


Yus Papí: Shuarjai
Yus Yamaram Chicham
Najanamu



New Testament in Shuar (EC:jiv:Shuar)

Yus Papí: Shuarjai Yus Yamaram Chicham Najanamu New Testament in Shuar (EC:jiv:Shuar)

copyright © 2012 Wycliffe Bible Translators, Inc.

Language: Shuar

Translation by: Wycliffe Bible Translators, Inc.

Shuar [jiv], Ecuador

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Shuar

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

Contents

MATEU	1
MĀRKUS	51
RŪKAS	83
JUAN	136
TŪRAMU	173
RŪMANAM	224
1 KURINTIUNAM	244
2 KURINTIUNAM	264
KARASEANAM	277
IPISIUNAM	285
JIRIPIUSNUM	292
KURUSENAM	297
1 TISARŪNIKIANAM	302
2 TISARŪNIKIANAM	307
1 TIMIUTĒUN	310
2 TIMIUTĒUN	316
TITIUN	320
JIRIMIŪNKAN	323
ISRAERNUM	325
SĀNTIAK	340
1 PĪTIUR	346
2 PĪTIUR	353
1 JUAN	357
2 JUAN	362
3 JUAN	363
JŪTAS	364
APUKARĪPSIS	366

Yúsan Shiir Chichamen MATEU aarmia nu

Jesukrístu weat̄ri (Rúkas 3.23-38)

¹ Jesukrístu weat̄ri ju áiniawai. Tura ashí nan̄kaamas ti uunt weat̄ Tawitcha Apraámsha áiniawai. ² Apraáma uchirí Isak. Tura Isaka uchirí Jakup. Jakupa uchirísha Jutá ni yachijíai. ³ Tura Jutá uchirín Páresan tura Sarancha Tamar jurermiayi. Páresa uchirísha Esum, nuna uchirísha Aram. ⁴ Nuna uchirísha Aminiatáp. Nuna uchirísha Nasun. Nuna uchirísha Sarmun. ⁵ Sarmun̄ka uchiríncha Púusan Raap jurermiayi. Puusa uchirín Uwitian Ruut jurermiayi. Uwitia uchirísha Isai. ⁶ Nuna uchirísha uunt akupin Tawit. Uunt akupin Tawitia uchiríncha Sarumún̄kan Patsepa jurermiayi. Patsepasha emka Uríasa nuweeyayi.

⁷ Sarumún̄ka uchirí Rupuam. Nuna uchirísha Apías. Nuna uchirísha Asa. ⁸ Asa uchirísha Jusapát. Nuna uchirísha Juram. Nuna uchirí Usías. ⁹ Usías uchirí Jutam. Nuna uchirí Akas. Nuna uchirí Esekías. ¹⁰ Esekías uchirí Manasés. Nuna uchirí Amun. Nuna uchirí Jusías. ¹¹ Jusías uchirí Jekunías ni yachi armia nujai. Nui Papirúnianmaya shuar Israer shuaran mesetjai nupetkar Papirúnia nun̄kanam achirar júkiarmiayi.

¹² Nu ukunman̄ka Jekunías uchirí Saratiár akiiniamiayi. Tura nuna uchirí Surupapír. ¹³ Surupapíra uchirí Awiut. Nuna uchirí Iriakím. Nuna uchirí Asur. ¹⁴ Asura uchirí Satuk. Nuna uchirí Akim. Nuna uchirí Eriut. ¹⁵ Eriuta uchirí Ereasár. Nuna uchirí Matan. Nuna uchirí Jakup. ¹⁶ Jakupa uchirí Jusé Marí áishriya nu. Marisha Jesusan jurermiayi. Nu Jesuska shuaran uwemtikiartin asa Kristu tu anaikiamuiti.

¹⁷ Tuma asantai Apraámnumia Tawitnium Jesusa weat̄ri katurse (14) áiniawai. Tawitniumiasha Papirúnianam jukimiumma nuisha katurse weat̄ áiniawai. Papirúnianam jukimiummayasha Krístunam ataksha katurse áiniawai.

Jesukrístu akiiniamu (Rúkas 2.1-7)

¹⁸ Jesukrístu akiiniamu júnis ámiayi. Ni nukurí Marí Jusejai anajmanairuyayi. Tura tsaniatsain̄ Yusa Wakaní ajaprumtikiamiayi. ¹⁹ Ajaprukmetaisha Jusé Marin iniatsaatsuk nin ajapatniun enentáimpramiayi. Tura ti péñker asa aya iniaisatniun wakerimiayi aents nekainiatsain̄. ²⁰ Nuna tu enentáimia pujái, mesekranam Yusa suntari tarí chicharuk tímiayi “Juséá, ame weat̄rum Tawitchakait. Tuma asam Marijiaj nuatnaikiatin ashamkaip. Uchin jurertatna nuka Yusa Wakaníniuiti. ²¹ Uchin áishman̄kan takustatui tura nuna naari JESUS anaikiattame. Ashí ni shuarín ni tunaariya uwemtikiartin asa Jesus anaikiatniuiti” tímiayi.

²² Yus ni etserniurijiaj yaunchu timia nu uminkiatu tusa nu túrunamiayi. Juna áamtikramiayi:

²³ “Nuwa natsa ajapruktatui tura uchin takustatui. Nuna náarisha Emanuéer ananiaktatui.” Tu áarmaiti.

Emanuéersha nu chichamnum “Yus iijiaj pujuwiti” tawai.

²⁴ Jusesha mesekranmaya shintiar Yusa suntari timia núnisan̄ Marin nu-atkamiayi. ²⁵ Tura uchin júreatsain̄ tsaninchamiayi. Tura jurermatai uchin Jesus anaikiamiayi.

2

Ti neka apach Jesusan eqkarmiania nu

¹ Jutía nunkanam Pirin pépru ana nuí Jesus akiiniamiayi. Nuísha nú nunka akupniuri Irutisauyayi. Akiiniamtai ti neka apach nantu tátainmaaniya Jerusaréñ péprunam táarmiayi. ² Taar inintruiniak “¿Israer shuara úunt akupniuri tuj akiiniait? tiarmiayi. Nantu tátainmaani pujaati ni yaari wáinkiamji. Tura tikishmatratai tusar winiaji” tiarmiayi.

³ Irutis nuna antuk nusháa enentáimpramiayi. Tuma asamtai ashí Jerusaréñnumiá shuarsha antukar nusháa enentáimprarmiayi. ⁴ Irutis nuikia ashí Israer-patri uuntrincha tura yaunchu akupkamun jintinniuncha untsukarmiayi. Tura Kristu akiiniatniurín inintrusmiayi. ⁵ Tutai chichainiak “Jutía nunkanam Pirin pepru ana nuí akiiniatniuiti, tiarmiayi. Yaunchu Yúsnan etserin tu áaruuti:

⁶ “Jutía nunkanam, Pirin pepru, ishitiápchich ana nuyá nekas uunt akupin winittiwai. Nii ashí Israer shuaran, Wíi shuar ásarmatai, péñker wáinkiattawai,” tawai Yus.” Tu tiarmiayi.

⁷ Nuna tuíniakui Irutis ti neka apachin úusan, urutía yaa emka wáinkiamarum tusa aniasarmiayi. ⁸ Nuyá Pirinnum akupeak “Nuí werum uchi péñker inintrusrum wáinkiatarum. Tura wáinkiarum ujatkataram. Wisha werin tikishmátuutaj” tímiayi.

⁹⁻¹⁰ Tutai ti neka apach wearmiayi. Tura yaa, yajaya wáinkiarmania nu, tuke eem wémiayi. Tura yaan wáinkiar ti wararsarmiayi. Tura nú yaa uchi pujumia nuí ejeniarmiayi. ¹¹ Jeá wayawar uchincha ni nukurí Maríjjai wáinkiararmiayi. Tura uchin tikishmatrarmiayi. Nuyá ni kajuntriyan kurincha, mirá kunkuinniasha, chíkich kunkuinniasha súsarmiayi. ¹² Nuyá mesekranam Yus “Irutisaini weerap” tutai chíkich jintianam waketkiarmiayi.

Ejiptunam pisaamu

¹³ Ti neka apach waketrantai Yusa suntari mesekranam Jusen ujakmiayi. “Nantakim uchi ni nukuríjjai Ejiptu nunkanam jukim nuí pujustá. Irutis uchin máataj tusa eqaktatui. Tura ukunam ankant ajasmatai ujaktajme” tímiayi.

¹⁴ Tutai Jusé kurat shintiar nú káshik uchincha nukuríjjai Ejiptunam jukimiayi. ¹⁵ Irutis jáatsain nuí pujusarmiayi. Ejiptunam pujusmatai Yus yaunchu timia nu uminkiamiayi. Iis, Yúsnan etserin aak tímiayi:

“Ejiptunmayaan winia Uchirun untsukmajai.”

Tu áarmiayi.

Irutis uchin máawarat tusa akupkamu

¹⁶ Irutissha ti neka apach nin ananka yajá waketran nekáa ti kajekmiayi. Ti kajek ashí áishmanchin Pirinnumsha tura yantamach pujuarmia nunasha maawaarat tusa akupkamiayi. Ti neka apach ujakmia nuna enentáimias ashí jimiará uwin takakun tura nú uchichin máawarat tusa akupkamiayi. ¹⁷ Nuka Yusnan etserin Jeremías aarmia nu uminkiamiayi. Juna áarmiayi:

¹⁸ “Ramá nunkanam ti úutainiak uur ajainiawai. Raker ti uutu asa atsankrachminiaiti ni uchirí jákarmatai.” Tu áarmiayi.

¹⁹ Tura Irutis jakamtai Yusa suntari mesekranam Jusen ujakmiayi.

²⁰ “Uchin máataj tiarmia nuka jákarai. Yamaikia ataksha uchi ni nukuríjjai jukim Israer nunkanam waketkitia” tímiayi. ²¹ Tutai Jusé nantaki uchincha nukuríjjai jukin Ejiptunmaya Israer nunkanam waketkiarmiayi. ²² Túrasha Irutisa uchirí Arkiráu Jutía nunkanam uunt akupin ajasun nekáa nuí wétinian

aránkámiayi. Mesekranmasha ujakma asa nuí pujutsuk Kariréa nunkanam wémiayi. ²³ Nuí jeá Nasarét péprunam pujusmiayi. “Nasarénumiá átatui” Yusnan etserin yaunchu tu etserkamu nujai uminkiamiayi.

3

Imiakratin Juan atsamunam etserkamiania nu (Márkus 1.1-8; Rúkas 3.1-9, 15-17; Juan 1.19-28)

¹ Nuyá imiakratin Juan Jutía nunkanam aents atsamunam etserki támiayi. ² “Enentáim yapajíatarum. Tsawant ishichik ajasai Yus juí akupin ajastin.” Tu etserkamiayi.

³ Nú Juan kan yaunchu Yúsnan etserin Isayas juna áarmiayi: “Shuar atsamunam aents untsumui. Untsumuk “Atumí enentái Uunta jinti iwiarturtarum tura naka awajsatarum” tawai.” Tu áarmiayi.

⁴ Nu Juan sha kamiyu ure najantramun entsauyayi. Emenmamkesha nuapeyayi. Tura yutai-títikriátsnasha chinijjai yúuyayi. ⁵ Tura Jerusarén péprunmaya shuarsha tura ashí Jutía nunkanmaya shuarsha Jurtan entsanam matsamiarmia nú shuarsha mash Juán kan tariarmiayi ni chichamen anturkatai tusar. ⁶ Tura ni tunaarin paant etserkarmatai Juan Jurtan entsanam imiainiarmiayi.

⁷ Juan sha Pariséuncha Satuséuncha imiatti tusa wininian wáiniak tímiayi “Napia áaniutirmincha, ¿ya atumniasha ti asutniátniunmaya uwempratniuncha ujatmakmarum? tímiayi. Asutiátin tsawant ishichik ajasai. ⁸ Tuma asamtai enentáim yapajíamuitkiuinikia pénger wekaamurmijjai paant iniakmatarum. ⁹ Atumsha “Íikia Apraám weeitji” tu enentáimtumasairap. Nujai uwemprashtatrome. Yus wakerakka ju kayan Apraáman tiran ki najankainti, tímiayi. ¹⁰ Numi ajaktinia áintsan kampuwarin jacha atuttsamuiti. Tura numi pénger nereatsna nuka tsupikia jinium apeamu ártatui. ¹¹ Wikia aya entsajain imiajrume atumi enentái yapajíawakrumin. Antsu winia ukuruí winiana nuka pénger awajtamsataj tusa imiantinia áanis tura já áanis Yusa Wakanin enketramprattarme. Wijjai nan kaamantu asamtai wikia tsuntsumpruan ni sapatrínkisha atitrachminiaitjai. ¹² Aruusa nerejai túruinia áintsan átatui. Awajtiutairin achikiuiti tura nujai saepen awajtitiawai. Tura neren pénger ikiustatui, antsu saepénka jinium apeatawai. Nu jisha tuke kajinchaiti.” Tu tímiayi Juan.

Juan Jesusan imiaimiu amia nu (Márkus 1.9-11; Rúkas 3.21-22)

¹³ Nuyá Jesus Kariréa nunkanmaya winis Jurtan entsanam támiayi Juan imiatti tusa. ¹⁴ Juan sha emka nakitiak Jesusan tímiayi “Ame winia imiatmini-aitme. Túrutanniaiatmesha ¿urukamtai winia tarutniunm?” tímiayi.

¹⁵ Tura Jesus tímiayi “Ántsan asati yamaikia. Núnisrik ashí Yus akupkamu umirkatniuitji.” Tutai Juan iniaisamiayi. ¹⁶ Tura Jesus imiani entsaya jíinkímtai nayaimpi uranmiayi. Tura Yusa Wakaní yámpitsa áintsan Jesusan tarimiayi. Niisha wáinkíamiayi. ¹⁷ Túramtai nayaimpinmaya Yus chichaak “Juka winia Uchiruiti. Ti aneamuiti. Ti shiir enentáimtajai” tímiayi.

4

Uunt iwianch Jesusan anankataj tímiania nu (Márkus 1.12-13; Rúkas 4.1-13)

¹ Nu túrunamtai Yusa Wakaní Jesusan iwianchjai nekapmamtiktsatta aents atsamunam jukimiayi. ² Nuí kuarenta (40) tsawant, káshisha tsawajsha

yurumtsuk pujak tsukarmiayi. ³ Nui uunt iwianch Jesusan nekapsataj tusa tarí tímiayi “Nekas Yusa Uchirínkiumka ju kaya apatuk najanata.”

⁴ Tutai Jesus tímiayi “Yus-Papinium áarmaiti:
“Aents aya apatkujain iwiaaku pujuschamniaiti. Antsu Yus táman enentáimtuiniak nekas iwiaaku pujusartatui” tawai” tímiayi.

⁵ Tutai uunt iwianch Jerusaréñ péprunam jukí Yusa Uunt Jee cháikín iwiak ⁶ tímiayi “Nekas Yusa Uchirínkiumka juya akaikim iniaata. Kame Yus-Papinium áarmaiti:

“Yus ni suntarín akatar akúptúrmaktatui. Nawemin kayanam ajiintsurnin wenkurmaktatui” tawai” tímiayi.

⁷ Tutai Jesus tímiayi “Núnisan Yus-Papinium áarmaiti:
“Ame Úntrum Yus “Nekapsataj” tiip” tawai” tímiayi.

⁸ Ataksha uunt iwianch naint yakí wájakmanum iwiakmiayi tura nuyá ashí nunkanmaya péprun shiira nuna iniaktusmiayi. ⁹ Tura tímiayi “Winia tikishmatrurakminkia juna mash amastatjai.”

¹⁰ Tutai Jesus tímiayi “Werumta, uunt iwianchi. Yus-Papinium aarma awai:
“Ame Úntrum Yúsak tikishmatrata tura Niniki shiir awajsata” tawai” tímiayi.

¹¹ Tutai uunt iwianch Jesusan ikiuak wémiayi. Túramtai Yusa suntari tariat atsumamurín súarmiayi.

*Jesus Kariréa nunkanam etserkamiania nu
(Márkus 1.14-15; Rúkas 4.14-15)*

¹² Juan sepunam enketui taman antuk Jesus Kariréa nunkanam wémiayi. ¹³ Tura Nasarét péprunam pujutsuk Kapernáum péprunam we pujusmiayi. Kapernáumsha Kariréa antumianka kánmatkarin pujumiayi. Ti yaunchusha Jakupu uchirí Sapurúnsha tura Niptarísha nu nunkanak nu pujustaitsar achikiaruyayi. ¹⁴ Jesus nuna túramtai yaunchu Yúsna etserin Isayas aarmia nu uminkiamiayi. Juna áarmiayi:

¹⁵ “Sapurúnsha Niptarísha nayaantsanam tíjiuch Jurtañ entsa amainini nunkan achikiarumiayi. Nuka Kariréaiti Israer-shuarsha matsatainia nu. ¹⁶ Nu aents kiritniunam pujuiniayatan ti tsáapninian wáinkiarumiayi. Jákatniunam pujuiniaí tsáapin tsáapnirmiayi.” Tu áarmaiti.

¹⁷ Nuyá Jesus étseruk tímiayi “Tunaarum enentáimturum enentáim yapajáatarum. Ju nunkanam Yus akupkatin tsawant ishichik ajasai.”

*Jesus kuatru aents namakan achinian ni unuiniamurí ajasarat tusa achik-
miania nu
(Márkus 1.16-20; Rúkas 5.1-11)*

¹⁸ Jesus Kariréa antumianka kánmatkarin wesa jimiará áentsun nuámtak yáchinniun wáinkíamiayi. Chikichik Antresauyayi, chikichcha Semunkauyayi. Nu Semun núnisan Pitru náartiniuyayi. Namakan achin ásar namakan nekajai nankiak yujaarumiayi. ¹⁹ Nuna Jesus wáinkiar tiarmiayi “Nemartustarum. Túrakrumin shuarsha Yusna arti tusan yamáí namak achíarmena núnisan shuaran-əəu awajsatjarne.” ²⁰ Tutai ni nekarin ikiukiar Nin nemariarmiayi.

²¹ Nuyá ishichik wésan ataksha nuámtak yáchinniun wáinkíamiayi. Jakupu Juanjai mai Sepetéu uchirí áarmiayi. Niisha kanunam enkemsar ni nekarin ni aparíjiaí iwiarainiak pujuriarmiayi. Tura Jesus “Nemartusta” tutai ²² nu chichamaik kanuncha tura aparíncha ikiukiar Jesusan nemariarmiayi.

*Jesus untsurí shuaran jintintiamiania nu
(Rúkas 6.17-19)*

²³ Ashí Kariréa nunkanam Jesus Israer-shuar iruntainiam etserki wémiayi. Yus ju nunkanam akupkatin chichaman etserkamiayi. Tura untsurí

sun̄kurjai jáinian ashí tsuármiayi. ²⁴ Ashí Siria nun̄kanam Jesus tsuákratman nekaawar ashí nán̄kamas sun̄kurjai wáitin armia nuna Jesusan tsuarti tusa itiararmiayi. Ashí jaancha, najaimiancha, yajauch wakantrukuncha, wáuruncha, tampemaruncha Jesus tsuármiayi. ²⁵ Tura untsurí shuar Jesusan nemariarmiayi. Kariréa nun̄kanmayasha, Tekapurisnumiasha, Jerusaréñ péprunmayasha, Jutía nun̄kanmayasha, Jurtan̄ entsa amainiyasha Jesusan nemariarmiayi.

5

Náinnium Jesus etserkamu

¹ Jesus untsurí shuar káunkarun wáiniak náinnium waka nuí pujusmiayi. Tura ni unuiniamurísha taar pujusarmiayi. ² Nuyá Jesus júnis unuiniamiayi.

Warastin ainia nu (Rúkas 6.20-23)

³ “Ame wakanim atsumamu nekamarum kakaram ajasrum warastarum. Tuma asarum Yus akupeamunam pachiinniuitrume. ⁴ Kúntuts pujarum nu warastarum. Yus atsañtamprattarme. ⁵ Péejchach enentáimtumarmena nu warastarum. Yus ashí nun̄kan amastatrume. ⁶ Eseer wekasataj tusa aya kitiamarum nu warastarum. Yus imiktamprattarme. ⁷ Waitnen̄kratniutiram warastarum. Yus waitnentrampattarme. ⁸ Péñker enentáimniutiram warastarum. Yus wáinkíáttarme. ⁹ Chicham iwiarin árum nu warastarum. Yusa uchirí turamartatui. ¹⁰ Péñker túrakrumin yajauch awajtamainiakui warastarum. Yus akupeamunam pachiinniuitrume. ¹¹ Wíi shuar asakrumin katsekramainiakui sha, itit awajtamainiakui sha, tura ashí tsanumprutmainiakui sha warastarum. ¹² Núnisañ yaunchu Yúsna etserin armia nunasha túrawarmiayi. Túramtai shiir enentáimkiuram warastarum. Nayaimpiniam ti péñker akinkíattarme’ tímiayi.

Ju nun̄kanam átum tsáapnia áintsarum tura weeya áintsarum árum (Márkus 9.50; Rúkas 14.34-35)

¹³ ‘Átumka ju nun̄kanam wee ana áintsanketrume. Tura wééaitiat jeakchaitkiun̄ka míchuiti. ¿Nusha itiur yuámniak ati? Antsu ántraití. Tuma asamtai aq̄ najatai tepet tusar ajapashtinkíait’ tímiayi.

¹⁴ ‘Átumka ju nun̄kanam shiripkia áintsanketrume. Náinniumka pepu úumkachminíaiti. ¹⁵ Núnisañ shiripik ekeemakam kajuñnum en̄keatsme. Antsu yakí sukúatsmek ashí jeñam ana nu paant atí tusam. ¹⁶ Núnisañ atumsha Yusjai péñker túramu paant atí. Tura ashí aents nuna iisar niisha Yus Apan shiir awajsartatui’ tímiayi.

Yaunchu akupkamun pachis Jesus unuiniamiania nu

¹⁷ ‘Muisais akupkamuncha tura yaunchu Yúsna etserin etserkarmia nuna ántar awajsattawai” turutiirap. Antsu nuna Wikia umiktaj tusan táwitjai. ¹⁸ Nekasan tájarme. Ashí túrunatniua nu amúatsain̄ nu akupkamu ishichkisha yapajniáshtatui. Nayaimpisha tura nun̄kasha tuke amúatsain̄ nu akupkamusha amuukashtatui. ¹⁹ Nu asamtai shuar chikichik akupkamun, yúpichuch ana nunaksha, umirchakka tura chíkich shuaran umirkashinian unuiníakka Yus nekas akupin paant ajastatna nuí nú shuar uunt áchattawai. Antsu ashí shuar akupkamun umíana nu tura chíkich shuaran umirkatniun unuiniana nusha Yus nekas akupin paant ajastatna nuí, nu shuarka uunt átatui. ²⁰ Tuma asamtai Yus akupeamunam pachiinkíataj tákumka Pariséujai nan̄kaamas tura akupkamu jintinniujai nan̄kaamas esera wekasatniuitrume’ tímiayi.

*Kajeamun pachis Jesus unuiniamiania nu
(Rúkas 12.57-59)*

²¹ ‘Yaunchu tiniu armia nu ántichukaitrum: “Maṅkartuawairap. Maṅkartana nuka asutniátniuiti” tiniu ármiai. ²² Tura Wisha tájarme: Shuar ni yachin aya kajerakka nusha asutniátniuiti. Ni yachin kátsekea nuka akupniunam junaktiniaiti. Tura ni yachin “netsé” tákunka jinium akupnakminiaiti.’

²³ ‘Tuma asamtai Yus susataj tusam wakerakum tura ame yatsum ámin itit enentáimturman enentáimpramka, ²⁴ suamu nuḷ ikuakum emka ame yatsum werim niijjai iwiarata. Turam waketkim Yus suam nu susata.’

²⁵ ‘Shuar úuntnum júramkuinkia jintian wesam niijjai iwiarata úuntnum ejetamtsain. Túrachakminkia úuntnum surutmaktatui tura niisha suntarnum surutmaktatui tura sepunam enketmattawai. ²⁶ Tura nekas tajai, nuḷ enkemamka ashí rearchisha akikmachkumka jíinkishtatme’ tímiayi.

Tsanirmatniun pachis Jesus unuiniamiania nu

²⁷ ‘Yaunchu tiniu armia nu ántichukaitrum: “Tsanirmawaip.” ²⁸ Tura Wisha tájarme: Shuar nuwan tsanirmataj tu iiska nuḷkia ni enentain tsanirmayi.’

²⁹ ‘Tuma asamtai ame jimi tunaanum yajauch awajtamkuinkia ukuinkiam yaja ajapata. Ashí ame ayashim jinium esaatsain aya chikichik ayashmi muchitmarḷ emesratin péṅkeraiti. ³⁰ Ame ewejmesha untsuurmetiat tunaanum ajunmakuinkia tsupikiam yaja ajapata. Ashí ame ayashim jinium esaatsain aya chikichik ayashmi muchitmarḷ emesratin péṅkeraiti.’

*Nuwa ajapatniun pachis Jesus unuiniamiania nu
(Mateu 19.9; Márkus 10.11-12; Rúkas 16.18)*

³¹ ‘Núnisan yaunchu tiniu ármiai: “Shuar ni nuarin ajapatniun wakera nuka papí najana susati.” ³² Tura Wisha tájarme: Shuar ni nuarin tsanirmachun ajapeakka nuwan tsanirmamtikiaiti. Tura ajapamujai nuatnaiyakka nuka tsanirmaiti.’

Jesus aya nekasa nu titinian unuiniamiania nu

³³ ‘Núnisan yaunchu tiniu ármiai: “Yusa naari pachisan turattajai” tákumka nekas takamtsuk umiktiniaitme.” ³⁴⁻³⁷ Tura Wisha tájarme: Áyatik “Ee” tákumka tura “Atsá” tákumka wáitrutsuk nuke titiá. Támena nu nekas umiktaj takum ame nú arant pachistiniaitkiumka nuka yajauchiiti, iwianchnumiaiti. Ti nekas tajai tusam nayaim pachischatniuitme. Nuka Uunt Yus pujutainti. Nunkasha pachischatniuiti Yusa tarimtaiari asamtai. Jerusaren péprusha pachischatniuiti Uunt Akupin pujutai nuḷ asamtai. Múukmesha pachischatniuitme. Chikichik intiashkesha pújusha mukusasha awajsachminiaitme. Áyatik nekasa nu páchitsuk titiá.’

*Ikkiatniun pachis Jesus unuiniamiania nu
(Rúkas 6.29-30)*

³⁸ ‘Yaunchu tiniu armia nu ántichukaitrum: “Shuar máanikiar jii apujtukka niisha apujtuktiniaiti. Tura naj akarkasha ni najsha akarkatniuiti.” ³⁹ Tura Wisha tájarme: Yajauch shuar taritairap. Antsu ame yapimin ijiutmam-tai áatú yapimsha tsanatkata. ⁴⁰ Tura pushirmin jurutramkitiaj tákuisha sakurmesha susata. ⁴¹ Tura káarkanacha chikichik kirumitruk jurutkitia túramkui ámeke jimiará kirumitru ejeeta. ⁴² Seatmana nu susata. Ikiatmakuisha páchitsuk ikiasta.’

*Nemasri aneetniun Jesus unuiniamiania nu
(Rúkas 6.27-28, 32-36)*

⁴³ ‘Núnisan tiniu armia nu ántichukaitrum: “Ame shuarum aneeta tura nemasrumka kajerkata.” ⁴⁴ Tura Wisha tájarne: Nemasrum aneetarum. Yajauch chichartamna nusha shiir awajsata. Nakitramana nusha nawamkata. Tura katsekramainiana nu tura yajauch awajtamainiana nusha Yus áujtusarta. ⁴⁵ Atumsha nu túrakrum atumí Apari nayaimpiniam pujana nu túrana áitkiasrumek tújarne. Iista, Yus yajauch shuarnumsha péñker shuarnumsha tsáapin awajmatkiatsuk. Núnisan yumincha yajauch shuar pujuiniamunmasha péñker shuar pujuiniamunmasha yútumtiktsuk. ⁴⁶ Aya atumin anenmainia nuke aneakmesha ¿yaki akirmakat? Yajauch shuarsha nuna túrin áiniawai. ⁴⁷ Aya ame yatsumek shiir chichaakmekka ¿warí péñkerak túram? Yus-shuarchasha nuna túrin áiniawai. ⁴⁸ Nu asamtai atumí Aparí Yus nayaimpiniam pujana nujai métek ti péñker átiniaitrume.’

6

Pénker túratniun Jesus unuiniamiania nu

¹ ‘Ashí íimiainiañ aya shuar iirsarti tusarum Yusna nu takasairap. Tu takaakrumniñkia Yus Apa nayaimpiniam pujana nu penké akirmakchat-tarme. ² Nu asamtai shuar atsuma nu yayiakmekka ashí shuar ujakairap. Anankartin ainia nuka iruntainmasha tura pepru jintí wekasasha ashí íimiainiañ shiir túrajai tusar nuna túrin áiniawai. Júnasha “pénker túrawai” tu enentáimturarti tiniu ásar Yus akíatsañ aya tu enentáimturmajañ akinkiaruiti, nekas tajai. ³ Antsu átumka atsumainia nu yayiakmekka penké úukam túrata. Chikichkisha nu yáinman nekaashti. ⁴ Úukam túrakminkia ame Apa Yus úukman wainia nu, nuna akirmaktatui.’

*Yus áujsatniun Jesus unuiniamiania nu
(Rúkas 11.2-4)*

⁵ ‘Atumsha Yus áujeakrumsha ántar chichamtin ainia núnis áujsaairap. Nu shuarka iruntainmasha tura pepru jintísha shuar iirsarti tusa wajakar Yúsan áujin áiniawai. Nekasan tájarne, Yus akíatsañ aya nu iismajañ akinkiaruiti. ⁶ Tura ame Yus áujeakmekka ame kuárturmin wayam waiti epenim nuñ amek ame Apa Yus áujsaata. Nuna ame Apa Yus úuka túramu waitma asa akirmaktatui.’

⁷ ‘Yus áujeakmesha ántram esaram áujsaip. Yúsan nékainiatsna nuka “Esaram áujeakuinkia Yus anturtuktatui” tu enentáimainiawai. ⁸ Niiññai métek ajasairap. Átumka seatsrumniñ Yus Apa átum atsumamun nékawai. ⁹ Nu asamtai Yus áujkuram júnis títiniaitrume:

‘Aparu Yus, nayaimpiniam pujamna nu, ii Aparínme. Ame náarmincha shuar ántar pachischarti. ¹⁰ Ashí áentsnum ame akupkatin tsawantrum wari jeati. Ame wakeramuram nayaimpiniam umikma ana núnisan ju nunkanmasha uminkiatí. ¹¹ Aparu, ii yurumkarí ashí tsawant amasta. ¹² Tura winia nemasrun tsankurajna núnismek, Aparu, winia tunaaru tumashrishasha tsankurturta. ¹³ Tunáa wakeruktin tsankatrukaip. Antsu ashí tunaanumiá uwemtikrurta. Tuke ashí aents akupkamniaitme. Núnisam Amesha tuke ti kakarmaitme. Tura ti shíraitme. Tuma asakmin seajme. Nuke atí.’

¹⁴ ‘Amesha chikich shuar yajauch awajtamka nu tsankureakminkia Yus Apa nayaimpiniam pujana nu amincha tsankurtamprattawai. ¹⁵ Tura chikich tsankureachkumnñkia Yus Apasha ame tunaarmincha tsankurtamprashtatui.’

Ijiarmatniun pachis Jesus unuiniamiania nu

¹⁶‘Ijiarmarum Yus áujkurmesha wake mesekrum susuntrairap. Anan̄kartin shuar chíkich shuar “ijiarmaiti” tu enentáimtursarti tusa tuma áiniawai. Nekasan tájame, Yúska akiátsain̄ aya nujaī akikma áiniawai. ¹⁷ Antsu ámeká ijiarmamsha péñker temashmaram péñker jaupmitia. ¹⁸ Shuar ijiarmaiti tu enentáimturmasarain̄. Aya Yus Apak nekaattawai. Tura asa akirmaktatui.’

Kuítian pachis Jesus unuiniamiania nu

(Rúkas 12.33-34)

¹⁹⁻²⁰ ‘Jū nun̄kanmayā kuit ikiaun̄katniujaī nan̄kaamas nayaimpiniam kuit ikiaun̄kata. Jūin̄kia kayaā yúchakait tura mash meseatsuk. Tura kasasha wayá kasamtsuk. Antsu nayaimpinman̄ka kayaāsha yuatsui tura mash meseatsui tura kasasha wayá kasamtsui. ²¹ Kuíttrum ana nui enentáimtustatme. Tuma asam nayaimpiniam ikiaun̄kata.’

Ayash̄i tsáapn̄intri

(Rúkas 11.34-36)

²² ‘Ame j̄imijaī tsáapin̄ amiin̄ wayam̄niaiti. Tuma asamtaī ame j̄iimī péñkeraitkiuin̄kia amiin̄ tsáapin̄ wayá tuke tsáapniiti. ²³ Antsu ame j̄iimī ya-jauchitkiuin̄kia tsáapin̄ amiin̄ wayach̄min̄ asamtaī tuke kiritin̄ átatui. Núnisan̄ yajauchia nu wakerakmeká péñkera nu ame enentáim̄in̄ wayach̄min̄ asamtaī tuke kirit̄ ajastatui. Nu kirit̄cha imiá yajauchiti.’

Yussha kuitsha máimtek enentáimtuschan̄niaiti

(Rúkas 16.13)

²⁴ ‘Shuar jimiará úuntr̄in̄ umirkatniun̄ tujintiawai. Chikichan wakerak chikichnaka nakitrattawai. Chikichan umiruk chikichnaka umirkashtatui. Núnisan̄ átumka Yussha kuit̄cha máimtek enentáimtustin̄ tujinkiattarme.’

Yus ni uchir̄in̄ péñker wáinkiaiti

(Rúkas 12.22-31)

²⁵ ‘Tuma asamtaī tájarne: Wariniak yuataj wariniak umartaj tura wariniak entsartaj tusarum nuke enentáimsairap. Yus iwiaaku átinian amasu asa yurumkancha amaschan̄niakait. Tura jū ayash̄niasha najana asa entsatain̄cha amaschan̄niakait. ²⁶ Chin̄kisha enentáimpratarum. Yakí nanamainiak yurumkan arakmainiatsui. Tura juuk yurumkan ikiuiniatsui. Tuma ain̄ Yus Apa nayaimpiniam pujana nú Yusak áyureatsuk. Atumsha chin̄kia nú nan̄kaamaschakaitrum. ²⁷ Nu arant̄cha ti enentáimkiumsha ¿nujaī tsakartatmek?’

²⁸ ‘Nuikia ¿urukamtaī entsartin̄cha timiá enentáimprum? Iistá, kukujsha takachuitiat tura najanchaitiat ²⁹ ti shíirmach áiniawai. Yaunchu uunt akupin̄ Sarumún̄ ti shiir iwiarmamniuitiat kukujia tímianchayayi. ³⁰ Iis, nupa yamá tsakaawai tura kashin̄ aents tsupikiar̄ jinium epeenawai. Tuma ain̄ Yus ti shiir áentseatsuk. Nuna tura asa atumniasha nú péñker waitmakchattawak. ¿Urukamtaī Yus nekas enentáimtatsrum? ³¹⁻³² Jū nun̄kanam ana nu pachiki-airap. Chíkich shuar, Yúsán̄ nékainiatsna nu, warin̄ yuattaj̄i warin̄ umartataj̄i warin̄ entsartataj̄i nuna ti pachiiniawai. Tura atumsha tu enentáimsarum weerap. Ame Apa nayaimpiniam pujana nu ame atsumamurmin̄ nékawai. ³³ Tuma asamtaī Yusjaī shiir wekasatin̄ tura Yus akupkamu ana nu umiktin̄ emka enentáimsatarum. Túrakrumniñkia atsumamurmin̄ Yus suramsattawai. ³⁴ Kashin̄ átatna nujaī itiurchat enentáimsairap. Kashinkia nusháā itiurcha-trijjaī tsawarchattawak. Yamái tsawanta jujaī máakchakait.’

7

Chíkich sumamtikiawairap
(Rúkas 6.37-38, 41-42)

¹ ‘Chíkicha tunaari ti enentáimtusairap. Núnisan Yus atumí tunaari iirtam-sashtatui. ² Chíkich wárik sumamtikiatin enentáimkiumniñkia Yus núnisan sumamtikramattawai. Tura ame chíkicha túramuri nekapmarmena nú nekapkajain amincha nekapmarmattawai. ³ Tuma asamtai ¿itiurtsuk atumi jijn numi enketna auk ítskesha atumi yachí jijn tsuat enketusha iyarum? ⁴ Ame jiiimjin numi tuke enketajsha ¿itiurtsuk ame yatsumi jiiya tsuátan jurustajme tame? ⁵ Antar shuará, ame yáintaj tákumka emka ame jiiimjin numi enketna nu jusata. Nuyá paant iistatme yatsumi jijn tsuat enketna nu jurustin.’

⁶ ‘Ti shiira nuka yawá súsashtiniaiti. Nuna nakitrar amincha esat-michartimpiash. Kuítrumsha kuchi súsashtiniaiti. Aya najatrachartatuak.’

Yus seakmin suramsattawai
(Rúkas 11.9-13; 6.31)

⁷ ‘Yus seakrumin suramsattawai. Eakrumka wainkiattarme. “Winiajai” tákurmin awaintiamattarme. ⁸ Seana núnaka suíniawai. Eana nuka wáiniui. “Winiajai” tuinia núnaka awainiawai.’

⁹ ‘Ame uchiram apatkun seatmakui ¿kayaash súsaintiam? ¹⁰ Tura namakan seatmakui ¿napíash súsaintiam? ¹¹ Nuikia átum yajauchitirmesha atumi uchirí péñker ana nu tuke súuchakaitrum. Nuna nankaamas nuikia seakrumniñkia atumi Aparí nayaimpiniam pujana nu péñker ana nuna suramsashtatuak.’

¹² ‘Júnaka Muisaishsha Yúsnan etserniusha akupenawai: “Chíkich ámin túrutatí tusa wakerakmeke amesha núnismek túratá.” Tu akupenawai.’

Wañkaram jintiasha tura yupikiach jintiasha
(Rúkas 13.24)

¹³⁻¹⁴ ‘Wañkaram jintia awai. Wayatniusha yúpichuchiiti. Nuisha untsurí wáiniawai. Tura nusha menkakatniunam jeawai. Túrasha chíkich jintia awai. Nusha yupikiach asa itiurchataiti. Wayatniurisha yupikchiiti. Nuí ishichik wáiniawai. Tura nusha iwiaaku pujustinnium jeawai. Tuma asamtai tuke iwiaaku pujustaj tákurmeka yupipitin jintia achiktarum.’

Nerejai numi nekaatainti
(Rúkas 6.43-44)

¹⁵ ‘Aneartarum. Wáitruiniak “Wi Yúsnan étserjai” tuinia nu írunui. Pátatek murikiua áinis yúpichuch áiniawai tura ni enentáin nekas úunt-yawá áinis áiniawai. Pátatek shiir chichainiawai tura ni enentáin yajauch piakuiti. ¹⁶ Atumsha túramujai nin nekaatniuitrume. Naranmayá shuiya júukchamniaiti. ¿Tsachiksha kushinñkiapen nerektatuak? ¹⁷ Núnisan péñker numia nu tuke péñkeran nereatsuk. Tura yajauch numia nu yajauchin nereatsuk. ¹⁸ Péñker numi yajauchin nereatsui. Núnisan yajauch numi péñkeran nereatsui. ¹⁹ Yajauch numi ajakar tsupirar jinium apeashtinkiait. ²⁰ Tuma asamtai wáittrin ainia nuka túramujai nekanattawai.’

Ashikia Yus akupeana nuí jeachartatui
(Rúkas 13.25-27)

²¹ ‘Aya winia Apar nayaimpiniam pujana nuna wakeramurin umirin ainia nuke Yus akupeamunam pachiiñkiartatui. Chíkichka “Uuntá, Uuntá” turutainiyat nayaimpiniam jeachartatui. ²² Amuukatin tsawant jeamtai untsurí turutiartatui “Uuntá, Uuntá, ame náaram pachisar ashí nunkanam et-serkachmakají. Ame náarmesha pachisar yajauch wakancha jiiiki akupkamji.

Tura ame náaram pachisar aentsti tujintiamu túramji” turutiartatui. ²³ Nui chichainiakui “Werumtarum. Penke nékachuitjiarme. Aya yajauchitrume” títiatjai.

Pénker ukurma tura yajauch ukurma
(Rúkas 6.47-49; Márkus 1.22)

²⁴ ‘Shuar winia chichamprun antuk umirkañka nu shuar ti péñker enentáimniuiti. Niisha ju shuarjai méteketete. Jeá jeamuk kayanam ukurmai. ²⁵ Tura yumi ti yutuk entsa nujañkruamai tura nase ti kakaram umpuimiai. Túmain pukukachmai ni ukurmari kayanam ukuamu asamtai. ²⁶ Tura shuar winia chichamprun antuk umirtukchañka ju shuara núnisañ enentáimchaiti. Jeá jeamuk náikminiam ukurmai. ²⁷ Tura yumi yutuk entsa nujañkruamai tura nase ti kakaram umpuimiai. Túmakui jeá mash saanaki iniaamai” tímiayi Jesus.

²⁸ Jesus nuna tinia amukmatai ashí shuar ti enentáimprarmiyai. ²⁹ “Yusa kakarmarijiai unuitiamtsujik. Israer-shuara jintinniurinkia núnis unuiniainiatsui” tiarmiayi.

8

Jesus tunamarun tsuarmiania nu
(Márkus 1.40-45; Rúkas 5.12-16)

¹ Jesus muraya támatai untsurí shuar Nin nemariarmiayi. ² Nui shuar tunamaru Jesusan jearin tikishmatramiyai. Tura tímiayi “Uuntá, wakerakmekatsuáramniaitme.”

³ Tutai Jesus uwejéjai antin “Wakerajai. Péñker ajasta” tímiayi. Tutai tunamaru ni tunamarmari péñker ajasmiyai. ⁴ Tura Jesus tímiayi “Pai, penké etserkaip. Áyatik Israer-patri iniakmamsam Muisais timia nu susata ashí shuar nekaawarti tusam.”

Jesus suntara uchirín tsuarmiania nu
(Rúkas 7.1-10)

⁵ Jesus Kapernáum péprunam wayamtai apachi suntara kapitiántri Nin tarimiayi. ⁶ “Uuntá, tímiayi. Winia uchir tampemaru jeá tepes ti wait ajáa tepawai” tímiayi.

⁷ Jessusha “Ayu, winin tsuartajai” tímiayi.

⁸ Tutai kapitián tímiayi “Uuntá, Ame ti nankaamaku asam winia jearuí wayachminiaitme. Áyatik “Pénker ajásti” tákumin winia uchir péñker ajatrustatui. ⁹ Iista, winiasha akuptuiniatsuk tura wisha suntaran akupenatsjak. Juna “Wetá” takui wéawai. Tura chikichnasha “Winitia” tutai winiawai. Tura takartinian “Ju túratá” tutai umíawai.”

¹⁰ Kapitián nuna tutai Jesus ti enentáimiuk Nin nemarainian tímiayi “Nekasan tájarme, Israer-shuar Yúsan tímiatrus enentáimtin atsawai. ¹¹ Maa, yajaya untsurí shuar Yus akupeana nui jeawar Apraámjaisha Isakjaisha Jakupjaisha iruntrar yurumáwartatui. ¹² Tura Israer-shuar Yúsnun jeamnia áiniayat aa kiritniunam ajapnawartatui. Nui ti úutin tura ti wáitsatin átatui.”

¹³ Nuyá Jesus kapitiánin chicharuk “Jeemiin waketkitia. Nekas enentáimtusú asakmin uchiram péñker ajatramsattawai” tímiayi. Túramtai ni uchirí nu chichamtaik péñker ajatsamiayi.

Jesus Pitru tsatsarin tsuármiania nu
(Márkus 1.29-31; Rúkas 4.38-39)

¹⁴ Jesus Pitru jeen we Pitru tsatsarin tsuemujai jaa tepan wáinkiamiyai.
¹⁵ Tura ni uwején antinmatai tsuemun michatramiayi. Tura nuwá nantakin ashí ajamsarmiayi.

Jesus untsurí jáinian tsuármiania nu
(Márkus 1.32-34; Rúkas 4.40-41)

¹⁶ Kashi ajasmatai yajauch wakantrukarun Jesusan itiararmiayi. Tura nu yajauch wakanin chikichík chichamjai chicharas jiki akupiararmiayi. Ashí jáiniancha tsuárrarmiayi. ¹⁷ Yúsnan etserin Isayas “Ii pimpirmarincha ii sunkurincha jurutramkimiaji” yaunchu timia nu uminkiatu tusa nu túrunamiayi.

Jesus nemarsatin
(Rúkas 9.57-62)

¹⁸ Shuar untsurí Jesusan káutkarmatai “Entsa amain katiñtai” tímiayi.
¹⁹ Nui Israer-shuara jintinniurí Jesusan tarí tímiayi “Uuntá, Ámin páchitsuk nemarsatniun wakerajme.”
²⁰ Tutai Jesus tímiayi “Kujanchmasha ni waarin takaktsuk. Chinkisha pasunken takaktsuk. Tura Wi Yúsnumiãitiatan tepestiniur atsawai.”
²¹ Nin nemarniusha tímiayi “Uunta, emka winia aparun iwiarsan ikiuuttajai.”
²² Tura Jesus “Nemartusta, tímiayi. Wakannium jaka ainia nu jakan iwiarsarti” tímiayi.

Nasesha entsasha Jesusan umirkarmiania nu
(Márkus 4.35-41; Rúkas 8.22-25)

²³ Nuyá Jesus ni unuiniamurijiai uunt kanunam enkemámiayi. ²⁴ Nui nase ti kakaram umpuimtai antumian ti tamparintin ajasmiai. Tura entsa kanunam yarána piákmiayi. Tuma ain Jesus kanunam kanar tepemiayi. ²⁵ Nuyá ni unuiniamurí kurashim Jesusan ishintiarar tiarmiayi “Uuntá, wayaji. Kakaram ajachkumniñkia jakattaji.”
²⁶ Jesus tímiayi “¿Urukantai timiá ashamarum, Yus enentáimtutskesha?” Nuyá wajaki nasencha entsan cha chicharkamiayi. Tutai mash miaaku ajasmiai. ²⁷ Nuna ísar ni unuiniamurí ti enentáimsarmiayi. Tura tiarmiayi “Jusha ¿warí áentsuit? Nasesha entsasha Nin umirainiatsuk” tiarmiayi.

Jatara nunkanam Jesus yajauch wakantrukun tsuármiania nu
(Márkus 5.1-20; Rúkas 8.26-39)

²⁸ Nuyá Jesus entsá amaini katiñ Jatara nunkanam jeamiayi. Nui jimiará shuar yajauch wakantruku tuke iwiartainium pujú Jesusan tariarmiayi. Mai yajauch wakantruku ásar ti kajen ármiai. Tuma asamtai shuar nu jintianam nankaamachu ármiai. ²⁹ Niisha Jesusan wáinkiar kakantar tiarmiayi “¿Warí pujuram iijiai, Jesúsá, Yusa Uchiría. Tsawant jeatsain in amukratkataj tusamek taum?” tiarmiayi. ³⁰ Nui arant kuchi untsurí shushunmak yujaarmiayi. ³¹ Yajauch wakancha Jesusan seainiak “Jiki akupkartakmeka kuchiniam wayatin tsankatkartukta” tiarmiayi.

³² Tutai Jesus “Pai, wetarum’ tímiayi. Yajauch wakancha shuara enentáiya jinkiar kuchiniam enkemáwarmiayi. Túramtai kuchi wáurkiar arau utsanamiayi. Nuyá entsá iniañkar jakerarmiayi.

³³ Kuchí wáinniusha nuna ashamkar péprunam tseke wéarmiayi. Nui jeawar ashí túrunamun etserkarmiayi. Yajauch wakantrukun péñker ajasmancha etserkarmiayi. ³⁴ Nuyá ashí nú peprunmaya shuar Jesusan inkiuntai tusar ashinkiararmiayi. Tura inkiunkar ni nunkeya waketkiti tusar seawarmiayi.

9

Jesus emearun tsuármiania nu
(Márkus 2.1-12; Rúkas 5.17-26)

¹ Nuyá Jesus kanunam en̄kemar antumian̄ amaini katin̄miayi. Tura nūi ni péprur̄in Kapernáumnum jeamiayi. ² Nūi jeamtai shuar emearu jaan patak yanakin ejeetiarmiayi. “Tsuártatui” nekas tu enentáimtuinia ásarmatai Jesus jaan tímiayi “Uchirú, kakaram ajasta. Ashí ame tunaarum tsan̄kuramuíti.”

³ Takui Israer-shuara jintinniurī yajauch enentáimprar “Juka Yúsan ti yajauch chicharui” tiarmiayi.

⁴ Tu enentáimainian Jesus nekáa tiarmiayi “¿Urukamtai imiá yajauch enentáimprum. ⁵ Tua imiá yúpichuchit. Shuara tunaar̄in tsan̄kuratin yúpichuchikiait. Tura emearun “Nantakim wekasata” títin yúpichuchikiait? ⁶ Wi Aents Ajasua núchakaitaj. Ju nun̄kanam Wi tunaan asakátratniuitjai. Wátsek, nu nekaatarum tusan jūna iniakmstatjai.” Nuna tinia emearun “Wajaktia, tepetairam jukim jēemīin wetá” tímiayi. ⁷ Tutai emearu tsuámar nantaki ni jēen wémiayi. ⁸ Tura nuna ashí aents wáinkiar Yus kakarman shuáran susa asamtai ashamkar Yúsan shiir enentáimtusarmiayi.

Jesus nemartusat tusa Mateun achíawai
(Márkus 2.13-17; Rúkas 5.27-32)

⁹ Nuyá Jesus wémiayi. Nūi wesa Mateun kuit júutainium pujan wáiniak “Nemartusta” tímiayi. Tutai Mateu nuna ikiuak Jesusan nemarmiayi.

¹⁰ Nú ukunmasha Mateu jēen yurumuk pujaj̄i yajauch armia nu Israer-shuar untsur̄i káunkar Jesusa unuiniamur̄ij̄ij̄aj̄i irunar yurumiarmiayi.

¹¹ Pariséusha nuna íisar Jesusa unuiniamur̄in aniasarmiayi “¿Urukamtia atumí Uuntrī kuitia achinjaisha tunaarinniuj̄aj̄isha irunar yuruma?”

¹² Tura Jesus nuna antuk tímiayi “Pén̄ker ainia nuka tsuákratniun atsumainiatsui. Antsu jainia nu tsuákratniun atsumainiawai. ¹³ Werum jū aarma unuimiutarum:

“Murik maam Winia surusum nujaj̄i “máakete” tátsujai. Antsu waitnen̄kartutain wakerajai,” Yus-Papinium tu áarmaiti.

Wikia “pén̄keraitjai” tuńian untsuktaj tusan táchaitjai. Antsu tunáa shuar ni enentáin̄ yapaj̄iáwarat tusan táwitjai” tímiayi.

Ijiarmatniun Jesusan aniasarmiania nu
(Márkus 2.18-22; Rúkas 5.33-39)

¹⁴ Nuyá imiakratin Juan̄ka unuiniamur̄i Jesusan tariar aniasarmiayi. “¿Urukamtai iikia tura Pariséusha ijiarmaj̄i tura ame unuiniamurmeka ijiarmainiatsu?” tiarmiayi.

¹⁵ Jesus ayak tímiayi “Nuatma nampernum ipiaamu ainia nu ¿ajakra uutu wayamniakait? Yamái-nuatu pujakui úutchamin áiniawai. Núnisan̄ Wi pujakui ijiarmashtin áiniawai. Tura tsawant jeattawai nuatua áintsan̄ Wi junaktatjai. Antsu nūj̄kia ijiarmawartatui’ tímiayi.

¹⁶ ‘Mamuru pushí jaanakmatai yamaram tarach anujtukchatniuiti. Túramka nijiam yamaram tarach sumpeak mamushan chin̄kiá nuna nan̄kaamas jaaktatui. ¹⁷ Nijiamanch yamáí nawar nuap najanamun arutnum yaraachminiaiti. Túramka kariak nuap najanamun ijiakratniuiti, nijiamchisha ukaratniuiti, tura nuap najanamusha yajauch ajastiniaiti. Antsu yamaram nijiamanch yamaram nuap najanamunam yaraatniuiti. Nu túramka nijiamchisha nuap najanamusha mai pén̄ker ártatui.”

Jesus Jairu nawantrincha tura chíkich nuwan̄cha tsuármiania nu
(Márkus 5.21-43; Rúkas 8.40-56)

¹⁸ Jesus nuna taj Israer-shuara uuntri Jesusan tarí tikishmatar tímiayi “Winia nawantur jarutkayi, tura Ame winim ewejmijiai antintrukakminkia ataksha nantaktiatui.” ¹⁹ Tutai Jesus ni unuiniamurijiai wajakiar niijiai wearmiayi.

²⁰ Tura jintiá weenaj nuwá tuse (12) uwitin numpá ájapeak wáitias pujú asa Jesusa ukurini amainian ni pushirin antiñmiayi. ²¹ “Áyatik ni pushirin antiñnaka péñker ajastatjai” tu enentaimpramiayi. ²² Nuna nekáa Jesus ayantar nuwan tímiayi “Shiir enentáimprata, nawantru. Yus shiir enentáimtususu asam péñker ajasume.” Nu chichamtaik ni jáamuri péñker ajasmiayi.

²³ Nuyá Jesus uunta jeen jeamiayi. Tura nuñ charaatum ajainiancha tura jakan iwarsatai tusar péeman umpuiniiancha wáiniak ²⁴ tímiayi “Aa jíintratarum. Nuwáchikia jákachai antsu aya kanarai.” Penké jakan nekayat túratta nuna neka asa “aya kanarai” tímiayi. Takui aents Nin wishikrarmiayi. ²⁵ Tura nuna ashí jiiir Jesus jeá wayá nuwáchin uwejnium achik iniantkimiayi. Túram nantakmiayi. ²⁶ Nu túramu ashí nu nunkanam etsernarmiayi.

Jesus kusurun jímiaran tsuármiania nu

²⁷ Nuyá Jesus wéakui jimiará shuar jii kusuru untsunki weriarmiayi. “Uuntá, ii Uuntri Tawit ame weatrum asamtai in waitnenkarturta” tiarmiayi.

²⁸ Jesus jeá wayamtai jii kusuru tariarmiayi.

Tura Jesus aniasar “¿Juna túramniaiti túrutrumek?” tímiayi.

Niisha “Ee, Uunta” tiarmiayi.

²⁹ Tuíniakui Jesus ni jiiin antinkiar tímiayi “Átum nekas enentáimtarmena núnisan túrunati.” ³⁰ Nujai jii péñker ajasarmiayi. Nuyá Jesus “Etserkairap. Shuar penké nekáwarain” tímiayi. ³¹ Támaitiat jíinkiar Jesus túramun ashí nu nunkanam etserkarmiayi.

Jesus chichachun péñker awajsamiania nu

³² Nuyá wenaj shuar yajauch wakantruku chichachun Jesusan itiariarmiayi. ³³ Tura Jesus yajauch wakanin jiiiki awemamtai nu chichachu chichakmiayi. Ashí nuna íisar ti enentáimprarmiayi. Tura tiarmiayi “Yáunchusha Israer nunkanam jujai métek túramu penké atsuwiti.” ³⁴ Antsu Pariséuka yajauch enentáimtuiniak tiarmiayi “Nu shuar iwianchi uuntri kakarmarjiai yajauch wakanin jiiiki akupeawai.”

Jesus shuaran waitnentawai

³⁵ Jesus ashí péprunam we ni iruntairin wayá “Yus akupeana nuñ enkemátarum” tu etsermiayi. Tura ashí nánkamas sunkurjai jáiniancha tsuármiai. ³⁶ Shuaran íisar murik wáinchatia núnis pimpikiar tura kúntuts pujuinia asamtai waitnentrarmiayi. ³⁷⁻³⁸ Nuyá ni unuiniamurin tímiayi “Ju aents Yus-Chicham ujaktiniatji Yus-shuar ajasarat tusar. Nu takat ti núkap awai tura takarin ishichik áiniawai. Nu takatka júuktinia áintsankete. Júuktin tsawant jeamtai takau táasmatai takamtikin ujaktin átsuk takaun akupkat tusa. Atumsha núnisrumek Yus seatarum ni shuarin akupak áentsun júukarat tusarum.”

10

Jesus tuse (12) unuiniamurin achikmiayi tuke nemarsatniun

(Márkus 3.13-19; Rúkas 6.12-16)

¹ Nuyá Jesus tuse (12) unuiniamurin achik Yusa kakarmarin súsarmiayi yajauch wakanin shuara enentáiya jiiiki akupkatniun. Núnisan ashí sunkurjai jáinian tsuáartinian susamiayi.

² Ju áiniawai Jesus tuse (12) unuiniamurin achikiarmia nu: Emka Semun núnisan Pitru náartiniuyayi. Nuyá ni yachí Antres. Nuyá nuámtak yáchintin Jakupusha Juansha, Sepetéu uchirí armia nu. ³ Nuyá Jiripi, Parturumí, Tumas, Mateu. Mateusha kuítian achiniuyayi. Arpeu uchirí Jakupusha. Ripíu núnisan Tateu náartiniuyayi. ⁴ Ásumpí Semunsha nuyá Jútas Iskariúti Jesusan ukunam surukmia nu. Nu tuse (12) achikma ármiai.

*Jesus ni unuiniamurin etserkarti tusa akupkarmiania nu
(Márkus 6.7-13; Rúkas 9.1-6)*

⁵ Nu tuse (12) unuiniamurin Jesus júnis chicharak akupkarmiai. “Israer-shuarcha matsatmanum weerap. Samaria nunkanam péprunam weerap. ⁶ Antsu Israer-shuar murikiua áinis Yusaiya wáakaru ainia nu weritiarum. ⁷ “Tsawant ishichik ajasai Yus jú nunkanam akupin ajastin” tu etserki wetarum. ⁸ Tunamarusha chíchich sunkurjai jainia nusha tsuarterum. Jakasha iniantkitiarum. Yajauch wakancha shuara enentáiya jiki awematarum. Nu túratin kuítchajai kakaram susamuitrume, tuma asamtai atumsha ashí ánrarmek túratarum.’

⁹ ‘Kurisha ashí kuitcha jukiirap. ¹⁰ Uyuncha jukiirap. Sapatcha tura ushukrustincha jukiirap. Antsu chikichik pushí jukitiarum. Takau asakrumin yurumkan ajampramsartin áiniawai.’

¹¹ ‘Péprunam jearmesha pénker shuar wáinkiarum nu wayarum tuke nuin pujustarum. ¹² Nu jeanam wayamsha “Ju jea shiir atí” titiá. ¹³ Nekas pénker shuaraitkiunka shiir ajasarti. Antsu nu shuar pénker itiamachkunka shiir ajascharti. ¹⁴ Tura nánkamsan atumin awaintiamainiachkuinkia anturtamainiachkuinkia nuyá jinkitiarum. Nu shuar yajauch ásarmatai jinkirum atumí naweyá nunka japimiarum ikiuktiarum. Ni tunaari aents nekaawarat tusarum túratarum. ¹⁵ Nu shuaran nekapsatin tsawant jeamtai Yus asutiáshtatuak. Sutum péprunmaya shuara nankaamas Kumura péprunmaya shuarnasha nankaamas Yus asutiáttawai nu shuaran’ tímiayi.

Yajauch awajsatniun ujakmiania nu

¹⁶ ‘Aneartarum. Wisha murik yawanum akupkatniua áintsanak akupeajrume. Tuma asamtai shiir nawamkartin áyatrúm aneartarum. ¹⁷ Yajauch shuarjai aneartarum. Akupniunam juramkiartatui. Israer-shuar iruntainiam asutiamawartatui. ¹⁸ Wíi shuar asakrumin uuntnumsha tura nuyá akupniunmasha juramkiartatui. Núnisrum akupniuncha tura Israer-shuarchanचा winia chichamur ujaktatrume. ¹⁹ Tura akupniunam surutmakakrumnisha wariniak títiáj tu enentáimprairap. Nu uuntjai chichaakrumin Yus títinian jintintramattarme. ²⁰ Nuinkia átum enentáimmiájai chichaschattarme antsu atumí Apari Yusa Wakaní atumin chichamtikramsattarme.’

²¹ ‘Shuar ni yachincha máawarti tusa suruktatui. Apasha ni uchirín surukartatui. Uchisha ni aparín máawarti tusa surukartatui. ²² Tura Wíi shuar asakrumin mash mujramkartatui. Tura tuke katsuntea nu uwempratatawai. ²³ Chikichik péprunam yajauch awajtamainiakui chíchich péprunam pisartarum. Wi Aents Ajasuitjai. Tuma asan nekasan tájarme, átum Israer-shuar mashi ujatsrumniñ wantinkiatjai.’

²⁴ ‘Unuiniamuka nin unuiniana nuna nankaamaschaiti. Takarniusha ni uuntri nankaamaschaiti. ²⁵ Unuiniamuka nin unuinia nujai métek ajaska maak. Takarniusha ni únuntriñ métek ajaska maak. Wátsek, Winia atumí únuntrin “Iwianchi uuntri” túrutainiakui atumniasha nuna nankaamas yajauch turamtatui.’

Yúsak ashamkatniuiti
(Rúkas 12.2-9)

²⁶ ‘Tuma asamtai aentska ashamkairap. Ashí uukma nu paant nekanat-tawai. ²⁷ Ishishmasan kiritniunam ujaajrumna nu, tsawái kakantrarum et-serkatarum. ²⁸ Aya ayashin main ainia nu ashamkairap. Wakanin máachmin áiniawai. Antsu wakanniasha ayashniasha mai jinium emesramnia asamtai Yus ashamkatarum.’

²⁹ ‘Jimiará chin̄ki pen̄ké ishichik kuitjaj̄ surukmin áiniawai. Túmaitiat Yus tsan̄kateachkuinkia nun̄ká jaka iniainiatsui. ³⁰ Ame intiashmisha mash nekapmarmaiti. ³¹ Nu asamtai jákatin ashamkairap. Yusjaj̄ átumka ti untsurí chin̄kijijaj̄ nan̄kaamas péñkerchakaitrum.’

Jesus natsantrashtiniaiti
(Rúkas 12.8-9)

³² ‘Ashí shuar ashí íimiainiain̄ Winia natsantruiniatsna núnaka Winia Apar yakí nayaimpiniam pujana nuí natsantrashtatjaj̄. ³³ Antsu shuar íimiainiain̄ Winia natsantra núnaka Wisha yakí nayaimpiniam winia Apar pujana nuí natsantrattajaj̄.’

Jesusa chichamejaj̄ shuar akannartatui
(Rúkas 12.51-53; 14.26-27)

³⁴ ‘Ashí shuar nawamnaikiar shiir pujusarat tusan ju nun̄kanam táchaitjaj̄. Nuna túrat tusarum enentáimturairap. Antsu wi tamaajaj̄ shuar péñker ajasarmatai yajauch shuar nin nakitrartatui. ³⁵ Shuar ni aparín nakitrat-tawai. Nuwasha nukurín nakitrattawai. Najatísha tsatsarín nakitrattawai. ³⁶ Tuma asa shuar ni shuarijijaj̄ nemasrintin ártatui.’

³⁷ ‘Shuar ni aparíncha nukuríncha Wijijaj̄ nan̄kaamas aneakka Wíi shuar áchamniaiti. Núnisan̄ ni uchiríncha nawantríncha nan̄kaamas aneakka Wíi shuar áchamniaiti. ³⁸ Tura ashí wáitsatniun surimiatsuk ni krúsriñ yanaki jukí nemartachkun̄ka Wíi shuar áchamniaiti. ³⁹ Aya jú nun̄kanam péñker pujustaj tana nu ni iwiaakmarín emesrattawai. Tura Winia anentu asa ju nun̄kanam péñker pujustinian páchiatsna nu tuke shiir pujustatui.’

Akinkiatin
(Márkus 9.41)

⁴⁰ ‘Atumin itiaarma nuka Winia itiaarui. Tura itiaarea nuka Winia akup-tukmia nunasha itiaawai. ⁴¹ Yúsnan etserniuncha Yúsnumiã winiá asamtai itiaakka etserin akínkiáttana nujaj̄ métek akínkiáttawai. Péñker shuárnasha péñker asamtai itiaakka péñker shuar akínkiáttana nujaj̄ métek akínkiáttawai niisha. ⁴² Uchíncha Wíi shuar asamtai entsá michan shikirak súsan̄ka imiá nekas nusha akínkiáttawai.” Tu tímiayi Jesus.

11

Imiakratin Juan Jesusaj̄ shuaran akupkamiania nu
(Rúkas 7.18-35)

¹ Tura tuse (12) unuiniamurín Jesus tinia akupkar Niisha nú nun̄ka péprunam we Yus-Chichaman jintíak etserkamiayi.

² Tura Juan sepunam en̄kemas Kristu túramun antukmiayi. Antuk ni unuiniamurín jímiaran Jesusaj̄ akupkamiayi. ³ Tura Jesusan aniasarmiayi “¿Nekas ame Kristu Yus akupkamu tátinia nukaitiam. Kame chikichak nákastataj̄?”

⁴ Tutai Jesus tímiayi “Waketkirum ashí ántarmena nusha wáintrumna nusha Juan̄ ujaktarum. ⁵ Kusurusha wáinmainiawai. Shutuapsha wekainiawai. Tunamarusha péñker ajainiawai. Empekarusha ántuiniawai. Jákarusha nantainiawai. Tura kuítrinchanmasha uwempratin chicham ujakmaiti. Nu ujaktarum. ⁶ Túrasha yawętsuk Winia tuke shiir enentáimturna nú shuar shiir átatui.” Jesus nuna tutai waketkiarmiayi.

⁷ Waketkiarmatai shuar káunkarun Jesus Juánkan pachis áujmatmiayi. “Shuar atsamunmasha ¿warí werimiarum? Pintiu nase umpúam atúu we juní we ajana nuka ¿ístai tusarumek wémarum? Kame Juan̄kka nú shuarchaiti. ⁸ Nuikia ¿warí werimiarum. Shuar péñker iwiarmampra ístai tusarmek wémarum? Warí, péñker iwiarmampraka uunta jeen pujuiniatsuk. ⁹ Nuikia ¿warí werimiarum. Yúsnan etserniuk werimiarum? Maa, túrachmashiuram. Túrasha Juan̄kka yaunchu etserniu nan̄kaamas enentáimtustiniaiti. ¹⁰ Yaunchu Yus-Papinium áarmaiti:

“Winia akatramurun amiñni emka akupeajai ame jintimin iwiarat tusa.” Juan̄ nu akatramuiti. ¹¹ Nekasan tájarne, shuar imiakratin Juan̄jai nan̄kaamas uunt atsuwiti. Tuma aiñ Yus akupeamunam pachiinia nu shuarnaka, nekasmianchancha, Juan̄jai nan̄kaamas shiir enentáimtustiniaiti. Tuma asamtai nuñ pachiinkiatin enentáimpratarum.’

¹² ‘Kakaram shuarka imiakratin Juan̄ támia nú tsawantnumiá Yus akupeamunam ti pachiinkiatniun wakeruiniak kakarmajai pachiinkiatniun enentáimiainiawai. ¹³ Juan̄ pujumia nú yaunchu ashí Yúsnan etserin armia nusha tura Muisais akupkamusha Yus akupin ajastinian etserkarmiayi. ¹⁴ Yaunchu Yúsnan etserin “Kristu táatsaiñ Erías tátiniaiti” tímiayi. Tura nekaatin wakerakrumka Juan̄ nu Eríasaiti. ¹⁵ Antuktin jeakrumka nekaatarum.’

¹⁶ ‘Ju áentsnasha ¿wariñjai métek nakumkataj? Uchijñjai métek áiniawai. Ni aijñjai iruntrar nakurustaj táyatañ tuñniawai ¹⁷ “Námpera áinis nakurustaitsar peem umpuarji túrasha jantsemáchurme. Nuyá iwiarsatniua áinis nakurustaitsar íwiareakur kantamtai kantamáji túrasha átum úutcharme.” ¹⁸ Atumsha núnisaitrume. Kame Juan̄ núkap yurumtsuk nijiamchinchá úmutsuk wekaimiayi. Túmakui átumka “Yajauch wakantrukuíti” tímiarme. ¹⁹ Nuyá Wissha Aents Ajasu támajai. Tura yurumeakui tura úmakui “Ti yurumin ti nampenaiti. Ashí yajauch shuaran amikrinti” túrutrume. Wátsek, wi túramujai Yus nekas nékamu nekanattawai.”

*Yajauch péprunmaja shuaran chicharkamiania nu
(Rúkas 10.13-15)*

²⁰ Nuyá tujintiamun túramiania nú peprunmaja shuaran pachis Jesus chicharkamiayi. Tuma aiñ nuyá shuar ni enentáin yapajiácharu asamtai juná chicharkamiayi.

²¹ “Wáinkiatá, Kurasín péprunmayatiram, Petsaitia péprunmayatirmesha. Nuñ aents tujintiamun ti túraitjai. Tiru péprunmasha Setuñ péprunmasha nu tujintiamu túramuitkiuin̄kia yaunchu ni enentáin yapajiáwaraayi. Túrawar kúntuts pujutai pushín entsarar yun̄kunim ajakiaaraayi. ²² Tura Wissha tájarne, nekap-satin tsawant jeamtai Yus atumin tí asuttiamattarme. Tirunmaja shuaran nan̄kaamas tura Setuñnumiá shuaran nan̄kaamas asuttiamattarme.’

²³ ‘Tura atumsha Kapernáum péprunmayatirmesha, ashí nan̄kaamas nan̄kaamantu ajastin enentáimtumarme. Antsu ashí emestamprartatui. Atumñ aents tujintiamun ti túraitjai. Sutuma péprunam nu tujintiamu túramuitkiuin̄kia nu pepru yamaisha tuke aayi. ²⁴ Tura Wissha tájarne,

nekapsatin tsawant jeamtai Yus Sutumanmaya shuar nan̄kaamas atumin asuttiamattarme.”

*“Winin ayampratarum” tímiania nu
(Rúkas 10.21-22)*

²⁵ Nuyá Jesus tímiayi “Shiir enentáimtajme, Aparu, ashí nayaimpisha nun̄kasha Úuntrinme. Tuma asam Ame túram nu ti unuimiaru enentáimtumainia nuyá úukuitme antsu uchichia áinis nan̄kaamantu enentáimtumainiatsna nú shuar paant awajtusuitme. ²⁶ Ame, Aparu, núnis wakera asam túraitme.’

²⁷ ‘Winia Apar ashí surusuiti. Wisha ni Uchirí asamtai Winia nékarui. Tura chíkich Winia nekas nekarainiatsui. Yus Apancha Wiki nékajai. Tura Wi wakeraj nú shuaran winia Aparun paant awajtajai. Nu shuarsha winia Aparun nékainiawai. ²⁸ Ashí pimpikniutirmesha itiurchat pujarmena nusha Winí winitiarum. Túrakrumniñkia ayamtikrattajrume. ²⁹ Wi ka-jechu asan tura péejchach enentáimin asamtai Winí winirum unuimiartarum. Winia chichamur ántakrum umíakrumniñka atumí wakaní ayamprattawai. ³⁰ Atumin akuptaj nú túratin yúpichuchiiti. Káarkasha Wi súajrumna nu wampuchiiti” tímiayi Jesus.

12

*Jesusa unuiniamurí ayampratin tsawantaj trikiu neren pakaarmiania nu
(Márkus 2.23-28; Rúkas 6.1-5)*

¹ Nuyá Jesus ayampratin tsawantaj ajanman̄ ajapenin nan̄kaamamiayi. Ni unuiniamurísha tsukarar trikiu neren majusar yukí wekasarmiayi. ² Pariséu shuarsha nuna wáinkiar Jesusan aniasarmiayi “Iista, ame unuiniamuram ayampratin tsawantaj túratin surimkiamua nuna túruiniawai.”

³ Tutai Jesus tímiayi “Yaunchu uunt akupin Tawitcha tura nemarniusha tsukamainiak túrawarmia nu ántichukaitrum. ⁴ Yusa Uunt Jeen wayá Yus iniaktusma tantan yuámiayi. Nu tantasha aya Israer-patrik yúatin asamtai Tawitniasha tura ni nemanin ana nunasha suritkiamuyayi. Túmain̄ yúawarmiayi. ⁵ Muisais akupkamunam aarma nu áujkachukaitrum. Israer-patrikia ayampratin tsawantaj takainiayatan̄ nusha tunaachuiti. ⁶ Nekas tájarne, yamáí Yusa Jeen enentáimtustinia nuna nan̄kaamas Wíniaka Aents Ajasuitjiana nu, nekas enentáimtursatniuitrume. ⁷ Yus-Papinium tawai:

“Murik maam Winia surusum nujaj “maakete” tátsujai. Antsu wait-nen̄kartutain wakerajai.”

Nu chicham nekas nékaitkiurmeka yamáí túrarmena núnisrum tunáa túrachu ántarum súmamtikiachaintrume. ⁸ Wi Aents Ajasu asan ayampratin tsawantan Úuntrintjai.”

*Shuara uwejé jakan Jesus tsuármiania nu
(Márkus 3.1-6; Rúkas 6.6-11)*

⁹ Jesus nuyá wé Israer-shuar iruntainiam wayamiayi. ¹⁰ Nuj shuar ámiayi ni uwejé jaka. Tura Jesusan ántar nekapsatai tusa wakeruinia ásar aniiniak “¿Ayampratin tsawantaj jaa shuar tsuarminkiait?” tiarmiayi.

¹¹ Tutai Jesus tímiayi “Atumsha atumí murikrí ayampratin tsawantaj waanam akaiki iniamtai jusatai tusarum wéchaintrupash. ¹² Antsu shuarka murikjai nan̄kaamaschakait. Tuma asamtai ayampratin tsawantaisha péñker ana nu túramniaiti.” ¹³ Tinia iniais áishman̄kan uwejé jakan tímiayi

“Uwejém takuitia.” Tutai uwejé takuí chíkich uwejéjaj métek péñker ajasmia-ayi. ¹⁴ Nuna túramtai Pariséu shuarsha aa jíinkiar Jesus itiurak máawaintiaj túsar chichaman najatiarmiayi.

Isayas Jesusnan tímia nu uminkiamiayi

¹⁵ Jesus nin máatniun nekaama nuyá jíinkiamiayi tura wéakuí untsurí shuar nemariarmiayi. Untsurí jáiniancha tsuámiayi. ¹⁶ Tsuar “etserkairap” tinia akupiarmiayi. ¹⁷ Yaunchu Yúsna etserin Isayas tímia nu uminkiaiti tusa túrunamiayi. Niisha júna áarmiayi:

¹⁸ “Júiti Wi achikmaj nu. Niisha Wi tájana nuna umin asamtai ti aneakun Nijjaj waraajai. Winia Wakantru kakarmarín takamtsuk susattajai. Túramtai winia uwempratin chichamprun ashí Israercha nunkanmasha etserkattawai. ¹⁹ Jiakchattawai tura kakaram chichaschattawai. Winia anturtukarat tusa péprunam weak untsukchartatui. ²⁰ Akupin ajatsuk shuar pintiu punua núnis pimpiru ainia nuna kúpitsuk yáintatui. Núnisañ shuar ji yama ikiapámu áinis kakarmachu ainia nuna ikiajniatsuk ikiakártatui. Tura ashí nupetak ti péñker kakaram akupin ajastatui. ²¹ Tura Israer-shuarchasha Nin nekas enentáimtusartatui.”

Jesusan “iwianchi uuntri kakarmarijjaj túrawai” tiarmiania nu
(Márkus 3.19-30; Rúkas 11.14-23; 12.10)

²² Nuyá Jesusan shuar yajauch wakantrukun itiararmiayi. Nu shuar jii kusurusha chichachusha ámiayi. Tura Jesus tsuármatai paant ímsamiayi tura chichakmiayi. ²³ Nuna wáinkiar shuar shiir enentáimprar tiarmiayi “¿Tawitia uchirí pampanku iniañnamu uwemtikkiartin tátinia nuáshit?”

²⁴ Tura Pariséu shuarsha nuna antukar yajauch enentáimtuiniak tiarmiayi “Juka iwianchi kapitántrin Pirsepún umirniuiti. Tuma asa nuna kakarmarijjaj yajauch wakanin jiki akupeawai.”

²⁵ Jesus tu enentáimainian neka asa tímiayi “Nú nunkanmaya shuar nu-amtak kajernaiyakuñkia nú nunka wari meserchattawak. Núnisañ nuamtak shuar ní shuarjaj mánainiakka amunaikchartatuak. ²⁶ Núnisañ íwianch nuamtak jiki akupnainiakka máanaikiar wárik amuukashtatuak. ²⁷ Kame Wi Pirsepú iwianchi kakarmarijjaj iwianchin jiki akupeakuñkia atumí uchirísha ¿yana kakarmarijjaj jiki akupena? Ni túramurijjaj átum awajirma nekamatarum. ²⁸ Wi Yusa Wakaní kakarmarijjaj yajauch wakanin jiki akupea asamtai atumsha Yusa akupeamuri atumjin jeartamarmena nu nekaatniuitrume.”

²⁹ Tista. Shuar kakaram shuara kuítrin kasarkatin wakerakka emka kakarman jiníkiá aya túrañ ni jeen wayá kasarkamniaiti. Wi iwianchin jikmiajaj uunt iwianch nupetkamua nu nekaamniaiti.’

³⁰ ‘Wijjaj tsanin pujatsna nuka winia nemasruiti. Núnisañ Winia yáintsuna nu aya itiurchat nájateawai.’

³¹ ‘Tuma asamtai tájarne, Ashí shuar tunáa túruinia nusha yajauch chichainia nusha tsankuratin awai. Antsu Yusa Wakanin yajauch chicharin ainia nuka tsankurashtiniaiti. ³² Winiasha Aents Ajasuitjiana nuna yajauch chichartuinia nú shuarsha tsankuramniaiti. Tura Yusa Wakanin yajauch áujmatainia nuka penké tsankurachminiaiti. Ju nunkanmasha tura ukunmasha tsankurnarchattawai’ tímiayi.

Ni nerejai numi nekaamniaiti
(Rúkas 6.43-45)

³³ ‘Yutai numi pé_nkeran nereawai. Tseas numisha yajauchin nereawai. Ni nerejai numi nekaamniaiti. Núniskete atumjai. ³⁴ Tseas wenunniutirmesha, ¿atumsha itiurak imiá yajauchitirmesha pé_nker chichamsha chichastarum? Shuar ni enentáin enentáimna nuna chichaawiti. ³⁵ Pé_nker shuar pé_nker enentáimiu asa shiir chichaawiti. Tura yajauch shuar yajauch enentáimiu asa yajauch chichaawiti. ³⁶ Tura Wissha tájarme, nekapsatin tsawant jeamtai ashí enentáimtsuk chichakma nuna Yúsan paant ujakartatui. ³⁷ Iis, ame chichammijjai nekanattarme. Pé_nker chichakuitkiumka sumamashtatme. Tura pé_nker chichakchaitkiumka sumamattame.”

Nu shuar yajauch ásar iniakmamun seawarmiania nu
(Márkus 8.12; Rúkas 11.29-32)

³⁸ Pariséu shuarsha Israer-shuara jintinniurisha Jesusan chicharuk “Uuntá, ame Yúsaiyáitjai tusam nayaimpinmayá kakarmajai iniakmamun túrata, iisha wáinkiatái” tiarmiayi.

³⁹ Tutai Jesus tímiayi “Shuar yajauch tura Yúsan enentáimtachu ásar nayaimpinmayá iniakmamun seainiawai. Tuma asamtai, áyatik yaunchu Junas túrunamu iniakmastiniati. ⁴⁰ Junas maintiu kashi maintiu tsawantcha namaka ampujen enkemsamiayi. Núnisnak Wi, Aents Ajasu asan, maintiu kashi maintiu tsawantcha nunká jakan tepestatjai. ⁴¹ Junás Níniwi péprunmayá shuaran Yus-Chichaman etserkamtai nu shuar ni tunaarín enentáimtsuk ni enentáin yapajiáwarmiayi. Tura jui yamá Junasa nankaamas etserin pujawai. Wiitjai nusha, tura anturkachuitrume. Tuma asamtai nekapsatin tsawant jeamtai Níniwinmayá shuar juyá shuaran súmamtikiawartatui.’

⁴² ‘Yaunchu nuwá yajayá shuaran úunt akupniuriyayi. Nu nuwá Sarumún ti neka asamtai nin anturkataj tusa tarimiayi. Tura jui yamá Sarumúnjai nankaamas anturkamnia pujawai. Nusha Wiitjai. Tuma asamtai nekapsatin tsawant jeamtai nu nuwá juyá shuaran súmamtikiawartatui’ tímiayi.

Yajauch wakan jiki akupkamuitiat wáketna nu
(Rúkas 11.24-26)

⁴³ ‘Shuara enentáiyá yajauch wakan jíinkin yumi penké yútatsna nuí wéawai. Tura nuí pé_nker pujustinian wáinkia ch ataksha waketkitniun enentáimiu. ⁴⁴ “Wi jíinkimij nuí waketkittijai” tawai. Tura waketki shuara enentáin pé_nker iwiamu tura ankantan wáiniak ⁴⁵ ni ain siati (7) iwianchin níijjai nankaamas yajauchin itia shuara enentáin enkemáwartatui. Túrunamtai nu shuar nuiki núna nankaamas yajauch ajastatui. Núnisan juyá shuar túrunawartatui” tímiayi Jesus.

Jesusa yachí, Jesusa nukurí
(Márkus 3.31-35; Rúkas 8.19-21)

⁴⁶ Jesus nu shuarjai tuke chichaak pujai ni nukurisha ni yachisha tariarmiayi. Tura aa wajasar Nijjai chichastaj tiarmiayi. ⁴⁷ Túramtai Jesusan ujakar “Ame nukusha yatsumsha aa wajasar chichastaj turamainiawai” tiarmiayi.

⁴⁸ Chichaman ujakmia nuna Jesus tímiayi “¿Ya ainia winia nukursha winia yatsursha?” ⁴⁹ Nuyá ni unuiniamurín iniakmas tímiayi “Ju ániawai winia nukur tura winia yatsursha. ⁵⁰ Ashí shuar winia Apar nayaimpiniam pujana nu wakeramun umiiniana nu winia yatsur winia umar winia nukur ániawai” tímiayi.

13

Untsurí métek-taku chichamjai Jesus unuiniamiania nu

*(1) Atsaamin atsaampramiayi
(Márkus 4.1-9; Rúkas 8.4-8)*

¹ Nu tsawantaj̄ Jesus ni jeeȳa jíinkin antumianka kánmatkarin pujusmiayi. ² Tura ti untsurí shuar káunkarmatai kanunam enkemar nūj pujusmiayi. Shuarsha antumianka kánmatkarin pujusarmiyi. ³ Túrunawarmatai untsurí métek-taku chichamjaj̄ unuiniamiayi. “Atsaamin atsaamprataj̄ tusa jíinkimiai, tímiayi. ⁴ Atsaamki wesa arakrī jintia písunmasha iniaarmai. Tura chin̄ki tariar yuawarmai. ⁵ Chikichcha kaya írunmanum iniaarmai. Nun̄ka ishichik asamtai wárik tsapainiarmai. ⁶ Tura nantu etsantramtai péñker kan̄káprúrcharu asa sukuam káararmai. ⁷ Chikichcha jan̄kí nupanam iniaarmai. Tura jan̄ki wárik tsakar nupetak ajakramai. ⁸ Chikichcha péñker nun̄kanam iniaarmai. Nusha péñker nerekar chíkich sian̄sha (100) nerekarmai. Tura chikichcha sesenta (60) nerekarmai. Tura chikichcha trainta (30) nerekarmai. ⁹ Kuishim ákuin̄kia antuktatum” tímiayi.

*“¿Urukamtai aya métek-taku chichamjaj̄ jintiam?” aniasarmiania nu
(Márkus 4.10-12; Rúkas 8.9-10)*

¹⁰ Nuyá ni unuiniamurin̄ Jesusan taruntar aniiniak “¿Urukamtai aya métek-taku chichamjaj̄ jū shuar unuiniam?” tiarmiayi.

¹¹ Tutaj̄ Jesus tímiayi “Urukuk jū nun̄kanam Yus akupin̄ ati, nuka yaunchu nekanachmiayi. Tura yamaikia Yus ashí nuna atumin paant iniakturmawai. Antsu chíkich nuna nekaachmin̄ ániawai. ¹² Kame núkap takakna nu shuar nú nukap patatnaktatui tura ti núkap takustatui. Antsu ishichik takakna nuka ishichik takakuk juruktiniaiti. Núnisan̄ Yusna ti nekarum nú nukapka yúpichuch nekaattarme. Tura ishichik nékarum wárik kajinmatkittiarne. ¹³ Tuma asamtai aya métek-taku chichamjaj̄ unuiniyajai. Nú shuarka íiniayatan̄ wáiniáiniatsui. Ántuiniayatan̄ ántachua núnis nekainiatsui. Túmainiak Winia nekarainiatsui. ¹⁴ Nujaj̄ yaunchu Yúsnan etserin̄ Isayas timia nu uminkiaiti. Juna tímiayi:

“Ti ántayatrum anturkashtatrome. Wáiniatrumsha nekaashtatrome. ¹⁵ Jū shuara enentá̄j̄ kátsuram ásar péñkera nuna nakitiainiawai. Nu asamtai péñker ántuiniatsui, jí̄isha pusá ánis ániawai. Túrachkun̄ka paant nekaawarainti, tura nekas antukarainti, tura enentá̄j̄j̄j̄ enentáimias Winia tsuarat tusa tarutiarainti.”

¹⁶ Tura átumka paant wainkia asarum péñker anta asarum shíiraitrome.

¹⁷ Nekasan tájarme, untsurí Yúsnan etserniusha tura péñker shuarsha átum yamá̄i wáintrum nuna wáinkiatniun wakeruiniayatan̄ wáinkicharmiayi. Tura átum yamá̄i ántarme nuna antuktinian wakeruiniayatan̄ antukcharmiayi’ tímiayi.

*Jesus atsaampramu chichaman paant jintintiamiania nu
(Márkus 4.13-20; Rúkas 8.11-15)*

¹⁸ ‘Ayu, antuktatum. Atsaampramu chichaman paant jintintiatjarme. ¹⁹ Árak jintia písunam iniaararma nuka shuar Yus-Chichaman ántayatan̄ ni enentá̄in̄ ikiuiniatsna núiti. Tura íwianch nu Yus-Chicham ni enentá̄in̄ atsaampramu ánis antukman kajinmatkiawai. ²⁰ Árak kaya írunmanum iniaarma nuka shuar Yus-Chichaman antuk waras umirainia núiti. ²¹ Tura núkap kan̄kaprurcharu ásar katsuiniatsui. Antsu itiurchatan̄ in̄kiuiniak tura Yus-Chichaman wakeruinia ásarmatai chíkich yajauch áujmatam wárik iniaisar ikiuiniawai. ²² Árak jan̄kí nupanam iniaarma nuka shuar Yus-Chichaman antuk emka umirniua núiti. Tura jū nun̄kanam írunna nuna tuke páchin̄iak ni kuítrin̄cha ti enentáimtuinia ásarmatai ashí Yus-Chichaman

enentáimtamun núpeteawai. Tuma asamtai nu áentsnum Yus-Chicham atsaampramu nereatsui. Yus-Chicham ni enentáin takasma atsawai. ²³ Tura árak péñker nunkanam iniaarma nuka shuar Yus-Chichaman antuk péñker umirainia núiti. Tura péñker nerenawai. Chíkich siañ (100) nerekarma núnis chikichcha sesenta (60) nerekarma núnis chikichcha trainta (30) nerekarma núnis ániawai” tímiayi Jesus.

(2) Yajauch nupa tríkiunam atsaamkamu

²⁴ Jesus ataksha ju métek-taku chichaman áujmatsamiayi. “Shuar Yus aku-peamunam pachiinkiertin júnisaiti. Shuar péñker arakan, tríkiun ni nunken araamai. ²⁵ Tura ashí kanararmatai nemasri kashi taa trikiu arakmanum yajauch nupa aratak ikiukmiai. ²⁶ Trikiu tsapakar nereakui nuyá yajauch nupasha nusháa nereku asa ti paant ajasmai. ²⁷ Nuna ísar takainia nu ni úntrin werí tiarmai “Uunta, ¿péñker arak araachmakam. Itiura júsha yajauch nupasha tsapakuit?” ’

²⁸ “Tutai nérentin timiai “Winia nemasur arakuiti.” ’

“Takui ni takarniuri tiarmai “¿Yajauch nupa uwerat tusam wakeramek?” ’

²⁹ “Tutai timiai “Atsá, uwerairap. Yajauch nupa uweaj tukamarum trikiu uweniirum. ³⁰ Iniaisatarum. Antsu métek tsakakti. Júuktin tsawant jeamtai winia takartinian emka yajauch nupa uwer irumar jinkiawarat tusan akupkartatjai. Tura áesawartatui. Tura trikiu neren júkar péñker ikiusarat tusan akupkartatjai” timiai” tímiayi Jesus.

(3) Mustasa jinkiái

(Márkus 4.30-32; Rúkas 13.18-19)

³¹ Jesus ataksha métek-taku chichaman áujmatsamiayi. “Shuar Yus aku-peamunam pachiinkiertin mustasa jinkiáiya áintsankete. Shuar péñker nunken araamai. ³² Mustasa jinkiáikia imiá uchichiitiat tsapái tsakaakka ashí numichijjai nankaamas uunt ajawai. Ti uunt asamtai chiniki ni kanawen pasunmainiawai” tímiayi Jesus.

(4) Karin enketatin

(Rúkas 13.20-21)

³³ Núnisan chíkich métek-taku chichaman áujmatsamiayi. “Shuar Yus aku-peamunam pachiinkiertin karinia áintsankete. Nuwa nijiamchiniam karinia enkea mashí páchimiawai. Tura nu mash karimtikiawai” tímiayi.

Jesus aya métek-taku chichamjaiñ jintintiamiania nu

(Márkus 4.33-34)

³⁴⁻³⁵ Ashí nuna Jesus métek-taku chichamjai áujmatsamiayi. Yaunchu Yúsnan etserin timia nu uminkiat tusa túramiayi. Etserin júna áarmiayi:

“Métek-taku chichamjai áujmattiatjai. Yámankamtaiknumiá nékashtain etserkat-tajai” tu áarmiayi.

Nu asamtai aya métek-taku chichamjaiñ áujmatmiayi Jesus.

Jesus yajauch nupa tríkiunam atsamkamun paant awajsamiania nu

³⁶ Nuyá shuaran ikiukin Jesus jeá támiayi. Túramtai ni unuiniamuri tariar “Yajauch nupa áujmatmena nu paant awajsata” tiarmiayi.

³⁷ Tutai Jesus tímiayi “Wi Aents Ajasuitjai. Wi péñker arakan atsaamkaitjai.

³⁸ Ashí nunka aja áintsaiti. Péñker jinkiái Yus-shuaran Yus akupea nuna nakumeawai. Yajauch nupa iwianchna ainia nuna nakumeawai. ³⁹ Tura íwianch ii nemasri asa yajauch nupa arakuiti. Tura nunka amúamunam Yusa suntari arakan júuktinia áintsan shuaran yaruaktatui. ⁴⁰ Yajauch nupa irur jinium áesatnua áanis nunka amúamunam túrunattawai. ⁴¹⁻⁴² Nui Wi Aents Ajasu asan winia suntarun akupkattajai. Tura ashí tunaan túruinia nunasha

tura chikichan tunaanum útsuinia nunasha mash irurar jinium apeawarta-tui. Nuisha ti úutin ti wáitsatniusha átatui. ⁴³ Antsu péñker túruinia nuka ti shiir wincha ajarar ni Aparí akupeana nuí etsa núnis tsáapnin ajasartatui. Wats, kuishim átsuk. Antukta.’

(5) Kuit wáinkiamu

⁴⁴ ‘Shuar Yus akupeamunam pachiinkiatin kuit nunká uukma áintsankete. Shuar nu kuítian wáiniak nuin ataksha uukmai. Tura ti waras waketki nu kuit niiniu atí tusa ashí ni takakman suruk nu nunkan sumakmai.’

(6) Kaya shiirmach ti kuitia nu

⁴⁵ ‘Shuar Yus akupeamunam pachiinkiatin júnisaiti. Shuar kayachin ti shíirman eak wekaana áintsankete. ⁴⁶ Tura kayan ashí nankaamas kuit jeean wáiniak waketki ashí takakna nuna suruk nu kayan niiniu atí tusa súmawai.’

(7) Neka

⁴⁷ ‘Shuar Yus akupeamunam pachiinkiatin júnisaiti. Shuar nekajai namakan achía áintsankete. Nekan nayaantsanam ajuntak niisháa namakaim achíawai. ⁴⁸ Tura nekanam nemarmatai kukar jiki, nuí péñker namak-nasha chaninnium chumpiniawai. Tura yajauch namaknaka ajapenawai. ⁴⁹ Núnisank átatui nunka amúamunam. Yusa suntari taar Yus-shuaran tura íwianch shuaran akantrattawai. ⁵⁰ Tura íwianch shuarnaka uunt jinium apeattawai. Nuisha ti úutin ti wáitsatin átatui.” Nuna ashí ni unuiniamurijiai áujmatsamiayi Jesus.

Yamá nekamujajisha tura yaunchu nekamujajisha Yus-shuaran yáintiniaiti

⁵¹ Jesus nuna tinia amuk “¿Ju mash antukurmek?” tímiayi.

Tutai ni unuiniamurí “Ee, Uunta, ashí antukji” tiarmiayi.

⁵² Tuiniakui Jesus tímiayi “Shuar ashí Yúsnan péñker unuimiaruka aents kuítriniua áintsankete. Ni ikiutairiya yamarmancha yaunchu sumakmancha jusanniaiti. Núnisank nu shuar yamá nekamujajisha tura yaunchu nekamujajisha Yus-shuaran yáintiniaiti.”

Jesus Nasarétnum waketkimiania nu

(Márkus 6.1-6; Rúkas 4.16-30)

⁵³ Jesus nu métek-taku chichaman áujmatas amuk nuyá wémiayi. ⁵⁴ Tura ni péprurín Nasarétnum jeá Israer-shuar iruntainiam wayá unuiniamiayi. Tura nuyá shuar antukar tí enentaimprarmiayi. Tura “¿Jusha tui imiá unuimiaruit, tiarmiayi. Itiurak aents tujintiamun túramniait? ⁵⁵ Juka karpintíru uchirinchukait. Nukurísha Marichukait. Tura ni yachísha Jakupu, Jusé, Semun, Jútas áiniatsuk. ⁵⁶ Tura ni umaisha iijiai írutra pujuiniatsuk. ¿Nuikia itiura mash neka?” tiarmiayi. ⁵⁷ Túrawar Jesusan itiurchat enentáimturarmiayi.

Túramtai Jesus chicharuk “Yúsnan etserniun ashí shuar péñker anturainiawai, antsu aya nuna nunkeyanaka ni shuarínkia nin anturainiatsui” tímiayi. ⁵⁸ Tura nú shuar Jesusan enentáimtuiniachu asamtai aentsti tujintiamun aya ishichik túramiayi.

14

Imiakratin Juan jakamu

(Márkus 6.14-29; Rúkas 9.7-9)

¹ Kariréa nunkanam Erutis akupniuyayi. Tura Jesus túramuncha antukmiayi. ² Tura ni írutramurín tímiayi “Nuka imiakratin Juan jakamunmaya nantaki túrawai auka. Tuma asa aents tujintiamun túrawai” tímiayi. Kame Erutis Juan kan maa asa tímiayi.

3-4 Akupin Erutis ni yachí Jiripi nuwen Jirutíasan akintrukmatai Juan Erutisan “Ame yatsumi nuwé akintrukchatniuitme” tímiayi. Tutai Erutis Juan kan achik jirujai jiníkiá sepunam enkeatarum tusa akupkamiayi. 5 Niisha Juan kan máataj tukamá aentsun ashamiarmiayi. Ashí aents “Juan Yúsna etserniuiti” enentáimtuiniakui ashamiayi. 6 Tura akupin Erutis akiiniamu tsawantri jeamtai nú námpertin Jirutíasa nawantri ashí ípiaamu pujuiniamunam jantsemamiayi. Túramtai Erutis shiir enentáimtak 7 “Ame ashí wakeram nu seattia, tímiayi. Nekasan amastatjai, Yussha iirui” tímiayi.

8 Tutai nu nuwäch emka ni nukurí akatramu asa Erutisan chicharuk “Imi-akratin Juan ka muuké tsupikiam amamkunam enkeram surústá” tímiayi.

9 Tutai Erutis wake mesekmiayi. Túrasha “nekas Yus iirui” tiniu asa tura ni amikrishá antukaru asamtai umikmiayi. 10 Ni suntarin sepunmayan Juan ka muuken tsupik itiarti tusa akupkamiayi. 11 Tura amamkunam itiar nuwächin súsarmiayi. Tura niisha ni nukurí susamiayi.

12 Nuyá Juan ka írutramurí tariar ayashí jukiar iwiarsarmiayi. Túrawar Jesusan ujauwearmiayi.

*Jesus senku mir (5000) áishman kan ayuramiania nu
(Márkus 6.30-44; Rúkas 9.10-17; Juan 6.1-14)*

13 Jesus nuna antuk Niníki ni unuiniamuríjiaín kanunam enkemar arant aents atsamunam wémiayi. Túrasha nuna aents nekaawar kukarak weri-armiayi Jesusan. 14 Kanunmaya jíiniaj tukamá untsurí áentsun wáinkiamiayi. Tura wáiniak waitnentrarmiayi. Tura jáiniancha tsuárarmiayi. 15 Kíakui ni unuiniamurí Nin tariar tiarmiayi “Kíawai, Uunta. Tura shuar tíjiuch pujaaka atsawai. Ju aents akupkarta. Péprunam wear sumak yuuwearti” tiarmiayi.

16 Tutai Jesus tímiayi “¿Urukamtaik wearat? Antsu atumek ayuratarum.”

17 Tutai tiarmiayi “Iikia takaktsuji. Aya senku (5) tantachik jimiaichik namakchijiaín takakji.”

18 Tuíniakui Jesus “Wats, nu itiantitarum” tímiayi. 19 Tinea aents chírichriniam pujusarti tusa akupkamiayi. Nuyá senku (5) tantancha jímiar namaknasha achik nayaimpiniam ímias Yúsna yumínsamiayi. Tura puur ni unuiniamurín aents ayuratarum tusa súsarmiayi. 20 Ashí yurumáwar jémararmiayi. Tura nuyasha puunaruka tuse (12) chan kin tíarmiayi. 21 Nui yurumáwarmia nusha nuwasha uchisha nekapmatsuk senku mir (5000) aya áishman áirmiayi.

*Jesus entsá pátatek wekasamiania nu
(Márkus 6.45-52; Juan 6.16-21)*

22 Nuyá Jesus ni unuiniamurín kanunam enkemprarum amain émaa ajatarum tusa akupkarmiayi. Niisha áentsun akupkarmiayi. 23 Akupkarsha naint waka Yúsna áujumiayi. Káshisha nui Niníki tuke pujumiayi. 24 Tura antumian tí wan karam asamtai kanu ajapén ajasmatai nase tukumma entsa tamparukmiayi. 25 Tsawaana ai nii tuke wenai Jesus entsá pátatek wekas pujuiniamunam jeamiayi. 26 Tura ni unuiniamurí entsá pátatek wekaan wáinkiar ti sapijmiakarmiayi. Tura ashamainiak “wakanchashit” tiarmiayi.

27 Tuíniakui Jesus tiarmiayi “Kakaram ajastarum. Wiitjai. Asham-prukairap.”

28 Takui Pítiur chicharuk tímiayi “Uunta, Ámetkumka nui wekasa jeatin untsurkata.”

29 Takui Jesus tímiayi “Wats, winitíá.”

Tutai Pítiur kanunmaya akaikin Jesus wajana nui jeataj tusa entsá pátatek wekasamiayi. 30 Tura ti nasen násentun nekáa ashamkamiayi. Ashama asa entsá wayamiayi. Tura “Uuntá, achirkata” tu untsummiayi.

³¹ Nu chichamtaik Jesus uwejnum achik júak “Maa, Yus imiá ishichik enentáimtuscheme” tímiayi. ³² Tura kanunam enkemáwarmatai nasesha menkakamiayi.

³³ Túramtai kanunam enkemarmia nusha Jesusan tikishmatar chicharuk “Nekas ame Yusa Uchirínme” tiarmiayi.

Jesus Jinisarítiumiá shuaran tsuármiania nu
(Márkus 6.53-56)

³⁴ Tura amaini katinkiar Jinisarít nunkanam jearmiayi. ³⁵ Tura nuyá aents Jesusan nekaawar nu nunkanam ashí ujanairarmiayi. Túrawar jaancha ni pujamunam itiararmiayi. ³⁶ Ni pushirínkisha antintai tusar seawarmiayi.

15

Shuáran yajauch awajeana nuna Jesus jintintiamiania nu
(Márkus 7.1-23)

¹ Nuyá Jerusarén péprunmaya Pariséusha yaunchu akupkamu jintinniurisha Jesusan tariar aniasarmiayi ² “¿Urukamtai ame unuiniamuram ii uuntri yaunchu jintintrarmia nuna uminiatsu? Iis, ikijmiatskesha yurumáiniawai” tiarmiayi.

³ Tuíniakui Jesus aniasarmiayi “¿Urukamtai atumsha Yus akupkamu umirt-suk aya aents akupkamu umiirum?” ⁴ Iis, Yus tíchamkia: “Ame apa, nukusha shiir enentáimtustarum.” Tura “Shuarsha ni aparíncha nukuríncha katsekka nu shuar jakati” tíchamkia.

⁵⁻⁶ Antsu átumka tárume “Shuar ashí niiniu írúnna nuna mash “Yúsnaiti” takui nuikia nujai ni aparíncha nukuríncha yáinchamniaiti, tárume. Nin yáintinian nakitiak ayatik “Ashí winia áiniana nu Yusna asamtai yáinchamniaitjame” títiniaiti” tárume. Núnisrum tákuram Yus akupkamu iniaisarum aya aents akupkamu umiirume, tímiayi. ⁷ Antra chichamtiniaitrume. Yúsna etserin Isayas yaunchu nekas atumin áartampramiayi juna:

⁸ “Ju aents ni wenejai shiir awajtuiniawai, tura ni enentái jeachat pujuiniawai. ⁹ Tura tukeneasan shiir awajtuiniawai. Aentsu chichamen jintintiainiyat “Yusa chichamente” tuiniawai.” Tu áarmiayi” tímiayi Jesus.

¹⁰ Tinia shuaran untsuk tiarmiayi “Ju antukrum pénker nekaatarum. ¹¹ Aents yúana nuka shuáran yajauch awajsashtatui. Antsu wenunmaya jinia nuka shuáran yajauch awajeawai” tímiayi.

¹² Nuyá ni unuiniamuri Jesusan tariar “Maa, Pariséu ame chichammin antukar ti iturchat enentáimprarai” tiarmiayi.

¹³⁻¹⁴ Tuíniakui Jesus tímiayi “Ikiuktiarum. Kusuru áintsan áiniawai. Tura kusuruncha jintintiainiawai. Mai kusuru ásar mai wáanam akaiki ini-aawartatui. Wats, ajanam nupá áintsan ainiawai. Tura ashí winia Apar nayaimpiniam pujana nu araachmaka takamtsuk uwé ajapamu átatui” tímiayi Jesus.

¹⁵ Takui Pítiur Jesusan tímiayi “Nu métek-taku chicham paant awajsata.”

¹⁶ Tutai Jesus tímiayi “¿Atumsha nekaachurmek. ¹⁷ Enentáimprachurmek? Ashí wenunam wayaana nu wakenam wéatsuk. Tura nuyá iniankastiniaiti.

¹⁸ Antsu wenunmaya jinia nu enentáinmaya jiniu asa áentsun yajauch awajeawai. ¹⁹ Enentáinmaya ashí yajauch enentáimsatin jiniainiawai. Mankartuatniusha, chikicha nuwé kasamkatniusha, tsanirmatniusha, kasamkatniusha, wáitruatniusha, yajauch áujmatsatniusha ²⁰ ashí nu áiniawai nekaska shuáran yajauch awajeana nu. Tura ikijmiatsuk yurumátniuka shuáran ni enentáin yajauch awajeatsui” tímiayi.

*Nuwa Israer-shuarcha Jesusan enentáimtusmiania nu
(Márkus 7.24-30)*

²¹ Jesus nuyá jiinki Tiru péprunmasha Sitiun péprunmasha wémiayi. ²² Tura nu nunkanmaya nuwa Jesusan tarí tímiayi “Uunta, uunt akupin Tawit ame weatrum asamtai winia waitnentrurta. Nawantur yajauch wakantruku asa ti wáitrutawai” tímiayi.

²³ Tura Jesus áikchamiayi. Tura ni unuiniamurí tariar “Awemata, tiarmiayi. Tuke untsunki apapétmaji” tiarmiayi.

²⁴ Nuyá Jesus tímiayi “Aya Israer-shuarnum menkakarú áinia nuna eaktinian Yus akuptukuíti.”

²⁵ Túrasha nuwa tikishmatar tímiayi “Uunta, waitnentrurta.”

²⁶ Tutai Jesus tímiayi “¿Uchí apatkurí jurukir yawá susamniakait?” tímiayi.

²⁷ Tutai nuwa tímiayi “Nekas, Uunta, tame. Tura yawasha ni aentsrì yurumainiakui nunká iniaarun yuiniatsuk.”

²⁸ Takui Jesus tímiayi “Maku, nekas Winia enentáimtursaitme. Ame wak-eram núnisañ atí” tímiayi. Tura nu chichamaik ni nawantrí péñker ajasmiai.

Jesus untsurí jáinian tsuararmiania nu

²⁹ Jesus nuyá jiinki Kariréa antumianka káanmatkarin waketkimiayi. Tura naint waka nuí pujusmiayi. ³⁰ Nuí untsurí aents Nin tariar shutuapnasha kusuruncha chichachuncha tsupirkamuncha chíkich jáiniancha ititariarmiayi. Túravar nawenam aeprusarmiayi. Túrám tsuararmiayi. ³¹ Nuna ísar chichachusha chichainiakui, tsupirkamusha péñker ajainiakui, shutuapsha péñker wekainiakui, kusurusha wáinmainiakui, ti shiir enentáimprarmiayi. Yus ni áentsrin Israeran yáinmatai shiir yuminsarmiayi.

*Jesus kuaru mir (4000) áishmankan ayuramiania nu
(Márkus 8.1-10)*

³² Nuyá Jesus ni unuiniamurin untsukar tiarmiayi “Ju aentsun waitnentinaiajai. Warí, menaintiu tsawant Wijiaí yurumtsuk yujainiatsuk. Ayurtsuk ni jeen akupkachminiiaitjai. Jintiá pimpiki wáitsartatui.”

³³ Ni unuiniamurí tiarmiayi “Túrasha, Uunta, ¿shuar atsaasha tuyañ yurumak imiá sumaktaji ju aents ayurawartincha?”

³⁴ Jesus aniasarmiayi “¿Urutma tanta takakrum?”

Tutai niisha “Siatí (7) tanta nuyá ishichik namak takakji” tiarmiayi.

³⁵ Nuyá aents nunká pujusarti tusa akupkamiayi. ³⁶ Tura siati tantan achik namaknasha achik nuyá Yúsan yuminsamiayi. Tura puur aents ayuratarum tusa ni unuiniamurin susamiayi. ³⁷ Ashí yurumáwar jémararmiayi. Tura puunaru siati chankin tiarmiayi. ³⁸ Tura nuí yurumáwaruka nuwasha uchisha nekapsatsuk aya áishmankak kuaru mir (4000) áirmiayi. ³⁹ Nuyá Jesus áentsun akupak kanunam enkemar Maktara nunkanam wémiayi.

16

*Pariséusha Satuséusha iniakmamin Jesús seawarmiania nu
(Márkus 8.11-13; Rúkas 12.54-56)*

¹ Pariséusha tura Satuséusha Jesusan nekapsatai tusar tariarmiayi. Túravar “Ame Yúsaiyaitkiumka kakarmarmijiaí nayaimpinnmaya iniakmasta, iisha wáinkiatái,” tiarmiayi.

² Tutai Jesus tímiayi “Átumka “Kapaaku péetar kintiamkui kashin esatrurta-tui” tınıuitrume. ³ Túrasha “Te ajas kapaaku péetar tsawaakuí yumi yajauch átatui” tınıuitrume. Tura nekasaíti. Maa, átumka nayaim ísrum ju nunkanam túrunattana nu nékarme. Antsu Yus yamáí jú nunkanam tura nuka nékatsrume.

Ántrairume. ⁴ Aents yajauch ásar tura Yusan enentáimtachu ásar kakarmajai iniakmamun wakeruiniawai. Túrasha áyatik Junas túrunamia nuke iniakmas-tiniaiti” tímiayi. Tinia ikiuak wémiayi.

Pariséusha Satuséusha jintintiaiania nu aneartiniaiti
(Márkus 8.14-21)

⁵ Tura entsá amaini katiñkiar ni unuiniamurí tantan júkitniun kajinmatkiarmiayi. ⁶ Nuyá Jesus tímiayi “Wáinkiatarum, Pariséusha Satuséusha wakaprutai takakainia nújajisha aneartarum.”

⁷ Tutai ni unuiniamurí tiarmiayi “Ii tanta itiachakrin tátsuk.”

⁸ Jesus nuna antuk tímiayi “¿Urukantai tanta itiachji tunaiyarum. Yusa kakarmari kajinmatkintrumek. ⁹ Senku tantajai túramiaj nu kajinmatkintrumek. Senku mir (5000) áishmankan ayurantai untsurí chan̄kin tiármia nu enentáimtsurmek. ¹⁰ Tura siati tantajai kuaru mir (4000) áishmankan ayurantai nuna ishichik chan̄kin tiármia nu kajinmatkintrumek. ¹¹ Itiurak imiá nékatsrum? Wi Pariséu wakaprutairisha Satuséu wakaprutairisha aneartarum tákun penké tantan tátsujai” tímiayi. ¹² Nuna Jesus takui ni unuiniamurísha nekaawarmiayi. Penké tantaa wakaprutairin tíchamiayi antsu Pariséusha Satuséusha unuiniatairin tímiayi.

Pítiur Jesusan Yus anaikiamun paant ujakmiania nu
(Márkus 8.27-30; Rúkas 9.18-21)

¹³ Tura Sesaria-jiripiunam jeawar Jesus ni unuiniamurin aniasarmiayi “Aents Ajasuitjiana juna ¿yaiti turutainiawa Winia?”

¹⁴ Niisha ayak tiarmiayi “Chíkich, imiakratin Juánkaiti turamainiawai. Chíkichka, Eriásaiti turamainiawai. Chíkichcha Jeremíasaiti, chíkichcha chíkich aents Yúsnan etserniuiti turamainiawai” tiarmiayi.

¹⁵ Tutai nincha aniiniak “¿Atumsha yaiti túrutrum?” tímiayi.

¹⁶ Semun Pítrusha “Ámetme Kristu, Yus Anaikiamu. Nekas iwiaaku Yusa Uchirinme” tímiayi.

¹⁷ Tutai Jesus tímiayi “Shiiraitme Junasa uchirí Semunka. Núnaka aents ujatmakchaiti antsu winia Apar nayaimpiniam pujana nu ujatmakmatai nekaam tame. ¹⁸ Tura Wisha tájame, ame Pítruitme, kayach tútaim. Nu kayanam jea jeamtinia áintsan Yus-shuaran ekenin tsakatmartatjai. Túramtai jákatniusha tura Yusa nemasrisha nu jeamman pukukchattawai. ¹⁹ Yus akupeamu yawincha amastatjai. Ju nunkanam jinkiatniusha atíatniusha amasmaiti. Tuma asamtai ame ju nunkanam suritiam nu nayaimpinmasha suritniaktatui. Tura ju nunkanam tsankateam nu nayaimpinmasha tsankatnaktatui” tímiayi. ²⁰ Nuna tinia Jesus ni unuiniamurin Krístuitiaj nu etserkairap tinia akupkarmiayi.

Jesus Nin máatniun etsertumakmiania nu
(Márkus 8.37-9.1; Rúkas 9.22-27)

²¹ Nuyá Jesus juna unuiniatan nan̄kammiayi. “Wi Jerusarénum wétiniaitjai. Nuí Israer-shuara úuntrīsha, Israer-patri úuntrīsha, Israer-shuara jintinniurisha ti wáitkiarsartatui. Nuyá mantuawartatui túrasha menaintiú tsawantaj nantaktiatjai.”

²² Takui Pítiur arantach jukí chicharuk tímiayi “Uunta, nuka penké áchatniuiti. Áminkia túrutmcharminiaiti.”

²³ Jesus ayanmatar Pítrun tímiayi “Werumta, Satanása. Yajauch awajtame. Ámeka Yus wakeramu enentáimtsume. Antsu jú nunkanam enentáimainia áinis enentáimme.”

²⁴ Nuyá Jesus ashí ni unuiniamurin tímiayi “Shuar Winia nemartustaj tusa wakerakka ni wakeramurin iniais ni krusi yanaki Winia nemartusti. ²⁵ Shuar áyatik péñker pujustaj tákunka nu shuar uwemtsuk jakattawai. Antsu jákatniuitkuisha péñker pujustinian enentáimtsuna nú shuar nekas iwiaakman wainkiattawai. ²⁶ Wats, shuar ashí jú nunkanam írúnna nuna sumakka tura nujai ni wakanj émesek ¿itiurak péñker pujustin? Shuara wakanj emesramu ¿ashí jú nunkanam írúnna nujai iwiamniakait? ²⁷ Wi Aents Ajasu asan, winia Aparu kakarmarjijai tura ni suntarjijai tana ashí shuáran ni takasmajai métek akiktatjai. ²⁸ Paant tájarne, shuar jui wajainia ju játsuk Wi akupin ajasmatai wáitkiartatui” tímiayi.

17

Jesus nushá iira ajasmiania nu (Márkus 9.2-13; Rúkas 9.28-36)

¹ Nuyá sais (6) tsawant nankaamasar Pítruncha, Jakupuncha, tura ni yachj Juannasha níniak júkiar Jesus náinnium yakí wakamiayi. ² Nui Jesus nusháa iira ajattsarmiayi. Ni yapisha etsaya áinis wincha ajasmiai. Ni pushirisha ti puju jiiitsumir ajasmiai. ³ Nujisha Muisaisnasha Eríasnasha Jesusjai chichainian wáinkiarmai. ⁴ Nuyá Pítiur Jesusan tímiayi “Uunta, ti shiir pujaji jui. Wakerakminkia menaint áakmaktai, Áminiu chikichik tura chikich Muisaisnasha, tura chikichcha Eríasna.” ⁵ Tura Pítiur tu auju wajái yurankim ti puju amuamiayi. Tura nu yuranminmaya chichaman antukarmiayi. “Juka winia aneamu Uchiruiti, tímiayi. Nin ti shiir enentáimtajai. Nii péñker anturkatarum” tímiayi. Tu chichasmiayi Yus. ⁶ Nuna ni unuiniamurj antukar ti ashamkar pákea ajakiarmiayi. ⁷ Túrunawarmatai Jesus táriar antiñ “Ashamkairap, nantaktiarum” tiarmiayi. ⁸ Tura pan kainiar ímiaj tukamá aya Jesusan wáinkiarmai.

⁹ Nuyá náinniumia akainiak Jesus tiarmiayi “Átum ísurmena nu penké etserkairap. Wi Aents Ajasu asan jakamunmaya nantaatsain etserkairap’ tímiayi.

¹⁰ Nuyá ni unuiniamurj Jesusan aniiniak “¿Urukamta in jintintramin “Kristu táatsain Erías emka tátiniaiti” tuinia?” tiarmiayi.

¹¹ Tuíniakui Jesus áikmiayi “Nekas Erías tátiniaiti. Tura nii mash iwiarattawai. ¹² Kame nekas Erías táwiti tura nin nekaacharmai. Antsu aents wakeriarmia nuna túrawar yajauch awajsarmiayi. Núnisan Winiasha, Aents Ajasu ain, wáitkiarsartatui.” ¹³ Nuna takui ni unuiniamurj imiakratin Juánkan áujmatui, tu enentáimprarmiayi.

Jesus iwianchin jiki akupkamiania nu (Márkus 9.14-29; Rúkas 9.37-43)

¹⁴ Ataksha aents matsatmanum jeawarmatai shuar Jesusan tarí tikishmatramiai. ¹⁵ Tura tímiayi “Uuntá, winia uchir waitnentrutata. Wainchi tukum ti wáitniuiti. Jiniumsha patamniuiti. Entsasha iniainaiti. ¹⁶ Ame unuiniamurmíncha itiarjiai túrasha tujinkiarai.”

¹⁷ Takui Jesus ashí tímiayi “Maa, Yus penké enentáimtichuitrume. Imiá úmichuitrume. ¿Wi atumin katsuntu ajatniukaitjiarum? Wats, uchi itiar-tiarum’ tímiayi. ¹⁸ Itiarim Jesus yajauch wakanin jiki akupkamiayi uchi ayashíniá. Túramtai nu chichamaik péñker ajasmiai.

¹⁹ Nuyá urum ni unuiniamurj Jesusjai niniki pujusar áujmatainiak “¿Urukam-tai yajauch wakan jiktin iikia tujinkiamaj?” tiarmiayi.

²⁰ Tuíniakui Jesus tiarmiayi “Yus nekas enentáimtachu asarum tujinkiarne. Túmaitiat nekasaiti mustasa jin*kiá*i timiá uchichitiat ti uunt tsakaatsuk. Núnisan Yus ishichkisha enentáimtakrumka nu naint ékemkata tutai nu naint túrunattawai. Pen*ké* tujinkiashtatrumne Yus nekas enentáimtakrumka. ²¹ Kame nu yajauch wakan *jiiki* akupkatniuka ijiarmam Yus áuj*sat*niuiti.”

Ataksha Jesus ni játniun ujakmiania nu
(Márkus 9.30-32; Rúkas 9.43-45)

²² Jesus ni unuiniamur*ijiai* Kariréa nun*kan*am wekas *ju*na ujakarmiayi. “Wi Aents Ajasu asan, aentsnum surunkattajai tura mantamnattajai. ²³ Túrutawarmatai menaintiú tsawantaj nantaktiatjai.” Tura ni unuiniamur*i*nuna antukar ti kúntuts enentáimprarmiayi.

Jesus ankantaitiat akiktinia nuna akikmakmiania nu

²⁴ Jesus ni unuiniamur*ijiai* Kapernáum péprunam jeawarmiayi. Tura kuítian achin Pítrun tariar aniasarmiayi “¿Atumi uuntri Israer-patrin akiktinia nuna akí*nkiait*?”

²⁵ Tutai Pítiur “Ee” tímiayi.

Tura Pítiur *jeá* wayá chichaatsa*in* Jesus emka tímiayi “Chíkich nun*kan*maya akupin *zyana* kuítr*ijiai*n takainia. Ni shuariniunkek atantainia. Antsu yajaya shuar*nan* atantainiatsuk. Nekaschak, Semun*ká*?”

²⁶ Tutai Pítiur “Nekas yajaya shuar*nan* atantainiawai” tímiayi.

Jesus tímiayi “Nuikia ni shuar*i* ankant áiniawai. Iisha núnisrik nu akiktin ankantaitji. ²⁷ Túrasha itiurchat enentáimprara*in* tusar akiktai. Ame tsau jukim entsá wetá. Túram emka namak japikim iwian*kam* nui kuit wáinkiatame. Nu jukim Wíniasha áminiusha akikmakta.”

18

*“¿Ya imiá nan*ka*amantuit?” tunaiyarmiania nu*
(Márkus 9.33-37; Rúkas 9.46-48)

¹ Nu tsawantaj ni unuiniamur*i* tariar Jesusan aniasarmiayi “Yus akupeamunam pachiinia nu *zya* imiá nan*ka*amantu áminiait?”

² Nuna tuíniakui Jesus uchin untsuk ajapen awajtusar ³ tímiayi “Tí nekasan tájarne, atumí enentáimtai*ri* yapajiarum uch*a* áinis ajachkurmeka Yus akupeamunam pachiinkiachminiaitrumne. ⁴ Nu asantai *ju* uch*a* áinis péejchach enentáimtumana nuka Yus akupeana nui nekas nan*ka*amantu ajasminiaiti. ⁵ Nú arantcha Winia anentuk uchin itiaana nú shuar Winiasha itiaareawai’ tímiayi.

Tsuumainti yajauch túrumtikiatin
(Márkus 9.42-48; Rúkas 17.1-2)

⁶ ‘Shuar *ju* uchin Winia umirtana nuna tunaanum ajuarmatain*ka* nuna túratsa*in* niisha kuntujén kayaj*ai* jin*kiar* nayaantsanam ajapen kunanam ajunmaitkiun*ka* maak ainti, tímiayi. ⁷ *Ju* nun*kan*am tunáa iniaatai írunuk tuke itiurchataiti. Antsu shuar chikichan tunaanum ajuarka ti itiurchatan inkiun*tatui*’ tímiayi.

⁸ ‘Nu asantai ame uwejem tura nawem tunaanum ajunmatnuiitkiun*ka* tsupikiam ajapata. Kame muntuch pujustin tura ukunam nayaimpiniam wétin pen*keraiti*. Antsu kajinkiashtin jinium takamtsuk jeatniuka imiá yajauchiiti. ⁹ Núnisan ame *jiimi* tunaanum ajunmatnuiitkiun*ka* ukuinkiam ajapata. Kame chikichik *jiijiai* pujusam nayaimpiniam wétin pen*keraiti*. Antsu jinium mai *jiintiuk* wétin imiá yajauchiiti’ tímiayi.

Murik menkaaka áujmatsamu
(Rúkas 15.3-7)

¹⁰‘Uchi ainia nu nakitraitrap. Yusa suntari nin wáinkiatniua nu winia Aparuj tǵjuch pujuiniawai. ¹¹Kame wi Aents Ajasu asan, menkaakarun eaktajtsan táwitjai.’

¹²‘Enentáimpratarum. Shuar sian (100) murikiun takakuitiat chikichik menkakamtai untsurí menkakacharun náinnium matsaak_u menkakan eaushtatuak. ¹³Wáinkiasha untsurí menkakacharua nujai nankaamas waraschattawak. ¹⁴Núnisan atumi Aparí nayaimpiniam pujana nu, nu uchi chikichiksha menkakacharti tawai’ tímiayi.

Yus-shuarti tsankurnairatin
(Rúkas 17.3)

¹⁵‘Chikich Yus-shuar ámin yajauch túrutmakuinkia nii werim áujmata. Tura ámechik werim ame yatsumjai chichasta. Anturtamkuinkia ame yátsum yáinkiume. ¹⁶Tura anturtamchakuinkia nuyá chikichik shuar jimiará shuarsha jukim ataksha weritia. Túram ataksha áujnaisatarum, niisha paant nekaawarat tusam. ¹⁷Túrasha yatsum tuke ántachkuinkia Yus-shuar iruntainiam iwiainiakta. Túrasha yatsum tuke ántachkuinkia Yus-shuarcha núnisan enentáimtusta nu shuar.’

¹⁸‘Nekasan tájarne, ju nunkanam suritiam nu nayaimpinmasha suritniaktatui. Tura ju nunkanam tsankateam nu nayaimpinmasha tsankatnaktatui.’

¹⁹‘Núnisnak tájarne, ju nunkanam pujusrum jimiará Yus-shuairam métek enentáimprarum winia Apar nayaimpiniam pujana nu seakrumninkia wak-erarmena nuna suramsattarme. ²⁰Jímiar menaintiusha Yus-shuar Winia enentáimturuk iruntrarmatai Wisha nu níjjai pujajai” tímiayi Jesus.

²¹Takui Pítiur werí Jesusan aniasmiayi “Uuntá, winia yatsur yajauch awajtakui ¿urutma tsankuratniuitiaj. Siátikik tsankuratniuitiaj?”

²²Jesus aiyak “Siátik tátsujme, antsu iniannatsuk tsankuratniuitme” tímiayi.

Takakmau tsankurachun pachis áujmatsamiania nu

²³Tuma asa Jesus Yus akupeamunam pachiinkiaru tsankurnairartiniaiti tusa ju métek-taku chichaman áujmatuk tímiayi, “Uunt akupin takarin tumashin akirkarat tusa untsukarmai. ²⁴Yama nánkamuk tí nukap tumashmakua nuna untsukmai. Akikmakchamnia ti tumashmakuyi. ²⁵Tura nu takakmau kuitri atsakui uunt akupin “Yajasma áitkiasrum nuartiuk uchirtiuk ashí waririntiuk suruktaram, timiai. Nu kuitjai akirkati” timiai.

²⁶Tutai nu takakmau uunt akupniun tikishmatar seak timiai “Uunta, waitneasam náarsatá. Auka, mash akiktatjame.” ²⁷Uunt akupin waitnentar mash tsankur ankant akupkamai. ²⁸Tura nú chichamaik nú takakmau jiinki ni ain inkiunmai. Nú aisha nin ishichik tumashiiyi. Tura tsékenki suwenam achik chicharuk timiai “Wari akirkata tumashitmena nu.”

²⁹Tura ni ai nin tikishmatar timiai “Waitneasam náarsatá. Auka, mash akiktatjame” timiai. ³⁰Túrasha nakitramai. Antsu tsankurtsuk sepunam enkeamai ashí akirkati tusa. ³¹Chikich takakmau nuna wáinkiar ti kúntuts enentáimtuiniak uunt akupniun ashí etsertukarmai. ³²Nuna antuk uunt akupin untsuk itia timiai “Yajauchitme. ¿Winia “waitnentrurta” túrutkumin tsankurachmakjam? ³³Amesha núnismek ame aím tsankuratniuitme” timiai. ³⁴Tinia uunt akupin kajekmai. Tura ashí tumashin akikmatsuk asutniati tusa suntarnum surukmai.” ³⁵Jesus nuna áujmatas amúak tímiayi “Núnisan winia Apar nayaimpiniam pujana nu atumin túrutmattarme atumi yachi nekas enentáijjai tsankureachkurminkia.”

19

*Jesus nuwá ajapatniun áujmatsamiania nu
(Márkus 10.1-12; Rúkas 16.18)*

¹ Jesus nuna tinia ikiuak Kariréa nunkanmaya wémiayi. Tura Jurtañ entsa amain Jutiá nunkanam jeamiayi. ² Untsurí aents nemariarmiayi tura jáiniancha péñker awajsamiayi.

³ Nui Pariséu Jesusan nekapsataj tusar aniasarmiayi “¿Shuar ni nuwën itiurchat akui ajapamniakait?”

⁴ Tutai Jesus tímiayi “¿Átumka Yus-Papí áujkachukaitrum? Yámankamtaik Yuska shuáran áishmanñ nuwancha najanamiayi tawai. ⁵ Tuma asamtai áishmanñ ni aparín ni nukurín ikiuki ni nuwejaj tsanin chikichik ayashtinia áinis ajasartatui, tu áarmaiti, tímiayi. ⁶ Tuma asa jímiaracha antsu chikichik ayash áiniawai. Tuma asamtai shuar Yus apatkamia nuna, aents akankashtiniaiti’ tímiayi.

⁷ Takui tiarmiayi “Nuikia ¿urukamta papí áarar nuwá ajapatniun Muisais tsanñatkamia?”

⁸ Tutai Jesus tiarmiayi “Timiá ántichu asakrumin nuwá ajapatniun tsanñatkamiayi. Túrasha émkaka núnischauyayi. ⁹ Wi tájarne, shuar ni nuwën chíkichjaj pujuschan ajapeakka tura chikichan nuatkuñka tsanirmayi. Chíkich áishmanñsha nuwá ajapamun nuátkanñka nusha tsanirmayi” tímiayi.

¹⁰ Takui ni unuiniamurí tiarmiayi “Nuikia áishmanñ ni nuwé penké ikukchamniatkiuñkia nuátkachminiaiti.”

¹¹ Jesus tiarmiayi “Nu chichamnaka mash antukchamin áiniawai. Antsu Yus nuna umiktin susamua nuke antukmin áiniawai. ¹² Chíkich chíkich nuatkachmin áiniawai. Chíkich nuátkachmin akiiniawaru áiniawai. Chikichcha aentsjaj nuátkachmin najanaru áiniawai. Chikichcha nuátainiatsui Yus akupamu takatan takastinian. Juna antuktinian jeáka antukti.”

*Jesus uchin shiir awajsamiania nu
(Márkus 10.13-16; Rúkas 18.15-17)*

¹³ Nuyá Jesusan uchin itiararmiayi. Nin antin Yúsan áujtusarat tusar wakeriarmiayi. Túruiniakui ni unuiniamurí chicharkarmiayi. ¹⁴ Túruiniakui Jesus tímiayi “Uchi Winí winitin tsanñatkatarum. Suritkiairap. Kame ju uchia áintsan péejchach áinian nunak Yus akupkamniaiti.” ¹⁵ Tinia uchin miniakas nuyá wémiayi.

*Kuítrintin Jesusjaj chichasmiania nu
(Márkus 10.17-31; Rúkas 18.18-30)*

¹⁶ Shuar natsa Jesusan tarin aniasmiayi “Uuntá, péñkeraitme. Tuma asam turuttia ¿warinia túrakna tuke iwiaaku átataj?” tímiayi.

¹⁷ Tutai Jesus nin enentáimtikrataj tusa tímiayi “¿Urukamta péñkeraitme túrutam. Shuar péñkerka atsatsuk. Aya Yúskechukait? Wats, tuke iwiaaku pujustaj tákumka akupkamu umírkartá.”

¹⁸ Tutai shuar “¿Tuna nekas umirkatniuitiaj?” tímiayi.

Takui Jesus tímiayi “Manñkartuawaip, tsanirmawaip, kasámkáip, chíkich shuar tsanumpruraip, ¹⁹ ame apa nukusha umírkartá, ame shuárum ame ayashim aneamna nútiksamek aneeta.”

²⁰ Tutai natsa tímiayi “Núnaka úchichik mash umiki tsakaruitjai. Nuyasha ¿warí táatrusa?” tímiayi.

²¹ Takui Jesus tímiayi “Nekas péñker átaj tákumka, weme ame kuítrum kuítrincha ainia nu súsartá. Tura nayaimpiniam kuítrintin ajastatme. Nuyá

Winia nemártústá” tímiayi Jesus. ²² Tura natsa nuna antuk kúntuts wémiayi ti kuítrintin asa.

²³ Nuyá Jesus ni unuiniamurín tiarmiayi “Nekasan tájarme, kuítrintin Yus akupeamunam pachiinkiatin tí itíurchataiti. ²⁴ Ataksha tájarme, kamiriuka kawái nan̄kaamas uunt asa auja jín wayachminiaiti. Núnisañ kuítrintin Yus akupeamunam pachiinkiatin tí itíurchataiti.”

²⁵ Ni unuiniamurí nuna antukar antúu ajarmiayi. Túrawar aniniainiarmiayi “¿Nuikia yaki uwempramniait?”

²⁶ Tuíniakui Jesus ashí íisar tímiayi “Aents uwempratniun nekas tujintiainiawai antsu Yuska ashí tujintiatsuí.”

²⁷ Nuyá Pítiur tímiayi “Uuntá, iikia ashí ikiukchajik Ámin nemarsatai tusar. ¿Warín wáinkiatjái iisha?”

²⁸ Jesus tímiayi “Nekasan tájame, ukunman̄ka jū nun̄ka yamaram ajastatui. Aents Ajasu asan, Wisha nuí, uunt akupin ajastatjai tura atumsha winia nemartusutirmeka Wijjái métek akupin ajastatrumé ashí Israer-shuar akupkatin. ²⁹ Tura shuar ni jeencha, yachíncha, umaincha, aparíncha, nukuríncha, nuaríncha, uchiríncha, tura nun̄kencha Winia anentu asa ikiukin wekaakka, nu shuar níi ikiukmia núnisañ yamaisha ti untsurí wáinkiatjawai tura ukunmasha tuke shiir pujustatui Yusjai. ³⁰ Untsurí yamáí penkerí áiniana nu ukunam ukunmaani pujusartatui, tura yapajíáwar yamáí ukunmayá áiniana nu ukunam emka pujusartatui’ tímiayi Jesus.

20

Jesus takarniun pachis áujmatsamiania nu

¹ Yus akupeamunam pachiinkiatin júnisaiti. Nun̄ka nérentin ni araamurín júuktaj tusa káshik iniartaj tusa jínkimiai. ² Chikichík tenariu kuit jean tsawant takamtsuk akiktajrume tusa chichas ni araamun júuktinian akupkarmiayi. ³ Nantu takuntaisha ataksha jiinki shuar yujan wáiniak ⁴ timiai “Atumsha winia arakur júuktin yáintkiatarum. Shiir akiktajrume.” Tutai wearmai. ⁵ Ataksha tutupin aí nuyá áan̄kúsha jiinki, núnisañ tinia akupkarmai. ⁶ Ataksha nantu patamsai jínkimiai. Tura shuaran yujan wáiniak “¿Urukamtai takakmatskesha áani pujarum?” timiai.’

⁷ “Warí, iincha iniatmainiatsji” tiarmai.’

“Tuíniakui timiai “Atumsha winia nun̄karuí takautarum. Péñker akiktajrume.”

⁸ Kirit ajátekiái takatrín wáinniun timiai “Takatan takasaru untsukam akikiarta. Kíarai nan̄kamawaru emka akikiarta. Túram káshik nan̄kamawarujai amuktá” timiai. ⁹ Takui nantu patamsa aí nan̄kamawaru wayawarmatai chikichík tenariu kuit jean ashí akikiarmai. ¹⁰ Mash umintramtai nuyá emka nan̄kamawaru wayawar “nuna nan̄kaamas achikchatjash” tu enentáimsarmai. Tura chikichík tenariu kuit jean achikiarmai. ¹¹ Achikiar nérenniun itíurchat enentáimturarmai. ¹² Tura tiarmai “Iikia ashí tsawant nantujai wáitsachjik. Jū shuarsha nantu patamsa aí nan̄kamawaruka penké ishichik takasari. Túrasha iijjai métek akikiarume” tiarmai.

¹³ Tutai nérentin chikichikiniak iniakmas timiai “Umpá, penké kasartsujme. Káshik chikichík tenariu kuit jeá chichasar iijjai iwiarachjik, timiai. ¹⁴ Pai, ame kuítrum achikiume. Nantu patamsai takasuncha amijjai métek akiktinian wakerajai. ¹⁵ Warí, winia kuítrujai wi wakeramun túrachminkaitiaj. Antsu wi tsan̄ka asamtai ¿yajauch enentáimturmek?” timiai.’

¹⁶ ‘Núnisaiti Yus-shuarnum. Émkaru áinia nu uku ártatui. Tura ukuya áiniana nu, emka ártatui. Untsurí ipiaamu áiniawai tura ishichik achikma áiniawai.’ Tu áujmatsamiayi Jesus.

*Jesus ataksha ni jákatniurin etserkamiania nu
(Márkus 10.32-34; Rúkas 18.31-34)*

¹⁷ Jesus Jerusarénum jintiá wesa ni unuiniamurin akankin tiarmiayi
¹⁸ “Iistarum, Jerusarénum wéaji. Nuisha Israer-patri úuntrin tura ni jintin-
niurinchá Winia surutkartatui. Nuisha, wi Aents Ajasu aijn, “mantamnati”
túrutiartatui. ¹⁹ Tura apachnium surutkartatui. Nui katsekrugar, awattiar
krúsnum máawarti tusar túrutawartatui. Túrasha jakayatan menaintiú tsawan-
taj nantaktiatjai” tímiayi.

*Jakupu tura Juanka nukurí Jesusan seamiayi
(Márkus 10.35-45)*

²⁰ Nuyá Jakupusha Juansha, mai Sepetéu uchirí, nukuríjiai tariar Jesusan
tikishmatrarmiayi. Tura nukurí Jesusan waitnentrurarat tusa seamiayi.
²¹ “¿Warí wakeram?” tímiayi Jesus.

Tutai nuwá tímiayi “Ame uunt akupin ajastatmena nui winia uchir chi-
kichik untsurnumaani chikichicha menaanmaani akupkarti tusam apu-
jsarta.”

²² Takui Jesus tiarmiayi “Atum seatrumna nu nékatsrume. ¿Wi wáitsattajna
nujai métek túramniakaitrum? Wi wáitsatniun yapá umartinia áinis umar-
tiniaitjai. Núnisan wáitsatniujai imiaitniua áintsan imiantiniaitjai. ¿Nú
piniñnumiá umarminkiaitrum. Núnisan imianminkiaitrum?”

Tutai “Páchitskea” tiarmiayi.

²³ Tuíniakui Jesus tímiayi “Ayu. Winia pininkruiya umartatrume. Wi
imiantiatjana nujai imiantiatrume. Antsu Wijjai tsaniñkia pujustinniaka
Wikia íschatniuitjai, antsu winia Apar iwiarturu áinia nuna nui apujsattawai”
tímiayi.

²⁴ Chíkich tias (10) unuiniamuri nuna antukar nu jímiaran kajerarmiayi.
²⁵ Túmainiakui Jesus untsukar tiarmiayi “Ju nékarme, apachniumka kapi-
tián ajasar ni shuarin nérenniua áinis ti akupenawai. Ni úuntrisha waantu
enentáimsar “wíitjai akupniun” tu enentáimtikiaiiniawai. ²⁶ Antsu atumjainkia
núnis áchatniuiti. Nankaamaku ajastaj tákuñka chikicha yaintri átiniaiti.
²⁷ Ame kapitiantrum ajastaj tákuñka ashí shuara yaintri ajástí. ²⁸ Wisha Aents
Ajasuitiatan, Winia yáintkiarat tusan táchaitjai antsu shuáran yáintaj tusan
táwitjai. Untsurí shuaran tunáa tumashrin akikmatkataj tusan jákatniuitjai.
Nuna tarimjai” tímiayi Jesus.

*Jímiar jii kusurun Jesus tsuármiania nu
(Márkus 10.46-52; Rúkas 18.35-43)*

²⁹ Jirikiú péprunmaya wénakui untsurí aents Nin nemariarmiayi. ³⁰ Nui
jintiá yantam jímiar jii kusuru pujuarmiayi. Jesus wéawai taman antukar
kakantar untsukarmiayi. “Uuntá, uunt akupin Tawitia Uchirinchkaitiam.
Waitnentrurta” tiarmiayi.

³¹ Tuíniakui “Takamatsatarum” tiarmiayi.

Tútaisha nú nankaamas untsukarmiayi. “Uuntá, Tawitia Uchiriá, wait-
nentrurta” tiarmiayi.

³² Tuíniakui Jesus wajas jii kusurun untsukar aniasarmiayi “¿Warí itiurtukat
tusarum wakerutarum?”

³³ “Uuntá, iimtiaí tusar wakeraji” tiarmiayi. ³⁴ Tuíniakui Jesus nin waitnen-trar ni j̄in antin̄kiarmiayi. Nu chichamaik ím̄iar niisha Jesusan nemariarmi-ayi.

21

Jesus Jerusarénnum wayamiania nu
(Márkus 11.1-11; Rúkas 19.28-40; Juan 12.12-19)

¹ Jerusarénnum nuntumsar Petpajái péprunam jeawarmiayi. Nusha Uriwiu náinnium ayamchiiyayi. Nūi jeawar Jesus ni unuiniamur̄in j̄imiaran aku-peak tímiayi ² “Tíj̄iuch péprunam wérum umpuuru umpuuruchij̄īai j̄in̄kiamu wáinkiatarme. Nu atiarum itartitiarum. ³ Tura aents “Urukamtai áitkiarum” túramkurminkia “Uunt wakerawai, tura wárik awain̄kittiwai” titiarum” tímiayi.

⁴ Tura nusha yaunchu Yúsnan etserin aarmia nu umínkiatí tusa tímiayi. J̄únis áarmiayi:

⁵ “Ashí Israer-shuarnum j̄u etserkatarum:

“Iistarum, atumi Akupniur̄i, péejchach ajas umpuuruchiniam ekeemak winitramprume. Péejchach asa káarak áintstai umpuuru uchir̄in ekeemak winitrámtrume,” titiarum.” Tu áarmaiti.

⁶ Tutai nu j̄imiar unuiniamur̄i wear Jesus timia núnisan̄ túrawarmiayi. ⁷ Umpuuruchin nukurtiuk itiararmiayi. Tura ni pushir̄in áitkiaram Jesus entsamkamiayi. ⁸ Shuar untsur̄i ásar ni wéamunam pushir̄in áitkiarmiayi. Chikichcha nuká jurukar ni wéamunam áeprurarmiayi. ⁹ Shuar untsur̄i eem wearmia nusha tura uku winiarmia nusha kakantar untsumiarmiayi. “J̄una wēatr̄i uunt akupin Tawit asamtai nan̄kaamakuiti. Yusa náar̄in winiana j̄u ii Untr̄inti. Shiir atí. Nayaimpinmasha Yus shiir awajsatai.” Tu untsumi-armiayi.

¹⁰ Jesus Jerusarénnum wayamtai ashí shuar ti enentáimainiak “¿J̄usha yait?” tiarmiayi. ¹¹ Chikichcha “Yúsnan etserin Jesusaiti, tiarmiayi. Nasarét pepru Kariréa nun̄kanmayaiti” tiarmiayi.

Yusa Uunt J̄een suruktinian Jesus surinkiamiania nu
(Márkus 11.15-19; Rúkas 19.45-48; Juan 2.13-22)

¹² Nuyá Jesus Yusa Uunt J̄een wayá kuítian súruiniak tura súmainiak pujan akúprámiayi. Kuítian yapaj̄inia misar̄incha ayanturmiayi tura yampitsa súruinia kutan̄kr̄incha núnisan̄ ayanturmiayi. ¹³ Nuyá tímiayi “Yus-Papinium áarchamukait,

“Yusa J̄eenka Yus aujtai j̄éaiti.” Antsu átumka kasa matsamtaiya nútikiarme” tímiayi.

¹⁴ Nūi Yusa J̄een j̄īi kusurarusha shutuapsha Jesusan tariarmiayi. Túramtai tsuárarmiayi. ¹⁵ Tura Israer-shuar pátrisha tura Israer-shuara jintinniur̄isha aents tujintiamun Jesus túrakui íisar kajerarmiayi. Nu arantcha uchi Yusa J̄een “J̄una wēatr̄i uunt akupin Tawit asamtai nan̄kaamakuiti” untsumainiakui Jesusan ti kajerarmiayi. ¹⁶ Tura tiarmiayi “¿J̄u uchi tuinia nu ántamek?”

Tutai Jesus “Ee, ántajai, tímiayi. Átumka Yus-Papí j̄una tana j̄uka áuj̄sachukaitrum. J̄únis tawai,

“Uchisha kuír̄chisha Yusa náar̄in imiá shiir awajtusarat tusa Yus tsan̄katkaiti.”

Tu áarmaiti.

¹⁷ Nuna tinia ikiuiniak Jerusarénnumia j̄īinki Petania péprunam we nūi kanarmiayi.

Jesus iikiu numin yum̄inkramiayi
(Márkus 11.12-14, 20-26)

¹⁸ Kashin tsawaar Jerusarénnum waketas Jesus tsukaarmiayi. ¹⁹ Iikiu numi jintiá yantam wajan wáiniak akaktajtsa werimiayi. Tura werí aya núminiak wáinkiamiayi. Túra numin tímiayi “Atakka nerekchattame.” Takui nu chichamaik káarmiayi.

²⁰ Nuna wáiniak ni unuiniamurí ti enentáimprar aniasarmiayi “¿Urukaku imiá wárik jaka?”

²¹ Tuíniakui Jesus tiarmiayi “Nekasan tájarme, Yus nekas enentáimtakrumka, “nekasplash túrat” táchakrum iikiun túrajna nusha túramniaitrume. Tura nu arantcha nu naint “Ékemtam nayaantsanam iniaṅta” tutai túrunattawai.

²² Ashí Yus áujeakum seamna nu, Yus nekas enentáimtakum seakmeke, wáinkiáttame” tímiayi.

Yusa kakarmarijajai Jesus takasmiania nu

(Márkus 11.27-33; Rúkas 20.1-8)

²³ Yusa Uunt Jeen Jesus wayá unuiniamiayi. Turaj Israer-patri uuntri tura Israer-shuara úuntri sha Jesusan tariar aniasarmiayi “¿Yana chichamejajai ju túram. Ya ju túratniuncha akuptamkait?” tiarmiayi.

²⁴ Tutai Jesus tiarmiayi “Wisha aniastaj tusan wakerajrume. Ju áirkakrumniṅkia Wissha yana chichamejajai túraj nuna ujaktatjarme. ²⁵ Wats, ¿ya imiakratin Juanṅkan akupkamia. Yusak, aentsuk, ya akupkamia?”

Tutai nuámtak tunainiarmiayi. “Yus akupkamiayi” tákurniṅkia “¿urukamtai enentáimtichuitrum?” túramtatji. ²⁶ Kame “shuar akupkaiti” tákurnisha ashí aents mantamattaji. Warí, ashí niisha Juan Yúsnan etserniuyi tuíniatsuk” tiarmiayi. ²⁷ Nuyá Jesusan “Nékatsji” tiarmiayi.

Tutai Jesussha aṅiniak “Wátsek, Wissha núnisnak akuptukua nuna ujakchat-tajrume” tímiayi.

Jimiará uchi tiarmia nuna áujmatsamiania nu

²⁸ Jesus unuiniak tiarmiayi “Enentáimpratarum. Shuar uchin jímiaran takakuuyi. Nuna chikichkin chicharuk timiai “Uchirú, arakur júuktin yamá wetá.”

²⁹ “Tutai uchi “Atsá, nakitiajai” timiai. Tayat urum enentáimiar takaumai.’

³⁰ ‘Nuyá aparí chikichnasha werí núnisan timiai.’

‘Tutai uchi “Apawa, páchitsuk wetajai” timiai, túrasha wéchamai.’

³¹ ‘¿Túa ni aparí wakeramun umirkama?’ tímiayi Jesus.

Tutai “Emkaa nu” tiarmiayi.

Tuíniakui Jesus tímiayi “Nekasan tájarme, yajauch shuar ainia nu tura tsanirma ainia nusha átumka pachiintsrumniṅ nii emka Yus akupeamunam pachiinkiertatui. ³² Iis, imiakratin Juan péṅker wekasatniun et-serkamiayi, túrasha antukchamarme. Antsu yajauch shuar ainia nu tura tsanirma ainia nu umirkarmiayi. Nusha wáinkiaiatrum atumi tunaari enentáimturchamarme’ tímiayi.

Yajauch takaun áujmatsamiania nu

(Márkus 12.1-12; Rúkas 20.9-19)

³³ Ju chíkich áujmatmasha antuktarum. Nunká nérentin uwa ajan ajamai. Tura wenuimiai. Uwa neketaincha najanamai. Kumpin jeancha najanamai. Tura mash péṅker iwiar shuar wáitrukarti tusa apujkimiai. Tura niṅkia yajá nunṅkanam wemai. ³⁴ Tura júuktin tsawant jeamtai juuk nakak akúptúrkartí tusa chíkich takarniurí akupkamai. ³⁵ Tura nuj pujuinia nu, akupkamun achikiar chikichnaka katsumkar, chikichnasha máawar, chikichnasha kayajajai tukurar máawarmai. ³⁶ Túrawarmatai nérentin takarniun nuna nanṅkaamas akupramai. Ataksha nuj pujuarmia nu núnisan

túrawarmai. ³⁷ Amúamunam ni uchirín akupeak “Winia uchir asamtai umirkachartimpiash” timiai. ³⁸ Túrasha nu takau nérenniu uchirín wáinkiar “Nuna aparí jakamtai juna mashi júkishtatuak, tiarmai. Maatai, túrar ii nérentin ajastai” tiarmai. ³⁹ Tiar achikiar arant júkiar nuí máawarmai.” ⁴⁰ Tinia Jesus aniasarmiayi “Nuńká nérenniuri taa nu takaun ¿itiurkatin?” tímiayi.

⁴¹ Tutai tiarmiayi “Nu shuar ti yajauch ásarmatai waitnentsuk máawartatui. Tura nu ajan chíkich takaun neren akanak nin susamnia nuna apujsattawai” tiarmiayi.

⁴² Tuíniakui Jesus tímiayi “Átumka Yus-Papikia ¿penkek áujchaitrum? Júnis áarmaiti:

“Jeá jeamin utsankarmia nú kaya ashí kayajai nankaamas apujsamuiti.

Núnaka ii Uuntrj Yus túraiti. Iisha ísar ti enentáimtaji.” Tu áarmaiti.

⁴³ Tuma asamtai tájarme, Yusna írunna nu wáinkiatárum tusa suramsamuitiat atumíya junas chíkich aents súnastatui. Niisha awantukiartatui. ⁴⁴ Tura shuar nu kayan tukumainia nuka kupintrartatui. Tura nu kaya shuarnum iniarka tsai tsai awajsattawai auka” tímiayi Jesus.

⁴⁵ Israer-patri uuntrisha Pariséusha Jesus áujmatman antukar “in túramji” tusar achiktaj tiarmiayi. ⁴⁶ Tura ashí aents “Jesus Yúsnan étserui” tuinia ásarmatai nin ashankarmiayi.

22

Métek-taku chichamjai nuatnaiyamun Jesus áujmatsamiania nu

¹ Jesus ataksha áujmatuk juna tímiayi: ² “Yus akupeamunam pachiinkiertin júnis enentáimpramniaiti. Uunt akupin ni uchirí nuáteakui nampermamai. ³ Túrak ni takarniurín ipiaamautarum tusa akupkarmai. Tura ipiaamusha nakitrarmai. ⁴ Ataksha chíkich takarniuncha ipiaamakrum ju titiarum tusa akupkarmai. ““Mash yurumkan iwiarajai, tawai, titiarum, timiai. “Waakasha máatarum tusan akupkarjai, tawai. Ajaermancha máatarum tusan akupkajai, tawai. Ashí nuatnaiyamunam winiarti,” tawai” titiarum” timiai. ⁵ Támaitiat nú ipiaamusha nakitrarmai. Chikichik ni nuńken wemai. Chikichcha kuítian suruktinian wemai. ⁶ Chikichcha ipiaakratniun achikiar yajauch awajsarmai, tura chikichnaka máawarmai. ⁷ Túramtai uunt akupin ti kajek, ni suntari mash máatarum túrarum ni jeé mash ekeemáktárum tusa akupkarmai. ⁸ Nuyá ataksha ni takarniurín akupkamai. “Nuatnaikiatin jísat mash iwiamuiti, timiai. Tura nu ipiaamu winichmin armai. ⁹ Tuma asamtai pepru jintí werum ashí shuar nánkamas wáintrum nu ipiaatarum” timiai. ¹⁰ Takui takarniuri jínkiar pepru jintin wajainian, yajauch shuar-nasha péńker shuarnasha, ashí ipiaawarmai. Túramtai jeá piákmái.”

¹¹ ‘Nuyá uunt akupin ipiaamun ísartaj tusa wayamai. Nuí shuaran péńker iwiamamprachun wáinkiamai. ¹² Tura timiai “Umpá, ¿urukamtai nuatnaiyamunam entsatai pushí entsatsuk wayam?” Tutai nu áishman tákamtak pujusmiayi. ¹³ Nuyá uunt akupin yurumka ajaaman timiai “Achikrum nawen-masha uwejnusha jínkiarum aa júnkrum kiritniunam ajapatarum. Nuisha ti úutin ti wáitsatin átatui” timiai. ¹⁴ Kame untsurí ipiaamu áiniawai antsu ishichik achikma áiniawai.”

Uunt akupin Sésar akiktinia nu

(Márkus 12.13-17; Rúkas 20.20-26)

¹⁵ Nuyá Pariséu chichaman najatawar uyumtikiatai tusar tiarmiayi. ¹⁶ Túrawar ni shuarincha tura akupin Erutisa nemarniurisha Jesusan akup-tukarmiayi. Kame akupin Erutis uunt akupin Sésara kuítri wáinin asamtai nu apachniasha akupkarmiayi. Niisha jeariar Jesusan tiarmiayi “Uuntá,

amesha nekas chicham chichaame. Nu nékaji. Chíkich shuar tuinia nu ántutsuk nekasam Yus-Chicham jintíame. Shuar shiir enentáimturarat tusam jintíatsme, tiarmiayi. ¹⁷ Tuma asamtai ju nekaatai tusar wakeraji. ¿Uunt akupin Sésar akikminkiait?” tiarmiayi.

¹⁸ Jesus ni yajauch enentáijjai aníam nekáa tiarmiayi “Aya shiir chicham-tiniaitrume. ¿Urukamtai uyumatkiarkatin wakerutarum? tímiayi. ¹⁹ Wats, Sésar akiktinia nú kuit itiartitiarum.” Takui chikichik kuítian itiariarmiayi. ²⁰ Nuna iis Jesus aniasarmiayi “¿Juí yana yapimpiait tura yana naari áarmait?”

²¹ Tutai “Uunt Sésarna” tiarmiayi.

Tuiniakui Jesus chicharuk tiarmiayi “Nuikia uunt Sésarna nu, Sésar susatarum. Tura Yusna nusha Yus susatarum” tímiayi. ²² Tura nuna antukar ti enentáimprarmiayi. Tura ikiuiniak wearmiayi.

Jesusan jakamunmaya nantaktinian aniasarmiania nu
(Márkus 12.18-27; Rúkas 20.27-40)

²³ Nu tsawantajk Satuséusha Jesusan tariarmiayi. Satuséuka jakamunmaya nantakchatniuiti tuíniawai. Nuna tiniu ásar juna Jesusjai áujmatsarmiayi.

²⁴ “Uuntá, Muisais juna áartampramijai, “áishman uchin yajutmatsuk jakam-tainkia ni yachi nu nuwan nuatak ni yachin yajútmátrati,” tu áarmiayi, tiarmiayi. ²⁵ Ayu, íi shuarnum siati (7) yáchintin áarmiayi. Iwiairi nuatak uchin yajutmatsuk jakamiayi. Tura wajen ni yachin ikiurkimiayi. ²⁶ Tura niisha nuatak uchin yajutmatsuk jakamiayi. Tura chikichcha núnisan jakamiayi. Tura chikichcha siati armia nu ashí nuatkar jákarmiayi. ²⁷ Nuyá nuwasha jakamiayi. ²⁸ Jakamunmaya nantakiar ¿yaki nekas ni aishri ati? Ashí nin nuatkacharmakia” tiarmiayi.

²⁹ Tuíniakui Jesus tímiayi “Yus-Chichamsha nékachkuram tura Yusa kakarmarisha nékachkuram nantaktin atsawai tákuram ti awajiarne.

³⁰ Nekaatarum. Jakamunmaya nantakiaruka nuatkachartatui. Antsu Yusa suntari nayaimpiniam pujuinia núnisar nuartichu pujusartatui.

³¹ Túrasha jakamunmaya nantakiartatna nu nekaatajtsa wakerakrumka ju enentáimsatarum. Muisais aarma nu áujkachukaitrum. Júnisan áarmiayi:

³² “Wiitjai Apráama Yúsrinjai, Isaka Yúsrinjai, Jakupu Yúsrinjai.” Tu áarmiayi. Watsek, Yuska jaká Yúsrinchuiti. Antsu iwiaaku ana nuna Yúsrinti, tímiayi. Iis, nu shuar imiá yaunchu jákaruitiat Yusjai iwiaaku pujuiniak nantakmin áiniawai” tímiayi. ³³ Ashí aents nuna antukar nu jintintiam ti enentáimprarmiayi.

Yus akupkamu imiá enentáimtustinia nu
(Márkus 12.28-34)

³⁴ Satuséu Jesusan aiktinian tujinkiarmatai Pariséu nuna antukar iruntrarmiayi. ³⁵ Tura chikichik Pariséu jintintin asa Jesusan uyumtikiataj tusa aniasmiayi ³⁶ “Uuntá, ¿túa Yus akupkamu imiá nankaamas enentáimtustiniait?”

³⁷ Tutai Jesus tímiayi “Júiti: “Ame Yúsrum ashí enentáimjai aneeta. Ashí ame wakanmijiaisha tura take enentáimtusam aneeta.” Tu áarmaiti, tímiayi. ³⁸ Núiti emka ashí akupkamu nankaamas enentáimtustinia nu. ³⁹ Chikichcha jujai métek-taku awai. Nusha tawai: “Ame írutramuram ame ayashim aneamna nútiksamek aneeta.” ⁴⁰ Nu jímjar akupkamu umirkam ashí Muisais akupkamia nusha tura ashí Yúsnan etserin unuiniararmia nusha umirkattame” tímiayi.

Kristu Tawit weeitiat Yusa Uchirinti
(Márkus 12.35-37; Rúkas 20.41-44)

⁴¹ Tura Pariséu tuke irunar pujuiniakui ⁴² Jesussha aniasarmiayi “Kristu tutai ¿ya weeá átiniait. Warí enentáimtarum atumsha?”

Takui “Tawit weeá átiniaiti” tiarmiayi.

⁴³ Tuíniakui Jesus tiarmiayi “Nuikia ¿urukamtai Tawit, Yusa Wakaní “titia” tutai, Krístun “winia Úuntur” tímia? Iis, Tawit juna tímiayi:

⁴⁴ “Uunt Yus winia Úuntrun juna tímiayi: “Akupin pujutainium, winia untsuruini, pujusam nákarsata. Ashí ame nemasrumin nupetkan Ámin umirtamkarti tusan amastatjai” tímiayi Yus.” Tu tímiayi Tawit.

⁴⁵ Watsek, Tawit Krístun “winia Úuntur” taisha ¿itiurak ni pampanmari áti?” tímiayi Jesus. ⁴⁶ Nuna takui penkesha áikcharmiayi. Túrawar atakka uyumantikiatai tusar aniascharmiayi Jesusan.

23

Jesus Pariséuncha Israer-shuara jintiniurincha “yajauchitrume” timiania nu (Márkus 12.38-40; Rúkas 11.37-54; 20.45-47)

¹ Jesus ni unuiniamurincha tura ashí shuárnasha tiarmiayi ² “Israer-shuara jintinniurisha tura Pariséusha Muisais akupkamun paant ujatmainiawai.

³ Tuma asamtai tuinia nu umirkatarum. Túrasha ni túruinia nu jumamkiirap. Nu shuar shiir chichainiayat nusháa túrin áiniawai. ⁴ Ti itiurchat ana nuna akupeenak ti emeram entsaktinia áintsan áentsun apujtuiniawai. Túrasha chikichik uwejéjaisha ishichkisha takuitniun nakitiainiawai. ⁵ Aya shuar íirsarti tusar ashí túruiniawai. Ashí shuar péñker enentáimturarti tusar Yus-Papin nijiaincha tura kunturincha ti wan_karam awajsar anujak yujainiawai. Tura nu arantcha pushiri sasariarman ashí shuarjai nan_kaamas esaram awajas wekainiawai. ⁶ Nampernumsha péñker iwiaramunam pujustinian wakeruiniawai. Iruntainmasha nan_kaamantu ajasa pujustinian wakeruiniawai. ⁷ Jintiá wekainiaksha ashí aents áujtuiniak “Jintínkiartiniá” turutiarti tusa wakeruiniawai’ tímiayi.

⁸ “Túrasha átumka ashí shuar “Jintínkiartiniá” turutiarti tusa enentáimsashtiniaitrume. Átumka nuámtak yáchintrume. Átumka chikichik jintinkiarin ni naari Kristu takakrume. Nu asamtai “Jintínkiartiniá” túramcharmin áiniawai. ⁹ Ju nun_kanmasha shuar “Aparú” tiirap. Chikichik nayaimpiniam pujana nu atumí Aparínti. ¹⁰ Atumi uuntri aya Krístuk asamtai “Uuntrú” túramcharmin áiniawai. ¹¹ Antsu átum írutkamunmaya uunta nuka peejchach átiniaiti. ¹² Shuar nan_kaamantu ajastaj tákuinkia Yus nin peejchach awajsattawai. Antsu peejchach ana nuna Yus nin nan_kaamaku awajsattawai’ tímiayi.

¹³ ‘Maa wáinkiatárum jintinniutirmesha, Pariséutirmesha. Ántrarum shiir chichamtiniaitrume. Yus akupeamunam wayatin waiti epenniuitrume. Atumsha wayatsuk chikichcha wayataj tuinia nusha suritniuitrume.’

¹⁴ ‘Maa wáinkiatárum jintinniutirmesha, Pariséutirmesha. Ántrarum shiir chichamtiniaitrume. Wajé jee atankiirum aents enentáimturarain tusarum ti esaram Yus áujtiniaitrume. Túrin asarum átum ti asutniátniuitrume.’

¹⁵ ‘Maa wáinkiatárum jintinniutirmesha, Pariséutirmesha. Ántrarum shiir chichamtiniaitrume. Nun_kanmasha nayaantsanmasha yajá wekainiuitrume chikichik shuar winí nemartusat tusarum. Tura atumi nemari ajasmatai atumjai nan_kaamas tunáa sumamamnia awajearme.’

¹⁶ ‘Wáinkiatárum átumka. Jintinkiariniaitiatrum nékachu asarum kuserua áiniuitrume. Ju jintíarme: “Shuar nekasan tajai tusa Yusa Jee páchiakka nii tana nuna umitsuk ikiukminiaiti. Antsu nekasan tajai

tusa Yusa Jēn kuri ana nuna páchiakka ti nekas umiktiniaiti” t́niuitrume. ¹⁷ Nétsetrume. Yúsjaínkia ashí kuri ánrachukait. Antsu Yusa Jēn írunna nuka aya nuin ikiusma asa Yusna ajasuiti. Tuma asamtaí kurijjai nankaamas Yusa Jē enentáimtustiniaiti. Enentáimcha asarum kusurua áinin wáakuitrume. ¹⁸ Nu arantcha t́niuitrume: “Shuar nekasan tajai tusa naman-maar-Yus-sútain páchiakka nii tana nuna umitsuk ikiukminiaiti. Antsu Yús-sutainiam naman patasman páchiakka ti nekas umiktiniaiti” t́niuitrume. ¹⁹ Nétsetrume. Penké naman Yusjai ánrachukait. Aya Yús-sutainiam patasma asa nu naman enentáimtuschatniukait. Enentáimcha asarum kusurua áinin wáakuitrume. ²⁰ Enentáimpratarum. Shuar nekasan tajai tusa Yús-sutain páchiakka aya sútainiak páchiatsui antsu sutaincha tura nuí patasmancha máí-metek páchiawai. ²¹ Núnisan shuar Yusa Jēn páchiakka aya nunak páchiatsui antsu Yus nu jeanam pujú asamtaí nunasha páchiawai. ²² Núnisan shuar nayaimpin páchiakka Yus pujutainchsetrume. Penké naman Yusjai ánrachukait. Aya Yúa tura Yus nuí pujana nunasha páchiawai.’

²³ ‘Maa wáinkiatarum jintinniutirmesha, Pariséutirmesha. Ánrarum shiir chichamtiniaitrume. Kumintsu nukeshá, anisa nukeshá, menta nukeshá tias (10) akantram chikichik akankamu Yus súwitrume. Nuka péñkeraiti, ikiukchatniuiti. Túramaitiat nekas péñker túratniua nu túrutsuk ikiuwitrume. Yus nekas enentáimtustincha, waitnentáimturincha tura tuke péñker túratniusha enentáimtsuk ikiuwitrume. ²⁴ Átumka jintinkiertiniaitrum nékachú asarum kusuru áiniuitrume. Kutanam yajasmach enketu wáinkiumeka júwitrume. Túrayatrum kamiriu wáinkiumeka kawai nankaamas úunt ain takamtsuk kújawitrume.’

²⁵ ‘Maa wáinkiatarum jintinniutirmesha, Pariséutirmesha. Ánrarum shiir chichamtiniaitrume. Átumka tsapasha pininsha initiaani nijiatsuk aya pátatek nijiawitrume. Núnisrum pátatek shiir awajmamniuitrume tura enentáiminkia kasamkatniusha tura chíkichna wakeruktincha nujai piákuitrume. ²⁶ Kusuru áiniuitrume, Pariséutirmeá. Antsu emka initiaani tsapasha pininsha nijiaktarum. Túrakrumniinkia pátatesha mai péñker átatui. Núnisrum atumsha atumi enentáin ana nu shiir awajsarum pátatesha shiir átatrume.’

²⁷ ‘Maa wáinkiatarum jintinniutirmesha, Pariséutirmesha. Ánrarum shiir chichamtiniaitrume. Iwiarsamu pújujai yakarar shiir awajsamua áiniuitrume. Aani shiir ániawai. Tura initkia jaká ukunchijjai piákuiti. ²⁸ Núnisaitrume atumsha. Chíkich shuar ísmaka ti shiira áiniuitrume. Túrasha atumi enentáinkia ashí mujmiai piákuiti.’

²⁹ ‘Maa wáinkiatarum jintinniutirmesha, Pariséutirmesha. Ánrarum shiir chichamtiniaitrume. Yaunchu Yúsnan etserin iwiarsamunam átumka shiir enentáimtakrum jea jeamkairume. Tura péñker shuar yaunchu jákarusha shiir enentáimturtaj tusarum ni iwiarsamu shiir awajearme. ³⁰ Túrakrum ju t́niuitrume: “Iikia yaunchu ii weatrijai pujaitkiurkia Yúsnan etserin máatin yáimkiachaaji.” ³¹ Nujai ti paant chichaarme atumsha. “Ii weatri Yúsnan etserniun máawar tunáa túrin ármiai” tárume. Tura “Yáimkiachaaji” táyatrum, atumsha métek túrin asarum “Nijijai méteketji” tárume. ³² Wats, atumi weatri nankamawarmia nu átum amuktatrume’ t́miayi Jesus.

³³ ‘Napia áiniuitrume. Shuar aya yajauch awajniuitrume. Túmatirmesha Yus tunáa shuaran jinium akupkartatna nuya çitiurak uwempratarum? ³⁴ Untsurí shuaran akuptuktatjarne. Yúsnan etserniuncha, ti nekancha,

jintinkiertinniasha akuptuktatjarme. Tura atumsha chíkich máattarme, chikichcha krúsnum ajintruarum máattarme, chikichcha iruntai jeanam asutiáttarme, tura chikichcha ashí nunkanam áintrattarme. ³⁵ Nu tura asarum péñker shuara numpé puarma nujai átum sumamattarme. Yámankamtaik Apir ti penker shuáraitiat máamuyayi. Tura ukunam Perekíasa uchirí Sakarías atumi uuntri Yusa Jee ámanum namañ-maar-Yús-sutai ajapén aténkamunam máawarmiayi. Wats, Apir máamunmaya Sakarías máamunam ashí péñker shuar ti untsurí máamujai sumamattarme. ³⁶ Nekasan tájarme, yamá pjuinia nú shuar ashí nujai sumamawartatui' tímiayi Jesus.

Jerusarénumia shuaran Jesus aneak útmiania nu
(Rúkas 13.34-35)

³⁷ 'Jerusarénumiatirmeá, Yúsnan etserin máiniaitume. Yus akatar akup-turmakmasha kayajai tukuram máiniaitume. Túrin árumniñ waitnentajrume. Atash ni uchirín weaana áitkiasnak weartinian wakerimjarme, tura nakitramarme. ³⁸ Iistarum. Ame pépruram ajapamuiti. ³⁹ Tura "Yusa náariñ winiana nu, shiir atí" títiatrumna nu tsawant jeatsaiñ penké wáitkiashtatume. Nuna tájarme" tímiayi Jesus.

24

Yusa Uunt Jee saanaktinian Jesus ujakmiania nu
(Márkus 13.1-2; Rúkas 21.5-6)

¹ Jesus Yusa Uunt Jeeñia jiinki weai ni unuiniamurí nin tariar Jeañ iniaktusar áujmatsarmiayi. ² Tura Jesus tiarmiayi "Nu mash yamá wáintrume. Tura nekasan tájarme ukunmanka mash saanaktiatui. Chikichík kayaksha ekentramurí atsuttawai" tímiayi.

Amúamu tsawant nekaatin
(Márkus 13.3-23; Rúkas 21.7-24; 12.22-24)

³ Nuyá Uriwiu náinnium wear niñki nuñ pujusar ni unuiniamurí Jesus aniasarmiayi "¿Nusha urutaik túrunatí. Tura ame tátincha tura nuñka amuukatin tsawant jeakuisha warijiañ nekaattají? Nu ujatkata" tiarmiayi.

⁴ Tuíniakui Jesus tímiayi "Aneartarum, anañkramawairap. ⁵ Untsurí shuar winia náarun pachisar "wi Krístuitjai" tiar untsurí shuaran anañkawartatui. ⁶ Ti untsurí meset chicham antuktatume túrasha sapijmiakairap. Núnisañ átiniaiti nuñka amúatsaiñ. ⁷ Apachcha chíkich nuñkanmaya apachjai máaniawartatui. Tura ti tsukasha átatui. Sunkursha ti pampartatui. Uúsha ti uurkartatui. Nuka untsurí nuñkanam ashí túrunawartatui. ⁸ Nujai ti wáitsatin aya yama nañkamui' tímiayi.

⁹ 'Nuyá atumniasha yajauch awajsarti tusa surutmakartatui. Tura manta-mawartatui. Tura winia naar pachia asakrumin ashí shuar muíjramkartatui. ¹⁰ Nu tsawantaj untsurí shuar Yúsan iniaisartatui. Túrawar nuamtak muíjniainiak surunairartatui. ¹¹ Untsurí shuar wáitruiniak "wi Yúsnan etserniuitjai" tiartatui. Túrawar untsurí shuáran nusháa enentáimtikartatui. ¹² Tura tunáa ti ákui nuamtak anenaichartatui. ¹³ Tura shuar ashí nuna tuke katsuntra nu uwemprattawai. ¹⁴ Ashí aents nekaawarat tusa Yus-Chicham ashí nuñkanam etsernaktatui. Túramtai amuukatin tsawant jeat-tawai" tímiayi.

¹⁵ Shuar juna áujea nu enentáimprati. Kame Jesus tímiayi "Yúsnan etserin Taniar muijmiamtik tuke emesratin ana nuna yaunchu aar etserkamiayi. Nuka Yusa Jeeñ wantinkiamtai ¹⁶ ashí shuar Jutía nuñkanam írúnna nu, muranam pisararti. ¹⁷⁻¹⁸ Ti wárik pisartin asamtai shuar jea yakí pujaksha tura shuar ajanam wekaakusha jeá waketki warirí jukitiaj tíchati. Antsu nuyañ

wárik pisarti. ¹⁹ Nu tsawantaj nuwá ajamtincha tura kuírchin takaku ainia nusha ti wáitsartatui. ²⁰ Ayampratin tsawantaisha tura michá nántutincha nu pisartin tsawant áchati tusarum Yus seatarum. ²¹ Maa, nu tsawantaj ti wáitsatin átatui. Ti yáunchusha núnisan wáitsatin atsuuyayi. Ukunmasha atsuttawai. ²² Nu wáitsatin ti esarmaitkiuinikia chikichkísha uwemprachainti. Tura Yus nu wáitsatniun wárik amumtikiattawai. Shuar Niiniu ajasarat tusa achikma ainia nu uwemprarat tusa wárik amumtikiattawai' tímiayi.

²³ 'Tura atumin "Júiti Kristu," tuíniakuisha tura "Nui pujawai" tuíniakuisha anturkairap. ²⁴ Untsurí shuar Krístuitjai tusar wantinkiertatui. Untsurísha "Yúsnan etserniuitjai" tiartatui. Tura shuáran anañkataj tusar aents tujintiamun iniakmasartatui. Tura ti kakarman túruiniak Yús-shuarnasha anañkamin áiniakuinikia anañkawarainti. ²⁵ Túrunatsain nuna emka ujaajrume. ²⁶ Tuma asamtai "Iis, Kristu nui aents atsamunam pujawai" túramainiakuisha nui wéerap. "Jui úumak pujawai" tuíniakuisha anturkairap. ²⁷ Núnisan úumkan táchattajai. Peem péetuk ti wárik ashí nunkanam wáinkiachminkiait. Núnisnak wi Aents Ajasuka winiakun paant wantinkiertatui. ²⁸ Wats, jaka tepaana nui chuan káutkachartatuak' tímiayi.

Kristu tátintri

(Márkus 13.24-37; Rúkas 21.25-33; 17.26-30, 34-36)

²⁹ 'Ti wáitsatin nankaamasmatai ti wárik tsawái nantu kajinkiertawai. Tura kashí nantusha etsantrastatui. Yaasha ashí muchitrattawai. Nayaimpiniam kakaram ainia nusha peantrartatui. ³⁰ Nuikia Wi Aents Ajasuka, tátiniur paant átatui. Tura ashí nunkanmaya aents Wi winiái wáitkiar asuttiamattajai tusar úutiartatui. Wisha ti kakaram tura Yusa wincharijjai yurañminiam winiái wáitkiartatui. ³¹ Yusa suntarín kachu kakaram umpuarterum tinia akupkamtai nu suntar ashí nunkanmaya ashí Yús-shuaran, Yus achikma ásarmatai, irurartatui' tímiayi.

³² 'Ikiu numirí nakumea nu nekaatarum. Ni nuken eteakui "esat nantu jeatemayi" tátsurmek. ³³ Núnisan ashí ju wáinkiumeka "amuukatin tsawant nekas jeatemayi" títiniaitrome. ³⁴ Nekasan tájarme, yamá aents pujuinia nu amúatsain ashí túrunattawai. ³⁵ Nunkasha nayaimpisha amuukartatui antsu winia chichamur amuukashtatui' tímiayi.

³⁶ 'Tura nu túrunatin tsawant nekanachminiaiti. Yusa suntarisha nékainiatsui. Wisha Yusa Uchiríntiatnak nékatsjai. Antsu aya winia Aparuk nékawai' tímiayi.

³⁷ 'Wi tátiniur jeamtai yaunchu Nuai pujumia nú tsawantin túrunamia núnisan átatui. ³⁸ Nu tsawantin, tuke amaartsain, aya júnisan aa asamtai yurumuk umarar pujuarmiayi. Nuatnainiarmiayi. Ni nawantríncha nu-atmamtikiarmiayi. Tura tumá pujuinia Nuai uunt kanunam enkemamtai ³⁹ nu aents tuke nékainiatsain ama amarak mash amuukarmiayi. Núnisan átatui Wi tátin jeamtai. ⁴⁰ Nu tsawantaj jimiara shuar ajanam pujuttawai. Chikichik junaktiatui tura chikichkia ikiunkittiwai. ⁴¹ Núnisan jimiara nuwá shana nekeak pujuttawai. Chikichik junaktiatui chikichcha ikiunkittiwai' tímiayi.

⁴² 'Nu asamtai atumsha iwiarnarum pujustarum. Nekaachminiaiti uruk áintsuk taritjarum. ⁴³⁻⁴⁴ Tuma asamtai aneara pujustarum. Wi nekaachmanum tátin júnisan enentáimpramniaiti. Shuar ju kashi kasa tátinian nekaanka kánutsuk kasa táawai tusa iwiarnar nákasainti. Núnisrum aneara pujustarum.'

Pénker takamtikniuncha yajauch takamtikniuncha Jesus áujmatsamiania nu (Rúkas 12.41-48)

⁴⁵ ‘Shuar p_{en}ker uminian tura p_{en}ker enentáimniun áujmatsattajai. Nuna uuntri yajá irauweak “Yurumátin jeamtai winia takartin ayuratarum” tíchanpiash. ⁴⁶ Nu takamtikniuncha ni uuntri taa takatrin tímiatrusañ túran tarínkia shiir enentáimtusainti. ⁴⁷ Nekasan tájame, umin asamtai ni uuntri ashí ni warirín wáitrukát tusa takatan susattawai. ⁴⁸⁻⁴⁹ Antsu úuntur wau táchattawai tusa takamtikin ni uuntri yáintrin yajauch awajeak tura takatsuk aya yurumátiniun tura nampektinian wararkunka nu takamtikin yajauchiiti. ⁵⁰ Turaj ni uuntri aya aneachma taa nu takamtikniun, yajauch asamtai, ⁵¹ ti kakaram asutiattawai. Yajauch shuar pujuinia nu akupkattawai. Nuisha ti wáitiak ti úuttiatui’ tímiayi Jesus.

25

Jesus tias (10) nuwān áujmatsamiania nu

¹ ‘Yus akupeemunam pachiinkiatin júnis átatui. Nuatnaikiatin jísat akui tias nuwā natsa kantiran akaawar nuátkattana nu áishmankan inkiun jeá itiatai tusar wearmai. ² Senku nuwā enentáimcha armai. Tura chíkich senku nuwā enentáimin armai. ³ Enentáimcha arma nú nuwā aya akaamunak juíniak amuukamtai yaraatniun asuitin júkicharmai. ⁴ Antsu chíkich senku núwaka akaamuncha juíniak tura ataksha amuukamtai yaraatniun asuitin júkiarmai. ⁵ Tura jíinkiar matai nuatkatin áishman wari taachkui kari pujakui kanararmai. ⁶ Nuyá kashi ajapén shuar untsumuk “Pai nuatkatin winiawai. Werirum inkiuntarum” timiai. ⁷ Tu untsumun antukar nantakiar kantiran akaatai tusar pujursarmai. ⁸ Nuyá senku nuwā enentáimcha arma nu, chíkich nuwā enentáimniun tiarmai “Incha atumi asuitiri ishichik ajamprusaitia. Ii kantirisha kajiniawai.”

⁹ ‘Tutai chíkich senku nuwā tiarmai “Atsá, warí íncha jeartamchattaji. Tura atumnia penké jeashtatui. Nekaska surutainium werum sumaka utumtarum” tiarmai.’

¹⁰ ‘Tura nuyá senku nuwā enentáimcha arma nu, asuitian sumak utitiai tusar wéaraj ukunam nuatkatin áishman tamai. Túramtai enentáimin nuwā arma nuka nuatnaikiatin námpernam nuatkatiujaj wayawarmai. Túramtai wáitin epeniarmai. ¹¹ Tura epeniaraj enentáimcha nu táarmai. Tura tiarmai “Úuntá, waiti uratritia.”

¹² ‘Tu untsumainiakui nu uunt kajerak chichak “Cha, zyátsukaitrum? Penké nékatsjarne” tiarmai.’ ¹³ Jesus nuna áujmatas umik tímiayi “Aents Ajasuitjai tura tátin tsawantrusha tura uruk aiñ tátaj nusha nékatsrume. Tuma asarum tuke iwiarnarum pujustarum’ tímiayi.

Kuit susamun áujmatsamiania nu

¹⁴ ‘Núnisan Wi tátin júnisaiti. Shuar chíkich nunkanam wéaku ni takarniurin untukar ni kuítrin akanak súsarmai. ¹⁵ Chikichkiniak senku mir (5.000) kuítian susamai. Chikichnasha jimiará mir (2.000) kuítian susamai. Tura chikichnasha chikichik mir (1.000) kuítian susamai. Nii takastin jearma nujaj métek súsarmai. Tura ikiuak yajá wemai. ¹⁶ Takarin senku mir kuítian achikmia nujaj takakmas ataksha senku mir kuítian patakmai. ¹⁷ Chikichcha núnisan jimiará míran achikmia nujaj takakmas ataksha jimiará míran patakmai. ¹⁸ Tura chíkich shuar ni uuntri kuítrin chikichik míran achikmia nuna wā taur úukmai.’

¹⁹ ‘Nuyá ukunam nu shuara uuntri támai. Tura kuítian súkiarma nujaj itiurkarmakit tusa untukarmai. ²⁰ Emka senku mir kuítian achikmia nu tamai. Nuyá ni úntrin chíkich senku mir patakman suak timiai “Uuntá, senku mir kuit surusmame. Pai, atak senku míran patasmajai.”

21 ‘Takui ni uuntri timiai “Ti pēnker takakmauwitme. Nekas uminiaitme. Ishichkijiaisha ti pēnker takakma asakmin ti núkap yamaikia amastatjai. Winí wayam wijiái ti shiir warasta” timiai.’

22 ‘Nuyá chíkich shuar jimiará míran achikmia nu tarí timiai “Uuntá, jimiará mir surusmame. Pai, ataksha jimiará míran patasmajai.”

23 ‘Takui ni uuntri timiai “Ti pēnker takakmauwitme. Nekas uminiaitme. Ishichkijiaisha ti pēnker takakma asakmin ti núkap yamaikia amastatjai. Winí wayam wijiái ti shiir warasta” timiai.’

24 ‘Nuyá chíkich shuar chikichik míran achikmia nu tarí timiai “Uuntá, ti kajen asakmin tura araachiatam tura atsaamprachiatam júurtuktarum tiniu asakmin 25 sapijmiakun ame kuítrumniaka nunká táutran úukmajai. Pai, júiti ame surukmiam nu” timiai.’

26 ‘Takui ni uuntri timiai “Ámeka yajauchiitme. Aya nákiitme. Wi araachiatan tura atsaamprachiatan júurtuktarum tíniuitme túrutsumek. 27 Tu enentáimkiumka ¿urukamtaí kuit-iruntainiam ikiurtuschamam? Nuikia wi táakun patasan achikiáajai” timiai. 28 Nuna tinia nuí wajainian tiarmai “Ju shuar chikichík mir kuit atankirum tias mir kuítian takaka nu susatarum. 29 Kame núkap takakna nú shuar ataksha patatnastatui tura ampiniartatui. Antsu ishichik takakna nusha ishichik takakuitiat jurunkittiawai. 30 Ju umichu shuarsha aa kiritniunam ajapatarum. Nuí ti wáitiak ti úuttiatui” timiai”. Tu áujmatsamiayi Jesus.

Akantratin átatna nu

31 Jesus áujmatuk tímiayi ‘Aents Ajasuitjiana nu ashí akupin ajasan Yusa sun-tari ēnkekma winittiajai. Tura Uunt Akupin asan shiir pujutairuú pujustatjai. 32 Túramtai ashí nunkanmaya aents Winia irunturartatui. Túrunawarmatai akantrartatjai. Murikiu wáinin kachurtinian tura kachurtichujai akanea nútisanak shuáran akantrattajai. 33 Tura kachurtichunka, pēnkerá nuna, untsuuruini awajsartatjai. Tura kachurtinniaka, yajauchia nuna, menaarui awajsartatjai. 34 Túran nekas Uunt Akupin asan untsuuruini wajainian títiatjai “Atumniaka winia Apar shiir awajtamsaitrume. Wi akupeajna nuí winitiarum. Yus nunkan najanamia tímianaik átum nuí warastinian tsankatramkamiarme. 35 Kame Wi tsukamá wekai ayurtuamiarme. Kitiamo wekaisha umartin surusmiarme. Wait ajá wekaisha itiaararum ajamprusmiarme. 36 Pushir atsaisha átumka surusmiarme. Jaa tepaisha íráimiarme. Sepunam enketajsha tarum íráimiarme” títiatjai. 37 Tutai untsuuruini wajainia turutiartatui “Uuntá, ¿urutia tsukamá wekaamnisha ayuramaji. Urutiá iisha kitiamo wekaa wainkiarsha umartincha amasmaji. 38 Tura urutia wait ajá wekaamnisha tura pushiram mamurmataisha iisha amasmaji. 39 Urutia iisha jaa tepamin tura sepunam enketmin wainkiarsha winitir íimijai?” turutiartatui.’

40 ‘Turutainiakui Wi Uunt Akupin asan tiartatjai “Nekasan tájarne, ashí ju wí shuar péjchachisha waitnentramarum nu Winia anentakum túraitrume” tiartatjai’ tímiayi.

41 ‘Wi Uunt Akupin asan menaarui wajainian tiartatjai “Atumsha yaja wetarum. Yajauchijjai yuminkramuitrume. Yus uunt iwianchi ni suntarijiai tuke kajinkiashtin jinium apeatniua nuí wétatrume atumsha. 42 Átumka Wi tsukamaji ayurtuachmarme. Kitiamajisha umartin suruschamarme. 43 Wait ajá wekaisha ikiatrachmarme. Pushirun imiampraisha entsartin suruschamarme. Jaa tepaisha tura sepunam enketajsha íraichmarme” tiartatjai.’

⁴⁴“Tutai niisha turutiartatui “¿Urutia, Uuntá, tsukamakmesha, kitiamakmesha, wait ajaknísha, pushiram imiampramsha, jáakmesha, tura sepunam wait ajá pujamnisha ísha winitir yáin_{ch}amaj?” turutiartatui.’

⁴⁵ ‘Wi Uunt Akupin asan tiartatjai “Nekasan tájarme, Ashí Wíi shuar, péejchachisha waitnentrachmarum nuí Winiasha túrutachuitrume” tiartatjai.

⁴⁶ Nu shuarka tuke wáitsatniunam weartatui. Tura Yus achikma ainia nusha tuke iwiaaku Yusjaj pujustinnium weartatui” tímiayi Jesus.

26

Jesus achiktin chichaman jurusarmiania nu

(Márkus 14.1-2; Rúkas 22.1-2; Juan 11.45-53)

¹ Jesus ashí nuna tinia umik ni unuiniamurí tiarmiayi ² “Atumsha nékarme, Paskua jisat jeatin jimiarchik tsawant ajasai. Nuí Wi Aents Ajasu asamtai krúsnum máawarti tusar surutkartatui” tímiayi.

³ Nuyá Israer-patri uuntrísha Israer-shuara jintinniurísha Israer-shuara úuntrísha Kaipiasa jeen áarin iruntrarmiayi. Kaipiassha Israer-patri uuntriyayi. ⁴ Nuí anankatin chichamjaj Jesus achikiar maatai tusar chichaman jurusarmiayi. ⁵ Tura tiarmiayi “Jístatin túrachminiaiti aents téetet ajarajin tusar.”

Nuwa Jesusan kunkuinian ukatramiania nu

(Márkus 14.3-9; Juan 12.1-8)

⁶ Jesus Petania péprunam pujus tunamaru Semunka jeen pujumiayi. ⁷ Nuí pujaj nuwa ti kuit jeá kunkuinian arapástru tutai kaya najanamunam piakun itiamiayi. Tura Jesus misanam yurumátaj tusa pujan tarí nu kunkuinian ukatramiayi. ⁸ Túramtai ni unuiniamurí nuna ísar kajerkar tiarmiayi “¿Urukamtai au kunkuin imiá kuítniasha áantrasha wasurea? ⁹ Antsu ti kuitjaj suruk shuar kuítrincha ainia nuna yáitskesha” tiarmiayi.

¹⁰ Jesus tuinian anturak tiarmiayi “¿Urukamtai ju nuwa yajauch enentáimtarum? Túrutana ju ti pénkeran túrayi. ¹¹ Kuítrincha tuke atumjaj pujushtatuak. Antsu Wikia atumjaj tuke pujushtatjai. ¹² Ju nuwa kunkuinjaj ukatruraj júka, Wi iwiarnastin asamtai áitkiarayi. ¹³ Nekasan tájarme, ashí nunkanam uwempratin chicham etsernakui tuke ju nuwa pachinias etsernaktatui. Túramtai ni túramurí kajinmankishtatui” tímiayi.

Jútas Jesusan surukmiania nu

(Márkus 14.10-11; Rúkas 22.3-6)

¹⁴ Nuyá Jesus tuse (12) unuiniamunmaya chikichik ni naari Jútas Iskariúti Jesusan suruktaj tusa Israer-patri uuntriin wémiayi. ¹⁵ Tura jeari tímiayi “Jesusan achikia amakui ¿urutmá akirkaintrum?” Takui trainta (30) kuítian akikiarmiayi. ¹⁶ Nu akikiam Jútas itiurak Jesusan súsaraintiaj tu enentáimias wekaimiayi.

Kristu jakamu enentaimtustin námper

(Márkus 14.12-25; Rúkas 22.7-23; Juan 13.21-30; 1 Kurintiunam 11.23-26)

¹⁷ Wakapruachu tantan yurumáinia nú námper yama nan_kamkui Jesusa unuiniamurí tariar aniasarmiayi “¿Tui paskua námper iwiaarakrin yurumáttam?” tiarmiayi.

¹⁸ Tuíniakui Jesus tímiayi “Péprunam wetarum. Nuí chikichík shuara jeen jearum titiarum “Uunta chichaak “Winia tsawantur ishichik ajasai. Tuma asan paskua namperan winia unuiniamurjaj ame jeem_{ij}in yurumátjai” tawai” titiarum” tímiayi. ¹⁹ Tutai ni unuiniamurí wear Jesus timia nuna umikiar paskua nampertin yurumátniun iwiararmiayi.

²⁰ Tura kashi ajasá*í* Jesus ni tuse (12) unuiniamurij*í* misanam yurumuk pujumiayi. ²¹ Nu*í* yurumáinia*í* Jesus tiarmiayi “Nekasan tájarme, átum pujar-mena juyá chikichik Winia surutkattawai.”

²² Nuna takui ti kúntuts enentáimprar mai aní awajiarmiayi “Uuntá, ¿wiáshitiaj?”

²³ Mai tu awajenam Jesus tiarmiayi “Wi nú pininnuman jimiartukan yuajna ju Winia surutkattawai. ²⁴ Wi Aents Ajasu asan Yus Chicham tana nuj*í* métek túrunattajai. Túrasha shuar Winia surutkattana nuka ti asutniátin asa akiinmainchu ajakuiti” tímiayi.

²⁵ Nuyá Jútas suruktaj tana nu Nin tímiayi “Uuntá nuikia ¿wiáshitiaj?”

Takui Jesus tímiayi “Ee, nekas ámetme.”

²⁶ Tura yurumuk pujuinia*í* Jesus yurumkan achik Yúsan yuminsamiayi. Tura puur ni unuiniamur*ín* suiniak tímiayi “Ju yuatarum. Juka winia ayashrui*ti*.” ²⁷ Nuyá pinin*ki*an achik Yúsan yuminsamiayi. Tura suiniak tiarmiayi “Jusha ashí umartarum. ²⁸ Juka winia numparuiti. Tura winia numpar puármatai, yamaram chicham nekas uminkiat*tawai* tawai. Tura puármatai untsur*í* shuara tunaar*ín* tsan*kur*attawai. ²⁹ Tura ataksha átum Yus akupea nu*í* jeatsrumn*ín* ju uwa yumir*ín* umarchattajai. Tura tsawant jeamtai atumj*í* Yus akupeana nu*í* yamarman umartatj*í*” tímiayi Jesus.

Pítur natsantratniua nuna Jesus ujakmiayi

(Márkus 14.26-31; Rúkas 22.31-34; Juan 13.36-38)

³⁰ Yús-kantan kantamáwar umikiar Uriwiu náinnium wearmiayi. ³¹ Nu*í* Jesus tímiayi “Ju kashi átum Winia ashí natsantrurtat*rume*. Kame Yus-Papinium áarmaiti “Murikiu wáinnium mantuattajai túram murik p*isar*artatui.” Tu áarmaiti. ³² Tura nantakin Kariréa nun*kan*am Wi ém*katt*ajai átum wéatsrumin.”

³³ Takui Pítur tímiayi “Chí*kich* natsantramainakuisha wikia túrashtatj*í*.”

³⁴ Tutai Jesus tímiayi “Nekasan tájame, ju kashi atash shiniatsa*ín* menaintiú natsantrurtatme.”

³⁵ Pítur tímiayi “Maa, Ámij*í* métek mántuiniakuisha pen*kes*ha natsantrashatjame.” Ashí ni unuiniamur*í* núnisa*n* tiarmiayi.

Jesus Jitsemaní ajanam Yúsan áujsamiania nu

(Márkus 14.32-42; Rúkas 22.39-46)

³⁶ Nuyá Jesus ni unuiniamurij*í* Jitsemaní náartin ajanam jeá tímiayi “Ju*í* pujusrum ná*kars*atarum. Aranta ai wena Yúsan áujsatj*í*.” ³⁷ Tinia Pítruncha tura mai Sepetéu uchir*í* jukí wémiayi. Nu*í*sha ti kúntuts enentáimiuk wake mesekmiayi. ³⁸ Nuyá Jesus tímiayi “Ti kúntuts jakamnia enentáimj*í*. Atumsha ju*í* pujusrum Wij*í* métek iwíáa pujutarum.” ³⁹ Tinia Jesus arantach we nu*í* tikishmar tsunsuma Yúsan áujeak tímiayi “Winia Aparú, Wi túrunatniua nu nusháa iwíaramniaitkiu*ín*kia ju wáitsatniua nu tsan*kat*rukaip. Tura Wi wakeraj núniska áhati antsu Ame wakeram núnis atí” áujuk tímiayi.

⁴⁰ Nuyá ni menaintiu unuiniamur*í* pujuiniamunam waketki kanúu pujuinian jeariar Pítrun tímiayi “Átumka chikichik úraksha Wij*í* iwíáa pujutin ¿tujinkarmek? ⁴¹ Iwíáa pujusrum Yus áujsatarum. Tunáa nupettamkairap. Enentáimin ti wakeriniait*rume* túrasha ayashim pimpiruiti.”

⁴² Tinia ataksha we Yúsan áujeak tímiayi “Winia Aparú, Wi imiá nekas n wáitsatniuitkiu*ín*kia nu*í*kia Ame wakeramna nu atí.” Tu áujsamiayi.

⁴³ Nuyá ataksha taa ni menaintiu unuiniamur*í* tarimiayi. Tura kar*í* ti nupeteam ataksha kanúu pujuarmiayi. ⁴⁴ Túmainiakui nin ikiukin ataksha áujmia núnisa*n* Yúsan áujsataj tusa waketkimiayi. ⁴⁵ Áujas umik ni unuiniamur*í*

pujamunman wémiayi. Tura tiarmiayi “Antsu yamaikia kanarum ayam-pratarum. Ura jeayi. Wi Aents Ajasu ain, tunaarintin shuarnum surunkatin jeayi. ⁴⁶ Wari nantaktiarum. Wéartai. Súrutna nu winiawai” tímiayi.

Jesusan achikiarmiania nu

(Márkus 14.43-50; Rúkas 22.47-53; Juan 18.2-11)

⁴⁷ Jesus tu chichaj Jútas támiayi. Nusha ni unuiniamuriyayi. Nujaisha untsurí shuar puniajaisha tura numijaisha winiarmiayi. Nu shuaran Israer-patri uuntrisha Israer-shuara úuntrisha akupka ármiayi. ⁴⁸ Jútas, Jesusan sura, tuke Jesusaj jeatsuk nu shuaran tiarmiayi “Wi miniakkan mukunattajna núiti. Nu achiktarum.” ⁴⁹ Nu asantai Jesusan tarí “Winiajai Uuntá” tinia mukunamiayi.

⁵⁰ Takui Jesus tímiayi “Amikrú, ¿warí winitiam?” Nuyá achikiar Jesusan júkiarmiayi.

⁵¹ Nuj chikichik Jesusa tsaníakmarí ni puniarin ukuiniak shuara kuishin tsupirkamiayi. Nu shuarsha Israer-patri uuntri takarniuriyayi. ⁵² Túramtai Jesus tímiayi “Puniarum enkeata. Ashí puniajai máanainia nusha puniajai mantamnashtatuak. ⁵³ Wi wakeraknaka winia Aparun timiá untsurí suntarin seakui páchitsuk akupturkainti. ¿Nu nékatsmek? ⁵⁴ Tura nuna túramtainkia Yus-Chichamnum tana nu uminkiachainti” tímiayi.

⁵⁵ Nuna tinia Jesus nu shuaran tiarmiayi “Átum kasá achiktaj tawa nútiksarum puniajaisha numijaisha tarutniurme. Kame ashí tsawantaj Yusa Jeen atumjai pujusan Yus-Chichaman etsermiajai. Nuisha achirkachmarme. ⁵⁶ Antsu yamaikia yaunchu Yúsnan etserin áararmia nu umínkiatí tusarum jútikrarme.” Tu tímiayi Jesus.

Nuyá ni unuiniamuri Jesusan Níniak ikiuiniak pisararmiayi.

Israer-patri uuntriin Jesusan júkiarmiania nu

(Márkus 14.63-65; Rúkas 22.54-55, 63-71; Juan 18.12-14, 19-24)

⁵⁷ Shuar Jesusan achikiarmia nusha Kaipiasaj júkiarmiayi. Nusha Israer-patri uuntriyayi. Nuisha Israer-shuara jintinniurisha Israer-shuara uuntri armia nusha irunar matsarmiami. ⁵⁸ Tura Pítiur árantak Jesusan nemarkin uuntri jeen aari jeamiayi. Tura suntarjai tsanin pujusmiayi Jesusan itiurkartin tusa.

⁵⁹ Tura Israer-patri úuntrisha Israer-shuara úuntrisha tura ashí naamka uunt armia nusha Jesusan wait-chichamjai súmamtikiatai tusar áujmamiayi. ⁶⁰ Untsurí shuar ántar tsanumpruiniakuisha máatin chichaman nekaracharmiayi. Nuyá jimiara shuar tsanumpruiniak ⁶¹ tiarmiayi “Ju áishman chichaak “Yusa Uunt Jeen yumpuan ataksha menaintiú tsawantin jeaminiaitjai,” tu chichamai” tiarmiayi.

⁶² Nuyá Israer-patri uuntri wajaki Jesusan tímiayi “¿Áimtsmek. Turamainia nusha anturammek?” ⁶³ Túrasha Jesus tuke áimchamiayi. Túmakui Israer-patri uuntri chicharuk “Nekas iwiaaku Yusa náariin tájame nekasa nu táchakminkia Yus írmastatui. ¿Ame Krístukaitiam. Yusa Uchirínkaitiam? Paant etsérkatá” tímiayi.

⁶⁴ Tutai Jesus tímiayi “Ee, ame támena núitjai. Tura ataksha atumin tájarme, wi Aents Ajasu asan ti kakaram Yusa untsuuriní pujaj wáitkiáttarme. Tura yuranminiam winiaisha wáitkiáttarme” tímiayi.

⁶⁵ Nuyá Patri uuntri nuna antuk ti kajek ni pushirí jaak tímiayi “Ju áishman ni chichamejai Yúsan nekas yajauch chicharniuiti. Nuyásha ¿warí atumají? Atumsha Yúsan yajauch chicharu antukcharumek. ⁶⁶ ¿Waritia enentáimprum?”

Tutai “Sumamayi. Mantamnati” tiarmiayi. ⁶⁷ Tiar usukiawarmiayi yapiniam. Tura awattiararmiayi.

Chikichcha yapiniam awati wishikiainiak tiarmiayi ⁶⁸ “Ame Krístuchukaitiam. ¿Ya awattama? Ítsuk nekaata.” Tu chichariarmiayi.

Pítiur Jesusan natsantramiania nu

(*Márkus 14.66-72; Rúkas 22.56-62; Juan 18.15-18, 25-27*)

⁶⁹ Nu túmain Pítiur aa pujai nuwa chikichik jeari tímiayi “Amesha ju Kariréanmaya Jesus tutaijiai wekaichamkam.”

⁷⁰ Tutai Pítiur ashí ántuiniamunam tímiayi “Nékatsjai. ¿Warittsuk chichaam?”

⁷¹ Nuna tinia jíinkitiaj tusa wéai chíkich shuar wáiniak nuí pujuinian tiarmiayi “Au áishmansha Nasarénumia Jesusjai wekainiuiti.”

⁷² Tutai Pítiur ataksha tímiayi “Nekasan tájarne, ju áishmankan penké nékatsjai.”

⁷³ Árusan nuí pujuarmia nu Pítrun tariar tiarmiayi “Nekas amesha aujai wekaimiame. Warí, chichammijiai páantaiti.”

⁷⁴ Tutai Pítiur “nekas Yus írui” taku tímiayi “Nu áishmankan penké nékatsjai.” Nuna tai atash shiniukmiayi. ⁷⁵ Túramtai Pítiur Jesus nuik tímia nuna enentáimpramiayi. “Atash shiniatsain menaintiú natsantrurtatme” tímiayi Jesus. Pítiur nuna enentáimiar jíinki we ti úutmiayi.

27

Piratui Jesusan júkiarmiania nu

(*Márkus 15.1; Rúkas 23.1-2; Juan 18.28-32*)

¹ Kashin tsawarmatai Israer-patri uuntrisha Israer-shuara úuntrisha Jesus maatai tiarmiayi. ² Tiar Jesusan jíinkiawar apachi uuntrin Punsiu Piratui júkiarmiayi.

Jútas máamamiania nu

³ Jútas Jesusan suruk tura máatai tuínian antuk enentáimiar trainta kuítian Israer-patri uuntrincha Israer-shuara úuntrincha awantukiarmiayi. ⁴ Tura tímiayi “Nu áishman tunaarinchan máatarum tusan surukan wi sumamajai.”

Takui tiarmiayi “Nusha íjjaisha warí urukatin. Nuka amek íschatniukaitiam.” ⁵ Tinia Jútas nuí Yusa Uunt Jee kuítian utsan ikiuak nuyá we kajempramiayi. ⁶ Nuyá Israer-patri uuntri nu kuítian júukar tiarmiayi “Ju kuit shuar sumakma asamtai Yusa kuítrijiai irurchamniaiti.” ⁷ Tura nuamtak áujmatsar “nunka sumaktai” tiar Nuwe Najantai nunkan sumakarmiayi yajaya shuar nuí iwíarsatniun. ⁸ Shuar sumakma kuitjai sumakma asamtai yamaisha Numpá Nunka tuke tuíniawai. ⁹⁻¹⁰ Nujai yaunchu Yúsnan etserin Jeremías tímia nu uminkiamiayi:

“Uunt Yus turutmia núnisan túrawarmiayi. Israer-shuar trainta kuítian seawarmatai nuna akantrar nujai Nuwe Najantai nunkan sumakarmiayi.”
Tu áarmiayi.

Piratu Jesusan aníasmiania nu

(*Márkus 15.2-5; Rúkas 23.3-5; Juan 18.33-38*)

¹¹ Jesusan apachi úuntrin ejeniarmatai nii aniasmiayi “¿Nekasmek Israer-shuara uunt akupniuríntiam?”

Tutai Jesus “Ame táména núitjai’ tímiayi.

¹² Nuyá Israer-patri úuntrisha Israer-shuara úuntrisha súmamtikia Jesus pachischamiayi. ¹³ Nuyá Piratu tímiayi “Ashí yajauch chichartamainia nu

¿anturmammek?” ¹⁴ Tútaisha Jesus penké áimkiachmiayi. Túmakui akupin ti enentáimiar títinian nekaachmiayi.

*Piratu Jesusan “mantamnati” tímiania nu
(Márkus 15.6-20; Rúkas 23.13-25; Juan 18.39-19.16)*

¹⁵ Jísat tsawantin apachi uuntri Israer-shuar shiir enentáimprarat tusa sepunam enketun shuar wakeramun jiiki ankant akupniuyayi. ¹⁶ Nui sepunam tunáa shuar Parapás náartin pujumiayi. Ashí shuar nékarmiayi. ¹⁷ Tuma asantai Piratu Israer-shuar iruntrarun aniasmiayi “¿Yana ankant akupkat tusarum wakerarum. Parapásnak akupkattaj; Kristu tutai Jesusnak akupkattaj?” tímiayi. ¹⁸ Kame Israer-shuar ántar kajerainiak ni itiarman nekaamiayi.

¹⁹ Tura Piratu nuna inintrak pujai ni nuarí chichaman akuptukmiayi. “Ju péñker áishman súmamtikiatniujai pachiinkiaip. Mesebranam nii áitkiatniun nekaan wáitsan tsawarjai” tímiayi.

²⁰ Túrasha Israer-patri úuntrisha Israer-shuara úuntrisha “Parapás ankant wetí, tura Jesus mantamnati” titiarum tusar shuáran akatrarmiayi. ²¹ Apachi akupniuri ataksha aniasarmiayi “Ju jimiará áentsun ¿yana ankant akupkat tusarum wakerarum?”

Tutai “Parapás” tiarmiayi.

²² Tutai aniasarmiayi “Jesusnasha. Yusa Anaikiamuri Kristu tuinia nunasha, ¿itiúrkáttaja?”

Tutai ashí “Krúsnum máatá” tiarmiayi.

²³ Tuíniakui Piratu tiarmiayi “¿Warí yajauchinia túrait?”

Tutai kakantar untsukum “Krúsnum máatá” tiarmiayi.

²⁴ Tura Piratu Jesus uwemtikrachminiaitkiui antsu ashí shuar charaatum ajainiakui entsa uturtitiarum tusa seamiayi. Tura ashí íimiainiajn ikijmiak tímiayi “Ju péñker áishman máatniunam wikia pachiintsujai. Antsu atumek íistarum.”

²⁵ Tutai ashí shuar tiarmiayi “Iik ii shuarijjai ju áishman máatin íistaji.”

²⁶ Nuyá Piratu Parapásan ankant akupkamiayi. Tura Jesus asutiárum krúsnum máatárum tusa akupkamiayi. ²⁷ Nuyá akupin pujutai jeanam akupniu suntari Jesusan júkiar ashí suntaraim irunturarmiayi. ²⁸ Tura pushiri áitkiar akupin entsatain kapaaku pushin áentsrarmiayi. ²⁹ Múuknúmsha tawaspan janke najanamun etsemtikiarmiayi. Tura karisun akupniu numirja áaniun untsuuriñi ataksarmiayi. Túrawar wishikiainiak tikishmatrar tiarmiayi “Israer-shuara uunt akupniurime.” ³⁰ Tiar usukiarmiayi. Tura karisun jurukiar múuknum awatiarmiayi. ³¹ Tura núkap wishikrar kapaaku pushin áitkiar ni pushirin áentsrarmiayi. Nuyá krúsnum maatai tusar júkiarmiayi.

*Jesusan krúsnum máawarmiania nu
(Márkus 15.21-32; Rúkas 23.26-43; Juan 19.17-27)*

³² Jesusan júki wésar Serini nunkanmaya shuaran, ni naari Semun, Jesusa krúsriñ jurukit tusar achikiarmiayi. ³³ Nuyá Kúrkutanam ejeniarmiayi. Kúrkutaka, shuar chichamjainkia, muuka ukunch tútainti. ³⁴ Nui Jesusan umutai yapájai pachimpra najanamun áartaj tusar súsarmiayi. Tura Jesus apas iis umarchamiayi.

³⁵ Krúsnum ajintrurar suntar yáki Jesusa pushirin jukit tusar nakurusar awakmakua nuna súsarmiayi. Nújainkia yaunchu Yúsnan etserin áarmia nu uminkiamiayi:

“Winia entsarmarun akantrarmiayi tura nakurusar awakmakua nuna winia pushirun súsarmiayi.” Tu áarmiayi.

³⁶ Nuyá wáinkiatái túsar pujursarmiayi. ³⁷ Tura urukamtái máamuit ashí aents nekaawarti tusa áarman muuknumaani anujtukarmiayi. *JUTI JESUS, ISRAERA UUNT AKUPNIURI*
Tu áarmauyayi.

³⁸ Núnisan Niijjai métek jimiará kasa chikichkin untsuurnumaní tura chikichnasha menaanmaní krúsnum máawarmiayi. ³⁹ Shuar nuí nankaamainiak muuke peatar wishikiainiak ⁴⁰ tiarmiayi “Ame Yusa Uunt Jee sáakim menaintiú tsawantin jeamtatjai tíchakaitiam. Nekas Yusa Uchirínkiumka krúsnumia akaikim uwemprata” tiarmiayi.

⁴¹ Núnisan Israer-patri úuntriśha, Israer-shuara jintinniurisha, Pariséusha, Israer-shuara úuntriśha, Jesusan wishikiainiak nuamtak tiarmiayi ⁴² “Chikichnaka uwemtikraiti tura Nínkikia uwemtsui. Israera Uunt Akupniuríntkiunka krúsnumia akaikimtai nekas enentáimtustatji. ⁴³ “Yúsan nekas enentáimtiniaitjai” tawai. Wátsek, Yus nekas Nin aneakka uwemtikrati. “Wi Yusa Uchiríntjai” turamchamkaj” tiarmiayi. ⁴⁴ Kasá shuarsha Niijjai ajintruamu armia nusha Nin wishikrarmiayi.

Jesusa jakamuri

(Márkus 15.33-41; Rúkas 23.44-49; Juan 19.28-30)

⁴⁵ Nuyá tutupin ai tee ajasmiayi. Túrunayat ataksha aanku tsáapin ajasmiayi. ⁴⁶ Nuni ai Jesus kakantar untsumkamiayi. “Eri, Eri, rama sapaktani’ timiayi. Nusha shuar chichamjainkia “Yusrú, Yusrú, ¿urukamtái ajapa ikiurkiniam?” tawai. ⁴⁷ Shuar nuí wajarmia nusha nuna enentáimtsuk antukar tiarmiayi “Yaunchu Yúsnan etserniun Eríasan untsuawai.” ⁴⁸ Tura chikichik tsékenki we uruchin itiamiayi. Tura churuinian ajamper sapapjai ijiú mukunati tusa susamiayi. ⁴⁹ Tura chikichcha wishikeak tiarmiayi “Iniáísatá, Erías tarí uwemtikratpiash.”

⁵⁰ Jesus ataksha kakantar untsamak nuyá jakamiayi. ⁵¹ Nu chichamaik Yusa Uunt Jee tarach ajamu yakiiniya achik nunkaani tseu jaanakmiayi. Nunkasha úurkamiayi. Kayasha jakukarmiayi. ⁵² Núnisan iwiarsamusha uraniarmatai untsurí Yus-shuar jákarusha nantakiarmiayi. ⁵³ Nusha emka Jesus nantakmiatai niisha nantakiar iwiarsamun ikiukiar Yusa péprurin Jerusarénum wayawarmatai untsurí shuar wáinkiararmiayi.

⁵⁴ Nuyá suntar Jesusan wáinkiarmania nusha tura ni kapitiantrisha nunka úurkamtái nuyá chikichcha ashammai ajasmatai ti sapijmiakarmiayi. Tura tiarmiayi “Ju áishman nekas Yusa Uchirínti.”

⁵⁵ Nuisha nuwá Jesusan nemariarmia nu, arant wajasar, ii wajaarmiayi. Nusha Kariréanmaya pataatukiar Jesusan yainki ejeniarmiayi. ⁵⁶ Nujai Máktaranmaya Marisha, Sepetéu nuwésha, tura chikich Marisha áarmiayi. Chikich Marikia Jakupuncha tura Jusenchá nukuríyayi.

Jesus iwiarsamu

(Márkus 15.42-47; Rúkas 23.50-56; Juan 19.38-42)

⁵⁷ Kiaraj shuar ti kuítrintin Arimatéu péprunmaya ni naari Jusé támiayi. Nusha Jesusan enentáimtiniuyayi. ⁵⁸ Nii Piratuí we Jesusa ayashin seamiayi. Nin súsarát tusa Piratu akupkamiayi. ⁵⁹ Túram Jusé Jesusa ayashin krusnumia jusa ti pénker tarachjai penuarmiayi. ⁶⁰ Tura kaya wáa táurmanum yamaram amia nuí iwiarsamiayi. Ni iwiarsatin táumtikramunam Jusé iwiarsamiayi. Iwiaras kaya uuntjai etektuk ikiuak wémiayi. ⁶¹ Nuisha Máktaranmaya Marisha tura chikich Marisha iwiarsamunam naka ii pujuarmiayi.

Jesus iwiarsamun suntar wáinkiarmania nu

⁶² Nú kíarain ayampratin tsawantna mash iwiarnakui Israer-patri úuntrisha Pariséusha Piratuĵ wearmiayi. ⁶³ Tura tiarmiayi “Uuntá, nu wáittrin áishman iwiaaku pujus “Menaintiú tsawant jakan nantaktiatjai” tíniuyi. ⁶⁴ Nu asantai iwiarsamunam menaintiu tsawant suntar wáinkiarat tusa akuptukta. Ni unuiniamurĵ kashi tariar tura ni ayashin kasamkar “Pai, nantakni” shuáran tiarain. Jujainkia nuna nankaamas shuáran anankawarainti” tiarmiayi.

⁶⁵ Tutai Piratu tiarmiayi “Nuĵ suntar takakrume. Werum iwiarsamu urakchamnia péñker wáinkiatárum.” ⁶⁶ Tutai wear iwiarsamun urankashti tusar etektukma inkiunmanum serajai yakarar ni áarmarin anujtukarmiayi. Tura suntarnasha awajtukiarmiayi.

28

Jesusa nantakmiari

(Márkus 16.1-8; Rúkas 24.1-12; Juan 20.1-10)

¹ Ayampratin tsawant nankaasmatai tumintin yama tsawaana ai Máktaranmaya Marisha chíkich Marijiaĵ iwiarsamu iyutai tusar wearmiayi. ² Tumai Yusa suntariĵ nayaimpinmaya iwiarsamun tariĵ kaya atutkamun urak nuĵ pujusmiayi. Túmakui nunka ti úurkamiayi. ³ Yusa suntarisha peemia tímiatrus wínchayayi. Pushirisha ti puju áuyayi. ⁴ Tura iwiarsamun wáiniarmia nú suntarsha nuna wáinkiar ashamainiak ti kuranĵkarmiayi. Jaká áinis ajasarmiayi.

⁵ Nuyá nayaimpinmaya suntar nuwan tímiayi “Ashamkairap. Jesus krúsnum máawarmia nu eátsrumek. ⁶ Juinkia pujatsui. Nii timia núnisan nantakniuiti. Pai, áepsarma nu ítiarum. ⁷ Wárik wérum ni unuiniamurĵ “Jesus jakamunmaya nantakni tura wari Kariréanam wétatui. Nuĵ werirum wáinkiáttarme” titiarum. Wats, nunak tájai” tímiayi. ⁸ Tutai nu nuwa iwiarsamunmaya wárik jĵinkiar ashamainiayat ti warasar tseke waketkiarmiayi ni unuiniamurĵin ujaktai tusar. ⁹ Tumai Jesus wantintiukarmiayi. Tura “pujarmek” takui Jesusan tariar tikishmatrar nawencha miniakrusar shiir awajsarmiayi. ¹⁰ Túram Jesus tiarmiayi “Ashamprukairap. Werum winia yatsur ujatruktarum. Kariréanam weartí. Nuĵ wear wáitkiartatui. Tu ujaktarum” tímiayi.

Suntar etserkarmiania nu

¹¹ Nuwa wéarmatai iwiarsamu wáinin suntarsha péprunam wéar Israer-patri úuntrin ashí túrunamun ujakarmiayi. ¹² Niisha nuna antukar Israer-shuara úuntrijiaĵ áujmatsatai tusar wearmiayi. Áujmatsar suntaran ti kuít akikiar ¹³ tiarmiayi “Atumsha étserkuram “Kashi kanararin ni unuiniamurĵ taar Jesusa ayashin kasamkarmai” titiarum. ¹⁴ Tura akupin átum kanarman nekamtaisha niijiaĵ ii iwiarattaji atumin yajauch awajtamsain tusar” tiarmiayi.

¹⁵ Nuyá suntarsha kuítian achikiar tiarmia nuna tímiatrusan titiái tusar wéarmiayi. Tura tuke yamaisha Israer-shuar tu túrunaiti tuńiawai.

Jesus ni unuiniamurĵin akatar akupkarmiania nu

(Márkus 16.14-18; Rúkas 24.36-49; Juan 20.19-23)

¹⁶ Nuyá ni auntse (11) unuiniamurĵ Kariréanam wéarmiayi. Tura Jesus timia nú nainnium jeawar ¹⁷ nuĵ Jesusan wáinkiar tikishmatrarmiayi. Kame chíkichka Jesusashit tuńiayat Nin wáinkiar tikishmatrarmiayi. ¹⁸ Nuyá Jesus

tíjju_{ch} tantá tímiayi “Ashí nayaimpinmasha nun_kasha akupkatniun kakarman surusuiti. ¹⁹ Tuma asamtai ashí nun_kanam werum ashí shuar jintintiarum Wíi shuar awajsatarum. Túrarum Yus Apa náarij_{ai}, Yus Uchi náarij_{ai}, tura Yus Wakan_i náarij_{ai} imiaitiarum. ²⁰ Ashí atumin Wi akatramajrum nu nútiksarmek umiktin unuiniartarum. Tura ju nekaatarum: Tuke tsawantaj ikiutsuk atumj_{ai} pujuttajai” tímiayi Jesus.

Yúsan Shiir Chichamen MÁRKUS aarmia nu

Imiakratin Juan̄ka etserkamuri

(Mateu 3.1-12; Rúkas 3.1-9, 15-17; Juan̄ 1.19-28)

¹ Juī Jesukristunu shiir chicham nan̄kameawai. Jesukristu Yusa Uchirinti.

² Yuska imiakratin Juan̄kan pachis ni etserniur̄in Isayasan ti yaunchu ni Papiriin̄ juna áamtikramiayi:

“Íisiana, ame wéamurm̄in emka wetí tusan winia akatramurun akupeajai. Ni-isha ame jintimin̄ iwiarattawai. ³ Niisha aents atsamunam untsumuk juna títiatui: “Uunta jintī iwiarturtarum; naka awajsatarum.”

Nuke áarmaiti.

⁴ Wats, aents atsamunam imiakratin Juan̄ imiaittsa pujus étseruk, “tu-naarun Yus asakatrurat” tusarum, enentáim yapajiárum imiantiarum” tímiayi. ⁵ Anturkatai tusar ashí Jutía nun̄kanmayā shuar tura Jerusarén peprunmayā shuarsha Niin̄ tariarmiayi. Taar, ni tunaar̄in ujakarmatai, Juan̄ Jurtañ̄ entsanam imiainiarmiayi.

⁶ Juansha kamiriu ure najantramun entsauyayi. Emenmamkesha nuapeyayi. Tura chinij̄iai yutai-títikriatsnasha yuuyayi. ⁷ Niisha áentsun ujaak tímiayi “Wíj̄iain̄kia nan̄kaamas ana nu winia ukurūj̄ winittiawai. Niisha nekas ii Uuntrī asamtai, wikia tsuntsumpruan ni sapatr̄i jin̄kiamur̄inkisha atitrachminiaitjai. ⁸ Wikia entsaj̄ain̄ aya ayashmin̄ imiaajrume, antsu Niñkia imiantinia áanis Yusa Wakan̄i atum̄i enentáin̄ en̄ketramprattarme” tímiayi.

Juan̄ Jesusan imiaimiania nu

(Mateu 3.13-17; Rúkas 3.21-22)

⁹ Juan̄ áentsun imiak pujurainiāi, Jesuska Nasarét pepru Kariréa nun̄kanam ana nuyá jiinki Juan̄kan tarimiayi. Tura Juan̄ Jurtañ̄ entsanam Jesusan imiaimiayi. ¹⁰ Nuiñ̄, Jesus entsayā jiiniuk, nayaimpin uranniun wáinkiamiayi. Tura Yusa Wakan̄in̄ yámpitsa núnin najanar Niin̄ taarun wáinkiamiayi. ¹¹ Tura nayaimpinmayā chichaamun juna antukmiayi, “Ámeke winia aneamu Uchiruitme. Ámin shiir enentáimtajme.”

Uunt iwianch Jesusan anañkataj t̄miania nu

(Mateu 4.1-11; Rúkas 4.1-13)

¹² Nuyá wárik Yusa Wakan̄i Jesusan atsamunam jukimiayi. ¹³ Tura nuī, yajasma yujamunam, kuarenta tsawant pujumiayi. Nuī pujāi uunt iwianch Satanás naartin Jesusan nekapsataj tusa pujurmiayi. Túramtai Jesusan wáinkiat̄ai tusar nayaimpinmayā suntar tariarmiayi.

Kariréa nun̄kanam ni takatr̄in Jesus nan̄kammiania nu

(Mateu 4.12-17; Rúkas 4.14-15)

¹⁴ Ukunam, Juan̄kan sepunam enkeawarmatai, Jesuska Kariréa nun̄kanam Yusa akupeamur̄in pachis shiir chichaman etserki támiayi. ¹⁵ “Tsawant jeayi. Shuarnum Yusa akupeamur̄i jeatemai. Tuma asamtai, yaunchu enentáimsamuram yapajiárum, Uwempratin Chicham umirkatarum” tu etserkamiayi.

Jesus namakan achinian ni unuiniamuri ajasat tusa kuartu achikmiania nu (Mateu 4.18-22; Rúkas 5.1-11)

¹⁶ Jesus Kariréa antumianka kánmatkarin wekas, namakan achinian Semunasha ni yachi Antresnasha nekan ajuntuk pujuinian wáinkiamiyi.

¹⁷ Wáiniak “Nemartustarum, tímiayi. Namak achiarmena nútiksanak áentsun-eau Yusna arti tusan awajsatjarne” tímiayi. ¹⁸ Tura nuyanka ni nekarin ajapa ikiuniak Jesusan nemarsarmiayi.

¹⁹ Nuyasha Jesus ishichik arantach wesa, Sepetéu uchirin Jakupun ni yachin Juánnasha kanunam ni nekarin apaa pujuinian wáinkiamiyi.

²⁰ Wáiniak, nemartusta tusa untsukarmiayi. Tutai ni aparincha, ni aparitakarniurincha kanunam ikiuniak Jesusan nemarsarmiayi.

Jesus iwianchin áishmannumia jiki akupkamiania nu (Rúkas 4.31-37)

²¹ Nuyá Kapernáum péprunam jeawarmiayi. Nui Israer-shuara ayampratin tsawantri jeakui Jesus Israer-shuar iruntainiam wayá Yus-Chichaman unuiniamiyi. ²² Tura ni jintinniuri jintintiarminia nuna iniankas uunt chichamjai Jesus jintiakui ni chichamen anturkar ti enentaimprarmiayi.

²³ Nuisha nu iruntainiam áishman iwianchruku ámiayi. Niisha untsumuk

²⁴ “¿Warí itiurtamkattsamea incha taum, Nasarénumia Jesusa? Wikia nékajme. Ámetme Tunaartichu Yúsaiya winiamna nu. In emestamprataj tusam táchamek” tímiayi.

²⁵ Tutai, Jesus kakantar chicharuk “Takamátsatá. Ni enentáiya jinkitia, tájame” tímiayi.

²⁶ Tutai iwianch áishman kan ukurak ajakniñkiar untsamak kakaar aa jinkimiayi. ²⁷ Nuna wáinkiar, ashamkar nuámtak aniniaisarmiayi. “¿Ausha warinkit. Yamaram chicham warí chichamait? Ju Jesuska timiá kakaram asa ímia iwianchin akupeatsuk. Iisiana umirainiatsuk” tiarmiayi. ²⁸ Tura ti wárik nu túrunamu ashí Kariréa nunkanam antunkamiayi.

Jesus Semunka tsatsarin tsuármiania nu (Mateu 8.14-15; Rúkas 4.38-39)

²⁹ Nuyá Israer-shuara iruntai jeenia jiki Jesuska Jakupujai Juanjaisha we, Semun ni yachi Antresjai pujuarmia nui jeawarmiayi. ³⁰ Semunka tsatsari tsuer peaknum jaa tepemiayi. Núnaka wárik Jesusan ujakarmiayi.

³¹ Nuinkia Jesus werí uwejnum achik iniantkimiayi. Tura nu chichamaik michatramiayi. Michatar, péñker ajas, Jesusnasha ni nemarniurincha ayurawarmiayi.

Untsurí jaan Jesus péñker awajsarmiania nu (Mateu 8.16-17; Rúkas 4.40-41)

³² Nu tsawantai kjarai, ashí jáinian, iwianchrुकuncha Jesusan itiariarmiayi. ³³ Tura ashí nú péprunmaya shuar taar wáitiniam Jesusan káutkarmiayi.

³⁴ Untsurí shuáran chikich sunkuraim jáinian Jesus tsuararmiayi. Tura iwianchrुकu armia nuna enentáiyán iwianchin jirkiarmiayi. Jesuska iwianch nékamu asa, winia náarun ántar pachisarain tusa suritkiarmiayi.

Kariréa nunkanam Jesus Yus-Chichaman etserkamiania nu (Rúkas 4.42-44)

³⁵ Nuyá kashin káshik tsawaatsain Jesus nantaki Yúsan áujсатаj tusa jiki atsamunam wémiayi. ³⁶ Tura Semun ni amikrijjai Jesus wemaanum wéarmiayi.

³⁷ Nin wáinkiar “Ashi shuar Ámin eátmainiawai” tiarmiayi.

³⁸ Tutai Jesus chichaak “Chíkich péprunmasha arantach wetai. Nuj Yusa chichame etserkatai; nuna túrattsan táwitjai” tímiayi.

³⁹ Nuna ti ashí Kariréa nunkanam Israer-shuar iruntai jeanam etseras wekaimiayi; tura núnisan iwianchniasha jiki akupkini wekaimiayi.

Tunamaru shuaran Jesus tsuármiania nu
(Mateu 8.1-4; Rúkas 5.12-16)

⁴⁰ Túramtai, ti tunamaru shuar Jesusan seatajtsa tarimiayi. Taa tikishmatar tímiayi “Wakerutakmeke tsuaratin tujintratsme.”

⁴¹ Jesus nin waitnentak uwejejai antiñmiayi. Antiñ “Wakerajme. Péñker ajasta” tímiayi. ⁴² Nu chichamaik, Jesus chichakmatai, ni sunkuri menkakamiayi. Tura péñker ajasmiai. ⁴³ Túrunamtai Jesus kakantar chicharuk ⁴⁴ akupeak “Wáinkiatá, nánkamsam etseraip, tímiayi. Antsu weme, Israer-patirmin iniakmamsata. Túram ashí aents ame péñker ajasmarumin nekaawarat tusam, Muisais aar akupkamiania nu umikiam súsatina ana nu susata” tímiayi. ⁴⁵ Tura etserkaip támaitiat, jiinki ni túrunamuriñ mash etseramiayi. Tura nuna etserka asamtai, péprunam, aents írunmanum wétinian Jesus nakitramiayi, antsu aa atsamunam pujumiayi. Tura ashí nunkanmaya Jesusan tariarmiayi.

2

Jesus emearun péñker awajsamiania nu
(Mateu 9.1-8; Rúkas 5.17-26)

¹ Kapernáum péprunam Jesus ukunam ataksha wémiayi. Jeamtai, ni jeen pujan nekaawarmiayi. ² Tuma asamtai shuar wárik ti untsurí káutkarmiayi. Ti untsurí asamtai, jea piakmiayi; wáitinmasha ankantchayuyai. Jesuska Yus-Chichaman nu aentsun ujaak pujurmiayi. ³ Nuiñkia ni amikriñ emearun kuatru shuar tampumpuwar júkiar Jesusan itiararmiayi. ⁴ Tura jeawar, untsurí shuar írunu ásamtai jea wayatniun tujinkiarmiayi. Tuma ásar, yakinini wakar jea urakar, áankawar, tampunam ni amikriñ Jesus pujamunam awaintiawar itiararmiayi. ⁵ Tura niisha Jesus nekas tsuártatui tu enentáimmarin Jesus nekáa emearun chicharuk, “Uchirú, ame tunaarumka tsankuramuiti” tímiayi.

⁶ Israer-shuara jintinniurisha nuna antúu pujuarmiayi. Tura ni enentájjiai enentáimsar, ⁷ “¿Jusha urukamtai emearun tu chichara? Yúsana imiá yajauch chicharui. Warí, yaki tunaan asakarminiait; aya Yúsak tunaan asakarchamniakait” tu enentáimsarmiayi.

⁸ Jesuska ni enentáimmarin nekarawar “¿Urukamtia átum tu enentáimprum? tímiayi. ⁹ Emearu, tunaarum tsankuramuiti títinjai, emearu, wajakim tampuram entsakim wekasata títinjai ¿tuá imiá yúpichuchit? ¹⁰ Wats wi, Aents Ajasu asan Yusa kakarmarjjiai shuara tunaari tsankuramniaitjiana nuna paant iwaintiuktajrume” tímiayi. Nuna tinia emearun chicharuk ¹¹ “Wajaktia, tájame; túram tampuram jukim jéemiñ wetá” tímiayi. ¹² Nu chichamaik emearu wajaki, tampurin jukí, ashí ímiainiain jínkimiai.

Nuna túrunamtai ashí ashankarmiayi. Tura “jútikiamu penké wáinchaitji” tiar Yusa náarin uunt awajarmiayi.

Jesus Riwin untsukmiania nu
(Mateu 9.9-13; Rúkas 5.27-32)

¹³ Nuyá ukunam Jesus antumiannum waketkimiayi. Tura ashí shuar káunkarmatai jintintiawarmiayi. ¹⁴ Tura jintintiawar amuk, akupin akitiai jeanam nankaamak, Arpeu uchirin Riwin pujan wáinkiamiayi. Wáiniak

“Nemartusta” tímiayi. Tutai Riwí wajakí Jesusan nemarsamiayi. ¹⁵ Chíkích tsawant, Riwishá Jesusan ni jeen itiaamiayi. Tura untsurí kuítian-juu shuarsha, yajauch shuarsha Jesusjái ni unuiniamuríjiaisha ashí nuim misanam pujuarmiai. ¹⁶ Tura kuítian-juu shuarsha yajauch shuarsha Jesusjái irunar yurumáinian wáinkiar, Pariséu jintinniurísha Israer-shuara jintinniurísha Jesusa unuiniamurín aniasarmiayi. “¿Urukamtai ame úntrum Jesus, kuítian-juu shuarjái tura yajauch shuarjaisha yuruma?” tiarmiayi.

¹⁷ Jesus nuna antuk tímiayi “Jaachu shuar tsuákratniun atsumainiatsui. Antsu jaa ana nu tsuákratniun atsumainiawai. Wats, “pénkeraitjai” tuinia nú shuaran untsuktajtsan táchaitjai; antsu “tunaitjai” tuinia nú shuaran Winia ajasat tusan untsuktajtsan táwitjai” tímiayi.

*Yurumtsuk Yus áujsatniun Jesusan aniasarmiania nu
(Mateu 9.14-17; Rúkas 5.33-39)*

¹⁸ Juanka unuiniamurísha Pariséu unuiniamurísha yurumtsuk Yúsan áujarmiayi. Túmakui chíkích shuar Jesusan tariar chicharainiak, “Juanka unuiniamurísha, Pariséu unuiniamurísha yurumtsuk Yúsan áujainiatsuk; ¿ame unuiniamurmeka urukamtai yurumtsuk áujainiatsu?” tiarmiayi.

¹⁹ Tutai Jesus chichaak, “¿Nuatma nampernum ipiaamu ainia nu ijiarmawartiniak ainia? Yama nuatu pujakui ní amikrî warainiak ijiarmachartin ainiawai. Núnisan winia unuiniamur, Wi pujakui, warainiak yurumtsuk pujuschartin áiniawai. ²⁰ Tura tsawant jeattawai, Winia jurukiartin. Nuínkia winia unuiniamur ijiarmawartatui’ tímiayi Jesus.

²¹ Tura nuyá juna tímiayi ‘Mamuru pushí jaanakmatai yamaram tarach anujtukchatniuiti. Túramka nijiam yamaram tarach sumpeak mamushan chiníkiá nuna nankaamas jáaktatui. ²² Nijiamanch yamáí nawar nuap najanamu arutnum yaraachminiaiti. Túramka wakaprúa kariak nuap najanamu ijiakratniuiti. Tura nijiamanch ukarattawai. Nuap najanamu yajauch ajastatui. Antsu yamaram nijiamanch yamaram nuap najanamunam yaraatniuiti” tímiayi.

*Trikiu neren yuawarmiania nu
(Mateu 12.1-8; Rúkas 6.1-5)*

²³ Chíkích ayampratin tsawantái Jesus ajanman ajapén nankaamarmiayi. Tura ni unuiniamurí trikiu neren majúkiar wearmiayi. ²⁴ Nuna wáinkiar Pariséu Jesusan chicharainiak “¿Warí, urukamtai ame unuiniamuram ayampratin tsawant takastin surimkiamu aisha takainia?” tiarmiayi.

²⁵ Tutai Jesus tímiayi “Íi uuntri Tawitia túramurí Yús-Papinium áujkachukaitrum. Niisha ni nemarniurísha tsukamainiak, ni yurumkarí atsakui, túrawarmia nu áujkachukaitrum. ²⁶ Apiatár Yusnan pujurniu uuntri pujái Uunt Tawit Yusa Jeen wayamiayi. Tura Tawitkia, patri nankaamas uunt asa, pátrichuiat, iniaktusma tantan, aya patri yútainiak, yuamiayi; tura ni nemarniuríncha ajamsamiayi. Nu áujkachukaitrum, tímiayi. ²⁷ Ayampratin tsawantái túrashtinian umirkashtimpiash tusa Yuska aentsun najanachmiayi. Antsu aents ayamprarat tusa Yus ayampratin tsawantan tesamiayi. ²⁸ Wishá, Aents Ajasu asan imia ayampratin tsawantan Nerenniuríntjai” tímiayi.

3

*Uweje jakan Jesus tsuármiania nu
(Mateu 12.9-14; Rúkas 6.6-11)*

¹ Ataksha chíkich tsawantaj Israer-shuar iruntainiam Jesus wayamiayi. Nuí shuar ámiayi, ni uweje jaka. ² Tura tunáan túrayi titiai tusar wakeru-
iniak “ayampratin tsawantaj tsuártimpiash” tusar, Pariséu shuarsha Jesusan
ii pujuriarmiayi. ³ Nuinkia Jesus uweje jaka shuaran chicharuk “Ajapén
wajasta” tímiayi. ⁴ Nuinkia mamikmaun chicharuk “¿Ayampratin tsawantaj
pénker túratin yajauch túratniujaj tuá imiá pénkerait. Shuar uwentikratin
maatniujaj tuá imiá pénkerait?” tímiayi.

Nuna takui niisha pachischarmiayi.

⁵ Tura Jesus kajek nin íyarmiayi; tura ni enentáin kátsuram ásarmatai kúntuts
enentáimsamiayi. Tura shuáran chicharuk “Uwejem iniakmasta” tímiayi. Ini-
akmasmatai ni uweje jaruku ataksha pénker ajatsamiayi. ⁶ Nuyá Pariséu
shuar jíinkiar, Jesus maami tusar Erutis shuarjaj áujmatsarmiayi.

Untsurí shuar Jesusan káutkarmiania nu

⁷ Nuyá Jesus ni unuiniamuríjjaj antumiannum wémiayi. Kariréa
nunkanmaya untsurí shuarsha Jesusan nemariarmiayi. ⁸ Untsurí
nunkanmayasha káunkarmiayi. Jutía nunkanmayasha, Jerusarén
péprunmayasha, Itiumía nunkanmayasha, Jurtañ entsa amainiasha, Tiru
tura Setun pepru pujuinia nú nunkanmayasha, untsurí shuar ni túramurín
nekaawar, Jesusan káutkarmiayi. ⁹ Untsurí káunkar chanuntawarain tusa
Jesus ni unuiniamurín kanuram inianáastarum tusa seamiayi. ¹⁰ Kame
untsurí shuaran Jesus nuik tsuaru asamtai, jaa shuar nuí káunkarmiania
nu Jesusan antintaj tusar shitianainiakui nuna seamiayi. ¹¹ Tura
iwianchrुकusha Jesusan wáinkiar tikishmatrarmiayi. Untsumainiak “Ame
nekas Yusa Uchirínme” tiarmiayi. ¹² Tura nuna etserkairap tusa Jesuska
kakantramiayi.

Jesus tuse shuaran anaikiarmiania nu

(Mateu 10.1-4; Rúkas 6.12-16)

¹³ Nuyá Jesus náinnium wakamiayi. Tura anaikiatniun wakerimia nú
shuaran untsukmiayi. Tura niisha Jesusan weriarmiayi. ¹⁴ Tura Niíjjaj
wekasar Yus-Chichaman unuinartinian tuse shuáran anaikiarmiayi. ¹⁵ Tura
sunkur tsuártinian, iwianchcha jíiki akupkatniun ni kakarmarín súsarmiayi
nú shuaran. ¹⁶ Ju shuáran anaikiamu ármiayi: Semun, Jesus chíkich naarín
Pítur apujtusmiania nu; ¹⁷ Sepetéu uchirí Jakupu, ni patai Juánsha; ipi-
amtajaj métek kakaram ásarmatai nuna mai “Puanérjis” naarí susamiayi.
Nusha shuar chichamjainkia “ipiamta nuke” tawai. ¹⁸ Nuyá Antressha, Jiripi,
Parturumí, Mateu, Tumas, Arpeu uchirí Jakupu, Tateu, ásump Semun, ¹⁹ Jútas
Iskariúti. Jesusan ukunam surukmia nú Jútasauyayi. Anaik amukmatai jeá
waketrarmiayi.

Yusa Wakanin yajauch chicharna nu

(Mateu 12.22-32; Rúkas 11.14-23; 12.10)

²⁰ Waketkiarmatai, ti untsurí shuar taarmatai takatrí ti akui, yurumátniun
jeacharmiayi. ²¹ Jesusa shuárishá nuna nekaawar Jesus ti itiurchat pujus
wáurtsuash tu enentáimsar jukitíai tusar nu jeanam jeariarmiayi.

²² Nuyá Israer-shuara jintinniurí Jerusarénnumiá táarmiania nu, Jesusan
áujmatainiak “Pirsepú enkea asa iwianchrुकuiti. Tuma asa uunt iwianchi
kakarmaríjjaj iwianchin jíiki akupeawai” tiarmiayi.

²³ Tutai Jesus winitiarum tusa nin untsukmiayi. Tura enentáimtikrataj
tusa júna tímiayi: “¿Iwianch Satanáskesha itiur ajapmamatin? ²⁴ Chikichik

nú nunkanmaya shuar nuámtak kajernaiyakuinkia, nu nunka wari meserchattawak. ²⁵ Nuámtak shuar ni shuarijjai kajernaiyakuinkia nu shuarsha amunaikchartatuak. ²⁶ Núnisan ¿Satanáskesha ni suntarijjai máaniakka itiurak tuke pujusarat? Amunaikiartatui. ²⁷ Nánkamas shuar kakaram shuara jeen wayá, nérenniun jinikiatsuk ni kuítrín kasarkachminiati. Antsu nérenniun jinikiá ni kuítrín kasarkamniati. ²⁸ Nekas tájarme, shuar tunáa ashí túruiniana nuka tsankuramniati. Winiasha winia Aparnasha yajauch áujmatusha tsankuramniati. ²⁹ Antsu Yusa Wakanín yajauch áujmatna nuka tsankurachminiati; antsu nu shuar niñki tuke sumamattawai.” ³⁰ “Jesuska iwianchrukuiti” tuíniakui Jesus nuní tímiayi.

Jesusa yachi Jesusa nukurí
(Mateu 12.46-50; Rúkas 5.19-21)

³¹ Nuyá ni yachi ni nukurijjai taar aa wajasar, Jesusan untsukat tusa akupkarmiayi. ³² Shuar Jesusan téntak pujuarmia nu tiarmiayi “Iis, nukusha, yatsumsha aa wajasar untsurmainiawai.”

³³ Tutai Jesus chichaak “Ya ainia winia nukursha yatsursha” tímiayi. ³⁴ Nin téntakar pujuarmia nuna iis “Júiti winia nukurka, yatsurka, tímiayi. ³⁵ Shuar Yusa wakeramurín uminiana nu winia yatsuruiti, winia umaruuti, winia nukuruuti” tímiayi.

4

Atsaamin atsaampramiania nu
(Mateu 13.1-9; Rúkas 8.4-8)

¹ Nuyá jiinki antumianka yantamen Jesus ataksha unuiniartinian juarkimiayi. Tura untsurí shuar iruntrarmatai, kanunam enkempramiayi. Shuarsha antumianka káanmatkarín pujuarmiayi. ² Jesuska métek-taku chichamjai ti jintintiármiai. Jintintiuk juna tímiayi: ³ “Antuktarum. Atsaamin atsaamprataj tusa jíinkimiai. ⁴ Atsaamkui ni arakri jintiá iniararmai. Chínki yakiya káutkar yuawarmai. ⁵ Chikichcha kaya írunmanum iniararmai, nunka ishichik ámanum. Tura nunka ishichik asamtai wárik tsapainiarmai. ⁶ Tura etsa etsantar sukuám kancape atsá asamtai káararmai. ⁷ Chikichcha janí nupanam iniararmai. Jankisha tsapainiar kankar ajakrarmai; túram nerecharmái. ⁸ Chikichcha pénger nunkanam iniararmai. Tura tsapainiar nerecharmái, chíkich trainta, chíkich sesenta, chíkich siañ nerecharmái. ⁹ Kuíshim ákuinkia antuktarum” tímiayi.

(Mateu 13.10-17; Rúkas 8.9-10)

¹⁰ Untsurí wearmatai, ishichik Niijjai juakarmiania nu, ni tuse unuiniamurijjai aniasarmiayi “¿Ame jintintiamna nusha warimpiat?” tiarmiayi.

¹¹ Tutai Jesus chichaak “Yuska ni akupeamurín atumin paant nekamtikramattsá wakerutmarme. Antsu chíkich shuarka aya métek-taku chichamjai jintintiáwartatui. ¹² Íniayatan wáinkiacharat tusa, antukarsha nekaacharat tusa, umirtsuk ni tunaari tsankurnacharat tusa túrattawai’ tímiayi.

(Mateu 13.18-23; Rúkas 8.11-15)

¹³ Tura tímiayi ‘Wi jintintiajrumna nú métek-taku chicham nekaachurmek. Nu nékachkurmeka ¿itiurak chíkich métek-taku chichamsha nekaatarum? ¹⁴ Atsaamniua nuka Yus-Chichaman étserna nuna nakumui. ¹⁵ Jinikiá jintiá iniaarua nuna chíkich shuar ántuiniamun nakumui. Nu shuar chichaman ántuiniawai. Tura antukarmatai Satanás wárik tarí ni enentáin atsaampramun jurawai. ¹⁶ Chíkich shuar ántuiniamu kayanam atsaampramua

núniskete. Niisha chichaman antukar wárik warainiak umiktasa wakeruiniawai. ¹⁷ Tura ni kan̄kapē atsakui, aya ishichik katsuiniawai. Tura ukunam, Yus-Chichaman wakeruiniakui shuar kajeram tura chíkich itiur-chatan wáinkiar Yúsaiya kanainiawai. ¹⁸ Chíkich ántuiniamuka jan̄kí nupanam atsaampramua núniskete. Nu shuar Yus-Chichaman ántuiniawai. ¹⁹ Ántuiniayat ju nuñkanam ana nuna ti páchiniawai. Tuma ásar kuítian tura shiirmachin ti takustinian wakeruiniawai. Nú wakeramu ni enentáin Yus-Chicham ana nuna kan̄kar emen̄katui. Tuma asamtai nerektinian tujintiainiawai. ²⁰ Tura chíkich ántuiniamusha péñker núnkanam atsaampramua núniskete. Nú shuarsha Yus-Chichaman antukar umiiniawai. Tura nerenawai, chíkich shuar trainta, chíkich shuar sesenta chíkich shuar sian̄sha nerenawai.’

Uukma ana nu paant nekanattawai

(Rúkas 8.16-18)

²¹ Nuyá Jesus juna tímiayi ‘¿Shuar shiripkin ekeemak itiā pitiaknum en̄keattawak. Peaknum wakenam ikiustatuak? Atsá. Antsu misanam ekentsashtinkiait. ²² Núnisan̄ ashí uukma ana nu ukunam paant nekanattawai. Tura núnisan̄ yamáishishmasa chichasmasha ukunam paant nekanattawai. ²³ Kuíshim ákuin̄kia antuktarum.’ ²⁴ Tura nuyá tímiayi ‘Ántarmena nu esetrarum enentáimsarum antuktarum. Urutá péñkerak enentáimsatarum, núnisan̄ Yuska ámin nekaatniun suramsattarme, tura nú núkap patatramsattarme. ²⁵ Tuma asamtai shuar núkap takakna nu patatnastatui. Antsu chíkich shuar ishichik takakuk jurunkittiawai.’

Yusa akupeamuri júnisaiti

²⁶ Nuyá Jesus chichaak juna tímiayi ‘Yusa akupeamuri júnisaiti. Shuar jin̄kiāin atsaampratniua núniskete. ²⁷ Jin̄kiāin atsaamar, untsurí kanar, tsawar, uruksan̄pi tusa nákawai. Tura itiura tsapainia núnaka nékatsui. ²⁸ Kame jin̄kiāi nuñkanam init aku nin̄ki tsapaatsuk; emka nukareawai, nuyá tuyureawai tura nujamar katsuawai. ²⁹ Túruna káakmatai júuktin tsawant jeayi tusar juíniawai.’

(Mateu 13.31-32; Rúkas 13.18-19)

³⁰ Ataksha Jesus tímiayi ‘¿Yusa akupeamuri warijiāin̄ki nakumkataj. War-ijiāin̄ki métek-takuit? ³¹ Mustasa jin̄kiāi araamua nujai métek-takuiti. Nu jin̄kiāisha ashí nan̄kaamas ishitiupchichiti. ³² Tura araam tsapái ashí nan̄kaamas uunt ajawai; tura tseñkeakmarisha kámpuram asamtai nūi mik-intranam chin̄kisha shiir ayamainiawai.”

(Mateu 13.34-35)

³³ Núnisan̄ Jesus untsurí métek-taku chichamjai Yus-Chichaman ujaamiayi. Nii nekaatniun jearmia nunak ujaamiayi. ³⁴ Chíkich shuaran aya métek-taku chichamjai ujaamiayi; antsu ni unuiniamurijiāi Nin̄ki pujus ashí paant jintinrarmiayi.

Nasenchá, entsancha Jesus imijian̄mia nu

(Mateu 8.23-27; Rúkas 8.22-25)

³⁵ Nu tsawantai etsa akaikimtai Jesus ni unuiniamurin chicharainiak “Entsa amain katiñtai” tímiayi. ³⁶ Tutai kanunam en̄kemprarmiayi. Chíkich shuarnaka káanmatkanam ikiukiar Jesusan kanunam pujan júkiarmiayi. Chíkich kanunmayasha atampriarmiayi. ³⁷ Tura nasesha ti nasenkatasa nan̄kammiayi; chíchimi kanunam yaráná piáktasa ajamiayi. ³⁸ Jesuska kanú sen̄karin atamprus kanú tepemiayi. Tura, ni unuiniamuri Jesusan ishintiak chicharuk “Uunta ii wayajnia júka pachitmatsmek” tiarmiayi.

³⁹ Tutai Jesus nantaki nasen kakantramiayi. Entsancharuk “Taka-matsata. Miaku ajasta” tímiayi. Tutai nasesha menkakamiayi, entsasha miaaku ajasmiayi. ⁴⁰ Túrunamtai Jesus ni unuiniamurin chicharainiak “¿Urukamtai ashamarum? Itiura Yus nekas enentáimtatsrum” tímiayi. ⁴¹ Tura imiá ashamainiak “¿Maa jusha yait? Nasesha entsasha nin umirainiatsuk” tunaiyarmiayi.

5

Jataranmayan iwianchrukun Jesus tsuármiania nu (Mateu 8.28-34; Rúkas 8.26-39)

¹ Nuyá antumian amaini Jatara nunkanam jeawarmiayi. ² Jesus kanunmaya jinkimtai áishman iwianchruku, shuar jakáa iwiartainiumiá wárik taa Jesusan inkiunmiayi. ³ Nu shuar iwiartainium tuke pujuyayi. Tura jirujainkia nin jinkiaatniun tujinkiarimiayi. ⁴ Jirujai nawenmasha, uwe-jnumsha tuke jinkiau ármiai. Túramaitiat jinkiaarman tsuriar tepet-tepet awajmiayi. Tura ti kakaram asamtai nin nupetkachminiuyayi. ⁵ Tuke tsawajsha káshisha, iwiartainiumsha murasha kayajai ijiumak untsumuu wekainiuyayi. ⁶ Tura yajayan wáiniak Jesusan tseke tarimiayi; tura tikishmatramiayi. ⁷⁻⁸ Túrunamtai Jesus chicharuk “Iwianchiá, ni enentáiyá jinkitia, tájame” tímiayi.

Takui íwianch kakantar chichaak “¿Winiasha urukamtai tarutnium, Uunt Nankaamaku Yusa Uchiri Jesúsá? Yus iirmanum wáitkiarsaip, tájame” tímiayi.

⁹ Takui Jesus tímiayi “¿Ame náarmesha yait?”

Tutai niisha ayak “Untsurí ásar wikia Untsurí-suntar tu anaikiamuitjai” tímiayi.

¹⁰ Nuna ti amik, nu nunkanmaya akuptukain tusa Jesusan ti seamiayi. ¹¹ Nuisha nainnium nuntumas untsurí kuchi shushunmak matsamarmiayi. ¹² Tuma asamtai, kuchiniam enkemátin tsankatrukta tusar Jesusan seawarmiayi.

¹³ Tuiniakui Jesus “ayu” tímiayi. Takui íwianch áishmankaíniá jinkiar kuchiniam enkemáwarmiayi. Kuchisha ti untsurí, jimiará mir (2.000) áchiawash. Ashí mash nánatanam iniaawar antumiannum iniankarmiayi. Nuisha entsá kïakar jakerarmiayi.

¹⁴ Túrunamtai kuchin wáinin pisarar péprunmasha shuarnumsha nuna et-serarmiayi. Tuma asamtai iyutai tusar ashintiukarmiayi. ¹⁵ Túrawar Jesusai jeawarmiayi. Jeawar áishman yaunchu iwianchrukun yamaikia pénger ajasun pushirin entsar pujan wáinkiarimiayi. Wáinkiar ashankarmiayi. ¹⁶ Tura waketkiar kuchi túrunamuncha iwianchruku pénger ajasmancha mash et-serkarmiayi. ¹⁷ Tuma asamtai ni nunkeya jinki wetá tusa seawarmiayi. Jesus kanunam enkemamtai áishman nuik iwianchruku amia nu Jesusan chicharuk ¹⁸ “Wi Ámijjai tuke tsaninkian wekasatjai” tímiayi.

¹⁹ Tura núnaka Jesus suritkiamiayi. “Antsu ame jeemiin, áminiurmijn weme, ashí Uunt Yus túrutma nu tura waitnentrampra nusha ujakarta” tímiayi.

²⁰ Tutai áishmansha wémiayi. Tura antsu Tekapuris nunkanam Jesus nin pénger awajsamia nuna ashí shuaran ujakmiayi. Nu nunkanmaya shuarka nuna antukar ti enentáimprarmiayi.

Jimiará jaan Jesus tsuármiania nu (Mateu 9.18-26; Rúkas 8.40-56)

²¹ Ataksha Jesus kanujai katinmatai, aents untsurí Nin irunturarmiayi. Jesuska antumianka káanmatkari wajamiayi. ²² Tura Israer-shuar iruntai jea náampruku, ni naari Jairu, támiayi. Taa, Jesusan wáiniak, piniakum

tepersamiayi. ²³ Piniakumar ti seak, “Winia nawantur jarutui. Winitia, túram pé_nker ajasat tusam uwejmijia antintrukta. Nui_nkia jarutkashtatui” tímiayi.

²⁴ Tu tímiatai Jesus niijia wémiayi. Tura untsurí shuar wena ásar Nin chánuarmiayi.

²⁵ Nui pachitkia nuwa ti jaa wémiayi. Niisha tuse uwí numpan ajapeak wáitias pujuyayi. ²⁶ Ti untsurí tsuakratin nincha iisu armiayi. Tura iyamsha ti wáitias pujuyayi. Tura ni kuítríncha ashí ajapaitiat tsuámarchauyayi; antsu tsuamsha nu arant ajauyayi. ²⁷ Nu nuwasha, Jesus túramun antuku asa, ni ukuurini amainia_n ni pushirín anti_nmiayi. ²⁸ “Wi aya ni pushirín anti_nnaka pé_nkerapi ajasaintjia” tu enentáimiar túramiayi. ²⁹ Tura Jesusa pushirín anti_n nú chichamaik numpa ájapman menkakamiayi. Pé_nker ajasman ayashi_n nekapramiayi. ³⁰ Tura nuin Jesuska, ni kakarmarijia tsuarman nekapmampramiayi. Tura nuna nekáa, ayantar chichaak “¿Yaki winia pushirun antintrukta?” tímiayi.

³¹ Tutai ni unuiniamuri tiarmiayi, “Untsurí Ámin antinmainiasha ¿urukamtai “yaki winia antintkia” tame?”

³² Tura Jesus, yaki túruta tusa ashí ímpramiayi. ³³ Nui_nkia nuwasha, ni ayashin túruna nuna nekáa, ti ashamak kuraimiayi. Tura Jesusan jeari tikishmatramiayi. Tura ni túrunamurín ashí paant ujakmiayi. ³⁴ Takui Jesus nin chicharuk “Nawantru, Winia nekas enentáimtursa asakmin, pé_nker awajtamsaitme. Shiir wetá, tura tuke pé_nker pujusta” tímiayi.

³⁵ Tura Jesus nuna tuke chichas puja, iruntai jea uuntri jeenia tariarmiayi. Tariar chicharainiak “Ame nawantrum jakayi. ¿Urukamtai Unuikiartin tuke itit awajsatam?” tiarmiayi.

³⁶ Tura Jesuska, nii tiarmia nuna ántayat, núnaka pachitsuk, iruntai jea uuntrin chicharuk “Ashamkaip; áyatik nekas enentáimtursata’ tímiayi. ³⁷ Tura Nijia wétinian aya Pítruncha, Jakupuncha ni yachi Juanjai tsankatkarmiayi. ³⁸ Iruntai jea uuntri jeen jeawar, áentsun charaatum ajainian, úutainian untsukum ajainiancha Jesus wáinkiamiayi. ³⁹ Tura nuwach penké jakan nékayat, wayá nin chicharuk “¿Urukamtai timiá úutrum, tura wa wa ajarum? Nuwach jákachai, antsu kanarai” tímiayi.

⁴⁰ Nuna takui wishikrarmiayi. Tura Jesus ashí jiiir akupkarmiayi. Áyatik nuwachí aparín, nukuríncha tura Nijia táaruncha nuwachí tepamurín jukimiayi. ⁴¹ Tura wayawar Jesuska nuwachí uwejen achik tímiayi “Taritia kumi.” Nusha shuar chichamjainkia “nawantrú nantáktiá” tawai. ⁴² Nuwach tuse uwí takakuya nu, nú chichamaik nantaki wekasamiayi. Túramtai nui pujuarmiania nu ti enentáimprarmiayi. ⁴³ Jesuska chichaak “Atumsha penké etserkairap’ tímiayi. Tura “nuwach ayuratarum” tímiayi.

6

Jesus Nasarénum pujusma (Mateu 13.53-58; Rúkas 4.16-30)

¹ Jesus nuyá jii_nki ni nunken waketkimiayi. Ni unuiniamurisha nemariarmiayi. ² Nuisha ayampratin tsawant jeamtai Israer-shuar iruntainiam wayá unuiniamiayi. Tura Jesusan anturkarmiania nu ti enentáimsarmiayi. “¿Jusha tui unuimiaruit. Ni nekaatniuríncha yaki susait. Tura aentsti tujintiajnia nuna Niisha itiurak tura? ³ Jusha karpintí_ruchukait; Maríi uchirínchukait. Ni yachisha Jakupusha, Jusesha, Jútassha, Semunsha nékatsjik. Tura ni umaisha jui iijia pujuiniatsuk” tiarmiayi. Túrawar Nin nekas enentáimtustinian tujinkarmiayi.

⁴ Túrasha Jesus nin chicharuk “Yúsnan etserniun chíkich nunkanmayanka shiir anturainiawai. Antsu ní nunkeyanka, ní shuarsha anturainiatsui” tímiayi.

⁵ Tura nuisha, ni nunkenkikia aentsti tujintiamun túratniun tujinkiamiayi. Antsu jaancha aya ishichik ni uwejejai antiñ tsuármiai. ⁶ Tura nekas enentáimtacham “¿urukamtai nusha?” tu enentáimsamiayi.

Nuyasha chíkich péprunam wayá, chíkich péprunam wayá Yus-Chichaman unuiniakní wekaimiai.

Yus-Chicham etserkatarum tusa Jesus ni unuiniamurin akupkarmiania nu (Mateu 10.5-15; Rúkas 9.1-6)

⁷ Tuse unuiniamurin untuk jímiarchik jímiarchik werum Yus-Chicham etserkatarum tusa akupkarmiai. Tura iwianchin nupetkarat tusa ni kakarmarin súarmiayi. ⁸ Tura chicharuk “Jintiá yurumátniusha jukiirap, uyuntrumiincha kuitcha enkearum jukiirap. Antsu aya áanik mashtun jukiirum wetarum. ⁹ Sapat uwekatarum, tura entsartincha jímiar jukiirap, tímiayi. ¹⁰ Tura jea wayarmena nuin pujustarum; pujá-pujakuarum nuyá chíkich peprunmasha wetarum. ¹¹ Tura nánkamas aents atumin awaintiamainiachkuisha, anturtamainiachkuisha, nuyá jíinkirum, nu shuar yajauch áiniawai tusarum, atumí nawe nunka akakekrum ikiuktiarum. Kame Yus áentsun nekapsattana nú tsawant jeamtai, nu shuarnaka asutiattawai. Sutama péprunmaya shuarjai tura Kumura péprunmaya shuarjai nankaamas nin asutiattawai” tímiayi Jesus.

¹² Nuyá Jesusa unuiniamuri jíinkiar enentái yapajiar Yúsai enentáimtumartinian etserkarmiai. ¹³ Tura iwianchruku enentáiyá iwianchin jíirki akupkarmiai, tura asutijiai yakarar untsurí jáinian tsuararmiai.

Juanka jakamuri (Mateu 14.1-12; Rúkas 9.7-9)

¹⁴ Jesusa náarin tura ni túramurin ashí aents áujmatin ásarmatai, uunt akupin Erutis nuna antukmiayi. Erutiska “Imiakratin Juan jakamunmaya nantakni. Tuma asa ti kakaram takaawai” tímiayi. ¹⁵ Tura chíkich shuar “Eríasaiti” tiarmiayi. Chikichcha “Yúsnan etserniuiti, yaunchu etserniuya núkete” tiarmiayi. ¹⁶ Erutis nuna antuk “Nekas Juánkaiti. Ni muuken tsupik-tinian akupkamiaj nu, jakamunmaya nantakniuiti” tímiayi. ¹⁷⁻¹⁹ Kame Uunt akupin Erutis, ni yachi Jiripi nuarin nuatkamiayi. Nu nuwá naari Jirutíasaiti. Juansha uunt akupniun Erutisan chicharuk “Yatsumi nuari akintrukchat-niuitme’ tímiayi. Tutai nuwá Jirutías Juánkan ti kakerkamiayi. Tura Juánkan máataj tusa wakerimiayi. Túrasha uunt akupin Erutis nuna surimkiamiayi. Antsu Juan achikrum sepunam enkeatarum tusa akupkamiayi. ²⁰ Juansha tuke enentáijjai Yusa jintin wekainiuyayi. Erutis, ni esetar enentáimniun neka asa Juánkan ashamak Jirutías wakeramurin túrawain tusa suritkiamiayi. Kame Erutis Juan etserman nékachuiat antuktinian wakerimiayi.

²¹ Jirutías, itiurak máawaj tu pujai, uunt akupin Erutis, ni akiiniamu tsawantri jeamtai, ni suntarincha, Kariréa nunkanmaya úntrincha, kuítrintin armia nunasha untukar, namperan najanamiayi. ²² Nuisha Jirutíasa nawantri wayá jantsemámtai Erutis tura niijjai nampernum matsamarmia nusha shiir enentáimsarmiayi. Túramtai uunt akupin nuwáchin chicharuk “Ame wakeram nu seattia. Wí amastatjai. ²³ Nekas tájame, ashí ame seatmena núnaka amastatjai. Wats, seatkumninkia takakjana nuna jímiapetek nakakan, amastatjai” tímiayi.

²⁴ Tutai nuwäch jiinki ni nukurín Jirutíasan chicharuk “¿Wariniak seattaj?” tímiayi.

Tutai “Imiakratin Juan̄ka muuke seata” tímiayi.

²⁵ Nu chichamaik nuwäch wari wayá Erutisan chicharuk “Yamaikia uunt amamkunam Juan̄ka muuken wakerajai” tímiayi.

²⁶ Nuna takui uunt akupin ti kuntuts enentáimpramiayi. Tura nii tiniu asa ni amikri matsatainia nu antukaru ásarmatai surimkiatniun tujinkiamiayi.

²⁷ Tuma asa uunt akupin Juan̄ka muuke itiatata tusa ni suntarín wárikmas akupkamiayi. ²⁸ Túramtai suntar wari we, sepunam Juan̄ka muuken tsupikmiayi. Tsupik, amamkunam itiatá, nuwan susamiayi. Túram achik ni nukurín susamiayi. ²⁹ Juan̄ maamun antukar ni unuiniamurí ni ayashín iwarsatai tusar júkiarmiayi.

*Senku mir áishman̄kan Jesus ayuramiania nu
(Mateu 14.13-21; Rúkas 9.10-17; Juan̄ 6.1-14)*

³⁰ Tura Jesusa unuiniamurí Nii akupkarma nu, ataksha waketki káunak irunturarmiayi. Ashí nii túrawarmia nuna, unuiniararmia nunasha ujakarmiayi. ³¹ Tura untsurí shuar táiniakui, niisha ankant ajastinniasha yurumátzniuncha tujinkiararmiayi. Tuma asantai Jesus chichaak “Ijjiai wemí aents atsuiniamunam; nuí ishichik ayamprarmi” tímiayi. ³² Nuyá Jesus ni unuiniamuríjjiai kanunam enkemprar, aents atsuiniamunam jeatai tusar jíinkiararmiayi. ³³ Túrasha shuar ni wéenan wáinkiararmiayi. Tura “Jesusaiti” tiarmiayi. Tuma ásar ashí péprunmaya untsurí shuar tseke ashintiukar, ni jeatniunam nákakarmiayi. ³⁴ Jesus kanunmaya jiinki ti untsurí aents iruntrar matsatun wáinkiamiayi. Murik pénker wáinchataiya núnisan matsatu ásarmatai Jesus nin wáitnentrarmiayi. Tura núkap unuiniararmiayi. ³⁵ Nuyá k̄iakui ni unuiniamurí Jesusan tariar chicharainiak “Atsamunam pujatsjik; tura yamá k̄iatsuk. ³⁶ Shuar wari akupkarta. Tíjiuch péprunmasha, shuarnumsha wearti, ni yurumkarí sumarmakarat” tiarmiayi.

³⁷ Tutai Jesus chichaak “Atumek ayuratarum” tímiayi.

Tutai “Iisha ju shuar ayuratai tusar, ¿jimiara sian̄ kuitjai yurumak sumaktai tusar wétinkiaitaj?” tiarmiayi.

³⁸ Tura Jesus ni unuiniamurín chicharainiak “Tanta takakrum nu iistarum ¿urutmak aa?” tímiayi.

Tutai nekapmarar chichainiak “Tántaka sénkuchikiiti, tura namaksha jímiarchikiiti” tiarmiayi.

³⁹ Tutai Jesus tímiayi “Ju shuar chírichriniam pujusarti tusar akupkatarum.” ⁴⁰ An̄kant an̄kant sian̄ sian̄sha, senkuenta senkuenta iruntrar matsamsarmiayi. ⁴¹ Jesuska senku tantancha, jímiar namaknasha jusa, yakí nayaimpinmaan̄ íimias Yúsan yuminsamiayi. Tura yurumkan púurmiayi. Puur ni unuiniamurín súsarmiayi. Namaknasha puur súsarmiayi, ashí shuáran ajamsarat tusa. ⁴² Ashí yurumáwar ejemarmatai, ⁴³ puunaruncha, namak ampirmancha achikiar, tuse chan̄kinian ámkar júkiarmiayi. ⁴⁴ Nu yurumkan ti untsurí yurumáwarmiayi. Aya áishman̄kak senku mir (5.000) ármiai.

*Jesus entsá pátatek wekasamiania nu
(Mateu 14.22-27; Juan̄ 6.16-21)*

⁴⁵ Nuyá Jesus ni unuiniamurín chicharainiak “Kanunam enkemprarum, katinkrum amain émaa ajatarum, Petsaitia péprunam. Wisha ju shuáran áujsan ikiuktatjai” tímiayi. ⁴⁶ Shuáran áujas ikiuki Yusjai chichastaj tusa náinnium wémiayi.

⁴⁷ Tura kirit ajasmanum kánuka antumiannum ajapén nanammiayi. Jesuska nin̄ki juakmiayi. ⁴⁸ Jesusa unuiniamurisha wia-wiainiakua ti pimpikiarmiayi, nase tukumma ásar. Nuna Jesus wáiniak tsawartin ishichik ajasmatai entsá pátatek wekas nin jeariarmiayi. Tura nan̄kaamaktiasa wea núnisan̄ wémiayi. ⁴⁹ Jesus entsá wekaan ni unuiniamur̄i wáinkiar, wakan-chashit, tu enentáimprarmiayi. Túrawar ti untsumkarmiayi. ⁵⁰ Ashí wáinkiar ti ashamkarmiayi. Tura Jesus wárik nin chicharuk “Kakaram ajastarum, wíitjai Jesus; ashamprukairap” tímiayi. ⁵¹⁻⁵² Nuin̄kia entsaya kanunam waka en̄kempramiayi. Túramtai nasesha majaantmiayi. Ni unuiniamur̄inkia enentá̄i kiritia áintsan̄ ásmatai Jesus yurumkan núkap awajsamia nuna paant nekaatniun tuke tujinkiarimiayi. Tuma ásar yamá̄i túrunamu itiurak aankia tusar ti enentáimpr̄ar sapijmiakarmiayi.

Jinisarítnumia shuáran Jesus tsuármiania nu
(Mateu 14.34-36)

⁵³ Nuyanka kat̄inkiar, Jinisarít núnkanam jeawarmiayi. Jeawar kanun ajuiniarmiayi. ⁵⁴ Kanunmayā jíntrarmatai, nu nunkanmayā shuar Jesusan nekaawarmiayi. ⁵⁵ Tura “Jesus pujawai” táman antukar, ashí jeanmayā jaan ni peakrintiuk Jesus pujamunam itiaarmiayi. ⁵⁶ Tura Jesus wekaak wémia nuisha, péprunmasha, shuar matsatmanumsha, ishichik matsatkamunmasha jaan itiar̄iar̄ jintiá̄ áeprusarmiayi. Túmainiak Jesusan pushirmin antint̄aj tusar seawarmiayi. Tura ashí ant̄inkiar̄mia nuka pé̄nker ajasarmiayi.

7

Jesus Pariséun áujmatsarmiania nu
(Mateu 15.1-20)

¹ Pariséusha, Israer-shuara jintinniur̄isha Jerusarénnumiā Jesusan tari-armiayi. ² Tura Jesusa unuiniamur̄in̄ ikijmiatsuk yurumun wáinkiar “Israer-shuara túrutair̄in̄ túruiniatsui” tiarmiayi. ³ (Kame Pariséusha, tura ashí Israer-shuarsha, ni uuntrī jintintiamur̄in̄ umikiar ti núkap ikijmiarar yurumin ármiai. ⁴ Péprunmayā tari “ikijmiatsuk yurumashtiniaiti” tiniu ármiai. Tura ti untsur̄i ni uuntrī túrutair̄i núnisan̄ ármiai. “Tsapancha, ichin̄nasha, jiruncha, peaknasha ni jakartiniaiti” tiniu ármiai.) ⁵ Tuma asamtai Pariséusha, Israer-shuara jintinniur̄isha Jesusan chicharainiak “¿Urukamtai ame unuiniamuram̄ ii uuntrī jintinramniuit̄iaj nuna túruiniatsui. Urukamtai ikijmiatskesha yurumáinia?” tiarmiayi.

⁶ Tutai Jesus tímiayi “Ántar chichamtiniaitrume. Isayas yaunchu nekas atumin áartampramiayi juna:

Ju aents ni wenej̄ai Winia “ti pé̄nkeraiti” turutainiawai, tímiayi Yus, tura ni enentá̄inkiā jeachat pujuiniawai. ⁷ Tura tukeneas Winia shiir awajtuniawai. Aentsu chichamē jintiainiayat, “Yus-Chichamaiti” tuiniawai.”

Tu áarmaiti. ⁸ Tura átum Yusa chichamē iniaisarum, aentsu jintintiamur̄i umirkarum, ichin̄nasha, tsapancha ni jaktin, tura chíkich túrutaisha áintsarmek untsur̄i túrarme. ⁹ Túrákrum Yus-Chichamka tsukintiaani ikiusurme atumí uuntrī chichamē umirkatai tusarum. ¹⁰ Kame Muisais yaunchu aar juna tíchamka:

Ame apa nukusha shiir enentáim̄tustarum.

Tura ataksha áarmiai:

Shuarsha ni apar̄in̄, nukur̄in̄cha yajauch chichareakka, nu shuar jákatniuiti. ¹¹⁻¹² Túrasha átumka Pariséutirmeka, antsu ju tárume: “Shuar ni apar̄in̄ ni nukur̄in̄ chicharuk “Wi yáint̄inian takakjana nu Kurpanaiti” takuin̄kia, atumsha pé̄nkeraiti, apar̄in̄cha nukur̄in̄cha yáin̄chatí” tarume. (Kurpan tana

nuka, Yus susamu, tawai.) ¹³ Nekaatarum, Pariséutiram. “Íí yaunchu uuntri chichame tuke umiki wétiniaitji” tákurum, Yus-Chicham penké ántar chichama núnin awajearme. Núnisrumek chikichcha untsurí túrarme.” Tu timiayi Jesus.

¹⁴ Nuyá ataksha Jesus ashí shuáran untsukar “Mash anturtuktarum, ashí nekaatarum, tímiayi. ¹⁵ Aaya ayashnium wayaana nu, shuáran yajauch awajsachminiati; tura antsu ni enentáinia jinia nu, yajauch awajsattawai. ¹⁶ Shuar nuna ántakka enentáimprati” tímiayi.

¹⁷ Nuyá áentsun ikuiak, jea wayamtai, ni unuiniamurí aniasarmiayi “¿Nu métek-taku chicham warintiua?” tiarmiayi.

¹⁸ Tutai Jesus tímiayi “Atumsha nékatsrumek. Páantchakait; yurumak yúajnia nu, enentáiniam wayachu asa, shuáran yajauch awajsachminiati. ¹⁹ Antsu wakenam wayá, nankaamas menkaatsuk” tímiayi. Nuna taku, ashí yurumak páchitsuk yuamniati, tímiayi. ²⁰ Nuyá tímiayi “Shuara enentáinia jinia nu, yajauch awajsamniati. ²¹ Shuara enentáinia, initia, yajauch enentáimsatniusha, tsanirmatniusha, natsa tsanirmatniusha, shuar máatniusha, ²² kasamkatniusha, chikichna wakeruktincha, péñkercha túratniusha, anankatniusha, natsantain átincha, yajauch enentáimtustincha, tsanumpratniusha, waantu enentáimtumastincha, netse túratniusha, ashí nuka initia wininiatsuk. ²³ Ashí nu tunáa ainia nu, shuara enentáinia jiniu asa, shuáran yajauch awajainiawai” tímiayi.

Serupinísianmaya nuwa Jesusan nekas enentáimtusmiania nu (Mateu 15.21-28)

²⁴ Tiru pepru, Setún péprusha Serupinísia nunkanam ámiayi. Nuka Israershuara nunkenchayuyayi. Nu nunkanam Jesus wémiayi. Tura jeá, jeá wayáa pujusmiayi. Tura nuí pujamun nu nunkanmaya shuar nekarawarain tusa nakitmiayi; túrasha uumkatniun tujinkiamiayi. ²⁵ Wárik nu nunkanmaya nuwa Jesus pujan nekaamiayi. Nu núwaka nawantri iwianchrukuyayi. Tuma asa Jesusan tarí ni nawen piniakum tepersamiayi. ²⁶ Nu nuwa Israershuarcha, Serupinísianmayayuyayi. Túmaitiat, nawantru enentáiya iwianchin jirturkitia tusa Jesusan seamiayi. ²⁷ Tutai Jesus nuwan chicharuk “Uchi emka ejemarartí. Uchi apatkurí atankir yawach súsatin péñkerchaiti” tímiayi.

²⁸ Tutai nuwa ayak “Nekas, Unta, tame. Tura yawachisha misanam wakenam pujuinia nu, uchi apatkun yurumuk juyumak kákeamun yuiniatsuk” tímiayi.

²⁹ Tutai Jesus tímiayi “Péñker tame. Tuma asam, shiir wetá; ame nawantrumí enentáiya iwianch jinkiyi” tímiayi.

³⁰ Takui niisha wémiayi. Tura ni jeen jeá, ni nawantrin íwianch jinkimtai péñker ajas peaknum tepan wáinkiamiayi.

Jesus empekun tsuármiania nu

³¹ Jesus Tirunmaya jiinki Setún péprunam nankaamarkutak, Tekapuris nunkanmaani nankaamaki, Kariréa antumiannum ataksha jeamiayi. ³² Nuí chichachu ámiayi, kuishin empeku. Nu shuáran Jesusan itiarar, ni uwejejai antinkiat tusa seawarmiayi. ³³ Shuar matsatmanumia Jesus nin akanki jukí kuishin tsara uwejejai tsutsukruamiayi. Tura usukia, nu shuara iniain antintkiamiayi. ³⁴ Tura nayaimpinmaaní ímias súkaska mayati “Epata” tímiayi. Nuka, shuar chichamnumka “chinkiatí” tawai. ³⁵ Nu chichamaik ni kuishisha chinkiamiayi, iniaisha séermiayi. Tura paant chichasmiayi. ³⁶ Tura Jesus chicharainiak “Penké etserkairap” tímiayi. Jesuska surí-suritiamaitiat, nu nankaamas etseriarmiayi. ³⁷ Tura ti enentáimprarmiayi. Enentáimprar,

“Ju Jesus aya péñkeran túrawai. Empekuncha ántumtikniaiti, tura chichachun chichamtikniaiti” tiarmiayi.

8

Kuattru mir shuáran Jesus ayuramiania nu (Mateu 15.32-39)

¹ Nu tsawantáji shuar timiá untsurí iruntrarmiayi. Yurumkarí atsakui Jesus ni unuiniamurín untsukar juna tímiayi: ² “Ju shuáran waitnentajai. Menaintiú tsawant Wijíajai pujuinia ásarmatai ni yurumkarí amuukachaik. ³ Tura ni jeen ayurtsuk akupeamka, tsukariin jintiá pimpikiartatui, yajaya káunkaru ásar” tímiayi.

⁴ Tutai ni unuiniamurí chichainiak “Túrasha juí atsamunam, ju aents ejemaratat tusar ¿tuyá yurumkak wáinkiatatái?” tiarmiayi.

⁵ Tutai Jesus nin aniasmiayi “¿Urutmá tanta aa?”

Tutai “siati awai” tiarmiayi.

⁶ Nuiñkia ashí áentsun “nunká pujustarum” tiarmiayi. Tura tantan achik, Yúsan yumínsamiayi. Tura puuk, áentsun ajamsatarum tusa ni unuiniamurín susamiayi. ⁷ Tura uchich namaksha ishichik aan achik, Yúsan yumíñkias, ni unuiniamurín chicharuk “Jusha shuar ajamsatarum” tímiayi. ⁸ Turam ashí yurumáwar ejemarmarmiayi. Ampirma púunaruncha siati chañkinnium áimkiarmiayi. ⁹ Kuattru mir (4.000) shuar yurumáwarmiayi. Yurumáwar amikiarmatai, Jesus nin áujas akupkarmiayi. ¹⁰ Tura ni unuiniamuríjjíajai kanunam enkemprar Tarmanúta nunkanam wearmiayi.

Pariséu Jesusan iniakmasta tiarmiania nu (Mateu 16.1-4; Rúkas 12.54-56)

¹¹ Pariséu Jesusjái áujmatsatai tusar tariarmiayi. Nekapsatai tusar wakeru- iniak Nin chicharuk “Nayaimpinmaya kakaram iniakmasta” tiarmiayi.

¹² Tuíniakui Jesus kúntuts enentáimias, súkaska mayati “¿Urukantai, yamaiya aentstiram, nayaimpinmaya kakarman iniakmasat tusarum wakerarum? Nuka penké sunaschattarme, paant tájarne” tímiayi.

¹³ Nuyá nin ikiukiar ataksha kanunam enkemar amain katiñmiayi.

Pariséu túramuríjjíajai aneartarum, tímiayi Jesus (Mateu 16.5-12)

¹⁴ Tura ni unuiniamurí yurumak jukitiai tukamá kajinmatkiarmiayi. Kanunmanka aya chikichik tantanak takaku ármiai. ¹⁵ Jesussha ni unuini- amurín enentáimikiuk tímiayi “Wáinkiatarum; Pariséusha Erutissha wakapru- tain takakainia nújajisha aneartarum” tímiayi.

¹⁶ Tutai ni unuiniamurísha tunaiyarmiayi “Tanta kajinmatkin asakrin nuna túramtsujíash” tiarmiayi.

¹⁷ Tura Jesus nuna nekáa chichaak “¿Urukantai aya yurumkak enentáimtarum? Tuke nékatsrumek. Penké enentáimtsurmek. Atumí enentái tuke kiritkiait? tímiayi. ¹⁸ Jimi aisha itiura wáintsurmea. Kuíshim aisha itiura ántatsrum. Ashí kajinmatkintrumek. ¹⁹ Nekaatarum, nuik, senku tantan púuran senku mir áishmankan ayurachmakaj. ¿Tura ampirma urutmá chañkinnium chumpiamarum?” tímiayi.

Niisha tiarmiayi “Tuse chañkinnium chumpiamji.”

²⁰ Ataksha Jesus tímiayi “Tura siati tantajái kuattru mir shuwaran ayuramtaí, ¿ampirmasha urutmá chañkinnium chumpiamarum?”

Niisha “siati” tiarmiayi.

²¹ Tuma asamtaí Jesus tímiayi “¿Itiura imiá nékatsrum?”

Jesus kusurun ímtiksamiania nu

²² Nuyá Petsaitia péprunam jeawarmiayi. Jeawarmatai, áishman jii kusurun Jesusan itiararmiayi. Túrawar antiñta tusar seawarmiayi. ²³ Tuma asamtai Jesus uwejn̄um achik péprunam aani en̄keki jukí j̄iin usukij̄ij̄iai kuérmiayi. Tura uwej̄ej̄iai antin̄ “¿íimmek?” tímiayi.

²⁴ Tutai kusuru ími tímiayi “Aentsun iij̄aj̄ai, túrasha paantcha. Numi wekainian áaniun iij̄aj̄ai” tímiayi.

²⁵ Nuyá ataksha Jesus ni uwej̄ej̄iai kusuru j̄iin antin̄miayi. Tura kusurusha úmamkes iis, péñker ajas, ashí paant ímpramiayi. ²⁶ Jesus chichaak “Jeemiin weakum péprunam wayawaip tura shuar ujakaip” tímiayi.

Pítiur Jesusan “Yusa Anaikiamurinme” tímiania nu
(Mateu 16.13-20; Rúkas 9.18-21)

²⁷ Jesus ni unuiniamurij̄ij̄iai uunt pepru Sesaria-jiripiunam jeatsuk, tíj̄j̄uch uchich péprunam irasarmiayi. Jintiá wésar Jesus ni unuiniamur̄in chicharainiak, “¿Yaiti turutainiawa Winia?” tímiayi.

²⁸ Tutai niisha áimkiarmiayi “Chíkich chichainiak, imiakratin Juan̄kaiti, turamainiawai. Chíkichcha, Eríasaiti, tura chíkichkia, yaunchu Yúsnan etserin nantakniua núiti, turamainiawai” tiarmiayi.

²⁹ Tutai Jesus tímiayi “Atumsha, ¿waritrume. Yáitiaj̄?” tímiayi.

Tutai Pítiur tímiayi “Ámeka Krístuitme; Yúsaiya akupkamuitme.”

³⁰ Tutai Jesus chichaak “Peñké etserkairap” tímiayi.

Jesus ni jákatniur̄in ujakmiania nu
(Mateu 16.21-28; Rúkas 9.22-27)

³¹ Unuiniak: “Wi Aents Ajasuitjiana ju ti wáitsatniuitjai. Israer-shuarti ii unun̄r̄isha, Patri únun̄r̄isha, ii jintinniur̄isha Winia nakitrurar mantuawartatui. Túrasha menaintiu tsawant nan̄kaasmatai nantaktiniaitjai” tímiayi.

³² Nunasha paant ujakmiayi.

Tura Pítrusha Jesusan arantach jukí kakantramiayi. “Tu chichasaip” tímiayi.

³³ Tutai Jesus ayantmatar, ni unuiniamur̄in iis, Pítrun kakantar chicharuk “Satanása, werumta. Ámeka Yusna ana nu enentáimtatsme, antsu aya áentsnak enentáimtame” tímiayi. ³⁴ Nuna tuasua amik tura nūj̄ matsamarmia nunasha, ni unuiniamur̄incha untsuk tímiayi, “Shuar Winia nekas nemartustasa wakerakka ni wakeramur̄inkia iniaisati; tura ni krusr̄j̄ yanak̄i nemartustí. ³⁵ Kame shuar jū nun̄kanam aya niñki anenmamkuñka nu shuar ni iwiaakmar̄in emen̄kaktatui. Antsu Winia anentu asa tura winia chichamprun anea asa, shuar aya péñker pujustinniak enentáimtsuna nu, nekas iwiaakman wáinkiat̄awai. ³⁶ Nekaata, shuar ashí jū nun̄kanam írunna nuna sumaksha túrasha ni wakan̄j̄ j̄inium wéakuisha, ¿itiurak péñker pujusaint?

³⁷ Shuarka wakan̄j̄in uwemtikrataj̄ tusa wakerak ¿urutmak akikmakaint?

³⁸ Antuktarum. Yamaiya aents Yús̄an nakit̄iar ajapawaru yajauch ainia nu íimiainiamunam shuar Winia natsantrakuñkia tura winia chichampruncha natsantakuñkia, wi, Aents Ajasuitjiana jū, winia Aparu kakarmar̄ij̄ij̄iai tura nayaimpinmaya péñker suntarj̄ai atak taakun, nú shuaran natsantrattaj̄ai Wis̄a.’ Tu tímiayi Jesus.

9

¹ Ataksha Jesus nin chicharuk, ‘Nekas tájarme, shuar játsuk Yus ni kakarmar̄ij̄ij̄iai aentsu enentáin akupkattana nú tsawantan wáinkiat̄atna nu jūj̄i iij̄ij̄iai pujuiniawai” tímiayi.

*Jesus nusháa iira ajasmiania nu
(Mateu 17.1-13; Rúkas 9.28-36)*

² Nuyá sais tsawant nankaasmatai, Jesus Pítruncha, Jakupuncha, Juánnasha uunt náinnium júkiarmiayi. Nuísha Jesus nushá iira ajasmiai. ³ Ni pushirísha ti puju jíitsumir ajattsarmiayi. Nujai métek puju awajsatin ju nunkanam atsawai. ⁴ Túruna nuí Erías, Muisaisjai wantinkiar Jesusjai chichainian wáinkiarmai. ⁵ Nuyasha Pítiur Jesusan chicharuk “Uuntá, ii jui pujustin ti péñkeraiti. Menaintiú áakmaktai, Áminiu chikichik, Muisaisna chikichik, Eríasnasha chikichik” tímiayi. ⁶ Jesusa unuiniamurí sapijmainiak, Pítiur wariniak titi nekaachmai. Nékachu asa nuna tímiayi.

⁷ Tura yurañkim tara mikintiu awajsamiayi. Yurañminmaya chichaak “Júiti winia aneamu Uchir. Nii anturkatarum” tímiayi.

⁸ Nuyanka ni unuiniamurí ayantmar iiyaj tukamar aya Jesusnak wáinkiarmai. Chíkichkia atsuarmiayi.

⁹ Nuyá náinniumia akainiak Jesus nin chicharuk “Wáinkiarumna nu et-serkairap. Wi, Aents Ajasuitjiana ju jakamunmaya nantaatsain nu et-serkairap” tímiayi.

¹⁰ Tutai ni tímian ímiatrusañ úukarmiayi. Tura “jakamunmaya nantaatsain tana nu, ¿wariniak ta?” nuamtak tunainiarmai. ¹¹ Tura Jesusan aniasarmiayi “¿Urukamtaí Israerti ii jintinniurísha, Erías emka tátiniaiti, tuinia?” tiarmiayi.

¹² Tutai Jesus tímiayi “Nekas Erías ashí iwiarattsa emka tátiniaiti. ¿Tura Aents Ajasunun Yus-Papinium warintiu?”

“Ti wáitsattawai; Nin nakitrartatui.” Tu áarmaiti.

¹³ Wi tájarme, Erías nekas táwiti. Támatai, shuar ashí ni wakeriarmia nuna nin túrawarmiayi. Yusa Papiriin Eríasa túrunatniurí aarma amia tímiatrusañ túrawarmiayi” tímiayi Jesus.

*Jesus iwianchin jiki akupkamiania nu
(Mateu 17.14-21; Rúkas 9.37-43)*

¹⁴ Tura ni unuiniamurí matsatmanum atak wáketuk, ti untsurí aents káutkar Israer-shuara jintinniurísha niijjai tunai pujuinian wáinkiamiayi.

¹⁵ Tura aencha, Jesusan wáinkiar wariniak, tsékeñki weriar, áujsarmiayi.

¹⁶ Túrunawarmatai, Jesus chicharainiak, “Warí tunaiyarum?” tímiayi.

¹⁷ Tutai chikichik ayak “Uuntá, winia uchirun Ámin itiarjame. Iwianchruku asa chichachuiti. ¹⁸ Túmakui íwianch enkemtañ paat ajiar áepeawai; túram uchisha saun kaput apak nain kátetete awajeawai. Túram kakaakcha ame unuiniamurmin seamjai, júirtukti tusan, túrasha tujintrutkarai” tímiayi.

¹⁹ Tutai Jesus tímiayi “Yúsan enentáimtichutirmea urutmá tsawantak pujustaj atumjai. Urutmá katsuntrataj! Uchi itiatarum” tímiayi. ²⁰ Takui uchin Jesusan itiararmiayi. Tura íwianch uchin enkemta Jesusan wáiniak uchin ajakramiai. Uchisha chichiatur nunká iniaan péper-péper ajakin wenunam saun apakmai.

²¹ Túrunamtaí Jesus ni aparín aniasmai “¿Urutá yaunchu áinkiait?”

Tutai ni aparí tímiayi “Úchichik áinkiaiti. ²² Tuma asa tuke jutikiú pujurniuiti; jiniumsha apeawai, entsá maataj tusa ajuawawai. Yaintrukminiaitkiumka waitneasam yaintrukta” tímiayi.

²³ Tutai Jesus chicharuk “¿Urukamtaí, yaintrukminiaitkiumka, tame? Nekaata, shuar Winia nekas enentáimturna nu ashí túramniaiti” tímiayi.

²⁴Tutai uchi aparí kakantar chichaak, “Uuntá, nekas enentáimtajme. Nekas enentáimtustinian táasjana nu yáintkiata” tímiayi.

²⁵Tura shuar untsurí káunainian Jesus wáiniak kakantuk “Empeku chichachu awajin iwianchi jíinkitia, tájame. Jíinkim ataksha wayawaipia” tímiayi. ²⁶Tura íwianch jíiniuk untsamak uchin we-werkasa ajakar chichichiptu áepkimiayi. Túram uchi jaka ímianis tepemiayi. Túrunamtai untsurí shuar “jakayi” tiarmiayi. ²⁷Támanak Jesus uwejeñ achik awajkimiayi, tura uchi nantaki wajakmiayi.

²⁸Tura Jesus jeá wayamtai, niñki pujusar, ni unuiniamurí aniasar “¿Urukamtai iisha jíiktin tujinkiamaj?” tiarmiayi.

²⁹Tutai Jesus tímiayi “Ju iwianchkia ijiarmar Yus áujkur jíikminiaiti” tímiayi.

Jesus ataksha ni jákatniurín ujakmiania nu

(Mateu 17.22-23; Rúkas 9.43-45)

³⁰Nuyá jíinkiar Kariréa nunkanmaani nankaamakarmiayi. Ni unuini-amurín unuinia asa nu nankaamamun nekaawarain tusa Jesus nakitmi-ayi. ³¹Unuiniak juna tímiayi: “Wi Aents Ajasuitiaj juna mantamnati tusar achirkar surutkartatui. Tura máamuitiatnak, iwiarsamunmayan menaintiú tsawantaj nantaktiatjai” tímiayi. ³²Tura nu chichaman nekaacharmiayi. Nékainiachiat, anintrustinian arantukarmiayi.

“¿Yaki imiá nankaamantuit?”

(Mateu 18.1-5; Rúkas 9.46-48)

³³Nuyá Kapernáum péprunam jeawarmiayi. Tura Jesus jeá pujus ni unuiniamurín aniniak, “¿Atumsha jintiá winisrum warí áujmatmiarum?” tímiayi. ³⁴Tura natsarar pachischarmiaiyi. Kame jintiá wésar “iijjai ¿yaki imiá nankaamantu ajasat?” tunainiarmiayi. ³⁵Ni unuiniamurí pachis-charmatai, Jesus pujus ashí tuse unuiniamurín irur chichaak “Shuar nekas nankaamantu ajastajtsa wakerakka, peejchachia nuke enentáimtumar shuara yáintrí atí” tímiayi. ³⁶Tura uchin itiáa miniakas chichaak: ³⁷“Shuar uchin winia naaruj shiir awajeakka Winia shiir awajtawai. Tura Winia akuptukua nunasha shiir awajeawai” tímiayi.

“Shuar in nakitramachkuñka in páchitkiawai”

(Rúkas 9.49-50; Mateu 10.42)

³⁸Nuyá Juan Jesusan chicharuk “Uuntá, shuar ame náarmin pachis iwianchin akupea wainkiamji. Tura iijjai írutkachu asamtai nu túratin suritki-amji” tímiayi.

³⁹Tutai Jesus tímiayi “Antsu suritkiairap. Shuar winia náarun pachis tujinkiamun túrakka, nu shuar warí tsanumprutratniun tujinkiattawai. ⁴⁰Shuar in nakitramachkuñka, in páchitkiawai, tímiayi. ⁴¹Winia nemarka asakrumin shuar yumiichinkesha ajampramkuka ántar túratsui; akikma átatui’ tímiayi.

(Mateu 18.6-9; Rúkas 17.1-2)

⁴²Tura shuar ju uchin Winia umirtuinia nuna yajauchin túrumtikiamtáinkia, ti asutniattawai. Tuma asamtai uchin yajauchin túrumtiktsain kuntujeñ kayajai jinkiar nayaantsanam ajunmaka maak ainti. ⁴³Ame uwejmek yajauchin túrumtikramamniaitkuñkia tsupikta. Mai uwejtuk wáitsatniunam jeatniujainkia chikichík uwejjai ju nunkanam pujusar tuke iwiaaku pujustinnium jeatin ti shiiraiti. Warí, wáitsatniunmanka ji kajinkiashtin awai, ⁴⁴jákaru akarisha jáiniatsui tura jisha tuke kapaawai. ⁴⁵Nawemsha yajauchin túrumtikramamniaitkuñkia nusha tsupikta. Mai

nawentuk wáitsatniunam jeatniujainkia chikichík nawejai ju nunkanam pujasar tuke iwiaaku pujustinnium jeatin ti shiiraiti. Wáitsatniunmanka ji kajinkiashtin awai, ⁴⁶ jákaru akarisha jáiniatsui tura jisha tuke kapaawai. ⁴⁷ Jimisha yajauchin túrumtikramamniaitkuinkia ukuinkiaata. Mai jiiintiuk wáitsatniunam jeatniujainkia chikichík jijjiai ju nunkanam pujasar Yus akupeana nu jeatin ti shiiraiti; ⁴⁸ wáitsatniunmanka jákaru akarisha jáiniatsui tura jisha tuke kapaawai.

⁴⁹ Namañ Yus susamu weaktinia áintsan aentstirmesha jijjiai nekapnastatrume. ⁵⁰ Weesha ti penkeraitiat michumarka, ¿itiurak jea-jeat átinkí? Wats, wee jeakua áintsarmek atumek shiir enentáimtunaistarum” tímiayi Jesus.

10

Nuwá ajapatniun Jesus áujmatsamiania nu (Mateu 19.1-12; Rúkas 16.18)

¹ Jesus Kapernáumnumia jiinki, Jutía nunkanam nankaamaki, Jurtan entsa amain jeamiayi. Nuí pujai, aents ataksha Nin irunturarmiayi. Iruntrar-matai tuke túrin asa ataksha unuiniamiayi. ² Tura Pariséu Jesusan nekap-satai tusar wakeruiniak, Nin chicharainiak “¿Áishman ni nuarí ajapatin tsankamkamukait?” tiarmiayi.

³ Tutai Jesus tímiayi “¿Muisais wariniak timia?”

⁴ Tutai “Papíjjiai in ajapatniun tsankatramkamiaji” tiarmiayi.

⁵ Tutai Jesus tímiayi “Atumí enentai kátsuram asamtai nu chichaman atumin tsankatramkamiarme. ⁶ Tura Yus yámankamtaik ashí najanamia nuí, áishmanasha nuwancha najanamiayi. ⁷ Tuma asamtai áishman ni aparíncha nukuríncha kanaki ikiuki, ni nuaríjjai tsaniñtiniaiti. ⁸ Warí, áishman nuaríjjiai jímiairaitiat chikichik ajasartatui. Tuma asamtai yamá jímiairchaiti, antsu chikichik ajasuiti. ⁹ Tuma asa, Yus atsanñkiania nuna, aents akankashtiniaiti” tímiayi.

¹⁰ Tura urum jeá wayawar, Jesusa unuiniamurí nu chichaman ataksha aniasarmiayi. ¹¹ Tuiniakui Jesus tímiayi “Shuar ni nuarín ajapa ikiuak chikichan nuátkanka, emka nuarín yajauch awajas, ikiuak, tsanirmayi. ¹² Nuwasha ni áishri ajapa ikiuak, chikichjai niiniurtukka, niisha tsanirmayi” tímiayi.

Jesus uchin shiir awajsamiania nu (Mateu 19.13-15; Rúkas 18.15-17)

¹³ Antñkiarat tusar uchin Jesusan itiararmiayi. Túruiniakui Jesusa unuini-amurí “ítiairap” tiarmiayi.

¹⁴ Tura Jesus nuna wáiniak, kajak juna tímiayi “Uchi Winí winitin tsankatruktarum. Suritkiairap. Iis, shuar ju uchía núnisan peejchach enentáimtumainia nu Yusa akupeamurín pachiinkiamniaiti. ¹⁵ Nuní asamtai tájarne, uchi umiana núnisan Yusa akupkamurín shuar umíachkunka nuna pachiinkiachminiaiti. ¹⁶ Nuyá uchin miniakas, “Yus yáinmakarti” tímiayi.

Kuítrintin Jesusan áujsamiania nu (Mateu 19.16-30; Rúkas 18.18-30)

¹⁷ Ukunam, Jesus nuyá weai, shuar tseke Nin tarimiayi. Tarí tikishmatar chicharuk “¿Uuntá, Amesha ti penkeraitme. Tuma asam, turuttia, ¿warinia túrakna tuke iwiaaku átataj?” tímiayi.

¹⁸ Tutai Jesus tímiayi, “¿Urukamtai Winia, penkeraitme, túrutam? Shuarka chikichkisha penkerka atsawai. Aya Yúsak penkeraiti. ¹⁹ Yus akupkamu nékatsmek. Ju áiniawai: tsanirmawairap, mankartuawairap, kasamkairap,

chíkich shuar tsanumprurairap, anan̄kartuawairap, apasha nukusha umirkatarum. Nu áiniawai” tímiayi.

²⁰ Tutai kuítrintin chichaak “Uunta, núnaka úchichik mash umiki tsakaruit-jai” tímiayi.

²¹ Tutai Jesus iis waitnenmai tímiayi “Chikichik táasume. Weme ashí áminiu ana nu surukta. Túram nu kuit kuítrincha susarta. Túrakum nayaimpiniam kuítrum ikiaun̄kattme. Túram winitia, krus yanaktinia áintsamek itiurcha-trum aṅ̄ nemartusta” tímiayi.

²² Tura kuítrintin nu chichaman antuk, wake mesek, kúntuts enentáimiar wémiayi, ti kuitrintin asa.

²³ Nii wématai, Jesus ashí ni téntakmarin iis, ni unuiniamurin chicharuk, “Kuítrintin ainia nu Yusa akupeamurin pachiinkiatin ti itiurchaiti” tímiayi.

²⁴ Takui ni unuiniamurij nuna antukar niisháa enentáimprarmiyai. Túramtai Jesus tímiayi “Uchiru antuktarum. Shuar kuítriniak enentáimtuinia nuka, Yusa akupeamurin pachiinkiatin pen̄ké itiurchataiti. ²⁵ Uunt kamiriu auja jṅ̄in wayatin ana nú nan̄kaamas, kuítrintin Yusa akupeamurin pachiinkiatin itiurchataiti” tímiayi.

²⁶ Nuna antukar nú arant niisháa enentáimprarmiyai. “¿Nuin̄kia yaki uwem-pramniait?” tunaiyarmiyai.

²⁷ Tura Jesus nin iisar chichainiak “Aents nin̄ki túrachminiaiti, antsu Yus túramniaiti. Yuska ashí túramniaiti” tímiayi.

²⁸ Nuyá Pítiur Nin chicharuk “Iis, iikia ashí ikiukir némartujuk” tímiayi.

²⁹ Tutai Jesussha tímiayi, “Nekas tájarme, shuar Winia nemartak Yus-Chichamnasha ipiampartasa wakerak ni jeencha, yachincha, umaincha, aparincha, nukurincha, nuarincha, uchirincha, nunkencha uyumatsuk ikiuakka, ³⁰ nu shuar ju nunkanam sian̄ patatnas jeencha, yachincha, umaincha, nukurincha, uchirincha, nunkencha, ju nunkanam wáitaiyat sunastatui. Tura ukunam, nunka amuukamtai, nu shuarsha jáchatainiam tuke pen̄ker pujustatui. ³¹ Tura untsurij shuar yamá pen̄keri ainia nu, ukunam ukunmaan̄j pujusartatui, tura íksan̄ untsurij shuar yamá ukunmayá ainia nu, ukunam eem pujusartatui” tímiayi Jesus.

*Jesus ni jákatniurj ataksha ujakmiania nu
(Mateu 20.17-19; Rúkas 18.31-34)*

³² Nuyá arak Jerusarénn̄num wéenak, jintiak wearmiyai. Jesuska émak wémiayi. Ni unuiniamurisha niisháa enentáimprarmiyai. Ashamainiayatan̄ Jesusan nemarsarmiyai. Túmainiaj atak ni nekas unuiniamurin akankiar, ni túrunatniurin ujakmiayi. ³³ Ujaak tímiayi “Antuktarum, arak Jerusarénn̄num wéaji. Nuṅ̄ Winia, Aents Ajasuitjiana juna, Patri uuntriincha, jintinniun-masha surutkartatui. Niisha apachnium mantamnati tusar surutkartatui. ³⁴ Nusha Winia wishikrurar, katsumprukar, usukruawar mantuawartatui. Túramaitatnak menaintiú tsawantaj nantaktiatjai” tímiayi.

*Jakupu Juanjai seawarmiania nu
(Mateu 20.20-28)*

³⁵ Sepetéu uchirij Jakupusha Juansha Jesusan taruntarmiyai. Taruntar “Uuntá, ii seattajnia nu túrak tusar wakeraji” tiarmiyai.

³⁶ Tutai Jesus tímiayi “¿Warí itiurtukat tusam wakerutam?”

³⁷ Tutai “Ame nupetmaktin tsawantrum jeamtai, iisha Ámijiaj pujustaitsar wakeraji, wi untsuurumini, winia yatsursha menaarmini. Nu tsan̄katrukta” tíarmiyai.

³⁸ Tura Jesus tímiayi “Átum seatrumna nu nékatsrume. Wi umartatjana nu umarminkaitrum. Tura Wi imiantiatjana núnisrum imianminkaitrum” tímiayi.

³⁹ Niisha tiarmiayi, “Túramniaitji, páchitskea.”

Tuñiakui Jesus tímiayi “Wats, Wi umartatjana nu umartatrume, tura Wi imiantiatjana núnisrumek imiantiatrume. ⁴⁰ Túrasha winia untsuuruini, menaruinisha átum pujustinian Wikia súsashtiniaitjarne, antsu Yus wakerana nu nuin apujsattawai” tímiayi.

⁴¹ Tura chíkich tias unuiniamuri nuna anturkar Jakupuncha, Juánnasha ti kajerarmiayi. ⁴² Tura Jesus ni unuiniamuri irur tímiayi “Ju nékarme; Yus-shuarchanum akupniuitjai tuinia nu, waantu enentáimtumas, ni shuarin ti akupeawai; tura uunt ainia nusha ashí shuar ti takamtikiainiawai.

⁴³ Antsu atumjai núnisan atsutniuiti. Átumka, wi unuiniamutiram, uunt ajastaj tusarum wakerakrumka, ashí yáimin ajastiniaitrum. ⁴⁴ Shuar atumi penkeri ajastajtsa wakerakka, takarniua nuke ajas, umirtamkatí. ⁴⁵ Wisha, Aents Ajasuitjiana ju, shuar takartusarat tusan táchamjai, antsu ashí shuaran yáintaj tusan táwitjai. Wisha jarukan shuaran uwentikratajtsan táwitjai” tímiayi.

*Jesus Partimiásan tsuármiania nu
(Mateu 20.29-34; Rúkas 18.35-43)*

⁴⁶ Jesus ni unuiniamurijjai, tura chíkich untsurí aentsjai Jirikiú péprunam jeawarmiayi. Nuyá Jirikiúnmayasha jíinkiar weenai, Timiasa uchirí Partimiás, kusuru amia nu, jintiá yantam kuítian seamu pujumiayi. ⁴⁷ Niisha, Nasarénumiá Jesusaiti táman antuk, untsukum “Uunt Jesusa, amesha Uunt Akupin Tawit weeachukaitiam, Yus anaikiachmakaitiam. Winiaja waitnen-trurta” tímiayi.

⁴⁸ Tura untsurí nui matsamarmia nu nin chicharainiak “Takamatsata” tiarmiayi.

Niisha nú nankaamas untsummiayi “Tawit weeá Jesusá, winia waitnen-trurta.”

⁴⁹ Nuna antuk Jesus wajatas, chichaak “Untsuktarum” tímiayi.

Takui shuar kusurun untsuuniak “Kakaram ajasta. Wajaktia; untsur-mawai” tiarmiayi.

⁵⁰ Tuiniakui niisha esekmatairin ajapa ikiuak wajaki Jesusan tseke tarim-iaiyi.

⁵¹ Tura Jesus nin chicharuk “¿Winia itiurtukat tusamea wakerutam?” tímiayi.

Tutai kusuru chicharuk “Uunta, ímtiasan wakerajai” tímiayi.

⁵² Tutai Jesus chichaak “Shiir wetá. Winia nekas enentáimtursa asam penker ajasume” tímiayi. Tura nu chichamaik ímpramiayi. Tura Jesusan nemarki wémiayi.

11

*Jesus Jerusarénum wayamiania nu
(Mateu 21.1-11; Rúkas 19.28-40; Juan 12.12-19)*

¹ Wésar Jerusarénum tura Petpajái péprusha Petania péprusha Uriwiu naint inkiuasmak ámanum jeawar, Jesus jimiará unuiniamuri ujuikimiai. ² Ujuiak tímiayi “Aatunini pépruchiniam werum nuin umpuuru uchich jinkiamu wáinkiatarme. Nu umpuuruka tuke entsamprukchamuiti. Nu atiarum utitiarum. ³ Tura “¿Urukamtia áitkiarum?” turamainiakuisha, “ii Uuntri wakerawai” titiarum” tímiayi. ⁴ Tutai wearmiayi. Tura umpuurun

wáitiniam aani jin̄kiamun, jintiá yantamnum wajan wáinkiar atiawarmi-
ayi. ⁵ Nuj̄ pujuarmia nu “¿Warí áitkiarum. Urukamtai umpuuru atíarum?”
tiarmiayi. ⁶ Takui, niisha Jesus timia nu ujakam suritkiacharmiayi. ⁷ Tura
umpuurun Jesusan itiariar pushir̄in umpuurunam awantkarmiayi. Túram
Jesus entsamkamiayi. ⁸ Tura untsur̄i shuarsha pushir̄in jintianam aya-
par áinkarmiayi. Chíkichcha jintiá yantamnumiān nukan juuk jintianam
áintrarmiayi. ⁹ Eem wearmia nusha, uku winiarmia nusha warainiak “Ju-
sanna” untsamkarmiayi. “Yusa náar̄in winiana nu imiá pen̄keraiti. ¹⁰ Ii
uuntri Tawitia akupeamur̄i tátatna nu imiá pen̄ker atí. Ii Yusr̄i naar̄i shiir
ati.” Tu untsunki wearmiayi. ¹¹ Tura Jesus Jerusarén̄num jeamiayi. Jeá,
Yusa Uunt Jeen wayamiayi. Tura ashí iiyasua amik, kintiampraj̄ tusa ni tuse
unuiniamur̄ij̄ai tíjiuch Petania péprunam wearmiayi.

Jesus iikiu numin yum̄inkramiania nu
(Mateu 21.18-19)

¹² Kashin tsawar, Petanianmaya jintia wesa, Jesus tsukammiayi. ¹³ Tura
arant wajan iikiu numir̄in núkenniun wáiniak, nereatsuash tusa iyumiayi.
Tura nereshtair̄in asamtai neren pen̄ké wáinkiachmiayi. ¹⁴ Nuyá iikiu numin
yum̄inkeak: “Ame nerem pen̄ké yunaashti” tímiayi. Ni unuiniamur̄isha nuna
táman antukarmiayi.

Yusa Uunt Jeen suruktinian Jesus suritkiamiania nu
(Mateu 21.12-17; Rúkas 19.45-48; Juan̄ 2.13-22)

¹⁵ Nuyá atak Jerusarén̄num jeawarmiayi. Nuj̄ Jesus Yusa Uunt Jeen wayá
suruktai tusar pujuarmia nuna j̄iki akupkatasa nan̄kammiayi. Kuítian
yapaj̄in armia nuna misar̄in tura yampitsan súrin armia nuna kutan̄kr̄incha
ayanturmiayi. ¹⁶ Tura káarak entsaki Yusa Uunt Jeen nan̄kaamaktinian
suritkiarmiayi. ¹⁷ Nuyá “Yus áuj̄satai tusar ashí shuar Yusa jeen wayamnia
átatui” tú aarchamukait Yusa Papir̄in. Antsu átumka Yusa j̄eē kasa matsam-
taiya nútikiarme” tímiayi. ¹⁸ Aents nuj̄ matsamarmia nu Jesusa chichamen
antukar ti enentáimprarmiayi. Tuma asamtai Israer-patr̄i úntr̄isha, Israer-
shuara jintinniur̄isha, nuna nekaawar, Jesusan ashamainiak mantamnati
tusar chichaman jurusarmiayi. ¹⁹ Nuyá kiakui Jesus Jerusarén̄numiā j̄i-
inkimiayi.

Iikiu numin káarun wáinkiamiania nu
(Mateu 21.20-22)

²⁰ Kashin káshik nan̄kaamainiak iikiu numin kan̄kaptuk jaka wajan
wáinkarmiayi. ²¹ Tura Pítur enentáimias Jesusan tímiayi “Uunta, iista, iikiu
Ame yum̄inkramam nu kan̄kaptuk káarchaik.”

²² Tutai Jesus tímiayi “Yus nekas enentáimtustarum. ²³ Iis, nekas tátsujrume-
shuar “Yus nekas túratpiash” tútsuk, tura “wi tájana nuna Yus nekas
túrattawai” tu enentáimsar, j̄u náintian “j̄iinki nayaantsanam iniántí” tákuinkia,
páchitsuk iniantatui, tímiayi. ²⁴ Tuma asamtai tájarme, ashí Yus áuj̄kuram
searmena nuna suramsattarme. “Wi seajna nuna yamá takakjai” tu
enentáimkiurmeka, wáinkíáttarme. ²⁵ Tura Yus áuj̄kuram pujarmena nu, ka-
jernaiyamuram ákuinkia tsan̄kurnáiratarum. Atumí Apar̄i nayaimpiniam
pujana nu atumí tunaar̄in tsan̄kurturti tusarum túratarum. ²⁶ Atumsha
tsan̄kurnáiyachkurminkia, núnisan̄ atumí Apar̄i nayaimpiniam pujana nu
atumí tunaar̄in tsan̄kurtámprashtatrume” tímiayi Jesus.

Yusa kakarmarij̄ai Jesus takasmiania nu
(Mateu 21.23-27; Rúkas 20.1-8)

²⁷ Ataksha Jerusarénum waketkiarmiayi. Jesus Yusa Uunt Jeeñ wekaj, Israer-patri úuntrisha, Israer-shuara jintinniurisha, Israer-shuara iruntai-jeñ úuntrisha Nin káutkarmiayi. ²⁸ Káutkar Jesusan tiarmiayi “¿Yana kakarmarijiaj ju túram. Ame túramna nuna ya tsankatrama?” tiarmiayi.

²⁹ Tuiniakui Jesus tímiayi, “Chikichkiniak aniastatjarme. Áirkatarum. Túrakrumniñkia Wisha winia takastinian tsankatrukma nuna ujaktatjarme. ³⁰ Wats, turutiarum, ¿ya Juan imiaitniun tsankatkama? ¿Shuar tsankatkamka? ¿Yus tsankatkamka? Áirkatarum” tímiayi.

³¹ Tura niisha enentáimprar “Yus akupkaiti” tákurninkia, “¿urukamtia umirkachuram?” turamchattajik. ³² Antsu “shuar tsankatkaiti” tákurkia, ashí shuar ashamaji” tunainiarmiayi. Ashí aents Juan nekas Yúsna etserniuiti, tu enentáimainiakui ashammiarmiayi. ³³ Nuyá Jesusan tiarmiayi “Iikia nékatsji.”

Tutai Jesus tímiayi “Wisha núnisnak yana kakarmarijiaj takaaj nuna ujakchattajrume.”

12

Yajauch takau armia nu

(Mateu 21.33-46; Rúkas 20.9-19)

¹ Jesus ju métek-taku chichaman unuiniarmiayi: “Shuar uwa ajan ajan wenuimiai. Nuyá uwa nekeetain najanamai. Tura kumpin jeñ najanamai. Najana takartusti tusa shuáran ikiuak niñkia jeachat wémai.

² Neretai tsawant jeamtai, ni takarniurin júukman akankat tusa akupkamai. ³ Tura ajanam takau arma nu, nu takarniun achik, katsumkar, áyatik awainkiarmai. ⁴ Ataksha chikich takarniun akupkamai, tura nunasha kayajai tukurar, múuknum katsumkar, katsekar awainkiarmai. ⁵ Tuma aiñ ataksha chikichan akupkamai, tura nunasha máawarmai. Ti untsurin akupramai. Chikichnasha katsumkarmai, chikichan máawarmai.

⁶ Tura niijiaj chikichik tuke ámiayi, nuka ni aneamu uchiri. Nu uchinha ukunam akupkamai. Akupeak “Winia uchirnaka shiir awajsartatui” tímiayi.

⁷ Tura ni uchiri winian wáinkiar, takau shuar nuámtak chichainiak “Juka ajá nérenniu uchirinti. Wátsek, maatai; túramka ajaka iiniu átatui” tiarmai. ⁸ Túsar achikiar máawarmai. Ayashincha ajanmaya ajapawarmai” tímiayi.

⁹ Tura nuyá aniasmiayi, “¿Wats, warí enentáimsarum; ajá nérenniuri ititurkat-tawa? Jeashtanmayá taa, ajá takainia nú shuaran amuktatui. Ni ajarincha chikichan ikiastatui. ¹⁰ Ju, Yus-Papinium aarma ana nu áujtsachukaitrum:

Kaya péñkernak, jeammin “yajauchiiti” tusar ajapawarmia nu ashí kayajai nankaamas péñker apujsamuiti. ¹¹ Nusha Yus túramuiti. Iisha ísar ti enentáimtaji.

Nuke áarmaiti” tímiayi.

¹² Tura nú metek-taku chichamjai nin áujmatma asa achiktai tusar chichaman jurusarmiayi. Túmainiyat shuáran ashamainiak Jesusan ikiiniak wearmiayi.

Uunt akupin súsatin tura Yus súsatin

(Mateu 22.15-22; Rúkas 20.20-26)

¹³ Tura wear, imiaamtikiar yajá chichakmatai nújai yajauch títai tusar Paríséu shuarnasha, Erutisa nemarkar shuarnasha akatar Jesusan akup-tukarmiayi. ¹⁴ Túram Nin jeariar chicharainiak: “Uuntá, aents nakitiainiañ tuke nekas chicham páchitsuk chichaame, nu nékaji. Aents pátatek iiyatsme, antsu nekas Yusa jinti unuiniame. ¿Waritia enentáimiam, ii kuitri uunt Sesar

súsatin pé_nkerkait. Susattajik. Suritkiattajik? Nu nekaatai tusar wakeraji” tiarmiayi.

¹⁵ Tura Jesus ni yajauch enentáimmiar_n nekara “¿Urukantai Winia yajauch titi tusarum wakerutarum? Kuit itiatarum, Wi ístaj” tímiayi.

¹⁶ Tutai kuítian itiararmiayi.

Jesus nuna iis tímiayi, “¿Juísha yana yap_i tura yana naar_i áarmait?” tímiayi.

Tutai “Uunt Sésarna” tiarmiayi.

¹⁷ Nuyá Jesus tímiayi “Uunt Sésarna ana nu susatarum; túrarum Yúsna Yús susatarum” tímiayi. Tura ni áimkiamur_n antukar ti enentáimprarmiayi.

*Aents nantaktinian Satuséu anintrusarmiania nu
(Mateu 22.23-33; Rúkas 20.27-40)*

¹⁸ Nuísha Satuséu aents, jakamunmaya nantaktin penké atsawai tiniu armia nu, Jesusan tariarmiayi. Taar Jesusan chicharainiak: ¹⁹ “Uuntá, Muisais juna áatrampramijai:

“Áishman ni nuar_i júreatsa_n jakamta_nkia, yachin yajutmatratsa, ni yach_i nu wajen nuátkatniuiti.”

²⁰ Wats, siati yach_i ármiayi. Iwair_i nuwan nuatak yajutmatsuk jakamiayi.

²¹ Ni yach_i wajen akinkiamiayi. Nusha núnisa_n yajutmatsuk jakamiayi. Nuna yach_isha núnisa_n tura nuna yach_isha núnisa_n túramiayi. ²² Tura ashí siati patainman, patainman nu nuwan nuátkarmiayi. Yajutmatsuk, yajutmatsuk jíniawarmiayi. Tura ukunam nuwasha jakamiayi. ²³ Nu_nkia nantaktin tsawantai, nantakiarmatai, ¿yana nuar_n ati? Ashí siati nuátkacharmaka” tiarmiayi.

²⁴ Tutai Jesus tímiayi ““Jakamunmaya nantaktin atsawai” táturmek. Yusa chichame tura Yusa kakarmar_i nékachu asarum awajiar_me, tímiayi.

²⁵ Iimiatarum, aents jakamunmaya nantakiarmatai, nuatnaikiatin atsuttawai, antsu nayaimpinmaya suntara núnisara_n pujusartatui. ²⁶ Tura jakamunmaya nantaktiniapitia tusarum nu nekaatin nekas wakerakrumka Muisais aarmia nu enentáimtustarum. Yuska numichinmaya Muisaisan chicharuk “Wikia Apráama Isaaka tura Jakupu Yúsrintjai” Yus tímiayi. ²⁷ Yaunchu jákaru a_n, Yus nuna taku, ayashnium jakayat iwiaaku pujuinia nuna Yusr_ntjai, tawai. Nekas jaka ainia nuna Yusr_nchuiti. Nantaktin atsawai tau asarum awajirurme” tímiayi Jesus.

*Yus akupkamu imiá pé_nker ainia nu
(Mateu 22.34-40)*

²⁸ Jesussha Satuséusha áujmatnainian Israer-shuara jintinniur_i taa an-turkamiayi. Anturak, Jesus ti penker áimkiui, niisha Jesusan juna aniasmiayi: “¿Yus akupkamu tuá imiá pé_nkerait?’ tímiayi.

²⁹ Tutai Jesus tímiayi “Júiti Yus akupkamu imiá pé_nker: Antukta Israer shuará. Ii Yusr_i úuntaiti, tura Ni_nki nekas Yúsaiti. ³⁰ Tuma asamtai, tuke enentáimjai ti enentáimsam Uunt Yus aneeta. Túram ame iwiaakmarmesha, kakarmarmesha Yus íktusta. Núiti nekas pé_nker akupkamu, tímiayi. ³¹ Nuyasha chikichcha awai, “ame ayashim aneamna tímiatrusmek ame írutramurmesha aneeta.” Chíkich nu nan_kaamas pé_nker akupkamu atsawai’ tímiayi.

³² Tutai jintintin tímiayi “Ee, pé_nkeraiti, Uunta. Nékas_mek tame. Chikichík Yus awai, chíkichkia atsawai. ³³ Tura tuke enentáijjai ti enentáimsar, ii kakarmar_isha Yus íktusar Nin aneakrikia, ii ayash_i aneajnia núnik ii írutramur_isha aneatniuitji. Nusha ashí Yus sutai ana nujai nan_kaamas pé_nkeraiti’ tímiayi.

³⁴Nuna tiniu asamtai Jesus ni pé_nker áimkian nekáa “Ameja Yus akupeamu-nam pachiinkiatin ishichik táasume” tímiayi. Tura nuyá chíkich shuar Jesusan aniastinian arantukarmiayi.

Kristu tutai ¿yana uchirimpait?

(Mateu 22.41-46; Rúkas 20.41-44)

³⁵Jesus Yusa Uunt Jeen unuiniak pujumiayi. Tura chichaak “¿Urukamtai ii jintinniurí “Yus anaikiamu Krístun Tawitia shuarí” tuinia?” ³⁶Tawit, antsu, Yusa Wakaní aarta tutai, Yus-Papinium juna áarmiayi:

Uunt winia Úuntru_n tímiayi “Ame nemasrumin nupetkatin amuatsain_n winia untsuuruinini_n pujusta”.

³⁷Kame Tawitkia, Krístun áujmatuk, “winia Uuntru” taisha, ¿itiura ní shuarisha átink’?” tímiayi Jesus. Tuma asamtai untsurí shuar nu_j matsamarmia nu ti shiir antukarmiayi.

“Israer-shuaran jintintin ainia nújai aneartarum” Jesus tímiania nu

(Mateu 23.1-36; Rúkas 11.37-54; 20.45-47)

³⁸Jesus unuiniak tímiayi, “Israer-shuara jintinniurí ainia nújai aneartarum. Niisha waantu enentáimtumasar, esaram pushin entsasar wekasatjtsar wakeruiniawai. Péprunmasha shuar shiir áujtusarat tusa wakeruiniawai. ³⁹Israer-shuar iruntainiam penkerí pujutainium pujustinian wakeruiniawai. Nampernumsha penkerí pujutainium pujustinniasha wakeruiniawai. ⁴⁰Tura wajé jeencha atantainiawai. Túrawar aents nekaracharat tusar ti esaram chichamjai_n Yúsan áujainiawai. Nincha chikichjai_n nankaamas Yus asutiawartatui” tímiayi.

Waje kuítrin susamiania nu

(Rúkas 21.1-4)

⁴¹Jesus Yusa Uunt Jeen kuit enketainiam naka pujus áents kuítrin chumpian wáinkiamiayi. Untsurí kúitrintin núkap enkeawarmiayi. ⁴²Nuyá waje kuítrinchá taa jimiará uchich kuítian, reara áantsan, enkeamiayi. ⁴³Jesuska unuiniamurín untsuk “Nekas tájarme, ju waje kuítrinchaitiat, ashí enkeena nú nankaamas núkap enkeayi. ⁴⁴Iis, kuítrinniusha nii ampirma nuna enkeenawai, tura antsu ju nuwa kuítrinchaitiat, ampirmatsuk ni yurumatniurín takurmakman ashí enkeayi” tímiayi.

13

Yusa Uunt Jeen yumpuntratniun Jesus ujakmiania nu

(Mateu 24.1-2; Rúkas 21.5-6)

¹Yusa Uunt Jeeniá Jesus jiinkimtai, unuiniamurí Nin tímiayi “Iisia, Uunta, kayasha ti shiir áiniawai. Jeasha imiá úuntchakait.”

²Tutai Jesus tímiayi “Ju imiá uunt jea wáinmek. Kaya ekentramu au ashí mash yumpuntrartatui” tímiayi.

Amuukatin tsawantin uruku átatna nu

(Mateu 24.3-28; Rúkas 21.7-24; 17.22-24)

³Nuyá Uriwiu náinnium wakar, Yusa Uunt Jee naka pujusar, Pítrusha, Jakupusha, Juansha, Antressha, ní_nkimias Jesusan aniiniak ⁴“Uuntá, tímiam nu, ¿urutíá túrunatta. Nu túrunatin jeakuisha itiura nekaattajia? Paant ujatmakta” tiarmiayi.

⁵Tutai Jesus tímiayi “Aneartarum, ana_nkramawairap. ⁶Nekaatarum, untsurí winia naarun pachisar winiartatui. Chíkich chíkich “Wiitjai Kristu” taku, untsurín ana_nkawartatui. ⁷Tura meset chicham ántakrumka, yajaya meset chicham ántakrumsha sapijmiakairap. Nekas túrunashtinkiait. Nujajisha

amuukatin tsawantka tuke jeatsui, tímiayi. ⁸ Shuar chíkich shuarjaj mesetan najanawartatui; apachcha chíkich apachjaj núnisan mesetan najanawartatui. Untsurí nunkanam úrkattawai. Tsukasha ártatui, charaatum ajamusha núnisan átatui. Tura nujaj itiurchatka aya yama nankamui.'

⁹ 'Túmaitkui atumsha aneartarum. Akupin iruntainiumsha surutmakartatume, tura íi shuar iruntainmasha katsumpramkartatume. Wíi shuar asakrumin, kapitíánnium, akupniunmasha juramkittiarume. Nuj jearum, Winia chichastatume. ¹⁰ Nu túruntsain ashí áentsnum Yus-Chicham etsernak-tiniaiti. ¹¹ Atumin surutmaktasar juramainiakusha, warintiajak tusarum ti enentáimsairap. Chichastin jeamtai, Yusa Wakaní jintintramattarmena nu titiarum. Iis, atumí enentájijaj tíchattarume, antsu Yusa Wakaní jintintiam títiatume. ¹² Nu tsawantin shuarsha ni yachin mantamnati tusa suruktatui. Apasha ni uchirín suruktatui. Uchisha aparíncha nukuríncha kajerak, jakati tusa suruktatui. Núnisan untsurí shuar túrawartatui. ¹³ Nuinkia Wíi shuar asakrumin ashí nakitramprartatui. Tura shuar yawetsuk katsuntrañka uwemprattawai" tímiayi.

¹⁴ Nuyá Jesus tímiayi "Shuar juna áujeana nu nekaati. Yúsnan etserin, ni naari Taniar, ti yajauch tuke emesin ana nuna yaunchu aar etserkamiayi. Nuka pujushtainiam pujan wáinkurmesha, ashí Jutía nunkanam pujarmena nu, náinnium pisartarum. ¹⁵ Jeá yakiini pujana nu akaiki wariri achiktajtsa, jeen wayashti. ¹⁶ Ajanam pujana nusha ni pushirín jukitiajtsa waketskisti. ¹⁷ Tura ajantin áiniana nusha, kuírchin umuntsainia nusha, nu tsawantin timiá itiurchatan wáinkartatui. ¹⁸ Tuma asamtai átum pisaarmena nu yimitin ahati tusarum Yus seatarum. ¹⁹ Nu tsawantinkia ti wáitsatin átatui. Yama nankamtaik Yus nunkan najanama nuisha, yamaisha ukunmasha timiu wáitsatin penké atsuttawai. ²⁰ Tura Uunt Yus wáitsatin tsawantan ishichik awajsattajaj tíchaitkuinkia, uwempratin penké atsuinti. Tura ni shuarin anaikiamia nuna yáintajtsa wakerak, nu tsawantan ishichik awajsattawai. ²¹ Nu tsawantaj "júiti Kristu" túramkuinkia anturkairap. ²² Kame "Kústuitjai" ántar tuinia nu, tura "Yúsnan etserniuitjai" ántar tuinia nusha wantinkartatui. Wantinkiar Yus anaikiamu shuárnasha anankatai tusar wakeruiniak, ni kakarmarin iniakmainiak aentsti tujintiamun túrartatui. ²³ Tura átum aneartarum. Aetak, túruntsain ujakchajrumek' tímiayi Jesus.

Aents Ajasu tutai tátintri

(Mateu 24.29-35, 42-44; Rúkas 21.25-36)

²⁴ Jesus tuke unuiniak juna tímiayi: 'Tura nu wáitsatin nankaasmatai, etsaasha nantusha etsantrashtatui. ²⁵ Yaasha nayaimpinmayá kakekartatui, tura nayaimpiniam kakaram ainia nu muchitrartatui. ²⁶ Nuyasha ashí aents Winia wáitkiartatui. Wi, Aents Ajasuitjiana ju, ti kakaran, ti wincha ajasan, yuranminiam winiái wáitkiartatui. ²⁷ Nuj nayaimpinmayá suntarun akupkattajaj, Wíi shuaran ashí nunkanmayan irurarat tusan. Arakaaniya, nunkaaniya, ashí nunka nánkatkamunmayan Wíi shuaran irurartatui.'

²⁸ 'Iikiu numi nakumea nu nekaatarum. Ni chinimpri punkak nuke jeakui, "ju nunkanam esat jeatemai" tátsurmek. ²⁹ Núnisrumek Wi tájarmena nu wáinkurmeka, ni tátintri jeatemai tu nekaattarume. ³⁰ Nekas tájarme, yamaí aents pujuinia nu kajin amuiniatsain, ashí Wi tájana nu túrunatniuiti. ³¹ Nayaimpisha nunkasha amuukatniuiti. Tura winia chichampruka amuukashtiniaiti. ³² Tura tsawantcha nekanachminiaiti. Nayaimpinmayá suntarsha nékainiatsui; Wisha Yusa Uchiríntiatan nékatsjai. Aya winia Aparuk nékawai. ³³ Atumsha anearum enentáimprarum Yus aujsa pujustarum, tsawant nékachu asarum.'

³⁴“Tura Wikia ju shuarjai méteketjai. Ju shuarsha jeachat weak, ni jeen iki-uawai. Ikiuak ni shuarin wáitrukartí tusa apujas ikiuak ashí shuaran takatrin súawai. Tura wáitin wáinniun, “ameja pé_{nk}er wáinkiata” tímiyai. ³⁵Wikia nu jea nérenniua núnisnak, urutai tátataj nékachu asarum anearum pujustarum. Kíaraimpiash, tura ajapkeash, atash shiniukaimpiash, káshikiash tátataj. ³⁶Nérentin aya aneachmak taa, kanúu tepaj wáitkiai tusarum aneartarum. ³⁷Wi atumin tájana nu, ashí shuáran tajai, anearum pujustarum” tímiyai Jesus.

14

Jesusan chichaman jurusarmiania nu (Mateu 26.1-5; Rúkas 22.1-2; Juan 11.45-53)

¹ Jímiarchikí tsawant ajasmiayi paskua tutai námper jeatin. Paskua námpertincha wakapruachu tantan yuatin námpernasha métek najanin ármiai. Israer-patri uuntrisha, Israer-shuara jintinniurisha Jesusan anankar achikiar maatai tusar wakeriarmiayi. ² Túrasha “Jista tsawantin túrachmi, aents charaatum ajarain tusar” tiarmiayi.

Nuwa kunkuinian Jesusan ukatramiania nu (Mateu 26.6-13; Juan 12.1-8)

³ Jesussha Petania péprunam tunamaru Semunka jeen misanam pujan, nuwa tarimiayi. Nartu kunkuinian arapástru tutai kaya najanamunam pi-akun itiamiayi. Nu kunkuin ti kuitiaiti. Mutí chuchuke kupik Jesusa muuken kunkuinian ukatramiai. ⁴ Tura nu pujuarmia nu, kajerar tunaiyarmiayi “¿Urukamtai ju kunkuinian ántar wasurea? ⁵ Junasha súrakka, menaintiú sian kuítnium surukminiuyi. Nu kuitcha kuítrinchán súsan_{ka} maak” tiarmiayi. Tusa nuwan kajerkararmiayi.

⁶ Antsu Jesus chicharainiak “Iniaisatarum. ¿Urukamtai au kajerarum? Winia shiir túrutayi, tímiyai. ⁷ Kuítrincha atumjai tuke íruntsuk. Waker-akrumka tuke pé_{nk}er awajsatniuitrume. Antsu Wikia atumjai tuke pujushtatjai. ⁸ Ju nuwa ashí nii túramnia núnaka umikiai. Wi jákatin jeatsain, iwiarsatin kunkuinian shiir ukatrurai. ⁹ Nekas tájarme, ashí nunkanam Yus-Chicham etsernaktatna nu, ju nuwa túramurisha etsernaktatui, nin kajinmatkiai_{in} tusa” tímiyai.

Jútas Jesusan suruktaj timiania nu (Mateu 26.14-16; Rúkas 22.3-6)

¹⁰ Nuyá Jútas Iskariúti, Jesusa unuiniamurintiat, Israer-patri uuntrin werimiayi, Jesusan suruktaj tusa. ¹¹ Niisha nuna antukar, warasar “Kuit amastatji” tiarmiayi. Jútassha Jesusan itiurak yúpichuch tsankamkattaj tusa enentáimias wekaimiai.

Jesusjai iruntrar yurumáwarmia nu (Mateu 26.17-29; Rúkas 22.7-23; Juan 13.21-30; 1 Kurintiunam 11.23-26)

¹² Wakapruachu tantan yuatin jisat nan_kama tsawant tsawarmatai, paskua námpertin yúatin murik máatin jeamtai, Jesusa unuiniamuri ini-asarmiayi “Paskuatin murikiu yúatin iwiaratai tusar ¿tui wétataj_i. Tui yurumattam?” tiarmiayi.

¹³ Tutai Niisha jimiará unuiniamurin akatar akupeak “Péprunam wetarum. Nu áishman_u yumin jukí wéa wáinkiatarme. Nu áishman_u nemarsatarum. ¹⁴Wayana nu jea nérenniuri títiarum “Uunt túramui, ¿wisha, unuiniamurjai tui yurumáttaj?” ¹⁵ Nu nérentin, yakí písunam uunt tesamunam ashí iwiaramun

iniakturmastatrume. Nuj jísat ii najanatin iwiaratarum” tímiayi. ¹⁶ Ni unuini-amurí wear, pérunam jeawar, Jesus timia núnisan wáinkiar miayi. Tuma ásar paskua námperan iwiararmiayi.

¹⁷ Nuyá kíakui Jesus ni tuse unuiniamurijíai wayawarmiayi. ¹⁸ Niisha misanam pekaamak, yurumáiniak pujasar, Jesus tímiayi. “Nekas tájarme, chikichík shuar Wijíai yurumna nu, surutkattawai.”

¹⁹ Nujai kúntuts enentáimprarmiayi. Chíkich chíkich Jesusan aniasar “wíashitiaj” tiarmiayi.

²⁰ Jesus tímiayi “Ju misanam tuse irunar yurumprum nu, chikichik surutkattawai. Wijíai pininum yurumkan ayak yuana núiti. ²¹ Nekas Wi, Aents Ajasuitjiana ju, jákatniunam wéajai, áarturma áintsanak. Tura áishman súrutna nu ti wáitsattawai. Niisha akiinmainchu ajakuíti” tímiayi.

²² Yurumainiak Jesus Yúsan yuminkias, yurumkan achik, puuk, chicharainiak “Achiktarum, jusha winia ayashruiti” tímiayi. ²³ Pininasha achik, Yúsan yuminkias, ni unuiniamurín súsarmiayi. Ashí umararmiayi. ²⁴ Umararmatai Jesus tímiayi “Júiti winia numpar, untsurín yáintajtsa puártinia nu. Nujai Yamaram Chichaman Yus najanaiti. ²⁵ Nekas tájarme, uwa yumirí ataksha juí umarchattajai. Tura tsawant jeamtai, ukunmasha, Yus akupeana nuí yamarman umartatjai” tímiayi.

*Pítur natsantratniua nuna Jesus ujakmiania nu
(Mateu 26.30-35; Rúkas 22.31-34; Juan 13.36-38)*

²⁶ Yus-kantan kantámawar, jíinkiar, Uriwiu náinnium wear miayi. ²⁷ Nuínkia Jesus nin tiarmiayi “Ju kashi átum natsantrurtatrume. “Murikiu wáinnium máattajai, túramtai murik tsakinmakartatui” tu aarchamukait. ²⁸ Tura ukunam Wi nantakin atumin Kariréanam émtuktiajrume” tímiayi.

²⁹ Tutai Pítur chicharuk “Ámin ashí natsantramainiakuisa, wikia natsantrashtatjame” tímiayi.

³⁰ Tutai Jesus tímiayi “Nekas tájame, ju kashi atash jimiará shiniatsain, natsantrurtatme. “Núnaka nékatsjai” menaintiú turuttiatme” tímiayi.

³¹ Tutai Pítur kakaram chichaak “Ámijíai métek máantuiniakuisha, núnaka penké tíchattajai” tímiayi. Ashí ni unuiniamurí núnisan tiarmiayi.

*Jesus Jitsemaní ajanam Yúsan áujsamiania nu
(Mateu 26.36-46; Rúkas 22.39-46)*

³² Nuyá Jitsemaní ajanam wear miayi. Jeawar Jesus ni unuiniamurín tímiayi “Juí pujustarum, Yúsan áujsatasa pujai”. ³³ Pítrun, Jakupuncha, Juánasha jukimiayi. Tura Jesuska ti kuntuts enentáimiar wake mesek nekapsatasa nankammiayi. ³⁴ Tura nin chicharuk “Wi ti kuntuts enentáimjai, tura jakamnia nekapeajai. Juí iimia pujutarum” tímiayi. ³⁵ Jesussha ishichik arantach we, nunká piniakumar tepes Yúsan aujmiayi. “Ju wáitsatin átatna nu, túrutatniuitkuínkia iniaitiusta” tu seamiayi. ³⁶ Tuke áujuk tímiayi “Apawá, ashí tujinchaitme. Piniñnumiá ashí umartinia áantsan ti nekapsatajna nú wáitsatniun, jurutkitia. Antsu Wi wakeraj nucha, ame wakeramuram túrunati.” ³⁷ Tura ni unuiniamurín tarin, kanúu tepenan wáinkiamiayi. Pítrun tímiayi “¿Semunka kánamek. Kanutsuk ishichiksha iimia pujustin tujinkiamek? ³⁸ Anearum Yus áujsatatum, tunaanum iniaaraj tusarum. Atumí wakanjin kakarmaitrume, antsu atumí ayashin kakarmachuitrume” tímiayi.

³⁹ Ataksha we, nuik Yúsan áujsama núnisan áujsamiai. ⁴⁰ Ataksha waketruki, ni unuiniamurín kanúu tepenan tarimiayi. Karí ti pujá asantai, Jesusan

áujSATniun tujinkiar^{miayi}. ⁴¹ Jesus ataksha we, tarí tímiayi “Kanárum ayam-pratarum. Máakete. Jeayi. Wi, Aents Ajasuitjiana ju, tunáa shuarnum surukmaitjai. ⁴² Nantáktiárum, wemí. Iis, Winia súrutna nu nuntumsai” tímiayi Jesus.

Jesusan achikiarmiania nu

(Mateu 26.47-56; Rúkas 22.47-53; Juan 18.2-11)

⁴³ Jesus nuna chicháa pujá unuiniamurí Jútas tarimiayi. Nii^{jia}i untsurí aents puniá takaku, tura numincha takaku káutarmiayi. Israer-patri uuntri, Israer-shuara jintinniurí, tura Israer-shuara úuntri akupkarma asa káutkarmiayi. ⁴⁴ Káuntsain Jútas chicharainiak, “Wi mukunattaj áujkin núiti Jesus. Achírum, péⁿker emetarum jukitiarum” tímiayi. ⁴⁵ Tura Jesusan tarí, mukunuk áujas “Uuntá, Uuntá” tímiayi. ⁴⁶ Túramtai aencha Jesusan achikiar emetawarmiayi. ⁴⁷ Túruiniakui nuⁱ wajatusha puniarí úkuitsan, patri uuntri takarniurín awati ni kuishín tsupirkamiayi.

⁴⁸ Túram Jesus áentsun tímiayi “Kasakaitiaj. Puniajai numijiai, kasá nútiksarmek achirkatai tusarum tarutniurme. ⁴⁹ Ashí tsawant atumjai Yusa Uunt Jeen wayan unuiniakun pujuchmakaj. Túmai nuⁱ achirkachmarme. Tura Yus timia nu uminkiat tusa ju túrunayi.” ⁵⁰ Nuiⁿkia ni unuiniamurí Niniak ikiuiniak pisararmiayi.

Natsa pisarmiania nu

⁵¹ Tura áishman nátsaach aya tarachin penumas Jesusan atamprimiayi. Tura natsaach suntar achikiam ⁵² tarachrín ajapa ikiuak misú tsékenkimiayi.

Patri uuntriin Jesusan júkiarmiania nu

(Mateu 26.57-68; Rúkas 22.54-55, 63-71; Juan 18.12-14, 19-24)

⁵³ Patri uuntriin Jesusan ejeniarmiayi. Nuⁱ Patri uuntrisha, Israer-shuara jintinniurisha, Israer-shuara uuntrisha irunturarmiayi. ⁵⁴ Tura Pítíur íkian nemarki Patri jeen aach jeá, Patri suntarijiai jinia anamuk pujumiayi. ⁵⁵ Patri uuntri ashí naamka uunt armia nujai iruntrar maatai tusar wakeruiniak shuar Jesusan tsanumprurat tusar eatkarmiayi. Nu chichamjai mantamnati, tiarmiayi. Tú^rasha wáinkiacharmiai. ⁵⁶ Tú^rasha untsurí shuar Jesusan tsanumpruiniayatan yapajjá yapajjá chichainia ásarmatai wáinkiacharmiai. ⁵⁷ Nuyá chíkich wajakiar wáitruiniak juna tiarmiayi ⁵⁸ “Yusa Uunt Jeen, aents jeamarmia nuna yumpuntiatjai. Túran menaintiú tsawantaj, chíkichan, aents jeamchamun jeamtatjai” tau antukmaji” tiarmiayi. ⁵⁹ Tura tuke yapajjáwar tiarmiayi.

⁶⁰ Nuisha Patri uuntri ajapén wajaki Jesusan chicharuk “¿Áimsatin penké tujintiamek. Warinia turamainia?” tímiayi.

⁶¹ Tura Jesus takamtak áimtsuk pujumiayi.

Patri uuntri atak chicharuk “¿Ame nekas Yusa Anaikiamurinkaitiam. Ii Yusri Uunt tajinia nuna Uchirinkaitiam?”

⁶² Tutai Jesus tímiayi “Ee, núitjai. Winia, Aents Ajasu tutaintiajna nu Kakaram Yusa untsuuriní pujai wáitkiattarme. Tura nayaimpinmaya yuraⁿminiam winiaj wáitkiattarme” tímiayi.

⁶³ Tutai Patri uuntri kajek, ni pushirín jaak tímiayi “¿Chíkich títincha warí atsumaji? ⁶⁴ Nii tana nujai Yusan kátsekeamu antukurme. ¿Warintia enentáimprum?” tímiayi.

Takui “jakamniaiti” ashí tiarmiayi. ⁶⁵ Chíkich chíkich Jesusan usukiáwarmiayi. Jiin epetkar awatiar “¿Ya áitkiarma? etserkata” tiarmiayi. Patri suntarisha yapiniam awatiarmiayi.

*Pítur Jesusan natsantramiania nu**(Mateu 26.69-75; Rúkas 22.56-62; Juan 18.15-18, 25-29)*

⁶⁶ Núnaka túruiniaí Pítu nunká, jea aani pujan, nuwa Patri uuntri takarni-uríya nu tarimiayi. ⁶⁷ Niisha Pitrun jinia anamu pujan wáinkiamiayi. Wáiniak, “Amesha Nasaretnumia Jesusjai wekaichukaitiam” tímiayi.

⁶⁸ Tutai Pítur chicharuk, “Nékatsjai. Ame támena nuna nékatsjai” tímiayi. Tura aa wáitiainiam jiinkimiayi. Tumai atash shiniukmiayi.

⁶⁹ Nu núwasha Pitrun ataksha wáiniak, shuáran nuí pujuinian tímiayi “Júiti ni shuari.”

⁷⁰ Tura ataksha “atsá” tímiayi.

Ishichik árusan, shuar nuí pujuarmia nu ataksha Pitrun chicharuk “Nekas ni shuarinme. Kariréanmaya shuárchakaitiam. Auya shuara nuní chichaame” tiarmiayi.

⁷¹ Tutai Pítrusha kakantar chichaak, “Ju áishmannaka átum tárumna núnaka nékatsjai. Wáitrakuinkia Yus írsati” tímiayi. ⁷² Nuya ataksha atash shiniukmiayi. Pítrusha, Jesus nuik timian enentáimmiayi. Iis, Jesus nuik tíchamka “Atash jimiar shiniatsain, ame, núnaka nékatsjai, menaintiu turuttiatme” tíchamka. Pítu nuna enentáimias ti útmiayi.

15*Jesusan Piratú ejeniarmiania nu**(Mateu 27.1-2, 11-14; Rúkas 23.1-5; Juan 18.28-38)*

¹ Tura kashin káshik Patri uuntri, Israer-shuara úuntriijai, Israer-shuara jintinniurijiai, ashí naamka armia nujai irunturar, chichaman jurusarmiayi. Túrawar Jesusan jinkiamun apach kapitíán Piratujin ejeniarmiayi.

² Ejeniarматаi Piratu aniasmiayi “¿Amesha Israer-shuara Uuntrinikáitiam?”

Tutai Jesussha “Amek tame” tímiayi.

³ Nuyá Patri uuntri ti tsanumprurarmiayi. ⁴ Ataksha Piratu aniasmiayi “¿Áimsatin penké tujintiamek? Ti untsurí etserturmainiatsuk.” ⁵ Tura Jesus nunasha áikchamiayi. Túmakui Piratu ti enentáimpramiayi.

*Jesusan, mantamnati, tíarmiania nu**(Mateu 27.15-31; Rúkas 23.13-25; Juan 18.38-19.16)*

⁶⁻⁷ Shuar ámiayi, ni naari Parapás. Niisha ni shuariijiai meset ámanum, shuaran maa asamtai sepunam enkeamuyayi. Tura námper tsawantaj Piratu sepunmaya chikichík shuarnak jíiki akupniuyayi, aents seawarmia nuna.

⁸ Nuisha untsurí shuar Piratun káutkar tiarmiayi “Ame ju námper tin tuke túramna nu túratá. ⁹⁻¹⁰ Patri uuntri Jesusan kajeraru ásar surukarmiayi. Piratusha, nuna nekáa chicharainiak “Israer-shuartiram ¿atumí akupniurín jíiki akupkattajak? ¿Nu wakerarmek?” tímiayi.

¹¹ Tutai Patri uuntri áentsun chichainiak ““Antsu Parapás jíikim akúpkatá” titiarum” tiarmiayi.

¹² Tutai Parapásan seawarmatai Piratu ataksha chicharainiak “Jesusnasha, átum ii akupniurí tarumna nuna, ¿itiurkattaja?” tímiayi.

¹³ Ataksha ni kakantar tiarmiayi “Krúsnum mantamnati.”

¹⁴ Piratusha nin tiarmiayi “¿Warí tunaana túriniait?” tímiayi.

Takui niisha nú nankaamas kakantar tíarmiayi “Krúsnum mantamnati.”

¹⁵ Tuma asamtai, aents shiir enentáimprartí tusa, Piratu tunáa shuaran, Parapásan jíiki akupkamiayi. Tura Jesusnasha katsumkarum krusnum ajin-trurtarum tusa suntaran tsankatkamiayi. ¹⁶ Tiniu asamtai suntar Jesusan jukiar, kapitíáni jeen awayawarmiayi. Nu jea naari Piritiúriuiti. Túrawar

untsurí suntaran untsukarmiayi. ¹⁷ Ashí káunkar, pushin kapaanniun Jesusan áentsrarmiayi. Tawasap jan̄ki najanamun etsenkrumtikiarmiayi. ¹⁸ Nuisha Jesusan áujsar “Shíraitme, Jesusá, Israer-shuara akupniuriya” wishikiainiak tiarmiayi. ¹⁹ Muuknumsha sapapjai awatiarmiayi; nuyá usukiawarmiayi, túrawar ántar tikishmatrarmiayi. ²⁰ Tura Jesusan wishikrar amukar, kapaantin pushin áitkiar, ni pushirin áentsrarmiayi. Túrawar krúsnum ajintrurtai tusar jíikiarmiayi.

Jesusa jakamuri

(Mateu 27.32-44; Rúkas 23.26-43; Juan 19.17-27)

²¹ Semun̄ Serini núnkanmaya shuárauyayi. Arijantruncha, Rupuncha aparíyayi. Semun̄kan takatnumiá winian suntar emetawarmiayi, Jesusa krusin yanaki jukiti tusar. ²² Jesusnasha Kúrkuta náinnium júkiarmiayi. Kúrkuta, shuar chichamjainkia, muuka ukunch naint, tutainti.

²³ Jeawarmatai, karía, mira kun̄kuinjai pachimprar áartaj tusa susarmiayi Jesusan. Túrasha umarchamiayi. ²⁴⁻²⁵ Nantu yakí jatemsamtaí krúsnum ayapar ajintrurar ikiusarmiayi. Túrawar suntar yakí jukit tusar nakurutaijjai nakurusar Jesusa pushirin yaruakarmiayi. ²⁶ Urukamtaí máamuit, ashí aents nuna nekaawarat tusa, ni krusin ju aarmauyayi: *ISRAER SHUARA AKUPNIURI*

²⁷ Nu náinnium jimiará kasa shuaran Niijjai máawarmiayi. Chikichik Jesusa untsuurin̄i krúsnum, chikichik ni menaarin̄i krúsnum máawarmiayi. ²⁸ Yus-Papinium aarma ana nujai uminkiauyayi. Nui “tunáa shuarjai nekapmar-mauyayi” tu áarmaiti.

²⁹ Shuar nan̄kaamainiak, muuke pearar, Jesusan katsekainiak tiarmiayi “Íisia, amesha, “Yusa Uunt Jeen yumpuntiatjai, tura menaintiú tsawantaj ataksha jeamkattajai” tíchakaitiam, tiarmiayi. ³⁰ Amek krúsnumiá akaikim uwemprata.” ³¹ Núnisan̄ Patri uuntrisha, Israer-shuara jintinniurisha Jesusan wishikrar chicharnaisarmiayi “Chikichan uwemtikraitiat, Nin̄ki uwempratniun tujintiawai. ³² Yusa anaikiamuri Krístuashit, ii akupniuriniashit, tiarmiayi. Wats, yamáí krúsnumiá akáikití, iisha nu íisar Yus-shuar ajastai” wishikiainiak ántar nuna tiarmiayi. Jesusjai krúsnum ajintruamusha Nin wishikiarmiayi.

(Mateu 27.45-56; Rúkas 23.44-49; Juan 19.28-30)

³³ Tutupin jeamtaí ti kiritin ajasmiai ashí nunkanam. Tura, nantu nunkaach ajasmataí ataksha tsaapnirmiayi. ³⁴ Nuiñ Jesus kakantar untsumuk tímiayi “Iruí, Iruí, rama sapaktani.” Nuka shuar chichamjainkia, “Yusrú, Yusrú, ¿urukamtaí ajapa ikiurkiniam?” tawai. ³⁵ Shuar nui pujuarmia nu, nu chichaman nékachu ásar, nuna antukar “Eríasan untsúawai” tíarmiayi. ³⁶ Chikichik shuar churuinian uruchjai ajamper, sapapjai ijiú mukunati tusa susamiayi. Tura tímiayi “Wajastarum, Erías Nin jukitiaj tusa winishtimpiash. Iistai” tímiayi.

³⁷ Nuiñkia Jesus kakaram untsamak jakamiayi. ³⁸ Túramtaí Yusa Uunt Jeen ejamu nin̄ki jaanakmiayi, yakíya nunká. ³⁹ Suntara kapitiantrisha Jesusan ayamtus wajamia nu, Jesus kakaram untsamak jaamun iis tímiayi “Nuka ti nekas Yusa Uchiriyayi.”

⁴⁰ Nuwasha arant ii pujuarmiayi. Nu nuwajai Máktara péprunmaya Marí, chikich Marisha, Sarumáisha pujuarmiayi. Chikich Marisha uchich Jakupuncha Jusenchá nukuríyayi. ⁴¹ Nu núwaka, Kariréa nunkanam Jesus wekaimia nui, Nin nemarsar yáintaitsar wekasarmiayi. Untsurí chikich nuwasha Jesusjai Jerusarénum wear, nu nuwajai arant ii pujuarmiayi.

*Jesusan iwiarsarmiania nu**(Mateu 27.57-61; Rúkas 23.50-56; Juan 19.38-42)*

⁴² Kiatemantai, ayampratin tsawant jeatsain, námper iwiaratin tsawant asantai, ⁴³ Arimiatíanmaya Jusé arantutsuk, kakaram ajas, Piratuí jeá Jesusa ayashin seatajtsa utuamiayi. Nu Jusenchá ashí irunin ainia nu anturin ármiai. Niisha Yus ju nunkanam akupin ajasat tusa nákasmiayi. ⁴⁴ Tura Jesusa ayashin seam, Piratusha “wárik jaka” tímiayi. Tuma asa suntara kapitíántrin untsurak “¿Nekas jakayik?” tímiayi. ⁴⁵ Tutai kapitíán “Ee” takui, Jesusa ayashin Jusén tsankatkamiayi. ⁴⁶ Jusesha puju tarachin péñkeran sumarak, Jesusa ayashin itiar áepas penuarmiayi. Tura yamaram kaya táurmanum ikiusmiayi. Ikius wáitiniam kayan átutmiayi. ⁴⁷ Tura Máktaranmaya Marí, Jusé nukurí Marijiaí ni ikiumun ii wajarmiayi.

16*Jesus nantakmiania nu**(Mateu 28.1-10; Rúkas 24.1-12; Juan 20.1-10)*

¹ Tura ayampratin tsawant nankaasmatai, Máktaranmaya Marisha, Jakupu nukurí Marisha, Sarumáisha, kunkuinian Jesusa ayashin kuertai tusar sumakarmiayi. ² Tura kashin Tumintin, ti káshik, nantu yáma jiiñiaí, iwiarsamunam jeariarmiayi. ³ Wésar chichainiak “Iwiarsamu wáitiri kayancha ¿yaki akanketramkattaj?” tiarmiayi. ⁴ Jear uunt kaya akankekman wáinkiararmiayi. ⁵ Iwiarsamunam wayawar, natsan esaram puju pushin entsar, untsurnumaani pujan wáinkiar ti ashankarmiayi. ⁶ Túmainiakui natsa tímiayi “Ashamkairap. Nasarétnumia Jesús krúsnum jakama nu éarme. Iniantkimiuiti. Juí pujatsui. Wátsek, ju ikiusmanum íistarum. ⁷ Túrarum werum Pítrusha, chíkich unuiniamurisha ju ujaktarum. Kariréanam atumin émkiyi. Turammarumna núnisan túruna wáinkiattarme” tímiayi. ⁸ Niisha ti ashamainiak purushniarar iwiarsamunmaya tseke wearmiayi. Ti ashamainia ásar, chikichkinkesha ujakcharmiai.

Máktaranmaya Marin Jesus wantintiúkiania nu
(Juan 20.11-18)

⁹ Émkaka Tumintin ti káshik Jesús nantaki, Máktaranmaya Marin wantintiúkmiayi. Nu María enentáiyá siati iwianchin Jesús yaunchu ajapruyayi. ¹⁰⁻¹¹ Marisha Jesusa nemaní kúntuts uutu matsatainian werí, “Jesús iwiaakui, imia wi wankiajai” tímiayi. Támaitiat anturkacharmiayi.

Jesus jimiara shuar wantintiúkiania nu
(Rúkas 24.13-35)

¹² Tura urum jimiaara shuar Jerusarétnumia tsanin weenan, Jesús nusháa iira ajas tarimiayi. ¹³ Niisha Jesusan wáinkiar waketkiar, unuiniamurin ujakarmiayi, tura ni chichamencha anturkacharmiayi.

Jesus ni unuiniamurin akupkarmiania nu
(Mateu 28.16-20; Rúkas 24.36-49; Juan 20.19-23)

¹⁴ Nuyasha Jesusa auntse unuiniamurí misanam pekaamkar pujuinian Jesús tarimiayi. “¿Atumí enentái urukamtaí kátsuram ainia, urukamtaí Winia nekas enentáimtursachuram?” tímiayi. Ni nantakmiarín wáinkiaru chichamen anturkacharu ásarmatai kakantramiayi. ¹⁵ Nuyá chichaak “Ashí nunkanam wetarum. Túrarum ashí shuarum Yusa shiir chichame etserkatarum. ¹⁶ Shuar anturak imiani uwemprartatui. Shuar antukcharka, tuke sumamawartatui. ¹⁷ Shuar winia náarun pachis, Yúsán nekas enentáimtakka, juna

túrawartatui, Yusa kakarmarín iniakmastaj tusa: iwianchin jiki akupkartatui; chikich chichamjai chichasarukamtai Winia nekas enentáimurtatui; ¹⁸ napincha achiksha, tseasnasha úmaksha, jaa ajaschartatui. Jaa shuaran ni uwejejai antiñ, nu shuaran péñker awajsartatui.” Tu tímiayi.

Jesus nayaimpiniam wakamiania nu

(Rúkas 24.50-53)

¹⁹ Jesus chichas amukmatai, Yus nayaimpiniam jukimiayi. Túruna Yusa untsuurini pujusmiayi. ²⁰ Ni unuiniamurisha jíinkiar, ashí nunkanam Yus-Chichaman etserkarmiayi. Tura Uunt Yus nin yáimmiayi. Tura etserainiakui, ashí aents ni kakarmarín nekaawarat tusa, aentsti tujintiamun túratniun susamiayi. Nuke atí.

Yúsan Shiir Chichamen RÚKAS aarmia nu

¹ Nekas iiní Jesus túramia nuna “ímiatrusan áartajai” untsurí aents tiarmiayi. ² Yámankamtaikniumian ísarmia nú shuar, tura Yus-Chichaman etserkatniun yáinkiarmlia nusha in unuitiamprarmia nútiksaran áartinian wakeriarmiayi. ³ Wisha núnisnak esetsaran enentáimsan, yámankamtaikniumia nuna nekaam-jai. Tuma asan túrunamia nuna ímiatrusnak amincha áatratajtsan wakerimji-ame, winia úuntur Tiupiru. ⁴ Jintintramawarma nú nankaamas nekaata tusan wakerakun áatjame.

Imiakratin Juanka akiiniatniurin ujakmiania nu

⁵ Jutía nunkanam uunt akupin Erutis akupkamia nú tsawantin Israer-shuar Yúsnan pujurin ámiayi, ni naari Sakarías. Niisha Aptías weeauyayi. Ni nuwasha Irisapít Arun weeauyayi. Irisapítia úntrisha Israer-shuar Yúsnan pujurin ámiayi. ⁶ Yúsjaisha Sakaríassha Irisapítcha máí-metek péñker ámiayi. Yus akupkamia nunasha umirin ámiayi. Tuma asamtai penkesha chíkich nin yajauch chicharkatin atsuarmiayi. ⁷ Yusjai péñker wekainiayat Irisapít júrechuyayi. Túrasha mai úuntach ámiayi.

⁸⁻⁹ Israer-shuar Yúsnan pujurin chíkich weeanmaya nuyá chíkich weeanam, ankant ankant Yusa jeen takáu ámiayi. Chíkich tsawant, Sakarías weea takastin amia nui, Sakaríaska kunkuinian ekeemaktaj tusa init wayatniuyayi. ¹⁰ Init kunkuinian ekeemaj untsurí aents aani matsamsar Yúsan áujtak pujuarmiayi. ¹¹ Sakarías init pujaí kunkuin ekeematainiam untsuurnumaani aya aneachma nayaimpinmaya suntar wajamiayi. ¹² Nuna wajan wáiniak Sakaríaska purushnairmiayi. ¹³ Túrasha nayaimpinmaya suntar chicharuk tímiayi “Sapijmiakaip Sakarías. Nekaata. Ame seamna nuna Yus anturtamkayi. Tura ame nuwem Irisapít uchin takustatui. Nii akiiniamtai, “Juan” anaikiata. ¹⁴⁻¹⁵ Ame uchiram akiiniattana nuka Yusjaisha nankaamantu átatui. Tuma asamtai akiiniamtai, amesha shiir enentáimsam warastatme. Tura chíkich aents untsurí warasartatui. Ame uchirmesha karia ainia nuna umarchattawai. Tura áetak akiinchanak Yusa Wakaní pimiutkattawai, tímiayi. ¹⁶ Tura ni shuarin Israer-shuar áiniana nuna, ii Untri Yusjai ataksha nawamtikiartatui. ¹⁷ Uunt Yúsaiya akatramu átatui. Yaunchu Yúsnan etserin Erías kakaram etserkamia núnisan niisha etserkattawai. Nujai shuaran ni uchiríjiai nawamtikiartatui. Tura umichu áinia nuna eseer enentáimtikrartatui. Ni Untri taakui ni enentái iwiamu arti tusa etserkattawai” tímiayi nayaimpinmaya suntar.

¹⁸ Nuna takui Sakarías nayaimpinmaya suntaran tímiayi “¿Nunasha warijiai paant nekaataj? Wisha nuarjai máí-metek ti úuntchichukaitiaj” tímiayi.

¹⁹ Tutai nayaimpinmaya suntar tímiayi “Wikia Kapriiraitjai, Yusa suntarintjai. Nii akatturmatai chichastájam tusan tura nu shiir chichaman ujaktájam tusan tarijme, tímiayi. ²⁰ Túrasha wi tájamna nu “nekasaiti” tu enentáimprachume. Tura asam uchiram akiintsaij muut ajastatme. Chichastin penké tujinkiattame. Tura wi tajana nu, tsawant jeamtai túrunattawai.”

²¹ Nuna tumaj Yusa jeen aani pujusar, Sakaríasan nákas pujuarmiayi. “¿Urukamtaik init we imiá menkaka?” tu enentáimprarmiayi. ²² Nuyá Sakarías jiinkimtai, áujstaj tukamá tujinkiarmliai. Sakaríaska, muut ajasu asa,

aya úwijmiasan chichamiayi. Túmakui, Sakarías init pujus Yúsai wáimiakun nekaawarmiayi.

²³ Yusa jeen takastin tsawantri amuukamtai Sakaríaska ni jeen waketkimiayi. ²⁴ Nuyá ukunam ni nuari Irisapít ajaprukmiayi. Tura senku nantutin aya jean pujusmiayi. ²⁵ Jeá pujus, “Aents wishikruiniakui natsantan jurutkitiaj tusa uchi takustinian Yus tsankatrukai” tu enentáimpramiayi Irisapít.

Jesusa akiiniatniurin nayaimpinmaya suntar etserkamiania nu

²⁶ Nu senku nantu nankaamasmatai Yus ni suntarin Kapriiran Nasarét péprunam akupkamiayi. Nu pepru Kariréa nunkanam pujawai. ²⁷ Nasarénumia nuwan, naari Marí, iyutí tusa akuptukmiayi. Nu núwaka áishmanjai pujuchuyayi. Niisha Jusejai nuatnaikiatsa anajmanair pujumiayi. Juseka uunt Tawit weeauyayi. ²⁸ Wats, nayaimpinmaya suntar Marí pujamunam wayá tímiayi “Yus pénger enentáimturma asamtai, ámin winitjiame, Mariya. Yuska ámin nemartamuk ashí nuwa nankaamas pénger awajtamui” tímiayi.

²⁹ Tura Marisha nayaimpinmaya suntaran wáiniak, chichaamun nékatsuk “Urukamtaik tu chicháa” tu enentáimpramiayi. ³⁰ Nuyá nayaimpinmaya suntar chicharuk tímiayi “Mariya, sapijmiakaip. Yus shiir enentáimturmawai. ³¹ Antukta. Amesha ajapruktatme. Túram Uchi takustatme. Nusha “Jesus” anaikiata. ³²⁻³³ Niisha uunt átatui. Nincha “Uunt Nankaamaku Yusa Uchiri” tiartatui. Tura Uunt Yuska yaunchu Tawitian uunt akupniuri awajsamia núnisan ame Uchirmin ame shuárumin Israer tutain Uunt akupin awajsat-tawai. Ni akupeamurisha Yus susamu asa penké amuukashtiniaiti” tímiayi.

³⁴ Nayaimpinmaya suntar nuna tutai Marí tímiayi “Nusha winia áishur atsaisha, ¿itiurak túrunataj?”

³⁵ Tutai nayaimpinmaya suntar Marín tímiayi “Yusa Wakaní tarutramtataui. Tura yuranmia núnisan Uunt Yusa kakarmari ijirmattawai. Nu tuma asamtai Uchi akiiniattana nu Yúsaiya asamtai, “Yusa Uchirinti” tiartatui, tímiayi. ³⁶ Tura Irisapít ame kaná kaimia nusha núnisan weamtanam ajaprukai. Iis, “júrechuiti” tiarmia nu, yamaikia sais nantu pujawai ajamtin. ³⁷ Yúsjainkia itiurchatka penké atsawai” tímiayi.

³⁸ Tutai Marí tímiayi “Yus wakeramun túriniaitjai wikia. Ame tame nuna Yus wakerana nuna túrutati, tajai” tímiayi. Nuna tímiatai nayaimpinmaya suntarka wémiayi.

Irisapítian Marí iyumiania nu

³⁹⁻⁴⁰ Nu tsawant Marí wárikmas muranam Jutía nunkanam ni kaná kain Irisapítian iyutaj tusa wémiayi. Sakaríasai jeá, ni jeen wayá, Irisapítian áujsamiai.

⁴¹ Marí áujeamun antukmatai Irisapítia ampujén uchiri muchitkamiayi. Tumai Yusa Wakaní ni enentáin pimiutkamiayi. ⁴² Nuinkia kakantar chichaak Marin tímiayi “Yus amincha ti shiir awajtamsaiti. Tura Uchiram akiiniattana nusha Yus shiir awajsamuiti. ⁴³ Kajrua, ame winia Uuntru nukurí ámini, Yus winia ti waitnentra asa, áusata tusa ámin akuptamkachaik, tímiayi. ⁴⁴ Warí, wisha ame áujtamna nuna ántakui ampujruí uchi waras muchitrukayai. ⁴⁵ Amesha Yus turámiania nu umikiu asam shiir pujame. Yus tímia nu túrunattawai auka” tímiayi.

⁴⁶ Nuna tinia iniaisamtai Marí juna tímiayi:

“Wikia tuke enentairjai “Yus timiá úuntaiti” tajai. ⁴⁷ Tura Uunt Yuska winia Uwentikruru asamtai ti waraajai. ⁴⁸⁻⁴⁹ Wisha péejchach ain ni wakeramurin umiktajtsan wakerakui winia enentáimturayi. Tuma

asamtaí ashí aents, “Marincha Yus shiir awajsaiti” tuke turutiartatui. Yuska imiá penker tura imiá kakaram ana nu winia ti uuntan túrutaiti. Tuma asamtaí ashí aents “Marincha Yus shiir awajsaiti” turutiartatui. Núnaka yamáí nankamamunak tuke turutú ajartatui. ⁵⁰ Tura Nin umirkatniun wakerana nunasha Yus tuke waitnentrartatui. ⁵¹ Ti itiuurchatan páchitsuk túraití Nii. “Nankaamantuitjai” tu enentáimtumainia nuna nupetkaiti. ⁵² Ashí akupin ainia nuna awakkaruiti. Tura íksan péjchach ainia nuna uunt awajsaruiti. ⁵³ Péñker ana nuna kitiamaínakui Yus péñkeran súsaruiti. Tura antsu “ashí takakjai” tuinia nuna aya júnik awajsaruiti. ⁵⁴ Israer-shuar Niiniu ájiniá núnaka waitnentratniun kajinmattsuk yáinmákuítji. ⁵⁵ Yaunchu ii Uuntrí Apraáman tura ní shuarnasha “túrattajai” timia nuna ímiatrusan tuke túraití.” Nuní tímiayi Marí.

⁵⁶ Marikia Irisapítjai menaintiú nantu pujus ni jeen waketkimiayi.

Imiakratin Juan̄ka akiiniamuri

⁵⁷ Nuyasha ni jurertin tsawantrí jeamtaí Irisapítcha uchin áishman̄kan takusmiayi. ⁵⁸ Tura ni shuarísha, ni írutramurísha “Irisapítian Yus ti shiir yáin̄miayi” tuíniak, nin iyuwearmiayi. Tura máí-metek warasarmiyai.

⁵⁹ Israer-shuar túrutai júnisaiti: uchi akiiniamurí uchu tsawant jeamtaí, shunichirí nuapen tsupiktin awai, sirkunsisiún tutai. Yus nuna tú tiniu asamtaí tuke túrin ármiyai. Wats, Irisapítia uchirí akiiniamuríniá uchu tsawant jeamtaí tsupirkatai tusar ni jeen jearmiyai. Nuínkia ni aparí naarí Sakarías anaikiataitsar wakeriarmiyai. ⁶⁰ Tura ni nukurí tímiayi “Atsá. Antsu ni naarí Juan̄ átatui.”

⁶¹ Tutai tiarmiayi “¿Nusha urukamtia? Amée shuarumsha nu náartincha áwak’ tiarmiayi. ⁶² Nuínkia uchi aparín “¿Warí anaikiatajtsam wakeram?” tusar aya úwejejaín iniasarmiyai.

⁶³ Tutai uchi aparísha “Nakash surusta; áartaj tusan wakerajai” tusa aya úwejejaín iniakmamiayi. Takui nakash susam, ni naarí Juánkaiti, tu áarmiyai. Nuna wáinkiar “Ayawá urukakun̄ ta” tu enentáimprarmiyai. ⁶⁴ Nú chichamaik Sakarías chichatsuk pujamun chichakmiayi. Tura nuin̄ Yusa náarin̄cha shiir awajsamiayi. ⁶⁵ Nuínkia ni írutramurísha ashamkarmiyai; tura ashí Jutía nun̄ka murá amia nuí nu túrunamun ujakam ashí nekaawarmiyai. ⁶⁶ Nu túrunamun antukar ti enentáimsarmiyai. Tura “ju uchin Yus nekas pujurtsuk. Tuma asamtaí uunt ajas ¿urukuk ati?” tu enentáimprarmiyai.

Sakarías Yus jintintiam tímiania nu

⁶⁷ Uchí aparí Sakarías, Yusa Wakaní pimiutkam tura Yus jintintiam, júna tímiayi:

⁶⁸ “Israer-shuartí ii Yusrí naarí shiir awajsatniuitji. Ii Yúsrísha tarutmaitji. Tura uwentikrampraitji. ⁶⁹ Yaunchu ii uuntrí Tawit Yusa wakeramuríjjai uunt akupin áchamkia. Tura ni ukurín ti kakaram Uwentikkiartinian suramsaitji. ⁷⁰⁻⁷² Yuska ii nemasriyá tura in nakitramainiajn̄ia nuyá uwentikrampratniun enentáimsamia nuna, yaunchu ni etserniurín péñker armia nuna ujakmiayi. “Winia ti penker chichamprun tájana nuna yapajítsuk umirkan tuke wáitnentratajrume” yaunchu ii úuntrín tímiania nunasha ni etserniurín ujakarmiyai. Yaunchu nu ujakma yamáí iisha wainji. ⁷³⁻⁷⁵ Nu ujakman Yuska yámankamtaik imiá yaunchu ii uuntrí Apraáman tíchamkia. Apraáman ujakmia nu júiti: “Wi wakeraj nútiksaran, Winia umirtukar péñker wekainia nuna ni nemasriyá uwentikrattajai.

Sapijmiatsuk winia tuke takartusarat tusan túrattajai” Yus tímiayi Apráaman. Iisha ni shuari asakrin, nuna taku incha túramaji. ⁷⁶ Tura amincha, uchiru, “Uunt Yúsna etserniuiti” turamartatui. Amesha ni tátintri iwiarataj tusam Uuntaí émkim wétatme. ⁷⁷ Ni shuari, ni tunaari tsankurnar uwemprarat tusam túrattame. ⁷⁸⁻⁷⁹ Yuska ashí shuaran anea asa, incha wáitnentrak ni pujamunmaya ni tsáapnintrin suramsaitji. Ni enentáin kiritniunam wekainia nuna, mesertinnium jeatemá ásarmatai, ni tsáapnintrí jeatí tusa túraití. Tura ashí incha ii enentáin imiatkinchanum wekasarmí tusa túraití.” Nuní tímiayi Sakarías.

⁸⁰ Uchisha tsakarmiayi. Tura Yúsan nekaki-nekaki wémiayi. Israer shuar-num etserkatin tsawantri jeatsainkia atsamunam pujuyayi.

2

Jesusa akiiniamuri (Mateu 1.18-25)

¹ Wats, Juan akiiniamia nú uwitin uunt akupin Akustu ashí nunkanam áentsun nekapmarartí tu chichakmiayi. ² Nu nekapmartinian yaunchu túrushtain yamáí túriarmiayi. Siria nunkanam Seriniu akupin pujái túrawarmiayi. ³ Ni naari áartaj tusa ashí shuar ni nunkenin wétin áirmiayi. ⁴ Tuma asamtai Jusé Nasarét péprunmaya Kariréa nunkanam amia nuyá jiinki Pirin péprunam Jutía nunkanam amia nuí wémiayi. Juseka Tawit weenam akiinia asa, ni nekas nunkenka Pirinkauyayi. ⁵ Nu asamtai, ni náarin áartaj tusa Jusé wémiayi Marijjái. Marisha Jusé núweyayi. Tura tsanincharuyayi. Túmaitiat Marisha Yusa Wakaní kakarmarijjái ajamtiniuyayi. ⁶ Tura nuí Pirinnum pujuiniaí Marí takustintrí jeamiayi. ⁷ Nuí iwiairin uchin áishmankan takusmiayi. Tura uchi penutaijjái penuar, waaka yurumtainiam áepsamiayi. Írar kanutainiam pujustin ankant atsa asamtai túrawarmiayi.

Murikiun wáinnium nayaimpinmaya suntar Yus akatar akuptukmia nu

⁸ Tura Pirinnum tíjiuch murikiun wáinin kashi murikrin wáiniuk pujuarmiayi. ⁹ Túmainiaí nayaimpinmaya suntar murikiun wáinin matsatainian wantintiukmiayi. Tura Yúsnumiá tsáapnin ni matsatainiamunam etsantramiayi. Túrunamtai murikiun wáinniuuka ti ashamkarmiayi. ¹⁰ Túrasha nayaimpinmaya suntar tímiayi “Ashamprukairap. Ashí áentsnum ti warastin atí tusan ti penker chichaman itiarjarme. ¹¹ Júiti: yamáí tsawantaj uunt Tawitia péprurin Pirinnum yaunchu Yus anaikiamu KRISTU tutai, uwentikramprataj tusa akiintiurmarme. Nu Uchisha ashí áentsun akupniuiti, tímiayi. ¹² Tura jujái nekaattarme: uchi penutaijjái penuarma waaka yurumtainiam tepá wáinkiatarme. Nu wáinkiarum nekas júiti, tu nekaattarme.” ¹³ Nu chichamaik nayaimpinmaya suntar ti untsurí, nayaimpinmaya káunkarmiayi. Túrawar Yusa naarin shiir awajainiak juna tiarmiayi:

¹⁴ “Nayaimpinmasha Yus nankaamantuiti tu enentáimtusarti. Tura ju nunkanmasha Yusjái nawamnaikiaru ainia nu imiatkinchanum pujusarti.” Tu tiarmiayi.

¹⁵ Tura Yusa suntari nayaimpiniam waketkiarmatai murikiun wáinin tiarmiayi “Wats, Pirinnum wárik wetái. Nu túrunamu Yus turamajnia nu iyumi” tiarmiayi.

¹⁶ Nuna tiar wárik wearmiayi. Tura Marincha Jusenchá wáinkiarumiayi. Tura uchincha waaka yurumtainiam tepan wáinkiarumiayi. ¹⁷ Wear nuna wáinkiar, nayaimpinmaya suntar uchi túrunamurin timia nuna etserkarmiayi.

¹⁸ Tura murikiun wáinin tiarmia nuna antukaruka ti enentáimtusarmiayi.

¹⁹ Túrasha Marikia ashí túrunamia nuna ni enentájjiainkia enentáimtu pujumiayi. ²⁰ Tura murikiun wáinniuka antukarmia nuna enentáimtusar, tura ísarmia nunasha enentáimtusar “Nayaimpinmaya suntar ujatmakmajnia tímiatrusan túrunayi” tiarmiayi. Tuma ásar Yusa náarin shiir awajsar kantampruawar waketkiarmiayi.

Uchin Jesusan Yusa Uunt Jeen itiarmiania nu

²¹ Tura uchi akiiniamu uchu tsawant jeamtai, ni túrutairin túrin ásar, ni shu-nichiri nuapen tsupirkarmiayi. Túrawar Marí ajapratsain nayaimpinmaya suntar tímia nútiksan “Jesus” anaikiarmiayi. ²² Tura Muisais akiiniatniunam akupkamia núnisan, tsawantri jeamtai, Yusa Uunt Jeen Jerusarénum uchin Yus iiktustai tusar júkiarmiayi. ²³ Kame Yus-Papinium ju aarma awai:

“Ashí uchi iwiairi áishman akiinkiuṅka Yusna átatui.” ²⁴ Tuma asamtai, Marí Yusa Uunt Jeen wáitsuk pujamu wayatniuri jeamtai, uchin Yus iistí tusa Yusa Uunt Jeen Jerusarénum pujana nuṅ itarmiayi. Tura yampitsan jímiaran súsarmiayi. Muisáis akupkamun umiiniak nuna túrawarmiayi.

²⁵ Nu túmai Semeún naartin áishman Jerusarénum pujumiayi. Semeúnsha Yusa Wakaní pujurma asa péṅker áishmankauyayi. Yusan nekas enentáimtiniuyayi. Yusa anaikiamurijjai Israer-shuar ankant ajastin jeati tusa nákauyayi. ²⁶ “Winia anaikiamur KRISTU tutai wáintsuk jákashtatme” uunt Yusa Wakaní tu jintintiamiayi. ²⁷ Nú Semeún Yusa Wakani “wetá” tutai, Yusa Uunt Jeen wémiayi. Tura nú tsawantai Muisáis tímia núnisan umirkatai tusar Marisha Jusesha uchin Jesusan Yusa Uunt Jeen itariarmiayi. ²⁸ Itariarmatai Semeún uchin jusa miniakas Yusan áujuk juṅa tímiayi:

²⁹ “Yamaikia, Uunta, Amiin wi jeatin ankant atí. Turutmiamna nu ímiatrusmek umikiume. ³⁰⁻³¹ Ju Uchi ashí aents uwemtikrartá tusam susamna nuna yamá imia winia jiiirujai wáinkiajai. ³² Israer-shuarcha ainia nu tsáapninium wekasarat tusa akuptukmaiti ju Uchi. Tura Israer-shuar Áminiuram ájinia nuna ashí aents shiir enentáimtikrartí tusam ju Uchi akuptukmaiti. Nuna wáinkian shiir enentáimsan jákatniuitjai.”

³³ Tura Semeún Uchiniun tu chicharkui Jusesha Jesusa nukurísha ti enentáimprarmiayi. ³⁴ Semeúnsha chichaak “Yus shiir enentáimturmasartí” nin tímiayi. Nuyasha Marin chicharuk tímiayi “Nekaata. Ju Uchin Israer-shuartisha untsurí nakitrar iniarartatji. Tura chíkich Israer-shuartikia ju Uchin shiir enentáimtusar ti wararsartatji. Tura Uchiram Yusa kakarmarin ti paant iniakmastatui. Tuma ain untsurí Aun yajauch chichariartatui. ³⁵ Nujai shuar ni enentáin warinia enentáimia nu, paant átatui. Maaṅ, ashí nu túmakui, ijiumua núnismek ame enentáimin ti wáitsattame, Mariya.” Tu chichasmiayi Semeún.

³⁶ Nuwasha Ana naartin nuṅ Yusa Uunt Jeen pujumiayi. Niisha Yusan etserniuyayi. Ni aparísha Panuíruyayi tura Aser shuarauyayi nu nuwa. Niisha ti úuntchiyayi. Niisha yama nuatnaikiamujai siati uwi ni áishrijjai tsaniṅ pujusarmiayi. ³⁷ Tura wajemamiayi. Tura uchenta kuaru uwi takakuyayi. Tura ninṅka Yusa Uunt Jeeniá jíintsuk káshisha tsawaisha tuke Yusan áujniuyayi. Tura yurumsuk Yusan áujniuyayi. ³⁸ Semeún tuasua amikmatai Anasha taa, Uchin wáiniak Yusan yuminsamiayi. Tura Jerusarénum Yus uwemtikram-pratai tusa nákarmia nuna ájukṅka uchin áujmat wémiayi.

Nasarénum waketkiarmiania nu

³⁹ Nuyá Yus tímia nuna ashí túrawar amikiar Kariréa nunkanam, kame nii pujumia nú peprunam Nasarénum Jusesha Marisha Uchisha waketkiarmiayi. ⁴⁰ Uchi Jesus tsakaki, kakaram ajaki tura nú nankaamas nekaki wémiayi. Tura Yus Nin ti shiir awajsamiayi.

Jesus Yusa Uunt Jeen túrunamuri

⁴¹ Jusesha, Jesusa nukurísha tuke uwitin paskua námper jeakui Jerusarénum weu ármiayi. ⁴² Ni túrutairi túruiniak, Jerusarénum weak Jesusan tuse uwí jeamtai júkiarmiayi. ⁴³ Námper amuukamtai ni nukurísha Jusesha nékachmanum Jesuska Jerusarénum juákmiayi. ⁴⁴ Marisha Jusesha “wí shuarjaj winiawai” tusa, núnaka eatsuk chikichik tsawant wekasarmiayi. Nuyá wáinkiataj tukamá, ni shuariin tura ni nékamunam eakarsha, ⁴⁵ wáinkiacharmiayi. Nuinkia Jerusarénum ataksha waketrukiarmiayi, eaktai tusar. ⁴⁶ Tura menaintiú tsawant eakar Yusa Uunt Jeen Yus akupkamun jintinnian anturak anintrú pujan wáinkiararmiayi. ⁴⁷ Tura nuj ashí Jesusan anturkarmiania nu, niisha ti nékakui tura áimtanash ti pénger áimkiui, ti enentáimturarmiayi. ⁴⁸ Ni aparísha nukurísha tumáa pujan wáinkiar, ti enentáimprarmiayi. Tura ni nukurí chichaak tímiayi “Uchiru, ¿ausha urukamtai itiurchat enentáimtikrurmam? Ame apasha wisha urukayik tusar ti eakjame” tímiayi.

⁴⁹ Tutai Jesus tímiayi “¿Urukamtai eattrum? Winia Aparnan túratniuitjiana nuka nékatsrumek” tímiayi.

⁵⁰ Tura timia núnaka penké nekaacharmiayi. ⁵¹ Nuyá Jesus niijiai Nasarénum waketkimiai. Ninkia tuke umiriarmiayi. Ashí nu túrunamun Marikia tuke enentáimtu pujumiayi. ⁵² Jesuska tsakaki, tura nekaki wémiayi. Yussha tura aencha Nin shiir enentáimtiarmiayi.

3

Imiakratin Juanka etserkamuri

(Mateu 3.1-12; Márkus 1.1-8; Juan 1.19-28)

¹ Tipiriu uunt akupin pujamu kinse uwí jeamtai, Jutía nunkanam Punseu Piratu akupin pujumiayi. Tura Kariréa nunkanam Erutis akupin pujumiayi. Itiurea nunkanmasha Trakuniti nunkanmasha ni yachi Jiripi akupin pujumiayi. Tura Apirinia nunkanam Risanias akupin pujumiayi. ² Tura nu uwitin Anassha Kaipíassha Israer-patri uuntri pujuarmiayi. Nu uwitin Sakaríasa uchirí Juan atsamunam pujan Yúsaiya chichaman antukmiayi. ³ Nuyá Jurtañ entsanam supichik matsamarma nuna Juan wekaatusar juna tímiayi “Winia tunaarun Yus tsankurturat tusarum, enentai yapajjárum imiantiarum.” Tu ujakmiayi. ⁴ Nu ujakman Isayas yaunchu juna áarmiayi:

Atsamunam wekaana nu untsunmun ántuiniawai. Nii untsunuk juna tawai: Atumí enentái Uunta jinti iwiarturtarum; naka awajsatarum. ⁵ Jápaaka ainia nusha áimkiamu arti. Naint ainia nusha paka awajsamu arti. Jintia apijiaru ainia nusha naka jiikmia arti. Tura pujutrin ainia nusha métekrak paka awajsamu arti. ⁶ Túrunamtai ashí nunkanmaya aents Yúsaiya uwempratin aan nekaawartatui.

⁷ Untsurí aents imiatit tusar tariarmia nuna Juan chicharainiak tímiayi “Napia áaniutirmincha, ti asutniátin jeatemáttana nuyá uwempratarum tusa ¿ya ujatmakuram? tímiayi. ⁸ “Iikia Apraám weeitji, tuma asakrin Yus shiir enentáimturmají” tu enentáimtumasairap. Antsu enentáim yapajjámuutkiuinikia pénger wekaamurmijiai paant iniakmatarum. Warí, Yus wakerakka, ju kayan Apraáma shuarin páchitsuk najankainti, tímiayi. ⁹ Aneartarum. Numi

ajaktinian kampuwarin jacha atuttsamuiti. Numi péñker nereatsna nuka ajakar jinium apeamu ártatui” tímiayi.

¹⁰ Tutai aentska enentáimprar “¿Nuiñkia itiurkatjik?” tiarmiayi.

¹¹ Tutai Juan tímiayi “Jimiará pushin takakna nu, takaktsuna nuna chikichan súsatniuiti. Yurumkan takakna nusha takaktsuna nuna ajamsatniuiti” tímiayi.

¹² Uunt akupniu kuítrín juu armia nú shuar imiantiaj tusar Juánkan weriar aniasarmiayi. “Uunta, ¿iisha warí itiurkatjik?” tiarmiayi.

¹³ Tutai Juan tímiayi “Kuit uunt akupin tana nu iniankasrum achikiairap.”

¹⁴ Suntarsha aniasarmiayi “Uunta, ¿iisha warí itiurkatjik?”

Juañsha tímiayi “Ame kakarmarmijiaj chikichna jurukip. Tura nin tsanumpruraip. Tura uunt akupin akirmanana nújain warasta” tímiayi.

¹⁵ “Ju Juan Yusa anaikiamurinchuashit” tu enentáimsar paant nekaataitsar náarmiayi.

¹⁶ Tumaj Juan tímiayi “Wikia aya ayashmin entsanam imiajrume. Tura wijiaj nankaamas ana nu tátatui. Ni sapatrj jinkiamurinkisha atitrachminiaitjai. Niisha taa, imiantinia áanis tura jíiya áanis Yusa Wakanin enketramprattarme. ¹⁷ Shuar aruusan awajtia núnisan, nusha yajauch ana nuna ajapa aya péñkernak júuktatui. Neren ikiustatui tura yajauchinkia ji tuke kajinchatainiam apeattawai” tímiayi.

¹⁸ Juan nu arant shiir chichaman áentsun ti núkap ujakarmiayi. ¹⁹ Tura nuyasha akupin Erutisan chicharkamiayi. Ni yachj Jiripi nuarín Jirutiasan kasarak nuatkui tura chíkich yajauchincha túrakui chicharkamiayi. ²⁰ Tura Erutis núnaka ántutsuk chíkich yajauchin túramiayi. Juánkan achik sepunam enkeamiayi.

Jesusa imianmiari

(Mateu 3.13-17; Márkus 1.9-11)

²¹ Nu túruntsain, Juañsha ashí nú nuñkanmaya áentsun imiak pujurainaj Jessusha imianmiayi. Niisha Yusan áujuk pujaj nayaimpisha uranmiayi. ²² Tura Yusa Wakanj yámpits najanar paant tarurmiayi. Tura Yus nayaimpinmaya chicharuk “Amek winia aneamur Uchiruitme; Ámin ti wararjame” tímiayi.

Jesukrístu shuari

(Mateu 1.1-17)

²³ Jesus trainta (30) uwí takaku asa ni takatrín nankamamiayi. “Jusé uchirínti” tiniu armiayi. Jusésha Iría uchiríyayi. ²⁴ Irísha Matata uchiríyayi; Matat Riwí uchiríyayi; Riwí Mirkía uchiríyayi; Mirki Jana uchiríyayi. Jana Jusé uchiríyayi; ²⁵ Jusé Matatíasa uchiríyayi; Matatías Amusa uchiríyayi; Amus Najuma uchiríyayi; Najum Esrí uchiríyayi; Esri Nakaia uchiríyayi; ²⁶ Nakai Maata uchiríyayi; Maat Matatíasa uchiríyayi; Matatías Semái uchiríyayi; Semái Jusé uchiríyayi; Jusé Jutáa uchiríyayi; ²⁷ Jutá Juana uchiríyayi; Juana Resa uchiríyayi; Resa Surupapira uchiríyayi; Surupapir Saratiira uchiríyayi; Saratiir Nerí uchiríyayi; ²⁸ Neri Mirkí uchiríyayi; Mirki Atí uchiríyayi; Atí Kusama uchiríyayi; Kusam Irmutama uchiríyayi; Irmutam Ira uchiríyayi; ²⁹ Ir Jusué uchiríyayi; Jusué Irieséra uchiríyayi; Iriesér Jurema uchiríyayi; Jurem Matata uchiríyayi; ³⁰ Matat Riwi uchiríyayi; Riwí Semeúnka uchiríyayi; Semeún Jutáa uchiríyayi; Jutá Jusé uchiríyayi; Jusé Junanka uchiríyayi; Juañ Iriakímia uchiríyayi; ³¹ Iriakím Mirea uchiríyayi; Mirea Mainiánka uchiríyayi; Mainián Matata uchiríyayi; Matata Natanka uchiríyayi; ³² Natan Tawitia uchiríyayi; Tawit Isaí uchiríyayi; Isaí Upitia uchiríyayi; Upit Puusa uchiríyayi; Puus Saramúnka uchiríyayi; Saramún

Naasun̄ka uchiríyayi; ³³ Naasun̄ Aminiatapa uchiríyayi; Aminiatap Arama uchiríyayi; Aram Esruma uchiríyayi; Esrum Paresa uchiríyayi; Páres Jutáa uchiríyayi; ³⁴ Jutá Jakupa uchiríyayi; Jakup Isaka uchiríyayi; Isak Apraáma uchiríyayi; Apraám Tarea uchiríyayi; Taré Nakura uchiríyayi; ³⁵ Nakur Seruka uchiríyayi; Seruk Rakaua uchiríyayi; Rakau Pirikia uchiríyayi; Pirik Epera uchiríyayi; Eper Sará uchiríyayi; ³⁶ Sara Kainián̄ka uchiríyayi; Kainián̄ Arpaksata uchiríyayi; Arpaksat Sema uchiríyayi; Sem Nuaia uchiríyayi; Nuai Ramikia uchiríyayi; ³⁷ Ramik Matusarín̄kia uchiríyayi; Matusarín̄ Enuka uchiríyayi; Enuk Jaritia uchiríyayi; Jarit Maararíira uchiríyayi; Maararíir Kainiañ̄ka uchiríyayi; ³⁸ Kainiañ̄ Enusa uchiríyayi; Enus Seta uchiríyayi; Set Atañ̄ka uchiríyayi; tura Atañ̄ Yus najanamuyayi.

4

Jesusa nekapsamuri

(Mateu 4.1-11; Márkus 1.12-13)

¹ Jesusa enentáin̄ Yusa Wakaní pimiutkamiayi. Jesussha Jurtañ̄ entsanmayá waketkimtai Yusa Wakaní aents atsamunam jukimiayi. ² Tura nuísha kuarenta tsawant pujusmiayi. Tura íwianch Nin tunaanum ajuaraintiajtai tusa pujurmiayi. Nu kuarenta tsawantin̄ Jesus yurumtsuk pujá asa ti tsukammiayi. ³ Nuín̄kia íwianch chicharuk “Amesha nekas Yusa Uchirín̄kiumka ju kaya apatuk najanata” tímiayi.

⁴ Tutai Jesus tímiayi “Yus-Papí tawai: “Aya apatkujain̄ shuar iwiaaku pujuschamniaiti. Antsu ashí Yus-Chicham tana nujai nekas iwiaaku pujusminiaiti,” tawai” tímiayi.

⁵ Tura nuyá íwianch naint yakí wájakmanum jukí, ashí nun̄ka ainia nuna ju chichamaik iniaktusmiayi. ⁶⁻⁷ Tura chicharuk tímiayi “Ashí ju nun̄ka wáinmena nu wíniaiti. Tura wi wakerajna nú shuaran súsatniuitjai. Tuma asamtai tikishmatrurakminkia ju nun̄kanam ashí akupkatniun susattajme. Tura nuj ni warirj̄ ainia nusha áminiu átatui” tímiayi.

⁸ Tutai Jesus tímiayi “Yus-Papí tawai: “Aya Niñki Yus ame Úuntrum tikishmatram enentáimtustiniaitme.” Tau asamtai, werumta, iwianchi” tímiayi.

⁹ Ataksha íwianch Jesusan Jerusarén̄ péprunam jukimiayi. Tura Yusa Uunt Jee yakiini iwiak tímiayi: ¹⁰ “Yus-Papí tatsuk:

“Yuska ni suntarj̄n̄ wáinkiatá tusa akupturmaktatui. ¹¹ Kayanam ajintrañ̄ tusa wen̄kurmaktatui.” Tuma asamtai nekas Yusa Uchirín̄kiumka juyá akaikim iniaata” tímiayi.

¹² Tutai Jesus áimiuk tímiayi “Yus-Papí junasha tawai: Yus ame Úuntrum nekapsataj tiip.”

¹³ Tuma asamtai íwianch pen̄ké tujintiak ishichik tsawant Jesusan ini-aisamiayi.

Kariréa nun̄kanam Jesus ni takatrj̄n̄ nan̄kamamiania nu

(Mateu 4.12-17; Márkus 1.14-15)

¹⁴ Jesus ni enentáin̄ Yusa Wakaní kakarmari pimiutkamu ajas Kariréa nun̄kanam waketkimiayi. Nu nun̄kanam nan̄kaamantu túramurj̄n̄ áujmatiarimiayi. ¹⁵ Nu nun̄kanam ashí péprunam Israer-shuar iruntai jeā armia nuj unuiniarmiayi. Tura anturkarmia nuka ni náarj̄n̄ shiir awajsarmiayi.

Jesus Nasarétnum pujumiania nu

(Mateu 13.53-58; Márkus 6.1-6)

¹⁶ Ni tsakarmarijn Nasarétnum Jesus wémiayi. Tura Israer-shuar ayampratin tsawantin iruntai jeanam wayamiayi, tuke turin asa. Tura wayá Yus-Papin áujсатаj tusa wajakmiayi. ¹⁷ Nuñkia Yúsnan etserin Isayasa áarmarijn súarmiayi. Nuna urak, nuj juna áarman wáinkiamiayi:

¹⁸ Yusa Wakaní winí pujurtawai. Shuar warainiachun shiir chichaman ujaktinian anaitiukuiti. Kúntuts enentáimiar wake mesek pujuinian tsuártinian akuptukuiti. Tura jii kusuruncha ímtiktinian, tura ya-jauch awajsamu ainia nuna péñker awajsatniuncha, ¹⁹ tura Uunt Yus, shuáran yaíntin tsawantri jeán etserkatniuncha akuptukuiti.

²⁰ Nu áarman aujsua amik papin nukukmiayi. Tura iruntai jeanam yáimin pujan susa iniais Niñkia etserkataj tusa pujusmiayi. Tura ashí shuar pujuarmia nu émamkes ii pujuarmiayi. ²¹ Jesussha chicharuk tímiayi “Yus-Chicham yamá antukurmena nu yamá tsawantin túrunayi.”

²² Jesusan ashí péñker áujmatiarimiayi. Tura Jesus ti shiir chichaakui ti enentáimprar “Juka Jusé uchirinchukait” tiarmiayi. ²³ Tu enentáimiainiakui, Jesus chicharuk “Atumsha shuar tuke tuinia núnisrumek, “tsuákratniuitkiumka amek tsuámarta,” turuttiatrume. Kapernáum péprunam aentsti túrachmin túramamna núnismek juisha túrata tusarum nu turuttiatrume. ²⁴ Túrasha nekas tájarme, Yúsnan etserniun ni nuñkenkikia nii tana nuna anturainiatsui. ²⁵ Nuyasha tájarme, Irías pujumia nú tsawantin, menaintiú uwí nankaamas yumí yutukcha asamtai ashí Israer núnkanam ti tsuka amia nuj ti untsurí waje irunmiayi. ²⁶ Tuma aiñ nu wajen yaínti tusa Yus Iríasan akuptukchamiayi. Antsu chíkich nuñkanmaya wajen Sarepta péprunam pujumia nuna yaínti tusa akuptukmiayi. Sarepta pepru Sitiún péprunam tíjiuch pujawai. ²⁷ Núnisan ii nuñkesha Iriséu pujumia nu tsawantin ti untsurí tunamaru iruniarmiayi. Tura núnaka tsuárcharmiayi. Antsu chíkich nuñka, Sírianmaya Naaman kan tsuármiai” tímiayi Jesus.

²⁸ Israer-shuarsha iruntai jeen pujuarmia nu, nuna antukar ti kajer karmiayi. ²⁹ Tura wajakkiar Jesusan jiiiki péprunmaya akupkarmiayi. Tura pepru amia nuj naint yakí nan katkamunam, nuyá akaki ajuatai tusar júkiarmiayi. ³⁰ Túrasha Jesuska irunar matsatainiamunman etempraktak jiinki wémiayi.

Iwianchrukun Jesus tsuármiania nu (Márkus 1.21-28)

³¹ Nuyá Jesus Kariréa nuñkanam Kapernáum pepru amia nuj wémiayi. Tura Israer-shuara ayampratin tsawantriin tuke etserki wémiayi. ³² Yusa kakarmarijn takaku asa nujai etserkamiayi. Tuma asamtai “Yusa kakarmarijiaj unuítiamtsujik” tiar ti enentáimprarmiayi.

³³ Chíkich tsawantaj áishman iwianchruku Israer-shuar iruntai jeanam pujumia nu untsumuk tímiayi, ³⁴ “Inikiartusta. Iikia Áminkia pachistin nakitijai. ¿Warí, incha amukratkataj tusam táchamek? Wikia nékajme. Ámeka ti penker Tunaarincha núitme” tímiayi.

³⁵ Tutai Jesus iwianchin kakantar chicharuk “Takamatsata. Ju áishman ikiuktia” tímiayi.

Tutai nu chichamaik íwianch áishmannumia jiinki weak nunká ajuant ikiukmiayi. Túrasha nekas yajauch awajtsuk ikiukmiayi.

³⁶ Ashí pujuarmiania nu ti enentáimiar mai tunai ajarmiayi. “¿Jusha warí chichamait? Ju áishman Yusa kakarmarijiaj iwianchin jiiiki awematsuk” tiarmiayi.

³⁷ Tura ashí nú nuñkanam Jesusa túramuriñ áujmatiarimiayi.

Semuñ Pitru tsatsarín Jesus tsuármiania nu
(Mateu 8.14-15; Márkus 1.29-31)

³⁸ Jesussha Israer-shuara iruntai jeeniā jiinki Semuñka jeen wémiayi. Semuñka tsatsarī tsuer ti jáamiayi. Ti jaakui Jesusan “tsuárturtá” tiarmiayi. ³⁹ Jesussha jaa tepan tsuntsumprua tsuemun “michatrata” tímiayi. Tutai nú chichamaik nuwasha michatramiayi. Nú chichamaik nantaki nincha ayurawarmiayi.

Untsurí jaan Jesus tsuármiania nu
(Mateu 8.16-17; Márkus 1.32-34)

⁴⁰ Etsa akaikin āi ni shuarī náñkamas sunkurjaī jaarmia nuna Jesusan ikiaatkarmiayi. Jesussha jáinian chikichkiniak chikichkiniak uwejējaī antiñkiar tsuárarmiayi. ⁴¹ Ti untsurí iwianchrúku armia nunasha iwianchrin̄ j̄irkiarmiayi. J̄inkiar íwianchkia untsumainiak “Ámeka Yusa Uchirínme” Jesusan tiarmiayi. Tura niisha “Jesuska Yusa anaikiamurinti” tu nékainiakui Jesus kakantar chicharak itiatmamtikarmiayi.

Kariréa nuñkanam Jesus etserkamiania nu
(Márkus 1.35-39)

⁴² Kashin káshik tsawaak̄ Jesus péprunmayā jiinki atsamunam Niñki wémiayi. Tura shuarsha ēakiar ni pujamunam jeariarmiayi. Tura iij̄jaī tuke pujusat tusar emetataitsar wakeriarmiayi. ⁴³ Túmain̄ Jesus tímiayi “Yus ii enentáin̄ akupkatajtsa wakera nú shiir chichaman ch̄ikich péprunam matsatainia nunasha ujaktinaītjai. Nu túrata tusa akupkamuitjai” tímiayi. ⁴⁴ Tuma asantai Kariréa nuñkanam Israer-shuar iruntai jeñam Jesus tuke etserki wémiayi.

5

Namakan ti untsurín achikiarmiania nu
(Mateu 4.18-22; Márkus 1.16-20)

¹ Ch̄ikich tsawantaī Jesus Jinisarít antumiankā tutainium káanmatkarī pujāi ti untsurí shuar, Yusa chichamen̄ antuktaī tusar wakeruiniak Jesusaī káunkarmiayi. Antuktaī tusar wakeruiniak kāe ajattsarmiayi. ² Tura j̄imiará kanun antumiankan̄ káanmatkarīn̄ tepan wáinkarmiayi. Ni nérenniur̄n̄kia j̄inkiar ni nekarin̄ nijiá pujuinia asantai kánuka an̄kant ármiayi. ³ Tuma asantai Jesus Semuñka kanur̄in̄ enkempramiayi. Tura Semuñkan̄ chicharuk “Ishichik ajapén juruktía” tímiayi. Nuñkia kanunam en̄kemas áentsun káanmatkanam pujuinian unuiniamiayi. ⁴ Unuinasua amik Semuñkan̄ chicharuk “Kanu kunanam jukim neka āi ajunkatarum” tímiayi.

⁵ Tutai Semuñ tímiayi “Túrasha, Uuntá, káshisha tuke aju-junkuar tsawar̄ji. Túrasha pen̄ké achikchaji. Kame áankisha Ame támajaī ajunkatjai” tímiayi.

⁶ Tura ajunkar namakan ti untsurín achikiarmiayi. Túram nekasha jaanaki wémiayi. ⁷ Tuma asantai ni írutkamur̄in̄ ch̄ikich kanunam pujuinian uwejējaī “winitia, yáintkiamniuram” tusar untsukarmiayi. Niisha táarmiayi. Túrawar j̄imiará kanunam métej awajsarmiayi. Tura kanusha init wayastatuk ajamiayi. ⁸ Nuna túramtai Semuñ Pítiur Jesusan tikishmatar tímiayi “Uuntá, wikia ti tunaitjai. ¿Wíj̄iāisha itiurak pujustam?” ⁹ Semuñsha ni írutkamur̄ij̄jaī namakan timiá untsurín wáinkiar ashamkarmiayi. Tuma asa Semuñsha nuní tímiayi. ¹⁰ Tura Sepetéu uchir̄i Jakupusha Juansha Semuñjaī pujuarmia nusha ashamkarmiayi. Tura Jesus Semuñkan̄ tímiayi “Ashamkaip. Yamaikia namaka-achinia áintsamek aents-ēau ajastatme.” ¹¹ Nuyasha kanur̄in̄ kukar j̄úkiar, ashí takakmar̄incha ikiukiar Jesusan nemarki wearmiayi.

*Tunamaru áishmankan Jesus tsuármiania nu
(Mateu 8.1-4; Márkus 1.40-45)*

¹² Ukunam Jesus chíkich péprunam pujaj tunamaru áishman taa Jesusan wáiniak tikishmatar nunká shushuma pankái Jesusan tímiayi “Uuntá, wakerutakmeka páchitsuk tsuáramniaitme.”

¹³ Nuna tutai Jesus antin tímiayi “Wakerajai. Tsuaajme.” Tura nú chichamaik tunamarusha péñker ajasmiayi. ¹⁴ Túrasha Jesus chicharuk “Ámeká nu etserkaip, tímiayi. Antsu Israer-shuar Patrij werim ame péñker ajasmanum Muisáis akupkama núnismek susata. Nujaj ashí shuar ame péñker ajasmarmin nekaawartatui” tímiayi.

¹⁵ Tura Jesusa túramurí ti etsernamiayi. Túmakui untsurí aents anturkataj tusar káutkarmiayi. Tura ni sunkurincha tsuámartaj tusar káutiarmiayi.

¹⁶ Núnisan Jesuska aents atsuiniamunam we ni Aparin áujmiayi.

*Emearun Jesus tsuármiania nu
(Mateu 9.1-8; Márkus 2.1-12)*

¹⁷ Chíkich tsawantai Jesus unuiniak pujaj Pariséu aents tura Israer-shuara jintinniurisha Kariréa péprunmayasha, Jutía péprunmayasha tura Jerusarennumiasha káunkarmia nu antúu pujuarmiayi. Jaa tsuártinian Yusa kakarmarin takakuyayi Jesus. ¹⁸ Nuinkia emearun tampumpua kuaru shuar itiararmiayi. Jesus pujamunam init awayattsar wakeriarmiayi.

¹⁹ Tura shuar ti untsurí piaku asamtai wayamnia atsumiayi. Túmaitkui yakiini wear jean urakar, aents kaé ajas matsatmanum Jesus pujamunam emearun tampunam nená itiararmiayi. ²⁰ Nin itiarmania nu, Jesus Yusa kakarmarin takakui, tú enentáimtamun Jesus nekáa emearun tímiayi “Ame tunaarum tsankuramuitme.”

²¹ Nuinkia Israer-shuara jintinniurisha, Pariséusha ni enentáin enentáimsar “¿Jusha yait Yúsa náarin yajauch awajtin? Warí, aya Yúsak tunaan tsankurachminkiait” tu enentáimsarmiayi.

²² Tura Jesus ni enentáimsamurin nekáa tímiayi “¿Urukamtai tú enentáimprarum átum? ²³ Nuinkia ¿warí imiá yúpichuchit, tsuártiniak, ni tunaari tsankuratniuk? ²⁴ Wats, Aents Ajasu tutai Wisha tunaan tsankuratniun Yusa kakarmarin takakjai. Jujaj nekaatarum tusan wats itiurchat tárugna nuna túrattajai.” Nuyá emearun chicharuk tímiayi “Amesha wajakim, tampuram achikiam ame jeemijn wetá.”

²⁵ Nú chichamaik emearu niisha íimiainiamunman tampurin achik wajaki ni jeen Yúsan wararki wémiayi. ²⁶ Túmakui ashí shuar ti enentáimprar Yusa náarin shiir awajsarmiayi. Tura ashamainiak “aentsti tujinkiamu yamá wáinkiaji” tiarmiayi.

*Riwin Jesus untsukmiania nu
(Mateu 9.9-13; Márkus 2.13-17)*

²⁷ Ukunam Jesus wekas akupniu kuítrin-juu, naari Riwi, ni chíkich naari Mateu, akupin akitiai jeanam pujan wáinkiamiayi. Wáiniak “nemartusta” tímiayi. ²⁸ Tutai Riwi wajaki takakmarinkia ikiuak Jesusan nemarsamiayi.

²⁹ Nuyá ukunam Riwi namperan Jesusan najatamiayi. Tura untsurí akupniu kuítrin-juu tura chíkich shuarsha káunkar misanam pujuarmiayi. ³⁰ Tura Pariséusha Israer-shuara jintinniurisha Jesusan tsanumpruniak Jesusa unuiniamurin tiarmiayi “¿Maaj, urukamtai atumsha akupniu kuítrin-juu ainia nújajisha tura chíkich yajauch shuarjajisha iruntrarum yurumprum?”

³¹ Tutai Jesus áimkiamiayi “Shuar jaachu péñker ainiana nu ¿tsuákratniun atsumainiawak? Antsu jaa ainia nu tsuákratniun atsumainiawai. ³² “Wikia

pénkeraitjai” tuinia nuna untsuktajtsan táchaitjai. Antsu yajauch shuar ni enentáin yapajjá Winia ajasat tusan untsuajai” tímiayi.

*Yurumtsuk Yus áujsatniun Jesusan aniasarmiania nu
(Mateu 9.14-17; Márkus 2.18-22)*

³³ Nuyá Jesusan aníak tiarmiayi “Juan̄ka unuiniamur̄isha, Pariséu unuiniamur̄isha yurumtsuk Yúsan áujainiatsuk. Tura ame unuiniamurmeka ¿urukamtai ijarma Yúsan áujainiatsu?” tiarmiayi.

³⁴ Tutai Jesus tímiayi “Nuatma nampernum, ¿ipiaamu ainia nu ijiarmamniakait, yamáinuatu pujai? ³⁵ Atsá. Wats Wisha ukunam junaktiatjai; nuin̄kia ijiarmatin átatuí” tímiayi.

³⁶ Tura junasha nujai métek-taku unuiniamiayi: “¿Yamaram pushí tsupikiar nujai arut pushiniam anujtukuminkiait? Nu túramka yamaram pushí yajauch ajasaintiui; túrasha shiir anujkamu arut pushijiai mai metek yamaram wáinkiachminiaiiti. ³⁷ Núnisan̄ nijiamanch yamáinawamu nuap najanamunam arutnum yaraachminiaiiti. Túramka nijiamanch kariak ijiakratniuiti; túmak nijiamanchisha nuap najanamusha mai metek men̄kainiawai. ³⁸ Tuma asamtai nijiamanch yamáinawamu yamaram nuap najanamunam yaraatniuiti. Nu túramka mai metek péñker átiniiaiiti. ³⁹ Yaunchu nawamu úmana nuka yamarman nakitrattui. “Yaunchu nawamu imiá pen̄keraiti” tiártatuí” tímiayi Jesus.

6

*Ayampratin tsawantai trikiu neren achikiarmiania nu
(Mateu 12.1-8; Márkus 2.23-28)*

¹ Ayampratin tsawantai Jesussha unuiniamur̄ijiai araamunam wekasar, unuiniamur̄isha trikiu neren majurkutak wekainiarmiayi; tura tishisar neren yuawarmiayi. ² Nuna túruiniakui Pariséu tiarmiayi “Maaj, atumsha ayampratin tsawantai takaschatniua nuí, ¿urukamtai takaarum?”

³ Takui Jesus ayak tímiayi “Yaunchu uunt akupin Tawitcha tura nemarniusha tsukamainiak túrawarmia nu ántichukaitrum. ⁴ Tawit Yusa Jeeñ wayá, Yus iniaktusma tantan yuámiayi; tura nemarniuncha ajamsamiayi. Tura nu tantancha aya Israer-shuara Pátrir̄i yúatin ármiayi. Tuma ain̄ Tawitcha yajauchin túrutsuk achikmiayi, tímiayi. ⁵ Wisha Aents Ajasuitkiun ayampratin tsawantan Nérenniur̄intjai” tímiayi Jesus.

*Shuara uweje jakaan Jesus tsuármiania nu
(Mateu 12.9-14; Márkus 3.1-6)*

⁶ Chíkich ayampratin tsawantai Israer-shuar iruntai jeanam Jesus wayá unuiniartasa nan̄kamamiayi. Nuí shuar uweje untsuuria nu jakaa pujumiayi. ⁷ Tura Israer-shuara jintinniur̄isha, Pariséusha Jesusan “yajauch túrayi” titiai tusar wakeruiniak, “ju ayampratin tsawantai nu shuaran tsuartimpiash” tusar ii pujuarmiayi. ⁸ Túrasha Jesuska ni enentáimmar̄in nekariarmiayi. Túmayat uweje jakaan chicharuk “Juí ajapén wajasta” tímiayi. Tutai áishman̄ ajapén wajasmiai. ⁹ Nuin̄kia iruniarmiania nuna Jesus tímiayi “Enentáimpratarum. Ayampratin tsawantai yajauch túratin, péñker túratniujai ¿tuá péñkerait? ¿Uwentikratin, máatniujai sha tuá péñkerait?” tímiayi. ¹⁰ Nuyá téntakarmia nuna iis áishman̄kan tímiayi “Uwejem takuitia.” Áishman̄sha uwejen takuimtai nú chichamaik péñker ajasmiai. ¹¹ Tura chíkichkia ti kajerarmiai. Túrawar “Jesus warí itiurkamniakit” tusar aniniaismiai.

*Tuse unuiniamun Jesus anaikiamiania nu
(Mateu 10.1-4; Márkus 3.13-19)*

¹² Nuyá Jesus Yúsan áuj̄sataj tusa náinnium wakamiayi. Tura nu kashi Yúsan au-auj̄kua tsawarmiayi. ¹³ Tsawarmatai unuiniamur̄in ikiankar tuse anaikiamiayi. “Winia akatramuruitrume” tímiayi. ¹⁴ Ju ármiayi: Emka, Semuñ chíkich naar̄i Pítiur apuj̄tusmia nu; tura nuyá ni yach̄i Antres, Jakupusha, Juañsha, Jiripisha, Parturumísha, ¹⁵ Mateusha, Tumassha, Arpeu uchir̄i Jakupusha, Ásump Semuñsha, ¹⁶ Jakupu yach̄i Jútassha, tura Jútas Iskariúti Jesusan ukunam surukmia nu. Nu tuse achikma ármiayi.

Untsur̄i shuaran Jesus yáin̄kiarmiania nu
(Mateu 4.23-25)

¹⁷ Niīj̄ai Jesus náinniumīa pakanam taawarmiayi. Nūi puj̄usarmiayi. Nūisha untsur̄i unuiniamur̄isha, tura Jutía nun̄kanmaya, tura Jerusaren̄numīa tura nayaantsanam ayamach Tiru, tura Setuñ péprunmaya ti untsur̄i aents antuktait̄sar pujuarmiayi. Jesus tsuarati tusar káunkarmiayi. ¹⁸ Iwianchrukusha tsuámararmiayi. ¹⁹ Jesus tsuártinian tuj̄inkiachu asamtai ashi shuar antiñtaj tusar wakeriarmiayi.

Náinnium Jesus etserkamu
(Mateu 5.1-12)

²⁰ Ni unuiniamur̄in Jesus iis jūna tímiayi: “‘Yusan atsumajai’ tár̄umna nu, Yus akupeamunam páchitkaiatrume; tuma asamtai warasminiaitrume.’

²¹ ‘Yamái tsukamarmena nu ukunam ejemartatrume. Tuma asamtai warasminiaitrume. Yamái útrumna nu, ukunmañka wishirtatrume. Tuma asamtai warasminiaitrume.’

²² ‘Atumin nakitramprarmatai, ajapramawarmataisha, tura Winia Aents Ajasu tutaiya nú shuar ajasuiti tusar tsanumprutmak katsekkramkarmataisha warasminiaitrume.’

²³ ‘Túramtai nayaimpiniam ti shiir ana nu núkap sunastin átatui tu enentáimsarum ti warastarum. Warí, jū shuara uuntrī yaunchu Yúsnan etserniun nútiksarañ yajauch awajsacharmakia.’

²⁴ ‘Tura kuítrinniutiram atumsha atumí waratairī aya yamaik waintrume. Ukunmañka waraschattarme.’

²⁵ ‘Atsumatsjai, tu enentáimprumna nu, ukunmañka atsumattarme. Nuiñkia waraschattarme. Yamái wishíarmena nu, ukunmañka wáitiakrum úttiatrume. Nuiñkia waraschattarme.’

²⁶ ‘Ashí aents atumin shiir awajtamkurmin aneartarum. Nuj̄ai waraschatniutrume. Warí nuna uuntrī ántar-yusnan etser̄in armia nuna nútiksarañ yaunchu shiir awajsarmiayi.’

Ii nemasrī aneatniun Jesus unuiniamiayi
(Mateu 5.38-48; 7.12)

²⁷ ‘Winia anturtarmena nuna jūna tájarme: Ame nemasrum aneata, nakitramainia nusha shiir awajsata; ²⁸ yajauch chichartamainia nusha shiir enentáimtusarta; katsekkramainia nusha Yus áuj̄tusarta. ²⁹ Ame yapimin ijiutmamtai áatú yapirūisha ijiuti tusam iniaktusta; ame pushirmin jurutramkitiaj tuíniakuisha sákurmencha jukiti tusam iniaisata. ³⁰ Seatmana nu susata, tura áminiun jurutramainiakuisha ataksha awañturkitia tiip. ³¹ Chíkich winia túrutati tusam wakeramna nútiksamek chikichcha túrata.’

³² ‘Iista, aya atumin anenmainia nuke aneakmesha, ¿nusha warí péñkera túrarum? Yajauch shuarsha nuna túrin ániawai. ³³ Tura atumniasha péñker awajtamainia nuke péñker awajkurmesha ¿nusha warí péñkera túrarum? Yajauch shuarsha nuna túrin ániawai. ³⁴ Awañturkimniaiti tu enentáimtarum nuke íkiakrumsha ¿nusha warí péñkera túrarum? Yajauch shuar nuamtak yajauch shuarj̄ai awañturkimniaiti tu enentáimsar ikianainiawai.

³⁵ Tura atumsha nemasrum aneatniuitrume, tura pé_nker túratniuitrume, tura awa_nturkittiwai tu enentáimtsuk ikiastiniaittrume. Túrakrumni_nkia Uunt Yus pé_nker akirmaktatrume; tura ni uchiríntjai tu iniakmastatrume. Yuska, “yumi_nsajme” ticha nunasha tura yajauch shuarnasha shiir awajeawai. ³⁶ Ii Aparí waitnentrarniua nútiksarmek atumsha waitnentratarum.’

Chikicha túramurí ti enentáimtusairap
(Mateu 7.1-5)

³⁷ ‘Chikicha túramurí ti enentáimtusairap. Núnisa_n Yuska atumí tunaarín iirtamsashtatui. Chikicha tunaarín “nuke asutniatniuiti” tiirap. Núnisa_n Yus atumin sumantikramashtatrume. Tsa_nkurnairatarum. Núnisa_n Yus tsa_nkurtamprattawai. ³⁸ Chikichcha susata. Núnisa_n Yus atumin suramsat-tarme. Niisha pé_nker nekapma, tura núkap ati tusa teeka awajas tura patas núkap enkea emetsaj amastatui. Atum chíkich túrarmena nútiksa_n atumniasha túrutmattarme.”

³⁹ Tura nuyasha juna métek-taku chichaman ujakarmiayi: “Jii kusurusha çitiurak chíkich kusuruncha jukimniait. Mai metek wa_nanam iniaashtatuak? ⁴⁰ Unuiniamua nu unuiniana nuna na_nkaamas áchatniuiti. Túrasha niisha ti unuimiatar unuiniana nujají métek nekaamniaiti.’

⁴¹ ‘çitiurtsuk atumi jii_n numi e_nketna auk ítskesha atumí yachí jii_n tsuat e_nketusha iiyarum? ⁴² Ame jii_miin numi tuke e_nketaisha çitiurtsuk ame yatsumi jii_ya tsuátan jurustajme tame? ¡Ántraitrume! Emka ame jii_miin numi e_nketna nu jusata. Nuin_nkia paant wáinkiatame yatsumi jii_n tsuat e_nketna nu jurustin.’

Nerejai numi nekaatainti
(Mateu 7.17-20; 12.34-35)

⁴³ ‘Pé_nker numi yajauchin nereatsui; tura yajauch numi pé_nkeran nereatsui. ⁴⁴ Numisha ni nerén nékanuí. Tsachikniumiasha kushin_nkiap júukchamniaiti. Tura naranmaya shuinia júukchamniaiti. ⁴⁵ Núnisa_n pé_nker shuar ni enentáí pé_nker asamtai pé_nkeran chichaawai; tura yajauch shuar, enentáí yajauch asamtai yajauchin chichaawai. Páantchakait. Enentáin pimiutkamu ana nuyañ ni wenejai chichaawai.’

Jimiará jea ukurtin
(Mateu 7.24-27)

⁴⁶ ‘Wi tájana nu túrachiatrumsha çurukamtai Winia, Uunta, túrutrum? ⁴⁷ Shuar winia chichamprun ántuinia nu jea jeammajají méteketete. Winia anturtuk umiana nu jujají méteketete: ⁴⁸ Shuar jean jeamuk emka init taur kayanam ukurmai. Tura yumi ti yutuk, entsa nujan_nkrua tukummaitiat pukukach-mai kayanam ukuamu asa. ⁴⁹ Antsu Winia anturtukiat umiatsna nuka jujají méteketete: Shuar jean jeamuk aya naikminiam jeammai. Tura entsa nujan_nkrua tukumpram nu jeaka pukukamai. Tura mash sáantramai.” Tu unuiniamiaiyi Jesus.

7

Suntara yáintrin Jesus tsuármiania nu
(Mateu 8.5-13)

¹ Jesus áentsun unuiniasua amik Kapernáum péprunam wémiayi. ² Nuj Rúmanmaya suntara kapitíántri pujumiayi. Nu kapitíáni takarniurí, ti anea-murí, jakamnia jaamiayi. ³ Tura Jesusan pachis áujmatainian antuk, ame shuarum Jesusan itiertiti tura winia takarniun tsuárturti tusa Israer-shuara úuntrin akupkamiayi. ⁴ Niisha Jesusan weriar, umirtukat tusa ti seainiak

tiarmiayi “Ju kapitián nekas yáintin péñkeraiti. ⁵ Niisha yajaya apachitiat in shiir enentáimturmajai. Tura iruntai jean jeamtinniasha niniki chicharkaiti, tura yayawai.”

⁶ Nuyá Jesus niijiai wémiayi. Tura ni jeen jeastatuk jatemsamtai kapitiáncha ni amikrin akatar ju titiarum tusa Jesusan akuptukarmiayi. Niisha Jesusan chicharuk juna tiarmiayi “Uuntá, ánttram wayataj tu enentáimsaip. Ame ti nankaamaku asam winia jearu wayachminiaitme. ⁷ Tuma asakmin imia wiki Amiin jeatniun arantukjame. Ayatik “pénker ajasti” takumin winia takarniusha péñker ajatrustatui. ⁸ Wi nékajai. Winia úuntur winia akuptuiniawai. Tura wisha suntaran akupenajai. Nunasha wi “wetá” takui wéawai. Tura chikichnasha “winitia” tutai winiawai. Tura winia takartinian “ju túratá” tutai umiawai.” Tu tímiayi.

⁹ Jesus nuna antuk ti enentáimias ni nemarainian tímiayi “Nekas tájarme Israer-shuar Yúsan tímiatrus enentáimtinian wáinchaitjai.”

¹⁰ Tura kapitiani akatramuri jeá waketkiar, takarniuri péñker ajasun wáinkiararmiayi.

Wajé uchirín Jesus iniantkimiania nu

¹¹ Nuyá ukunam chikich pepru Naín tutainium ni unuiniamurijiai tura chikich untsuri aentsjai Jesus wémiayi. ¹² Tura péprunam nuntumas jakaan iwiansatai tusar juinian wáinkiamiayi. Jakáa nukuri wájeyayi, tura uchiri jakamia núchikiiyayi. Tura ti untsuri nu peprunmaya nin nemarsarmiayi. ¹³ Jesus nu wajen wáiniak tura waitnentar “úutip” tímiayi.

¹⁴ Nuinkia Jesus jakaa enkerman tarunt antinmiayi; nuna juiniasha wajasarmiayi. Nuinkia Jesus jakaan chicharuk “Umpa nantaktia, tájame” tímiayi.

¹⁵ Tutai niisha nantaki pujus chichaamiayi. Tura Jesus ni nukurin “Jujú uchiram” tímiayi.

¹⁶ Tura matsamiarmia nu, nuna wáinkiar ashamkarmiayi. Tura Yusa náarin shiir awajsarmiayi. Tura chichainiak, “Yúsnan etserniuchukait Niisha. Ataksha Yúsnan etserin uunt ana nu tarutramji” tiarmiayi. Tura “Israer-shuarti Niiniu ájania nuna yáinmaktai tusa Yus tarutramji” tiarmiayi.

¹⁷ Tura ashí Jutía nunkanmayasha tura ni írutkamu nunka ármia nuyasha Jesus túramia nuna nekaawarmiayi.

Imiakratin Juan sepunam pujak ni amikrin akatar Jesusan akuptukarmiania nu

(Mateu 11.2-19)

¹⁸ Juan ni írutkamuri ujakam Jesus túramun nekaamiayi. Nekáa ni írutkamurin jímiarun untsukmiayi. ¹⁹ Tura Jesusai akupkarmiayi. “Atumsha Jesus aniastarum. ¿Amesha nekas Kristu Yus akupkamu tátinia núkaitiam. Kame chikichak nákastataj? titiarum. Nu nekáa ikiuutarum’ tímiayi.

²⁰ Tutai niisha Jesusan weri jeariar tiarmiayi “Incha imiakratin Juan akatar akuptamkaji. ¿Amesha nekas tátinia núkaitiam. Chikichak nákastataj? Nu nekaatai tusar wakeraji” tiarmiayi.

²¹ Wats, nii jeawarmia nu Jesus untsuri jaan tsuártasa pujurmiayi. Iwianchrunkuncha iwianchrin jirki akupkatasa pujurmiayi. Tura kusuruncha ímtikmiayi. ²² Tuma asa Jesus akatramun juna tímiayi: “Waketkirum ashí átum antukurmena nusha, wáinkiarumna nusha ujaktarum. Kususurusha wáinmainiawai; shutuap ainia nu péñker wekainiawai; tunamarusha tsuámainiawai; empekusha ántuiniawai; jakaasha atak iwiaaku ajainiawai; tura kuítrinchanumsha uwempratin chicham ujakmaiti. Juan nu ujaktarum. ²³ Yawetsuk Winia tuke shiir enentáimturna nú shuar shiir átatui” tímiayi Jesus.

24 Waketkiarmatai Jesus Juánkan pachis áujmatman antuk shuar mat-samarmia nu juna tímiayi: “Shuar atsamunmasha ¿warí werimiarum. Pintiu nase umpúam atúu we juní we ajana nu iistai tusarmek wémarum? Juan núnischaiti. 25 Nuikia ¿warí werimiarum. Shuar péñker iwiarmampra íistai tusarmek wémarum? Warí, péñker iwiarmampraka uunt akupniu jeen pujuiniatsuk. 26 Nuinkia ¿warí werimiarum. Yúsnan etserniuk werimiarum? Maa, nú nankaamas wáinkiarne. 27 Yaunchu Yus-Chichamnum ju áarmaiti: “Winia akatramurun amiini emka akupeajai ame jintimin iwiarat tusan.” Juan nu akatramuiti. 28 Nekasan tájarme, Yúsnan etserin imiakratin Juanjai nankaamas uunt atsuwiti. Túmaitiat Yus akupeamunam páchinia nu shuarka nekas imianchaitiat, Juanjai nankaamas átatui” tímiayi. 29 Penké shuarsha, kuítian-juusha, Juan imiaimiujai imianiarmia nu, Jesus timian antukar Yusa náarin shiir awajsarmiayi. 30 Túrasha Paríséusha Israer-shuara jintin-niurisha Yus yáintaj támaitiat Juan imiaamujai imiancha ásar nakitrarmiayi. 31 Nuinkia Uunt Jesus tímiayi “Yamaiya áentstiram, warijiaín métek árum nuna paant títiatjarme. 32 Uchijjai métek árum. Ni aijjai iruntrar nakurustaj tukamá tuíniawai “Námpera áinis nakurustaitsar peem umpuarji, túrasha jantsemáchurme. Nuyá iwiarsatniua áinis nakurustaitsar íwiareakur kantantai kantamáaji, túrasha átum úutcharme.” Tu tuíniawai. 33 Atumsha núnisaitrume. Kame Juan núkap yurumsuk úmutsuk wekaimiayi. Túmakui átumka “iwianchrukuiti” tímiarme. 34 Nuyá Wisha Aents Ajasan támajai. Tura yurumá úmakuisha “ti yurumin tura ti nampenaiti; kame ashí yajauch shuara tura kuítian-juu amikrinti” túrutrume. 35 Wats, nekas neka áinia nu, Yusa nekatairín iniakmainiawai.” Tu tímiayi.

Pariséu Semun náartin Jesusan ni jeen ipiaamiania nu

36 “Winí yurumáitia” tusa Paríséu Jesusan ipiaamiayi. Tutai Jesus ni jeen werí misanam pujusmiayi. 37 Nuinkia nu péprunmaya yajauch nuwa, Jesus Paríséu jeen yurumáttsa weyi táman antuk, kayá mutinium kunkuin asuiti áimkiamun takukí jearmiayi. 38 Tura úutki Jesusa nawen pujuras neajkijjai nijjarmiayi. Tura intiashijjai japirmiayi; nuyá nawenam mukuta kunkuinian ni nawen ukatramiayi. 39 Paríséu Jesusan ipiaamia nu, nuna wáiniak juna enentáimsamiayi: “Ju nekas Yúsnan etserniuitkiunka, ju yajauch nuwa ántiana nuna nekaawainti. Warí, niisha netse nuwachukait” tu enentáimsamiayi.

40 Nuinkia Jesus Paríséun chicharuk tímiayi “Semunká, ámin titiaj tusan wakerajai.”

Tutai Paríséu chichaak “Turuttiá, Uuntá” tímiayi.

41 Tutai Jesus tímiayi “Kuítian ikiamniun jimiará áishman tumashmakarmiayi. Chíkich kiniantus (500) tura chíkichka aya senkuentak tumashmakmiayi. 42 Akiktin tsawant jeamtai máí-metek takakcha ármiai. Tuma asamtai kuítian ikiamin ni tumashrín máí-metek asakátrarmiayi. Wats, turuttiá ¿tú áishmanka ikiamniun nekas aneamia?” tímiayi.

43 Tutai Semun tímiayi “Enta, núkap tumashrín tsankuramia nu.”

44 Tutai Jesus tímiayi “Nekas tame.” Nuinkia nu nuwan iis Semunkan tímiayi “Ju nuwa wáintsumek. Ame jeemiin wayamtai winia nawer nijjartin entsa suruschamame; antsu ju nuwaka nawerun neajkijjai nijjarturai, tura intiashijjai japirturai. 45 Mukutam áujtusamame; antsu ninkia nawerun tuke mukutui. 46 Winia muukaruisha asuiti ikiurtuschamame; antsu ninkia nawerui kunkuin asuitin ukatrurai. 47 Nu tuma asamtai tájame, niisha Winia ti anentu asamtai ni tunaari untsurí ana nu tsankuramuiti. Tura tunaar

ishichik awai tau tsankuramu ana nuka ishichik anenkratniuiti.” Tu tímiayi Jesus.

⁴⁸ Nuiñkia nuwan tímiayi “Ame tunaarum tsankuramuitme.”

⁴⁹ Tura chíkich ipiaamu Jesusjái misanam pujuarmiania nu “¿Jusha ya asañ tunaancha tsankurea?” nuamtak tunainiarmiayi.

⁵⁰ Tura Jesus nuwan chicharuk ““Uwemtikiartiniaiti” tu enentáimturu asam uwempraitme. Shiir wetá” tímiayi.

8

Nuwá Jesusan yáinkiarmania nu

¹ Nuyá untsurí péprunam Jesus wekaráktak Yus akupeana nuna shiir chichaman etserkini wekaimiayi. Tura ni unuiniamurí tuse ármia nu nemarsarmiayi. ² Yaunchu untsurí nuwá jaa armia nuna tura iwianchruku armia nunasha Jesus tsuárarmiayi. Nu nuwasha Nin nemarsarmiayi. Nusha ju ármiai: Maktaranmaya Marí, siati íwianch jíirkimiuyania nusha ³ tura uunt akupin Erutisa takarniurí Chusa nuwé Juancha, tura Susancha; tura chíkich untsurí ni takakmarín súsar Jesusan yáinkiararmiayi.

Atsaamin atsaampramun Jesus unuiniamiania nu

(Mateu 13.1-9; Márkus 4.1-9)

⁴ Untsurí péprunmaya Jesusan iistai tusar jíinkiararmiayi. Tura untsurí káunkarmatai ju métek-taku chichaman Jesus unuiniamiayi:

⁵ “Atsaamin atsaamprataj tusa jíinkimiayi. Atsaamki wesa jinkiái jintiá iniaararmiayi. Túrunamtai weenak najakarmiayi. Nuyá chiniki tariar yuawarmiayi. ⁶ Chíkich jinkiái kaya írunmanum iniaararmiayi. Nu jinkiái tsapainiar, wárik nantu sukuam káararmiayi. ⁷ Chíkich jinkiái jan kiniam iniaararmiayi. Tura jan kisha jinkiáisha máimetek tsapainiar, jan ki kan kar ajakramiayi. ⁸ Tura chíkich jinkiáisha péñker nun kanam iniaararmiayi. Tura tsapainiar, péñker nerekar chíkichkia siañsha (100) nerekararmiayi.” Tuasua amik kakantar chichaak Jesus tímiayi “Kuishim ákuñkia antuktaram.”

(Mateu 13.10-17; Márkus 4.10-12)

⁹ Nuyá ni unuiniamurí Jesusan aniak tiarmiayi “Ju métek-taku chicham tamena nu ¿warintkumea tame?”

¹⁰ Tutai Jesus tímiayi “Atumnia Yus ni akuptairin nekaachma ana nuna nekamtikramprume. Tura chikichnaka, wáiniainiyat kusurua núnin árti tusan, tura ántuiniayat nekaacharat tusan aya métek-taku chichamjái jintintiatjai,” tímiayi.

Atsaampramu chichaman Jesus paant jintintiamiania nu

(Mateu 13.18-23; Márkus 4.13-20)

¹¹ ‘Wats, ju nekaatarum, tímiayi. Jinkiáisha Yusa chichamen nakumui. ¹² Jintiá iniaaru tana nuka shuar aya ántana nuna nakumui. Yúsan nekas enentáimtus uwempracharti tusa íwianch wárik taa nu chichaman ni enentáiyān júawai. ¹³ Kayanam iniaaru tana nuka shuar antuk waras umiana nuna nakumui. Tura nú shuar kan kape atsá asamtai, ishichik tsawantiniñ umikiar itiurchatan wáinkiar wárik kanainiawai. ¹⁴ Jan kiniam iniaaru tana nuka tuke enentáijjai umiatsna nuna nakumui. Nu shuarsha ántuiniawai, túrasha ni wakeramurijjai wekainiawai. Ju nun kanman ana nuna ti páchiniakui, tura kuítian ti wakeruiniakui, warastinniak enentáimtuiniakui, Yus-Chicham ni enentáin takaatsui. Nujai kan karma ásar nerektinian tujintianiawai. ¹⁵ Tura jinkiái péñker nun kanam iniaaru tana nuka shuar antuk

umiinia nuna nakumui. Niisha antukarmia nuna pé_nker enentáimtusar, yawetsuk umirkar ti pé_nker nerenawai.'

Ashí iwianiakma átatui
(Márkus 4.21-25)

¹⁶ '¿Shiripkin ekeemak nukuktinkiait? Peaknum waaptak ikiuschat-niuiti. Antsu jeanam wáiniana nu paant wáinkiarat tusa yakí ekentsatniuiti. ¹⁷ Núnisan ashí nekaachma ana nu paant átatui. Tura úukma ana nu nekanattawai. Tura iwianiakma átatui. ¹⁸ Tuma asamtai anearum pé_nker antuktarum. Shuar takakna nu patatsamnia átatui. Túrasha takaktsuna nu, takakjai tu enentáimtumana nuka jurunkíttiawai." Tu timiayi.

Jesusa nukurí, Jesusa yachi
(Mateu 12.46-50; Márkus 3.31-35)

¹⁹ Jesus pujamunam nukurí ni yachisha tariarmiayi. ²⁰ Turamtai Jesusan tiarmiayi "Ame nukusha yatsumsha aá wajasar untsurmainiawai."

²¹ Tutai Jesus tímiayi "Ee, nukuruiti, yatsuruiti, tura Yus tana nuna antuk umiana nusha winia nukuruiti, winia yatsuruiti."

Nasesha entsasha Jesusan umirkarmiania nu
(Mateu 8.23-27; Márkus 4.35-41)

²² Chíkich tsawantai Jesus ni unuiniamurijjai kanunam enkemprar "Antumian amaini wetai" tímiayi. ²³ Entsanam wesar Jesus kanarmiayi. Tura aya aneachma nase ti kakaram násentkui chíchimi tampá tukumar kanun inít awayastatuk awajmiayi. ²⁴ Túram nuinkia Jesusan ishintiainiak "Uuntá, iisha entsá wayaaji" tiarmiayi. Nuinkia Jesus nantaki nasencha entsancha chicharkamiayi. Nú chichamaik nasesha menkakamiayi, tura entsasha miaaku ajasmiayi. ²⁵ Nuyá ni unuiniamurín chicharuk "¿Urukamtai Winia enentáimtursachuram?" tímiayi.

Tura niisha ashamainiak, ti enentáimprar "¿Ausha warí áishmankait? Nasesha entsasha Nii chicharkam umirainiatsuk" tiarmiayi.

Jatara nunkanam Jesus iwianchrukun tsuármiania nu
(Mateu 8.28-34; Márkus 5.1-20)

²⁶ Kariréa nunka amaini Jatara nunkanam jeawarmiayi. ²⁷ Kanunmaya Jesus jiinkimtai nu péprunmaya áishman Nin taruntamiayi. Nu áishmansha yaunchu iwianchrukuyayi. Misú wekas, jeá pujutsuk aents iwiansamunam pujuyayi. ²⁸⁻²⁹ Íwianchkia nu aishmankan ti kakaram nupet wémiayi. Tura emetatai tusar uwejencha nawencha jirujai jinkiá wearmiayi. Túrasha tu-jinkiararmiayi. Niisha jiruncha tsurí wémiayi. Tura íwianch aents atsamunam útsuk awemamiayi. Nu aishman Jesusan wáiniak tikishmatar kakantar chicharuk "¿Urukamtai winiisha tarutnium, Uunt Nanakaamaku Yusa Uchirí Jesusa? Winia wáitkiarsaip tusan seajme" tímiayi. Íwianch nún pujurun Jesus jiki akupeam tu tímiayi. ³⁰ Jesus nu áishmankan anias "¿yáitiam?" tímiayi.

Tútai nii chichaak "Wikia Untsuríntjai" tímiayi. Untsurí íwianch nún pujurma asa nuna tímiayi. ³¹ "In uunt wáanam ii jiinkimij nuin akuptukam amutkaip" íwianch seawarmiayi Jesusan. ³² Nuí ishichik arantach náinnium untsurí kuchi shushunmak yujaarmiayi. Tura íwianch chichainiak, "Antsu kuchiniam wayatin tsankatrukta" tiarmiayi.

Tutai Jesuska "Ayu, wetarum" tímiayi.

³³ Nuna takui íwianch áishmannumia jinkiar kuchiniam wayawarmiayi. Túram kuchisha nánatanam akaiki iniaawar entsanam utsanawarmiayi. Túrunawar jakekarmiayi.

³⁴ Kuchin wáinniusha túrunan wáinkiar, ashamkar, péprunmasha tura arantcha etserkatai tusar tseke wearmiayi. ³⁵ Etserkarmatai, iyutai tusar untsurí shuar wearmiayi. Tura Jesus pujamunam jeawar, íwianch jíintiukiarmia nú áishmaṅkan péṅker ajas pushí entsar Jesusa nawen pujan wáinkiar miayi. Tura ashamkar miayi. ³⁶ Iwianchruku áishmaṅ tsuárman wáinkiar miia nu yama taan ujakar miayi. ³⁷ Tura ti ashamainiak Jatara nunṅkanmaya aents ashí Jesusan “Wetá” tiar miayi. Tutai Jesus kanunam enṅkemar wé miayi. ³⁸ Íwianch jíintiukiarmia nú áishmaṅ Jesusan, wisha ame wéamunam winitiaj tusa seamiayi. Tutai Jesus nuna suritiak, ³⁹ “Antsu ame jeemiin weme Yus ámin túrutma nu ashí etserkata” tí miayi. Tutai áishmaṅ we Jesus nin túramia nuna ashí nu péprunam etserkamiayi.

*Jairu nawantríncha tura chíkich nuwáncha Jesus tsuármiania nu
(Mateu 9.18-26; Márkus 5.21-43)*

⁴⁰ Tura Jesus katiṅki Kariréanam tatí tusar nákas pujuarmiayi. Tuma ásar Nii wakетки katiṅki támatai nu aencha warasar áujsar miayi. ⁴¹ Tumaj Israer-shuara iruntai jeá uuntri Jairu naartin tá miayi. Nii taa, Jesusa nawen tikishmatar “Winia jearuj waitneasam winítrítía” tí miayi. ⁴² Ni nawantri chikichik amia nu, tuse uwí takaku, jakatasa pujakuí nuna tí miayi.

Jesus “ayu” tinia weakui ti untsurí aents nemariarmiayi. Tura untsurí shuar kaḗ ajas weena ásar chanuawarmiayi.

⁴³ Nuí nuwá páchitkia wé miayi. Niisha tuse uwí numpa ajapeak wáitias pujuyayi. Tsuákratniua nuísha ni kuítrín ashí ajapaitiat tsuámarchauyayi. ⁴⁴ Jesusa úkuriini winiá weantuk ni pushirí náṅkatramurín antin miayi. Nuna tura nú chichamaik numpé ajapeamuncha péṅker ajas miayi. ⁴⁵ Nuínkia Jesus chichaak “¿Ya Winia antintkia?” tí miayi.

Tura “peṅkesha antinṅchajme” tuíniakuí Pítiur ni tsaniakmaríjiaí Jesusan chicharuk “Uuntá, ti untsurí antinṅmasha, tura ti untsurí chanunmainiasha ¿itiura “ya Winia antintkia” tame?” tíarmiayi.

⁴⁶ Tútaisha Jesus tí miayi “Nekas Winia antintkiayi. Winia kakarmarjai tsuárajna nuna nékajai” tí miayi.

⁴⁷ Nuyá nu nuwasha, nekarayapi tusa kuraṅki taa Jesusa nawen tikishmatramiayi. Tura ashí aents ántuiniamunam urukaku antinṅkia tura itiura wárik péṅker ajas miia nuna ujak miayi.

⁴⁸ Nuínkia Jesus nuwán tí miayi “Nawantrú, shiir wetá. Winia nekas enentáimtursa asam péṅker ajasume.”

⁴⁹ Jesus tuke chichas pujaj uunt Jairu jeá, ti untsurí antinṅmasha, turenia taa, Jáirun tí miayi “Ame nawantrum jakayi. Unuikiartin tuke itit awajipia” tí miayi.

⁵⁰ Tura Jesus nuna antuk tí miayi “Ashamkaip. Áyatik Winia nekas enentáimtursata. Túrakmin nawantrum péṅker ajastatui” tí miayi.

⁵¹ Jeá jeawar Jesussha Niijiaí untsurí wayatniun surinkiamiayi. Antsu aya Pítrun, Jakupun, Juánnasha tura nuwachi aparín nukuríncha wayatniun tsanṅkatkamiayi. ⁵² Ashí útainiak atakka wáinkiashtatjapi tu útiarmiayi. Túmainiakui Jesus penṅké jakaan nékayat tí miayi “Úutirpa. Nuwáchkia jákachai, antsu kanarai” tí miayi.

⁵³ Jakaancha urukaku ta tusar wishikrarmiayi. ⁵⁴ Nuyá Jesus nuwachi uwején achik, kákantar chicharuk “Nawantru nantaktia” tí miayi. ⁵⁵ Túram niisha jakayat atak iwiaaku ajas miayi. Tura nú chichamaik nantakmiayi; túrunantai Jesus “ayuratarum” tí miayi. ⁵⁶ Nuwachi aparí nukurísha ti enentáimprarmiayi. Tura Jesus “Ju túramu penṅké etserkairap” tí miayi.

9

*Jesus ni unuiniamurin etserkati tusa akupkarmiania nu
(Mateu 10.5-15; Márkus 6.7-13)*

¹ Ni tuse unuiniamurin ikiaanank ni chichamejai iwianchrukun enentáiyān iwianchin jjiirki akupkatniun tura sunkurjai jaa tsuártinniasha ni kakarmarin súarmiayi. ² “Yus akupin ajastin ujaktarum, tura jaa tsuártarum” tinia akupkarmiayi Jesus. ³ Nuyá tímiayi “Wéakrum áyatik wetarum. Ushukrustincha, uyuncha, yurumkasha, kuitcha penké jukiirap. Aya chikichík pushí jukitiarum. ⁴ Nánkamas jeanam jearum wayarmeka nuiñ pujustarum. Nuiñ pujusrumek chíkich péprunam wéakrum jíinkitiarum, tímiayi. ⁵ Tura atumin awaintiamatniun nakitiana nú péprunmaya jiinkirum nawemiya nunka akakekum ikiuktiarum. Awaintiamachma paant ati tusarum nu túratarum” tímiayi.

⁶ Nuyá jíinkiar ashí péprunam uwempratin chichaman ujakiar wearmiayi; tura ashí péprunam jáiniancha tsuákiar wearmiayi.

*Erutis “Jesusan ístaj” tímiania nu
(Mateu 14.1-12; Márkus 6.14-29)*

⁷⁻⁸ Uunt akupin Erutis Jesus túramun antukmiayi. Nu túramun chíkich shuarka “Juan jakamunmaya nantaki túrawai” tu wearmiayi. Chíkichkia, “yaunchu Yúsnan etserin Eriás wantiniak túrawai” tu wearmiayi. Chíkichkia, “chíkich yaunchu etserin nantaki túrawai” tiarmiayi. Tuma asamtai Erutis penké nekaachmiayi. ⁹ Tura tímiayi “Wiki, Juanka muuke tsupirkatarum, tíchamkaj. Tuma aisha, ¿ju shuar, ni túramurí ashí shuar chichainia nusha yátsukait?” Tu enentáimiuk “íistaj” tímiayi.

*Senku mir áishmankan Jesus ayuramiania nu
(Mateu 14.13-21; Márkus 6.30-44; Juan 6.1-14)*

¹⁰ Atak Jesusa akatramurí waketki taar ni túramurin Jesusan ujakarmiayi. Nuiñkia aents atsamunam Petsaitia péprunam tíjiuch weak nui júkiarmiayi. ¹¹ Tura penké shuar nuna nekaawar nemariarmiayi. Túram Jesus nin shiir áuj samiayi. Tura Yusa akuptairí pachis unuiniamiayi. Tura jaa armia nuna tsuáarmiayi.

¹² Tura kíakui, tuse unuiniamu Jesusan wériar tiarmiayi “Uuntá, shuar akupkachminiashit. Tíjiuch péprunmasha, shúarnumkesha wear ni yurumátniurin sumarmakarti, tura kanartintrin wáinkarti. Jui pujajnia juñkia penké atsawai” tiarmiayi.

¹³ Tutai Jesus tímiayi “Atumsha ayuratarum.”

Tutai chichainiak “Íisha aya senku tanta tura namaksha jímiarchik takakji. Ju shuar ayuratin sumaktai tusar wétiníaitji” tiarmiayi.

¹⁴ Áishmansha ti untsurí senku mir (5000) jeeá ámiayi. Tura Jesus ni unuiniamurin chicharainak ““senkuenta senkuenta kanaarum ankant ankant pujustarum,” titiarum” tímiayi.

¹⁵ Túrawarmatai ashí pujusarmiayi. ¹⁶ Nuyá senku tantan tura jimiará namaknasha Jesus achik, yakiini íimias Yúsan yuminsamiayi. Nuyá ajamsarat tusa ni unuiniamurin súarmiayi. ¹⁷ Ashí yurumáwar ejemarmayi. Tura ampirman tuse chañkinnium áimkiarmiayi.

*Jesus Yusa anaikiamurinti ujakma amia nu
(Mateu 16.13-19; Márkus 8.27-29)*

¹⁸ Jesus ni unuiniamurijiai áentsnumia kanaki pujuarmiayi. Jesus Yúsan ajsua umik ni unuiniamurin tiarmiayi “¿Yáiti turutainia Winia?”

¹⁹ Niisha áimkiarmiayi, “Chíkich “Imiakratin Juánkaiti” turamainiawai; chikichcha “Iríasaiti” tura chíkichkia “yaunchu Yúsnan etserin nantakniua núiti” turamainiawai” tiarmiayi.

²⁰ Tutai “Tura atumsha ¿yáiti túrutrum?” tiarmiayi.

Takui Pítiur chichaak “Ámeke Yusa Anaikiamuri, Kristu tutai, núitme” tímiayi.

²¹ Tutai Jesus “Peṅké etserkairap” tímiayi.

Ni jákatniurin Jesus ujakmiania nu

(Mateu 16.20-28; Márkus 8.30-9.1)

²² Nuyá Jesus tímiayi “Wi Aents Ajasuitjiana ju ti waitsatniuitjai. Wíi shuara uuntri, tura ni Pátriri úuntri sha tura ni jintinniurisha nakitrurar maantuáwartatui. Túrasha iwiartusarmatai menaintiu tsawant jeamtai nantaktiatjai.”

²³ Nuyá ashí áentsun chicharuk ju na tímiayi “Shuar Winia nekas nemar-tustajtsa wakerakka ni wakeramuriṅkia iniaisati. Tuke tsawant ni krusri yanaki nemartusti. ²⁴ Kame shuar ju nuṅkanam aya peṅker pujustaj tákuṅka nu shuar uwemtsuk jakattawai. Antsu Winia anentu asa peṅker pujustin- niak enentáimtsuna nú shuarka nekas iwiaakman wáinkiatstawai. ²⁵ Iimiata, shuar ashí ju nuṅkanam ana nuna súmakui tura jinium wétin ákuisha ¿itiurak peṅker pujusat? ²⁶ Wi Aents Ajasuitjiana ju Winiasha tura winia chicham- pruncha shuar natsantraitkuṅkia, winia wincharujai, winia Aparu win- charijjai tura nayaimpinmaya peṅker suntara wincharijjai atak táakun shuar natsantrurmia nuna natsantrattajai Wi. ²⁷ Tura shuar Yusa akuptairin wáintsuk jákachartatna nu juí pujuiniawai. Nuna nekas tájarne” tímiayi.

Jesus nusháa iira ajasmiania nu

(Mateu 17.1-8; Márkus 9.2-8)

²⁸ Nuna tuasua amik nuyá chíkich semanatin Yúsán áujstaj tusa Jesus náinnium wakamiayi. Pítiur, Jakupu, Juanjai nemariarmiayi. ²⁹ Jesus auju pujus nusháa iira ajattsarmiayi. Ni pushirisha ti puju jíitsumir ajasmi- ayi. ³⁰ Nuṅkia jimiará áishman Nijjai chicháa wajarmiayi. Nuka Muisáis Eríasjai ármiai. ³¹ Níncha wincha jíitsumir téntakarmiayi. Tura Jesus wáitias Jerusarénum jákatniurin amia nuna áujmatarmiayi. ³² Pítiur ni tsaniak- marijiai kari ti pujainiain iwíáa pujuarmiayi. Tuma ásar Jesusan tura jimiará áishmanjai jíitsumir ajas wajainian wáinkiararmiayi. ³³ Tura nu áishman Jesusan ikiuki weenai Pítiur Jesusan chicharuk “Uuntá, iisha ti shiir pujat- sjik. Menaintiu áakmaktai, Áminiusha, Muisaisnasha, Eríasnasha áakmaktai” tímiayi. Tura Pítrusha enentáimtsuk nuna tímiayi. ³⁴ Nuna chicháa pujai yu- raṅkim tarí kaput amuawarmiayi. Tura yuraṅkim amuam ti ashankarmi- ayi. ³⁵ Nuṅkia yuraṅminmaya ju chichaamun antukarmiayi: “Juka winia aneamu Uchiruiti. Nii anturkatarum.” ³⁶ Chichaamun antasua amikiar Jesus niṅki wajan wáinkiararmiayi. Nuṅkia takamtak pujuarmiayi. Tura wáinkiar- mia nuna peṅké etserkacharmiayi.

Uchi iwianchrukun Jesus tsuármiania nu

(Mateu 17.14-21; Márkus 9.14-29)

³⁷ Kashin tsawantai, náinniumiá táarmatai, ti untsurí shuar Jesus inkiuntai tusar wearmiayi. ³⁸ Nu shuarnumiá chikichik áishman Jesusan untsuak tímiayi “Uuntá, waitneasam uchir írtústá. Uchirsha júchikiiti. ³⁹ Íwianch achik núpeteam niisha náṅkamas untsumui. Tura chichichiipu ajas wenunmasha saun kaput apaawai. Íwianch nin tuke yajauch awajas aṅkant awajsatniun

nakitiawai. ⁴⁰ Túmakui ame unuiniamurmin iwianchin j̄irtukit tusan seam-jai. Túrasha tujinkiarmai” tímiayi.

⁴¹ Tutai Jesus tímiayi “Yus enentáimtichutirmin, tutupnik wekaichatirmin çurutmá tsawanttsuk atumj̄aj̄i pujustaj. Urutmá katsuntratjatsuk? Uchiram j̄uj̄i itiatá” tímiayi.

⁴² Tura uchi winiaj̄i íwianch nunká ajuant chichichiptu áepsamiayi. Tura Jesus iwianchin kakantar chicharkamiayi. Tura uchin péñker awajas ni aparin awantuki susamiayi. ⁴³ Tura ashí pujuarmia nu ti enentáimprar “Yuska imiá úuntchakait” tiarmiayi.

Jesus ni jákatniur̄in ataksha ujakmiania nu
(Mateu 17.22-23; Márkus 9.30-32)

Jesus túramun ti enentáimtu pujuiniaj̄i Jesus ni unuiniamur̄in tímiayi ⁴⁴ “Wi tájarmena j̄uj̄i péñker antuktaram. Winia Aents Ajasu tútain surutkartatui.”

⁴⁵ Tura Nii timia nuna unuiniamur̄i nekaacharmiayi. Nekaawaraj̄in tusa paantcha awajsamuyayi. Tura wariñkit tusa anintrustinniasha aran-tukarmiayi.

“¿Yaki imiá nan̄kaamantuit?”
(Mateu 18.1-5; Márkus 9.33-37)

⁴⁶ Nuyá ni unuiniamur̄i, yaki imiá nan̄kaamaku ati tusa, nuamtak mai tunai ajarmiayi. ⁴⁷ Tura ni enentáimsamur̄in Jesus nekaamiayi. Tuma asa uchin achik ni pujamunam itiamiayi. ⁴⁸ Itiá tímiayi “Winia anentuk j̄uj̄i uchin shiir awajeana nuka Winiasha shiir awajtai. Tura Winia shiir awajtana nuka Winia akuptana nunasha shiir awajeawai. Kame átum nan̄kaamantuchu tárugna nu ti nekas nan̄kaamantuiti’ tímiayi.

(Márkus 9.38-40)

⁴⁹ Nuyá Juan̄ tímiayi “Uuntá, shuar ame náarmin pachis iwianchin j̄ij̄iki akupea nu wáinkiam̄ji. Tura in páchitkiachu asamtai nuka suritkiam̄ji.”

⁵⁰ Tutai Jesus tímiayi “Antsu suritkiarap. Shuar in nakitramachkuñka in páchitkiawai.”

Jesus Jakupun Juán̄nasha chicharkarmiania nu

⁵¹ Jesus, nayaimpiniam waketkitniur̄i jeatemamtai, enentáimmia ímiatrusan̄ Jerusaréñnum we-wémiayi. ⁵² Wesa, kanartinian wáinkiarat tusa akatar émtikiarmiayi. Tura niisha Samaria péprunam jeawarmiayi. ⁵³ Tura Samarianmaya aentska, Jerusaréñnum wéenan nekaawaru ásar itiatniun nakitrarmiayi. ⁵⁴ Jesusa unuiniamur̄i Jakupusha Juán̄sha nuna nekaawar, Jesusan tiarmiayi “¿Uuntá, Eriás yaunchu túramia núnisrik iisha túrat tusam wakeramek. Nayaimpinmayā ji tara Samarianmayā aentsun amukarti, títiatjik?”

⁵⁵ Tutai Jesus nin íisar kakantar chicharuk tímiayi “Atumsha atumi enentáij̄i urukukit nuka nekamatsrume. ⁵⁶ Wi Aents Ajasu áentsun emesrattsan táchaitjai. Antsu uwemtikratajtsan táwitjai” tímiayi. Nuyá chíkich péprunam wearmiayi.

Jesus nemarsatin
(Mateu 8.19-22)

⁵⁷ Jintiá weenaj̄i, chíkich áishman̄ Jesusan chicharuk “Uuntá, tuí wétatam nuisha nemarsatjame” tímiayi.

⁵⁸ Tutai Jesus tímiayi “Kujanchmasha ni wáar̄in takaktsuk. Chínkisha pasunken takaktsuk. Tura Wi Yusa Uchir̄intiian tepesan ayampratniur̄i atsawai.”

⁵⁹ Chíkich áishman̄kan Jesus “Nemartusta” tímiayi.

Tutai nii chichaak “Antsu, Uuntá, winia apar jakamtai, iwiarsa ikiuakun nemarsatjame. Nu tsan_kátrúktá” tímiayi.

⁶⁰ Tutai Jesus tímiayi “Jakaa ainia nu ni shuarin iwiarsatniunka enentáimtusarti. Tura ámeke weme Yus-shuar átin urukukit nu etserkata” tímiayi.

⁶¹ Nuyá chíkich tímiayi “Uuntá, nemarsataj tusan wakerajme. Túrasha wíi shuaran emka áujsan ikiuweartaj tsan_kátrúktá” tímiayi.

⁶² Tutai Jesus tímiayi “Shuar arayát ukunmaanî apajas iimna nu, Yus akupeana nuî takaschamniaiti.”

10

Ni unuiniamurîn setenta armia nuna Jesus etserkatarum tusa akupkarmiania nu

¹ Nuyá ukunam chíkich unuiniamurîn setenta anaikiarmiayi Jesus. Tura jímiar jímiaran apatak émkítarum tusa ashí péprunam ashí nunkanam ni wétin amia nuî akupkamiayi. ² Akupeak tímiayi “Nekas tájarme, Yus-Chicham étserkum, júuktinia núnisan, aents Yus-shuar awajsatin ti awai. Tura çyaki júukat, aya ishichik takainiasha? Tuma asantai ni takarniurî akupkat tusarum Nerentin seatarum. ³ Wetarum. Átumka murikiua núninaitrume. Uunt yawá yujamua núninnium tsuumai ámunam akupeajrume. ⁴ Yurumkasha, kuitcha, sapatça júkiirap; shuarjái jintiá áujmamsatai tusarum wajasairap. ⁵ Jeá wayakrum emka ju titiarum: “Ju jeanam pujuinia nuna Yus shiir awajsarti.” ⁶ Nérentin “Ee, nuna wakerajai” tákuin_kia túrunattawai. Tura “Atsá, wakeratsjai” tákuin_kia, “nuin_kia túrunashti” titiarum. ⁷ Jeá wayattarmena nú jeanman pujustarum. Tura ajampramsattarmena nu yuatarum. Warí, takaana nu akinkiashtinkiait. Chíkich jeanam nuî werum nuî werum ajairap. ⁸ Awaintiamawartatna nú peprunam jearmeke ajampramsartatna nu yuatarum. ⁹ Jaa ainia nu tsuártarum. Túrarum “Yus ju nunkanam akupin ajastin ishichik ajatemsai” nu peprunmaya shuar titiarum. ¹⁰ Íksarmek itiaarmachartatna nú peprunam jearum, jintiá wajasrum ju titiarum, ¹¹ “Yusna nakitra asakrumin, atumi pépruriniá nunka ii nawen peema japirar akakekji. Túrasha ju paant nekaatarum: Yus ju nunkanam akupkatin ishichik ajatemsai.” ¹² Yusa nekapsatin tsawantrî jeamtai nu peprunmaya shuaran ti asutiáttawai. Yaunchu Sutumanmaya shuaran asutiámia nujái nankaamas asutiáttawai. Núnaka paant tájarme tímiayi.

(Mateu 11.20-24)

¹³ Wáinkiatá, Kurasín péprunmayatiram. Wáinkiatá Petsaitia péprunmayatirmesha. Atumí péprurîn aents tujintiamun ti túraitjai. Warí, yaunchu Tiru péprunmasha, Setun péprunmasha nu tujintiamu túramuitkuin_kia yaunchu ni enentáin yapajiáwaraayi. Túrawar kúntuts pujutai pushin entsarar yun_kunim ajakiraayi. ¹⁴ Tura atumsha aents tujintiamu túramu wáiniatrum yapajiachu asakrumin Tirunmaya tura Setunnumiá aentsjai nankaamas asutniáttarme. ¹⁵ Tura atumsha Kapernáumnumiáttirmesha, “ti nankaamantu ajarar nayaimpiniam jeattaji” tu enentáimtsurmek. Maaj, antsu jaka matsamtainium jeattarme, auka” tímiayi.

¹⁶ Tura Jesus ni unuiniamurîn junasha tímiayi: “Atumin anturtamainiakka Winiasha anturtuiniawai; atumin nakitramainiakka Winiasha nakitruiniawai; tura nú arant, Winia nakittrakka Winia akuptukua nunasha nakitiawai.” Tú áujas Jesus nin akupkarmiayi.

Setenta unuiniamu waketki táarmiania nu

¹⁷ Ukunam nu setenta unuiniamu warasar waketki táarmiayi. Tura chichainiak “Uuntá, ame náarmiin íwianch jiiiki akupeam umirtamkamji” tiarmiayi.

¹⁸ Tutai Jesus tímiayi “Ee, Wisha nayaimpinmaya peem peetna núnisan, uunt iwianch Satanásan akaiki iniaan wáinkiamjai. ¹⁹ Atumniaka winia kakarmarun susamjarme, napi najarmasha titin najarmasha yajauch awaj-tamsairum tusan; tura ii nemasri kakarmari nupetkatniuncha susamjarme. ²⁰ Túrasha íwianch umirtamkui nu enentáimsam warasairap. Antsu atumí naari nayaimpiniam aarma aa asamtai warastarum” tímiayi Jesus.

Jesus warasmiayi

(Mateu 11.25-27; 13.16-17)

²¹ Nuinkia ni enentáin Yusa Wakaní waramtiksam Jesus juna tímiayi: “Aparú, ashí nayaimpijiai nunka Úntrinme; tuma asam ju túrunamu ti unuimiaru enentáimtumainia nuyá úukuitme; antsu uchichia núnis nankaamantuchu enentáimtumainia nú shuar paant awajtusuitme. Ee, Aparú, núnik wakerichmakum. Tuma asamtai shiir enentáimtajme, Aparú” tímiayi.

²² “Winia Apar ashí surusuiti. Wisha ni Uchiri asamtai Winia nékarui. Tura chíkich Winia nekas nekarainiatsui. Yus Apancha Wiki nékajai. Tura Wi wakeraj nú shuaran winia Aparun paant awajtajai. Nú shuarsha winia Aparun nékainiawai.” Tu tímiayi Jesus.

²³⁻²⁴ Nuyá ni unuiniamurin iis tímiayi “Wi tájarme, untsurí Yúsna etserniusha tura uunt akupniusha átum yamá wáintrum nuna wáinkiatniun wakeruiniyatañ wáinkiacharmiai. Tura átum yamá ántarme nuna antuk-tinian wakeruiniyatañ antukcharmiai. Tura Yus achirmaku asakrumin, wáintrumna nu ti péñkeraiti” tímiayi.

Samarianmaya áishman katsumkamun yainmia nuna Jesus unuiniamiania nu

²⁵ Nuyá akupkamun jintinkiertin Jesus warintiak chichakat tusa wajatki werimiayi. Werí iniimiayi “Uuntá, wi tuke iwiaaku átaj takun ¿warinia túratniuitaj?” tímiayi.

²⁶ Tutai Jesus ayak “¿Yús-Papinium Muisáis áarmanum waritia áarmait. Waritia enentáimiam?” tímiayi.

²⁷ Akupkamun jintinkiertin ayak tímiayi “Juna tawai: Ti enentáimsam, tuke enentáimjai Uunt Yus aneeta. Ame kakarmaram, iwiaakmarmesha Yus íiktusta. Tura ame ayashim aneamna núnismek ame írutramurmesha aneeta. Núchakait” tímiayi.

²⁸ Tutai Jesus tímiayi “Péñker áimsame. Nu túrakmeka tuke iwiaaku átatme.”

²⁹ Tutai akupkamun jintinkiertin ni anintramun kíshtumaktajtsa wakerak “Winia írutramursha ¿ya ainia?” tímiayi.

³⁰ Takui Jesus tímiayi “Jerusarénumia jintia Jirikiú péprunam jeana nú jintianam áishman wean, kasa áishman tariar ni waririn, pushirinha kasarkarmiayi. Tura katsumkar mayái ashirak ajuantar ikiukiarmiayi.

³¹ Tura Israer-shuar Patri ukunman winis nu áishmankan wáiniak aya íkian iis ikiukmiayi. ³² Nuyá ukunam Patri yáintrisha nu jintianam wesa, nu áishmankan wáiniak, áyatik iis ikiuak wémiayi. ³³ Tura nuyá Samaria nunkanmaya áishmansha nu jintianman wesa, nu áishmankan wáiniak ní shuarinchunak wáitnéntarmiayi. ³⁴ Nuyá nu áishmankan weantuk ni numpamnamurin asuitijai tura wíniujai tsuar jaanchjai penuarmiayi. Tura ni kawairiin ekenak jukimiayi. Tura írar kanutainiam jukí ejé nu áishmankan

pénker wáinkiamiayi. ³⁵ Tura kashin tsawarmatai Samarianmaya áishman weak jimiará kuítian jusa jeá nérenniurin susamiayi. Susa tímiayi “Ju áishman pénker wáitrukta. Tura wi amaajna ju táasmataisha wi wáketkun akiktajme” tímiayi. ³⁶ Ayu, ámijiaisha, nu menaintiu áiniana nu, ¿tuá imiá nekas katsumkamun waitnentramia?” tímiayi Jesus.

³⁷ Takui akupkamun jintinkiertin chichaak “Entá, katsumkamun wáitnentramia núa” tímiayi.

Tutai Jesus tímiayi “Amesha weme núnismek túrata.”

Marta ni kaijiai Marí jeen Jesus pujusmiania nu

³⁸ Nuyá Jesus jintiá wesa chíkich péprunam jeamiayi. Nu péprunmaya nuwa naari Marta ni jeen itiaamiayi. ³⁹ Marta kai ámiayi ni naari Marí. Marisha unuiniamun anturkataj tusa Jesusa nawen pujursamiayi. ⁴⁰ Tura Mártaka ni takatrin ti enentáimtak Jesusan weantuk tímiayi “Uuntá Jesúsá, ¿winia kaij takatan winiak íktursainia nuka enentáimtsumek? Winia yáintá turuttia” tímiayi.

⁴¹ Tutai Jesus tímiayi “Maaj Martá, untsurí túratin ana nu ti enentáimsam itit awajtamui. ⁴² Tura aya chikichik nekas túratniuiti. Marikia nekas pénker ana nuna achikiai. Nusha penké jurunkishtatui” tímiayi.

11

Jesus Yus áujsatniun unuiniamiania nu (Mateu 6.9-15; 7.7-11)

¹ Chíkich tsawantaj Jesus Yúsán áujsataj tusa atsamunam pujumiayi. Áuj sua amikmatai ni unuiniamurj chikichik Nin tímiayi “Uuntá, imiakratin Juan ni unuiniamurj unuiniamia núnismek Yus áujsatin unuitiurta.”

² Tutai Jesus tímiayi “Yus áujkuram ju titiarum:

Aparu Yus, nayaimpiniam pujamna nu, ii Aparinme. Ame náarmincha shuar ántar pachischarti. Ashí áentsnum ame akupkatin tsawantrum wari jeati. Ame wakeramuram nayaimpiniam umikma ana núnisan ju nunkanmasha uminkiatí. ³ Aparú, ii yurumkarj ashí tsawant amasta. ⁴ Tura winia nemasrun tsankurajna núnismek, Aparú, winia tunaaru tumashrisha tsankurturta. Tunáa wakeruktin tsankatrukaip. Antsu ashí tunaanumiá uwemtikrurta.”

⁵⁻⁶ Nuyá Jesus juna tímiayi. “Wats, ju titiái. Kashi ajapén amikrum werishtameash. Tura “Winia amikiur yajaya winia jearuí yama tayi. Tura ajamsatniun penké takaktsujai. Tuma asantai amikru, menaintiu apatuk ajamprustá” tíchatameash. ⁷ Tura nii inít pujusan chichaak “Warí, wáitisha epenmiaiti, tura winia uchirsha wijiai ashí tepeenawai. Itiur nantakniak amastaj. Itit awajtipia” turamchanpiash. ⁸ Wats, paant tájarme, niisha amikrum asa, nantaki ikyatmastinian nakitiayat, itit awajtin tusa nantaki ashí wakeramna nuna suramsattawai. ⁹ Tuma asantai tájarme: Yus seatarum; túrakrumin suramsattarme. Eakrumka wáinkiatarme. “Winiajai” tákurmin awaintiamattarme. ¹⁰ Seana núnaka suíniatsuk. Eana nuka wáintsuk. “Winiajai” tuinia núnaka awainiatsuk.”

¹¹ ‘Wats, átum uchirtintiram, ame uchiram apatkun seatmakui ¿kayaash súsaintiam? Namakan seatmakui ¿napíash súsaintiam? ¹² Nujintian seatmakuisha ¿titiñkiash súsaintiam? ¹³ Warí, átum imiá yajauchitirmesha atumí uchirj pénker ana nu tuke súchakaitrum. Atumí Aparj nayaimpiniam pujana nu, seakrumniñkia nú nankaamas ni Wakanin suramsattawai.” Tu unuiniamiayi.

*Jesusan “iwianchi kakarmarijiaí túrawai” tiarmiayi
(Mateu 12.22-30; Márkus 3.19-27)*

¹⁴ Shuar iwianchruku asa chichachu ámiayi. Nuna enentáiyān nu iwianchin Jesus jiki akupkamiayi. Íwianch jiinkimtai chichachu chichasmiayi. Túramtai shuar nuí pujuarmia nu ti enentáimprarmiayi. ¹⁵ Tura chikich tiarmiayi “Juka iwianchi kapitíāntri Satanásan, ni chikich naari Pirsepún umirniuiti. Tuma asa nuna kakarmarijiaí iwianchin jiki akupeawai.”

¹⁶ Tura chikichkia, nekas Yúsnumiā taawashit tusar “Nayaimpinmaya kakaram ana nu iniakmasam aents tujintiamu túrata” Jesusan tiarmiayi.

¹⁷ Tura Jesus tu enentáimiainian neka asa tímiayi “Núu nunkanmayan shuar nuamtak kajernaiyakuinkia nú nunka wárik meserchattawak; nuamtak shuarsha ni shuarjiaí kajernaiyaksha amunaikchartatuak. ¹⁸ Wíniaka “Pirsepú iwianchi kakarmarijiaí iwianchin jiki akupeawai” túruttsurmek. Tuma asamtai tájarne, uunt iwianch Satanás naartin, ni suntarijiaí kajernaiyaksha çitiur tuke kakaram átink’? ¹⁹ Tura Wi Pirsepú kakarmarijiaí iwianchin jiki akupeakuinkia, atumi shuarisha çyana kakarmarijiaín iwianchin jiki akupena? Niisha “iwianchi kakarmarijiaí túrichuitji” tuniaisha çitira Winiasha, “iwianchi kakarmarijiaí túraití” turutminiaitrum? ²⁰ Wikia Yusa kakarmarijiaí iwianchin jikin akupeajai. Nu nekaarum Yus atumi enentáin akupin ajasuana nu nékarme.’

²¹ ‘Kakaram áishman kíishtumaktajtsa iwiarnar wajas jeen wáinkui, ni wariri init ana nusha tímiatrusan áiniawai. ²² Antsu niijiaí nankaamas kakaram ana nu winiakka nupetkashtatuak. Tura kíishtumaktinian iwiar takakman jurawai. Tura kasamkámun ni amikrin súawai. Kakaram áishman iwianchin nakumeawai. Tura nujai nankaamas kakaram áishman Winia nakumprawai. ²³ Iista. Winia nemartatsna nu winia nemasruiti. Núnisan Winia yáintsuna nuka aya iturchat nájateawai.’

*Iwianch jiki akupkamuitiat wáketna nuna ujakmiania nu
(Mateu 12.43-45)*

²⁴ Nuyá Jesus juna tímiayi: ‘Shuara enentáiyā íwianch jiinki ayamprataj tusa yumi penké yútatsna nuí wéawai. Tura ayampratniun wáincha asa ataksha waketkitniun enentáimui. “Wi jíinkimij nuín waketkitjai” tawai. ²⁵ Tura waketki péñker iwiamun tura ankant aan wáiniui. ²⁶ Nuna wáiniak, ni ain siati iwianchin niijiaí nankaamas yajaunchin itia enkemáwartatui. Túrunamtai nu shuar nuiki nuna nankaamas yajauch ajastatui.” Tu tímiayi Jesus.

Nekas warastin

²⁷ Shuar iruniarmia nuí Jesus nuna chichaa pujai, nuwā untsukum “Ame nukun Yus ti yáinkiai. Ni ampujén ame pujuschamkam. Ámin amuntstamachmakam” tímiayi.

²⁸ Tutai Jesus tímiayi “Antsu ni chichamen antukar umirainia nuna, nukurjai nankaamas Yus ti yáinkiaru áiniawai, tajai” tímiayi.

(Mateu 12.38-42; Márkus 8.12)

²⁹ Shuar untsurí Niin káunkarmatai Jesus tímiayi “Yamaiyā shuarka yajauch áiniawai. Yajauch ásar, chichartuiniak “Nekas Yúsnumiātkiumka aents tujintiamua nu túram Yusa kakarmari iniakmasta” turutainiawai. Túrasha áyatik yaunchu Junas túrunamujai iniakmasmia nujain nekaatin áiniawai. ³⁰ Kame Junas túrunamujai Níniwi péprunmaya shuaran yaunchu Yus ni kakarmarin iniakmasmia núnisan yamaisha Aents Ajasu tutainjiana nu Wi túrunamujai Yuska ni kakarmarin iniakturmastatrome. ³¹ Yaunchu

Sarumún uunt akupin pujaj Sepa núŋkanmaya nuwa akupin Sarumúnka chichamen nekaataj tusa ti jeashtanmaya támiayi. Tura yamaikia Sarumunjai nankaamas pujaj átumka anturtatsrume. Tuma asamtai Wi tájarme, Yus ashí shuaran nekapsattana nu tsawant jeamtai nu nuwa, akupniun péŋker anturka asamtai, Yus ímianum péŋker átatui. Antsu atumsha Winia anturtukcha asakrumin Yus ímianum yajauch átatrume. ³² Tura Yúsnan etserin Junas Níniwi péprunmaya shuarum Yus Chichaman etserkamtai nu shuar ni tunaarin enentáimtusar enentáin yapajjáwarmiayi. Tura jui yamáí Junasjai nankaamas etserin pujajai. ¡Tuma asamtai nekapsatin tsawant jeamtai Níniwinmaya shuar yamaiya shuar árumna nuna sumantikramat-tarme!

Ayashi tsáapnintrí
(Mateu 5.15; 6.22-23)

³³ ¿Shirikip ekeemakar úŋktinkiait? Pitiaknumsha eŋkeashtiniaiti. Antsu shuar jeá wayana nu paant ímsat tusar yakí ekensatniuiti. ³⁴ Ame jiiimijiai wáinkiam nujaj wekasatin nekaattame. Tuma asamtai ame jiiimijiai péŋker ana nu wáinkiumka péŋker wekasattame; antsu ame jiiimijiai yajauch ana nu wáinkiumka, kiritniunam wekasatniua núnisan yajauchiniam wekasattame. ³⁵ Anearta. Enentáimin tsáapin ana nu kiritin ajaschati tusam anearam wekasata. ³⁶ Ame ayashmiin kirit ajatsuk aya tsáapniniaitkiuŋkia, shirikip paant awajea núnisan ashí paant wáinkiattame” tímiayi.

Pariséuncha, Israer-shuara jintinniurísha “yajauchiitrume” tímiayi Jesus
(Mateu 23.1-36; Márkus 12.38-40; Rúkas 20.45-47)

³⁷ Jesus chichasua amikmatai Pariséu shuar, winia jearui yurumáitia tusa untsukmiayi. Tutai Jesus wayá misanam pujusmiayi. ³⁸ Tura Israer-shuar ikijmiartin ana nuna túrutsuk aya pujakui Pariséusha nuna wáiniak “maa ¿urukamtia tura?” tu enentáimsamiayi.

³⁹ Tura Uunt Jesus tímiayi “Pariséutirmeka atumí yurumtairi aya pátatek nijiaktin ti wakeriniaitrume. Atumsha nu yurumtaijiai méteketrume. Pátatek péŋker túrarme. Tura atumí enentáinkia kasamkatniusha tura yajauchia nusha piakuiti. ⁴⁰ ¡Enentáimcha! Warí, ashí pátatek wáiniaji nuna Yus najanachmakia; tura init paantcha ana nunasha Yúsak najanachmakia. ⁴¹⁻⁴² Aneartarum, Pariséutirmesha. Aya nuka méntasha, anissha tura aya apatkusha Yus súsatin ti enentáimprume. Nukasha tsuriasrum apatkusha tias ana nuyá chikichik achikrum, Yúsnaiti tátsurmek. Tura antsu nu túratin iniaitsuk péŋker wekasatniusha, Yus anenmarmena nusha péŋker enentáimsatniuitrume. Wats init, enentáimin ana nútiksarmek jusam susarta. Nuŋkia ashí chamir átatui.’

⁴³ ‘Tura aneartarum Pariséutirmesha. Yus áujtai jeanam penkeri puju-tainium pujustin wakerarme. Tura jintiá aents ímiainiamunam ti shiir áujtusarat tusarum wakerarme.’

⁴⁴ ‘Jintinniutirmesha, Pariséutirmesha máí-metek aneartarum. ¡Antar shiir chichamtinia! Iwiarsamu paantcha núniniaitrume. Shuar nu nankaamaksha nájamiat nékatsui. Núnisan shuar atumi chichame antukar yajauchia nuna nekartamtsurme.’

⁴⁵ Nuikia Israer-shuara jintinniuri chikichik Jesusan chicharuk tímiayi “Uuntá, nu tákum incha yajauch chichareame.”

⁴⁶ Tutai Jesus tímiayi “Atumsha jintinniutiram aneartarum. Atumi akupka-murijiai káarak ti kijin entsakchamnia súarme. Tura átumka yáintaj tusarum atumi uwejejaisha penké ántiatsrume.’

⁴⁷ ‘Aneartarum tájarme. Yaunchu atumí uuntri Yúsnan étserniun máawarmia nuna iwiarsamurí átum jeamniuitrume nu etserin ti pé_{nk}er ásarmatai kajinmatkishtin. ⁴⁸ Nu túrakrum atumí uuntri túrawarmia nu, “yajauchichuiti” tarume. Warí, niisha máawarmiayi, tura atumsha máawarai táyatrum niijjaj méteketrume. Warí, Yúsnan etserniu iwiarsamurín jeamkuram atumek sumarmarme.’

⁴⁹ ‘Atumí túramurín nekáa Yus juna yaunchu tímiayi: “Winia etserturniun tura winia akatramurnasha niin akuptukartatjai. Túramtai chikichnaka máawartatui, tura chikichnaka pataatukartatui.” ⁵⁰ Tuma asamtai ashí ni etserniurín maamu ainia nuna, yamaiya áentstirmin Yus sumantikramatarme. Nunka najanamunmaya júkí ⁵¹ yamáí ímiajaj maamu ainia nuna, kame Apir maamunmaya júkí yamáí Sakarías maamua tímiajaj anintrustatui. Namañ maar Yus sutai ámanum tura Yus-jea ámanum ajapén atenkamunam máawarmia nú Sakaríasan tajai. Nu tuma asamtai tájarme, ni etserniurí maantamnewarmia nuna yamáí matsatrumna nútirmin aninmasartatui.’

⁵² ‘Jintinniutiram aneartarum. Waiti asakatniua núnisrumek nekas nekaatin surimiarme. Atumkesha nékatsrume. Tura nekaataj tana nusha suritiarme” tímiayi.

⁵³⁻⁵⁴ Jesus nuna takui Pariséusha, jintinniusha ti kajerkarmiayi. Tura nii tana nujaj “yajauch túrame” titiai tusar wakeruiniak untsurí anintriarmiayi.

12

¹ Nu tumaj shuar ti untsurí káunkarmiayi. Ti kaunka ásar nawen mainajatnai ajarmiayi. Tura Jesus ni unuiniaturín tútan juarkimiayi. “Pariséu ántar chichamtin ániawai. Nuka wakaprutaiya núnisaiti. Wakaprutaikia nijiamanch yumirniun yama enkeam páantchaiti. Tura ukunam nekaamni-aíti. ² Núnisañ ashí paantcha ana nu iwiainiakma átatui. Uukma ana nusha nekaamu átatui. ³ Nu tuma asamtai, kiritniunam tímiarmena nusha tsawái tsáapin ajasmanum antunkattawai. Tura jea init pujusrum ishishmasrum tímiarmena nusha áa ti paant etsernaktatui.’

Yusak ashamkatniuiti (Mateu 10.28-31)

⁴ ‘Amikrutiram, aya ayashmin main ainia nu ashamkairap, tájarme. Ayashmin maa nú arantka máashtatui. ⁵ Tura ya nekas ashamkatniuitrum, nuna paant jintintiattajrume. Ame ayashmí maa, nuyá ámin jiniun akuptamkatniun tujintiatsna nu ashamkatarum. Ee, Yus ashamkatarum, tájarme.’

⁶ ‘Jimiará chin_{ki} ishitiúpchich ishichik kuitjaj surukchatniukait. Túrasa Yussha nu chin_{kin} pen_{ké} kajinmatkishtatui. ⁷ Wats, ashamkairap. Untsurí chin_{kijaj} nan_{ka}amas Yuska atumin enentáimturmarme. Warí, ame intiashmin mash Yus nekapmaruiti.’

(Mateu 10.32-33; 12.32; 10.19-20)

⁸ ‘Ashí shuar ashí ímiainiamunam Winia Aents Ajasu tutain, Winia natsantruiniatsna núnaka, Wisha Yusa suntarij ímiainiamunam natsantrashtatjai; ⁹ antsu shuar ímiainiamunam Winia natsantrana núnaka Wisha Yusa suntarij ímiainiamunam natsantrattajai.’

¹⁰ ‘Winia, Aents Ajasu tutain, shuar yajauch chichartakuin_{ki} nusha tsan_{ku}ramniaiti, tura Yusa Wakan_{in}cha yajauch chicharkuin_{ki} nuka pen_{ké} tsan_{ku}rachminiaiti.’

¹¹ ‘Wats, Israer-shuar iruntai jeanmasha, tura Israer-shuar kapi_{ti}ánniumsha, uuntnumsha juramainiakui, aninmainiakui sha warintiajak tusam ti enentáimsáip. ¹² Ame áimkiatin jeamtai, Yusa Wakan_i ame títiatmena nuna jintinramattawai,” tu timiayi.

Kuítiak enentáimtuschatniuitji

¹³ Chíkich áishman Jesusan tímiayi “Uuntá, ii aparí ikiurtamkimiaj nuna yatsur winiasha nakak surustí, titia” tímiayi.

¹⁴ Tutai Jesus tímiayi “Áishmanka, atumin nu túratin anaikiamukaitiaj.”

¹⁵ Nuyá tímiayi “Pénker enentáimsatarum. Nii takakna nújain shuar iwiaaku, áchatniuiti. Tuma asamtai kuítrintin ajastin aya nuke enentáimsaip.”

¹⁶ Nuyá juna métek-taku chichaman unuiniak tímiayi:

“Kuítrintin áishman ni ajaríyan arakan ti nukap juukmai. ¹⁷ Tura “¿Ti nukap asamtai tuiñ ikiustaj. Itiurkatjak?” tu enentáimsamiai. ¹⁸ Wats, wi nékajai. Winia ikiutái-jeárun ashiran nú nankaamas úuntan najanatjai. Tura nuí ashí ikiustajai. ¹⁹ Nuiñkia untsurí uwitin shiir pujustinian ikiusman takustatjai. Tuma asamtai, ayampran, yurumán, umaran shiir pujustatjai” timiai.’

²⁰ “Tura Yus nin chicharuk timiai “Netse. Yamái kashi jakattame. Nuiñkia imiá núkap ikiusumna nusha ¿yana átata?” timiai” tímiayi.

²¹ Nuyá Jesus tímiayi “Shuar niñki kuítrin ikiauntumna nu, núnisaiti. Túrasha Yusjai ísmaka kuítrinchaiti.”

*Yus ni uchirín péñker wáinkiaiti
(Mateu 6.25-34)*

²² Nuyá ni unuiniamurín Jesus juna tímiayi: “Warí yuarik pujustaj tura warin entsartaj tusarum nuke ti enentáimsairap. ²³ Yus iwiaaku átinian amasu asa yurumkancha amastatui. Tura ju ayashniasha najana asa entsataincha amastatui. ²⁴ Chiñkisha enentáimsatarum. Niisha arakmainiatsui. Juuk yurumkan ikiuiniatsui. Tuma aiñ Yuska ni yurumátniurín tuke súawai. Atumsha chiñkia nú nankaamaschakaitrum. ²⁵ Tura ya shuarak, ti enentáimtana nujai nú naya ajasminiait. ²⁶ Kame yúpichuch ana nusha túrachminiatiatrumsha, ¿urukamtai chíkich ainia nusha ti enentáimtarum?”

²⁷ Íistá, kukujsha takaachitiat tura nájanchitiat ti shíirmach áiniawai. Yaunchu akupin Sarumún ti shiir iwiamamniuitiat kukujia tímianchayuyai. ²⁸ Iis, nupa yamá tsakaawai tura kashin aents tsupikiar jinium apeánáwai. Tuma aiñ Yus ti shiir awajeatsuk. Nuna tura asa atumniasha nú péñker wáitmakchattawak. ¿Urukamtai Yus nekas enentáimtatsrum? ²⁹⁻³⁰ Ju nunkanam ana nu ti pachirap. Chíkich shuar, Yúsan nékainiatsna nu, warin yuataj, warin umartaj nuna ti pachiniawai. Tura atumsha tu enentáimsairap. Urukatjak, tiirap. Ame Apa nayaimpiniam pujana nu, ashí atsumarmena nuna nékawai. ³¹ Antsu emka Yusna nu enentáimtustarum. Túrakrumniñkia atsumamna nuna Yus suramsattawai.’

*Kuítian pachis Jesus unuiniamiania nu
(Mateu 6.19-21)*

³² ‘Winia murikrutiram ashankairap. Untsuríchuitrume. Túrasha atumí Aparí ni akuptairín pachitmaktasa ti wakerutmarme. ³³⁻³⁴ Kuítrum tui aa, nuí tuke enentáimtittiarne. Tume asamtai takakrumna nu surukrum atsumainia nu susatarum. Nuka enketai arut ajatsna nuí enkeatniua núniskete. Túrakrum nayaimpinmaya kuit amuatsna nu íkiáuwearme. Nuísha kasa nu kuitian kasamkataj tusa wayachminiaiti, tura kayaasha nu kuitian yúatniun tujintiaawai.’

Anearar wekasatniuitji

³⁵⁻³⁶ ‘Ju enentáimsatarum. Ni uuntri nuatnaikiatin námpernumia taa, “uraitia” takui, takarniuri jinia ekeemakar wárik urattiai tusar nakáa pujuiniawai. Atumsha núnisrumek Wi atumí Uuntri támatai, shiir itiaatai tusarum anearum wekasatarum. ³⁷ Ni uuntri taak iwiáa pujuinian wáinkiarai

nuka shiir pujuiniawai. Nu úuntak iwiar, “misanam pujustarum” ni takarniurin títiatui tura yurumkan sústartatui. ³⁸ Kashi ajapén taaksha tura tsawaana a_i taaksha ni takarniurin iwiáa pujuinian wáinkiuinka, nu takarin shiir pujuiniawai. ³⁹ Tura jusha nekaatarum. Jeenniua nu, kasa tátinian nékaitkiunka, iwiáa pujusaayi. Kasa wayá kasamkatniun suritkiaayi. ⁴⁰ Atumsha núnisrumek, anearum pujustarum. Wi Aents Ajasu tutai aya aneachmanum tátatjai” tímiayi.

Pénker takarin yajauch takarniujai
(Mateu 24.45-51)

⁴¹ Nuyá Pítiur aniasmiayi “¿Aya ínkik unuiniartaj tusam nu métek-taku chicham támek. Kame ashí nekaawarat tusamek tame?” tímiayi.

⁴² Tutai Jesus tímiayi “Atumsha pé_nker takatan wáinnia núnisketrume. Takatan wáinin ni uuntri takatrin takainia nuna, yurumátin jeamtai, ayurkamna núiti ni úuntrin shiir umirna nu, tura pé_nker enentáimtana nu. ⁴³ Ni uuntri taa, takatrin tímiatrusan túran wáinkiuinka nu wáinniusa shiir enentáimsanniaiti. ⁴⁴ Umirin asamtai, ni uuntri ashí ni waririn wáitrukata tusa apujstatawai. Nuna paant tájarme. ⁴⁵ Tura nu takatan wáinniusa “úuntur wau táchattawai” tu enentáimias, ni uuntri takarniurin yajauch awajeakuinka tura niñki ti yurumá, ti umar nampeakuinka, ⁴⁶ nuinka ni uuntri ni nákachmanum aya aneachma taa ti asutiáttawai. Umichu pujuinia nu akupkattawai.’

⁴⁷ “Takaran ni uuntri wakera nuna nékayat, iwiartsuk umitsuk pujakka ti awatramu átatui. ⁴⁸ Túrasha takarin nékachu asa, asutniámnia túrakka, ishichik awatnartatui. Núkap susamu ana núnaka núkap seawartatui. Núkap ataksamu ana núnaka núnisan nankaamas seawartatui.’

Jesusjai shuar akannartatui
(Mateu 10.34-36)

⁴⁹ ‘Jijjai nekapsatniua nútiksanak nunkanam jinia ikiapartaj tusan tamajai. Tura túrunat tusan ti wakerajai. ⁵⁰ Imiantinia núnisan itiurchat ukatruktatui. Nusha wárik amuukat tusan ti wakerajai. ⁵¹ “Ashí shuar shiir pujusarat tusa táwiti” tu enentáimturumek. Núchaiti. Antsu shuar tesanairat tusan táwitjai. ⁵² Yamái jukimiutak chikichík shuarnum senku ainia nu akannakartatui; maintiu shuar ni shuarin jímiarar nakitrartatui. Jímiarsha ni shuarin maintiun nakitrartatui. ⁵³ Apasha ni uchirin nakitrattawai. Núnisan uchisha ni aparin nakitrattawai. Nukusha ni nawantrin nakitrattawai; nawantrisha nukurin nakitrattawai. Tsatsarisha ni najatin nakitrattawai; najatisha tsatsarin nakitrattawai.”

(Mateu 16.1-4; Márkus 8.11-13)

⁵⁴ Jesus áentsun chicharuk junasha tímiayi “Atumsha nantu akaatainmaani kiarumatai “yutuktatui” tátsurmek. Nusha nekas tárume. ⁵⁵ Tura anaaraniá nase násenkamtai “séejik átatui” tárume. Tura nekas tárume. ⁵⁶ Yuranminmasha nunkanmasha túruna nu nékarme. Túmaitatrumsha ju tsawantaj túrunattana nusha ¿itiura nékatsrum? ¡Maaj, ántraitrume!”

Nemasrumjaisha nawamnaikiata
(Mateu 5.25-26)

⁵⁷ “Túrasha pé_nker ana nusha ¿urukamtai atumek enentáimsarum wáintsuram? ⁵⁸ Irutramuram úuntnum júramkuinka jintia wésamek “nuamtak iwiarartai” titiá. Túrachkumniinka akupniunam juramkittieme. Tura niisha suntarum akuptamkattame. Tura niisha sepunam enketmattawai. ⁵⁹ Tura nekas tajai, nuj enkemamka ashí rearchisha akikmachkumka jíinkishtatme” tímiayi.

13

Ii enentái yapajíátniuitji

¹ Nu tsawantin chícham ujaktai tusar Jesusan tariarmiayi. Kariréa nunkanam Israer-shuar ni waakarín máawar Yus susatai tusar pujuiniaí, Piratu nin maa, nuna numpen waaka numpejai pachimpramun ujakarmiayi. ² Tura Jesus tímiayi “¿Warí enentáimsarum? Kariréanmaya áishman tárumna nu, chíkich Kariréanmaya áishmanjai nankaamas yajauch ásar túrunawarai ¿tu enentáimprumek? ³ Atsá; atumí enentái yapajíáchkurmeka núnisrumek atumsha jakattarme. Nuna paant tájarme, tímiayi. ⁴ Tura tiasiúchu áishman yakí jea Seruí kupiniak iniaak nekenkarmiania nu, ¿warí enentáimtarum? Chíkich Jerusarénumia shuarjai nankaamas tunáa ásar túrunawarai ¿tu enentáimprumek? ⁵ Atsá, tájarme. Atumí enentái yapajíáchkurmeka núnisrumek atumsha jakattarme.”

Iikiu numi nereatsna nu

⁶ Junasha Jesus métek-taku chichaman tímiauyi. Júiti: Shuar ni ajariin iikiu numin araamun takakuyi. Nerekchiash tusa iyumai. Túrasha nere atsumai. ⁷ Nuinkia ni ajarin wáinnium timiai “Antukta, menaintiú uwitin juna nere átai tusan waketrú pujajai; túrasha penké wáinkiachjai. Ajakta. ¿Urukamtai ánttrash wajastata?” ⁸ Tutai ajá wáinin timiai “Atsá, uuntá; ju uwitin wajastí. Wajamurin takarsatjai tura péñker nunkan matsatkatjai. ⁹ Nujai nerekchampiash. Tura tuke nereachkuinkia nuinkia ajakta” timiai”, tímiayi.

Nuwan punuá kaarun Jesus tsuármiania nu

¹⁰ Ayampratin tsawantai Israer-shuar iruntai jeanam Jesus unuiniak pujumiayi. ¹¹ Nuisha nuwa pujumiayi. Nu nuwasha tiasiúchu uwitin tuke jaa pujumiayi. Íwianch nin yajauch awajas apuna tuke ikiaramiayi. Túramu asa pañkái nakuenkataj tukamá penké tujinmiayi. ¹² Jesus nuna wáiniak, chicharuk “Nawantrú, ame jaamurmiya ankant ajasume” tímiayi.

¹³ Nuna tinia ni uwejejai antinmiayi. Tura nú chichamaik nuwasha pañkái nakuenkamiayi. Tura Yusa náarin uunt awajsamiayi. ¹⁴ Tura Jesus ayampratin tsawantai tsuaru asamtai, iruntai jea uuntri kajek iruntrarmia nuna tímiayi “Sais tsawantin takaschatniukait; ayampratin tsawantai tsuámartaj tusarum táchatniuitrume. Sais tsawant ana nui tátiniaitrome.”

¹⁵ Tura Jesus tímiayi, “¿Ántar chichamtinia! ¿atumí waakarisha atumí umpu-ururisha yumi aartai tusarum ayampratin tsawantin atíarum júatsrumek? ¹⁶ Tura ju nuwasha, atumí shuari Apraám shuarnumia akiiniaiti. Nii tiasiúchu uwí Satanás yajauch awajsamujai jinkiamuyayi. Níncha ayampratin tsawant aiñ yajauch awajsamunmaya atíachminkiait” tímiayi.

¹⁷ Jesus nuna takui ni nemasrisha natsaararmiayi. Tura penké shuar ni péñker túramurin wáinkiar warasarmiayi.

Mustasa jinkiaí

(Mateu 13.31-32; Márkus 4.30-32)

¹⁸ Nuyá Jesus tímiayi “¿Yusa akupeamuri warijiaín métek-takuit? ¹⁹ Mustasa jinkiaíjiaí métek-takuiti. Mustasa jinkiaíncha shuar ni ajariin araamiayi. Tsapái, tsakaak, uunt numi ajasmiayi. Ti uunt asamtai chiniki ni kanawen pasunmarmiayi.”

(Mateu 13.33)

²⁰ Tura junasha tímiayi: “¿Yusa akupeamuri warijiaín métek-takuit? ²¹ Tanta wakaprutaia métek-takuiti. Arinia núkap ana nui nuwa wakaprutain ishichik enkeamiayi. Túram ashí wakapruamiayi.” Tu tímiayi.

*Yupikiach waiti**(Mateu 7.13-14, 21-23)*

²² Jesus Jerusarénum jeattsá weak untsurí peprunam wayá unuiniarku-tak wémiayi. ²³ Weaj chíkich shuar aniasmiayi “Uuntá, ¿uwemainia nu ishichkikiat?”

²⁴ Tutai Jesus tímiayi “Yupikiach wáitiniam wayataj tusam ti wakeritiarum. Kame untsurí wayataj tusar wakeriartatui, túrasha tujinkiartatui, tájarme.

²⁵ Jeá nérenniuri wáitin epenmiatai, atumsha aa wajarum nu, wáitiniam wajasrum untsúakrum “Uuntá, uratritia” títiatrume. Túrasha “Nékatsjarme. ¿Tuyantskaitrum?” turamtatrume. ²⁶ Nuyá átum títiatrume “Túrasha, uuntá, iisha ámijiai yurumámji, ámijiai umarmaji. Tura ii pépruríncha unuiniamame.” ²⁷ Túrasha nii títiatui “Tuyantskaitrum, nékatsjarme, tátsujrumek. Yajauch túrintirmeka winiyaŋka kanaktiarum.”

²⁸ ‘Nuyá Apraámsha, Isaksha, Jakupsha tura ashí Yúsnan etserin Yus aku-peana nuí wayawaru wáinkiarum tura aa ajapam pujusrum ti útkuram naim tásarara ajattarme. ²⁹ Tura Yus akupeana nuí, nantu tatainmaaniyasha nantu akaatainmaaniyasha, arakiasha, nuŋkaaniyasha taar, imia Israer-shuarchaitiat yurumátai tusar pujusartatui. Tura atumsha, “Apraám shuáraitjai” táyatrume, wayashtatrume. ³⁰ Nuisha yamá ukunmaani ainia nusha emka ártatui; tura yamá emka ainia nusha nuisha ukunmaani ártatui.”

*Jerusarénumaani Jesus wémiayi**(Mateu 23.37-39)*

³¹ Nu tsawantaj Pariséu aents Jesusan tariar tiarmiayi “Erutis mantamatta wakerutmawai. Tuma asantai juyanka wetá.”

³² Tutai Jesus tímiayi “Werum nu kujancham ju titiarum: “Íistá. Yamaisha ishichik tsawant iwianchin júkin akupkartajai; túran jaancha tsuáartajai. Tura ukunam amuktatjai.” ³³ Tura Jerusarénumaani ishichik tsawant tuke wétinaitjai. Yúsnan etserin aya Jerusarénuman jákatniuiti.’

³⁴ ‘Jerusarénumiatiram, Yúsnan etserin máinaitrume; tura Yus akatar akupturmakmania nusha kayajai tukurum máinaitrume! Tuma ain atash ni shiamprin etektana núnisnak Wisha weaktasan wakerimjiarme, túrasha nakitramarme. ³⁵ Iistarum. Atumniasha Yus ajapramaitrume. Tura “Yusa náarijn winiana nu, shiir atí” títiatrume nú tsawant jeatsain penké wáitkiashtatrume. Nuna tájarme” tímiayi Jesus.

14*Áishman eaak-jaan Jesus tsuármiania nu*

¹ Ayampratin tsawantaj Pariséu uuntri jeen Jesus yurumáttsa wémiayi. Tura chíkich Pariséu wariniak túrat tusar ii pujuarmiayi. ² Nuí áishman eaak-jaa Jesus pujamunam naka pujumiayi. ³ Jintinniuncha Pariséuncha Jesus aniasmiayi “¿Warí tárume? ¿Ayampratin tsawantaj jaa tsuárminkiait. Tsuárchamniakait?” tímiayi.

⁴ Tura niisha áimtsuk pujuarmiayi. Nuñkia jaan antin tsuármiai. Tura “shiir wetá” tímiayi. ⁵ Nuyá Pariséun chicharuk, “Atumí umpuurarisha, waakarisha waa táurmanum akaiki iniamtai, ayampratin tsawant ain nu chichamaik júatsrumek” tímiayi.

⁶ Takui áimkiatniun penké tujinkiarmiayi.

Nuátnaikiatin nampernum ipiaamu ármia nu

⁷ Ipiaamusha penkeri pujutainium pujustaitsar ti wakeruiniakui, Jesus nuna wániak juna jintintramiayi:

8 “Nuátnaikiatin nampernum penkeri pujutainium pujusaip. Nui pujakminkia, chíkich ámijiai nankaamas penkeri táchatpiash.’

9 ‘Tura ipiatmania nu chichartamuk “Chikich iiktusta” turamchatpiash. Nuiñkia chíkich nánkatkamu pujutainium wéakum natsartatme. 10 Antsu ipiatmakmin, nánkatkamu pujutainium pujustá. Nuiñkia ipiatmamnia nu chichartamuk “Amikru, ámeke jui penkeri pujutainium pujustá” turamtatui. Nujai chíkich ipiaamu ainia nu, “nekas penkerinti” turamartatui. 11 Iimiata, “penkerintjai” tu enentáimtuma nuka péejchach awajnastatui. Tura ímianchach enentáimtúmana nuka waantu ajastiniaiti.”

12 Nuyá Nin ipiaamua nuna chicharuk tímiayi “Amesha yurumáití tusam untsuktajtsam wakerakmeke, ame amikrumsha, yatsumsha, ame shuarumsha, írutramuram kuítrintin ainia nusha ipiaawaip. Nii ipiaamka, ataksha íksan ámin ipiatmashtatuak. Nujai akikma átatme. 13 Antsu yurumáití tusam untsuktajtsam wakerakmeke, kuítrincha, wekaicha, shutuapsha, kusurusha ipiaawarta. 14 Niisha akirmaktinian tujintiainiawai. Péñker shuar nantakiartatna nui akinkiattame. Nu tuma asamtai warastatme” tímiayi.

Uunt namperan Jesus nekapmá chichasmiania nu

15 Nu misanam pujuarmia nuyá, chikichik Jesus chichaamun antuk, Jesusan tímiayi “Yus akupeamunam pachiiniak, yurumkunka ti shiir ainti.”

16 Nuna takui Jesus juna jintintiamiayi: “Áishman namperan nájanut, untsurí shuaran taartí tusa akatar akupkamai. 17 Yurumátin jeamtai “Winitiarum, yurumátin jeayi” tu tiarta tusa ni takarniurin akupkamai. 18 Tura winichminiaitji tusar ashí ujakarmai. Chíkich timiai “Nunkan yamáí sumarmakjai. Iyutaj tusa wéakun winishtatjai. Tsankurturti” timiai. 19 Tura chíkich chichaak “Wisha tias waakan sumarmakjai. Nekapsatsan wakerajai. Tuma asan winishtatjai. Tsankurturti” timiai. 20 Tura chíkich chichaak “Yamáí nuatnaikijai. Tuma asan winishtatjai” timiai. 21 Takarin waketki ni úntrin ashí nuna ujakmai. Nuna antuk niisha kajekmiayi. Tura ni takarniurin timiai “Ju péprunam penker jintianmasha tura uchich jintiachinmasha weme, kuítrincha tura wekaichasha, shutuapsha, kusurusha itiaarta.” 22 Nuyá ukunam ni takarniurí taa chicharuk “Uuntá, ame turutmiamna nútiksanak túramjai; túrasha tuke ankant awai” timiai.’

23 “Tutai ni uuntri chichaak “Jintianam weme, chíkich jintiachiniam weme, wáinmena nu ashí awayawarta. Winia jearui piakat tusan wakerajai. 24 Emka ipiaawarmajnia nuka penké chikichkíksha winiñkia yurumáchartatui, tajarne’ tímiayi.”

Kristu nemarsatin yúpichuchichuiti

25 Untsurí aents Jesusjai irunki wearmiayi. Niisha nuna apajas iis juna tímiayi:

26 “Shuar ni aparíncha, ni nukuríncha, nuaríncha uchiríncha, yachíncha, umaincha Wijiai nankaamas enentáimtakka, tura shiir pujustinian wakerak Winí winitniun nakitiakka winia unuiniatur ajaschamniaiti. 27 Ni wakeramurin ajakeak ni krusri yanaki nemartatsna nu winia unuiniatur ajaschamniaiti.’

28 ‘Jea yakí jeamtaj tusam wakerakmeke, kuítian urutmak ajapawaintaj tusam tura urutmajaink’ amukaintiaj tusam emka enentáimsashtatmek. 29 Túrutsuk aya ukura iniaisam amuktin tujinkiaminkia, nuna wáiniainia nu, wishikiainiak juna tiartatui: 30 “Iiskua. Nu shuar jeamtinian nankamamiayi. Túrasha amuktinian tujinkiamiayi.”’

³¹ ‘Tura uunt kapitián chíkich kapitiánjaj mesetan najanatín áchatpiash. Emka, niisha pujus, tias mir (10.000) suntarjaj painti mir (20.000) suntar winiana nuna nupetkaintjash tusa enentáimsashtatuak. ³² Tujintiakka, chíkich kapitián jeachat pujaanak, nawamnaikiatai tusa akatar akupkashtatuak. ³³ Wats, “Kristu unuiniamurj ajastinjaj, wi takakjana juna warí winia itiurtawa” tu enentáimsatniuitrume. Túrachkurmeka winia unuiniamur ajastin tujinkiarne.’

Wee michumarka yajauchiiti
(Mateu 5.13; Márkus 9.50)

³⁴ ‘Weeka jeaku péñkeraiti. Tura michumarka çitiurak atak péñker ati? ³⁵ Wee michumarka araaamatniunmasha yayaatsui. Tura tsuatnum ikiusmasha ántraiti. Aya ajapatniukete. Kuishim ákuinkia antuktarum” tímiayi.

15

Jesus murik menkakamu chichaman unuiniamiania nu
(Mateu 18.10-14)

¹ Akupniu kuítrín-juu tura yajauch shuarsha Jesusan anturkatai tusar tarú wearmiayi. ² Tuma asamtai Pariséusha, Israer-shuara jintinniurisha Jesusan áujmatainiak “Jusha tunáa shuaran itiaawai tura niijjaj yurumáiniawai” tiarmiayi.

³ Nuna tuiniakui Jesus ju métek-taku chichaman jintintiawarmiayi:

⁴ “Shuar sian (100) murikiun takuschampiash. Nu siánnumia chikichik menkakamtai nuwintia nuíwinkia ni matsatmarijn ikiuak, menkaka nuna ti eakchattawak. Wáintsuk iniaiashtatui. ⁵ Tura wáiniak yakainium awankek waras jeen wáketui. ⁶ Tura jeen jeá ni amikrín, írutramuríncha ikiaanak “Wijjaj warastarum. Murikiur menkaka nuna wáinkiajai” tawai. ⁷ Wats, nuwintia nuiwi péñker shuar akui nayaimpiniam warastin awai. Tura antsu chikichík yajauch shuar ni enentáin yapajjámtainkia, nú nankaamas warastin átatui, tájarne’ tímiayi.

Kuit emenkakman Jesus unuiniamiania nu

⁸ ‘Nuyá chíkich enentáimsatai. Nuwá tias kuítian takakna nuna chikichik menkakamtai, wáinkiataj tusa jinia ekeemak, jean japimiak émamkes eakchattawak. ⁹ Tura wáiniak ni amikrín, írutramuríncha ikiaanak, “Wijjaj warastarum. Kuit menkakamia nuna wáinkiajai” tawai. ¹⁰ Núnisan yajauch shuar ni enentáin yapajjámtai, Yusa suntari matsatmanum ti warastin awai” tímiayi.

Uchi ni aparijn waketkitniun Jesus unuiniamiania nu

¹¹ Nuyá Jesus juna unuiniamiayi:

“Áishman jimiará uchin takakuyi. ¹² Tura pátatka uchi ni aparín timiai “Apawá, surustiniaitmena nu yamá surusta.”

“Tutai ni aparí ni kuítrín jímiapetek nakak mai uchin susamai. ¹³ Ishichik tsawant nankaamasaj pátatka uchi ni warirín irur jukí jeachat chíkich núnkanam wémai. Nuisha nánkamas yajauchin túrak kuítrín ashí ajapamai. ¹⁴ Ni kuitri ashí amuuka ajin nu nunkanam ti tsuka ámai. Niisha núnisan tsukarijn wáitsamai. ¹⁵ Túmak takatan eaktajtsa nu nunkanmayá apachiin werimiai. Nu áishmansha kuchirín wáitrukta tusa akupkamai. ¹⁶ Uchi ti tsukamak kuchi ukatramun niisha yuátajtsa ti wakerimiai. Túrasha penké súcharmai. ¹⁷ Tumáa pujus nuinkia enentáimpramai. “Winia aparuj takau shuar péñkeran ti yurumáiniawai. Tura wikia juí tsukaruí wáitiajai. ¹⁸ Wats, aparuj waketkitjai. Tura aparun chicharkun “Apawá Yúsjaisha ámijjaisha

tunaan túrajai, titiajai. ¹⁹ Ame uchiram áchamniaitjai yamaikia. Ame takarni-urmea áantsanak átaj tusan wakerajai” titiajai” tu enentáimsamai. ²⁰ Tura wajaki ni aparíin waketkimiai’ tímiayi.

“Tura ni aparísha jeachat winian wáiniak waitnentramai. Aparí tsékenki inkiun miniakak mukunámai. ²¹ Nuiñkia uchirísha timiai “Apawá, Yúsjaisha ámijjaisha tunáan túrajai. Ame uchiram áchamniaitjai.”’

²² “Túrasha ni aparíñkia ni takarniurin chicharuk “Ti penker pushí itiarum áentsratarum, timiai. Tura uwejnun aweetaisha aweemtikiatarum. Tura sapatcha aweemtikiatarum. ²³ Túrarum waaka nueram ana nu maatarum. Námper nájankur shiir enentáimsar yurumámi. ²⁴ Warí, ju winia uchir jakaapitia tu enentáimsamjai. Túrasha iwiaakui. Menkakama nuna wáinkiajai.” Nuiñkia ti warasarmai’ tímiayi.

²⁵ ‘Tumaj iwiaíi úchikia takatnum pujumai. Tura wáketuk, jeá nuntumas jantsemáiniak túntuyamun antukmai. ²⁶ Nuiñkia yaintri matsatun chikichiniak untsuk “¿Warimpait?” timiai.’

²⁷ “Tura nii chichaak “Ame yátsum tayi. Túramtai ame apa waaka nueram maatai tawai, ame yatsum penker tau asamtai” timiai.’

²⁸ “Tura iwiaíi uchi kajek wayatniun nakitramai.’

‘Tuma asamtai ni aparí jiiintiuki “wayata” timiai.’

²⁹ “Tura uchisha aparín chicharuk “Wisha ámin umirkun untsurí uwitin ame takatrumin túraitjai. Nu nékame. Túrasha winia amikrujai námper najanatin chiipiuksha penké surichuitme. ³⁰ Tura ju ame uchiram nuwajai yajauchin túrak ame kuítrumin wasurkania nu támatai, waaka nueram máachumek” timiai.’

³¹ “Takui aparí chicharuk “Uchirú, ámeke wijjai tuke pujame. Tura wi takakjana nusha ashí áminuiti. ³² Tura ame yatsum jákaiti tu enentáimsamij nu iwiaakuiti. Menkaka nu yamaikia wáinkiaji. Tuma asamtai námper najanar waraschatniukaitiaj” timiai” tímiayi.

16

Takatan wáinin

¹ Ju métek-taku chichamnasha Jesus ni unuiniamu7 ‘Tura nii chichaak “Ame yátsrin unuiniamiayi.

“Kuítrintin áishmanka takatrin wáinniuri ámai. Tura nérenniun ujainiak “Ame wáinniuram ame kuítrumin nánkamas ajapeawai” tiarmai.’

² ‘Nuna antuk ni wáinniurin untsuk “¿Warinia jusha turamainia? timiai. Yamaikia winia wáinniur áchattame. Tuma asamtai winia kuítrujai itiurkamea nu iniaktursata” timiai.’

³ ‘Tutai takatan wáinin enentáimsamai. “Maaj, wisha itiurkatjak, timiai. Nunka táurtinnisha jeatsjai. “Kuit surusta” titinnisha natsamajai. ⁴ Winia takatur atsakui yurumkan ajamprusarat tusan túratajna nuna nekajai” tu enentáimsamai. ⁵ Nuyá nérenniun tumashmaku armia nuna ankant ankant untsukarmai. Emka tamia nuna chicharuk “¿Winia úuntur urutma tumashmakuitiam?” timiai.’

⁶ ‘Niisha ámiuk “Asuitin siañ taru tumashiitjai” timiai.’

‘Tutai takata wáinin chicharuk “Pai. Papinium tumashrum ana nu juá: wárikmasmek pujusam, nu papí jaakam, chíkich papinium aya senkuentachik aarta” timiai.’

⁷ ‘Nuyá chíkich tumashmaku támatai “¿Amesha urutmá tumashiitiam?” timiai.’

‘Tutai nii chichaak “Shana siañ taru tumashiitjai” timiai.’

‘Tutai “Pai. Papinium tumashrum ana nu júiti. Chíkich papinium aya uchentak aarta” timiai.’

⁸ ‘Nuyá takata wáinniu uuntri nuna nekáa “Nii yajauch túriniaitiat imiá enentáimniuiti” timiai’ tímiayi.

Nuyá Jesus tímiayi ‘Yus-shuarjai nankaamas Yus-shuarcha aijjai ni túratniuriniak takainiak imiá enentáimkia áiniawai.’

⁹ ‘Jú nunkanam anankatin átsuk. Tura kuitsha aya jú nunkanmayankete. Tuma asamtai atumsha kuitrumjai “shuaran yaiñtaj” tu enentáimsatarum. Kuitjai yaiñtin amuukamtai atumsha amuicha jeanam ipiaamu átaj tusarum túratarum.”

¹⁰ ‘Shuar ishichik takakna nujai péñker túrakka, núkap takakna nujai sha péñker túrattawai. Tura ishichik takakna nujai péñker túrachkunka, núkap takakna nujai sha péñker túrashtatui. ¹¹ Tuma asamtai jú nunkanmaya anankartin kuitjai péñker túrachkurmeka, tuke átin ana nujai takastincha çitiur takastarumek? ¹² Takakme nuna Yus ikiatmasuiti. Nujai péñker túrachkurminkia, atumnia átinia nuna çitiurak suramsat?’

¹³ ‘Takarniuri jimiará úuntrintin ajastinian tujintiawai. Warí, chikichnaka aneak chikichnaka nakitrashta túrattawai. Turya senkuentachik aarta” timi-aituak. Chikichan umiruk chikichnaka umirkashtatui. Yussha kuitcha máimetek enentáimtuschaniaitume” tímiayi Jesus.

¹⁴ Pariséusha kuítian anen armia nu, ashí ni táman antukar Jesusan wishikrarmiayi. ¹⁵ Túmakui Jesus nin tímiayi “Atumsha aents ímmianum péñker awajmamprume. Túrasha atumí enentáincha Yus péñker nékawai. Kame winia “nankaamantuiti” turutit tusa wakera nuna Yuska nakitiawai.’

Yaunchu etserkamu, yamá etserkamu

¹⁶ ‘Juan étsetsain Muisáis aar akupkama nunasha tura Yúsnan etserin unuiniarmia nunasha antuktin ármiayi. Tura yamaisha tímianiaí ti shiir chicham awai. Yus akupeana nuí urukukit nuka paant etserkamuiti. Tura ashí shuar nuí pachiiñkiataj tusar ni kakarmarijiañ ti takainiawai.’

¹⁷ ‘Túrasha yaunchu akupkamu ashí chicham uminkiatniuiti. Nu chicham uminkiashtinkia nayaimpisha nunkasha amukatniujai nankaamas itiur-chataiti.’ *

¹⁸ ‘Áishman nuarín ajapa chikichan nuátkunka tsanirmawai. Tura nuwa ajapamu niiniurtakka nusha núnisan tsanirmawai.’

Kuítrintin áishman Rásarujai

¹⁹ ‘Áishman kuítrintin ámai. Niisha imiá shiir pushin ti kuit ainia nujai iwiarmamniuyi. Tura tuke tsawant yurumak ti kuit amia nujai namperan najanniuyi. ²⁰ Tura kuítrincha ámai ni naari Rásaru. Niisha kuchapruku tunamaruyi. Tuke tsawant kuítrinniu wáitiriñ pujuyi. ²¹ Ti tsukamak kuítrinniu misarinia kakekan yuattsá wakerimiaí. Tura yawasha ni kuchaprin nukatiarmaí. ²² Kuítrincha jakamai. Jakamtai jaka shiir pujutainium, Apraám pujumia nuí nayaimpinmaya suntar júkiarmaí. Kuítrinniusha jakamai. Jakamtai iwiarsarmaí. ²³ Jaka pujutainium wáitias pujus, pañkái ímias, Rásarun Apraámjai pujuinian wáinkiamai. ²⁴ Wáiniak untsukum “Apawá Apraamá wáitnentrurta, timiai. Rásaruka tsara uwejejai entsan uchupir winia iniairun imichturat akupturkata. Wisha juí jinium pujusan ti waitiajai” timiai.’

²⁵ ‘Tutai Apraám timiai “Uchirú enentáimpratá. Ame nunká iwiaaku pujusam ti shiir pujumame. Antsu Rásaruka nuí ti yajauch pujumai. Tura niisha yamaikia juí áyamui tura ámeká wáitiame. ²⁶ Tura nú arant nánata ti uunt awai.

* **16:17** Mateu 19.1 ya senkuentachik aarta” timiai-12; Márkus 10.1-12

Tuma asamtai juyá aĭ wétinian wakeruiniayat tujintiainiawai. Tura aĭya jui tátinian wakeruinia nusha tujintiainiawai.” ’

²⁷ ‘Nuĭnkia kuítrintin timiai “Nuĭnkia apawá Apraamá, juna seajme. Winia aparu jeen Rasaru akupturkata. ²⁸ Nuĭsha winia yatsur senku matsatainiawai. Niisha ju wáitsatniunam tácharat tusa ujákartí, tájame” timiai.’

²⁹ ‘Tutai Apraám timiai “Muisáis áarman tura Yúsnan etserin áarman takakainiawai. Nuna umikiarti.” ’

³⁰ ‘Tutai kuítrintin áimkiamai “Túrasha apawa Apraamá, antsu jakamunmaya nantaki, shuar we ujakam enentáin yapajíáwarainti.” ’

³¹ ‘Tura Apraám timiai “Muisáis áarman tura Yúsnan etserin áarman an-turainiachkunka jaka nantaki we ujakmasha antukchartatui” timiai.” Tu áujmatsamiayi Jesus.

17

Yajauch túrumtikiatin ti tsúumainti
(Mateu 18.6-7, 21-22; Márkus 9.42)

¹ Jesus ni unuiniamurĭn juna tímiayi, “Aentsun yajauchin túrumtikiattana nu tuke átatui. Tura shuar ni aĭn tunaan wakerumtikna nu aneartí. ² Ju shuar uchich ainia nuna yajauchinium túrumtikna nuna Yus imiá asutiáttawai. Tuma asamtai nuna túratsaĭn uunt kayajai kuntujnum jĭnkíá nayaantsanam ajunkam maak ainti. ³ Túrasha atumek ímiastarum. Ame yatsum ámin tunáa túrutmamtaĭnkia chicharkata; tura niisha “tsaĭnkurturta” túramkuĭnkia tsaĭnkurata. ⁴ Chĭkĭchĭk tsawantinĭn siati túrutmamtai, tura “tsaĭnkurturta, atakka túrashtatjai,” siati túramkuĭnkia, tuke tsaĭnkurata.”

Yus nekas enentáimtakrikia tujĭnkiashtatji

⁵ Jesusa unuiniamurĭ Nin chicharuk “Yus enentáimtajnia nú naĭkaamas enentáimtustin yáinmaktá” tiarmiayi.

⁶ Tutai Jesus tímiayi “Mustasa jĭnkíá ti ishitiúpchich ana núnisaĭ ishichkisha Yus enentáimtaĭtkiurmeka, sikiumuru numi wajana nu, “Wajamurmĭyanka ukuiniakam nayaantsanam wajasta” tákurmin nú numi umirtamkainti.’

Yusa takatriĭ takasar “ti peĭker túraitji” tíchatniuitji

⁷ ‘Atumí takarniurĭ arakmasua amik, waakancha iis támatai, ĭnú chichamaik amesha, “Winitiá, yurumáitiá” tíintmek? ⁸ Atsá. Antsu, “yurumak iwiarturata. Wi yurumátin tura umartincha surusminiam iwiarnarta. Nuyá ame yurumátá.” Nu tíchaintmek. ⁹ Nii túratin ana nunak túratsuk. Tuma asamtai yumĭnsashtatme. ¹⁰ Atumsha núnisrumek Yus túramna nu ashí umikiam “ti peĭker túraitjai” tíchatniuitme. Antsu “aya ii túratniurĭ ana nuke tura asar iikía ántraitji” títiniaitme.” Tu tímiayi Jesus.

Tias áishmaĭkan tunamarun Jesus tsuárarmiania nu

¹¹ Jesus Jerusarénnum wesa Kariréa nuĭka ikiuki Samaria nuĭkanam naĭkaamakmiayi. ¹² Tura péprunam jeamtai, tias áishmaĭ ripra suĭkurjai tunamaru armia nu, arant wajasarmiayi. ¹³ Tura untsumainiak “Uunt Jesusá, waitnentrurta” tiarmiayi.

¹⁴ Jesus nin wáiniak, “Pátrĭĭ werirum iniaktumastarum” tímiayi.

Tura wésar peĭker ajasarmiayi. ¹⁵ Nuyá chĭkĭchĭk ni tsuamarman nekáa kakantar chichaki Yusa náarin uunt awajki waketki Jesusan tarimĭiayi. ¹⁶ Yumĭnsataj tusa Jesusan tikishmatar piniakumar tepesmiayi. Nu áishmaĭka Samarianmayayuyayi.

¹⁷ Nuna wáiniak Jesus tímiayi “Tsuámaru tiáschakait. ĭChĭkĭch nuiwisha tui pujuinia? ¹⁸ ĭJu yajaya áishmaĭ níĭkĭk Yusa naari uunt awajsataj tusa waketki

tai?” ¹⁹ Nuyá áishman kan tímiayi, “Winia nekas enentáimtursa asam pé_nker ajasume. Wajakim shiir weta” tímiayi Jesus.

*¿Yusa akupeamuri urutaik ati?
(Mateu 24.23-28, 36-41)*

²⁰ Pariséu aents Jesusan aníak “¿Yusa akupeamuri urutaik ati?” tiarmiayi.

Tutai Jesus tímiayi, “Yusa akupeamuri paant wáinkiachminiati. “Yamaí nan_kamnayi” tichamniaiti. ²¹ “Juí awai, nuísha awai” tíchamniaiti. Warí, Yusa akupeamurinkia atumiin pujawai” tímiayi.

²² Nuyá ni unuiniamurin chicharuk juna tímiayi: “Tsawant jeattawai atumsha Winia Aents Ajasu tutain “aya chikichík tsawantkesha Nii wáinkiar_kia mak” turuttiatrume. Túrasha tujinkiattarme. ²³ Aents Ajasu tutai “juí pujawai, nuísha pujawai” tuíniakui weriirap. Tana nu nemariirap.

²⁴ Wi, Aents Ajasuitjiana nu tátinian tsawantur jeamtai paant wáitkiattarme. Peem péetuk ashí nayaimpin tsáapnin awajna núnisan wi taamu paant átatui. ²⁵ Tura nu túruntsain yamai pujuinia nu Winia nakitruiniakui ti wáitsatniuitjai.

²⁶ Winia atak tátiniur jeamtai, yaunchu Nuái pujumia nú tsawantin túrunamia núnisan túrunattawai. ²⁷ Yurumáwarmiayi, umararmiayi, nuatnaikiarmiayi, ni nawantri nuatnakat tusa surukarmiayi. Tumáa pujuinia Nuái uunt kanunam enkempramtai, amarak nu aentsnasha mash amuukarmiayi. ²⁸ Tura Sutuma péprunmasha Rauta írutramurisha núnisan Yusa asutiátniuri enentáimtutsuk pujuarmiayi. Yurumáwarmiayi, umararmiayi, sumakarmiayi, surukarmiayi, ajan_kha ajarmarmiayi, jeancha jeammarmiayi. ²⁹ Tura Raut Sutuma péprunmayá jiinkimtai asupri tutai kaya keek yútana áintsan nayaimpinmayá kakeetuk nu áentsun mash máawarmiayi.

³⁰ Núnisan winia atak tátiniur jeamtai enentáimtsuk pujusartatui.’

³¹ ‘Nu tsawant jeamtai jea yakiini pujana nú shuar ni waririn achik-taj tusa akaikishti. Jeá wayashti. Tura kampunniunam wekaana nú shuar ni jeen waketkishti. ³² Rauta nuarí túrunamu enentáimpratarum.

³³ Aya ju nun_kanmayan enentáimias “iwiaaku átaj” tana nu ni iwiaakmarin emenkáktatui. Tura ju nun_kanam ni iwiaakmarin emenkana nu nekas iwiaakma ana nuna wáinkíattawai. ³⁴ Paant tájarme. Nú káshitin jimiará áishman nuu peaknuman kanúu tepeartatui. Chikichik junaktiatui, chíkichkia ikiunkittiwai. ³⁵ Jimiará nuwá máí-metek nekée pujuartatui. Chikichik junaktiatui, chíkichkia ikiunkittiwai. ³⁶ Jimiará áishman kampuniunam wekainiartatui. Chikichik junaktiatui, chíkichkia ikiunkittiwai.” Tu tímiayi.

³⁷ Nuna antukar “Uunta ¿tuj túrunatta?” tiarmiayi.

Tutai ni chichaak “Jaka tepana nuí chuan káutkartatui.”

18

Shuar yawetsuk Yúsan tuke áujsatniuiti

¹ Shuar yawetsuk Yúsan tuke áujsatniua nuna unuiniartaj tusa Jesus ju métek-taku chichaman tímiayi:

² “Chíkich péprunam shuaran akupin amai. Nú áishman Yúsnasha asham-chauyi; shuárnasha pé_nker enentáimtichuyi. ³ Tura nú péprunam waje amai. Niisha shuáran akupniun chicharuk “Áishman winia yajauch awajtusmania nu írtusta” tusa tuke waketrú pujuyi. ⁴ Yámankamtaikkia nin anturkatniun nakitmiái. Tura ukunam enentáimias “Wisha Yúsan ashamachiatnak shuárnasha pé_nker enentáimtichuiatnak ju waje tana nuna túrattajai. ⁵ Warí niisha tuke taa itit awajtatsuk. Tuma asamtai nin kajer_kaj tusan wárik túrattajai” timiai” tímiayi.

6 Nuyá uunt Jesus tímiayi “Shuaran akupin yajauchiitiat nuna timiai.
7 Tura Yus ti péñker asa, ni achikmarin tsawaisha, káshisha untsuamka
nú nankaamas anturkashtatuak. ¿Yáitsuk menkakatuak? 8 Atsá, wárik
yáinkiertatui, tájarme. Tura Wi Aents Ajasuitjiana jú atak támatai, ¿shuaran tuke
Winia nekas enentáimturainia nuna wáinkiatjash?” tímiayi Jesus.

Pariséusha, kuítian-juuncha Yúsan áujarmia nu

9 “Péñkeraitjai” tu enentáimtumainiak chikichnaka yajauch enentáimtiarmia
nuna Jesus nekapmá chichasmiayi. Juna tímiayi:

10 “Jimiará áishman Yusa Uunt Jéen Yus áujasatai tusar wearmai. Chíkichkia
Pariséuuyi, chíkichkia kuítian-juuyi. 11 Pariséusha wajaki Yúsan áujuk júnis
tímiayi: “Yusrú, chíkich áishman kasa, yajauch, tsanirmau ainia nujai métekcha
asan yuminsajme. Tura jú kuítian-juu wajana jújaisha métekchaitjai. 12 Warí,
Ame akupkamna nuna iniankasan wisha chíkichík semanatinin jimiará
tsawant ijiarman áujeajai; tura wi achiajna nuna tiásnumia chikichkiniak
Yúsnaiti tusan akankan súajai.” Tu tímiayi.

13 “Tura kuítian-juusha arant wajas, nayaimpinmaanĭ pankái ĭimsatniunkesha
natsaamak, tsuntsuma, ni netsepen awatí “Yusá, ti tunaitjai. Waitnétrurtá”
timiai.”

14 “Wats tájarme, nu kuítian-juu shuar Yus ĭimmianum ni enentái péñker
awajnas ni jéen waketkimiai. Tura Pariséuka tamia núnisan waketkimiai.
Nekaatarum. Shuar nankaamantu enentáimtumana nuka péejchach awajnas-
tatui. Tura antsu péejchach enentáimtumana nu, nankaamantu awajnastatui”
tímiayi Jesus.

Uchisha Jesusna áminiaiti

(Mateu 19.13-15; Márkus 10.13-16)

15 Jesus antinkiarat tusar uchin itiararmiayi. Tura Jesusa unuiniamurisha
nuna wáinkiar suritkiarmiayi. 16 Tura Jesus nin untsukar tímiayi “Uchi Winí
winitin tsankamkatarum, surimkiairap. Enentáimsatarum. Uchichia áintsan
enentáimtumana nú shuárak Yus ni enentáin akupin ajasminiaiti. 17 Uchi
ni úntrin umira núnisan shuar Yúsan umíachkunka Yus ni enentáin akupin
ajaschamniaiti.” Tu tímiayi Jesus.

Kuítrintin áishman Jesusjai áujmatsamiania nu

(Mateu 19.16-30; Márkus 10.17-31)

18 Shuara untrin Jesusan tarí áujsamiaiyi. “Uuntá, amesha péñkeraitme.
Tuma asam, turuttia, ¿warinia túrakna tuke iwiaaku átataj?” tímiayi.

19 Tutai Jesus, “¿Urukamtia Winia, péñkeraitme, túrutam? Aents péñkerka
atsawai. Aya Yusak péñkeraiti. 20 Tura Yus akupkamu ana nu péñker nékame.
Tsanirmawairap, mankartuawairap, kasamkairap, tsanumprurairap, ame
apasha, nukusha shiir enentáimtustarum. Nusha nékame” tímiayi.

21 Tutai áishman tímiayi “Uuntá, úchichik mash umiki tsakaruitjai.”

22 Jesus nuna antuk “Chikichik taatramsai, tímiayi. Ame takakmena nu ashí
surukam kuítrinha ainia nu susarta. Nuinkia nayaimpiniam kuítrum átatui.
Túram nemartustaj tusam winitia.”

23 Tura nuna antuk, nu áishman ti kuítrintin asa ti kuntuts enentáimpramiayi.
24 Tura kúntuts enentáimprantai Jesus nuna nekáa “Kuítrintin ainia nu Yus
akupeamunam pachiinkiatin ti iturchataiti, tímiayi. 25 Kamiriuka, uunt ana
nu, auja jin wayatin itiurchataiti. Tura shuar kuítrin ti enentáimtana nu Yus
akupeamunam pachiinkiatin nú nankaamas itiurchataiti.” Tu tímiayi.

26 Tura nuna antukarmia nu tiarmiayi “¿Nuinkia yaki uwempramniait?”

27 Tutai Jesus tímiayi “Aents tujintiainia nuna Yuska páchitsuk túramniaiti.”

²⁸ Nuyá Pítiur Nin chicharuk tímiayi “Uuntá, iikia Ámin nemarsataj tusar ii takakmaaka ikiukji.”

²⁹⁻³⁰ Tutai Jesus tímiayi “Shuar Yus akupeana nuna túrataj tusa ni jeen ikiuakka tura núnisañ ni aparíncha, nukuríncha, yachínkisha, nuwenkesha, uchirínkisha ikiuakka ju nuñkanmasha núkap wáinkiatstawai nu shuar. Tura tuke iwiaaku pujustinniasha wáinkiatstawai.”

Ataksha ni jákatniurin Jesus ujakmiania nu
(Mateu 20.17-19; Márkus 10.32-34)

³¹ Jesus ni tuse unuiniamurin akanki ikiaanak juna tímiayi:

“Jerusarénum jeatemaji. Juisha Jerusarénum Winia, Aents Ajasu tutaín, túrunatniurun Yúsnan etserin yaunchu áatrurarmia nu uminkiatstawai.

³² Apachnium surutkartatui. Túrawar wishikrurar, katsekrukar usukruawartatui. ³³ Awatiar mantuáwartatui. Túramaitiatnak menaintiú tsawantaj nantaktiatjai” tímiayi.

³⁴ Tura Nii tímiania nuna nekas túrunattawai, tícharmiayi. Wariniak ta tusar nekaacharmiayi.

Jirikiúnmayá áishmankan Jesus ímtikmiania nu
(Mateu 20.29-34; Márkus 10.46-52)

³⁵ Jesus Jirikiú péprunam nuntumsaj, nuí áishman jii kusuru, kuítian surusarat tusa jintiá pujumiayi. ³⁶ Untsurí aents nankaamainian antuk “¿warinkit?” tímiayi.

³⁷ Tutai, “Nasarénumia Jesus nankaamawai” tiarmiayi.

³⁸ Kusurusha nuna antuk untsukum “Jesusá, Uunt Kapitián Tawit weeachukaitiam. Tátiniuya núchakaitiam. Winiaja waitnentrurta” tímiayi.

³⁹ Eemak wearmiania nu chicharainiak “takamatsata” tiarmiayi.

Tutaisha nú arant untsukum “Tawit weeachukaitiam; winiaja waitnentrurta” tímiayi.

⁴⁰ Nuñkia Jesus wajas “itiatarum” tímiayi. Tura nii támatai, ⁴¹ “¿Warí itiurtukat tusamea wakerutam?” tímiayi.

Tutai kusuru áimiuk “Uuntá, ímtiasan wakerajai” tímiayi.

⁴² Tutai Jesus chichaak “Iimtia. Winia nekas enentáimtura asam péñker ajasume” tímiayi.

⁴³ Nu chichamaik kusuru ímmiayi. Tura Yusa naari uunt awajki Jesusan nemarmiayi. Tura ashí aents nuna wáinkiar nusha Yusa náarin uunt awajsarmiayi.

19

Sakíu Jesusjai

¹ Nuyá Jirikiú péprunam wayá nuí wekaikini ajamiayi. ² Nuí kuítrintin áishman ni naari Sakíu pujumiayi. Nu Sakíu kuítian-juu úntriyayi. ³ Aents ti káunkámtai, Sakíu ti sútarach asa, Jesusan ístaj tukamá tujinkiamiayi. ⁴ Tuma asa Jesus nuke nankaamaktin asamtai, eemki tsékiniki sikiumuru numi wajamunam wakamiayi iistaj tusa. ⁵ Jesus nuí nankaamak pankáí íimias chicharuk “Sakíu wárik akáikitiá. Ame jeemiin yamá kanartiniaitjai” tímiayi.

⁶ Tutai Sakíusha wárik akaiki, shiir enentáimias Jesusan itiaamiayi. ⁷ Ashí aents nuna wáinkiar “Maaj, Jesus tunáa áishmanka jeen pujawai” tusa mai tunaim ajarmiayi.

⁸ Nuyá Sakíu wajaki Jesusan chicharuk “Ístá Uuntá, wi takakjana juna jímiapetek nakakan kuítríncha ainia nuna susartatjai. Tura wáitruan chikichan kasarkaitkiuncha menaintiu patatsan awainkittiajai” tímiayi.

⁹ Tutai Jesus tímiayi “Ju áishman Apraáma shuárintiat yamá niisha níniujai uwempra asa nekas Apraáma shuari ajasuiti. ¹⁰ Wisha Aents Ajasu asan menkakarú ainia nuna eakan uwemtikrartaj tusan táwitjai.” Tu tímiayi.

Kuítian nekapmá chichasmiayi

¹¹ Nu aents Jesusan anturkarmia nu “Jerusarénum jeawakrin Nii, Yus anaikiamu asa, wárik akupin ajastatui” tu enentáimsarmiayi. Tuma asamtai wésar Jerusarénum nuntumsarai, nuna enentáimsaráin tusa Jesus juna métek-takun chichasmiayi:

¹² “Áishman penkeri amai. Nu áishmansha jeachat chíkich núkanam kapitán náamkan tátaj tusa wemai. ¹³ Tura wétsuk ni takarniurin tias armia nuna untukarmai. Tura ankant ankant kuit kurijjai nankaamas penker armia nuna suíniak “Ju kuitjai wi táatsain takakmá ajatarum” timiai.’

¹⁴ “Tura ni nunkenia shuarka nakitiarmai. Túmainiak “nu áishman ii kapitántri ajasain tusar nakitiaji” nu titiá tusar áishman kan akatrar akuptukarmai.’

¹⁵ “Tuma ain kapitán náamak ni nunken waketki tamai. Taa “winia kuítrujai warí túrarum” titiaj tusa ni takarniurin kuitia súsarmia nuna untukarmai.’

¹⁶ ‘Ni takarniuri emka chikichik taa “ame kuítrumjai takakmasan tias patasan achikmajai” timiai.’

¹⁷ “Tutai kapitán chichaak “Pénker túrame. Ishichik susamjamna nújainki wi tímiajna tímatrusmek túrame. Tuma asakmin tias péprun akupin awajsattajme” timiai.’

¹⁸ ‘Chíkich taa “Íistá Uuntá, ame kuítrumjai takakmasan senku patasan achikjai” timiai.’

¹⁹ ‘Nunasha chicharuk “Amincha senku péprun akupin awajsattajme” timiai.’

²⁰ ‘Nuyá chíkich taa “Uuntá, ame kuítrumin panijjai ijian ikiusmajai.

²¹ Amesha kakaram chichau asakmin, ikiuschiatam achin asakmin tura arakmachiatam juu asakmin ashamkamjame” timiai.’

²² “Tutai kapitán timiai “Maaj, amesha ti yajauchiitme. Ame támena nuke makurmawai. Wi kakaram chichau aisha, ikiuschiatan achin aisha tura araknasha arakmachiatan juu aisha, ²³ nuinkia ¿urukamtia kuit-ikiutainiam ikiuschamam? Nuinkia wi atak táakun patasan achikiaajna” timiai. ²⁴ Tura nu wajarmia nuna chicharuk “Kuítian takakmarí juruktiarum; túrarum tias takakna nú shuar susatarum” timiai.’

²⁵ “Tura niisha chichainiak “túrasha Uuntá, tias takakja” tiarmai.’

²⁶ “Tutai kapitán chichaak “Takakna nujai takaakuinkia patatnastatui tájarne. Tura takakna nujai takaachkuinkia ishichik takakkuisha jurunkit-tiawai. ²⁷ Tura winia nemasur kapitán ajasain tusar nakitrurarmia nu itiatarum. Tura wisha íimiai máatárum” timiai.” Tu tímiayi Jesus.

Jerusarénum Jesus wayamiayi

(Mateu 21.1-11; Márkus 11.1-11; Juan 12.12-19)

²⁸ Nuna tuasua amik Jesus Jerusarénumaani wémiayi. ²⁹ Petpajai pepru tura Petania péprusha Uriwiu náinnium tíjiuchi; nu jeastatuk ajatemas ni unuiniamurin jímiaran chicharuk, ³⁰ “Tíjiuch péprunam wetarum. Túrarum nu umpuuruch ekemtukchamu jinkiamu waja wáinkiatarme. Nu atiarum itiatarum. ³¹ Tura “¿urukamtai atiarum?” turamainiakuisha, “ii uuntri wak-erawai” títiarum” tímiayi.

³² Tutai unuiniamuri wear, Jesus timia ímiatrusan wáinkiarumiayi ³³ Tura umpuuruchin atiakui nérentin chichainiak “¿Urukamtai umpuuruchsha atiarum?” tiarmiayi.

³⁴ Tutai unuiniamusha “Ii uuntri wakerawai” tiarmiayi.

³⁵ Tura umpuuruchin Jesusan itiararmiayi. Túrawar ni pushirin umpuuruchiniam awantkar Jesusan ekenkarmiayi. ³⁶ Tura Jesus wétinnium ni pushirin jintianam ayaparar áintrarmiayi. ³⁷ Tura Uriwiu naint awan^hkénamunam tíjiuch ajasarmatai untsurí aents Jesusan nemariarmia nu warainiak kakantar untsumainiak aents tujintiamun untsurí túran wáinkiaru ásar Yusa náar^hin uunt awajsarmiayi. ³⁸ “Yusa náar^hin winiana ju ii uunt Akupniuiti. Nincha Yus shiir awajsati. Nayaimpiniam pujuinia nu shiir enentáimsar Yusa náar^hin uunt awajsarti” tiarmiayi.

³⁹ Tura Pariséu aents nu^hi páchitra pujuarmia nu Jesusan chicharainiak “Uuntá, nemartamainia nu “takamatsata” tiarta” tiarmiayi.

⁴⁰ Tutai Jesus tímiayi “Nu^hinkia ju takamatsarmatai^hnkia, kayasha untsumkarainti. Nuna paant tájar^hme” tímiayi. ⁴¹ Jerusarénnum tíjiuch ajatemas péprun wáiniak útuk júnis tímiayi: ⁴² “Jerusarénnumiá shuártiram, ju tsawantinkesha shiir pujustintrum nekaarmeka maak. Túrasha yamaikia nekaatin nan^hkaamasai. ⁴³ Kame ti itieurchat tsawant jeartamtatrome. Atumí nemas^hi nun^hkajai aa-tanishan tanishmarar téntatramkattarme. Mesetan najatramattarme, tura áatusha junisha mash árenmaktatrome. ⁴⁴ Túrutma nun^hká ajun^hmartatrome. Tura atum^hiin pujuinia nuna máawartatui. Tura ashí emesrarmatai ishichkisha kaya irumpramusha pen^hké atsuttawai. Wi Yusa anaikiamur^hin tarijrumna nu nekaachu asakrumin túrutmattarme.” Tu tímiayi.

*Yusa Uunt Jeen suruktinian Jesus surimkiamiania nu
(Mateu 21.12-17; Márkus 11.15-19; Juan 2.13-22)*

⁴⁵ Nuyá Jesus Yusa Uunt Jeen wayá suruktasa pujuarmia nuna sumaktasa pujuarmia nunasha juiki awemarmiayi. ⁴⁶ Túrak júna tímiayi:

“Yús-Papinium yaunchu aarma awai: “Winia jearka Yus áujsatin jeaiti” tu áarmaiti. Túrasha átumka kasáa matsamtaiya nútikiarme” tímiayi.

⁴⁷ Tuke tsawantin Yusa Uunt Jeen Jesus uwempratin chichaman unuiniak pujai Israer-patri úuntri^hsha, Israer-shuara jintinniur^hisha, tura pepru úuntri^hsha, itieur máamniakit tusar ti enentáimsarmiayi. ⁴⁸ Túrasha ashí aents émamkes anturainiakui máatniun tujinkiar^hmiayi.

20

*Yusa kakarmarijai Jesus takasmiania nu
(Mateu 21.23-27; Márkus 11.27-33)*

¹ Yusa Uunt Jeen Jesus uwempratin chichaman unuiniak pujai Israer-patri úuntri^hsha, Israer-shuara jintinniur^hisha, Israer-shuara úuntri^hsha táarmiayi.

² Taar Jesusan chicharainiak “¿Yana chichamejai ju túram? ¿Ya ju túratniuncha akuptamkait?” tiarmiayi.

³ Tutai Jesus tímiayi “Wisha ania^hstajrum tusan wakerajrume. ⁴ ¿Ya Juán^hnasha imiakrattia tusa akupkamia? ¿Yusak? ¿Aentsuk? Turuttiarum” tímiayi.

⁵ Tútaisha niisha nuamtak warintiajik mai tunai ajar^hmiayi. ““Yus akupkaiti” tákurni^hnkia, “¿urukamtai enentáimtuscharum?” turamtatji. ⁶ Túrasha “aents akupkaiti” tákurnisha ashí aents kayajai tukurmar mantamattaji. Warí “Juan Yús^hnan etserniuiti” tu^hniatsuk” tiarmiayi. ⁷ Nu^hinkia Jesusan áiniak “Iisha nékatsji, Juan imiakratinniasha yátsuk akupkamia” tiarmiayi.

⁸ Tutai Jesus tímiayi “Wisha núnisnak winia akuptukua nuna tíchattajrume” tímiayi.

Pénker-takachu armia nu
(*Mateu 21.33-44; Márkus 12.1-11*)

⁹ Nuyá Jesus ju métek-taku chichamjai aentsun jintintiamiayi:

“Áishman ni ajariin uwa araa amuk, shuaran takartusti tusa ikiukmiai. Tura nin⁹kia wau táchataj tusa jeachat wémai. ¹⁰ Tura júuktin tsawant jeamtaí juukman akanak jurumkit tusa takarniurin takau shuariin akuptukmai. Tura takarniurincha katsumkar áyatik awainkiarmai. ¹¹ Nuyá nérentin chikich takarniurin akupkamai; tura nunasha núnisan katsekkar, awatiar, sútsuk akupkarmai. ¹² Nuyá ataksha chikichan akupkamai. Tura nunasha takau shuar katsumkar akupkarmai.’

¹³ ‘Nuyá ukunam ajá nérenniuri “Itiurkatjak, timiai. Winia aneamu uchirun akupkattajai. Nin wáinkiar shiir enentáimtuschartimpiash” timiai.’

¹⁴ ‘Túrasha takau shuar nuna wáinkiar, nuamtak chichainiak “Juka ajá nérenniuri ajastatui. Maatai. Nuikia aja iiniu átatui” tiarmai. ¹⁵ Nuna tuíniak ajanmaya jiki máawarmai.’

Nuyá Jesus aniasmiayi ‘Wats ¿warí enentáimsarum, ajá nérenniuri itiurkat-tawa? ¹⁶ Niisha taa, nu takau shuáran máawartatui. Tura núnkanka chikichan susattawai” tímiayi.

Nuna anturkar “Yus núnaka tsankatkashti” tiarmiayi.

¹⁷ Tura Jesus nin émamkes ísar tímiayi “¿Nuikia Yus-Papinium áarma nu warintuia? Ju áarmaiti:

Kayan pénkernak jea jeamin “yajauchiiti” tusar ajapawarmia nu ashí kayajai nan⁹kaamas pénker apujsamuiti. ¹⁸ Nu kayan tukumainia nuka kupin-trattawai. Tura nu kaya shuarum iniarka nu shuaran tsai tsai awajsattawai. Tu áarmaiti.

Pariséu achiktai tusar wakeriarmiania nu
(*Mateu 21.45-46; 22.15-22; Márkus 12.12-17*)

¹⁹ Israer-patri uuntri tura Israer-shuara jintinniurisha “nu métek-taku chichamjai in túramji” tu nekaawar nuik¹ Jesusan achikiar emetatai tusar wakeriarmiayi. Tura untsurí shuar Jesusan wakeruiniakui, ashamainiak túracharmiayi. ²⁰ Tura Kapitiánnium suruktai tusar wakeruiniak mamik-mau shuaran Jesusan akuptukarmiayi. Nu shuar pénker shuara núnisan jeariar, Jesus nékatsuk yajauch chichakat tusar, aniastaj tusar wearmiayi. Ni chichakmarijjai uuntnum suruktai tusar túrawarmiayi. ²¹ Tu enentáimsar tíarmiayi “Uuntá, ame tuke nekas chicham chichaame, nu nékaji. Aents pátatek íiyatsme, antsu nekas Yusa jinti jintintieme. ²² Wats turuttia, ¿Rúmanmaya uunt akupin ii kuitri akiktin pénkerkai? ¿Akiktinkiai? ¿Suritkiatniukai? Nu nekaatai tusar wakeraji” tiarmiayi.

²³ Tura Jesuska ni yajauch enentáimsamurin nekáa chicharainiak, ²⁴ “Kuit itiatarum. ¿Yana yapi tura yana naari juí áarmait?” tímiayi.

Tutai nii tiarmiayi “uunt akupniunu.”

²⁵ Tutai Jesus tímiayi “uunt akupniunu átinia nu uunt akupin susatarum. Tura Yusna átinia nu, Yus susatarum.”

²⁶ Aents ántamunam ni chichakmarijjai achiktinian penké tujinkiarmiayi. Antsu aya ímprarmiayi tura takamtak pujusarmiayi.

Satusésha achiktai tusar wakeriarmiania nu
(*Mateu 22.23-33; Márkus 12.18-27*)

²⁷ Nuyá Satuséu “jakamunmaya penké nantakchamniaiti” tuinia nu, Jesusan aniastai tusar tariarmiayi. ²⁸ Aniiniak tiarmiayi “Uuntá, Muisáis juna áartampramijai: “Áishman ni nuarí júreatsain jakamtainkia ni yachi nu wajen nuátkatí, yachin yajutmatratsa.” Tu áarmaiti, tiarmiayi. ²⁹ Wats, siati yachi

ármái, tiarmiayi. Iwiairi nuwan nuatak yajutmatsuk jakamai. ³⁰ Ni yachi wajen akintiak, nuátak, niisha yajutmatsuk jakamai. ³¹ Nuna yachisha núnisan nu wajen nuátkamai; tura núnisan ashí siati nuna patainkⁱ nuátkarmái. Yajutmatsuk yajutmatsuk kajinkiarmai. ³² Tura ukunam nuwasha jakamai. ³³ Nantaktin tsawantaj, nantakiarmatai, ¿yana nuarín ati? Ashí siati nuátkacharmaka” tiarmiayi.

³⁴ Tutai Jesus tímiayi “Ju nunkanman nuatnaikiatin awai. ³⁵ Tura nantakiar atak iwiaaku ámin ainia nuka nuatnaikiachartatui. ³⁶ Warí, jákashtin ániatsuk. Nayaimpinmaya suntara áintsan ajasartatui. Tura nantakiaru ásar Yusa uchirí ajasartatui. ³⁷ Tura jákaru nantakiartin ainia nuna imia Muisáis jintíamiayi. Warí, numichiniam ji wajái keamunan Yus niijjai chichaamun, Yus-Papinium Muisaiska áarmiayi. Nú áarmanum Uunt Yus Apráama, Isaka tura Jakupu Yúsrinti, tímiayi. Nú áishman yaunchu jákaru ain “ni Yúsrinti” tímiayi. Nuna taku nantaktin awai tu jintíamiayi. ³⁸ Kame jaka menkakatniunam pujuinia nuna Yúsrinchuítí. Tuma asamtai jakáa Yúsrinti tíchamniaiti. Antsu iwiaaku ainia nuna Yúsrinti. Ashi Niiniun iwiaarkaini-awai” tímiayi.

³⁹ Nuna antukar Israer-shuara jintinniuri “pénker tame, Uuntá” tiarmiayi.

⁴⁰ Tura nuyánka aniastinian arantukarmiayi.

¿Kristu tutai yana uchirimpiait?

(Mateu 22.41-46; Márkus 12.35-37)

⁴¹ Nuyá Jesus tímiayi “Yus anaikiamu Kristu tutaisha, ¿itiura “Aya Tawit weeaiti” tárúm? ⁴² Warí, Sarmu papinium Tawit nínki juna tátsuk:

“Uunt winia Úuntrun “Akupin pujutainium Winia untsuuruiní pujustá, tímiayi. ⁴³ Ame nemasrumin núpeteatsain nuj pujustá” tímiayi.” Tú áarmaiti.

⁴⁴ Kame Tawitkia, Krístun chicharuk, “winia Úuntur” taisha, ¿itiurak Kristu tutai Tawitia pampanmarí átinkⁱ?” Tú tímiayi Jesus.

Israer-shuaran jintintin ainia nuyá aneartarum

(Mateu 23.1-36; Márkus 12.38-40; Rúkas 11.37-54)

⁴⁵ Ashí aents Nin anturkatasa pujuiniaj ni unuiniamurín Jesus juna tímiayi:

⁴⁶ “Israer-shuaran jintintin ainia nuyá aneartarum. Niisha esaram pushin entsarar wekasataitsar wakeruiniawai. Tura jintiá ti shiir áujtusarat tusar wakeruiniawai; tura iruntai jeenam penkerí pujutainium pujustinian wakeruiniawai. Tura nampernumsha uunt pujutainium pujustaj tusa wakeruiniawai. ⁴⁷ Túrasha wajé jeencha atantainiawai. Túrawar aents nekaracharat tusar ti esaram chichamjai Yúsan áujainiawai. Nincha chíkichjai nankaamas Yus asutiáwartatui.”

21

Waje ni kuítrin susamia nu

(Márkus 12.41-44)

¹ Yusa Uunt Jeen kuítrintin kuit enketainiam kuítian enkeenan Jesus wáinkiamiayi. ² Tura waje kuítrincha jimiará uchich kuítian, reara áaniun, enkean wáinkiamiayi. ³ Wáiniak tímiayi “Nekas tájarme, ju waje kuítrinchaitiat, ashí enkeena nú nankaamas núkap enkeayi. ⁴ Warí, chikichcha ampirma nuna enkeenawai. Tura niisha aya núchiniak takurmakman ampirmatsuk ashí enkeayi.”

Yusa Uunt Jeen saanaktinian Jesus ujakmiania nu

(Mateu 24.1-2; Márkus 13.1-2)

⁵ Yusa Uunt Jeen kaya shíirmach armia nuna tura chíkich shíirmach susamu armia nunasha chíkich shuar áujmatuk pujuarmiayi. Nuyá Jesus tímiayi:

⁶ “Átum yamá shiir wáintrumna nu ashí emesnartatui. Kaya ekenramusha mash yumpuntrartatui” tímiayi.

Amuukatin tsawantin uruku átata nu nekaatin
(Mateu 24.3-28; Márkus 13.3-23)

⁷ Nuyá Jesusan chicharainiak “Uuntá, nusha ¿urutaik túrunatí? ¿Kame ju túrunatin jeatemamtaisha warijiaín nekaattají?” tiarmiayi.

⁸ Tutai Jesus tímiayi “Aneartarum; anañnawairap. Nekaatarum. Winia náarun pachisar, “wi Krístuitjai” tau ti untsurí jíintrartatui. “Nuñka amuukatin jeayi” tu etserkartatui. Tuíniakui anturkarum nemariirap. ⁹ Tura meset chichamsha, kapitián mesetan nájanmasha antukrum sapijmiakairap. Nusha emka túrunatniuiti. Túrasha nú chichamaik amuukatin tsawant jeashtatui.’

¹⁰ Nuyá tuke chicharuk tímiayi ‘Shuar chíkich nuñkanmaya shuarjai mesetnum ti nekas maaniawartatui. ¹¹ Ti uurkattawai; untsurí nuñkanam tsukasha, sunkursha ti átatui. Nayaimpinmasha ti ashammai náñkamas túrunattawai. Nujai Yus ni kakarmarín iniakmastatui.’

¹² ‘Tura ju túruntsaín atumin pataaturmakar achirmakartatui. Iruntai jeanmasha makurmartai tusar juramkiartatui. Sepunmasha enketmattarme. Tura winia naar páchia asakrumin, akupniunmasha, úuntnumsha juramkiartatui. ¹³ Nuñkia atumin túrutmakrumin wi túramu etserkatin arutmattarme. ¹⁴⁻¹⁵ Tura atumi nemasri nakitramainiak “wáitaiiti” titinian tujinkiarat tusan, winia nekatairjai chichastinian amastatjarme. Tuma asamtai “Jurakuisha warinia tiniak kíishtumaktaj tusan áetak enentáimsashtatjai” titiarum.’

¹⁶ ‘Tura imia atumí aparisha surutmakartatui. Atumí yachisha, atumí shuarisha amikrumsha núnisaran surutmakartatui. Tura máamunka máawartatui. ¹⁷ Tura Winia ajasaru asakrumin ashí aents nakitramprartatui. ¹⁸ Tura penké ishichkisha yajauch awajtamsachartatui. ¹⁹ Katsuntrarmeka iwiaaku átin wáinkiattarme.’

²⁰ ‘Ju pepru Jerusarénka aa tanishriin suntar téntakar matsatu wáinkiurmeka, emesratin jeá nekaattarme. ²¹ Nuikia jui Jutía nuñkanam pujuinia nu, náinnium pisartin ániawai; tura jui Jerusarénnum pujuinia nusha juyanka jiinki wétin ainiawai. Tura ajanam pujuinia nusha, péprunam waketkishtin ániawai. ²² Nu tsawantincha Yus asutiámun wáinkiartatui. Yús-Papinium nu túrunatin yaunchu aarma nu uminkiattawai nu tsawantin. ²³ Nuñkanam ti wáitsatin átatui. Tura ju aents ti asutniawartatui. Tuma asamtai nuwa ajamtin ainia nusha, tura uchi kuírchin takakainia nusha imiá itiurchatan wáinkiartatui. ²⁴ Tura juyá aents mesetnum jákartatui. Tura chikichnaka ashí nuñkanam misaawar júkiartatui; tura yajaya apach, Yúsnan enentáimtuiniatsna nu, jui Jerusarénnum wayawar najakartatui. Nu túratniunka Yus tsanatkana nuñ túrawartatui.’

Aents Ajasu tutai tátintri
(Mateu 24.29-35, 42-44; Márkus 13.24-37)

²⁵ ‘Nuñkia etsanmasha, nantunmasha, yáanmasha Yuska ni kakarmarín iniakmak nusháa túrattawai. Nuñkanmasha ashí aents páchim enentáimprartatui. Tura nayaantsanam chíchimi ti aku tantáa ajakui ti ashamkartatui. ²⁶ Tura túrunatin ana nuna enentáimsar mayái ashinkiartatui. Warí, nayaimpiniam kakaram ainia nusha peantrartatui. ²⁷ Nuyá Winia, Aents Ajasu tutain, yurañminiam ti shiir ajasan winiaí wáitkiartatui. ²⁸ Nu

túrunatin nánkamkui uwempratin jeatemayi tusarum kakaarum shiir enentáimsatarum.'

²⁹ Tura ju chichamnasha nekapmamiayi. 'Ikiu numi tura nánkamas numisha enentáimsatarum. ³⁰ Ju nunkanam ni nuké yama punkakmatai "esat jeatemayi" tátsurmek. ³¹ Núnisan Wi tájana nu wáinkiumeka, Wi ju nunkanam akupin ajastin jeatema nu nekaatarum.'

³² 'Tura aents yamaí pujuinia nu jáatsain nusha ashí túrunattawai. Núnaka paant tájarme. ³³ Nayaimpisha nunkasha amuukartatui. Tura winia chichampruka amuukachminiaiti. ³⁴⁻³⁵ Nu tsawant aya aneachma jeattawai. Ashí aents ju nunkanam pujuinia nu, nuna enentáimtsuk pujuiniaí jeattawai. Tuma asantai atumsha anearum wekasatarum. Yajauchiniam emetnarum, aya yurumátniuk, aya umartiniak enentáimtusrum, ju nunkanam ana nu ti wakerakrumninkia péñker enentáimsatin tujinkiattarme. Nu atsutí tusarum tura nu tsawant aya áwaktamkaj tusarum péñker wekasatarum. ³⁶ Anearum wekasatarum. Túrunattana nuí katsuntrataj tusarum Yus aujsa pujustarum. Túrarum Aents Ajasu tutai ímmianum péñker átaj tusarum túratarum."

³⁷ Tuke tsawant tsawaisha Yusa Uunt Jeeñ Jesus unuiniamiayi. Tura káshikia Uriwiu náinnium we-wémiayi. ³⁸ Tura tuke tsawant Yusa Uunt Jeeñ Jesus chichaamun anturkatai tusar káshik tariarmiayi.

22

Jesus achiktin chichaman jurusarmiania nu

(Mateu 26.1-5, 14-16; Márkus 14.1-2, 10-11; Juan 11.45-53)

¹ Wakaprutai enketaachma tanta yuatin námper, paskua tutai, jeatemamiayi. ² Israer-shuara Pátririsha Israer-shuara jintinniurisha áentsun ashamainia ásar, itiurak máawaintiaji tusar ti enentáimsarmiayi.

³ Nuinkia Iskariúti Jútasan enentáin íwianch wáintiamiayi. Nú Jútaska Jesusa unuiniamuriin páchitkiauyayi. ⁴ Israer-patri úntrin tura Yusa Uunt Jee kapitían pujuarmia nuna werimiayi. Tura Jesusan tu surukminiaiti tusa niijiaí chichasarmiayi. ⁵ Niisha nuna antukar warasar "kuit amas-tatji" Jútasan tiarmiayi. ⁶ Niisha "ayu" tinia, aents nékachmanum suruktaj tu enentáimsamiayi.

Kristu jakamu enentáimtustin námper

(Mateu 26.17-29; Márkus 14.12-25; Juan 13.21-30; 1 Kurintiunam 11.23-26)

⁷ Wats, wakaprutai enketaachma tanta yúatin námper jeamiayi. Paskua tutainium murikchin máatin ármiayi. ⁸ Tura Jesus Pitruncha, Juánnasha akupeak "Paskua tutai námper iwiaratarum" tímiayi.

⁹ Tutai niisha chichainiak "¿Tui iwiarat tusamea wakeram?" tiarmiayi.

¹⁰ Tutai Jesus juna tímiayi "Péprunam wetarum. Jearum áishman yumin takaku wekáa wáinkiattarme. Nú áishman nemarsatarum. Tura jeá wayaakui, ¹¹ nú jea nérenniuri chichareakrum "Uunt chichartamuk unuiniamurjai paskua yurumátin ¿tui aa? turamui" titiarum, tímiayi. ¹² Tákurmin nu nérentin yakí písunam uunt kuártun ashí iwiarapun iniakturmastatrume. Nuí ii yurumátin iwiaratarum" tímiayi.

¹³ Tutai niisha wear Jesus tímiania tímiatrusan wáinkiarmiayi. Tura paskua namperan nuí iwiararmiayi.

¹⁴ Yurumátin jeamtai ni unuiniamurijiaí Jesus misanam pujusarmiayi. ¹⁵ Pujusarmatai, Jesus chichaak "Wisha játsuk atumjai ju paskua najanatniun ti wakerimjai, ¹⁶ atakka ju nunkanam atumjai najanashtin asan. Tura antsu Yus akupeana nuí jear atak najanattaji" tímiayi.

17 Nuyá pinin̄kian achik, Yúsan yum̄in̄kias, ni unuiniamur̄in tímiayi “Ju pinin̄ achikrum sunaisatarum. 18 Atakka ju nun̄kanam uwa yumir̄in atum̄jai umarchattajai, tajarme. Tura antsu Yus akupin ajastin jeamtai atak iij̄iai umartatji” tímiayi.

19 Nuyasha yurumkan achik, Yúsan yum̄in̄kias puuk susarmiayi. Tura chicharainiak “Juka winia ayashruti. Winia ayashur atum p̄nker pujustinium surunkattana núiti. Winia enentáimtursarum yuatarum” tímiayi.

20 Tura yurumsua amikiarmatai pinin̄kian achik, “Ju pinin̄ winia numparun nakumea asa uwempratin yamaram chicham najanamun nakumeawai. Winia numpar atumnian puartamprattawai” tímiayi.

21 ‘Túrasha winia surutkattana nu Wij̄iai métek ju misanam pujawai. 22 Kame Wi, Aents Ajasuitjiana ju, Yus iwiamua nútiksanak jakattajai. Túrasha Winia surutkana nu nekaatí. Ti asutniattawai” tímiayi. 23 Nuna antukar “Wíashitiaj, yákit” tunaim ajarmiayi.

Nan̄kaamantu ana nu

24 “¿Iij̄iai yaki imiá nan̄kaamantu aint?” tunaim ajarmiayi. 25 Tura Jesus tímiayi “Ju nun̄kanam akupin ainia nu, waantu enentáimtumasar akupenawai. Tura akupenakuí “p̄nker túrin áiniawai” tuíniawai. 26 Tura atum̄jain̄kia nuka atsutí. Antsu nan̄kaamantu ana nu, uchichia núnik ajastiniaiti; akupeana nusha takarniua núnik ajastiniaiti. 27 Enentáimsatarum. Misnam pujus yurumna nu, yurumkan ajamana nuj̄ai ¿tuá imiá nekas nan̄kaamantuit? ¿Yurumna nu nekas nan̄kaamantuchukait? Tura Wisha atumin yurumkan ajamna núnisnak pujajai.’

28 ‘Winia itiurchatrun wáinm̄iaj nuí atumsha Wij̄iai tuke pujumarme. 29 Tuma asakrumin akupin ajastinian winia Apar surusu asamtai Wisha nútiksanak akupkatniun súajrume. Wi akupkatjana nuí atumsha Wij̄iai yurumáttarme, tura Wij̄iai umartatrume, tájarme. 30 Tura akupin pujutainium pujusrum, Israer-shuar tuse írutkamu akupkattarme tajai.” Tu tímiayi.

P̄tiur “atsá nékatsjai” t̄tinian Jesus ujakm̄iania nu (Mateu 26.31-35; Márkus 14.27-31; Juan̄ 13.36-38)

31 Nuyá Uunt Jesus tímiayi, “Nekaata, Semun̄ká. Trikiu neré tsatsamátniua áintsan̄ Satanás atumi enentáin p̄achim enentáimtikramprataj tusa seayi. 32 Tuma ain̄ Yus enentáimtustinian kajinmatkiin̄ tusan Wisha Yúsan seamjai. Tura Yúsn̄um waketkim ame yatsum ikiakárarta” tímiayi.

33 Tutai Semun̄ tímiayi “Uuntá, sepunam enketmainiakuisha wisha nemarsatajme. Tura mantamainiakuisha métek jakatjai” tímiayi.

34 Tutai Jesus tímiayi “Pitrú, nekas tájame, yamaik atash shiniatsain̄ ame menaintiú natsantrurtatme” tímiayi.

Itiurchat winiawai

35 Nuyá Jesus tímiayi “Wisha yurumkajain̄chu, kuítjain̄chu, sapatjain̄chu akupkamjarmena nuí ¿táatramsamkarum?”

Niisha “Atsá pen̄ké táatramsachmaji” tiarmiayi.

36 Tutai Nii tímiayi “Antsu yamaikia yurumkan takakkun̄ka takustí, kuítniasha núnisan̄; tura puniancha takakchakka ni pushirin̄ suruk punian sumakti. 37 Nekaatarum. Yus-Papinium yaunchu aarma ana nu wi túrunamuj̄ai uminkiattawai. J̄uiti aarma:

Yajauch shuarnum pachikiarmiayi.

Warí, Yus-Papinium ashí Winia aarma ana nu uminkiatniuiti.”

38 Tutai ni unuiniamuri tiarmiayi “Uuntá, juí jimiará puniá awai.”

Tutai Niisha “Asati” tímiayi.

Jitsemaní ajanam Jesus Yúsan áujsamiania nu
(Mateu 26.36-46; Márkus 14.32-42)

³⁹ Nuyá Jesus jíinkimiayi. Tura tuke túrin asa Uriwiu náinnium wémiayi. Ni unuiniamurisha nemariarmiayi.

⁴⁰ Aí jeá nin chicharuk “Itiurchat winiakui iniaraj tusarum Yus áujsatarum” tímiayi. ⁴¹ Tuasua amik arantach, kaya nankimiam jeana núnik Jesus wémiayi. Tura Yúsan áujsataj tusa tikishmarmiayi. ⁴² Tikishmar juna tímiayi “Apawá, pininnum yapá umartinia ántsan Wi wáitsattajna nu wakerakmeka jurutkitia. Tura Wi wakerajna nucha antsu Ame wakeramna nu atí, tajai” tímiayi.

⁴³ Nuyá, ikiakártaj tusa Yusa suntari nayaimpinmaya tarimiayi. ⁴⁴ Tura Jesus imiá wáitias pujak nú kakaram Yúsan áujsamiayi. Tura ni searmarisha numpá ántsan nunká kitiawarmiayi.

⁴⁵ Yúsan aujsua amik wajaki ni unuiniamurin werimiayi. Tura kúntuts enentáimmiaríjiaí ti pimpiki kanúu tepenan tarimiayi. ⁴⁶ Nuinkia chicharainiak “¿Urukamtaí kanúu teparum? Itiurchat winiakui iniaraj tusarum nantakrum Yus áujsatarum’ tímiayi.

Jesusan achikiarmiania nu
(Mateu 26.47-56; Márkus 14.43-50; Juan 18.2-11)

⁴⁷ Jesus tuke chichaa pujai, untsurí shuar táarmiayi. Tura nuní eemka Jesusa unuiniamurí Jútas naartin winimiayi. Tura Jesusan mukunatajtsa tarunmiayi. ⁴⁸ Támataí Jesus chicharuk “Jútasá, ¿Aents Ajasu tutai mukunamek surutkattam?” tímiayi.

⁴⁹ Jesusjai pujuarmia nu, túmamun wáinkiar “¿Uunt puniajai íjiuartatjik?” tiarmiayi. ⁵⁰ Tura chikichik Patri uuntri takarniurí kuishin untsuurin tsupirkamiayi.

⁵¹ Tura Jesus tímiayi “Iniaisatarum.” Nuna tinia ni kuishin antin tsuármiai. ⁵² Nuyá Israer-patri úuntrin, Yus-jea úuntrincha, tura pepru úuntrincha, Nin achiktaj tusa tariarmia nuna chicharuk “¿Wisha kasakaitiaj. Urukamtaí puniajaisha numijiaisha tarutniuram? ⁵³ Nuik Yusa Uunt Jeen tuke tsawant atumjai pujumaj nu achirkachmarme. Túrasha átum kiritniumia kakarmajai nupetkatin yamáí tsawantin tsankatkamuitrume” tímiayi Jesus.

Pítiur “Jesusnaka nékatsjai” tímiania nu
(Mateu 26.57-58, 69-75; Márkus 14.53-54, 66-72; Juan 18.12-18, 25-27)

⁵⁴ Nuinkia Jesusan achikiar emetawar Israer-patri uuntri jeen júkiarmiayi. Tura Pítrusha íkiañ nemarki wémiayi. ⁵⁵ Tura açh jinia ikiapármiai. Túrawar anamuk pujuarmiayi. Pítrusha níijiaí pujusmiayi. ⁵⁶ Tura nuwa, Patri takarniurí amia nu, Pítiur jinia anamuk pujan wáiniak “Ju áishmansha Níijiaí pujumiayi” tímiayi.

⁵⁷ Tutai Pítiur chichaak “Nuwá, Nin nékatsjai” tímiayi.

⁵⁸ Tura árusañ chíkich nin wáiniak “Amesha Niin páchitkaiatme” tímiayi.

Tutai Pítiur tímiayi “Atsá. Wikia áinkia páchitkiatsjai” tímiayi.

⁵⁹ Chikichik ura nankaasmataí chíkich apach chichaak “Nekas ju áishmansha Níijiaí pujumiayi. Warí, niisha Kariréanmayançhakait” tímiayi.

⁶⁰ Tutai Pítiur chichaak “Ame támena núnaka nékatsjai” tímiayi. Nú chichamaik Pítiur chicháa pujaink' atash shiniukmiayi. ⁶¹ Tura nuinkia Uunt Jesus Pítrun apajas íismiayi. Túra “atash shiniatsain ame menaintiu natsantruratme” Uunt Jesus timia nuna enentáimpramiayi. ⁶² Nuyá Pítiur jíinki ti útmiayi.

Jesusan wishikrarmiayi
(Mateu 26.67-68; Márkus 14.65)

⁶³ Áishman Jesusan wáiniarmiania nu ti wishikiainiak awattiar^{miayi}. ⁶⁴ Jjin epetkar yapiniam awattiar chicharainiak “Nekamata, ya awatama” tiarmiayi. ⁶⁵ Tura katsekainiak ti untsurí chikichnasha nánkamas tiarmiayi.

Unt Iruntainiam Jesusan ejeniarmiania nu
(Mateu 26.59-66; Márkus 14.55-64; Juan 18.19-24)

⁶⁶ Tsawarmatai, Israer-shuara úuntrisha, Israer-patri úuntrisha, Israer-shuara jintinniurisha iruntrar ni iruntairiin ejeniarmiayi. Nuí chicharainiak ⁶⁷ “Paant titiá. ¿Yus anaikiamu Kristu tutaia núkaitiam?” tiarmiayi.

Tutai Jesus tímiayi “Wi “ee” tákuisha, “nekasaiti” tíchattarme. ⁶⁸ Tura Wi aníamsha áirkashtatrome, túrasha akuptukchattarme. ⁶⁹ Tura wárik Wisha Aents Ajasuitjiana nu, ashí nankaamaku ajasan, Yusa untsuuriní pujustajai” tímiayi.

⁷⁰ Tutai niisha tiarmiayi “¿Nuinkia amesha Yusa Uchirínkaitiam?”

Tutai Jesus tímiayi “Ee, Wítjai, átum Winia túrutrum núnisnak.”

⁷¹ Tutai niisha tiarmiayi “Warí, ¿iisha chíkich ujatkat tusar atsumajik? Imia níñki chichaamu antukchajik” tiarmiayi.

23

Piratuí Jesusan júkiarmiania nu
(Mateu 27.1-2, 11-14; Márkus 15.1-5; Juan 18.28-38)

¹ Nuyá ashí Uunt iruntrarmia nu wajatkiar Rúmanmaya akupin Piratuí Jesusan júkiarmiayi. ² Nuí jeawar, Piratun chicharainiak “Ju áishman íi shuaran awajimtikiar enentáimtikiaiania nu nekaamji. Rúmanmaya uunt akupin Sésaran kuit akiktinian suritramaji. Tura nu arant Niñki, akupin Kristu tutaintjai, tawai” tiarmiayi.

³ Tutai Piratu Jesusan chicharuk “¿Ame Israer-shuara akupniurínkaitiam?” tímiayi.

Tutai Jesus tímiayi “Ee, núitjai, ame támena núnisnak.”

⁴ Nuyá Israer-patri úuntrincha tura aents nuí iruntrarmia nunasha Piratu chicharainiak “Ju áishman tunaan túran penké wáinkichuitjai, tajai” tímiayi.

⁵ Túrasha niisha nú kakantar chicharainiak “Antsu nekas ashí Jutía nunkanmaya aentsun ni unuiniana nujai akajenawai. Kariréa nunkanmaya nankaamas ímiajajisha tayi” tímiayi.

⁶ Piratusha nuna antuk “Nu áishman ¿Kariréanmayankait?” tímiayi.

⁷ “Ee” tuiniakui, Erutisan akuptukarmiayi. Erutiska Kariréanmaya aentsun akupniuyayi. Túmaitiat nu tsawantin Jerusarénum ishichik tsawant pujusmiayi.

⁸ Erutiska Jesusan ístaj tusa ti wakerimiayi. Jesusa túramurín áujmatman ti antukmiayi. Tuma asa, “Wi ímiai aents tujintiamun túrashtimpiash” tusa Jesusan wáiniak warasmiayi. ⁹ Jesusan ti nukap aniasmiayi; túramsha penké áimkiachmiayi. ¹⁰ Nuísha Israer-patri úuntrisha, tura Israer-shuara jintinniurisha yajauchiiti tusar charaatum awajiar^{miayi}. ¹¹ Tura Erutissha ni suntaríjiai Jesusan yajauch enentáimtuiniak Nin wishikiainiak ti penker pushin, akupniu entsatairiya ánniun, áentsrarmiayi. Nuyasha Erutis ataksha Piratuín akupkamiayi. ¹² Túram nu tsawant Piratu Erutisjai nawamnaikiarmiayi. Kame yáunchuka nemasnaikiau ármiai.

Jesusan “mantamnati” tiarmiania nu
(Mateu 27.15-26; Márkus 15.6-15; Juan 18.39-19.16)

13 Nuyá Israer-patri úuntrin aentsu úuntrijjai tura penké aentsjai Piratu ikiaanank tímiayi. 14 “Ju áishman aentsu awajimtikiui tusarum itiartin-trume. Túrasha átum ímprumnin anintrusan yajauch átum tárumna nuna penké nekarachjai. 15 Erutissha núnisan yajauchin nekaachai. Warí, ju awainkichmaka. Nuikia páantchakait jú aishman jakamnia tunaanka túrichuiti” tímiayi.

16-17 Túraitiat tuke túrutai asamtai, jísat jeakui sepunmaya chikichík áishmankan Piratu ankant akupkatin ámiayi. Tuma asamtai, nii chichaak “juna asutián awematjai” tímiayi.

18 Tura aencha iruntrar ti untsumainiak “Atsá; júcha. Ju nakitiaji. Antsu Parapás akupkata” tiarmiayi. 19 Nu Parapássha akupniun nakitiak mesetan najana asa tura mankartin asa sepunam enkeamuyayi.

20 Piratuka Jesusan akupkatta wakerak ataksha aentsun áujsarmiayi. 21 Túrasha nú arant untsumainiak “Atsá. Krúsnum mantamnati” tiarmiayi.

22 Tura ataksha Piratu chicharainiak “¿Urukamtai. Warí tunaan túrait? Jakamnia tunaan túrachias tusan, aniasan penké nekarachjai. Asutián akupkatjai” tímiayi.

23 Tura niisha kakaram untsumainiak “Jesus mantamnati” tiarmiayi. Kame aencha tura Patri úuntrisha ti untsumaina ásarmatai ni wakeramuri tsankatnakarmiayi. 24 Nii wakeriarmia nuna Piratu “túratjai” tímiayi. 25 Tuma asa Parapásan, mesetan najanin tura mankartin amia nuna akupkamiayi. Tura Jesusnaka ni wakeramun túrawarti tusa íktusarmiayi.

*Jesusan krúsnum ajintrurarmiania nu
(Mateu 27.32-44; Márkus 15.21-32; Juan 19.17-27)*

26 Jesusan jukitiasa pujuinia Serini nunkanmaya Semun ni pépruriya Jerusarénnum yama jeamiayi. Nin achikiar, Jesusa krusri ayantkar “ni ukuri wetá” tiarmiayi.

27 Untsurí aents Jesusan nemariarmiayi. Tura untsurí nuwasha ti kuntuts enentáimiainiak úutkiar tura wa-wa ajakiar wearmiayi. 28 Túmainiakui Jesus nin iis, “Jerusarénnumia nuwatiram Winia enentáimtursarum úuttiirap. Antsu atumniak tura atumi uchiri enentáimtusarum úuttiarum. 29 Warí, ti iturchat tsawant jeawartatui. Tuma asamtai “Uchirtichu ainia nu, ajaprukchana nu tura amuntsachu ainia nu, chikich aentsjai nankaamas pénger pujuini-awai” tiartatui. 30 Nu tsawantjai aents chicharainiak “Náint in nekentmak yuturmaartai” tiartatui. 31 Warí, numi sameka áinis yajauch aya nánkamna ainsha ju itiurchat átsuk. Tura numi kukaru ainkiamtai iturak nú yajauch túrunachat.” Tu timiayi Jesus.

32 Tura Jesusjai krúsnum maatai tusar jímiar yajauch áishmankan júkiarmiayi. 33 Karawír nain tutainium jeawar Jesusan krúsnum ajintrurarmiayi. Tura Jesusa untsurini chikichík yajauch áishmankan tura ni menarini chikich yajauch áishmankan núnisan krúsnum ajintrurarmiayi.

34 Tura Jesus krúsnum ajintraku pujoram, chichaak “Apawá, tsankurarta. Nii áitkiainia nuna nékainiatsui” tímiayi.

Tura suntar pujuarmiania nu, yaki Jesusa pushiri jukit tusar nakurusarmiayi. 35 Péprunmaya aents ii wajatiarmiayi. Tura uunt armia nusha Nin wishikiainiak “Chikichnaka uwemtikniuiti. Wats, yamá nekas Yusa anaiki-amuri Kristu tútainkiunka imia Niñki uwémpratí” tiarmiayi.

36 Suntarsha Nin wishikrarmiayi. Tariar churuínian aartai tusar awajiararmiayi. 37 Tura chicharainiak “Amesha nekas Israer-shuara uunt akupniurinkiumka amek uwemprata” tiarmiayi. 38 Tura muuknumaani, Kriaku

chichamjaj, Rúmanmaya apach chichamjajsha tura Israer chichamjajsha ju áarar anujkamu ámiayi: *JÚITI ISRAER-SHUARA UUNT AKUPIN*

³⁹ Chikichík yajauch áishman nuj ajintruamu amia nu kátsekeak chicharuk “Amesha nekas Yusa anaikiamurintkiumka amek uwemprata tura incha uwentikramprata” tímiayi. ⁴⁰ Tura chíkich ni tsaniakmarin kakantar chicharuk “¿Amesha Niijjaj métek asutniátasa pujayatam, Yus ashamatsmek? tímiayi. ⁴¹ Iikia yajauch asar wáitsatniuitji; ii tunaari akikmakur wáitiaji. Antsu ju áishmanka yajauchin túrichuiti” tímiayi.

⁴² Nuyá Jesusan chicharuk “Amesha akupin ajasam winiasha enentáimtursata” tímiayi.

⁴³ Tutai Jesus chicharuk “Nekas tájame, jakar shiir pujutainium yamáí tsawant Wijjaj pujustatme” tímiayi.

Jesusa jakamuri

(Mateu 27.45-56; Márkus 15.33-41; Juan 19.28-30)

⁴⁴ Tutupin aj ashí nunkanam ti kirit ajasmiayi. Tura menaintiú ura nankaamasu ain, nantu nunkaach ajassha tuke kirit ámiayi. ⁴⁵ Tsawái nantusha mushatmarmiayi. Tura Jerusarennum Yusa Uunt Jeencha tarach ajamu aa jímiapetek nakaakamiayi. ⁴⁶ Nuyá Jesus untsukum “Apawá, winia wakantrun Amiin ikiuajai” tímiayi. Nuna tinia jakamiayi.

⁴⁷ Suntara kapitiantri nu túrunamun wániak, Yusa náarin shiir awajeak “Jusha imiá nekas péñker áishmankuyi” tímiayi.

⁴⁸ Tura untsurí aents pujuarmia nu, nu túrunamun wáinkiar ti kuntuts enentáimiainiak ni netsepen paat awatiar waketkiarmiayi. ⁴⁹ Tura Jesusa amikrisha tura nuwá Kariréanmaya Nin nemariarmia nusha íkian wajasar ii wajarmiayi.

Jesusan iwiarsarmiania nu

(Mateu 27.57-61; Márkus 15.42-47; Juan 19.38-42)

⁵⁰ Naka enentáimin péñker áishman ámiayi ni naari Jusé. Arimatéa pepru Jutía núnkanam ana nuyauyayi. Israer-shuara Uunt Iruntairin páchitkiauyayi. ⁵¹ Yus ju nunkanam akupin ajasat tusa Jusé nakas pujumiayi. Tuma asa Uunt Iruntainium Jesusan túrawarmia nuna nakitmiayi. ⁵² Tuma asamtai Piratui we Jesusa ayashin seamiayi. ⁵³ Piratu “ayu” takui, Jesusa ayashin krúsnumia jusa tarachjaj penuar kaya táurmanum iwiarsamiayi. Nu táurmanum chíkich iwiarsachmauyayi. ⁵⁴ Iwiaratin tsawantaj, ayampratin tsawant tsawastatuk ajasmatai túrunamiayi.

⁵⁵ Tura nuwá Kariréanmaya jukiniutak Jesusan nemarsarmia nusha iwiarsamunam weriar, Jesusa ayashí itiur ikiusmait nuna iisarmiayi. ⁵⁶ Iisar ikiuak ni jeen waketkiarmiayi. Tura Jesusa ayashí mejeeniñ tusar kunkuinian iwiararmiayi. Tura ayampratin tsawantaj, Israer-shuar akup-kamun umikiar ayamprarmiayi.

24

Jesus nantakmiania nu

(Mateu 28.1-10; Márkus 16.1-8; Juan 20.1-10)

¹ Tumintin káshik kunkuinian iwiaramun júkiar nu nuwá Jesus iwiarsamunam weriarmiayi. Tura chíkich nuwasha atampriarmiayi.

² Tura iwiarsamu kaya atutkamu urani aan wáinkiararmiayi. ³ Tura wayawar uunt Jesusa ayashin wáinkiacharmiayi. ⁴ Wáinkiachu ásar ashankarmiayi. Tura “itiurkatjik” tiarmiayi. Tumaj jimiará áishmankan pushin wincharpatniun entsaru nin ayaamach wajainian wáinkiararmiayi.

⁵ Nuna wáinkiar ti sapijmiainiak tsuntsumawarmiayi. Túmakui nu áishman chicharainiak “¿Iwiaakusha urukamtai jakaanumsha earum? tiarmiayi. ⁶ Jui pujatsui. Antsu nantakni. Nékatsumek. Niisha Kariréanam tuke pujus ⁷ “Wi, Aents Ajasuitjiana nu, yajauch aentsnum surunkattajai. Túran krúsnum mantamnattajai. Tura menaintiú tsawantaj nantaktiatjai” turamchamkarum” tímiayi.

⁸ Nuna takui Jesus timian enentáimprarmiayi. ⁹ Tura iwiarsamunmaya waketki taar, Jesusa unuiniamurin auntse armia nuna tura chikichnasha ashí nu túrunamun ujakarmiayi. ¹⁰ Jesusa unuiniamurin ujakarmia nu ju áiniawai: Maktaranmaya Marí, Juánasha, Jakupu nukurí Marisha, tura chikich nuwajai. ¹¹ Tura Jesusa unuiniamurisha nuwá tuíniakuisha nekasaiti tu enentáimtsuk “wáuruk tuíniawai” tiarmiayi.

¹² Túrasha Pítrusha jiinki Jesus iwiarsamunam tsékenki werimiayi. Jeá, init iis, aya tárachik tepenan wáinkiamiayi. Tura túrunamia nuna ti enentáimiar ni jeen waketkimiayi.

*Emaús wetai jintianmaani túrunamia nu
(Márkus 16.12-13)*

¹³ Nu tsawantajk Jesusa nemarniuri jímíar Emaús péprunam wéarmiayi. Emaúska Jerusarénumia auntse kirumitru jeá pujawai. ¹⁴ Túrunamia nuna chichaki wearmiayi. ¹⁵ “Itiurkit” tu aujmatki weenai imia Jesus taa nu páchiniak níijjai wearmiayi. ¹⁶ Tura wáinkiarat nekaashtin asamtai yait nekaacharmiayi.

¹⁷ We-wénakua Jesus chicharainiak “Jintiasha ¿warí áujmatkirum wéarum? ¿Urukamtai kúntuts enentáimprum?” tímiayi.

¹⁸ Chikichik, Kreupas náartin chicharuk “Jerusarénum túruna nuna ashí nékainiawai. ¿Ámeke amekék túrunamia nu nékachu páchitkiam?” tímiayi.

¹⁹ Tutai Jesus tímiayi “¿Warí urukait?”

Tutai tiarmiayi “Entá, Nasarénumia Jesusa túrunamuri taji. Niisha Yúsnan etserin asa Yusa kakarmaríjiai chichasmiayi tura nuna kakarmaríjiai takasmiayi. Núnaka ashí aents nékainiawai. ²⁰ Tura ii Pátrirí uuntri tura ii pépruri uuntri “tunáa jakamnia túrayi” tusar “krúsnum mantamnati” tiarmiayi. ²¹ Tura ii Israer-aentstin uwentikrampratin tu enentáimsamji. Tura ni maa-musha menaintiú tsawant nankaamasai. ²²⁻²³ Túrasha ii nuwá ni iwiarsamunam yamá káshik weriar ni ayashin wáinkiacharmái. Tura “Yusa suntari wáinkiaji tura “Jesus iwiaakuiti” túramji” tiarmai. Nuna tu ujatmakakrin ti enentáimpraji. ²⁴ Nuyá íi shuar iwiarsamun weriar, nuwá tiarmia tímiatrusan wáinkiararmiayi. Tura Jesusnaka wáinkiacharmái.” Tu ujakarmai Jesusan.

²⁵ Nuyá Jesus nin chicharainiak “Enentáimchaitrume. Ashí Yúsnan etserin tiarmia nu wau enentáimtsurume. ²⁶ ¿Yusa anaikiamuri, Kristu tutai, shiir awajnatsuk ti wáitsashtinkiait?” tímiayi.

²⁷ Tura nuyá Yus-Papinium Muisáis aarmia nuyá jukin ashí Yúsnan etserin ni túrunatniurin áararmia nuna jintintiatasa nankamamiayi.

²⁸ Ayu, nii wearmia nú peprunam jeawarmiayi. Tura Jesuska nu nankaamaki wétaj tau ajamiayi. ²⁹ Tura niisha chicharainiak “Weep. Iijjai pujustá. Warí, nantu akaikiyi, kirit ajatemsai” tiarmiayi.

Tutai Jesus níijjai pujustaj tusa wayamiayi. ³⁰ Tura níijjai irunar misanam pujus, yurumkan achik, Yúsan yuminkias nincha puuk súsarmiayi. ³¹ Nu chichamaik, ni jii uranniuá núnikiarmatai Jesusan nekaawarmiayi. Tura Niisha nú chichamaik menkakamiayi. ³² Tura nu shuarsha mai tunai ajainiak “Jintia winis Niisha Yus-Papin jintintramuk nekas ii enentáin shiir enentáimtikramprachmakaj” tiarmiayi.

³³ Nuyá, Emaúsnumiá wárik jíinkiar Jerusarénum waketkiarmiayi. Nui Jesusa unuiniamurin auntse armia nuna tura chíkich shuar Jesusan nemari-armia nunasha iruntrar pujuinian wáinkiararmiayi. ³⁴ Auntse armia nusha tiarmiayi “Uunt Jesus nekas nantakni. Semun Nin wáinkiaiti.”

³⁵ Tutai niisha jintiá túrunamun ujakarmiayi. “Jesus yurumkan ajaamakui nui nekaamji” tiarmiayi.

Ni unuiniamurin Jesus wantintiukmiania nu
(Mateu 28.16-20; Márkus 16.14-18; Juan 20.19-23)

³⁶ Nuna áujmatuk pujuiniai Jesus aya aneachma ajapén wajas “Shiir enentáimsatarum” tímiayi.

³⁷ Nuna antukar, ti sapijmiakar, wakanchashit, enentáimsarmiayi.

³⁸ Tura Jesus chicharainiak “¿Urukamtai sapijmiakrum wakanchashit, tu enentáimsarum? ³⁹ Winia uwejrusha, nawersha írtustarum. Wíkiitjai. Takarsa írsatarum. Warí, wakancha ayashtinkiait, ukunchtinkiait” tímiayi.

⁴⁰ Nuna tinia ni uwejéncha nawéncha iniaktusarmiayi. ⁴¹ Warainiyat sapijmiainia ásar, Niimpiashit tu enentáimtusarmiayi. Tuma asamtai, nin chicharainiak “¿yurumak takakrumek?” tímiayi. ⁴² Takui, namaknasha, míshkincha súsararmiayi. ⁴³ Tura Jesus nuna achik niisha íimiainiamunman yuami-ayi. ⁴⁴ Tura nin tiarmiayi “Winia túrutawarma nuna, Wi atumjai nuik pujusan tímiajrum. Nekas uminkiatniuyayi. Iis, wi túrunatniurun Muisáis aarmia nusha, Yúsnan etserin aarmia nusha, tura Sarmu papinium aarma ana nusha ashí uminkiatniuyayi” tímiayi.

⁴⁵ Nuyá Yus-Papinium aarman jintintiawarmiayi. ⁴⁶ Jintintiuk juna tímiayi: “Yusa anaikiamuri Kristu tutai jaka menaintiú tsawantai jakamunmaya nantaktinia nu yáunchuk áarmauyayi. Tura Wi nú Krístuchukaitiaj. ⁴⁷ Winia náarun pachisar, Jerusarénumiá nanakama ashí nunkanam nu chicham etsernaktinia nu áarmauyayi. Shuar ni tunaari tsankurnarat tusar enentáin yapajiátniuiti. Tura tu etserkatniua nusha yaunchu áarmauyayi. ⁴⁸ Tura wi túrunamu neka asarum etserkatniuitrume, tímiayi. ⁴⁹ Tura winia Apar, winia Wakantrun susartatjai, turammarumna nuna akuptuktatjarme. Tura nayaimpinmaya táatsain jui Jerusarénum péprunam pujústárum. Taa ni kakar-marin suramsattarme.” Tu tímiayi.

Jesus nayaimpiniam wakamiania nu
(Márkus 16.19-20)

⁵⁰ Nuyá Jesus Jerusarénum péprunmaya júkiar Petania péprunam ejeniarmi-ayi. Tura nui ni uweje takuí, “Yus yáinmakarti” tímiayi. ⁵¹ Nuna tu pujus, niya kanakmiayi. Tura nayaimpiniam junakmiayi. ⁵² Ni unuiniamurisha Nin imiá shiir enentáimtusarmiayi. Tura nuyá ti warasar Jerusarénum waketkiarmiayi. ⁵³ Tura Yusa Uunt Jeen pujusar Yusa náarin shiir awajú pujuarmiayi. Áukete.

Yúsan Shiir Chichamen JUAN aarmia nu

Chícham aents ajasmiania nu

¹ Ashí nan̄kamamia nú yaunchu Yusa Uchirí tuke pujuyayi. Niisha Yúsan ti paant awajeakui, Chícham tíminiaiti. Chichamsha Yusjái pujuyayi. Chichamsha Yúsauyayi. ² Yáman̄kamtaik Niisha pujuyayi Yusjái. ³ Ashí najanamu ainia nu Niijjái najanamuiti. Nii najanachmaka pen̄ké atsawai. ⁴ Niisha iwiaaku átinia nérenniuti. Nu iwiaaku atincha tsáapninia áinis Yusna ana nuna ashí shuaran paant nekamtikiamniaiti. ⁵ Nu tsáapnin kiritniunam tsáapniawai. Tura kiritniusha tsáapninian ikiajniaktinian tujinkiaiti.

⁶ Áishman̄ ámiayi, Yus akupkamu, ni naari Juan̄. ⁷ Niisha tsáapnin chichaman etserkatajtsa támiayi. Nuna étseruk ashí umirkarat tusa támiayi. ⁸ Juan̄sha nu tsáapninchauyayi. Áyatik akupkamuyayi tsáapnin chichaman etserkat tusa. ⁹ Nu tsáapninkia nekas tsaapniniaiti. Ju nun̄kanam taa ashí shuaran enentáin tsáapniartiniaiti.

¹⁰ Chichamsha taramiayi ju nun̄kanam. Tura nun̄kasha ni najanamu ain̄, nun̄kaya aents Nin nekaacharmiayi. ¹¹ Támiayi ni nun̄kén tura ni shuarsha ni enentáin itiaacharmiayi. ¹² Tuma ain̄ chíkich shuar Nin enentáimtuiniak ni enentáin itiaawarua nuna Yusa uchirí ajastinian Yus tsan̄katkamiayi. ¹³ Niisha Yusa uchirí ajasar ataksha númpentin ayashímkiacharmai. Áentsnúmiã akiiniachu áiniawai niisha. Áishman̄ wakeramujajsha akiiniacharmai. Antsu Yúsnumiã akiiniawaru ásar Yusa uchirí áiniawai.

¹⁴ Nú Chichamsha ayashtin ajas iijjai núkap tsawant pujumiayi. Yusa anen̄kratairijjai piakuyi. Aya nekas nunak chichaamiayi. Núnisan̄ ni pen̄kerin̄, aya Yusa Uchirí chikichkia nu takusminia nuna iniakmamiayi. Nusha iisha paant wáinkiaitji. ¹⁵ Juan̄sha Nin neka asa, étseruk tímiayi “Júiti wi tímiaj nu: “Winia ukuruini winittiana nu wíjjain̄kia émkaiti. Maa, wi atsaisha tuke pujuyayi” tiniujai.” Tu etserkamiayi.

¹⁶ Chichamsha ti anen̄kartin asa ashí pen̄ker ana nuna iniaitsuk súramji. ¹⁷ Yusa akupeamurin̄ Muisais yaunchu jintintraiti, antsu aneatniuncha tura ashí nekas ana nunasha Jesukrístu jintintraiti. ¹⁸ Chikichkisha Yúsan pen̄ké wáinkiachuiti. Tura ni Uchirí chikichkia nu tuke Niijjái tsaníaku asa Yúsan paant awajturmasuitji.

Imiakratin Juan̄ Jesukrístunun etserkamiania nu (Mateu 3.11-12; Márkus 1.7-8; Rúkas 3.15-17)

¹⁹ Jerusarénnumiã Israer-shuar ni Pátririn̄cha Riwi-shuarjai Juan̄kai akupkarmiayi yákit tusar.

²⁰ Inintruiniakui paant ujakmiayi. “Wikia Krístuchuitjai” tímiayi.

²¹ Takui ataksha aniasarmiayi “¿Nuikia yáitiam. Yúsnan etserin yaunchu amia nú Eríaskaitiam?” tiarmiayi.

Juan̄sha “Atsá, núchaitjai” tímiayi.

Nuyá ataksha aniasarmiayi “Nuikia ¿Yúsnan etserin tátinia nukáitiam?” tiarmiayi.

Niisha “Atsá” tímiayi.

²² Takui “¿Nu arantcha yáitiam. In akuptamkajnia nusha warí títiataj. Warintia enentáimiam?” tiarmiayi.

²³ Juansha tímiayi “Yúsnan etserin Isayas yaunchu timia núitjai. Niisha áarmiayi “Aents atsamu nunkanam shuar untsumui “Ii uuntri jintí naka awajsatarum,” tu untsumui.” Núnaka Isayas áaruiti. Tura wikia untsumna nú shuaraitjai” tímiayi.

²⁴ Juanjaj chichainiakka Pariséu akupkarma áarmiayi.

²⁵ Niisha tiarmiayi “Nuikia Krístuchuitatmesha, Eríaschaitatmesha, Yúsnan etserin tátinia núchaitatmesha ¿urukamtai imiakratam?” tiarmiayi.

²⁶ Juansha tímiayi “Wikia entsajain imiakratjai. Tura átum írutramunam shuar átum nékatsrumna nu wajaawai. ²⁷ Niisha winia ukuruñi wini-ayat wíjiañkia ti nankaamantuiti. Nii ti péñker asamtai wisha ni sapatrj jñkiamurñcha atitrachminiatjai” tímiayi.

²⁸ Nuka Petapara peprunam túrunamiayi. Petaparasha Juan imiakratmia nu jurtan entsa amain amai.

Jesus Yusa Murikrinti

²⁹ Nuyá kashin Juan Jesusan winian wáiniak tímiayi “Iistarum. Núiti Yusa Murikrj ashí aentsu tunaarñ júana nu. ³⁰ Núiti wi tímiaj nu, “Winia ukuruñ winiana nu wíjiañkia nankaamantuiti. Tura wi atsaisha tuke pujuyayi” tímiajai. ³¹ Wisha Nin nekaachmajai. Tura ashí Israer-shuar Nin nekaawarat tusan imiakin támajai” tímiayi.

³² Nuyá tímiayi “Yusa Wakanin yámpitsa núnin nayaimpinmayan táarun wáinkiamjai. Tura ekemsamai. ³³ Nu túruntsañ tuke Nin nekaachmajai. Tura Yuska winia imiakrattinian akuptak turutmiai “Chikichik shuarnum Yusa Wakaní tara ekemsa wáinkiam, nujaj nekaattame. Yusa Péñker Wakaníjiaj imiakratniua núiti” túrutmiayi. Tura nujaj Nin nekaamjai. ³⁴ Yamaikia wainkia asan ti paant nékajai tí nekas Yusa Uchirínti” tímiayi Juan.

Jesusa unuiniamurj emka armia nu

³⁵ Kashincha ataksha Juan nu j wajasmiayi ni unuiniamurj jímiarjai.

³⁶ Jesussha nu nankaamakui Juan tímiayi “Iistarum, Yusa Murikrj áuwiti.”

³⁷ Juanka unuiniamurj nuna antukar mai Jesusan pataatukarmiayi.

³⁸ Jesussha úkumur ímias nu jímiaran wininian wáinkiamiai.

Tura tímiayi “¿Ya earum?”

Niisha “Uuntá, ¿tuj pujam?” tiarmiayi.

³⁹ Jesussha tímiayi “Wats, iitiarum.”

Niisha wear ni pujutairñ wáinkiarmai. Tura áankú ajasmatai nu tsawantaj nu kintiamprarmiayi.

⁴⁰ Juanka chichamen antukar Jesusan pataatukaruka jímiar áarmiayi. Chikichik Antresauyayi. Niisha Semun Pitru yachiiyayi. ⁴¹ Antressha wárik ni yachj Semun kan eaktajtsa wémiayi. Tura wáiniak “Misías wáinkiaji” tímiayi. Misíaska ni chichamen “Kristu” tawai. Krístuka Israer-shuaran yainkariat tusa Yus anaikiamuiti.

⁴² Nuyá Antres ni yachj Semun kan Jesus pujamunam jukimiayi. Jesussha wáiniak tímiayi “Ámetme Semun, Junasa uchirí. Túrasa Sépas átatme.” Sépaska Israer-shuar chichamnum kaya tawai. Tura Kriaku chichamnum nuka Pítruiti.

Jesus Jiripijiaj tura Natanaérjai chichasmiania nu

⁴³ Kashincha Jesus Kariréa nunkanam wétajtsa pujumiayi. Tura Jiripin wáiniak “Nemartusta” tímiayi.

⁴⁴ Jiripisha Petsaitia péprunmayayuyayi. Antressha Pítrusha nu péprunmayayuyayi. ⁴⁵ Nuyá Jiripi Natanaéran eakmiayi.

Tura wáiniak tímiayi “Muisais Yus akupkamu papinium “Anaikiamu tátatui” tu áarchamkia. Yaunchu Yúsnan etserniusha ujakcharmakia. Nu shuar wáinkiaji. Jesusaiti, Jusé uchirí. Nasarét péprunmayaiti.”

⁴⁶ Natanaérsha tímiayi “¿Nasarétnumiá péñker shuar áminkiait?”

Jiripisha “Winim ítiá” tímiayi.

⁴⁷ Jesussha Natanaéran tíjiuch winian wáiniak tímiayi “Ju shuar iistarum. Ti péñker Israer-shuaraiti. Penké anankartichuiti.”

⁴⁸ Natanaérsha tímiayi “¿Itiur nékaram?”

Jesussha tímiayi “Jiripi tuke untsurmatsain wáinkiajme iku numirin ejamkam wajamin.”

⁴⁹ Natanaér nuikia tímiayi, “Uunta, nekas Yusa Uchirínme. Israer-shuar akupniuitme” tímiayi.

⁵⁰ Tura Jesus tímiayi “¿Aya wi “Iku numirin ajamkam wajamin wáinkiajme” takui Winia enentáimturamek? Antsu nuna nankaamas nekaachmin ana nusha wáinkiaátame” tímiayi. ⁵¹ Nuyasha Jesus tímiayi “Wi nekas tájarme, Aents Ajasu asan atumsha nayaim uranmianum Yusa suntari Winin tara waka ajainia wáinkiaátarme.” Tu tímiayi.

2

Nuatnaikiatin jísat Kaná péprunam ámiania nu

¹ Menaintiu tsawant nankaasmatai nuatnaikiatin jísat Kaná péprunam ámiayi. Kaná péprusha Kariréa nunkanmauyayi. Jesusa nukurísha nuí pujumiayi. ² Jesussha ni unuiniamurísha nu nuatnaiyamunam ipiaamu ármiai.

³ Umutai amuukamtaí Jesusa nukurí tímiayi “Umutai amuukai. Penké takakainiatsui.”

⁴ Tura Jesus tímiayi “Nukuá, ¿urukamtaí Winia túrutam? Iniáitiústá. Winia kakarmar iniakmastiñ jeaatsui.”

⁵ Nuyá umutain wáinmainia nuna ni nukurí tímiayi “Ashí ni tana nu umiktárum.”

⁶ Nuí kayajai najanamu yumi-yaraatai sais (6) ámiayi. Nu yaraatainmaya Israer-shuar ni ewejéncha ni nawéncha nijiamau ármiai Yus shiir enentáimtusar. Chíkich chíkich yaraatainiam uchenta (80) rítrusha, siañ (100) rítrusha yumi wayamniauyayi.

⁷ Nuyá Jesus umutain wáinmaun “Ju yaraatai áimpratarum” tímiayi. Takui mete áimprarmiai. ⁸ Áimprarmatai Jesus tímiayi “Pai, ishichik shikikrum námper chicharu suutarum.” Tutai nútiksañ túrawarmiai.

⁹ Jista chicharusha nu umutai ajasun nekáprámiayi. Yaraatainmaya yumi jusamun nekaachmai niisha tura umutai ajamau jusaru ásar nékarmai. Jista chicharusha nuwatun untsuk ¹⁰ tímiayi “Jístanmanka péñker umutain emka suíniatsuk. Tura jémararmatainkia tímianchan suiniatsuk. Túrasha ámeke péñker umutai ikusam yamáí jíikchamek” tímiayi.

¹¹ Jesus túramu Kananum Kariréa nunkanam túrunamiayi. Nújainkia Jesus emka ni kakarmarin paant iniaktusmiayi. Nuna ísar ni unuiniamurísha Nin enentáimtusarmiai.

¹² Nuyá Kapernáum péprunam wémiayi. Ni nukurísha ni yachísha ni unuiniamurísha nemariarmiai. Nuísha untsurí tsawant pujusarmiai.

*Yusa Uunt Jeen suruktinian Jesus surinkiamiania nu
(Mateu 21.12-13; Márkus 11.15-18; Rúkas 19.45-46)*

13 Israer-shuara namperi, paskua tutai, ishichik ajasmatai Jesus Jerusarennum wemiayi. 14 Nui jea Yusa Uunt Jeen suruini wainkiamiayi. Turuncha murikniasha yampitsnasha surin armiayi. Chikichcha ni misarin pujusar kuítian yapajiniancha wainkiamiayi.

15 Nuna wainiak yaranken chapikmar asutkiartutain najana nujai ashí waakartiuk murikrintiuk aa jirmiayi. Kuítian yapajniu misarincha ayantar ni kuítrin nunka utsankarmiayi. 16 Yampitsan surinniasha timiayi “Nuka juyá jiiitarum. Winia Aparu Jeen surutai jea najanawairap” timiayi.

17 Nuna ísar ni unuiniamuri yaunchu Yus-Papinium áarman enentáimprarmiayi. Ju áarmaiti: “Ame Jeem shiir atí tusan ti wakerukuitjai.”

18 Nuikia Israer-shuara uuntri Jesusan aniasarmiayi “Juna túramniatjai tusan ¿warí kakarmak iniakmastatam?”

19 Jesussha timiayi “Ju jea sáakiakrumin menaintiú tsawantai iniantaittiai Wiki.”

20 Israer-shuarsha tiarmiayi “Kuarentisáis (46) uwitin juna jeamtinian pujursarmiayi. Amesha menaintiú tsawantai jeamtámeash.” 21 Kame Jesus “Jea” chichayat ni ayashin timiayi. 22 Tuma asamtai Jesus ukunam jakamunmaya nantakmiatai ni unuiniamuri ni timian enentáimprar ni chichamencha tura yaunchu Yus-Papinium áarmancha “Nekasaiti” tu enentáimtusarmiayi.

Jesus ashí shuara enentáin nékawai

23 Paskua námpertin ti untsurí Jerusarennum pujuarmia nu, Jesus aents tujintiamun túramtai, nuna wainkiar Nin nekas enentáimtusarmiayi. 24 Tuma ain Jesus ashí neka asa ninkia enentáimtuscharmiai. 25 Ninki ashí shuara enentáin neka asa chikich ujatkat tusa atsumchamiayi.

3

Jesus Nikiutémujai

1 Shuar ámiayi ni naari Nikiutému. Niisha Pariséu asa nii tuinia áintsan Yúsnan takauyayi. Niisha Israer-shuara uuntriayayi. 2 Niisha kashi Jesusai irastajtsa wé timiayi “Uuntá, shuáran unuiniarat tusa Yus akúptámkaiti. Nu paant nékaji. Yúsaiyanchuitkiumka aentsti tujintiamu túramna nu tujinki-aintme’ timiayi.

3 Jesussha timiayi “Tí nekas tájame. Atak yamaram akiiniachuka Yus akupeamunam pachiinkiashtatui.”

4 Tutai Nikiutému aniasmiayi “¿Itiurak shuar uunta nu ataksha akiiniat. Ataksha ni nukurí ampujén enkempramniakait atak akiiniatniuna?”

5 Ataksha Jesus timiayi “Ti nekas tájame. Shuar entsayasha tura Wakanniumiasha akiiniachuka Yus akupeamunam penké pachiinkiashtatui. 6 Ayashniumia akiinia nuka ayashchakait. Núnisan Wakanniúmia akiinia nuka wakanchakait. 7 Wi “atak yamaram akiiniatniuiti” takui itiurchat enentáimpraip. 8 Nase enentáimpratá. Nase nánkamsan umpúawai. Amesha ántame tura tuyan winiá túrasha tuiñ weti nékatsme. Núniskete ashí Wakanniúmia akiinia nu.”

9 Tuma asamtai Nikiutémusha atak anias “¿Jusha itiurak áminiat?” timiayi.

10 Jesus áikmiayi “Ame Israer-shuara jintinniurintiatmesha ¿itiura nékatsmea? 11 Ti nekas tájame. Nekas nékakur chichaaji. Íismajnia nusha ujaaji. Tuma ain ii chichame ántatsrume. 12 Aya ju nunkanmaya túramu ujaam ántachkurmeka ¿itiurak nayaimpinmaya túramusha antuktatum?”

¹³ ‘Shuar chikichkisha nayaimpiniam waka atsawai. Aya Wiki, nayaimpinmaya taran Aents Ajasu asan, túraitjai. Tura Wikia nayaimpinmayaitjai. ¹⁴ Tura Winiasha, Aents Ajasu ain, mantuawartatui. Iis, yaunchu Israershuar atsamunam wekainiak napijiaj ti jáiniakui tuke tsuamarti tusa Muisais napin jirú najana yakí numiniam awajaimiayi. Núnisnak Wisha awajnitniuitjai. ¹⁵ Nújainkia ashí Winia enentáimturna nuka jinium wétsuk Yusaj tuke iwiaaku pujustatui.’

Yuska ashí shuaran ti aneawai

¹⁶ Yuska ashí shuaran ti anea asa, ni Uchirin chikichik ana nuna shuaran uwemtikrarat tusa tsankatkamiayi. Ashí shuar Nin enentáimtana nu, jinium wécharat tusa, antsu Yúsnum tuke iwiaaku pujusarat tusa ni Uchirin akúpturmakmaji. ¹⁷ Yus áentsun kajerak jinium surukat tusa ni Uchirin akupkachmiayi. Antsu uwemtikrarat tusa akupkamiayi.

¹⁸ Yusa Uchirin enentáimtana nuka jinium penké surunkashtiniaiti. Tura Nin enentáimtatsna nuka, Yusa Uchirin chikichik ana nuna enentáimtachu asa, páchitsuk jinium surukmaiti. ¹⁹ Yusa Uchiri tsáapninia áintsan ii tunaari paant awajturmajai. Nu tsáapnisha ju nunkanam taraiti. Shuar tunáa ti tura ásar tsáapninian nakitrar kiritniun wakeriarmai. Nuna tura ásar jinium surunkaruiti. ²⁰ Ashí tunaan túruinia nuka tsáapninian mujiainiawai. Túrawar yupitiainiawai ni tunáa túramu paant ajasaj tusa. ²¹ Antsu ashí nekas túratniun umiiniana nuka tsáapninian weantainiawai. Yus ni enentái pujuram tsáapninium takainiawai. Nuka ti paantaiti.

Imiakratin Juan ataksha Jesusnan chichasmania nu

²² Nuyá Jesssha ni unuiniamurijiaisha Jutía nunkanam wear nuj pujusar imiakratiarmiayi. ²³ Juansha Enun nunkanam, Sarim tíjiuchia nuj, imiakratuk pujumiayi entsa nuj núkap aa asamtai. Tura aents táarmatai imiainiarmiayi. ²⁴ Nusha Juánkan sepunam enkenatsain túrunamiayi.

²⁵ Tura Juánka unuiniamuri Israer-shuarjai jianaiktinian nan kamawarmiayi. “¿Ya imiakratma imiá péñkerait?” tusar áujmatiarmiayi. ²⁶ Juánkaj inintrustai tusar wéarmiayi. “Uunta, ame nuik Jurtan entsa amain pujakum shuar nuj pujá “núiti Yusa Murikri” tíchamkum. Yamaikia imiakratui tura ashí shuar Nin nemarainiawai” tiarmiayi.

²⁷ Tutai Juan tímiayi “Ashí kakarmaka aya Yúsaiyanchakait. ²⁸ Wisha paant tímiajai “Wikia Krístuchuitjai antsu ni jintin iwíarat tusan emka akupkamuitjai.” Nusha antukmarme. ²⁹ Kame shuar nuwan nuatna nuna áishrinti. Nuatnaiyak áishman nuwejaj áujnainiakui, ni amikri sha nuna antuk ti waraatsuk. Wisha núnisnak aents Jesusaj wénakui ti waraajai. ³⁰ Niisha tuke nan kaamaku uunt ajastiniaiti antsu wikia tuke tímiancha ajastiniaitjai.” Juan tu chichasmiayi.

Nayaimpinmaya tara nu

³¹ Nayaimpinmaya tara nuka ashí nan kaamakuiti. Nun kaya nuka, nun kaya asa ju nunkanmayan ak áujmatui. Nayaimpinmaya tara nuka ashí nan kaamakuiti ³² tura nuj antukmancha ísmancha áujmatui. Túrasha ni chichamen ántuiniatsui. ³³ Antsu ni chichamen ántana nuka “Yusa chichame imiá nekasaiti” tawai. ³⁴ Yus akupkamuka Yusa chichamen étserui. Yuska ni Wakanin ementutsuk susa asamtai tu étserui. ³⁵ Yus Apa ni Uchirin anea asa ashí ana nuna iistí tusa ataksaiti. ³⁶ Shuar Yusa Uchirin enentáimta nuka yamaram iwiaakmanum akiinia asa tuke Yusaj shiir pujustiniaiti. Antsu Yusa Uchirin enentáimtatsna nuka nu iwiaakmanum akiiniachuiti antsu Yus tuke nin kajerkaiti.

4

Jesus Samaria nunkanmaya nuwajai chichasmiania nu

¹ “Jesus untsurí shuaran ni nemarkin awajeawai; kame Juanjajai nankaamas untsurí imiaawai” taman Pariseu shuar antukarmiayi. ² Nekaska Jesus imi-akratchamiayi, antsu ni unuiniamurí túrawarmiayi. ³ Pariséu nu chichaman antukarman Jesussha nekáa Jutía nunkanmaya jiinki Kariréa nunkanam waketkimiayi.

⁴ Wáketuk Samaria nunkanmaani nankaamaktiniuyayi. ⁵ Samaria nunkanam wéak Sekar péprunam jeamiayi. Nu pepru jeastatuk Jakupa nunke ámiayi. Jakupsha nu nunkan ni uchirín Jusén tí yaunchu susamiayi. ⁶ Nuisha yumirmat ámiayi. Jakup taurma asamtai “Jakupa yumirmatri” tiarmiayi. Tutupin jeamtai Jesussha pimpiki winis yumirmat ayamach pujusmiayi. ⁷ Nuí pujajai Samarianmaya nuwá yumí shikiktajtsa támiayi. Tura Jesus “Entsa surusta” tímiayi. ⁸ Jesusa unuiniamurísha yurumkan péprunam sumaktajtsa wéaru asamtai aya Jesusak pujumiayi.

⁹ Samarianmaya nuwá Jesusan tímiayi “¿Itiura Israer-shuaraitiatmesha Samarianmaya nuwá aisha entsa seatam?” Kame Israer-shuar Samarianmaya shuarjainkia penké chichachu ásar nuna tímiayi.

¹⁰ Jesussha tímiayi “Yus súamu nékameka tura entsa surusta tájam nusha nékameka ame antsu seattínme tura Wikia iwiaaku entsan amasaintjai.”

¹¹ Nuwasha tímiayi “Uunta, entsasha ti initiaiti tura shikiktincha takaktsume. ¿Tuyañ iwiaaku entsasha surustam? ¹² Ii uuntri Jakup ju yumirmatan taur juyanak niisha ni uchirísha ni waakarísha umararmiayi. Nuyá ikiur-tamkimiayi. ¿Amesha Jakupjai nankaamas kakarmakaitiam?”

¹³ Jesussha tímiayi “Ashí shuar ju entsan umarka ataksha kitiamtiatui. ¹⁴ Antsu Wi súajna nú entsan umarka penké kitiamchattawai. Antsu nu entsa Wi susamuka ni enentáin púkunia áintsan tuke pajamtiatui nujajai tuke iwaaku pujustí tusa.

¹⁵ Tutai nuwá tímiayi “Uuntá, winiasha nu entsa surusta. Wisha kitiamcha átaj. Tura ju entsan cha shikiktinian táchataj” tímiayi.

¹⁶ Nuyasha Jesus tímiayi “Áishrum untsukam utitia, turam jui tatá.”

¹⁷ Nuwasha “Winia áishur atsawai” tímiayi.

Tutai Jesus tímiayi “Maa, nekas tame. Áishrum atsawai. ¹⁸ Kame ame áishrum senku (5) takusuitme. Yamái takakmena nusha ame áishrumchaiti. Nekas tame.”

¹⁹ Nuna antuk nuwasha tímiayi “Uunta, ame Yúsnan etserniuchukaitiam. ²⁰ Ii únuntriñkia tuke Samarianam pujuarmia nu jú nainnium Yúsan tikishmatrarmiayi. Antsu átum Israer-shuar árumna nu aya Jerusarénum Yus tikishmátratniuiti tárume.”

²¹ Jesus tímiayi “Nuwá, enentáimsata. Tsawant jeattawai átum jú nainniumsha tátsuk tura Jerusarénumsha wétsuk Yus Apa tikishmatratin.

²² Átum tikishmatrum nuka nékatsrume. Iikia tikishmatrajnia nu nékaji. Israer-shuarnumiá Uwemtikkiartin winiakui nékaji. ²³ Tsawant winittiana nu yamá jeayi. Ashí shuar Yus Apan nekas tikishmatainiakka tuke wakanjajai tuke enentáijajai awajitsuk tikishmatrartatui. Núnisan tikishmatrurat tusa wakerawai Yus Apa. ²⁴ Yuska Wakaniiti tura ashí Nin tikishmatainia nuka tuke wakaníjjajai tura tuke enentáijjajai awajitsuk tikishmatratin áiniawai.”

²⁵ Nuwasha tímiayi “Anaikiamua nu tátiniaiti. Nusha Krístuiti. Niisha taa ashí jintinramattaji.”

²⁶ Jesus tímiayi “Wiitjai. Ámin chichaajmena nú Kristuitjai.”

²⁷ Nuin ni unuiniamuri táarmiayi tura nuwajai chichaa pujan wáinkiar ti enentáimprurarmiayi. Tumaitiat “¿Warí wakerakmea nuwajai chichaam?” títinian arantukarmiayi. ²⁸ Nuyanka nuwa ni yumirin ikiuki péprunam we ashí áentsun tímiayi ²⁹ “Winiirum ítiarum, shuar ashí wi túramun túruta nu. ¿Juka Krístitiya?” ³⁰ Tutai péprunmaya jíinkiar Jesus pujamunam wearmiayi.

³¹ Jeainiatsain ni unuiniamuri seak tiarmiayi “Uunta, yurumáta.”

³² Tura Jesus tímiayi “Wi yúatniunka takakjai átum nékachman.”

³³ Ni uniuniamurisha nuámtak anniasarmiayi “¿Chíkich shuar yurumak itiarím tátsuash?” tiarmiayi.

³⁴ Tura Jesus tímiayi “Winia akuptukua nuna wakeramuri túrakun tura ni takatrín takaakun Wíjainkia yurumátniua áintsan ikiakáatui. ³⁵ Átumka “Tuke kuatru nantu árak júuktin taasai” tátsurmek. Túrasha Wi tájarme, shuar wininia nu iistarum. Yus-Chicham ni enentáin araamuiti. Tura júuktin tsawant jeayi. ³⁶ Arakan júaka akinkiatniuiti. Júukmataisha nu shuar uwemprar tuke iwiaaku pujusartatui. Núnisan arakan araana nusha júana nusha mai metek warasartatui. ³⁷ Tiniu armia nuka nekasaiti: “Chíkichik araawai chíkichcha júawai.” ³⁸ Iis, chíkich arakmamu júuktinian akupkaitjarme. Átum araachiatrumek chíkich takasmanum atumsha pachíintiukuitrume” tímiayi.

³⁹ Tura núwaka péprunam jeá “Ashí wi túramun ujakayi” takui untsurí shuar Jesusan ti shiir enentáimtusarmiayi. Niisha Samarianmaya shuar áarmiayi. ⁴⁰ Nu asantai ashí Jesusai taar niijjai pujusát tusa seawarmiayi. Tutai Jesus jimiará tsawant nuí pujusmiayi. ⁴¹ Nú shuar untsurí ni chichamen antukar Jesusan ti shiir enentáimturarmiayi. ⁴² Nuyá nuwan tiarmiayi “Yamaikia aya ame chichammijjain Jesus enentáimtatsji antsu imia iisha ni chichamen anturkaji. Tura nékaji nekas Krístiti, ashí shuaran Uwemtikin.”

Jesus akupniu takarniuri uchirin tsuármiania nu

⁴³ Jimiará tsawant nankaasmatai Jesus Samaria nunkanmaya jiinki Kariréa nunkanam wémiayi. ⁴⁴ Kariréasha Jesusa nunke asantai, ainsha Jesus timia áintsan ámiayi: “Yúsnan etserniun ashí shuar pénker anturainiawai antsu nuna nunkeyanka nin anturainiatsui.” ⁴⁵ Tuma ain Kariréa nunkanam jeamtai auya shuarsha Jerusarénnum paskua námpernum wearu ásar tura ashí ni túramun nuí wainkia ásar ti shiir awajsarmiayi.

⁴⁶ Nuyá Jesus Kaná péprunam atak támiayi. Nu péprunmasha nuik Jesus yumin umutai awajsamiayi. Jesussha nuí pujai yajá péprunam Kapernáumnum akupniu takarin ámiayi. Ni uchirísha jaa tepemiayi. ⁴⁷ Niisha Jesus Jutíanmaya Kariréa nunkanam taman antuk Jesusai wémiayi. Tura ni uchirí jákatin tepakui ni jeen we ni uchirín tsuarat tusa Jesusan seamiai.

⁴⁸ Jesussha tímiayi “Aya aents túrachminian túrakui ísrum aya nújain Winia enentáimtarme.”

⁴⁹ Tura takarin tímiayi “Uunta, winia uchir jáatsain wari winitia.”

⁵⁰ Nuinkia Jesus tímiayi “Jeemíin waketkitia. Yamaikia ame uchiram pénker ajasai.” Tutai nú aishman Jesus táman antuk wémiayi.

⁵¹ Ni jeen jeátemámtai ni takarniuri inkiun tiarmiayi “Yamaikia uchiram pénker ajasai.”

⁵² Apasha inintrusmiayi nantu urukaim pénker ajasma.

Niisha tiarmiayi “Yau, nantu pukuntamta, tsuemun michatramai” tiarmiayi.

Nuna antuk uchí aparísha enentáimsamai. ⁵³ Nantu pukunta ai Jesus “Ame uchiram pénker ajasai” timia nuní ain michatrait. Tuma asantai niisha ashí ni shuarísha Jesusan nekas enentáimturarmiayi.

⁵⁴ Jesus nu túramujaj ni kakarmarín jimiara iniakmasmiayi. Nunasha Jutíanmaya jiinki Kariréa nunkanam jeá túramiayi.

5

Petesta amia nuí tampemarun Jesus tsuármiania nu

¹ Nu nankaasmatai, Israer-shuar namperan najanainiakui Jesus ataksha Jerusarénum waketkimiayi. ² Jerusarén yama wayamunam murik wayatin waiti tíjich amia nuí entsa pajamtai jeammauyayi. Nu pajamtain Petesta tiarmiayi. Nuna wáitirisha senku (5) ármiai. ³ Nuí untsurí jáiniak nunkanam tepearmiayi. Kusurusha shutuapsha tampemakusha tepesar entsa miartukat tusa nákasarmiayi. ⁴ Kame ni tátaj taku Yusa suntarí táuyayi entsan umuchkiattsa. Nuyanka emka shuar entsá wayá nu ni jáamuriya tsuáarmiayi. ⁵ Áishman traintiúchu (38) uwi jaa tepá nuí ámiayi.

⁶ Jesussha nu shuaran nuí tepan wáinkiamiayi. Tura untsurí uwitin jaa tepan nekáa aniasmiayi “¿Shiir ajastiniak wakeram?”

⁷ Tutai jaasha tímiayi “Uunta, entsa muchitkiui ¿winia yaki enkétát? Kame wi enkemátaj tai chíkich emka enkemáiniawai.”

⁸ Nuyá Jesus tímiayi “Nantaktia. Ame peakrum jukim wetá.”

⁹ Nu chichamtaik áishman shiir ajasmiayi. Tura ni peakrín jukí wémiayi. Nusha ayampratin tsawantaj túrunamiayi. ¹⁰ Tuma asamtai Israer-shuar shiir ajasun tiarmiayi “Yamáí ayampratin tsawantaiti. Peakrum júkishtiniaitme” tiarmiayi.

¹¹ Áishmansha tímiayi “Winia tsuara nu “Peakrum jukim wetá” turutni” tímiayi.

¹² Nuinkia aniasarmiayi “¿Ya “Peakrum jukim wetá” túramam?” tiarmiayi.

¹³ Tura áishmansha Nin tsuárun nékachmiayi. Untsurí shuar nuí aa asamtai tura Jesus weu asamtai nin nekaachmiayi.

¹⁴ Atak Jesus Yusa Uunt Jeen áishman kan wáiniak tímiayi “Antukta. Yamaikia shiir ajasume. Atak tunáa túrawaip; nu arant ajasáim” tímiayi. ¹⁵ Nuinkia áishman Jesus nin tsuármán nekáa Israer-shuaran ujakmiayi. ¹⁶ Tuma asamtai ayampratin tsawantaj túramtai Israer-shuar Jesusan maatai tusar áintrarmiayi. ¹⁷ Tura Jesus tímiayi “Wina Apar tuke yamaisha takawiti. Núnisnak Wissha takaajai.” ¹⁸ Tutai Israer-shuar nuna nankaamas maatai tusa wakeriarmiayi. Ayampratin tsawantaj takaakui kakerkarmiayi. Tura nu arantcha “Yus winia Aparuiti” takui Yusjaj métek enentáimtumawai tusar nu arant kakerkarmiayi.

Yusa Uchirí túramnia nu

¹⁹ Nuyá Jesus tímiayi “Ti nekas tájar me, Yusa Uchirínkia ni enentáijiaín takaatsui. Antsu aya winia Apar takaana nuna ísan métek takaajai. Ashí winia Apar túramun Wissha ni Uchirí asan métek takaajai. ²⁰ Ni Uchirí asamtai winia Apar anentui tura ashí tura nuna iniakturui. Tura nuna nankaamas tujinkiamnian iniaktursattawai Wissha túratniun. Tura nuna túrakui ashankattarme. ²¹ Winia Apar jakamunmayan iwiaaku ajasat tusa Ni wakerana nuna inianteatsuk. Núnisnak, ni Uchirí asan, Wi wakeraj nuna iwiaaku awájsámniaitjai. ²² Winia Aparka súmamtiktusui antsu shuar súmamtikiatniun ni Uchirín súsaiti. ²³ Tuma asamtai ashí shuar Yus Apan shiir awajainia áintsan ni Uchiríncha métek shiir awajatsin áiniawai. Yus Apa ni Uchirín akupka asamtai, Uchin shiir awajatsna nuka Yus Apancha shiir awajatsui’ tímiayi.

²⁴ ‘Ti nekasaiti. Winia chichamprun ántana nú shuarka Winia Akuptukun enentáimtak ni iwiaakmarin tuke amuukashtinian takakui. Nu shuarsha ayashí iwiaakuitiat jákauyi antsu yamá nekas iwiaakuiti. Tuma asa sumamashtatui. ²⁵ Ti nekasaiti. Tsawant winittiana nu jeayi. Nu tsawant jaka ainia nu Wi untsumman antukar umirkarka iwiaaku ajasartatui. ²⁶ Iis, winia Apar iwiaaku awajsatniun takakui. Tura Winiasha, ni Uchirí asamtai, iwiaaku awajsatniun surusuiti. ²⁷ Nu arantcha wi Aents Ajasu asamtai, shuaran súmamtikiatniun surusuiti. ²⁸ “Ju chicham iturchataiti” enentáimprairap. Atak tsawantai wi untsumman ashí jákaru ainia nu antukartatui. ²⁹ Tura ashí iwiansamunmaya jíinkartatui. Péñker túrawarusha nantakiar tuke iwiaaku pujusartatui. Antsu tunáa túrawarusha nantakiar jinium surunkartatui’ tímiayi.

“Jesus nekas Yúsaiyaiti” tu áujmatania nu

³⁰ ‘Imia Wíki takaatsjai. Antsu Yus tana núnisnak súmamtikeajai. Wi wakeraj nuna enentáimtsuk antsu winia Apar wakera nuna wakerukan, Nii akupta asamtai, awajitsuk súmamtikjai. ³¹ Aya Wíki “Yúsaiyaitjai” tákunka winia chichamur ántar ainti. ³² Chikichcha awai. Niisha “Yúsaiyaiti” túrutui. Ni chichamesha imiá nekasaiti. ³³ Atumsha Juankej wi túramu inintrusmarme tura nii timia nu nekasaiti. ³⁴ Tuma ain aents táman atsumatsjai. Antsu Juanke chichame enentáimkiuram uwempratarum tusan tájarme. ³⁵ Juansha jiya núnis keemai. Atumsha ishichik tsawantin nú tsáapninnium warastin enentáimprarmarme. ³⁶ Tura Winia “Yúsaiyaiti” túrutna nu, Juanjai nankaamas péñkeran takakjai. Wi takasma núiti. Winia Apar takastinian surusma nuna takaakun nujai páantaiti Yus Apa akupkamuitjai. ³⁷ Winia Aparsha, akuptuku asa, ayamprutui. Túrasa átumka ni chichamesha antukchaitrume tura wáintiash wáinkiachuitrume. ³⁸ Yus Apa akuptukuiti. Tuma asamtai Winia enentáimturchakrum winia Aparu chichamesha atumi enentáin wayachuiti. ³⁹ Átumka Yus-Chicham yaunchu aarma nu iwiaaku átinian wáinkiatat tusarum ti unuimiaruitrume. Nu chichamsha Wínian áujmatui. ⁴⁰ Tuma ain nekas iwiaaku átaj tusarum Wíni tátin nakitiarme” tímiayi.

⁴¹ “Shuar Winia “shíiraiti” túrutainiakuisha nuna páchiatsjai. ⁴² Maa, Wi nékajrume. Átumka Yus aneatrume. ⁴³ Winia Apar akuptukmatai táwitjai túrasa nakitrarme. Antsu chikichka ní enentáijiaín jeartamkuinkia nuka átum wakerarme. ⁴⁴ Átumka nuámtak “Shiir enentáimtursatí” tu enentáimtunaiyarme. Tura Yus enentáimturma nuka páchiatsrume. Nújainkia çitiurak Yus enentáimtustam? ⁴⁵ “Ii tunaarín Yusai etserturmaktatji” turutiirap. “Muisais akupkamun umirkan uwemprattajai” tátsurmek. Antsu Muisais aarma nujai atumí tunaari etsernaktatui. ⁴⁶ Iis, Muisais Winia áatrurmiayi. Atumsha ni timia enentáimtakrumka Winiasha enentáimturaintrume. ⁴⁷ Tura ni aarma enentáimtachkurmeke çitiurak wi tama enentáimtustarum?” tímiayi Jesus.

6

*Jesus senku mir (5.000) áishmankan ayurawarmiania nu
(Mateu 14.13-21; Márkus 6.30-44; Rúkas 9.10-17)*

¹ Nu nankaasmatai Jesus Kariréa antumiannum amain katiñmiayi. Nu antumiansha Tipirias antumian tuiniawai. Jimiará náartiniaiti. ² Untsurí shuar Jesus ti jáinian timiá wárik tsuan wáinkiaru ásar Nin nemariarmiayi. ³⁻⁴ Israer-shuara paskuanamperi ishichik ajasmatai Jesussha ni unuiniamurijjai náinnium waka nu pujusmiayi. ⁵ Jesussha untsurí aents wininian

wáiniak Jiripin tímiayi “Timiá untsurí shuar ayuratniusha ¿tuyan yurumak sumaktaj?” tímiayi. ⁶ Kame Jesuska Nii túrattana nuna neka asa Jiripi warittin tusa tímiayi.

⁷ Jiripisha nuyá tímiayi “Timiá nukap kuitjai tanta sumakmesha ashí ishichik susamsha jeachaintjia” tímiayi.

⁸ Nuyá chíkich unuiniamurí Antres, Pitru yachí, tímiayi ⁹ “Uchi jui senku (5) tantan jimiará namakjai takakui. Ausha timiá untsurínmasha jeatpiash” tímiayi.

¹⁰ Nuyanka ““Ashí pujustarum” titiarum” tímiayi Jesus.

Áishmansha nuwasha uchisha irunmiayi. Tura chírichri núkap aa asamtai nuisha senku mir (5.000) áishman pujusarmiayi. ¹¹ Jesussha nu tantan achik Yúsan yuminkias ni unuiniamurín susamiayi. Niisha ashí nuí pujuinian súsarmiayi. Namaknasha núnisan ashí ni wakeriarmiania nuna súsarmiayi.

¹² Jémararmataisha Jesus ni unuiniamurín tímiayi “Ampirma júukrum chan̄kinnium chumpiatarum. Wasúrnákain̄.” ¹³ Niisha senku (5) tantanmaya ampirman júukar tuse (12) chan̄kinnium áimkiarmiayi.

¹⁴ Nu shuarsha Jesus túramun ísar tiarmiayi “Ju nekas Yúsnan etserin tátinia núchakait.” ¹⁵ Shuar Jesusan uunt akupin awajsataj tutai Jesus nekáa Niñki náinnium wémiayi.

*Jesus entsá pátatek nanamas wekasamiania nu
(Mateu 14.22-27; Márkus 6.45-52)*

¹⁶ Kíakui Jesusa unuiniamurí antumian̄num wearmiayi. ¹⁷ Káshisha Jesus tuke táchamtai uunt kanunam en̄kemáwar Kapernáum péprunam wéenak jíinkarmiayi. ¹⁸ Tura nase ti umpúakui chíchimi ti wajaimiayi. ¹⁹ Ajapén ajarar Jesus entsá pátatek nanamas tíjiuch winian wáinkiar ashamkarmiayi. ²⁰ Tura Jesus “Wiitjai. Ashamprukairap” tímiayi. ²¹ Nújain̄kia ti shiir warasar kanunam itiaawarmiayi. Tura nu chichamtaik ni wéamunam jeawarmiayi.

Shuar Jesusan eak wekainiawai

²² Kashincha chíkich shuar amain ayuramunam kanararu nekaawarmai. Jesusa unuiniamurí Jesusjain̄chu chikichik kanu amia nujai wéarun nekaawarmai. ²³ Nuí chichak matsatai Tipirias péprunmaya chíkich kanu táarmiayi. Yau Jesus Yúsan yuminkias tantan ayuramunam tíjiuch táarmatai ²⁴ nu shuar, Jesussha ni unuiniamurísha nuí atsuiniakui, nu kanunam en̄kemáwar Kapernáum péprunam Jesusan eaktajtsa wearmiayi.

Jesus apatkua áintsankete

²⁵ Entsa amain Jesusan wáinkiar aniasarmiayi “Uunta, ¿urutía juísha támam?”

²⁶ Jesussha tímiayi “Ti nekas tájarne. Aents tujintiamu nekáa asarum éatsume. Antsu tanta yuarum jémaru asarum éatrume. ²⁷ Juyá yurumak amuukatin asamtai ti pachisairap. Antsu amuukashtin yurumak tuke iwiaaku pujustinian amaana nu takarsatniuiti. Nú yurumkanka Wi, Aents Ajasu asan, susattajrume. Yus Apa nuna túratniun surus “Juka shuáran Yáinkiertiniaiti” túrutui” tímiayi.

²⁸ Tutai inintrusarmiayi “¿Warí túratniuitiaji Yus wakerana nu umiktin?”

²⁹ Jesussha tímiayi “Yus akupta asa Winia enentáimtursarat tusa wakerawai.”

³⁰ Tutai aniasarmiayi “¿Aentsti tujintiamuka warí túrattam ii íisar Ámin nekas enentáimtustin? Chikichcha túratá. ³¹ Yaunchu ii uuntri aents atsamunam maná yurumkan nayaimpinmaya susamun yurumáwarmiayi. Yus-Chichamnum núnik áarmaiti: “Nayaimpinmaya yurumkan Yus susamiayi.” Tu áarmaiti” tiarmiayi.

³² Jesussha tímiayi “Wi tájana nu nekasaiti. Muisais atumí úuntrin nayaimpinmaya yurumkan súsachmiayi. Antsu winia Apar yamá nekas apatkun nayaimpinmaya súramui. ³³ Iis, Yusaiya apatkunka, nayaimpinmaya tára nu súramui tura nekas apatuk asa ashí shuaran nekas iwiaakman súawai.”

³⁴ Tutai “Uunta, nu apatuk tuke amasta” tiarmiayi.

³⁵ Tura Jesussha tímiayi “Wiitjai nu apatuk nekas iwiaakman súana nu. Winí winiana nú shuar penké tsukamashtatui, tura Winia enentáimturna nusha tuke kitiaarchattawai. ³⁶ Túrasa wi túramu wáinkiumesha winia chichamur enentáimtatsrume. ³⁷ Ashí shuaran winia Apar tsankatrukarmiania nu, Wíi shuar ajasartatui. Winin winiana núnaka penké nakitrashtatjai. ³⁸ Wi wakeraj nuna túratniun táchaitjai antsu Winia akuptukmia nuna umirkatniun táwitjai. ³⁹ Winia Apar akuptukuiti tura juna wakerawai. Ashí winia tsankatrukman emenkátsuk amuukatin tsawantaj iniantkiarat tusa wakerawai. ⁴⁰ Yus Apa wakerana nu júiti. Ashí shuar Winia “Yusa Uchirinti” tu enentáimturkui yamaram iwiaakman tuke takusat tusa wakerawai. Nú shuarnaka amuukatin tsawantaj iniantkittijai” tímiayi Jesus.

⁴¹ Tura Jesus “Wiitjai, nayaimpinmaya apatuk akupkamu” takui Israer-shuar Jesusan áujmatiarimiayi.

⁴² Tura tiarmiayi “Ju Jesuschakait, Jusé uchiríya nu. Iikia ni aparísha nukurísha nékatsjik. ¿Itiurak “Nayaimpinmaya táraitjai” ta?” tiarmiayi.

⁴³ Jesussha tímiayi “Tu áujmatrukairap. ⁴⁴ Shuáran winia Apar akúpturkachuítkiuin_kia penké weanturkachainti. Tura Winia akupturna nuna amuukatin tsawantaj iniántkíttijai. ⁴⁵ Yúsnan etserniu áarmarin tawai “Ashí Yus jintintiamu ártatui”. Núnisan ashí Yusa chichamen antukar unuimiatainiakka Winí táiniawai’ tímiayi.

⁴⁶ ‘Aya Wiki Yúsaiya tau asan Yúsan wáinkiaitjai. Chíkichka penké wáinkiachuiti. ⁴⁷ Ti nekas tájarme. Winia enentáimturna nú shuarka yamaram iwiaakman amuukashtinian takakui. ⁴⁸ Wikia iwiaakman súana nú apatkuitjai. ⁴⁹ Iis, atumí uuntri aents atsamunam maná yurumkan yúawariatcha ashí jákarmiayi. ⁵⁰ Antsu Wi tájana nú apatkun shuar yúakka jákachartatui. ⁵¹ Wikia nayaimpinmaya iwiaaku apatkuitjai. Nu apatkun shuar yuakka tuke iwiaaku átiniaiti. Nu apatkun Wi susattaj nusha winia ayashruiti. Ashí shuar Yusaj iwiaaku pujusarti tusan winia ayashrun susattajai” tímiayi Jesus.

⁵² Nuyá nuámtak áujmattsar tiarmiayi “¿Itiurak ni ayashinkesha ayurtamat-taj?” tiarmiayi.

⁵³ Jesussha tímiayi “Ti nekas tájarme, Wi Aents Ajasu asantai winia ayashur yúatniutrume. Winia ayashur yúachmeka tura winia numpar umarchamka nekas iwiaaku pujatsrume. ⁵⁴ Winia ayashrun yúana nuka tura winia numparun úmakka yamaram iwiaakman amuukashtinian takakui. Tura nu shuaran amuukatin tsawantaj iniántkíttijai. ⁵⁵ Winia ayashruka nekas yurumkaiti tura winia numparsha nekas umutainti. ⁵⁶ Winia ayashruncha yúaka tura winia numparnasha úmaka Wijijaj tsanin pujawai tura Wisha nu shuarjai tsaninkian pujajai. ⁵⁷ Yus Apa, Winia akuptukuka, nu iwiaakma nérenniuiti. Tuma asantai ni iwiaakmarin iwiaaku pujajai. Núnisan Winia

yurakka winia iwiaakmaruj iwiaaku pujustatui. ⁵⁸ Nayaimpinmaya apatkun tajai. Ju apatuk maná yurumka áintsachuiti. Atumí uuntri maná yurumkan yuawarsha ashí jákarmiayi. Antsu ju apatkun shuar yúakka tuke iwiaaku pujustatui” tímiayi Jesus. ⁵⁹ Núnaka Jesus Israer-shuar iruntainiam unuiniarmiayi.

Iwiaaku chicham

⁶⁰ Nu chichaman antukar Jesusa unuiniamurj chicharainiak “Nii tana nu ti itiurchat asamtai ¿yaki antukminiait?” tiarmiayi.

⁶¹ Jesussha ni áujmatman nekáa tímiayi “Átum “ju chicham itiurchataiti” tárumek. ⁶² Wátsek, Wi nayaimpiniam pujumiaj nuj waketkimtaisha ¿urukawaintrumek? ⁶³ Warí, aya wakanik iwiaakman súwaiti. Ayashkia penké áantrai nekas iwiaaku awajsatniun. Wi tájana nujai imiá nekas wakankia iwiaaku awajsamniaiti” tímiayi Jesus. ⁶⁴ Tura Jesus Nin enentáimtachun tura Nin suruktatna nunasha yaunchu neka asa ni unuiniamurjín tímiayi “Atumíncha winia chichamprun enentáimtachu tuke awai. ⁶⁵ Nu asamtai tímiajrumé “Shuáran winia Apar akupturkachmaitkiuinjia penké wean-turkachainti” tímiajai” tímiayi Jesus.

⁶⁶ Nuyasha ni nemarniurj untsurj armia nu Jesusan ikiukiar atakka Nijijai wekasacharmiayi. ⁶⁷ Nuyá Jesus ni tuse (12) unuiniamurjín chicharainiak “¿Atumsha wétin wakerarmek?” tímiayi.

⁶⁸ Semun Pítrusha áikmiayi “Uunta, ¿yáiniñ wetaji? Ame chichammijjain nekas iwiaaku áminiaiti. ⁶⁹ Ame Kristu asam nekas iwiaaku Yusa Uchirínme. Nuka enentáimtusar ti paant nékaji” tímiayi.

⁷⁰ Jesussha tímiayi “Ashí tuse (12) árumna nu achikiuitjiarme nekas Wíi shuar ajastin. Tuma ain atumín chikichik iwianchiiti” tímiayi. ⁷¹ Nuna taku Jútas Iskariútin, Semunka uchirín, enentáimtus tímiayi. Jútassha ni unuiniamurjintiat Jesusan ukunam surukmiayi.

7

Jesusa yachisha Nin enentáimtuscharmiaiyi

¹ Nu nankaamasmatai Jesus Kariréa nunkanam wekaimiayi. Jutía nunkanam wéchamiayi Israer-shuara uuntri nuj máataj tutai. ² Tura Israer-shuar aak aakmatai namperj jeatemamtai ³ Jesusa yachj wishikiainiak tiarmiayi “¿Urukamtai juisha pujam? Jutía nunkanam wetá, aisha ame unuiniamuram túram nuna ísarat. ⁴ Ashí shuar nekaawarat tákumka úukam túrawaip. Ti tujintiamu túriniaitkiumka ashí shuar íimmianum túratá” tiarmiayi. ⁵ Ni yachjisha ishichkisha Nin enentáimtachu ásar tiarmiayi.

⁶ Tura Jesus tímiayi “Winia tsawantur nampernum wétin jeatsui. Atumjainjia nánkamas tsawant wétin péñkeraiti. ⁷ Ju nunkanmaya aents atumniaka kajertamatsrume. Antsu ni tunaarjín etsertin asamtai Wíniaka kajertuiniawai. ⁸ Átumka nampernum wetarum. Wikia tsawantur jeachkui wéatsjai.” ⁹ Juna tinia Jesuska Kariréa nunkanam juákmiayi.

Aak aakmatai nampernum Jesus timia nu

¹⁰ Ni yachj wearmatai Jesussha nampernum wémiayi. Tura nekarawarain tusa úumak wémiayi. ¹¹ Israer-shuara úuntrisha námper irunturmanum eakar “Nu aishmansha ¿tuin pujá?” tiarmiayi. ¹² Ashí shuarsha Nin áujmatiararmiayi. Chikich “péñkeraiti” tiarmiayi. Tura chikichcha “Péñkerchaiti. Aya anankartawai” tiarmiayi. ¹³ Tura Israer-shuara úuntrin ashamainiak uuk áujmatiararmiayi.

¹⁴ Nampersha ajapén ajasmatai Jesus Yusa Uunt Jeen wayá shuáran unuiniamiayi. ¹⁵ Israer-shuara úuntrisha nuna ísar ti enentáimsar chichaak “Jusha unuimiátrachiatcha ¿itiurak imiá neka?” tiarmiayi.

¹⁶ Jesussha tímiayi “Wi unuiniaina nu winia chichampruchuiti antsu Winia akuptukua Núnan unuiniajai. ¹⁷ Yus wakerana nuna shuar nekas umiktinian wakerakka winia chichamprun nekaattawai. Nekas Yúsnaikuiñkia, nuna nekaattawai. Aya wi enentáimmiajain chichaakuisha, nuna nekaattawai. ¹⁸ Ni enentáimmiajai chichaana nuka ashí shiir enentáimtursarti tusa chichaawai. Antsu nin akupka nuna shiir awajsarti tusa wakerak, nekas wáitratsuk tawai. ¹⁹ Muisais Yusa akupkamurin atumí uuntrin amaschamka. Tuma ain nu umitsuk mantuatin wakerutarme” tímiayi Jesus.

²⁰ Nu shuarsha tiarmiayi “Wáurtsmek. ¿Ya mantamataj tusa wakera?”

²¹ Jesussha tímiayi “Ayampratin tsawantaj chikichkí túramtai ti enentáimtsurmek. ²² Muisais ashí tsupirnaktinian akupkachmiayi. Antsu ni uuntrinñkia nuna akupka ániawai. Tuma ain átumka Muisais akupkamu umiktai tusarum ayampratin tsawantajsha uchi áishman tsúpirnaitrume. ²³ Wátsek, Muisais akupkamu uminkiatu tusarum ayampratin tsawantajsha uchi áishman tsúpirkurmekaka ¿urukamtai Wi ayampratin tsawantaj áishmanka ayashí takamtsuk tsuármatai kajertarum? ²⁴ Shuar túrana nu ísam wárik súmamtikiawaip. Antsu inintrúsam paant nekaam, nekasa nu enentáimtusta” tímiayi Jesus.

Jesus Yúsnumia akupkamuiti

²⁵ Nuyá Jerusarénnumia shuar tiarmiayi “Maatai tuinia núchakait. ²⁶ Tura nuí ashí ántamunam étserui tura suntar páchiniatsui. ¿li uuntrisha “Nekas Krístuiti” tu enentáimtuiniawash? ²⁷ Antsu nekas Kristu taa tuyañ winia nekanashtatui tura ju pujamuka ashí nékaji” tiarmiayi.

²⁸ Jesus nuna antuk, Yusa Uunt Jeen waja kakaram chichaak tímiayi “Winia nekararum tuyá winiaj nu nékarme. Kame núnisrum enentáimprume. Tura winia enentáirjai táchaitjai antsu winia Apar akuptukuiti. Niisha ti nekas akupniusha átumka nékatsrume. ²⁹ Antsu Winia akuptukuitkiui aiyá tau asan Wikia nékaji” tímiayi. ³⁰ Nuyá sepunam enkeataj táyat achikcharmiayi ni tsawantri jeachu asamtai. ³¹ Tura untsurí shuar Nin enentáimtusar “Kristu ta ¿nuna nankaamas aentsti tujintiamun túratpiash?” tiarmiayi.

“Eátkáttarme tura wáitkiashtatrume” tímiayi Jesus

³² Pariséusha Israer-patri úuntrisha Jesusnan timian antukar suntaran akupkarmiayi Jesusan achikiar sepunam enkeawarat tusar. ³³ Nuyá Jesussha tímiayi “Aya ishichik tsawant atumjai pujustajai. Nuyá ataksha Winia akuptuku pujana nuí waketkittiajai. ³⁴ Átumka eátkáttarme tura Wi wéajna nuí wéchamniaitkiuram wáitkiashtatrume.”

³⁵ Israer-shuarsha nuamtak aniniaisarmiayi “¿Jusha tui wéakuin iisha wáinkiashtataj. Israer-shuar apachnium pujuinia nuí we apachin unuiniartatuak. ³⁶ Nii timia nu itiurkit. “Átumka eátkáttarme tura Wi wéajna nuí wéchamniaitkiuram wáitkiashtatrume” tana nu itiurkit?” tiarmiayi.

Yamaram iwiaakman súana nú entsa

³⁷ Jista amúamunam ti shiir najanawarmia nu tsawantaj Jesus wajaki kakaram chichaak tímiayi “Shuar ni enentáin kitiamakka Winin taa umar kitiakén imíkrati. ³⁸ Winia enentáimturna nuka ni enentáiya entsa wa áintsan yamaram iwiaakman súana nú entsa jiinkittiwai.”

³⁹ Nuna taku Jesus “Ashí Yúsán enentáimtusarun Yusa Shiir Wakaní súsatniuiti” tímiayi. Tura núnisan Yus-Papiniumsha áarmaiti. Antsu Jesus tuke nayaimpiniam wéatsain Yusa Wakaní shuar súsachmauyayi.

Shuarsha niisháa niisháa enentáimprarmiania nu

⁴⁰ Chíkich shuarsha nuna antukar “Ju nekas Yúsán etserin tátinia núiti” tiarmiayi. ⁴¹ Chikichcha “Juka nekas Krístuiti” tiarmiayi. Tura chíkichkia Jesus Kariréanmayaiti tu enentáimiainiak tiarmiayi “Warí, ¿Kariréa nunkanmaya Kristu áminkiat? ⁴² Yus-Papinium paant tawai “Krístuka yaunchu uunt akupin Tawit weeanmaya akiinatniuiti, tawai. Tura Tawitia pépruriya Pirinnumia átiniaiti” tawai” tiarmiayi. ⁴³ Tuma asamtai shuar niisháa niisháa enentáimprar kanakiarmiayi. ⁴⁴ Chíkich aiyá nuka “sepunam enkeatai” tiarmiayi túrasha túracharmiayi.

Israer-shuara uuntri Jesusan enentáimtuscharmiania nu

⁴⁵ Suntarsha waketkiarmiayi. Tura Pariséusha Israer-patri uuntri sha “¿Urukamtai itiachuram?” tiarmiayi.

⁴⁶ Suntarsha tiarmiayi “Chikichkisha ju áishman chichaa áanis chichaschaiti” tiarmiayi.

⁴⁷ Nuyá Pariséu tiarmiayi “Atumsha anañnarume. ⁴⁸ Pariséutisha uuntcha nuna enentáimtuiniawash. ⁴⁹ Penké shuarka yaunchu akupkamun nékachua nuka yajauchiniam yuminkramu áiniawai” tiarmiayi.

⁵⁰ Nikiutémusha, kashi Jesusan tarimia nu, Pariséuitiat tímiayi ⁵¹ “Ii shuar tikia, shuar ni túramun etserkamu ántutsuk súmamtikiachminiaiti” tímiayi.

⁵² Nuinkia niisha tiarmiayi “Wats, amesha Kariréanmayanchuashitiam. Yus-Chicham áujam nekaattame. Kariréanmaya Yúsán etserin penké táiniatsui” tiarmiayi.

Nuwa wáinmakman Jesusan itiararmiania nu

⁵³ Nuyá ashí ni jeen waketkiarmiayi.

8

¹ Tura Jesuska Uriwiu náinnium wémiayi. ² Tura kashin tsawar Yusa Uunt Jeen atak támatái ashí shuar Nin káutkarmiayi. Túrawarmatai Jesus pujus unuiniarmiayi. ³ Nuyá Israer-shuara jintinniurisha Pariséusha nuwan wáinmakman Jesusan itiararmiayi. Tura ashí iruntramunam ajapén awajarmiayi. ⁴ Tura Jesusan tiarmiayi “Uunta, ju nuwa tsanirma pujá achinkiaiyi. ⁵ Muisais akupkamunmasha nuna túraka “kayajai tukurar máatniuiti” tawai. ¿Amesha warintmea?” tiarmiayi. ⁶ Aya mamikmar nekapsatai tusar tiarmiayi. Nin sumamtikiatniun wakeriarmiayi.

Nuyá Jesus tsunsumá ni uwejéjai nunká áarmiayi. ⁷ Tura tuke iníam wajaki tímiayi “Ayu, atumiiya tunáa túrichu ákunka kayan achik nin emka tukuti” tímiayi. ⁸ Tura nuna ti, ataksha tsunsumá nunká áimiayi.

⁹ Tura ni chichamen antukar ni enentáin sumamawar úuntnumia juki chikichik chikichik jünki wéarmiayi.

Ashí wéarmatai Jesus Niñki nuwájai juákmiayi. ¹⁰ Jesussha wajaki aya nuwanak wáiniak tímiayi “¿Ámin súmamtikramainia nusha tuin pujuinia. Chikichkisha áwak?” tímiayi.

¹¹ Niisha “Atsá, Uunta. Chikichkisha atsawai” tímiayi.

Nuyá Jesus tímiayi. “Ayu. Wisha súmamtikiatsjame. Yamaikia weme atakka tunáa túrawaip” tímiayi.

Jesus tsáapninia áintsankete

¹² Ataksha Jesus Yusa Uunt Jeen iruntrarun tímiayi “Ju nunkanam Wi tsáapnina áintsan shuara enentáin tsáapniajai. Ashí Wijíai tsanin wekaana nú shuar ni enentáin kiritniunam wekasashtatui antsu tsáapnin yamaram iwiaakman súana nujai wekasattawai.”

¹³ Pariséu nuikia tiarmiayi “Ame péñkerum tau asam támena nu áantrai.”

¹⁴ Jesus tímiayi “Tuyá winiaj tura tui weaj nu nékatsrume, tura Wikia nékajai. Tuma asan winia péñkerun táyatnak tájana nu péñkeraiti. ¹⁵ Ju nunkanmaya aents enentáimmiajai enentáimtakrum ti súmamtikrume. Tura Wikia chikichkinkesha súmamtiksujai. ¹⁶ Tura súmamtikkiunka awajitsuk túrajai. Iis, Wiki shuar túramun péñkerashit tusan enentáimtsujai antsu winia Apar Winia akuptukua nusha Wijíai métek shuar túramun nékawai. ¹⁷ Atumí akupkamuriin áarmaiti: “Jimiará shuar mai nú chichamnak tákuinkia nu chicham nekasaiti.” ¹⁸ Wátsek Wisha winia Aparsha mai métek taji. Winia Aparsha akuptukuiti” tímiayi.

¹⁹ Tutai “¿Ame apasha tuj pujá?” tiarmiayi.

Jesussha tímiayi “Átumka Winiasha winia Aparsha nékatsrume. Winia nékarkurmeka winia Aparsha nekaawaintrume.” ²⁰ Nuna Yusa Uunt Jeen Yusa kuítrín suinia nuí tímiayi. Tuma ain sepunam enkeatniun achikcharmiayi ni tsawantrí jeachu asamtai.

“Wi wéajna nuí wéchamniaitrume’ tímiayi Jesus

²¹ Jesus ataksha tímiayi “Wikia wéajai. Atumsha eátkáttarme tura wi wéamunam wéchamniaitkiuram atumí tunaaríjjai jakattarme.”

²² Israer-shuarsha tiarmiayi “Wi wéamunam wéchamniaitrume” tutai, nuinkia máamatpiash” tiarmiayi.

²³ Nuinkia Jesus tímiayi “Átumka nunkayaitrume antsu Wikia nayaimpinmayaitjai. Ju nunkayaitrume tura Wikia juyanchuitjai. ²⁴ Tuma asamtai tájarme “Atumi tunaaríjjai jakattarme.” Nekas Wi tájana núitjai. Tura nu enentáimtachkurmeka atumi tunaaríjjai jakattarme” tímiayi.

²⁵ Niisha aniasarmiayi “¿Amesha yáitiam?”

Jesussha tímiayi “Yaunchu tájarme. ²⁶ Nu arantcha atumin súmamtikiatjarum tusan ti tímíniaitjai. Winia Apar akuptukua nuka tuke nekasa nuna tawai. Tura aya ni taman antukan ashí shuaran nunak tajai” tímiayi. ²⁷ Tuma ain ni Aparín áujmatman penké nekaacharmiayi. ²⁸ Tuma asamtai tímiayi “Aents Ajasuitjana ju, numiniam ajintruarum yakí takuriakrumin nújainkia nekarattarme. Wi tájana núitjai tura winia enentáirjain takatsuk aya winia Apar unuiturmanak tájai. ²⁹ Winia akuptukua nuka tuke Wíjjai pujawai. Winia Apar wakeramun tuke shiir túrakui ikiurkichuiti” tímiayi. ³⁰ Tutai untsurí shuar Nin nekas enentáimtusarmiayi.

Yus-shuarsha tura tunaanum emetamusha

³¹ Israer-shuaran Nin shiir enentáimtusarmia nuna Jesus tímiayi “Wi tájarmena nu yawetsuk túrakrumka nekas winia unuiniamur átatrume. ³² Nújajisha timiá nekas ana nu nekaattarme tura nekas ankant ajastatrume” tímiayi.

³³ Niisha tiarmiayi “Iisha Apraám weeitji. Chikicha takarniur átai tusar penké emetachmaitji. ¿Urukamtai “Ankant ajastatrume” tame?” tiarmiayi.

³⁴ Jesus tímiayi “Timiá nekasaiti, ashí shuar tunaan túruinia nuka nu tunaajai emetamuiti. Tuma asa takarniua núnisañ ajasuiti. ³⁵ Takarniusha ajapnamnia asamtai Yus atumin ajapramamniaitrume. Tura Akupniu Uchirinkia ni Aparíjjai tuke pujawai. ³⁶ Tuma asamtai Akupniu Uchirí ankant awajtamsamtainkia imiá nekas ankant pujustatrume. ³⁷ Átum

Apraám weeitrumé nékajai. Túmaitiatrum winia chichamur ántachu asarum mantuataj tárume. ³⁸ Winia Apar iniaktursamun áujmatjai. Átumka atumí uuntri timia túrarme” tímiayi.

³⁹ Tutai niisha tiarmiayi “Íkia Israer-shuar asakrin ii úuntriñkia Apraámaiti” tiarmiayi.

Tura Jesus tímiayi “Nekas enentáimin Apraám weeitkiurmeka níya núnis túrawaintrume. ⁴⁰ Nekas ana nuna Yus iniaktursamtaí nuna ujakjarme, tuma aín mantuataj tarume. Apraámka nuní túrachmiayi. ⁴¹ Antsu atumí uuntri túrana áintsarum túrarme” tímiayi.

Tutai niisha tiarmiayi “Warí, tsanirnumiá akiiniachuitji. Ii uuntri Yúskete. Niisha ii Aparínti.”

⁴² Tura Jesus tímiayi “Yus nekas atumí Aparíntkiuñkia Winiasha anentíntrume Yúsnumiá tau asamtaí. Wisha winia enentáimmarjai jui táchaitjai antsu Yus akuptukuiti. ⁴³ ¿Urukamtaí Wi tájana nu imiá nékatsrum? Wi tájana nu nakitia asarum winia chichamur ántatsrume. ⁴⁴ Atumí aparíñkia úunt iwianchiiti. Tura niiniu asarum nii wakera nu túrarme. Yámankamtaiksha úunt iwianchkia tuke mankartiniaiti. Nekas ana nunasha nakitiawai tuke wáitrin asa. Wáitraksha níniunak chichaawai. Iis, waitia uuntri asa tuke wáitriniaiti. ⁴⁵ Tura Wikia nekas takuí átum enentáimturtsurme. ⁴⁶ ¿Yaki chikichkí tunaajai súmamtikruamniait? Nuikia Wi nekasa nuna tau aisha ¿urukamtaí enentáimturtsuram? ⁴⁷ Yús-shuarka Yus timian ántawai tura átum Yúsnachu asarum Wi tájana nu nakitiarme” tímiayi.

Apraám akiintsain Jesus pujumiayi

⁴⁸ Nuikia Israer-shuar tiarmiayi “Maa, ti nekas tátsujik “Ame Samarianmaya shuáraitme. Tuke yajauch ániawai nusha. Nu arantcha iwianchrukuitme amesha” nekas taji” tiarmiayi.

⁴⁹ Jesussha tímiayi “Iwianchrukchaitjai. Áyatik winia Aparun shiir enentáimtikiajai. Tura átumka yajauch chichartarme. ⁵⁰ Wikia “shiir enentáimturarti” tátsujai túrasha Yuska ashí shuar Winia shiir enentáimturat tusa wakerawai. Niisha Yus asa ashí shuar túramun penkerashit tusa nekaattawai. ⁵¹ Ti nekasaiti. Wi tájana nuna enentáimta nú shuarka penké jákashtiniaiti” tímiayi.

⁵² Nuñkia Israer-shuar tiarmiayi “Pai, yamaikia ti paant íwianch takakme. Apraámsha ashí Yúsnan etserniusha jákaruiti tura Ame “Wi tájana nuna enentáimtaka penké jákashtiniaiti” tátsumek tiarmiayi. ⁵³ ¿Nuñkia ii uuntri Apraám nankaamaskaitiam. Niisha tura Yúsnan etserniusha jákacharuk áinia. Itiurak imiá nankaamantu enentáimtumam?” tiarmiayi.

⁵⁴ Jesussha tímiayi “Wiki shiir enentáimtumaknaka penké áantrai. Antsu Winia shiir enentáimturna nu winia Aparuiti. Nusha átumka “winia Yúsruiti” tárugna núiti. ⁵⁵ Nusha táyatrum Nin nékatsrume. Wikia Nin nékajai. “Nin nékatsjai” takunka atumjai métek wáitrin áintjai. Tura Nin neka asan Nii tana nuna tuke túriniaitjai. ⁵⁶ Apraámka, atumí uuntri, imiá yaunchu jákaitiat Wi ju nunkanam tátinian wararas nákasmiayi. Tura wáitiak ti shiir warartusmiayi” tímiayi.

⁵⁷ Nuyá Israer-shuar Jesusan tiarmiayi “Warí, senkuenta (50) uwí takaktsume túmaitiatam Apraáman wáinkiamjai tame.”

⁵⁸ Jesussha tímiayi “Ti nekas tájarme, Apraámka pujatsain Wikia pujajai” tímiayi Jesus.

⁵⁹ Nuna takuí kayan achikiar “Jesusan tukutai” tiarmiayi. Tura Jesus úumak ni matsatmanum ajapénin weak Yusa Uunt Jeeniá jiinki wémiayi.

9

Kusuru akiinian Jesus tsuármiania nu

¹ Jesus ni unuiniamurjijai wesa áishman kan kusuru akiinian wáinkiamiayi.

² Ni unuiniamurisha aniasarmiayi “Uunta, jusha ¿urukamtai kusuru akiiniawit. Yana tunaarjijain kusuru akiiniait. Niiniujajimpiash, aparíniujajimpiash túrunawit?” tiarmiayi.

³ Jesus tímiayi “Ni tunaarjijainchusha ni aparíniujajinchusha túrunaiti. Antsu Yus ni ayashín túratniua nu paant atí tusa túrunaiti. ⁴ Tsawajikia takastiniaiti. Yamaikia Winia akuptukua nuna takatrín túratniuitjai. Kashi ajasmatai takastin atsuttawai. ⁵ Jú nunkanam pujakun shuara enentáin tsáapnimitkratniuitjai” tímiayi. ⁶ Nuna chichas nunká usukmi nunkejai pachimiar kusuru jijn yakarmiayi. ⁷ Nuyá chichaak “Siruí pajamtai entsanam nijiamauta” tímiayi. Siruísha nu chichamnum “akupkamu” tawai. Kusurusha we nijiamar péñker ímiamar támiayi.

⁸ Nuyá ni írutkamurisha nuik wáinin ármia nusha tiarmiayi “Juka pujus tuke kuítian seamniuya núchakait.” ⁹ Chíkich “Ee, núkete” tiarmiayi. Chíkichcha “Atsá, núchaiti; kame nuash tumainti” tiarmiayi.

Tura niñki “Ee, wiitjai” tímiayi.

¹⁰ Tutai aniiniak “¿Itiurak yamaikia ímiam?” tiarmiayi.

¹¹ Niisha tímiayi “Áishman Jesusa nu tsakusan jírún yakartur “Siruí pajamtai entsanam nijiamauta” turutmiai. Takuí wena nijiamaran paant iimpramjai” tímiayi.

¹² Tutai “Nu áishman sha tuiñ pujá” tiarmiayi.

Niisha “Cha, nékatsjai” tímiayi.

Pariséu kusuru tsuárman inintrusarmiania nu

¹³ Nuyá kusuru tsuárman Pariséunam júkiarmiayi. ¹⁴ Kame Jesus kusurun tsuarmia nu jayampratin tsawantauyayi. ¹⁵ Tuma asamtai Pariséusha itiurak íimnium tusar aniasarmiayi.

Niisha tímiayi “Jiiruin tsakusan yakaarámtai, nijiamaran paant iimjiai.”

¹⁶ Nuyá chíkich Pariséu shuarnumiá nuamtak tunaiyar “Juna tsuáruka Yúsaiyanchuiti. Kame ayampratin tsawantai túrait” tiarmiayi.

Tura chíkichcha “Tunáa shuaraitkiuin kía júnisan túratniun tujinkiaayi” tiarmiayi. Nujai akannaikiarmiayi.

¹⁷ Tsuármancha ataksha aniasarmiayi “Ámin tsuármarua nu ¿warí enentáimtam?” tiarmiayi.

Tutai “Wikia “Yúsnan etserniuiti” tajai” tímiayi.

¹⁸ Tura Israer-shuar nekas kusuruitiat yamáí íimiui tu enentáimtuscharmiaiyi Pariseu. Tuma ásar ni aparíncha untsukar ¹⁹ inintrusarmiayi “¿Ame uchiram kusuru akiinia tárúmna nukait. Itiurak yamaikia iimia?” tiarmiayi.

²⁰ Ni aparísha tiarmiayi “I uchirín kía kusuru akiiniama nu nékaji. ²¹ Tura iisha nékatsji itiurak yamaikia iimia. ¿Yátsuk péñker tsuáruit? Niisha úuntchakait, nii aniastrarum. Niñki ujatmakarti” tiarmiayi. ²² Sapijmiak tiarmiayi. Israer-shuara úuntrin kía “Jesus Yus akupkamu asa nekas Krístuiti” tuinia núnaka Israer-shuara íruntainmaya jiki akupnakti tiniu ásarmatai tsuarma aparí ashamkarmiayi. ²³ Nu asamtai ni aparí “Niisha úuntchakait, nii aniastrarum” tiarmiayi.

²⁴ Nuin kía Israer-shuara uuntri kusuru tsuárman ataksha untsuk tiarmiayi “Yus íimmianum nekasa nu titiá, ju áishman kka tunaarinniuiti nékaji” tiarmiayi.

²⁵ Tutai tímiayi “Kame tunaarinchashit. Nékatsjai. Antsu junak nékajai. Yaunchu kusuruitiatan yamaikia íimjiai.”

²⁶ Ataksha aniiniak “¿Itiurtámkama. Itiur íimtikrammia?” tiarmiayi.

²⁷ Niisha tímiayi “Yaunchu tájar me tura anturtatsrume. ¿Urukamtai ataksha tita tusa wakerarum. Niiniu ajastin enentáimprurmek?” tímiayi.

²⁸ Nuñkia katsekkar “Ámeke ní shuarinme. Tura iikia Muisaisa shuárintji, tiarmiayi. ²⁹ Yus Muisaisan akupkaiti iikia nékaji antsu nu áishman nékatsji. ¿Tuyantskait?” tiarmiayi.

³⁰ Áishman tsuarma tímiayi “¿Ausha itiurtsuk áminiait? Winia íimtikruma nu átumka nékatsrume tuyankit. ³¹ Paant nékaji tunaarinniun Yus anturtsui. Tikishmatar ní wakeramun túruinia nunak anturui. ³² Yáunchusha kusuru akiinian tsuáruka tuke atsuwaiti. ³³ Ju áishman Yúsaiyanchuitkiunka penké túrachaayi” tímiayi.

³⁴ Nuñkia tiarmiayi “Ámeke tunaarintin akiiniaiatmesha ¿in jintintin átaj tamek?” Nuna tiar jiki awemarmiayi.

Wakanin kusurua nu

³⁵ Kusuru tsuárman jiki awemarma nuna Jesus nekaamiayi. Tura wáiniak “Yusa Uchiria nu enentáimtamek” tímiayi.

³⁶ Tsuarma tímiayi “Uunta, turuttia wisha nekaan enentáimtustaj.”

³⁷ Jesussha tímiayi “Wainme. Wiitjai ámijiai chichaajna nu.”

³⁸ Tutai, tikishmatar “Uunta, enentáimtajme” Jesusan tímiayi.

³⁹ Nuyá Jesus tímiayi “Shuara enentáin nekaan, akantratajtsan táwitjai. Ni enentáin kusuru ain iimtikinian tura ananmamuk “Yusnan nekaan paant iimjiai” tana nuna ukusturtinian táwitjai” tímiayi.

⁴⁰ Tutai Pariséu shuar nu pujuarmia nu nuna antukar “¿Nuñkia iikia kusurukaitiaj?” tiarmiayi.

⁴¹ Jesussha tímiayi “Átum kusuruitkiurmeka atumí tunaari wáinchakrum sumamachu áintrume. Tura “paant iimjiai” tau asarum sumamaitrume” tímiayi.

10

Iikia murikiua áintsar aji

¹ Jesus tímiayi “Wi tájana nu ti nekasaiti. Shuar murikiun takakna nu ni murikrin wenuimiunam kashi ikuawai. Tura murik wenuimiunam pujuiniakui yajauch shuar murikiun kasamkatniun wakerakka wáitiniam wayachmin asa tanishnum waruk yaja wayawainti. ² Antsu murikiu wáinniuka wáitiniam wayaawai. ³ Waiti wáinniuka nekas murikiun wáinniun wáitin uratui. Muriksha ni wáinniuri chichamen nékainiawai. Niisha ashí ni murikrin chikichik chikichik náarin anaitius untsúawai. Tura tsawaikia ni murikrin jiki ayurtainiam yarumui. ⁴ Tura ashí ni murikrin jir émtuki wéawai. Muriksha ni chichamen ántuiniak untsuam nemarainiawai. ⁵ Chikich shuárnaka nékachu ásar nemarainiatsui. Antsu ni chichamen nékainiachu ásar pisainiawai.” ⁶ Nu métek-taku chichamnaka Jesus áujmatsamiayi tura shuar antukar nekaacharmiayi.

Pénker wáinniuka Jesusaiti

⁷ Nuyá Jesus tímiayi “Ti nekasán tájar me. Wenuimiu wáitiri murik wainia nuka Wiitjai. Shuarsha murikiu áintsar Winí wayamin áiniawai. ⁸ Wi táatsain ashí táaruka kasa áiniak winia shuarun kasamkatai tusa wakeriarmiayi. Tura winia murikiur Wí shuar áiniak nu shuaran anturkacharmiayi. ⁹ Wikia wáititjai. Ashí Winin wayaaka uwemprattawai. Tura murikiua áintsan

wenuimiunmaya j̄iinki p̄nker yurumáttawai tura atak wayá ayamprattawai' tímiayi.

¹⁰ 'Kásaka aya kasamkatniuncha máatniuncha emesratniuncha wakerawai. Antsu Wikia yamaram iwiaakman tuke shiir atsumtsuk takusarti tusan táwitjai. ¹¹ Wikia p̄nker wáinniuitjai. P̄nker wáinniuka ni murikr̄in uwemtikrartaj tusa jakattawai. ¹² Antsu aya kuitjai takauka ni murikr̄ichu áiniakui tura nekas wáinniuchu asa p̄nker wáintsui. Kame uunt yawá winiakui murikiun ikiuki pisaawai. Uunt yawasha murikiun achik tsakin̄mawai. ¹³ Nu shuarsha akikiam takáa asa murikiun enentáimtatsui. Nu asamtai aya pisaawai' tímiayi.

¹⁴⁻¹⁵ 'Wikia p̄nker wáinniuitjai. Winia Aparsha nékarui. Wisha Aparun nékajai. Núnisnak murikrun nékajai tura winia murikrusha nékarui. Wisha murikiun uwemtikrataj tusan jakattajai. ¹⁶ Chíkich muriknasha takakjai. Nusha ju wenuimiunmayan̄chu áiniawai. Nunasha itiattajai. Nu muriksha Winia umirtukar ashí métek matsamsar chikichík wenuimiunmaya ajasar-tatui tura chikichik wáinin̄ átatui' tímiayi.

¹⁷ 'Winia murikrun uwemtikrataj tusan jakattajai turan atak nantaktiatjai. Nu asamtai winia Apar anentui. ¹⁸ Wi wakerakun jakattajai. Wi waker-achkuin̄kia chíkichkia mantuachminiaiti. Jákatniuncha tura nantaktinniasha winia Apar surusuiti" tímiayi Jesus.

¹⁹ Israer-shuarsha nuna antukar niisháa enentáimpr̄ar kanakiarmiayi. ²⁰ Untsurí tiarmiayi "¿Urukamtai ántarum wáuruk tausha. Yajauch wakanin̄ takaktsuk?" ²¹ Tura chikichcha tiarmiayi "¿Yajauch wakantrinniusha núnisan̄ chichasminkiait. Yajauch wakantrinniusha kusurun ímtikramniashit?" tiarmiayi.

Israer-shuarka Jesusan nakitiarmiania nu

²² Micha nantutin Israer-shuar Jerusarén̄num namperan najanainiawai. Nu nampernumsha Yusa Uunt J̄ē atak jeamman enentáimtuiniawai. ²³ Jesussha Yusa Uunt J̄ēe áachiniam wekasamiayi Sarumún̄ka wáitir̄ia nui.

²⁴ Israer-shuarsha Nin téntakar tiarmiayi "¿Ame nekas Krístukaitiam? Ju chichamaik etserkata. ¿Urukamtia nekas paant tátsum?" tiarmiayi.

²⁵ Tutai Jesus tímiayi "Yaunchu tiniu āin̄ enentáimturachmarme. Winia Apar akupkamun takaajna nu ti paant awajtawai. ²⁶ Tura átumka winia murikr̄ochu asarum enentáimturtsurme. ²⁷ Wisha winia murikrun untsuam anturtuiniak nemartuiniawai. Wisha w̄inianak mash nékajai. ²⁸ Tura yamaram iwiaakman tuke jákashtinian súajai. Nu asamtai niisha men̄kakachartatui antsu Wi wainkia asamtai ¿yaki jurutkit? ²⁹ Winia Apar murikiun surusuiti. Niisha ashí nan̄kaamas kakaram asamtai ¿yaki uwejéyan̄ atankit? ³⁰ Wisha winia Aparjaī iisha aya chikichkiitji" tímiayi Jesus.

³¹ Tutai Israer-shuarsha atak kayan achikiar tukutaj tiarmiayi.

³² Jesussha tímiayi "Winia Aparu kakarmar̄ij̄iaī ti untsur̄i p̄nker̄a nuna takasuitjai. ¿Túj̄āimpia mantuattarum?"

³³ Israer-shuarsha Nin tiarmiayi "P̄nker̄ túra asakmin máataj tát̄suji antsu Yus yajauch chicharkumin túrattaji. Ámeke shuár̄aitiatam Yusa nuke enentáimtumame" tiarmiayi.

³⁴ Nuyá Jesussha tímiayi "Atumí akupeamur̄īin̄ Yus timia nu áarmaiti: "Átum yúsaitrume" tawai. ³⁵ Kame Yus-Papinium aarma nu tuke nekaschakait. Tuma asamtai ni chichamen̄ antukarun Yuska "yúsaitrume" takui nuikia ti nekaschakait. ³⁶ Niisha yúsaitkiun̄kia nuikia Yus Apa anaikia ju

nunkanam akupkamu asan ti nekas Yúschakaitiaj. Nújainkia wi “Yusa Uchirintjai” takui žitiurak “Yusan yajauch chicharui” túrutrum? ³⁷ Winia Apar túramu túrachkuinkia enentáimtursairap. ³⁸ Tura nekas túrakuinkia enentáimtursatarum. Tura Winia nakitrakrumsha nuikia wi túramu enentáimtustarum. Nujainkia winia Apar Winin pujamu ashí nekaattarme. Núnisnak Wisha Nijn pujajai. Iisha chikichkiitji.” ³⁹ Tutai ataksha sepunam enkeatai tiarmiayi. Túrasha Jesus uwempramiayi.

⁴⁰ Nuyá Jesus Jurtañ entsa amain wé yaunchu Juan imiakrattainium pujusmiayi. ⁴¹ Ti untsurí shuar iyuwar tiarmiayi “Nekas Juanka aentsti tujintiamun túrachiat ashí Jesusnan tímia nu nekasaiti” tu tiarmiayi. ⁴² Nujisha untsurí Jesusan enentáimtusarmiayi.

11

Rásaru jakamu

¹ Petania péprunam áishman, ni naari Rásaru, jaa pujumiayi. Nu péprunam Marí ni kajijai Mártañai pujumiayi. ² Niisha Rásaru umai áirmiayi. Nu Marisha ukunmanka kunkuinian sumak Jesusan kuer ni intiashijjai japirmiayi. ³ Tura Rásaru jaaku ni umai Jesusan chichaman akuptuiniak tiarmiayi “Uunta, ame amikrum jaawai.”

⁴ Jesussha nuna antuk tímiayi “Tuke jakataj tusa jaatsui. Antsu Yusa kakarmarisha tura ni Uchirí kakarmarisha jú sunkur tsuármanum paant atí tusa jaawai.” ⁵ Jesus Mártañcha ni kaincha tura ni umai Rásaruncha nekas anemiayi. ⁶ Túmaitiat Rásaru jaawai taman antukiat ni pujamunam jimirá tsawant pujusmiayi. ⁷ Nuyá ni unuiniamurín “Ataksha Jutía nunkanam wetái” tímiayi.

⁸ Tura ni unuiniamurisha tiarmiayi “Uunta, nuiksha Israer-shuar kayajai tukurmar mantamatai tícharmaka. ¿Nui ataksha wétai támek?”

⁹ Jesussha ju métek-taku chichaman tímiayi “Tsawajkia páantchakait. Tsawaj wekaana nu paant asamtai tukumkashtatui. ¹⁰ Tura kashi wekaana nusha kirit asamtai tukumkáttawai. Núnisan Wii tuke pujakun winia takatrun takastiniaitjai. Túraknasha itiurchatan wáinkiashtatjai.” ¹¹ Nuyásha Jesus atak tímiayi “Ii amikri Rásaru kanarai. Wi ishintiartatjai.”

¹² Tutai ni unuiniamurí tiarmiayi “Uunta, aya kanarka nuinkia péñker ajastatui.” ¹³ Jesuska Rásaru jakamu nékayat “kanarai” tímiayi. Tura ni unuiniamurí Rásaru kajinmakua áintsan kanarai enentáimprarmiayi.

¹⁴ Jesus nuikia ti paant tímiayi “Rásaru yamaikia jakayi. ¹⁵ Tura nuj pujuscha asan kúntuts pujatsjai. Jean túrattajna nu ísrum ti nekas enentáimtursattarme. Nuna nekaan shiir enentáimjai. Wátsek, iyutai.” ¹⁶ Nuyá Jimiampramu Tumas chikich unuiniamurí nuj armia nuna “Iisha weri Nijijai métek jakatai” tímiayi.

Iwiaaku átinniasha jaka nantaktinniasha Jesus nérenniuiti

¹⁷ Nui taa, Rásarun kuaru tsawant ikiusman wáinkiamiayi. ¹⁸ Petania pépruka Jerusarennumia menaintiú kirumitru áinis tíjiuchiiti. ¹⁹ Tuma asamtai untsurí Israer-shuar Mártañcha Marísha, ni umai jakamtai uutkui atsankrataj tusa weriarmiayi. ²⁰ Mártañcha Jesus tíjiuch ajasun nekáa inkiuntajtsa wémiayi. Antsu Marikia jeá pujumiayi. ²¹ Tura Marta Jesusan inkiun tímiayi “Uunta, Ame pujakminkia winia umar jákachaayi. ²² Tura tuke nékajai ashí Yus seamna nuna súramui.”

²³ Jesussha tímiayi “Ame umaimisha nantaktiatui.”

²⁴ Mártasha tímiayi “Nekas, ashí amuamunam jákaru nantaktin tsawantaj nantaktiatui. Nuna nékajai.”

²⁵ Nuyá Jesus tímiayi “Iwiaaku átinia nérentin asan Wikia iniantkartiniait-jai. Winia enentáimturna nuka jakasha nantaktiatui. ²⁶ Tura ashí iwiaaku pujana nusha Winia enentáimturaka penke jákashtatui. ¿Nu nekasaiti tu enentáimtamek?”

²⁷ Niisha “Ee, Uunta, ame Yusa Uchirínme. Krístuitme, uwemtikkiartin jú nunkanam tátinia nu” tímiayi.

Jesus Rásaru iwiarsamunam taa úutmiania nu

²⁸ Mártasha nuna t̄i, ni kaj̄ Marin untsuk úukan̄ tímiayi “Uunt juī taa untsurmawai.” ²⁹ Marisha nuna antuk wárik wajaki Jesusa iyuttsa wémiayi. ³⁰ Jesussha péprunam jeatsuk Marta in̄kiun̄manum pujumiayi. ³¹ Marí wari wajaki wématai Israer-shuar nu jeanam atsan̄krattsa pujuiniasha nuna íisar weriarmiayi. Iwiarsamunam úuttiasa wéatsuash tusa weriarmiayi. ³² Marisha Jesus pujamunam jeá tikishmatar tímiayi “Uunta, Ame pujakminkia winia umar jákach̄ayi.”

³³ Jesussha Marincha tura niij̄aī úutuncha wáiniak wáitnentaimta asa ti kúntuts pujusmiayi. ³⁴ Tura “Tuj̄ iwiarsamarum” tímiayi.

Niisha “Uunta, iitia” tiarmiayi.

³⁵ Jesussha úutmiayi. ³⁶ Israer-shuarsha “Ti aneatsuk” tiarmiayi. ³⁷ Tura chíkich “Kusuru tsuáruchukait. Nii pujakuisha Rásaru jákaampiash” tiarmiayi.

Rásaru iniantkimiu

³⁸ Jesussha ti kuntuts enentáimiar iwiarsamunam weankámiayi. Náinnium asa paka taurma áuyayi. Tura kaya atutkamuyayi. ³⁹ Tura Jesus “Kaya jurustarum” tímiayi.

Rásaru umaj̄ Marta tímiayi “Uunta, kuaru tsawant jákaiti. Mejeatsuk’ tímiayi.

⁴⁰ Tura Jesus tímiayi “Yus enentáimtakmeka Yusa kakarmarī wáinkiattame tíchamkajam.” ⁴¹ Nuikia kayar̄in uratiarmatai Jesus nayaimpin iis tímiayi “Aparu, Winia anturtakmin yum̄nsajme. ⁴² Winiasha tuke anturtame tura jū shuaran pénker enentáimtikrataj tusan tajai. Ame akuptukuitmena nuna nekarmawarti.” ⁴³ Nuna tinia kakaram untsuak “Rásaru jíinkitia” tímiayi. ⁴⁴ Nuj̄ain̄kia penuarmartiuk j̄iinkimiayi. Yapinmasha jaanch̄j̄aī ijiamuyayi. Tura Jesus “Atirtarum. Wéti” tímiayi.

Jesusan achiktin chichaman jurusarmiania nu

(Mateu 26.1-5; Márkus 14.1-2; Rúkas 22.1-2)

⁴⁵ Untsur̄ī Israer-shuar Marin nemariaru Jesus túramun íisar enentáimtusarmiayi. ⁴⁶ Tura chíkichkia Pariséunam wear Jesus túramun ujakarmiayi. ⁴⁷ Nuna antukar Pariséusha Israer-patri úntr̄isha ashí naamka uunt armia nuj̄aī iruntrar tiarmiayi “¿Warí itiurkamniait? Nu shuarka aentsti tuj̄intiamun ti túratsuk. ⁴⁸ Aya júnik iniaiyakrinkia ashí shuar Nin enentáimtuschartatuak. Nuyá Rúmanmaȳa apach taar mesetan najanawartatui tura in amutmakar Yusa Uunt J̄eench̄a emesrartatui.”

⁴⁹ Nu uwitin Kaipias Israer-patri uuntrīyayi. Niisha tímiayi “Átumka nékatsrume. ⁵⁰ ¿Ashí Israer-shuar mesertin pénkerk̄ait. Antsu aya chíkichik shuar jákatin pénkerchakait?” tímiayi. ⁵¹ Kaipiaska aya ni enentáimmiáj̄ain̄ tíchamiayi. Antsu nu uwitin Israer-patri uuntrīī asantai Yus nuna enentáimtikramiayi. Nuj̄ain̄kia Israer-shuar Jesus jaruktinian ujakmiayi. ⁵² Tura aya Israer-shuarnakcha antsu niij̄aisha ashí nunkanam Yus-shuar

ajasarun irurtajtsa jákatniuyi. ⁵³ Tuma asamtai nu tsawantiniñ Israer-shuara uuntri Jesus máatai tusar áujmatsarmiayi.

⁵⁴ Nu asamtai Jesus paant wantiniak Israer-shuarnum wekaichmiayi. Antsu Jutía nunkanmaya jiinki atsamu nunkanam Eprain pepru tíjiuch wémiayi. Tura nui pujusmiayi ni unuiniamurijjai.

⁵⁵ Israer-shuara namperi paskua ishichik jatemsamtai untsurí shuar yajá péprunmaya Jerusarénum káunkarmiayi. Kame paskua jeatsain Mui-sais timia núnisan ni ayashísha enentáisha iwiarnarat tusa wakeriarmiayi. ⁵⁶ Jesusnasha eak yujarmiayi. Tura Yusa Uunt Jeen pujusar nuamtak anini-aisar “¿Warí enentáimiam. Jístanam tatimpiash?” tiarmiayi. ⁵⁷ Pariséusha Israer-patri uuntri sha akupainiak “Jesus pujá nekaamka ujatkata” tiarmiayi. Jesusan sepunam enkeatai tusar tiarmiayi.

12

Marí Jesusan kunkuinian kuérmiania nu (Mateu 26.6-13; Márkus 14.3-9)

¹ Paskua jísat jeatin sais tsawant ajasmatai Jesus Petania péprunam wémiayi. Jesus jakamunmaya iniantkimia nú Rásaru nuiñ pujumiayi. ² Jesus jeamtai ayurawarmiayi. Rásarusha niijjai yurumámiayi. Mártasha yurumkan iwiasmakmiayi. ³ Tura Marikia kunkuinian ti kuitjai ritru ajapén sumak itiamiayi. Tura Jesusa nawen kuer ni intiashijjai japirmiayi. Jeasha nu kunkuinjai ti shiir kunkunmiayi. ⁴ Jútas Iskariúti, Semunka uchirí, nui pujumiayi. Niisha Jesusa unuiniamurintiat ukunam Jesusan surukmiayi máawarat tusa. Niisha tímiayi ⁵ “¿Urukamtai nu kunkuinian ti kuitjai surukchama kuítrinchan súsatniun?” ⁶ Kame kuítrinchan enentáimtak tíchamiayi. Antsu unuiniamu kuítrin wainkia asa yúpichuch kasamkamniuyayi. Tuma asa nuna tímiayi.

⁷ Tura Jesus tímiayi “Iniaisata. Wi iwiarnakui kuératniun sumak ikiurtusuiti. ⁸ Kuítrincha tuke atumjai íruntsuk. Antsu Wikia atumjai tuke pujuschattajai” tímiayi.

Rásaruncha máataj tiarmiania nu

⁹ Israer-shuarsha Jesus Petania péprunam pujan antukar Jesus ístaitisar weriarmiayi. Rásaruncha Jesus jakamunmaya iniantkimia nusha iyutai tusar wearmiayi. ¹⁰ Túramtai Israer-patri uuntriñkia chichaman jurusarmiayi Rásaru maatai tusar. ¹¹ Untsurí Israer-shuar Rásaru iniantkimiun nekaawar Israer-patrin ikiukiar Jesusan enentáimtusarmiayi. Túrawarmatai Rásaruncha máatniun wakerukarmiayi.

Jesus Jerusarénum shiir wayamiania nu (Mateu 21.1-11; Márkus 11.1-11; Rúkas 19.28-40)

¹² Paskua namperan pachiintiuktajtsa ti untsurí shuar Jerusarénum wearmiayi. Kashin tsawar Jesus nú peprunam tátinian nekaawarmiayi. ¹³ Niisha tintiuki nuké áinis nukan júurar Jesusan inkiuntai tusar jíinkarmiayi. Túrawar untsumainiak “Shiir tati, tiarmiayi. Yusa kakarmarijjai winiana nu tí péñkeraiti. Israer-shuara uuntri asa shiir atí” tu untsumiarmiayi. ¹⁴ Jesussha umpuurun wáiniak entsamkamai. Núnisan áarmaiti Yus-Chichamnum:

¹⁵ “Seun péprunmaya shuara, ashamkairap. Atumí Akupniuri umpuurunam entsamak winiawai.”

¹⁶ Nu chichamaik Jesusa unuiniamuri nu túrunamun nekaacharmiayi. Tura ukunam Jesus nayaimpiniam shiir waketkintai enentáimprarmiayi. Ashí Jesusna aarma núnisan túrunamiayi.

¹⁷ Jesus Rásarun iwiarsamunmaya iniantkimiun wáinkiarua nú shuar nuna áujmatiarmaiya. ¹⁸ Tuma asamtai shuar Jesus nu tujintiamun túramtai nekaawar Jesusan inkiunktaj tusar jíinkiarmaiya. ¹⁹ Tura Pariséusha nuamtak tiarmiayi “Iis, penké tujinkiaji. Maa iista, ashí shuar Nin nemarainiatsuk.”

Kriaku apach Jesusjai chichastinian wakeriarmiania nu

²⁰ Paskua nampernum Yus shiir awajsatniun Jerusarénum weriaruka untsurí nunkanmaya shuar ármaiya. Kriaku apachcha ármaiya. ²¹ Niisha Jiripin weantukarmiayi. Kame nu Jiripi Petsaitia péprunmayayuyayi. Petsaitia péprusha Kariréa nunkanam awai. Nincha Kriaku apach seainiak “Uunta, Jesusjai chichastaisar wakeraji” tiarmiayi. ²² Jiripisha Antresan werí ujakmaiya. Nuyá niijiai métek tsaninkiar Jesusan weriar ujakarmiayi.

²³ Jesussha tímiayi “Wi Aents Ajasuitjiana ju tsawantur jeayi. Túramtai shiir awájnástajai. ²⁴ Wi tájana nu ti nekasaiti. Jínkiaia ántsanketjai. Araachmaka níngi pujatsuk. Antsu araamka tsapain jinkiaichirí kaushmariat nerek ti untsurí ajatsuk. Núnisnak Wi jakamtai ti untsurí shuar yamaram iwiaakman takusartatui. ²⁵ Shuarsha jinkiaia nuke aya ju nunkanam pénger pujustinian enentáimkiunka ántar pujak nekas iwiaakmarin emenkaktatui. Tura ju nunkanam pénger pujustinian enentáimtsuk jákatniuncha ashamchaa nú shuarka nekas iwiaakman wáiniak tuke iwiaaku átatui. ²⁶ Shuar winia átaj takunka nemartusti. Túranka Wi pujajna nui Wíi shuar tuke átatui. Núnisan Wíi shuar winia takatrun takáa nuna winia Aparsha shiir enentáimtustatui’ tímiayi.

Jesus ni jákatniun étserui

²⁷ ‘Yamaikia enentáirui ti iturchat pujajai. ¿Warittiajak. “Aparu, ju túrunatniunmaya uwemtikrurta” titiajash? Antsu jú túrunatniun táwitjai. ²⁸ Aparu, wi túramujai ashí shuar ame náarmin shiir enentáimturarti” tímiayi Jesus.

Tutai nayaimpinmaya chichaman antukarmiayi. “Winia náarun shiir awajsaitjai tura ataksha shiir awajsattajai” tímiayi.

²⁹ Shuarsha nui pujuinia “ipiamtachuashit” tiarmiayi. Tura chikichcha “Nayaimpinmaya suntar Nin chichasai” tiarmiayi.

³⁰ Jesussha tímiayi “Wi antuktinian chichaschayi antsu átum nekaatarum tusa chichasai. ³¹ Yamaikia nunkanam makumatin jeayi. Tura íwianch ju nunkanam akupniua nu nupetnak ajapnattawai. ³² Tura numiniam awajnaintai ashí nunkanmayanka shuar enentáimturartatui” tímiayi. ³³ Juna taku krúsnum jákatniun ujakmaiya.

³⁴ Shuarsha awajirar tiarmiayi “Yaunchu Yus akupkamu papiniumia áujsar nékaji. Kristu tutai tuke jáatsuk iwiaaku pujustiniaiti. ¿Itiurak nuikia “Aents Ajasu numiniam awajnaitniuiti” tame? Aents Ajasuka Krístuchukait, Yus anaikiamu. Núchaitkiuinikia Aents Ajasuka yait?” tiarmiayi.

³⁵ Nuinkia Jesus tímiayi “Wi tsáapninia ántsanketjai. Tsáapnisha atumín aya ishichik tsawantin tsáapniartatui. Tsáapin ana juik wekasatarum kirit ajatsain. Kame kiritniunam wekaana nusha nékatsui itiuranimpia wea. ³⁶ Tsáapnin wáinkieuram nin enentáimtustarum. Túrakrum winia tsáapnintrui wekasattarme.” Jesussha nuna ti wémiayi uumak pujustaj tusa.

Untsurí Israer-shuar Jesusan enentáimtuscharmiania nu

³⁷ Jesus aentsti tujintiamun ti untsurí túramtaisha Nin enentáimtuscharmiaiya.

³⁸ Yúsnan etserin Isayas yaunchu aarma uminkiatniuyi:

“Uunta, ¿ya ii ujam antukuit. Yusa kakarmarisha yana iniaktusuit?” tu áarmaiti.

39 Nuna uminiak Jesusan enentáimtuscharmiayi. Tura nu arantcha Isayas áarmiayi:

40 “Yus nin kusuru awajsaiti tura ni enentáincha kátsuram awajsaiti. Ni jiiijiai ímsain tusa tura ni enentáijiai nekaawain tusa túrait. Kame ni tunaari iisar enentáimtuiniakui Yus nin tsuáraini” tu áarmaiti.

41 Isayas yaunchu Jesusan nayaimpiniam ti shiir pujan wáiniak nuna tímiayi.

42 Tuma aijn untsurí Israer-shuarsha tura ni uuntrinmayasha Jesusan nekas enentáimtusarmiayi. Tura niisha Pariséun ashamainiak paant tícharmiayi. Israer-shuara iruntairiya jiki awetamaj tusa ashammarmiayi.

43 Yus shiir enentáimtursati tutsuk antsu shuar shiir enentáimtursati tusar túrawarmiayi.

Shuaran sumamtikiatniun táchaitjai antsu uwemtikratniun táwitjai, timiania nu

44 Jesus kakantar untsujuk tímiayi “Winia enentáimturuk aya Winiak enentáimturtsui antsu winia Aparun Winia akuptukua nunasha enentáimtawai. 45 Winia wáitkiusha Winia Aparnasha wáinui. 46 Wikia tsáapnin asan Winia enentáimturainia nuka kiritniunam wekasain tusan ju nunkanam táwitjai. 47 Shuáran sumamtikiatniun táchaitjai antsu uwemtikratniun táwitjai. Tuma asantai shuar winia chichamprun antuk umíachkunka sumamaiti. Tura Wikia sumamtikiachuitjai. 48 Winia nakitrur chichampruncha enentáimtachuka sumamtikiamuiti. Wi timiaj nuka amuukatin tsawantaj nin sumamtikiattawai. 49 Wi enentáimmiajain chichaatsjai. Winia Apar akattur akuptukuiti. Tura chichastinia nuna surusuiti. 50 Wisha nékajai, ashí winia Apar akupeamuka yamaram iwiaakman tuke amuukashtinian súawai. Tuma asantai winia Apar túrutmia núnisnak tajai” tímiayi Jesus.

13

Jesus ni unuiniamuri nawen nijiatramiania nu

1 Paskua jísat jeatin chikichik tsawant ajasmatai Jesusa tsawantri jeatemayi. Túramtai ju nunkan ikiuki ni Aparin wétiniuyi. Jesussha nuna nekaamiayi. Ashí Níiniun ju nunkanam pujuinian tuke anea asa amúamunmasha yapajitsuk tuke aneemiayi. 2 Nu tsawantaisha murikiun yúatin árimiayi. Tura yurumátin jeatsain, uunt iwianch Semunka uchirí Jútas Iskariúti enentáin Jesusan surukat tusa enentáimtikramiayi. 3 Tura Jesus Yusaiya tau asa waketkitniuyi. Tura Yus Apa ashí mash susamiayi akupin atí tusa. Jesussha nuna nekáa 4 chikich yurumuk pujuiniaj wajakmiayi. Tura pushirin ámiak awan kéman emenmamamiayi. 5 Nuyá nijiaamatainiam entsan yará ni unuiniamuri nawen nijiatramiayi. Tura awan kémjai japirmiayi. 6 Semun Pítrunam jeamtai Pítiur tímiayi “Uunta, ¿Winia nawer nijiatraj tamek?”

7 Jesussha tímiayi “Wi túrajna nu yamáí nékatsme tura ukunam nekaattame.”

8 Tura Pítiur tímiayi “Penké winia nawer nijiarhattame.”

Jesussha tímiayi “Wi nijiaachkuñkia Wijiai tsaniñkia pujuschamniaitme.”

9 Tutai Semun Pítiur tímiayi “Nuñkia, Uunta, aya nawerkechu antsu uwe-rusha tura muukarsha nijiatrurta.”

10 Tura Jesus tímiayi “Yamáí mainkia ayashí shiir asantai aya nawenin nijiamártiniaiti. Atumí enentáin ashí péñkeraitrume. Túrasha ashí shuarsha” tímiayi. 11 Kame Jútas Nin suruktinian nekáa “ashí shuarsha” tímiayi.

12 Jesussha nijiar umik ni pushirin entsarmiayi. Tura atak pujus tímiayi “¿Atumsha Wi túrajna nu nekaarmek? 13 Wi atumí Uuntri asantai nekas “Uunta” túrutrume. Nusha péñkeraiti. 14 Tura Jintinniuitiatan tura

Úuntaitiatan atumí nawen niijarchajak. Atumsha núnisrumek nuamtak náwem niijatnairatarum. ¹⁵ Atumin nekapruatsan túramjai. Atumsha núnisrumek túratarum. ¹⁶ Ti nekasán tajai. Takarniuka ni uuntri nankaamaschaiti. Akupkamusha akupea nuna nankaamaschaiti. ¹⁷ Nu nekaarum túrakrumka shiir átatrume.

¹⁸ “Tura tájana nuna ashí tátsujrume. Anaikiaitiaj núnaka Wi nékajai. Tura Yus-Chicham uminkiatniuiti, nékajai. Ju aarmaiti:

“Wijjaj yurumna nu winia nemasur ajasai.”

¹⁹ Nuka túmatsajin ujaajrume. Nuyá túrunamtai Yusa Uchiríntjai nusha paant nekaattarme. ²⁰ Wi tájana nu nekasaiti. Shuar Wi akupeaj nuna shiir itiaakka Winiasha shiir itiaarui. Tura Winia shiir itiaarna nusha Winia Akuptukuncha itiaawai” tímiayi.

Jesus Jútas Nin suruktinian étserui

(Mateu 26.20-25; Márkus 14.17-21; Rúkas 22.21-23)

²¹ Nuna ti, Jesus ni enentáin ti itiurchat enentáimpramiayi. Tura paant tímiayi “Nekas tajai, chikichik juí atumjai pujana nu Winia surutkattawai.”

²² Tutai ni unuiniamuri nuamtak íniaisar “¿Yanak ta?” tiarmiayi. ²³ Chikichik unuiniamuri, Jesus ti aneamu, Nijjaj tsanin yurumuk pujumiayi.

²⁴ Tuma asamtai Semun Pítiur ni uwejéjaj iniakmas “Aniasta, ¿yanak áujmata?” tímiayi.

²⁵ Tutai Jesusan áyanmatsan aniasmiayi. “¿Yait, Uunta?” tímiayi.

²⁶ Jesussha ayak “Tantan túumnium ajunkan susattaj núiti” tímiayi. Nújain tantan túumnium ajun Semunka uchirín Jútas Iskariútin susamiayi. ²⁷ Tura wárik Jútas tantan achikmatai íwianch ni enentáin wayamiayi. Nuyá Jesus tímiayi “Túratamna nu wárik túrata.”

²⁸ Tura ashí nuí yurumainiak pujuarmia nusha wariniak ta tusa nekaacharmiayi. ²⁹ “Kuítríncha kuit súserta” tátsuash tu enentáimprarmiayi. Tura chikichcha “nampernum yurumátin atsumajnia nu sumakta” tátsuash, tu enentáimprarmiayi. Jútas kuítian wáinin asamtai tu enentáimprarmiayi.

³⁰ Jútas tantan yua kashi ajasmanum jíinkimiayi.

Yamaram akupkamu

³¹ Jútas jíinkimtai Jesus tímiayi “Wi Aents Ajasu asamtai winia kakarmar yamaikia paant átatui. Tura wi túramujaj Yusa kakarmarísha ti paant átatui.

³² Wi Yusa kakarmarin paant awajeakui Wisha ni Uchirí asamtai winia kakarmarnasha Yuska wárik paant awajsattawai. ³³ Uchichiru, atumjai ti untsurí tsawant pujuschattajaj yamaikia. Wi Israer-shuaran tímiaj nútiksanak atumin tájarme. Atumsha Winia eátkáttarme tura wi wéamunam winishtarume. ³⁴ Ju yamaram akupeamun amaajaj nuamtak mai anenai ajatarum tusan. Wi atumin aneajrumna núnisrumek atumsha nuamtak mai anenai ajatniuitrume. ³⁵ Anenaiyakrumniñkia nujaj ashí shuar “Kristu unuiniamuri ániawai” túramartatui.

Pítiur Nin natsantratniun Jesus ujakmiania nu

(Mateu 26.31-35; Márkus 14.27-31; Rúkas 22.33-34)

³⁶ Semun Pítiur Jesusan aniasmiayi “Uunta, ¿tua wéam?”

Jesussha tímiayi “Wi wéajna nuí yamaikia winichminiaitrame. Tura ukunam winittiarume.”

³⁷ Nuyá Pítiur tímiayi “Uunta, ¿urukamtai yamaikia winichminiaitiaj? Ámin yáintajtsan jakataj tajai.”

³⁸ Jesussha tímiayi “¿Nekasmek táme? Ti nekas tájame, atash shiniatsain Winia menáintiú natsantrurtatme” tímiayi.

14

Jesus Yus-jintiaiti

¹ “Kúntuts pujusairap. Yus enentáimtustarum, Winiasha enentáimtursatarum. ² Winia Aparuú átum pujustin ti ankant awai. Tura nuna iwiarataj tusan Aparuú wéajai, nekasaiti. Nekaschaitkiuinikia ¿itiurak ujakaajrum? ³ Tura iwiaaran amukan ataksha tátatjai. Tura tana yaruaktatjarme, wi pujamunam atumsha pujusúk tusan. ⁴ Wi wéaj nu nékarme tura jintiasha nékarme” tímiayi Jesus.

⁵ Tumas tímiayi “Uunta, Ame weam nu nékatsji. ¿Jintiasha itiurak nekaat-taj?”

⁶ Jesussha tímiayi “Wi nekas jintiitjai. Wijjainchu wekaana nuka winia Aparuú jeatniun penké tujintiawai. Tura Wisha tuke nekas tiniu asan nekas ana nuna shuáran nékamtikiajai. Wisha shuáran yamaram iwiaakman tuke amuukashtinian súwitjai. ⁷ Winia nékarkurmeka winia Aparsha nekaawaintrume. Yamaisha Nii wáinkia asarum nékarme” tímiayi.

⁸ Nuinkia Jiripisha tímiayi “Uunta, Apasha wáinkiarka maak.”

⁹ Jesussha tímiayi “Jiripi, atumjai ti pujusu aisha ¿tuke nékartsumek? Winia wáitkia nuka Winia Aparnasha wáinkiaiti. ¿Itiurak, nuikia, “Apasha wáinkiarka maak” tame? ¹⁰ Winia Aparjai tsaniñkian pujakun tura winia Aparsha Wijjaj pujakui tuke chikichkiitji. ¿Nu nékatsrumek? Wi tájarmena nu Winia chichampruchuiti. Yus Apa Winí pujak ni wakeramun takaawai. ¹¹ Nekaatarum. Wisha winia Aparjai tsaniñkia pujakur nekas chikichkiitji. “Nu chicham itiurchataiti” enentáimkiurmeka wi túramu nuikia enentáimpratarum. Wi túramujai chikichik ájinia nu páantchakait. ¹² Wi tájarmena nu ti nekasaiti. Winia enentáimturna nu Wi túrajna nuna túrattawai. Tura winia Aparuú wéakui nuna nankaamas tujintiamun túrattawai. ¹³ Ashí Winia enentáimtursarum seatrumna nuna amastatjai. Nújainkia winia Apar shiir awajnastatui. ¹⁴ Winia enentáimtursarum seakrumniñkia ashí túrattajai’ tímiayi.

Jesus Yusa Wakanín akupkattawai

¹⁵ ‘Atumsha anentkurmeka winia chichamur umiktarum. ¹⁶ Tura wéakun winia Aparun chikichan akupturmakti tusan seattajai. Niisha atumjai tuke pujak atsanampartatui. ¹⁷ Nusha Yusa Wakaníinti. Yus-shuarcha Nin nekaachmin áiniawai. Tuma asantai ni enentáin wayachminiaiti. Antsu átumka atumi enentáin pujakui Nii nékarme. Niisha atumí enentáin tuke pujustatui. ¹⁸ Mitiaikia áitkiasnak ikiukchattajrume. Atumín atak tátatjai. ¹⁹ Ishichik tsawant nankaamasmatai chikich shuar irunna nu wáitkiachartatui. Tura Wi iwiaaku asantai átumka nu iwiaakmajai pujustrume. Tuma asarum wáitkiattarme. ²⁰ Tura nu tsawantaj ju nekaattarme. Wisha winia Aparjai tsaniñkia pujakur chikichkiitji. Núnisnak Wisha atumjai tsaniñkian pujajai. Tura atumsha Wijjaj tsaniñkia pujarme. ²¹ Shuar Winia anentuka wi akupkamun nekáa umíawai. Nú shuarnaka winia Aparsha aneawai. Wisha nin aneajai tura nekarati tusan iniaktustatjai.” Jesus nuna tímiayi.

²² Chikich Jútas, Iskariútichu, tímiayi “Uunta, ¿urukamtai ashí shuarnum iniaktutskesha aya in iniaktustatam?”

²³ Jesus tímiayi “Winia anentuka tájana nuna enentáimtawai. Winia Aparsha nu shuarn aneattawai. Tura Wisha winia Aparnum nu shuarjai tsaniñkia

pujustatji. ²⁴ Antsu Winia anentchaka tájana nuna enentáimtatsui. Átum ántarmena nú chichamka wíniachuiti, antsu Yus Apa Winia akuptukua Núnaiti' tímiayi.

²⁵ 'Atumjai tuke pujakun nuna tájarme. ²⁶ Yus Apa ni Shiir Wakanin atumin yáinmak atsantamprarat tusa akupturmaktatrume. Wi seam túrattawai. Nu Wancha ashí Wi ujakjarmena nuna atak enentáimtikramprar ashí unuiti-amprartatui' tímiayi.

²⁷ 'Imiatkinchanum pujustarum. Imiatkinchanum pujajna núnisrumek pujustarum tusan amaajai. Jú nunkanmanka warastin wáinkiashtatrume. Antsu itiurchatnum pujayatrunkesha Wijiai imiatkinchanum pujustatrume. Ashamtsuk pujustarum. Itiurchat enentáimprairap. ²⁸ Nuik timiaj nu antukmarme. Aparuí wena atak atumiin tátatjai. Winia Aparka Wijiai nankaamas úuntaiti. Tuma asamtai ti nekas anentkurmeka "Aparuí wéajai" takui ashí warasaarme. ²⁹ Nuka túmatsain ujaajrume. Túrunamtai nuyá Winia enentáimtursattarme" tímiayi.

³⁰ 'Jú nunkanmayan akupin winiakui atumjai núkap chichaschattajai ya- maikia. Winiaka nupettukchamniaiti. ³¹ Tura Wikia winia Aparun aneajai tura Nii akupturkama nuna tuke túrajai. Ashí shuar nuna nekaawarti tusa ashí túrunatniuiti. Wajaktiarum. Juyá wetái' tímiayi.

15

Numi arakma áintsanketjai

¹ 'Winia iwiaakmarun amaakun numi arakma áintsanketjai. Wikia kampuintjai atumsha kanawentrume. Winia Aparsha arakan wáiniua núnisaiti. ² Winia kanawernasha nereatsna núnaka tsupik ájapeawai. Tura nereana núnaka púruawai nú nukap nerekat tusa. ³ Wi ujakjarmena nujai puruar-maitrume. ⁴ Numi kanawesha kampuin áchitkiachkunka ninki nerechamniaiti. Núnisrumek atumsha Winí áchitkiachkurmeka nerechamniaitrume. Wi atumjai áchitkij núnisrumek atumsha Winí tuke áchitkia atarum' tímiayi.

⁵ 'Wikia kampuintjai atumsha kanawentrume. Kampuinkia kanawen áchitkia núnisnak achiakjarme. Tura kanawe ni kampuinin áchitkia núnisrum Winí áchitkia atarum. Túrakrumka núkap nerektatrume. Antsu Wíjiainchuka péñker túratin péñké tujintiarume. ⁶ Winí áchitkiachuka ajapam kukartatui. Kanawesha kukarmatai shuar irumkar áesawartatui' tímiayi.

⁷ 'Tuke Winí áchitkiaitkiurmeka tura winia chichamprusha kajinmattsuk emetarmeka átum wakerarmena nu seakrumin amastatjai. ⁸ Átum núkap nereakrumninkia ashí shuar "Nekas Jesusa unuiniamurinti" túramartatui tura winia Aparnasha shiir awajsartatui. ⁹ Winia Apar anenna nútiksanak Wisha atumin aneajrume. Winia aneamur tuke atarum. ¹⁰ Winia Aparu akupkamurin umiakun tuke ni aneamurintjai. Núnisrumek winia akupkamur umiakrumka tuke winia aneamur áatrume' tímiayi.

¹¹ 'Wi waraajna áintsarmek warastarum tusan nuna tájarme. Tura ti shiir warastatrume. ¹² Wi akupkamu júiti: "Wi aneajrumna nútiksarmek ashí anenaitiarum." ¹³ Shuar ni amikrin yáintaj tusa jakañka ti anenkartichukait. ¹⁴ Wi akupeamu takaakrumka atumsha winia amikruitrume. ¹⁵ Takarniuka ni uuntri takaana nuna nékatsui. Tuma asamtai "winia takarniuruitrume" tátsujrume. Antsu ashí winia Apar táman ujaku asan "winia amikruitrume" tájarme. ¹⁶ Aya atumi enentáimsamurijain Wíi shuar ajascharmeme. Antsu akatramur ajastarum tusan atumniaka achikjarme Wi. Winia takatur takastiniaitrume. Túrarum péñker túratniuitrume nerektinia áintsarmek. Tura

nu nere amuutsuk tuke átiniaiti. Tuma asamtai winia Apar searmena nuna amastatui. ¹⁷ Júnaka akupeajrume: Nuamtak mai anenai ajatarum' tímiayi.

Yus-shuarcha Jesusnasha Níniuncha nakitiainiawai

¹⁸ Ju nunkanmaya shuar Winia emka nakitrurar atumniasha nakitramarme. ¹⁹ Atumsha ju nunkanmaya shuaraitkiurminkia niiniua nútiksañ anenmaintrume. Antsu Wíi shuar ajastarum tusan ju nunkanmaya achikmajrume. Túramtai nekas ju nunkanmayanchuitrume yamaikia. Nu asamtai nu shuar nakitramainiawai. ²⁰ “Takarniuka ni uuntri nankaamaschaiti” tíchamkajrum. Shuar Winia yajauch awajtusaru ásar atumniasha yajauch awajtamsartatui. Chikichcha umirtukaru ásar atumniasha umirtamkartatui. ²¹ Winia Akuptukun nékachu ásar Winia enentáimturkurmin yajauch awajtamsartatui' tímiayi.

²² ‘Wi tana Yus-Chichaman nin ujakchamtainkia tunaanum sumamacharaayi. Antsu ujakma ásar “Nékachkun túraitjai” tíchamin áiniawai. ²³ Winia nakitruinia nuka winia Aparnasha nakitiainiawai. ²⁴ Aents penké túrachman túrachuitkiuinikia tunaanum sumamacharainti. Antsu wi túramun wáinkiaru áiniayat Winiasha tura winia Aparnasha nakitiainiawai. ²⁵ Yaunchu Yus akupkamunam áarmaiti: “Penké ántar nakitrurarmai.”

Nu chicham uminkiatu tusa túrunaiti' tímiayi.

²⁶ ‘Tura atsanamprattsa yáinmana nuna winia Aparuiya akuptuktatjarme. Niisha tuke nekas tiniu Wakaniiti. Niisha Yusaiya taa atumin nekamtikramprattarme. ²⁷ Atumsha yaunchu Wijiaí pujusu asarum nekamtikiattarme' tímiayi.

16

¹ ‘Átum kanartukairum tusan júnaka tájarme. ² Israer-shuar iruntainiumia jiki akuptamkattarme. Nu arantcha mantamainiaksha “Yúsan shiir awajsattsan túrajai” tiártatui. ³ Nu shuar Winiasha tura winia Aparnasha nékachu ásar túrutmawartatui. ⁴ Núnaka yamáí tájame. Tura túrunamtai “núnisañ átiniaiti” timiaj nu nekaarum itiurchat enentáimprairap' tímiayi.

Yusa Wakaní túrana nu

‘Atumjai tuke pujá asan núnaka yaunchu ujakchamajrume. ⁵ Antsu yamaikia wáketjai winia Akuptukmia nujai pujustaj tusan. Tuma áin wéajna nu inintratsrume. ⁶ Antsu nuna takui ti kuntuts enentáimprarme. ⁷ Tura Wi wématai atumjainkia nuna nankaamas péñker átatui. Iis, Wi wéakna atumin yainmaktinia nuna akupkattajai tura wéachkuinkia táchattawai. Nuka ti nekasaiti. ⁸ Yusa Wakaní taa ashí jú nunkanmaya aentsun ju menaintiun nekamtikiattawai. Ni tunaari aan nekamtikiattawai. Péñker tunaajainchu wekasamniana nunasha nekamtikiattawai. Tura Yus tunaanum súmamtikiamniana nunasha nekamtikiattawai. ⁹ Winia enentáimturainiachu tunáarintin áiniawai. ¹⁰ Winia Aparui wáketkui wáitkiashtrume. Tuma asamtai ashí shuar wi péñker tunaajainchu wekaamun nekaawartatui. ¹¹ Tura ju nunkanam akupniunka Yus tunaanum súmamtikia asa shuarnasha súmamtikiamniaiti. Nuna paant nekaawartatui' tímiayi.

¹² ‘Nu arantcha núkap tíntjiarme túrasha átumka nekaachaintrume. ¹³ Yusa Wakaní ashí nekas tiniu asa ashí nekasa nuna unuitiamprattarme. Ni enentáimmiyajai tíchattawai antsu winia Aparui antukma nuna ujatmaktatui. Ukunam átatna nunasha ujatmaktatui. ¹⁴ Ashí Wínian ujatmak Winia shiir awajtustatui. ¹⁵ Ashí winia Apar takakna nusha Wíniaiti. Nu asamtai “ashí Wínian ujatmaktatui” tajai' tímiayi.

Kúntuts pujuiniayat ukunam warasartatui

¹⁶ ‘Ishichik pujusrum Winia wáitkiashtatrome. Nuyá ataksha ishichik pujusrum ataksha wáitkiattarme. Wisha winia Aparuí wéajai’ tímiayi.

¹⁷ Nuyá ni unuiniamurí nuamtak aniniaisarmiayi “¿Jú chichamsha warimpait? “Ishichik pujusrum wáitkiashtatrome tura ataksha ishichik pujusrum wáitkiattarme tura Aparuí wéajai” tátsuk. ¹⁸ “Ishichik pujusrum” tana nusha ¿warimpait? Nii tana nu ántatsji” tiarmiayi.

¹⁹ Jesussha nin aniaistai táman nekáa tímiayi “Ishichik pujusrum wáitkiashtatrome nuyá ataksha ishichik pujusrum wáitkiattarme” tímiajai. ¿Núchakait átum initrustin wakerarmena nu? ²⁰ Ti nekas tájarme: Átumka kúntuts pujusrum úttiaturume tura Yus-shuarcha warásártatui. Tuma aínkⁱ átum kúntuts pujayatrume ukunam warastatrome. ²¹ Iis, nuwasha jurertin tsawant jeamtai najaimiak wáitiatsuk. Tura uchin jurerka ti waraak wáitsamunka enentáimtsui. ²² Atumsha núnisrumek yamaik kúntuts pujarme. Tura atak íitjarum tusan winiakui ti shiir atumí enentáin warastatrome. Nu warastinian jurutramkichminia áiniawai.’

²³ ‘Nu tsawantinkia penké ininsashtatrome. Ti nekas tájarme Winia enentáimtursarum winia Apar searum nuna ashí amastatui. ²⁴ Yamaisha Winia enentáimtursarum winia Apar seachurme. Seakrumniñkia amastatui ti shiir warasaruk tusa’ tímiayi.

Jesus jú nunkanmayan nupetkaiti

²⁵ ‘Métek-taku chichamjai nakumkan nuna tímiajai. Tura ukunmanka nujai chichatsuk winia Aparnan paant ujaktatjarme. ²⁶⁻²⁷ Nu tsawantai átumka Winia enentáimtursarum winia Apar seattarme. Winia Aparsha atumin anea asamtai Wi Nin áujsatin atumashtatrome. Winia anentu asarum tura winia Aparuíya taman enentáimtakrumin Niisha anenmawai. ²⁸ Winia Aparuíya jíinkin jú nunkanam táwitjai. Yamaikia jú nunkanmaya jíinkin ataksha Aparuí wáketjai” tímiayi.

²⁹ Nuyá ni unuiniamurí tiarmiayi “Yamaikia métek-taku chichamjainchu chichaame. ³⁰ Mash nékaitme. Shuar Ámin ininmatsain penker áimkiatin nékame. Nu nekaar Ame nekas Yúsnumaitme tu enentáimtaji” tiarmiayi.

³¹ Tura Jesus tímiayi “¿Nekasash enentáimtarum? ³² Ti warik átumka ashamkarum niisháa tsakiñmaktatrome tura Winiak ikiurkittiarme. Antsu winia Apar pujakui Wiki pujatsjai. ³³ Winia enentáimturkuram imiatkinchanum pujusarat tusan tájarme. Jú nunkanam ti wáitsattarme. Tura Wi jú nunkanmayan nupetka asamtai warastarum” tímiayi Jesus.

17

Jesus ni unuiniamurin Yúsán áujtawai

¹ Nuna ti Jesus nayaimpinmaani íimias tímiayi “Aparu, yamáí jeayi ame Uchiram shiir awajsatin. Núnisanñ ame Uchirmisha penker awajtamstawai. ² Ashí shuara Akupniurí najataitme. Nujainkia Winia surusumna nú shuaran yamaram iwiaakman tuke amuukashtinian súsaitjai. ³ Aparu, chíkich atsawai. Amek nekas Yúsaitme. Wisha Jesuskrístuitjai Ame akuptukmamna nu. Nu asamtai ashí shuar nuna enentáimtak yamaram iwiaakman tuke amuukashtinian takakui.’

⁴ ‘Ashí túratniun akuptukmamna nuna amukuitjai. Túran ju nunkanam shiir awajsaitjame. ⁵ Nuna túramtai, Aparu, ti yaunchu jú nunka atsaisha Ámijai pujakui shiir awajtusmamna núnismek yamaisha shiir awajtusta.’

⁶ ‘Ashí jú nuṅkanmaya surusmamna nú shuaran Ámin nekamtikiamjai. Áminiu áiniakui surusmame. Niisha ame chichammin umirtámkaruiti. ⁷ Ashí Wi takaajna nu Amek surusuitme. Niisha nuna nékainiawai. ⁸ Ame chichamem surusmam nuna ujakam niisha umirtámkaruiti. Ame akuptukakmin Amiiníya táwitjai. Nu nekasaiti tu enentáimtuiniawai.’

⁹ ‘Nin yainkiarta tusan seajme. Jú nuṅkanmaya shuaran Ámin enentáimturmainiatsna nuna seattsujai. Antsu Ame surusmam nuna, Áminiu ajasarmatai, yainkiarta tusan seajme. ¹⁰ Ashí Winia ainia nuka Áminiuiti. Tura ashí Áminiu ainia nuka Winia áiniawai. Winia péñkerusha ni túramunam paant awajsaiti.’

¹¹ ‘Wikia yamaikia jú nuṅkanam pujuschattajai. Tura nu shuarka jú pujuartatui. Antsu Ámijiai pujustajtsan winiakui ashí surusumna nuka, Aparu, ti shiir asam ame kakarmarmijiai wáinkiaata. Wisha Ámijiai chikichik ájinia núnisan niisha ashí iruntrar chikichik ajasarti. ¹² Jui niijiai pujakun ame kakarmarmijiai ti péñker wáinkiamjai. Antsu Yus-Chichamnum aarma uminkiatu tusa aya chikichik meñkakaiti. Niisha tuke emesnartinia núiti.’

¹³ ‘Yamaikia Amiini winiajai. Tura jú tuke pujakun júna tájame. Niisha Wi waraajna núnisar ti shiir warasarat tusan tajai. ¹⁴ Wi jú nuṅkanmayanchuitjai. Niisha núnisan jú nuṅkanmayanchu áiniawai. Tuma asamtai ame chichammin Wi susamtaí jú nuṅkanmaya shuarka nin naki-tiainiawai. ¹⁵ Jú nuṅkanmaya júiki tusan seatsjame. Antsu íwianch nin nupetkain tusan seajme. ¹⁶ Wi júyanchuitiaj áintsan niisha júyanchu áiniawai. ¹⁷ Ame chichammin ti nekasa nuna ántuiniakui péñker awajsata. ¹⁸ Júya shuarnum akuptukmam áintsan Wisha nin chíkich shuarnum akupeajai. ¹⁹ Aya Áminiuinak takastaj tusan enentáimtimjai. Túra asamtai niisha aya Áminiuinak takastinian enentáimpratin áiniawai’ áujtak tímiayi.

²⁰ ‘Aya níniunkeka seatsjame antsu ashí ni chichamen antukar Winia enentáimtursartatna nusha ame yainkiarta tusan seajme. ²¹ Ashí niisha chikichikiniak enentáimtusarti tusan seajme. Wisha Amesha, Aparu, chikichik ájinia núnisan niisha Iijiai iruntrar chikichik ajastai tusar seajme. Wíi shuar chikichik najanata tusan seajme. Nuyá jú nuṅkanmaya shuar akuptukuitmena nuna nekaawartatui. ²² Ame shiir awajtursamna núnisnak Wisha nin shiir awajsaitjai. Iikia chikichik ájinia núnisan niisha chikichik ajasarti tusan túraitjai. ²³ Wi ni enentáin pujakui Amesha Winin pujakmin penké chikichik ajasarti. Túramtai ashí shuar júna nekaawartatui: Ame akuptukuitme, tura Winia anenmena áintsam nu shuarsha aneame. Wíi shuar chikichik ajasmajai ashí shuar nuna nekaawartatui.’

²⁴ ‘Aparu, shuar surusmam nu, Wi pujustatjana nuí pujusarti tusan seajme. Tura ti shiir awajtusmamna nuna ísarti tusan nuna seajme. Jú nuṅka najanchamunman tuke anentin asam ti shiir awajtusuitme. ²⁵ Aparu, ti péñker áminin jú nuṅkanmaya shuar nekarmainiatsui. Antsu Wi nékajme. Jú shuarsha ame akuptukman nékainiawai. ²⁶ Nú shuaran Ámin nekarmawarti tusan jintintiaitjai. Tura nu arantcha jintintiattajai. Nújainkia Wisha ni enentáin pujurkui Winia anenmena áintsan niisha anenkratin ajasartatui” áujtak tímiayi Jesus.

18

*Suntar Jesusan achikiarmiania nu
(Mateu 26.47-56; Márkus 14.43-50; Rúkas 22.47-53)*

¹ Jesussha nuna tinia amuk ni unuiniamurijjaj Setrun entsá katin numi arakmanum wémiayi. ² Jútassha Nin suruktajtsa pujumia nuka nu ajan nekaamiayi. Untsurí tsawant Jesus ni unuiniamurijjaj nu iruntramtai Jútas Jesusan nu wáinkiatniun enentáimpramiayi. ³ Tura untsurí suntarjajsha Jesusan tariarmiayi. Pariséusha Israer-shuar Patri uuntrijsa suntarnasha Yusa Jeen wáiniuncha Jesusan achikiarat tusa akupkarmiayi. Niisha machitniasha nankincha rámparancha jiniasha júkiar weriarmiayi. ⁴ Jesussha ashí átinia nuna neka asa jüintiuki “¿Ya eaarum?” tímiayi.

⁵ Niisha “Nasarétnumiá Jesus” tiarmiayi.

Jesussha “Wiitjai” tímiayi.

Jútassha Jesusan surukua nu niijjaj pujuarmiayi. ⁶ Tura Jesus “Wiitjai” takui ti ashamkar úkumur waketainiak iniaararmiayi.

⁷ Ataksha Jesus “¿Ya eaarum?” tímiayi.

Niisha “Nasarétnumiá Jesus” tiarmiayi.

⁸ Nuinkia Jesus tímiayi “Wiitjai, tájarme. Winia eatkurmeka Wíi shuar ainia júka waketkiarti” tímiayi. ⁹ Jesus nuik aujuk “Winia Apar surusma nu menkakacharai” timia nu uminkiat tusa Jesus “waketkiarti” tímiayi. ¹⁰ Nuyá Semun Pítiur machitian jusa Marku kuishin untsurnumaanij tsupirkamiayi. Markusha Israer-patri uuntri takarniuriyayi. ¹¹ Túramtai Jesus Pítrun tímiayi “Machitrumka awainki ikiusta. Winia Apar wáitsatniun surakuinkia ¿wáitsashtinkaitaj?”

Israer-patri úuntriniam júkiarmiania nu

(Mateu 26.57-58; Márkus 14.53-54; Rúkas 22.54)

¹² Nuinkia apach suntarsha ni kapitántrijsa Yusa Jeen wainniusha Jesusan achikiar jinkiwarmiayi. ¹³ Nuyá Anasa jeen júkiarmiayi. Anassa Kaipiasa weariyayi. Tura Kaipias nu uwitin Israer-patri uuntriyaayi. ¹⁴ Kaipiasa nuik “¿Ashí Israer-shuar mesertin penkerkait. Antsu aya chikichik shuar jákatin penkerchakait?” timia núiti.

Pítiur Jesusan natsantramiania nu

(Mateu 26.69-70; Márkus 14.66-68; Rúkas 22.55-57)

¹⁵ Semun Pítiur chikich unuiniamujaj Jesusa uku weriarmiayi. Israer-patri uuntri nú unuiniamunka nékauyayi. Tuma asamtai ni jeen jeawar, suntar Jesusajaj aa tanishnum wáiniakui niisha wayamiayi. ¹⁶ Tura Pítiur aa wáitiniam wajaamiayi. Túramtai chikich unuiniamu jiinki wáitin wáinia nú nuwajaj chichas Pítrun awayamiayi. Nu ni nékanu asa yúpichuch awayamiayi. ¹⁷ Waiti wáiniusha Pítrun aniasmiayi “¿Amesha nuna unuiniamurinchukaitiam?”

Pítrusha “Atsá, núchaitjai” tímiayi. ¹⁸ Tsetsek asamtai suntarsha tura nu takarniusha jinia ikiapárar ni nawen anaak pujuarmiayi. Pítrusha nu pachiiniak anamuk pujumiayi.

Kaipias Jesusan aniasmiania nu

(Mateu 26.59-66; Márkus 14.55-64; Rúkas 22.66-71)

¹⁹ Israer-patri uuntri Jesusan aniasmiayi “Ame unuiniamurmasha ¿ya ainia. Tura warí nin jintintiaitiam?”

²⁰ Jesussha tímiayi “Ashí íimiainiainj tuke etserniuitjai. Israer-shuar iruntainmasha Yusa Uunt Jeencha Israer-shuar irunainia nu arantutsuk tuke etserkaitjai. ²¹ ¿Urukamtai Winia inintiam? Winia chichamprun antukua nu aniasstarum. Wi timian nii ujatmakarti. Wi timiancha niisha nékainiatsuk.”

²² Jesus nuna takui Yusa Jeen wáiniua nu nu pujá Jesusan yapiniam awati tímiayi “¿Núnisanj nekas úuntnum chichastinkait?”

²³ Jesussha tímiayi “¿Warinmampa yajauch aa? Turuttia. Tura tájana nu penkeraitkiuin_hkia ¿urukamtai awattiniam?” ²⁴ Nuyá Anas Jesusan jinkia Kaipias takaamunam akupkamiayi Kaipias Patri uuntri_h asamtai.

Pítiur ataksha Jesusan natsantramiania nu
(Mateu 26.71-75; Márkus 14.69-72; Rúkas 22.58-62)

²⁵ Tuke Anasa jeen chichainia_h Pítiur jinia anamuk puján_h shuar aniak “¿Amesha Jesusa unuiniamurinchukaitiam?” tiarmiayi.

Pítrusha “Atsá, wíchaitjai” tímiayi.

²⁶ Chíkich takarin, Marku shuari_h, nu_h pujumiayi. Pítiur Marku kuíshin_h tsupirkamia nuna shuari_h asa tímiayi “¿Ajanam Jesusjai_h wekaamin wáinkiachmakajam?”

²⁷ Pítrusha ataksha “atsá” tai_h atash shiniukmiayi.

Piratu Jesusan aniasmiania nu
(Mateu 27.1-2, 11-14; Márkus 15.1-5; Rúkas 23.1-5)

²⁸ Nuyá Kaipiasaiya_h Jesusan júkiar tsawant tsawaamunam apach kapitían Piratu takatai jeenam_h ejeniarmiayi. Israer-shuarsha ni uuntri_h akupkamia nunisar wapik ajasaij_h tusar nu jeenam wayacharmiayi. Wayawarka paskua nampernum yurumáchmin_h ármiayi. ²⁹ Nu asamtai Piratu niijjai_h chichastaj tusa jíinki tímiayi “¿Jú áishmansha warí tunáa túrait?”

³⁰ Niisha “Tunaarinchaitkiuin_hkia amiini_h itiachaaji” tiarmiayi.

³¹ Tutai Piratu tímiayi “Atumek júkirum atumí akuptammariijai_h ni tunaari nekaatarum.”

Israer-shuarsha tiarmiayi “Antsu iikia Israer-shuartikia tunáa shuarsha máachminiaitji.” ³² Yaunchu Jesus ni jákatniur_hin enentáimtus “Wi awajna_hitniuitjai” tímiayi. Niisha krúsnum awajnain asamtai apach máataijjai_h Nii timia nu uminkiamiayi.

³³ Piratusha atak jeá wayá Jesusan untsuk “¿Ámeke Israera Uunt Akupniur_hinkaitiam?” tímiayi.

³⁴ Jesussha tímiayi “¿Amekek nu inintram. Kame chíkich túramainiatsuash?”

³⁵ Piratusha tímiayi “¿Wi Israer-shuarkaitiaj? Ameer shuarak Israer-patri uuntriijjai_h winin itiarmai. ¿Warí tunáa túraitiam?”

³⁶ Nuinkia Jesus tímiayi “Wi jú nunkanam akupniuchuitjai. Juyaitkiuin_hkia Winia nemartuiniana nu máanaikiaraayi. Túrawarmatai Israer-shuarnum surutkacharaayi. Antsu juy_han akupniuchuitjai.”

³⁷ Piratusha “¿Nuikia ame nekas uunt akupniukaitiam?” tímiayi.

Jesussha tímiayi “Ee, ame támena nu nekasaiti. Jú nunkanam akiinian ashí shuaran nekas ana nuna ujaktinian táwitjai. Ashí shuar nekas ana nuna umirniuka Wi táman ántawai.”

³⁸ Tura Piratu “¿Nekasa nusha warimpiait?” tímiayi.

Piratu Jesusan mantamnatniun tímiania nu
(Mateu 27.15-31; Márkus 15.6-20; Rúkas 23.13-25)

Piratusha nuna ti_h, atak Israer-shuarjai_h chichastajtsa jiinki tímiayi “Jú aishmanka tunaar_hin penké wáittsujai. ³⁹ Tura ashí uwitin paskua nampernum sepunmaya_h shuar ankant akupkatniuiti. Núnisrum tuke searme. Tuma asamtai, ¿yamaikia Israera Uunt Akupniur_hin ankant akupkattajak?” tímiayi.

⁴⁰ Nuinkia ashí kakantar untsumainiak “Ju akupkaip; antsu Parapás akupkatá” tiarmiayi. Nu Parapássha kásauyayi.

19

¹ Nuyá Piratu suntaran akupkamiayi Jesusan asutiáwarat tusa. ² Suntarsha Jesusan wishikrar tawasap jañki najanamun etsenkrumtikiarmiayi. Yamakai pushincha uunt akupniua áintsan áentsarmiayi. ³ Nuyá “Israera Uuntriá, kakaram ajasta” tiar yapiniam awatiarmiayi. ⁴ Nuyá Piratu atak jiinki tímiayi “Átum wáinkiarum nekaatarum tusan Jesusan jíktiatjai. Wikia tunaarinkia penké wáittsujai.” ⁵ Tímiatai Jesussha jañkin etsenkruku tura pushin yamakairman entsaru jíinkimiayi. Tura Piratu nuí káunkarun tiarmiayi “Pai juíti, íistarum.”

⁶ Israer-patri uuntrisha suntarsha Jesusan íisar ataksha ataksha kakantar unsumainiak “Krúsnum jakati” tiarmiayi.

Piratusha “Átum júkiirum máatarum. Ni tunaarín penké wáittsujai” tímiayi.

⁷ Tura Israer-shuar tiarmiayi “Nu shuar “Yusa Uchiríntjai” takui jákatniuiti. Iiniu akupeamu aarma nuí núniskete” tiarmiayi. ⁸ Nuna antuk Piratusha nu nankaamas ashankamiayi. ⁹ Ataksha init wayá Jesusan aniasmiayi “¿Tuyampaitiam?” Tura Jesussha penké áikchamiayi. ¹⁰ Nuyá Piratu tímiayi “¿Urukamtia winia airsum. Wi jeajna nu nékatsmek? Wakeraknaka krúsnum máatniuncha tura ankant akupkatniuncha jeajai.”

¹¹ Tutai Jesussha tímiayi “Yus nuna amaschaitkiuinikia penké tujinki-aintme. Nu asamtai amíin surutka nu ámin nankaamas tunaarinniuiti.”

¹² Piratusha nú chichamtaik Jesusan ankant akupkattsa wakerimiayi. Antsu Israer-shuar unsumainiak tiarmiayi “Ju ankant iníakmeka ame úunt akupniu amikrinchuitme. Juka “úunt akupniuitjai” taku atumí uunt akupniuri nemasrinti” tu unsumkarmiayi.

¹³ Piratusha taman antuk akupin pujutainium pujus Jesusan untsukmiayi. Nuí kaya ukatkamu asamtai Israer-shuara chichamen Kapata anaikiarmiayi. ¹⁴ Paskua jisat jeatsain nantu tutupin ajatsain Piratu Israer-shuaran tímiayi “Uunt akupniuram íistarum.”

¹⁵ Tura ashí “Jakati, jakati, krúsnum máatá” tu unsumkarmiayi.

Tura Piratu “¿Atumí uunt akupniurín krúsnum máattajak?” tímiayi.

Tura Israer-patri uuntri tiarmiayi “Atumí uunt kapitíántrumek in akup-tamji. Chíkichka atsawai.”

¹⁶ Tutai Piratu Jesusan krusnum mantamnati tusa tsankatkarmiayi. Tutai niisha Jesusan júkiar wearmiayi.

Jesusan krúsnum máawarmiania nu

(Mateu 27.32-34; Márkus 15.21-32; Rúkas 23.26-43)

¹⁷ Jesussha ni krusri yanaki Kúrkuta náinnium wémiayi. Kúrkuta naarisha Israer-shuara chichamen “muuka ukunch” tawai. ¹⁸ Nuí krúsnum ajintrurar awajainiarmiayi. Tura mai pae jimiará shuaran chikichik chikichik awajainiarmiayi. Tura Jesus ajapén ámiayi. ¹⁹ Piratusha Jesusa krúsrin uunt áarman anujkamiayi. *NASARETNUMIA JESUS, ISRAERA UUNT AKUPNIURI* Tu áarmauyayi. ²⁰ Israer chichamjaisha Kriaku chichamjaisha Rúmanmaya chichamjaisha áarmauyayi. Menaintiu chichamnum aarma asamtai tura Jesusarén pepru tíjiuch asamtai Israer-shuar ti untsurí áujiarmiayi. ²¹ Nu asamtai Israer-patri uuntri Piratun jeariar “Israera Uunt Akupniuri” áaraip. Antsu “Israera Uunt Akupniuríntjai tawai” tu aarta” tiarmiayi.

²² Tura Piratu nincha áikiar “Wi áaraj nuke átatui” tímiayi.

²³ Suntarsha Jesusan krúsnum awajainiar ni entsarmarin kuátru akankar ankant ankant júkiarmiayi. Tura ni pushirín apatsuk najanamu asamtai

jáaktinian nakitrarmiayi. Kame yakíya nunkaani apaiyiachma takamt-sukuyi. ²⁴ Tuma asamtai suntar tiarmiayi “Juka jáakchatai. Antsu naku-rakrin yának ati nu jukiti.” Nújainkia yaunchu Yus-Chichamnum aarma nu uminkiamiayi:

“Winia entsarmarun akantrarmiayi tura nakurusar awakmakua nuna winia pushirun súarmiayi” áarmaiti.

²⁵ Krúsnumsha Jesusa nukurísha Kriúpasa nuarí Marisha tura Máktaranmaya Marisha wajaarmiayi. ²⁶ Jesus ni nukuríncha tura ni ti aneamu unuiniamuríncha nuí wajan wáiniak ni nukurín tímiayi “Nukuru, ju ame uchirmea áintsan atí.” ²⁷ Nuyá ni unuiniamuríncha tímiayi “Ju ame nukua áintsan atí.” Nu tsawantaik nu unuiniamurí ni jeen jukí awayámiayi.

Jesusa jakamurí

(Mateu 27.45-56; Márkus 15.33-41; Rúkas 23.44-49)

²⁸ Nuyá ashí uminkiamtai Jesus nuna nekáa yaunchu Yus-Papinium aarma uminkiatu tusa “kitiamajai” tímiayi. ²⁹ Nuísha piniñnum churuín ámiayi. Tura shuar nuna uruchjai ejampar sapapjai ijiu mukunaati tusa susamiayi. ³⁰ Jesussha churuínian najekaa “ashí túrunatniua nu mash uminkiai” tímiayi. Nuna ti, muuken nená jakamiayi.

Suntar Jesusan paenam nanjijai ijiumiania nu

³¹ Nu tsawantaj, kashinkia paskua námper uunt tsawantri asamtai tura ayampratin tsawant aa asamtai, Israer-shuar jaka ayashí nuí paant ain tusa nakitrarmiayi. Nu asamtai Piratun seainiak “Krúsnum ajintrurma ainia nuna kanjajin suntar kupirkarti. Nuyá wari jákarmatai krúsnumia júkiarti” tiarmiayi. ³² Nuyá suntarsha weriar emka krúsnum amia nuna kanjajin kupirkarmiayi. Nuyá chikichnasha Jesusjai atsankiar ajintrurma nuna kanjajincha kupirkarmiayi. ³³ Tura Jesusan weantuk yaunchu jákaiti tusa kanjajin kupirtsuk ³⁴ suntar aya paenam ijiumiayi. Ijiumtaisha nu chichamtaik numpa yumijiai puarmiayi. ³⁵ Wi, Juan, nuna wainkia asan nekas tajai. Atumsha Yus enentáimtustarum tusan tí nekas tajai. Wi áarajna nu nekasaiti nékajai. ³⁶ Yaunchu Yus-Chichamnum aarma uminkiatu tusa túrunaiti:

“Ni ukunchin kupirkachartatui” tu áarmaiti.

³⁷ Tura chikichcha:

“Ijiuarmiania nuna wáinkiantatui” tu áarmaiti.

Jesus iwiarsamu amiania nu

(Mateu 27.57-61; Márkus 15.42-47; Rúkas 23.50-56)

³⁸ Nuyá Arimatéanmaya Jusé Jesusa ayashín jukitiaj tusa Piratun seamiayi. Nu Jusé Jesusan enentáimtaitiat Israer-shuara úuntrin ashamak paant nemarsachmiayi. Niisha seamtai Piratu “Jukitia” tímiayi. Tutai Jusé Jesusa ayashín jukimiayi. ³⁹ Nikiuté musha Jesusjai chichastaj tusa kashi tarimia nu jimiará kunkuin pachimpramun ti nukap sumak itiamiayi. Mira kunkuinniasha aruí kunkuinniasha sumakmiayi. ⁴⁰ Nuyá Jusé Nikiuté mujai Jesusa ayashín júkiar kunkuinian kuérar jaanch esarmajai penuararmiayi. Israer-shuar tuke nunisar ikiúu ármiayi. ⁴¹ Jesus krúsnum maamua nuí aja tíjiuch ámiayi. Nu ajanmasha waa náinnium paka taurma ámiayi. Nusha yama taurma asamtai jaka nuí ikiuschamuyayi. ⁴² Nu waasha tíjiuch asamtai tura Israer-shuara ayampratin tsawantri jeatemantai Jesusa ayashín nuí iwiarsarmiayi.

20

Jesus nantakmiania nu

(Mateu 28.1-10; Márkus 16.1-8; Rúkas 24.1-12)

¹ Tumiñtincha káshik kirit aĩn Máktaranmaya Marí Jesus iwiarsamunam íistajtsa wémiayi. Jesusan iwiarsar kaya uuntjai waan atutkarmiayi. Tura Marí nuí jeá nu kaya uraimiun wáinkiamiayi. ² Nuna wáiniak Semuñ Pítiur pujamunam tsékenki wémiayi. Chíkich unuiniamurí Jesus ti anemía nusha nuísha pujumiayi. Tura Marí tímiayi “Iwiarsamunmaya ii Úuntrin júkiarai. Tura ¿tuíntsuk ikiusara?” ³ Pítrusha chíkich unuiniamuríjjai jíinkiar iwiarsamunam iyuwarmiayi. ⁴ Mai métek tsékenkiar Pítiur jeatsain chíkich unuiniamurí iwiarsamunam emka jeamiayi. ⁵ Niisha wayatsuk tsunsumá iis penuarmarĩnkia nuí tepan wáinkiamiayi. ⁶ Nuyá Semuñ Pítiur ukunam jeá iwiarsamunam wayá penuarmarí nuí tepan wáinkiamiayi. ⁷ Chíkich jaanchcha Jesusa muuken penuarma nusha nanerma niisháa tepan wáinkiamiayi. ⁸ Nuyá chíkich unuiniamurí emka tamia nusha iwiarsamunam wayamiayi. Niisha túruna wáiniak “Jesus nekas nantakni” tu enentáimpramiayi. ⁹ Nuna wáintsuk Yus-Chichamnum “Jesus jakamunmaya nantaktiniaiti” áarman áujsariat nekaacharmiayi. ¹⁰ Nuyá mai ni jeen waketkiarmiayi.

Máktaranmaya Marincha Jesus wantintiukmiania nu

(Márkus 16.9-11)

¹¹ Tura Marikia iwiarsamunam juak úutu pujumiayi. Niisha úutiatañ tsunsumá iwiarsamunam íimsamiayi. ¹² Tura Jesusa ayashí nuik tepesmanum nayaimpinmaya suntar puju entsaru jímiar pujan wáinkiamiayi. Chikichik múuknumaani tura chíkichka nawenmaani pujumiayi. ¹³ Nayaimpinmaya suntarsha “¿Urukamtai úutam?” tiarmiayi.

Marísha tímiayi “Winia Úuntrin jurutkiarai tura ¿tuíntsuk ikiusara?” ¹⁴ Nuna tí ayanmar Jesusan wáiniak Nin nekaachmiayi.

¹⁵ Jesus aniak “¿Urukamtai úutam. Ya eeam?” tímiayi.

Marisha ajan wáinnia nui ti tusa tímiayi “Uunta, ame ni ayashí jukimkia, tui ikiusmam ujatkata wi jurumkitiaj” tímiayi.

¹⁶ Nuyá Jesus “Mariya” tímiayi.

Tutai niisha ayanmar “Rapuni” tímiayi. Nusha Israer-chichamnum “Untá” tawai.

¹⁷ Jesussha tímiayi “Emetruawaip. Winia Aparuí wáatsjai. Antsu weme Wíi shuar titiá “Winia Aparuí nayaimpiniam wéajai. Niisha atumí Aparínti. Winia Yúsruiti tura atumí Yúsrinti” tawai titiá” tímiayi.

¹⁸ Nuyá Máktaranmaya Marisha Jesusa unuiniamurín wáiniak “Wi Úuntan wáinkiajai, tímiayi. Niisha juna mash túrutui” tu ujakarmiayi.

Jesus ni unuiniamurín wantintiukmiania nu

(Mateu 28.16-20; Márkus 16.14-18; Rúkas 24.36-49)

¹⁹ Nu tsawantai, tumiñtin, ni unuiniamurí Israer-shuara úuntrin ashamainiak kashi iruntrar waiti epeni pujuarmiayi. Túrasha Jesus áyatik wayamiayi. Tura ajapén wajas “shiir pujustarum” tímiayi. ²⁰ Nuna tí, nuyá ni uwejeñ ajintruamuncha ni paen ijiumuncha iniakmasmiayi. Ni unuiniamurísha Úuntrin wáinkiar shiir warasarmiayi. ²¹ Ataksha Jesus “Shiir pujustarum, tímiayi. Winia Apar akatar akuptukma núnisnak Wisha akatran akupeajrume” tímiayi. ²² Nuyá ni matsatmanumaani umpuí tímiayi “Yusa Shiir Wakaní atumí enentáin wayati. ²³ Shuara tunaarĩnkia átum “asakárti”

tákurminkia tsankurnartatui. Tura nu shuar “sumamati” tákurminkia tuke sumama pujawai” tímiayi Jesus.

Tumas Jesus nantakniun wáinkiamiania nu

²⁴ Tura chikichik unuiniamu, Jímiampramu Tumas, Jesus tamia nuí pujuch-miayi. ²⁵ Tura ukunam chikich unuiniamurí ujainiak “Íi Uuntrí wáinkiaji” tiarmiayi.

Tura Tumas tímiayi “Ajintruamurí wáinkian uwejrún awaintiuatniuitjai. Tura paenumsha awaintiuatniuitjai. Penké jaka asamtaí aya nujai ini-antkimiun enentáimtustatjai” tímiayi.

²⁶ Chíkich tumintin ataksha Jesusa unuiniamurí iruntrarmiayi. Nuinkia Tumassha níijiaí pujuarmiayi. Tura waiti epenmianuman Jesus wayá ajapén wajas “Shiir pujustarum” tímiayi. ²⁷ Nuyá Tumasán tímiayi “Winia uwejur íisam ame uwejem awaintiuata. Núnismek winia paeruí uwejem awaintiuam íistá. Tura arantutsuk nekas enentáimtursata.”

²⁸ Nuyá Tumas “Winia Úuntruá, nekas winia Yúsruitme” tímiayi.

²⁹ Jesussha tímiayi “Winia wáitkiam nuin enentáimtursame. Antsu Winia wáittsuk enentáimturaru nekas shiir áiniawai” tímiayi.

Shuar Yusa Uchirín enentáimtusarti tusa ju papí áarmaiti

³⁰ Aentsti tujintiamuncha Jesus túramu ti untsurí ju papinium áarchamu áiniawai. Tura ni unuiniamurí mash wáinkiarmai. ³¹ Antsu Jesuska Kristu asa Yusa Uchirínti tu enentáimtustarum tusan júnaka áarmajai. Tura enentáimtakmin Jesus ni iwiaakmarín yamarma nuna amastatui.

21

Entsá yantamnum Jesus siati (7) unuiniamurín wantintiukmiania nu

¹ Tipirias antumianka káanmatkarín Jesus ni unuiniamurín wantintiukmi-ayi. Júnisan ámiayi. ² Semun Pítrusha Jímiampramu Tumassha Kananmaya Natanaérsha Sepetéu uchirísha tura chíkich jímiar unuiniamurísha métek iruntrar pujuarmiayi. ³ Semun Pítrusha “Namakan nekajai nankiattsan wéajai” tímiayi.

Chíkich mash “Iisha winittiaji” tiarmiayi.

Wéar uunt kanunam enkemprar nu kashi achitsuk tsawararmiayi. ⁴ Káshik aín Jesus entsá káanmatkarín wantinkiamiayi tura ni unuiniamurísha Jesu-san nekaacharmiayi. ⁵ Jesussha tímiayi “Uchiru, ¿namak achikiurmek?”

Niisha “Atsá” tiarmiayi.

⁶ Tutai Jesus tímiayi “Neka untsuurnumaaní ajunkatarum. Nuí achikta-trume.”

Nii timia núnisan túrawar namakan ti achikiar nekan júsatniun tujinkiar-miayi. ⁷ Nújainkia Jesusa unuiniamurí Jesus ti aneemia nu Pítrun tímiayi “Íi Úuntrinti.” Takui Pítrusha ámiaku asa ni pushirín entsar entsá inianmiayi yukuak jeataj tusa. ⁸ Chíkich unuiniamurísha jeachat pujuiniachuk nekan japiki kanujai káanmatkanam jeawarmiayi. ⁹ Káanmatkanam jeawar ji kajir ámanum namakan jiámun wáinkiararmiayi. Tantancha wáinkiararmiayi. ¹⁰ Jesussha “Átum achikiurména nuyá jíatin itiatarum” tímiayi. ¹¹ Tutai Semun Pítiur kanunam we nekan nekartiuk káanmatak japiki itiamiayi. Itiar namaknasha sianu senkuenta nuyá tres (153) nekapmararmiayi. Ti untsurí áyat nekasha jáankachmiayi. ¹² Nuyá Jesussha “Yurumáitiarum” tímiayi. Ni unuiniamurísha “aya ii Uuntrí áminiaiti” tusar inintrustinian natsantiarmiayi. ¹³ Nuyá Jesus wajaki tantan jukí súsarmiayi. Núnisan namaknasha súsarmiayi.

¹⁴ Jesus jakamunmaya nantaki jujai menaintiu ni unuiniamurin wantin-tiukarmiayi.

Jesus Semun Pítrujai chichasmiania nu

¹⁵ Nuyá yurumáwar Jesus Semun Pítrun aniasmiayi “Junasa uchirí Semunka, ¿ju shuar nankaamas anentmek?”

Pítrusha tímiayi “Ee, Uunta, wi wakerajam nu Ame nékame.”

Jesussha “Nuiñkia winia murikiur ayuratniua áintsam Winia enentáimturainia nu yaintá” tímiayi. ¹⁶ Ataksha aniasmiayi “Junasa uchirí Semunka, ¿Winia anentmek?”

Pítrusha “Ee, Uunta, wi wakerajam nu Ame nékame” tímiayi.

Jesussha “Winia murikiur wáinkiatá” tímiayi. ¹⁷ Nú ataksha aniasmiayi “Junasa uchirí Semunka, ¿winia wakerutamek?”

Pítrusha menaintiu iníam kúntuts enentáimiar tímiayi “Uunta, ashí nékame. Wi wakerajam nu Ame nékame.”

Jesussha tímiayi “Winia murikiur ayurata. ¹⁸ Maa, nekas tájame. Natsa asamka iwiarmampram ame wakeramunam wéuyame. Tura úuntach ajas-meka ame kunturam ayaparakin chíkich aentstamprattawai tura ame wétin nakitiam nu juramkiartatui.” ¹⁹ Jesus nújainkia Pítiur máatniun ujakmiayi. Tura núnisan jakamtai shuar Yúsan shiir awajsatniun ujakmiayi. Nuyá Pítrun “Nemartusta” tímiayi.

Juan túrunatniun Pítiur Jesusan aniasmiania nu

²⁰ Pítrusha ayanmar chíkich unuiniamurin Jesus ti anea nuna némarun wáinkiamiayi. Kame nu unuiniamuka nuik Jesus jáatsain yurumáiniakui “Uunta, ¿ya surutmaktata?” timia núiti. ²¹ Nincha Pítiur wáiniak Jesusan aniasmiayi “Uunta, ¿jusha warí urukatniuit?”

²² Jesussha ayak “Wi wakeraknaka iwiaaku pujain tátatjai tíminiaitjai. Nuna tákuisha ¿warí itiurtama? Ámeka nemartusta” tímiayi. ²³ Nújainkia “Nu unuiniamurí jákashtatui’ tusa Yus-shuarnum áujmatarmiayi. Túrasha Jesus “jákashtatui’ tíchamiayi antsu áyatik “Wi wakeraknaka iwiaaku pujain tátatjai takuisha ¿warí itiurtama?” tímiayi. ²⁴ Wikia nú unuiniamurintjai. Ju papincha aaru asan “mash nekasaiti’ tajai. Ashí shuarsha núnisan tuíniawai.

²⁵ Nu arantcha juí áarchamusha ti awai. Kame ashí áamka ti untsurí papí asa ashí nunkanam ikuschamnia ainti. Nuke atí.

Jesusa Akatramurĭ Yusa Wakanĭjĭai TÚRAMU

Yusa Wakanĭn nákasarmĭania nu

¹ Amikiur Tiúpiru:

Nuik akupkamĭaj nú papĭnĭum ashĭ Jesus túramĭa nuna áatramĭajme. Tura unuitĭampramĭaj nunasha áatramĭajme. Yámankamtaiknumĭa, ² nayaimpĭnĭam wétsuk, ashĭ Nĭi túramĭa nuna tímiĭajme. Jesuska, nayaimpĭnĭam waketsuk Yusa Wakanĭ kakarmarĭjĭai túratnĭua nuna ni akatramurĭn jĭntĭntĭawarmĭ-ayĭ. ³ Tura jaka nantakĭ, Jesus tímiĭajĭk wantĭntĭukmiĭayĭ ni akatramurĭn. Tura kuarenta (40) tsawant nin wantĭntĭukarmĭayĭ. Nuna tura nekas iwĭaak-jai tusa ĭniakmasmiĭayĭ, nekaawarat tusa. Tura Yusa akupeamurĭ urukukĭt nuna mash ujakmiĭayĭ.

⁴ Jesuska ni akatramurĭjĭai tuke pujus, nin chicharuk “Jerusarénnumĭa wéerap, tímiĭayĭ. Winĭa Apar “amastatjai” tímiĭa nuna, paant ujakchamkajrum. Nu túrunat tusarum Jerusarénnum nákastarum, tímiĭayĭ. ⁵ Tuke enentáimsatarum. Juān entsajĭ atumĭ ayashĭn ĭmiatmĭmĭarme. Túrashā wárik Yusa Wakanĭsha atumniasha tarutmar, atumĭ enentáin enkemprutmattarme. Nusha enentáin ĭmiĭantĭn áintsankete” tímiĭayĭ.

Jesus nayaimpĭnĭam wakamĭania nu

⁶ Tura Jesusjai ĭrunar matsamas anĭntriarmĭayĭ “Uunta, Israer-shuar ájĭnĭa nu, anĭkant ajasakrĭn ĭĭniuk Akupĭn atak naamkatin yamaĭ jeayash” tiarmi-ayĭ. ⁷ Jesus áimiuk tímiĭayĭ “Winĭa Apar túratana nu warĭ tsawantĭnik túrunatĭ nu nekaatnĭusha atumniachuitĭ. Apar Nĭnĭki neka asa ni kakarmarĭjĭain túratawai. ⁸ Tura atumsha Yusa Wakanĭ kakarmarĭn sunastatrume. Nĭi taa enkemprutmamtaĭ kakaram ajasrum, Wĭi túramu etserkattarme. Emka juĭ Jerusarén péprunam etserkattarme. Nuyá ashĭ Jutĭa núnkanam, tura arant Samaria nunkanmasha, tura nú arant ashĭ núnkanam werum, Wĭi túramu etserkattarme” tímiĭayĭ Jesus.

⁹ Nuyá chichas amir, ashĭ ni akatramurĭ ĭi wajainĭai, Jesus nayaimpĭn-maani junakmiĭayĭ. Wéa-wéakui yurankim mash Nin amuámiĭayĭ. Tuma asamtaĭ ni akatramurĭ Nin wáinkĭacharmĭayĭ. ¹⁰ Tura Jesus waakkui ni akatramurĭsha yakĭ ĭi wajainĭai, jĭmiará áishman puju entsaru nuĭ wantĭntĭukarmĭayĭ. Tura ayamach wajattsarmĭayĭ. ¹¹ Nu áishmansha Jesusa akatramurĭn tiarmiĭayĭ “Kariréanmaya áishmanĭka, ĭurukamtaĭ nayaimpĭnmaani ĭmiĭa ĭmĭprum? Ju Jesusak atumĭya nayaimpĭnĭam wea wáinkĭarumna núnisanĭ ataksha winĭttĭawai” tiarmiĭayĭ.

Matĭasan anaĭkiarmĭania nu

¹² Tuasua amĭkmataĭ Jesusa akatramurĭ Uriwiu náinnĭumĭa akaĭkiar Jerusarénnum waketsĭarmĭayĭ. Uriwiu naincha Jerusarénnumsha tíjiuchiĭti, chĭkĭchĭk ĭirumĭtrua núnisanĭ. ¹³ Tura Jerusarénnum jeawarmĭayĭ. Nuĭ jeawar, jeá wayawar yakĭ wákararmĭayĭ. Nuĭ Pĭtrusha, Jakupusha, Juansha, Antressha, Jirĭpĭsha, Tumassha, Parturumĭsha, Mateusha, tura Arpeu uchĭrĭ Jakupusha, nuyá ásump Semunsha, Jakupu yachĭ Jútassha, tímiĭan wayawarmĭayĭ. ¹⁴ Jusha mash tuke ĭrunĭarmĭayĭ Jesusa yachĭjĭai. Tura Jesusa nukurĭ Marĭjĭai, nuyá chĭkĭch nuwajaisha tuke ĭrunĭarmĭayĭ, Yus áujsataĭ tusar. ¹⁵ Nuĭ síántu paintĭ (120) aents ĭruntrarmĭa nuĭ Pĭtiur chichastaj tusa wajakmiĭayĭ.

16 Pítiur juna tímiayi “Yatsurtírmesha, umarutírmesha antuktarum. Yuska yaunchu ni Papiriin Jutasnan áamtikramiayi. Jútas akiintsain Tawitkia, Yusa Wakanj jintintiam Jutasnan áarmiayi. Jesusan achik surukarmia nú shuaran nekapruamia núiti. Kame Tawitia áarmari Yus-Chicham asa tímianak uminkiatniuyi. 17 Nú Jutaska ii írutramuítat, ii takaamurín páchitkiaítat, 18 tunáa tura nujaj kuítian achik nunkan sumakmiayi. Tura piniakum iniaan tantane páttimiayi. 19 Tuma asamtai ashí Jerusarénum pujuarmia nu, nuna nekaawar nú nunkan “Numpa Nunka” anaikiarmiayi. 20 Kame Sarmu papinium Tawitkia juna áarchamkia:

“Ni jeesha itiarak atí.

Nu jeanmanka penké pujuschartí.” Tura

“Ni takatri chíkich atankiti.”

Tu aarmaiti’ tímiayi.

21 “Tuma asamtai yamaikia chíkich anaikiatniuitji. Tura nánkamas achikchatniuitji. Antsu ii nemartamkau atí. Uunt Jesus iijjai pujumia nuj tuke Nin nemarsamia nu atí. 22 Juan Jesusan imiaimiania nú tsawantnumiá jukí, Jesus nayaimpiniam wémiania nú tsawantan tímianu eje tuke Niijjai wekaimia nu atí. Nu shuar enentáimtusar, chikichik achiktai. Iisha iruntrar Jesusa nantakmari etserkamí tusar túramí” tímiayi Pítiur.

23 Tura nuyá jimiara shuaran anaikiarmiayi. Matíasan anaikiarmiayi. Tura chikichnasha Jusén, ni chíkich naari Parsapas, tura apach náarinikia Justu, nunasha anaikiarmiayi.

24-25 Tura nuyá Yus-shuar Yúsan áujainiak juna tiarmiayi “Ii Uuntri, Amesha ashí shuara enentái nekame. Jui awai jimiara áishman. Jútas tunáa túrak jákatniunam wéak akatramu takatan ikiukmiayi. Yamaikia Jútas takatri achikiat tusam, ¿tuá achikium, Uunta? Paant iniakmasta.” Tu aujsarmiayi.

26 Tura Israer-shuara túrutairi núnisan, wats yaki nupetmakat tusar túrawarmiayi. Tura Matías nupetmakmiayi. Túrunamtai Matíasnak pachikiarmiayi.

2

Yusa Wakanj taramiania nu

1 Pintikiustís náartin jísat jeamtai, chikichík jeanman nuin Yus-shuar tuakarmiayi. 2 Tumaj aya aneachma nayaimpinmaya nasea áintsan téter ajaki winian antukarmiayi. Ashí mash jeá pujuarmia nuka antukarmiayi. 3 Tura nuj pujuinijai ji wajaj kea áaniun wáinkarmiayi. Túruna ankant ankant puunak tarurarmiayi. 4 Tuma asamtai Yusa Wakanj ashí ni enentáin pim-iutkarmiayi. Túram chichasarat tusa Yusa Wakanj ni nekatairi súsarmiayi. Tuma asamtai nujaj niisha chíkich chichaman chichasarmiayi.

5 Nu j Jerusarénum Yus táman umirin Israer-aents áarmiayi. Ashí nunkanmaya Jerusarénum taar matsamarmiayi. 6 Tura túrunamia nuna antukar káunkarmiayi. Tura ashí shuar ni chichamejain chichaamun antukarmiayi. Tuma ásar, warinkit, tu enentáimsarmiayi. 7 Nekaachar ashankarmiayi. “Warinkit, tunaim ajararmiayi. Ju aents chíkich chíkich chichaman chichainia nu, ashí Kariréanmayanchukait, tiarmiayi. 8 Tura iisha ankant ankant ii chichamenka ántatsjik. Ausha urukainiakua, nunak chichainiawa, tiarmiayi. 9 Jui ashí nunkanmaya aents pujuiniatsjik. Partianmaya, Eramnumiasha, Misiuputámianmayasha, Puntanmayasha, tura Asia nunkanmayasha, 10 Prijianmayasha, Pampirianmayasha, Ejiptunmaya tura Áprikanmaya Serinia nú nankaamasnumiasha pujuiniatsjik, tiarmiayi. Nuyasha ii shuarsha Ruma péprunmaya yaunchu

taar juí matsatainiawai. Chikichcha tuke Israer-shuar áiniawai. Tura chikichcha Israer-shuar ajastaj tusa Israer túrutairin mash túruiniawai. 11 Kritianmayasha Arapiamaya pujuiniaji. Tura ashí mash ii chichamejaisha Yusa péñker túramuri ántaji” tiarmiayi.

12 Ashí aents nuna nékachu ásar ashamkarmiayi. Tura nuámtak aniniais-armiayi “¿Warinminiait ju?” 13 Tura chikichcha wishikiarmiayi. “Nampeku ániatsuash” tiarmiayi.

Pítiur ujakmia nu

14 Nuñkia Pítiur, chíkich áuntse Jesusa akatramurijjai wajaki, kakantar chichasmiayi. Chichaak tímiayi “Jutíanmaya shuartiram, Jerusaréñnumiätirmesha antuktaram. Wi títiatjana nu antukrum péñker enentáimpratarum. 15 Ju áishman, nampekarai, tárugna nu, nampekcharai. Warí, nantu imiá ishichik takuni. ¿Aisha itiurak? 16 Antsu Yúsnan etserin, ni naari Juér, yaunchu áarmia nu, yamá túrunayi, tímiayi.

17 Juna áarmiayi: “Yus tawai “Jú nunka amuukatin jeatemamtai, winia Wakantrun ashí áentsnum akupkattajai, yumi yaraanua áintsan. Atumí uchiri, atumí nawantrisha Yusa chichamen áujmariartatui. Tura nátsaka ímiarartatui. Tura uuntka mesekramiartatui. 18 Tura áishmansha nuwasha winia takartin ainia núnaka winia Wakantrun akuptukartatjai. Túram niisha Wíi túramun áujmariartatui. 19 Yaki nayaimpiniam, aents túrachminian iniakmastatjai. Tura nunkanmasha winia kakarmarun iniakmastaj tusan numpancha, jiniasha, mukuintiuncha yuranmia áintsan akupkattajai. 20 Tura tsawái nantusha kajinkiattawai. Tura nantusha mushatmar numpa núniktatui. Uunt tsawant achikmiajna nu jeatsain, túrunattawai. Nú tsawantcha imiá nekas uunt átatui. 21 Nuñkia ashí shuar nekas winia kakarmarun seana nuka uwemprartatui” tímiayi Yus.”

Núnis Juér áarmiayi’ tímiayi Pítiur.

22 Tuke chichaak: ‘Israernumia shuartiram, wi títiatjana nu antuktaram. Nasarénumia Jesusnan tajai. Nú Jesusan Yus shiir enentáimtawai. Yuska, átum ti enentáimprarum ni kakarmarin paant nekaatarum tusa, nú Jesusan ti ikiakármiai. Tura Jesusjai aentsti túrachminian Yuska túramiayi, átum íimmianum. Nuka ti paant nékarme, tímiayi. 23 Tura Jesus surunkamia nuna Yuska yaunchu, túruntsain, paant nekaamiayi. Túrasha Yus enentáimmia nujai métek túrawarmiayi. Tura atumek emetarum Jesus jukimiarme. Nú arant, krúsnum máatarum, tunáa shuar tímiarme. 24 Túramunak Yus Jesusan jákatniun nupetmamtik iniantkimiayi, tuke jákachmin asamtai. 25 Iimiata, ii uuntri Tawit Jesusnan kantamprua juna áarmiayi:

Úuntan tuke pujurtan wáinmiajai. Winia pujurtakui awajkamú áhattajai.

26 Tuma asamtai winia enentáirjaisha Nin shiir enentáimtusmiajai. Tura wenurjaisha shiir chichaman chichamiajai. Jáknasha shiir enentáimsan jakattajai, aneantiniapitjia tusan.

27 Winia wakaniur, Yusru, jákatniunam ikiurtuschattame. Wi ame Uchirmetjai, Tunaaríncha. Túmaitkui anentu asam ayashur káurtin tsanka-trukchattame.

28 Tura iwiaaku átin jintia jintintrutamame. Tura tuke pujurtakum waramtikrustatme.

Tu áarmiayi Tawit’ tímiayi.

29 Pítiur tuke chichaak: ‘Páantchakait. Ii uuntri Tawit yaunchu jákaiti. Tura iwiansamuiti. Ni iwiansamuri iini pujatsuk. 30 Túrasha Tawitkia Yúsnan etserniuyayi. Tuma asa Yus tímia nuna nekaamiayi. Yus Tawitian chicharuk

tímiayi “Ame akupniuitme. Nekas tájame, ukunam ame iniannamurminian Kristu akiiniattawai. Niisha Akupin anainiaktatui, amea áintsan.” Nuna Yus táman Tawit nekaamiayi. ³¹ Neka asa, túruntsain Tawit, wainkia nútiksan, Kristu nantaktintrin áarmiayi. Kristu túrunatniurin chicharuk tímiayi “ni wakaníncha jákatniunam ikiukchatniuyi. Ayashíncha káurtinian tsankatkashtiniuyi.” ³² Au Krístun tímia nu Jesusaiti. Nu Jesusnak Yus iniantkimiayi. Nuka iisha neka asar étsereaji. ³³ Yuska, Jesus nankaamantuiti tusa ni untsuurin apujsaiti. Tura ni Wakanin Jesusan súsaiti, Nii yaunchu tímia nútiksan. Tuma asamtai jusha átum antukurmena nuna, tura ísurmena nunasha Yus suramsaiti. ³⁴ Tawitkia ayashtiuk nayaimpiniam wákachmiayi. Tura nú Tawitiak juna áarmiayi:

“Uunt Yus winia Úntrun tímiayi “akupin pujutainium, winia untsuuruin pujustá.

³⁵ Ame nemasrumin nupetkattajai. Nu túruntsain jui pujustá’ tímiayi.”

Nuní áarmaiti Jesusnan, tímiayi. ³⁶ Tura ii, Israer áentsti, Jesus krúsnum maaitji, tímiayi. Jú Jesus máamjinia nuna Yuska Uunt Akupin anaikiamiayi. Túrasha Jesussha in uwentikkiartin Krístuiti. Ashí áentstíram nu péñker nekaatarum” tímiayi Pítiur.

³⁷ Nuna antukar wake mesekarmiayi. Tura Pitruncha chíkich akatramuncha aniasarmiayi “Yatsuru, ¿nuinkia itiurkatjik?” tiarmiayi. ³⁸ Tutai Pítrusha chichaak “Atumí tunaari ikiuktiaj tusarum Yus nekas enentáimtustarum. Tura ashí shuarteram Jesukrístu naari pachisrum imiantiarum. Nuinkia atumí tunaarin Yus tsankurtamprattarme. Túrunawakrumin Yuska ni Wakanin suramsattarme, tímiayi. ³⁹ Yus tímia nuka atumin túramprume. Atumí uchiríncha tura ashí arant matsatania nunasha tawai. Kame ii Yusri áentsun untsuktaj tusa wakerana nuna tawai” tímiayi.

⁴⁰ Nú chichamjai tura nuyasha Pítiur tuke jintintiuk tímiayi “Yajauch shuara asutiátniuri átatna nuyá uwempratarum” tímiayi. ⁴¹ Tuma asamtai nuna antukarmia nuka imianiarmiayi. Nú tsawantai menaintiú mir (3000) aents Yus-shuar ajasarmiayi. ⁴² Ashí nu shuar Jesusa akatramuri jintintiarmia nuna tímatrusan antukarmiayi. Tura irunar shiir enentáimtunaisar yurumin áarmiayi. Túrawar, Kristu enentáimtustin namperin najanin áarmiayi. Túrawar Yúsan áujiarmiayi.

Yus-shuar pamparamiania nu

⁴³ Tura Yuska aentsti túrachminian Jesusa akatramurijjai túramiayi ni kakarmarin iniakmastaj tusa. Tuma asamtai ashí aents nuna wáinkiar ashankarmiayi. ⁴⁴ Yúsan umirkaruka ashí métekrak pujuarmiayi. Tura ashí niiniu armia nuna sunaisarmiayi. ⁴⁵ Ni nunken surukar, ni takakmarincha surukar, atsumainia nuna súarmiayi. ⁴⁶ Tuke tsawantak Yusa Uunt Jeen káuniarmiayi. Tura ni jeencha iruntrar warainiak Kristu enentáimtustin námper najanin áarmiayi. Tura nankaamantu enentáimtumatsuk, yurumkan ajamnainiarmiayi. ⁴⁷ Túrawar, Yuska ti úntaiti, tu wearmiayi. Tura ashí aents nin shiir enentáimtiarmiayi. Tura Uunt Yus tuke tsawant shuaran uwentikiar Yus-shuar írunmanum íkiaunki wémiayi.

3

Wekaicha wekasamiania nu

¹ Chíkich tsawantai, nantu nunkaach ajasmatai, Pítiur Juanjai, Yusa Uunt Jeen Yus áujstai tusar wearmiayi, Israer-shuar tuke turin armia nútiksan.

² Tura áishman, ni akiiniamuriniá wekaicha amia nu, nui aa wáitiniam tuke tsawant pujumiayi. Nu áishmanasha ni shuari entsakí júkiar nú wáitiniam

apujin ármiai, nuí shuar wayan kuítian seat tusar. Nú wáitisha, Shiir Waiti, tutaiyayi. ³ Tura nú shutuapsha Pitrun Juanjái wayan wáinkiamiayi. Wáiniak kuítian seamiayi. ⁴ Tura Pítur Juanjái apajas ísarmiayi. Tura nú áishmanasha chicharuk “Iirsata” tímiayi. ⁵ Aishmanasha, surustatuapi, tu enentáimias, íimsamiayi. ⁶ Nuyá Pítur chichaak “Kuítusha atsawai, tímiayi. Kurisha atsawai. Antsu kuítjái nankaamas takakjana nuna amastajai. Wats, Nasarénumia Jesukrístu kakarmarijiaí wajakim wekasata” tímiayi.

⁷ Tinia iniais, Pítur ni untsuuriní achik awajkimiai. Túram ni nawesha, wanusesha kakaram ajasmiai. ⁸ Tura niisha wajakí nantent ajakmiayi. Nuyasha wekasamiayi. Tura Píturjuajisha Juánjaisha Yusa Uunt Jeen wayawarmiayi. Nuik shutuapka wayá nantent nantent ajak Yusa náarin shiir pachimiayi. ⁹ Ashí aents pujuarmia nu, nin wekaan wáinkarmiayi. Tura ni chichamen anturkarmiayi. ¹⁰ Tura chichainiak “Nuik Yusa Uunt Jeen wáitirin, Shiir Waiti tutainium, nu áishman tuke pujuuya núchakait” tiarmiayi. Tura ni túrunamurin nekaawar, ti ashamkar nusháa enentáimsarmiayi.

Pítur ujakmiania nu

¹¹ Shutuapka péñker ajasu asa Píturjái Juánjaisha penké tsurachmiayi. Tura aents nuí pujuarmia nu, warinkit tusar, jeáshkiri tsékenki wearmiayi. Nuka Sarumúnna tiniu ármiai. ¹² Aents káunkarun Pítur wáiniak, chicharuk “Israer-shuartiram, ¿urukamtaí winiasha imiá írum? tiarmiayi. ¿Iisha péñker asarikí tsuarmají? ¿Ii kakarmarijiaínkikí ewekamsamají? ¹³ Atsá. Antsu Yuska ni Uchirin Jesusan ashí nankaamantu awajsaiti. Ii uuntri Apraamsha, Isaksha tura Jakupsha enentáimtin armia nú Yusan tajai. Átumka Jesus nakitrarum kapitían Piratuí surukmarme. Tura Piratu akupkataj tau atumsha suritkiamarme. ¹⁴ Jesus péñker nákak enentáimniuyana nu “akupnakchati” tímiarme. Antsu shuáran main akupnakat tusarum wakerimiarme. ¹⁵ Túrarum iwiaaku átinian Amaana nu maamarme. Tuma ain Yuska Nin jakamunmaya iniantkimiayi. Nuka iisha neka asar étsereaji. ¹⁶ Tura ju aishman juí wajaana ju tura nékarmena ju, Yusa Uchiri naari enentáimta asa kakaram ajasuiti. Jesus enentáimtusu asa nekas péñker ajasuiti. Nusha wáinniu asarum nékarme’ tímiayi.

¹⁷ ‘Wats, yatsurtiram, wi nékajai. Atumsha atumí úuntriiaí Jesusan túramarmena nu nékatsuk túramarme. ¹⁸ Tura nu túramurmijiaí Yus yaunchu tímia nu tímianak umikiurme. Ni Krísturí wáitsatniuya nuna Yuska ashí ni etserniurín áamtikramiai. ¹⁹⁻²⁰ Wats, yamaikia tunaaruminiá kanaktiarum. Túrarum Yúsnumaani ayantártarum, tunaarun asakarat tusarum. Túrunawakrumniakia, atumin uwemtikramprarat tusa Yus yaunchu anaikiamia nuna akupturmaktatrum. Nusha Jesukristuiti. Tura Niijiaí enentáimin ayampratin átatui. ²¹ Tura yamaikia Jesukrístu nayaimpiniam pujustiniaiti, ashí iwiarnatsain. Yuska ukunam ataksha nunkan shiir awajsattawai. Nuna ni etserniurín tsáapin enentái takaku armia nuna yaunchu áamtikramiai. ²² Tuma asa Muisais ii aparín tímiayi:

“Atumi Uunt Yusrí ukunam etserniun akupturmaktatrum, winia akuptukmia núnisan. Nuámtaktirminiá achik akupturmaktatrum. Tura nii títiatna nu umirkatarum” tímiayi. ²³ Nánkamas aents nu etserniun chichamen umíachkunka emesnartatui. Tura Israer-shuarnum páchitkia áchattawai.

Núnisan áarmiayi Muisaisha’ tímiayi.

²⁴ Pítur tuke chichaak ‘Iimiata, Yúsnan etserin Samuer ju tsawantin túratniurí etserkamiayi. Nuyá ashí Yúsnan etserniusha tuke nuna etseriarmiayi. ²⁵ Etseriarmia nuka atumin túramprume. Tuma asa átum péñker

pujustinian Yuska ii uuntri Apraáman ju chichaman susamiayi. “Nekas tájame, ame shuarum akiiniáttana nujai ashí áentsnasha shiir awajsattajai’ tímiayi. Tura ii úuntriñ tímia núnaka incha túramji, tímiayi. ²⁶ Iimiata, Yus ni Uchirín iniantkimia nuí, atumin emka akupturmakmiarme. Atumsha, atumí tunaariya kanaktiarum tusa, tura atumin shiir awajtsatniun wak-erak túramiayi.” Nunak tímiayi Pítiur.

4

Pitruncha Juánnasha kajerkarmiania nu

¹⁻² Pítrusha Juanjai Yusa chichamen áentsun jintintiainiak pujuarmiayi. Jesus nantakin asamtai aencha nantaktin ániawai, tiarmiayi. Tura chichaak pujuiniaí Israer-patri táarmiayi. Tura Yusa Uunt Jeen wainniu úuntriñsha Satuséu aentcha táarmiayi. Taar Pitruncha Juánnasha kajerkarmiayi, niisha Jesusa nantakmiari chichaman jintintinia asamtai. ³ Yamaikia kíawai, kashin iismí tusar achik sepunam enkea iniaisarmiayi. ⁴ Tura Pitrun nuik anturkarmia nú aents untsurí Yus-shuar ajasarmiayi. Nuik Yus-shuaraim tura yamaiyaim iruram ti untsurí ajasarmiayi. Aya áishmankak, senku mir (5000) aents áirmiayi.

⁵ Kashin tsawarmatai Israer-shuara akupniuri, ni úuntriñsha, tura ni jintinniurisha Jerusarénum iruntrarmiayi. ⁶ Nuisha Anassha, Israer-patri uuntri anakiamu amia nu, tura Kaipiassha, Juansha, Arejantrusha, tura Israer-patri kapitiantri shuarisha tímian iruntrarmiayi. ⁷ Iruntrar Pitruncha Juánnasha utitiarum tusar akupkarmiayi. Tura itiar matai, ajapén awajsarmiayi. Tura aniasarmiayi “Kame ¿yana kakarmarijiaí, yana chichamejai túrarum?” tiarmiayi. ⁸ Tutai nuyá Pítiur, ni enentáin Yusa Wakaní pimi-utkamu asa tímiayi “Akupniutiram, tura úuntirmesha antuktaram. ⁹ Ju áishman nuik shutuap amia nu péñker ajasmari anintrarme. Kame itiurak péñker ajasuit táturmek. ¹⁰ Urukamtia úuktataj. Anintrakrumin iisha paant títiatji, Israernumia shuar ashí nekaawarat tusar. Ju áishman Jesukrístu kakarmarijiaí péñker ajasuiti. Nasarénumia Jesukrístun, átum máamurmena nuna, tura Yus jakamunmaya iniantkimiania nuna tajai, tímiayi. ¹¹ Nú Jesuska kayaa áintsanquete. Atumsha jeamniutiram, nú kaya yajauchiiti, tímiarme Jesusna. Túrasha túramaitatan Niisha jeanam emka apujsamua núnisan ajasuiti, tímiayi. ¹² Tura chíchichjai uwempratin penké atsawai. Ju nunkanam ii chikicha naari pachisar uwempratin atsaji. Jesuskete ii uwentikrampratniun Yus suramsamaj nu” tímiayi Pítiur.

¹³ Pítrusha Juansha nánkamas shuara áintsan áirmiayi. Núkap unuimiar-charu áirmiayi. Tura unuimiarchaitiat, arantutsuk etseriarmiayi. Aentsu uuntri núnaka nekaawar “Nékachuitiat, itiura sapijmiatskesha chichainia” tiarmiayi. Tura, jusha Jesusa namarin ármia núiti tiar nekaawarmiayi. ¹⁴ Nuyasha áishman péñker ajasmia nu nijiaí nuí wajamiayi. Tuma asamtai, niisha ai wajakui, Israer-shuara úuntriñkia, péñker ajaschaiti títai tukamá tujinkiararmiayi. ¹⁵ Tuma ásar, iik nuamtak áujmatsatai tusar, Pítrusha Juansha shutuapsha aa awemartai, tiarmiayi. ¹⁶ Tura áujmatainiak tiarmiayi “Ju Pítrusha ju Juansha iturkatjik. Ju uunt túrunamun Jerusarénum matsatainia nu ashí nékainiatsuk. Wáitaiiti titin tujintiaji, tiarmiayi. ¹⁷ Tura, ashí aents nekaawarain tusar yamaik jiaktai. “Ju Jesusa naari pachisrum penké jintintiarap,” titiai” tiarmiayi.

¹⁸ Tura árusan Pitruncha Juánnasha shutuapnasha ataksha untsukarmiayi. Tura chicharkarmiayi. “Jesusa naari penké áujmatsairap. Tura Jesusa túramuri penké jintintiarap” tiarmiayi. ¹⁹ Tutai Pítiur Juanjai áimkiarmiayi

“Enentáimpratarum. ¿Yus warinia wakera? ¿Iikia Yus umirtsuk atumí chichamen umirkatniukaitiaj? tiarmiayi. ²⁰ Nekaatarum. Iisha ísjinia nu, tura antukjinia nusha ii etsertsuk pujustin tujintiaji.” Tu áimkiarmiayi.

²¹⁻²² Shutuáp péñker ajasmia nu kuarenta (40) uwí nankaamas takakuyayi. Ni péñker ajasmarin aents nekaawar, “júka aentsti túrachminiaitji” tusar Yusa naarin uunt awajsarmiayi. Tuma asamtai aentsu uuntri Pitruncha, Juanasha asutiátai tukamá aentsun ashamainiak áyatik chicharkar iniaisarmiayi.

Yus-shuar Yusa kakarmarin seawarmiania nu

²³ Pítiur Juanjai ankant ajarar ni írutramuriin waketkiarmiayi. Tura jeawar Israer-patri uuntri tura aentsu úuntrisha nin tiarmia nuna mash etserkarmiayi. ²⁴ Nu ujakam antukar métekrak Yúsan áujuk tiarmiayi “Winia Uunt Yusru, Amesha nayaimpisha nunkaasha najanaitme. Nayaantsasha tura jui írunna nusha najanamiamé, tiarmiayi. ²⁵ Tura Tawit ámin umirtamin amia nu ju áamtikramiamé:

“¿Urukamtai ashí nunkanmaya aents charaatum ajainia? ¿Tura Israer-shuarsha urukamtai ántar chichaman enentáimiainia?

²⁶ Uunt kapitían ármia nuka chichaman jurusarmiayi Uunt Yúsan.

Tura pepru úuntrisha iruntrar Uunt Yúsan kajerarmiayi. Ni anaikiamurin Krístun nútiksañ kajerarmiayi.”

²⁷ Tu áarmaiti, Uunta, tura nekasaiti. Erutis apachi kapitíantri Punsiu Piratujai jú péprunam iruntrararmiayi. Niisha yajaya shuarjai tura Israernumia shuaraim nuim iruntrararmiayi. Ame Uchirmin Jesusan tunaarinchán kajerarmiayi. Jesuska Ame anaikiamiamé, winia takatrun túrat tusam.

²⁸ Tura ame enentáimjai iwiamamna nu uminkiatniuiti. Tura apachcha Jesusan kajerainia ásar, Ame iwiamamna tímianak umikiarmiayi. ²⁹ Uunta, iisia kajertamainiaj nu. Jes, Áminiu asakrin áujmatramtsujik. Túmaitkuisha ame chichamem ii ashamtsuk etserkatin ame kakarmaram amasta. ³⁰ Tura ame kakarmarmijjai jaasha tsuártin amasta. Ame Uchiram Jesus tunaarinchá nujai ii aentsti túrachmin túratniusha amasta. Aents Yusa kakarmarin nekaawarat tusam túrata” tiarmiayi.

³¹ Tura Yúsan tú áujas umikmatai nuin irunar pujuiniajn úurkamiai. Túrunamtai ashí shuara enentáin Yusa Wakaní pimiutkarmiayi. Túmaitkiui ashamtsuk Yusa chichamen etserkarmiayi.

Wíniakete, tícharmiania nu

³² Yus-shuar ajasarmia nu, ti untsuritat, ashí chikichík enentainiak enentáimainiak, ni takaku armia nuna, aya wíniakete tútsuk, júsha ashí iniini ainiawai, tiarmiayi.

³³ Tura Jesusa akatramurisha, Yus ti yayamu ásar, Yusa kakarmarjijai Uunt Jesusa nantakmiarín tuke etseras pujuarmiayi. ³⁴ Tura ashí Yus-shuarka nunkan takakusha jeañ takaku armia nusha, núnaka surukar kuítian itiararmiayi. ³⁵ Tura itiaar Jesusa akatramurín súarmiayi. Akatramusha susam, niisha atsumainia nuna súarmiayi. Tuma asamtai shuar atsumaka penké atsuarmiayi. ³⁶ Chikichík shuar, ni naari Jusé, nunkan takakuyayi. Jesusa akatramurisha Jusén chikich náarin apujtusarmiayi, Pirnapín. Nu náarisha, shiir enentáimtikkiartin tawai. Tura Pirnapísha Riwi áentsuyayi. Tura ni akiiniamuri núñkenka Chípriiyayi. ³⁷ Niisha ni nunken surukmiayi. Tura nu kuítian itía Jesusa akatramurín súarmiayi.

5

Ananiasa tunaari

¹ Tura chíkich áishman, ni naari Ananías, ni nuwe Sapirjai ni nunken surukarmiayi. ² Niisha nunkan suruk kuítian emeenak akanak jukí Jesusa akatramurin werí takamtsukea nútikias susamiayi. Ni nuweshá, Sapir, nuna túran nekaamiayi. ³ Túramtai Pítiur chichaak “Ananíasá, ¿urukamtai uunt iwianch enentáimin enkemturmatai, Yusa Wakanín anañkataj tusam nunka surukam kuit achikumna nu akankam ikiurmasam? tímiayi. ⁴ Entá, nuñkia nunka áminiuchukait. Surukumna nu kuitcha áminiuchukait. Nusha, ¿urukataj tusamea tu enentaímprom? Amesha aya áentsnum wáitruachume. Antsu Yus-numsha wáitruame” tímiayi Pítiur. ⁵ Tutai Ananías nuna antuk nú chichamaik jakamiayi. Tura ashí shuar nuna antuk nekaawar ti ashamkarmiayi. ⁶ Nú turunamtai áishman tariar Ananías jakan penuararmiayi. Túrawar iwarsatai tusar júkiarmiayi.

⁷ Tura Ananíasá nuwe arur, menaintiú ura nankaamasai támiayi. Túrashá ni áishri jakanka nekaachmiayi. ⁸ Támatai Pítiur nuwan tímiayi “Turuttia. Átum nunka surukurmena nuí, ¿kuit itiarumna núnikik surukuram?” tímiayi. Tutai nuwá tímiayi “Ee, núnik surukji.” ⁹ Tutai Pítiur tímiayi “¿Urukamtai atumsha Uunt Yusa Wakaní nekapkamsatai tusarum imiá enentáimprarum? Pai, iisiá. Ame áishrumin iwarsatai tusar júkiaria nu wininiawai. Tura yamaikia amincha juramkiartatui” tímiayi. ¹⁰ Tutai nu chichamaik niisha imia Pitru wajamunam jaka iniaantmiayi. Aishman wayaj tukamá jaka tepan wáinkarmiayi. Túramtai júkiar ni áishrinin ayamach iwarsarmiayi. ¹¹ Tura ashí Yus-shuar armia nu tura ashí aencha nuna antukarmia nu ti ashamkarmiayi.

Yusa kakarmarijai túrawarmiania nu

¹²⁻¹⁴ Tura ashí Yus-shuar Yusa Uunt Jeen shikirijn irunin ármiai. Nu shikirisha, Sarumúnna, tu anaikiamuiti. Tura chíkichmamtinkia nuim iruntratniun ashamiarmiayi. Túmainiyatan, ti péñker áiniawai, tu wearmiayi. Tura Yus-shuar Yusa kakarmarin iniakmasarmiayi. Túra asamtai imiá untsurí aents Yus-shuar ajasarmiayi. ¹⁵ Tura chíkich aents ni shuari jainia nuna jintiá amamtikiarmiayi. Peakjai júkiar, tampunmasha enkeawar júkiar jintiá ayamach áepsarmiayi. Pítiur nankaamak ni wakaninsha enkemprutmawainti tusar nu shuar túrawarmiayi. ¹⁶ Núnisan arantiá shuarsha ti untsurí ni shuari jáinian tura iwianchrunkuncha nuí Jerusarennum itiararmiayi. Tura ashí nuí táaruka tsuámararmiayi.

¹⁷ Israer-patri uuntri, tura Satuséu aencha niijjai pujuarmia nu suiir iiniak ¹⁸ Jesusa akatramurin achikiar enkeawarmiayi. ¹⁹ Túrashá kashi Uunt Yusa suntari nayaimpinmaya tara sepú wáitirin uraimiayi. Tura Jesusa akatramurin aa júkiarmiayi. ²⁰ Tura tímiayi “Wetarum. Tura Yusa Uunt Jeen wajasrum Yusjai tuke iwiaaku átinia nu etserkatarum” tímiayi.

²¹ Nuna antukar kashin tsawar káshik Yusa Uunt Jeen wayawar jintintiawarmiayi.

Nu túmainiai Israer-patri uuntri, tura niijjai pujuarmia nusha iruntrarmiayi. Tura Israer-shuara uuntri, naamka armia nuna iruntrami tusa untsukarmiayi. Ashí iruntrar akatar akupkarmiayi, Jesusa akatramuri sepunmaya itiatarum tusar.

²² Tura suntarsha sepunam jeariar Jesusa akatramurin wáinkiacharmiayi. Atsawai tukam táarmiayi. ²³ Taar chichainiak “Sepú waiti asakamua tímianisan aa wáinkiaji, tiarmiayi. Tura suntar wáitin iimpru wajainia wáinkiaji. Tura waiti urair wayaj tukamar atsá wáinkiaji” tiarmiayi.

²⁴ Israer-patri uuntri, tura Yusa Uunt Jeen wainniu úuntrisha, nu chichaman antukar, “tsej ausha ¿urutiak nunasha iniaisarat?”

tiarmiayi. ²⁵ Nu chichamaik áishman̄ taa tímiayi “Aishman̄ átum sepunam en̄keamarmena nu, Yusa Uunt Jeen wajasar áentsun jintintiuk pujuiniawai” tímiayi.

²⁶ Túrunamtai Yusa Uunt Jeen wainniu uuntrī ni suntarijijaī wear achik itiarimiayi. Túrasha pen̄ké aents kayajaī tukurmaraj̄j tusar, yajauch awajtsuk itiarimiayi. ²⁷ Tura achik itiaar Israer-shuar naamka pujamunam naka awajsarmiayi. ²⁸ Tura Israer-patri uuntrī tímiayi “Iisha atumin chicháa chicharu awajsar, Jesusa naarī pachisrum etserkairap tusar akupkachmakajrum. Túrasha, ¿antukurmek? Atsá. Mash Jerusaren̄num átum etserkamu pampankai. Jes, átum, Jesusan máawarai, in tátsurmek. Nusha in makuutai tusarum tárume” tiarmiayi.

²⁹ Nuyá tutai Pítiur chíkich Jesusa akatramurijjaī chichainiak “Iikia aentsjainkia inian̄kasar Yus emka umirkatniuitji, tiarmiayi. ³⁰ Jesus atumek krúsnum máamurmena nuna ii iwiaaku Yusrī Nin iniantkimiayi. ³¹ Yus ni kakarmarijijaī Nin nan̄kaamantu awajsamiayi. Tura nekas Akupniuiti tusa ni untsuurin̄i apujsamiai. Tura áentsun Uwemtikniuiti. Israer-shuar enentái yapajíáwar tunaariniá uwemprarat tusa Yus túraiti. ³² Nu tuma asamtai iisha nu nekaar étsereaji. Tura Yusa Wakanísha nuna étsereawai. Túrasha aya Yusa umirkarua nunak ni Wakanín súsaruiti” tímiayi Pítiur.

³³ Tutai nuna antukar ti kajerkarmiayi. Túrawar, maatai tusar wakeriarmiayi. ³⁴ Tura nū Israer-shuara uuntrī pujumiayi, ni naarī Kamarír. Niisha Pariséunam páchitkiauyayi. Tura akupeamun jintinniuriyayi. Túmakui ashí aents nin shiir enentáimtin ármiai. Tura niisha wajaki tímiayi “Jū áishman̄ āa ishichik wajasarti” tímiayi. ³⁵ Nuyásha irunar matsamarmia nuna chicharuk “Israer shuartiram, jū áishman̄ tú túratai tu enentáimsarumna nu aneartarum. ³⁶ Enentáimsatarum. Nuik áishman̄ Tiútas wantinkiachmakia. Niisha kapi-tiániitjai takui, kuaru siántu (400) shuar nemarkarmiayi. Tura ukunam nin maawarmatai, ni némarkamurísha pisararmiayi. Túrunawar nuní amuukamiayi. ³⁷ Ukunmasha, iruntrar nekapmartin tsawantincha Kariréanmaya Jútas wantinkiachmaka. Tura nincha nútiksañ ti untsurí nemarkarmiayi. Túman máawarmiayi. Nu túrunamtai nútiksañ ni némarkamurísha pisararmiayi. ³⁸ Jes, tuma asamtai nu áishman̄ āa wajainia nu iniaisatarum. Auka pachisairap. Au tumainia nu aya áentsnaketkuin̄kia amuukattawai. ³⁹ Tura antsu Yúsnaikkuin̄kia atumsha amuktai tukamarum tujinkiattarme. Aneartarum. Iniaiyachkurmeka nu tumá pujusrum Yusjaī máanikchattarmeash” tímiayi Kamarír.

⁴⁰ Tú tutai tímianak umikiarmiayi. Túrasha Jesusa akatramurin̄ untsukar asutiáwarmiai. Tura chicharuk “Jesusa naarī pachisrum pen̄ké ishichikisha etserkairap” tiarmiayi. Tú tiar akupkarmiayi. ⁴¹ Jesusa akatramurísha Israer-shuara uuntrī pujamunmayā jínkiarmiayi. Tura wáitsamniaitrume tusa Yuska Jesusa naarī pachia asakrin̄ ii natsantin wáitsatniun tsan̄katramkaitji tusar ti shiir enentáimsar wearmiayi. ⁴² Tura Jesukristunun áujmatsatniun pen̄ké iniaisacharmiayi. Antsu tuke tsawant Yusa Uunt Jeencha tura chíkich jean̄masha páchitsuk etseriarmiayi.

6

Yus-shuaran yainian siati anaikiarmiania nu

¹ Nú tsawantin Yusan umirkaru ti kawen̄kar ármiai. Tura tuke tsawant yurumak súsatin ámiayi. Túmakui Yus-shuar Kriaku chichaman chicharmia nu, Israer-shuaran kajeriarmiayi. “Tuke tsawantin yurumak súarmena

nui atumí waje ti nukap súarme. Tura íniuka ishichik súarme” tiarmiayi. ² Túruinia Jesusa tuse akatramurí ashí Yus-shuaran irurar tiarmiayi “Iisha Yus-Chicham etserkatin iniaisar yurumak súsachminiati. ³ Tuma asantai yatsurtiram, atumíniá siati áishman eáktárum yurumkan súsarat tusarum. Péñker wekainia nu, tura neka shuar, Yusa Wakaní pimiutkamu ainia nu achiktarum. ⁴ Iikia antsu Yus áujkir unuiniakratkir Yusa chichame etserkir wétatji” tiarmiayi. ⁵ Akatramu tiarmia nuna ashí aents enentáimsar pujuarmiayi. Túmainiak Estepañkan anaikiarmiayi. Estepañsha Yúsan tuke enentáimtiniuyayi. Tura Yusa Wakanísha pimiutkamuyayi. Chíkich áishman kan anaikiarmiayi, niisha Jiripi, tura nuyá Pুরুkuru, Nikianúrsha, nuyá Temuñ, Parmenasha, Nikiurássha. Nikiurássha Antiukía nun kanmayaitiat Israernancha ashí umirniuyayi.

⁶ Tura nu siati áishman kan Jesusa akatramur in itiararmiayi. Táarmatai, akatramusha, Yus áujtusar, anaikaji tusar múuknumsha ni uwejen awantsarmiayi. ⁷ Túrasha Yusa chichamenka tuke pampankí wémiayi. Nui Jerusaréñnumsha Yus-shuar ti kawen karmiayi. Tura imia Israer-patrisha untsurí Yus-Chichaman umiriarmiayi.

Estepañkan Israer-shuara uuntri in júkiarmiania nu

⁸ Estepañsha Yusa waitnenkartutairi pimiutkamuyayi. Tura Yusa kakarmarisha pimiutkamuyayi. Tuma asa aentsti túrachminian shuar írunmanum túramiayi. Nu shuar Yusa kakarmar in nekaawarat tusa túramiayi. ⁹ Israer-shuar iruntai jea, ni naari Ankantín, ámiayi. Nuyá áishman sha tura Serini nun kanmaya áishman sha, tura chíkich nun ka Arijiantrianmayasha, Serisianmayasha, Ásianmayasha, tímian Estepañjai áujmatsatai tusar káutkarmiayi. ¹⁰ Estepañ Yusa Wakaní nekatairijiai tímianak chicháa asantai, nu áishman Estepañjai inkiunaikiar nupetkataj tukamá tujinkiar miayi. ¹¹ Tuma asantai suiir enentáimtuiniak chíkich áentsun Estepañkan tsanumprurarat tusar eá karmiayi. Estepañ Muisaisnasha Yúsnasha yajauch áujmatui, titiarum tusar akikiarmiayi. ¹² Penké áentsun, tura uunt ainia nunasha, jintintin ármia nujai sha chichaman júsar yajauch enentáimtikrarmiayi. Tura Estepañkan jintiá akirtuawar achikiarmiayi. Túrawar Israer-shuar naamka matsamarmia nui júkiarmiayi. ¹³ Tura wait chichamtinian itiar miayi. Niisha taar chicharainiak “Yusa Uunt Jeen ti péñker ana nu, tura Yusa akupkamur incha ju Estepañ tuke yajauch chicharui, tiarmiayi. ¹⁴ Nú arantcha ju Estepañ tímia nu antukji, tiarmiayi. Estepañ chichaak “Nasarénumia Jesuska Yusa Uunt Jeen sáaktiatui, tura nuyá Muisais in ikiurtamkimiaj nunasha yapajiáttawai” tímiai. Nusha Estepañ tímia nu antukji” tiarmiayi. Tura nunasha penké ántar tsanumprurarmiayi.

¹⁵ Nuyasha ashí Israer-shuar naamka iruntramunam pujuarmia nu Estepañkan iiyaj tukamá ni yapin nayaimpinmaya suntara yapiya nuní íran wáinkiar miayi.

7

Estepañ etserkamiania nu

¹ Tuma wáiniak Israer-patri uuntri Estepañkan aniasmiayi “¿Ju tuinia nu nekaskait?” tímiai. ² Tutai niisha áimkiarmiayi “Winia úntrutirmesha, yatsurtirmesha anturtuktarum. Ii Waantu Yusri ii úntrín Apráaman wantintiukmiayi. Apráamka Misiuputámia-Kartea nun kanam pujai, Aran nun kanam wéatsain, nui wantintiukmiayi. ³ Tura wantintiuk tímiai “Ame nun kemsha áminiurmesha ikiukim nun ka Wi iniaktustatjamena nui wetá” tímiai Yus.

⁴ Tutai Apraám Misiuputámia-Kartea nunkan ikiuki Aran nunkanam pujustaj tusa wémiayi. Nuyá ni aparí jakamtai “Arant wetá” tímiayi Yus. Nuna taku ju nunkan ii pujajnia juí pujsamiayi. ⁵ Túrayat nunkan ishichkisha súdachmiayi ju nunkanam. Antsu “Ukunam amastajai. Ame jakakmin ame uchirmin susattajai” tímiayi. Tura Apraama uchirí penké atsan nuní tímiayi Yus. ⁶ Nuyasha Yus tímiayi “Ame uchirmesha írara núnisan chíkich nunkanam pujusartatui. Nuisha emetamu itit awajtai pujuartatui. Kwatru siántu (400) uwí, tímianu uwí wáitsartatui, tímiayi. ⁷ Túrasha, Wi asutiáttajai ame shuárumin wáitkia núnaka, tímiayi. Túram nuyá nú nunkanmaya shiákartatui. Tura Winia enentáimtursartatui jú nunkanam’ tímiayi. ⁸ Yus tuke Apraámnasha chicharuk ‘Yamaikia Wíi-shuar asarum tsupirnaktiniaitrum. Tuma asam amesha uchiram áishmankach akiiniamtai, Wi tímiajna núnismek, sirkunsisiún tutai, shunichirí nuape tsupirkata, tímiayi. Tura chícham Wi yamaikia ámijiai najanaj nu nekas uminkatniuiti tusam nusha túrata” tímiayi Yus. Tuma asamtai ni uchirí Isak akiiniamtai, uchu tsawant nankaasmatai, Apraám nin tsupirkamiayi. Tura Isaksha ukunam ni tuse (12) uchirín ii uuntri armia nunasha nútiksán túramiayi. ⁹ Tura niisha ni yachín Jusén suiir íiyarmiayi. Túmainiak Ejiptu nunkanam júkiarat tusar surukarmiayi. Túrasha Yus némarkauyayi. ¹⁰ Tuma asa, ashí ni itiurchatrinia uwentikramiayi. Tura waitnenkartutairincha nekatairincha susamiayi. Tuma asamtai Ejiptunam uunt akupin Paraún Ejiptu nunkaa akupniurí ajasat tura ni jeen wáinniurí ajasat tusa anaikiamiayi.”

¹¹ ‘Tímiatam tsuka tura itiurchatcha ámiayi Ejiptu núkanam. Tura juí Kanaan nunkanmasha núnisan ámiayi. Tuma asamtai ii uuntri yurumkan penké wáincharmiayi. ¹² Tura Jakup, Ejiptunam yurumak ikiusma awai taman antuk ni uchirín akupkarmiayi. Túrasha wekaicha wearmiayi. Wats, ii úntrininiun ujaajrume. ¹³ Tura ii uuntri atak Ejiptunam wéenak Jusesha, wíitjai takui ni yachí Jusén nekaawarmiayi. Tura Jusé “Yatsur ániawai” takui Paraún, antuk “au shuarapitia” tímiayi. ¹⁴ Nuyanka Jusé ni yachín chicharuk “Apar itiatarum uchirtuk” tímiayi. Nu shuarsha untsurí, setenta senku (75) matsamarmiayi. ¹⁵ Nuní tutai Jakupsha ni shuaríjjiai Ejiptunam pujustai tusar wearmiayi. Tura ukunam nú nunkanman jakamiayi. Tura ni uchirísha ii uuntri ainia nu, núnisan nú nunkanman jákarmiayi. ¹⁶ Tura atak ukunam ni shuarí Sikiam nunkanam ni ukunchín júkiar iwiarsarmiayi. Kame Sikiam nunkanam Apraámka yaunchu játsuk Amura uchirí nunken sumakmiayi. Túramtai nuí iwiarsarmiayi’ tímiayi.

¹⁷ ‘Yus, Apraáman chicharuk “Nekas wi susattajme” tímiania nú tsawant jeatemamtai, Ejiptu nunkanam Israer-aents pampanki tí kawenarmiayi. ¹⁸ Nu tsawantincha Ejiptunam chíkich akupin naamka ámiayi, tura Jusén nekaachmiayi nii. ¹⁹ Nu akupin ii yaunchu úntrin anankawar yajauch awajarmiayi. “Atumí uchirí kuírchich ana nu ajapa ikiuktiarum” tu wémiayi. Pampankarain tusa tímiayi. ²⁰ Tiri iniaisamunam Muisais akiiniamiayi. Muisaisnaka Yus shiir enentáimtimiai. Tura ni nukurí menaintiu nantu takusmiayi. ²¹ Tura nuyá ajapa ikiuktin jeamtai entsá apujsamiayi. Uunt Paraúnka nawantri Muisaisan wainiak jukimiayi. Achik, ni uchirínia tímiatrusan júki tsakatmarmiayi. ²² Tuma asa Muisais unuimiátrauyayi ashí Ejiptu aents nékarmia nuna. Túramurísha chichamesha kakarmauyayi.’

²³ Estepan tuke étseruk juna tímiayi: ‘Nuyá Muisais kuarenta (40) uwí takaku asa Israer áentsun iyutaj tusa wakerimiayi, ni shuarí asamtai. ²⁴ Nuyá we Ejiptunmaya áishman ni shuarín máatasa pujurun wáinkiamiayi. Tura Muisais ni shuarín ayamprak Ejiptunmaya áishmankan máamiayi. ²⁵ Wíi tu-

ramujaj Yuska Israer-aentsun uwentikrattawai, tu nekaamiayi Muisais, Yus timia asamtai. Tura Israer-aencha áintsaran nékainiawai tu enentáimsamiayi. Túrasha nin_{ki}a nekaacharmiayi. ²⁶ Kashin tsawar Muisais ni shuari jímiar maani pujuinian wáinkiamiayi. Tura nawamnaikiarat tusa “¿Urukamtai nuamtak yatsumjaisha yajauch awajniarum?” tímiayi. ²⁷ Tutai emka nan_{ka}ama nu Muisaisan kárut shitiá “¿Ya amincha ii akuptamin tura ii chichartamin anaitiamkamam? ²⁸ ¿Winiasha maantuátaj tusam wakeramek, ya Ejiptunmaya áishman máamamna nútiksamkea?” tímiayi. ²⁹ Nuna antuk Muisaiska Matian nun_{ka}nam pisar, nú nun_{ka}nam kuarenta (40) uwí yajaya áintsan pujumiayi. Nú nun_{ka}nam pujus, nuatak, jimiará uchin yajutmarmiayi.’

³⁰ ‘Kuarenta uwí nan_{ka}amas, nu atsamu nun_{ka}nam Senai náinnium tíjiuch Yusa suntari nayaimpinmaya taa Muisaisan wantintiukmiayi. Numi uchich ukat-ukatin keamunam wantinkiamiayi. ³¹ Muisais, nuna kean wainiak ashamkamiayi. Tura weantuk iistaj tukamá Uunt Yusa chichamen antukmiayi. ³² Yus tímiayi “Wiitjai Yus. Ame úuntrumi Apráama Isaka, Jakupa Yúsrintjai” tímiayi. Tutai antuk Muisaiska ti kuraimiayi sapijin. Tura íistinian tujinmiayi. ³³ Nuyá Uunt Yus tímiayi “Úuntrun shiir awajsataj tusam, ame sapatrum ukuinkiam ikiuktia, wajamna nui Wi pujakui. ³⁴ Nuyá nekaata, tímiayi. Wíi-aents Ejiptunam wáitias pujuinia nuna wáinkiajai. Tura úutainia nunasha antukjai. Tuma asamtai uwentikrataj tusan tarajai. Wats, akupkatjame ámin. Ejiptunam waketkitia” Yus tímiayi Muisaisan.’

³⁵ Estepan tuke étseruk: ‘Ju Muisaisan ni shuari “¿Ya amincha ii akuptamin tura ii chichartamin átinniasha anaitiamkamam?” tiarmia nuna Yuska akupniun anak uwentikrarat tusa awain_{ki} akupkamiayi. Numiniam ni suntari wantintiukmia nuna chichamejai Yuska Muisaisan akupkamiayi, tímiayi. ³⁶ Muisaisaiti Israer-aentsun Ejiptunmayan uwentikramia nu. Yusa kakarmarin nekaawarat tusa, aentsti túrachminian untsurín túramiayi Ejiptu nun_{ka}nam. Nuyá Kapaantin Nayaantsanmasha, tura nuyá kuarenta (40) uwitin atsamunam pujuiniaisha ti kakarman iniaktusmiayi. ³⁷ Jú Muisaisak Israer-shuaran chicharuk “Atumíinianak etserniun Yus ukunam anaikiattawai, winia anaitiukma áintsan. Tuma asamtai nu shuarsha umirkamniuram” tímiayi. ³⁸ Jú Muisais Israer-aentsjai atsamunam pujumiayi. Senái nainnium Yusa suntari níjiaisha pujumiayi. Tura Muisaiska ii úntrijjai pujumiayi. Níiyaiti iwiaaku pujustin chichaman sunasmia nu. In ujatmaktinian sunasmiai.’

³⁹ ‘Túrasha ii yaunchu uuntri Muisaisan umirkatniun nakitiarmiayi. Áaniuk imiá umirtaint tusar Ejiptunam waketkitniun wakeriarmiayi. ⁴⁰ Túmainiak Muisais Yusjai chichastajtsa murá wématai nu shuar Muisaisa yachin Arun_{ka}n tiarmiayi “Ii yusrí najanató, ii nemarsatin. Áaniusha Muisaissha Ejiptunmaya in juramkiyatcha tútsuk weruma” tiarmiayi. ⁴¹ Nuyá wáakachia áaniun najanawarmiayi. Túrawar, júiti ii yusrí tusar, kuntinian maantuawarmiayi, nu susatai tusar. Tura ni uwejejai najanamun íisar ti wararsarmiayi. ⁴² Nuna túruinian wáiniak Yus, iniaisajai taku, niia_{ya} kanakmiayi. Nii wakerak yaan tikishmatrarti, tímiayi. Tuma asamtai, yaunchu Yusa etserniuri juní áarmiayi:

“‘Israer-aentsu, kuarenta (40) uwitin atsamunam wekaimiarmena nui, ¿Winiak kuntin maanturtuamarum? Winia surustai tusarum pen_{ke} túrachurme, tímiayi Yus. ⁴³ Antsu, Muruk naartin ántar-yusa pujamurin jukimiarme. Tura chíkich ántar-yussha, ni naari Rempan, yaa áanin najanarum nusha jukimiarme. Júkin asakrumin atumí nun_{ke}ya jukin, tímiai Papirúnia nun_{ka}n nan_{ka}iki akupkatjarme” tímiayi Yus.”

Nuní áarmaiti' tímiayi.

⁴⁴ Estepañ tuke étseruk: 'Yus Muisaisan tímiayi "Wi akupeamu chicham ikiunsatin jeá áaniun Wi iniaktusjamna tímiatrusmek atsamunam najánatá" tímiayi. Tutai Muisais Yus tímianak umikmiayi. Nu jean ii uuntri yaunchu takaku áarmiayi. ⁴⁵ Nu jean ni uchiri akintkiar akintkiar wearmiayi. Ukunam, jú nunka achiktin jeamtai, Yuska kapitián Jusuejai jú nunkanmaya aentsun jiki akupkarmiayi. Tura ii uuntri kapitián Jusuejai winiarmianu, nu jeancha jú nunkanam itiarimiayi. Tura Tawit uunt akupin náamtsain, ii úuntrisha nu jean takaku áarmiayi. ⁴⁶ Kame Yus Tawitian yájau enentáimtichmiayi. Tuma asamtai Tawit Yus shiir pujustinian jean jeamtinian seamiayi. ⁴⁷ Túrasha antsu Tawitia uchiri Sarumún Yusa jeen jeammiayi. ⁴⁸ Túrasha aents jeammanuman Uunt Yus pujuschamniaiti. Jes, yaunchu Yusa etserniuri Yus tímia nuna áarchamkia. ⁴⁹ Juna áarmiayi: "Nayaimpikia winia pujutairuiti. Nunkanmasha nawer tarimiui.

¿Warí jea najatruatai tusarme tarum? tímiayi Uunt Yus.

Tura Wi ayampratniusha, ¿túi aa?

⁵⁰ Wiki winia uwejrujain ashí najanachmakiaj" tímiayi.'

⁵¹ Estepañ tuke étseruk: "Tura átumka Israer-shuartirmeka atumí enentáijiai tuke umichuitrume. Atumí kuishisha weaktsui tura Yus nékachua núniniaitrume. Yusa Wakaníjiaisha tuke nemasnaikiaitrume. Tura atumí yaunchu úuntriijiai métek túrarme' tímiayi.

⁵² 'Isia, atumí úuntrisha Yusa etserniurin tuke kajerin áarmiayi, tímiayi. Tura nú arant atumí úuntrisha Tunaarincha tátatui tu etseru wekaan, máacharmakia. Jes, nútiksarmek yamaisha, Tunaarincha támania nusha atumek anankarum máachmakuram, tímiayi. ⁵³ Tura Yusa suntari nayaimpinmaya Yusa chichamen susamuitiatrum atumsha penké umikchamarme" tímiayi Estepañ.

Estepañka jakamuri

⁵⁴ Israer-aencha Estepañ tu chichaamu antukar imiá kajerkar nain kátetete awajiarimiayi. ⁵⁵ Tura Estepañsha imiá Yusa Wakaní pimiutkamuyayi. Tuma asa nayaimpinmaani íimias, Yusa wincharin, tura Yusa untsuurinini Jesusan wajan wáinkiamiayi. ⁵⁶ Tumá wániak Israer-áentsun tímiayi "Núá íiskua, nayaimp uranniun wáinjai. Tura Jesusan, Aents Ajasu tutaiya nuna Yusa untsuurinini wajan wáinjai" tímiayi. ⁵⁷ Támaiat niisha kuishin akiriarmiayi, tura achiktai tusar charáa tiar ashí wajakarmiayi. ⁵⁸ Túrawar, péprunmaya arant júkiarmiayi. Tura antuk etserkarmia nu pushirin áikiar, natsa Sauru wajamunam au iisti tusar áeprusarmiayi. Tura máawartai tusar kayajai tukurarmiayi Estepañkan.

⁵⁹ Tura Estepañka tukamaitiat Yúsan áujsamiayi. Tura áujuk "Uuntru Jesúsá, winia wakantrusha jurutkitia" tímiayi. ⁶⁰ Tura tikishmar áujuk "Uunta, ju winia túrutainiana ju makuip" tímiayi. Tura nuna ti iniais, jakamiayi.

8

Sauru Yus-shuaran kajerkarmiania nu

¹⁻² Estepañkan máawarmatai Sauru, péngeraiti, tímiayi. Tura áishman Yúsan pénger enentáimta armiania nu, Estepañka ayashincha iwiarsarmiayi, tura aneenak ti uutiarmiayi. Tura nú tsawantai Yus-shuaran Jerusarénum pujuarmia nuna ti kajerkatin nankamnamiayi. ³ Sáuruka Yus-shuaran kajerak ti pataat wémiayi. Túmak nuí jeá wayá, nuí wayá áishmannasha nuwancha

wáinkianka japiki jukí sepunam enkeataj tusa túrimiayi. Tumakui Yushuar Jerusarénumiã pisarar Jutía nunkanam, tura Samaria nunkanmasha jeawarmiayi. Jesusa akatramurĩnkia antsu Jerusarénuman juakarmiayi.

Samaria nunkanam etserkarmiania nu

⁴ Túrasha Jerusarénumiã aents pisararmia nu, arant wénaksha tuke Yusa chichamen etserkini yujarmiayi. ⁵ Tura Jiripi Jerusarénumiã we tura chikich péprunam Samaria núnkam amiania nu jeá, chichaak “Yus anaiki-
amu ana nu Jesusaiti” tu etsermiayi. ⁶ Túrakui aents iruntrar chikichik enentáijjai Jiripi étsereamun titiú pujusar antukarmiayi. Yusa kakarmarin nekaawarat tusa aentsti túrachminian túrimia nunasha wáiniarmiayi. ⁷ Ti untsurí aents iwianchruku ármia nuna Jiripi nu iwianchin jirki akup-
tiarmiayi. Tura íwianch jíiniainiak kakantar charáa tiar jíiniarmiayi. Tura ti untsurí emearusha shutuapsha péñker ajasarmiayi. ⁸ Tuma asamtai nú péprunmayańka ashí shuar ti warasar pujuarmiayi.

⁹ Tura nú nunkanam uwishin Semun pujumiayi. Nuikkia wi ímianaitjai tusa Samarianmaya aentsun ananniuyayi. ¹⁰ Tuma asamtai ashí aents úmamkesar uchichisha, uuntcha, nin anturiarmiayi. Tura tiarmiayi “Ju Semunsha Yusa kakarmarijiai áitkiawai.”

¹¹ Tura ti untsurí uwí wawekratmarijiai anankarta asamtai, umirkarmi-
ayi nu aents. ¹² Túrasha Jiripi Yusa akupeamurin, tura Jesukristununcha shiir chichaman etserkamiayi. Tura, nuna antukar nuwasha áishmansha umikiar imian wearmiayi. ¹³ Semunsha imia uwishniuitiat Yus-Chichaman enentáimtus imianmiayi. Tura Jiripijiai tsanin wekaimiayi. Yusa kakarmarin shuar nekaawarat tusa Jiripikia aentsti túrachminian túrimiayi. Nuna wáiniak Semun ti enentáimsamiayi.

¹⁴ Tura Jesusa akatramurisha Jerusarénum pujuarmia nu Samarianmaya aents Yusa chichamen umirainiawai taman nekaawarmiayi. Tuma asamtai Pitruncha Juánnasha nekáa ikiuutarum tusa akupkarmiayi. ¹⁵⁻¹⁶ Tura Samarianmaya Yushuarsha aya Uunt Jesusa náarin imianiarmi-
ayi. Yusa Wakanĩnkia tárachmiayi. Tuma asamtai Pítrusha Juanjai nu jeawar Samarianmaya Yus-shuara enentáin Yusa Wakaní pimiutkarat tusan Yusan áujtusarmiayi. ¹⁷ Tura áujtua umikiar Pítiur Juanjai ni uwejen nú Yus-shuaran awantsarmiayi. Nuinkia Yusa Wakaní taramiayi.

¹⁸ Jesusa akatramurí uweje awasmanum Yusa Wakaní taramtai, Semunsha nuna wáiniak, kuitjai nu kakarman sumaktaj, tímiayi. ¹⁹ Tura Jesusa akatramurin chicharuk tímiayi “Winiasha kuitjai surustarum nu kakaram. Wisha nútiksanak nánkamas aentsnum winia uwejur awantsam Yusa Wakaní tarurat tusan tajai” tímiayi. ²⁰ Tutai Pítiur tímiayi Semunkan “Ámeke kuítrumjai métek menkakatniuitme. Warí, Yus amaana nu ¿kuitjai sumaktinkiait? ²¹ Yus esetram enentáimtachu asam nu túramu pachistincha penké tujinkiamé, tímiayi. ²² Enentáimprata. Túram Yus seata. Enentáimtamna nuna Yus tsankurtamprashtimpiash. ²³ Nékaime, tsaankea áintsan yapá enentáimin pimiutramkaiti. Tura tunaarmijn jinkiamua núniniaitme” tímiayi.

²⁴ Tutai Semun áimkiamiayi “Uunt Yus aujtursatarum. Túrutrumna nuna túrunawaj tusan tajai” tímiayi. ²⁵ Nuyasha Jesusa akatramurí Jesusa túramurin nú áentsun ujakarmiayi. Tura wésar Samaria nunkanam pepru ámunmanka Yus-Chichaman nu etserkiar, nu etserkiar Jerusarénum waketkiarmiayi.

Jiripi Yus-Chichaman etserkamiania nu

²⁶ Tura Yus ni suntarin nayaimpinmayan Jiripincha akuptukmiayi. Niisha chicharuk tímiayi “Wátskea. Juyá jinkim Jerusarénumiã jintia Enkasa

péprunam wea nuní weme, anaraanj wetá. Nú jintiaka atsamu nunkanam nankaamawai' tímiayi. ²⁷ Tutai Jiripisha wémiayi. Jintiá wesa Itiupianmaya áishmankan wáinkiamiayi. Nú áishmansha Itiupia nunka akupniurín, ni naari Kantasen takarniuyayi. Kantaseka núwayuyayi. Tura nu áishman ti neka asa nuna kuítrín írniuyayi. Nú áishmansha Yúsan áujstataj tusa Jerusarénum wéu wáketmiayi. ²⁸ Karetanam enkemar wesa, Yusa etserniuri Isayas aarmia nuna aujki wémiayi. ²⁹ Wats, Jiripi nú jintianam wéakui, Yusa Wakaní nin tímiayi “Nú kareta amayánta.” ³⁰ Tura Jiripisha amayán, Yusa etserniuri Isayasa áarmarín áujun antuk, chicharuk “¿Aujeamna nu nékamek?” tímiayi.

³¹ Tutai nú áishman tímiayi “¿Itiurak nekaataj? ¿Yaki jintintruat?” tímiayi. Tura antsu iijjai wetái tusa, Jiripincha enker jukimiayi karetanam.

³² Nu papí áarman áujmia nu júuyayi: “Murikiua áitkiasan jákatniunam júkiarmiayi. Tura uchich murik, ure tsúpiram chichaatsna núnisan niisha chichakchamiayi. ³³ Nincha iniatsáarmiai. Túrasha penké chichamnaka tútsuk tsankamakmiayi. Niisha nunkanam iwiaaku pujá maamu asamtai, ¿yaki nuna áujmatkat?” Nuní aarma ámiayi.

³⁴ Kantase takarniuri Jiripin aniasmiayi “Waitneasam turuttia, tu aarma nusha, ¿yana ta? ¿Yusa etserniuri nínikik túmama? ¿Chikichnash ta?” tímiayi.

³⁵ Nuyá Jiripi nu aarman áujtus “Juka Jesusnan tawai” tímiayi. Tura nú arantcha Yus-Chichaman ujakmiayi.

³⁶ Nuyá entsa áamanum nankaamak áishman Jiripin chicharuk “Jui entsá jeaji. Wikia jui imianchamniakaitiaj” tímiayi.

³⁷ Tutai Jiripisha tímiayi “Tuke enentáimjai Jesus nekas enentáimtakminkia túramniaitjame.”

Tutai áishman chichaak “Ee nekasaiti, Jesukrístuka Yusa Uchirínti tajai” tímiayi. ³⁸ Tura, karetan awajas mai jíinkiar entsá wearmiayi. Nuí Jiripikia Kantase takarniurín imiaimiayi.

³⁹ Tura kukar jíinkiar matai Uunt Yusa Wakaní Jiripinkia jukimiayi. Tuma asamtai Kantase takarniurísha Jiripin wáinkiachmiayi. Túrasha nínkia waras wémiayi. ⁴⁰ Jiripisha jeachat Asutu péprunam wantinkiamiayi. Tura nuyá jíinki péprunam nuí wayá, nuí wayá Yus-Chichaman etserki we, Sesaria peprunam jeamiayi.

9

Sauru Jesusan umirkamiayi

(Túramuri 22.6-16; 26.12-18)

¹ Nuna tumaj, Jerusarénum Uunt Jesusan umirkarmia nuna máataj tusa áujmattan Sáuruka penké iniaichamiayi. Tuma asa Israer-patri uuntri iyutaj tusa werimiayi. ² Tura jeari tímiayi “Papí ame naarmijjai áaram surusta. Wi nuna papí jukin timiai Tamasku péprunam jean, Israer-shuar iruntainiam wayattajai. Túran nú papijjai Jesusan umirkaru ainia nuna, nánkamsan achikiartatjai. Túran áishmannasha nuwancha achikian jinkian, jui Jerusarénum enkeataj tusan ikiaankattajai” tímiayi. ³ Tura papí susam Sauru jintiá wéai, Tamasku péprunam nuntumsai nuí aya aneachma nayaimpinmaya tsáapin jíitsumir téntakmiayi nin. ⁴ Túrunamtai Sauru nunká iniaarmiayi. Tura nayaimpinmaya chichaamun antukmiayi. “Sauru, Sauru, ¿Urukamtai yajauch awajtustaj tusam imiá pataaturam?” tímiayi.

⁵ Táman antuk “¿Amesha, yáitiam, uunta?” tímiayi Sauru. Tutai ataksha áimkamiayi “Wikia Jesusaitjai. Ame pataaturmena núitjai, tímiayi. Wíi aents pataatamna nuí, amek enentáimin yajauch awajmamsame, waaka sankanmiak numin ijiuma núnismek” tímiayi.

⁶ Nuyanka Sauru sapijin kuranki tímiayi “Nuinkia Uunta, ¿wi warinia itiurkat tusamea wakeram?” tímiayi.

Tutai Uunt chichaak “Wajakim weme péprunam wayatá, tímiayi. Nui jeawakmin ame túratamna nuna turamiartatui” tímiayi.

⁷ Tura Sáurujai irunar wearmia nu, chichaamun antukarmiayi. Tura áentsnaka penké wáinkiacharmiayi. Tuma ásar ti ashamkarmiayi. ⁸ Nuyá Sauru nunká tepá nantakmiayi. Tura wáinmaktaj tukamá wáinmakchamiayi. Tuma asantai chíkich shuar uwejnun enkekiar júkiarmiayi Tamaskunam. ⁹ Nui jeá menaintiu tsawant ímitsuk tura yurumtsuk penké úmutsuk pujumiayi.

¹⁰ Nui Tamaskunam Yus-shuar Ananías ámiayi. Nin mesekranam Uunt Jesus tímiayi “Ananíasá.”

Tutai “¿Warí wakeram, Uunta?” tímiayi.

¹¹ Nuyá Uunt Jesus tímiayi “Wajakim jintia, Naka tutaiya nui wetá. Nuisha Jutasa jeen jeam, Társunmaya Sáurun eaktaj tusan winijiai, titiá, tímiayi. Niisha Yúsan áujuk pujawai. ¹² Tura juna mesekranam ipiatkamjai Sáurun. Aishman wayá ni uwejéjai ántiawai, ataksha ímit tusa. Nú áishmanka ámetme, Ananíasá” tímiayi Jesus.

¹³ Táman antuk Ananías chichaak “Túrasha Uunta, ju áishman ame áentsrumin Jerusarénum ti yajauch awajchakait. Ni yajauch túramurín ti untsurí aents ujatainiawai, tímiayi. ¹⁴ Tura yamaisha Israer-patri chicharniun papirín takakui. Tura nujai ame náarmin páchiaj nuna achik jukitiaj tusa tímiajaisha tarutramji” tímiayi Ananías.

¹⁵ Tutai Uunt Jesus tímiayi “Áankisha wetá. Ju áishman kan winia etserniur atí tusan achikjai Wi. Niisha Israer-shuarchancha tura kapitíanniasha tura Israer-shuarnasha wínian etserin átatui, tímiayi. ¹⁶ Tura Sauru winia náarun páchia asa ti wáitsattana núnaka nin iniaktustatjai” tímiayi Jesus.

¹⁷ Tura Jesus táman umirak Ananías Sauru pujamunam wémiayi. Tura jeari wayá uwején awantas tímiayi “Yatsuru Sauru, Uunt Jesus jintiá wantintiur-makmamna nusha ame ataksha ímiat tusa, tura Yusa Wakanísha enentáimin pimiutramkat tusa winia akuptukai” tímiayi.

¹⁸ Nu chichamaik ni jiiya namaká saepeya áanin iniaarmiayi. Túrunamtai ataksha ímmiayi. Túruna wajaki we imianmiayi. ¹⁹ Nuyasha yurumámiayi. Tura yurumásha kakaram ajasmiayi. Tura Yus-shuarjai Tamaskunam wárumchik tsawant pujusmiayi.

Sáuruka Tamasku péprunam Yus-Chichaman etserkamiania nu

²⁰ Nuyanka Sauru Israer-shuara iruntairín wayá Jesusa túramurín et-serkamiayi. Etseruk tímiayi “Nekasaiti, ju Jesus Yusa Uchirínti” tímiayi.

²¹ Nuna ashí anturú pujuiniaka “¿Ausha urukakua aania? tiarmiayi. Entá ju áishmansha Jerusarénum Jesusan enentáimtuinian ti pataatimia núchakait. Tura tímiajaisha nuna achik Israer-patri akupniuriin jukitiaj tusa tamia núchakait” tiarmiayi.

²² Tura Sáurusha sapijmiatsuk etsermiayi. “Ju Jesus nekas áentsun Uwemtikniuiti” tu etsermiayi. Tura ti paant étserkui, Tamaskunmaya Israer-aents, nekaschaiti titiaj tukamá tujinkiarimiayi.

²³ Tura ukunam, Israer-aents Sáurun maatai tusar chichaman jurusarmiayi. ²⁴ Tura Sáurusha nu chicham jurusman nekamamiayi. Israer-aents pepru jínmanum tuke tsawaisha, káshisha achikiar maatai tusar jintian akir-tiarmiayi. ²⁵ Nuna antukar Yus-shuar Sáurun chiikniun kashi enkeawar itiararmiayi. Pepru tanishnum itiarar awemarmiayi.

Sáuruka Tamaskunmaya Jerusarénum wémiania nu

26 Tura Sauru Jerusarénum jeá Yus-shuarjaj iruntrattsá wakerimiayi túrasha nin̄kia ashamiarmiayi. Sáurusha nekas Yus-shuar ajaschaiti tusar ashamiarmiayi. 27 Túmainiaḡ Pirnapí Jesusa akatramurḡ matsatmanum jukimiayi Sáurun. Tura nuḡ ejé tímiayi “Ju Sauru jintiá wesa Uunt Jesusan wáinkiaiti. Tura Yus chicharkaiti. Tuma asa Sauru Tamaskunam sapijmiatsuk Jesusa náarḡ etserkaiti” tímiayi. 28 Tura Sauru Jerusarénum juákmiayi. Tura Yus-shuarjaj irunar pujumiayi. 29 Nuyasha Yus, etserkata tutai, sapijmiatsuk Jesusa túramurḡ etsermiayi. Tura Israer-shuar Kriaku chichaman chichau ármiá nu, nuḡ pujuarmiayi. Sáurusha nu shuarjaj áujmatsarmiayi. Túrasha nu shuar Sáurun itiur máatjik tusar chichaman juriarmiayi. 30 Tura Yusaj yachi ármiá nu, chicham jurusman nekaawarmiayi. Neka ásar Sáurun Sesaria peprunam júkiarmiayi. Tura nuyasha Tarsu péprunam akupkarmiayi.

31 Tura Jutíanmayá, Kariréanmayasha, Samarianmayasha Yus-shuar shiir tímiajnisaḡ ajaras kakaram ajasarmiayi. Yúsan ashamainia ásar, tura Yusa Wakanḡ yayamu ásar kawen̄ki kawen̄ki wearmiayi.

Pítiur Eneasan yáḡmiania nu

32 Tura Pítiur Yusaj yachi armiania nuḡ iráa wekaimiayi. Wekaak Yus-shuar Rítianam matsamarmia nuḡsha iraumiayi. 33 Nuḡsha Rítianam jeá áishman̄kan Eneas náartinian wáinkiamiayi. Niisha emearu asa wekaicha uchu uwí aya tépenuyayi. 34 Tura Pítiur chicharuk “Eneasa, Jesukrístu tsuármawai. Nantaktia. Tura esekmatairam iwiarata” tímiayi. Tutai Eneas nu chichamaik nantakmiayi. 35 Nuna túman wáinkiar Rítianmayá aents tura Sarun̄mayá aencha enentáimprar Uunt Yusan nemarsarmiayi.

Nuwá Túrkas nantakmiania nu

36 Túrasha Jupe péprunam nuwá Yus-shuar pujuyayi, ni naari Tapitia. Tura nusha Kriaku chichamjain̄kia Túrkas tuiniawai. Nu nuwasha nuḡ pujus tuke péḡker túriniuyayi. Tura niisha nútiksaḡ yaj wémiayi. 37 Nu tsawantinik Túrkas sun̄kuran jateemak jakamiayi. Túrunamtaí ayashin nijiarar yakí tesaamunam áepsarmiayi. 38 Jupe péprusha Rítianmayá tíjiuch ámiayi. Júpenmayá Yus-shuar Rítianam Pítiur pujan nekaawar jimiará áishman̄kan akatrar akupkarmiayi, Júpenam wari winití tusar. 39 Nuḡ tutai Pítiur niijjai wémiayi. Tura támataí jaka tepemia nuḡ awayáwarmiayi. Nuḡ wayamtaí waje pujuarmia nu útkiar Pítrun téntakarmiayi. Túrawar pushirḡ, Túrkas iwiaaku pujus najankamia nuna iniaktusarmiayi.

40 Nuyanka Pítiur aḡ akupkarmiayi ashí. Tura niisha nin̄ki tikishmar Yúsan áujsamiai. Nuyasha nuwān jaka tepaan iis tímiayi “Tapitia nantaktia.” Tutai niisha íimi Pítiur wajaan wáiniak nantaki pujusmiayi. 41 Tura Pítrusha nuwān uwejnum achik awajkimiai. Tura iniaís Yus-shuar ármiá nuna tura wajencha untsukar Túrkas iwiaaku ajasun iniaktusarmiayi. 42 Nu túrunamun ashí aents Jupe péprunmayá nekaawarmiayi. Túrawar untsurḡ aents Uunt Jesusan umirkarmiayi. 43 Tura Pítruka Jupe péprunam untsurḡ tsawant nuapen-iwiarin Semun̄ka jeen pujusmiayi.

10

Pítiur Kurniriuḡ

1 Sesaria péprunam Kurniriu naartin suntara kapitíantrḡ pujumiayi. Ni suntari Itiaria nun̄kanmayá ármiayi. 2 Nu kapitían Kurniriu ni shuarijjai, Yuska nan̄kaamantuiti, tu enentáimtiarmiayi. Tuma ásar Yúsan enentáimtin ármiayi. Tura nútiksaḡ kuítniasha takakchan yáḡntaj tusa Israer-shuaran súuyayi. Tura tuke tsawant Yúsan áujtiniuyayi. 3 Chíkich tsawantai, nantu

aanku ajasaj Kurniriu ímiarmiayi. Yusa suntari Yus nayaimpinmaya akupkamu, ni pujamunam utuá “Kurniriuá” tímiayi.

⁴ Kurniriuá tutai, Yusa suntarın ashamak ímia pujumiayi. Tura “¿Warimpiait, Uunta?” tímiayi.

Tutai Yusa suntari tímiayi “Ame seamun Yus anturtamkai. Tura atsumainia nu yayakmin Yus shiir enentáimturmawai’ tímiayi. ⁵ Tura Yusa suntari Kurniriun tuke chicharuk “Wats, áminiuram Júpenam akupkata. Semun, chikich naarı Pítiur, tatı tusam akuptukta, tímiayi. ⁶ Nu Semunsha chikich Semunjajı pujawai. Nuka nuapen-iwiarin Semunkaiti. Tura ni jeesha nayaantsanam ayaamach pujawai, tímiayi. Nujı jeawakmin, ame túratamna nuna Semun Pítiur turamtatui” tinia ikiukmiayi. ⁷ Tura Yusa suntari waketkimtai, Kurniriuka ni takarniurın jımiaran itiamiayi. Tura suntaran chikichkiniak nemarsat tusa itiamiayi. Nu suntar ni írutramuriyayi. Tura Yúsan enentáimtiniuyayi. ⁸ Kurniriusha ni túrunamurın ashı ujáa-já awajas Jupe péprunam akupkarmiayi.

⁹ Kashin tsawantajı Kurniriu suntari Júpenam nuntumsarajı, tutupin ajı Pítiur jea yakı wáakunam Yúsan áujساتاјtsa wakamiayi. ¹⁰ Pítrusha ti tsukamak yurumátaj tusa wakerimiayi. Túrasha yurumkan iniarainiaı Pítiur íkijajtiusmak, ¹¹ nayaimp uranmianum wanıkarım tarachia áanin tura nuna tsakarın jıńkiakman tárun wáinkiamiayi. ¹² Nu tarachnium yajasma irunmiayi. Wekainiusha, nanamtincha, tura napisha enıkemiarmiayi. ¹³ Tumajı Yus Pitrın chicharuk “Pitrı, wajakim maam yuata” tímiayi.

¹⁴ Tutai Pítiur tímiayi “Atsá Uunta. İi Israer-shuartikia yajauch yajasma áinia nu tura yúatin surimkiamu ana nuka penıké yúchaitji. Tuma asamtaı júnaka wikia yuashtatjai” tímiayi.

¹⁵ Túrasha Pitrın atak Yus chicharuk “Wi, penıkeraiti, tájana nu, yajauchiiti, tiip” tímiayi.

¹⁶ Nuka menaintiú túrunamiayi. Tura nuyasha tarach ataksha nayaimpiniam wakamiayi. ¹⁷ Nuna túrunan wáiniak Pítiur wariniak áaniuncha wáinkiaı tusa enentáimia pujajı kapitián Kurniriu ayakma armia nu, anintruiniak jeawariayi. ¹⁸ Tura jeawar kakantar unsummiar “¿Semun, Pítiur, juın pujá?” tiarmiayi.

¹⁹ Tura Pítruka ímiarmarın tuke enentáimia pujajı Yusa Wakanı chichaak “Menaintiu áishmanı untsurmainiawai, tímiayi. ²⁰ Wajakim akaikim arantut-suk au nemariarta, Wi akupkamu asamtaı” tímiayi.

²¹ Nuna antuk Pítiur taramiayi. Tura áishmanıkan Kurniriu akupkama nuna wajainian wáiniak “Wiitjai Pítiur. Átum eıtrumna núitjai. ¿Warı tarıntrum?” tímiayi.

²² Tutai niisha tiarmiayi “İisha kapitián Kurniriu akupkamu taji. Kurniriuka áishmanı penıkeraiti. Yúsan enentáimtiniaiti. Tura Israer-aencha nin shiir enentáimtuiniawai. Nııya winiaji, tiarmiayi. Kame nuik, Yusa suntari, nayaimpinmaya akupkamu, İi kapitiántrın tímiayi “Pitrın untsukát akupkata. Nii tatı. Tura nii titiatna nu penıker anturkata” tímiayi. Nuna İi kapitiántrın takui iisha winiji” tiarmiayi.

²³ Tutai Pítiur jeá awayámiayi. Tura nu kashi nuı kanararmiayi.

Kashin tsawarar Pítiur niıjıajı wearmiayi. Túrasha Júpenmaya Yus-shuarsha nin nemarmiayi. ²⁴ Nuyá tsawarar Sesarıa péprunam, Kurniriu nákamun jeararmiayi. Kurniriuka ni shuarın tura ni nekas amıkrın, nekaatarım tusa untsuk ikiaankamiayi. ²⁵ Tura Pítrusha jeamtaı Kurniriu aı jıintiuki Pitrın tikishmatramiayi. ²⁶ Túrasha Pítiur awajki tímiayi “Wajaktia. Wisha aya áentsketjai. Ámea núnisketjai” tímiayi. ²⁷ Tura chichasar jeá wayawarmiayi.

Tura wayá, untsurí aents matsatun wáinkiamiyai. ²⁸ Nuyá Pítiur chichaak tímiyai “Amikrua, atumsha nékarme. In Israer áentstinkia, chíkich áentsjai pachiniarchatniuitrume, tura ni jeencha wayashtiniaitrumen in jintintramín turamainiaji, tímiyai. Túrasha Yuska ni enentáimsamurín wíniaka paant iniaktursayi. Túmaitkiui wikia nánkamas áentsun yajauchiiti, tura auka wapikiaiti, tíchamniaitjai, tímiyai. ²⁹ Tuma asamtai, untsurkurmin, páchitsuk winimjai. Túmaitkiui nekaataj tusan wakerajai. ¿Urukamtai untsurkamarum?” tímiyai.

³⁰ Tutai Kurniriu tímiyai “Kuatru tsawant nankaamasaj tura nantusha juní aj, wikia yurumtsuk Yúsan áujsamjai, kjaraj áujsatín ana nuna. Túran chichaj, áishman, ni entsatairí wincharpatniun, naka wajatran wáinkiamjai, tímiyai. ³¹ Niisha chichartak turutmiaiyi “Kurniriu, Yus ame áujman anturtamkayí. Tura shuar atsumainia yáinmamna nunasha nekarmayí, turutmiaiyi, tímiyai. ³² Tuma asamtai, Jupe péprunam akatramuram akupkata. Semun Pítrun itiatí. Nu Semun Pítrusha, chíkich Semunjai pujawai. Nuapen-iwiarin Semunkaiti nuka. Tura ni jeesha nayaantsanam ayamach pujawai. Niisha taa ámin chichartamkattawai” turutmiaiyi, tímiyai. ³³ Túrutkui, wi umikian áentsun wárikmasan ámin akuptukjame utitia tusan. Tura nékaseñ taume. Tuma asamtai iisha jui Yus ímmianum pujuiniaji. Tuma asamtai, ashí Uunt Yus ámin au ujakarta túramna nu, iisha antuktai tusar pujaji” tímiyai Kurniriu.

Kurniriu jeen Pítiur etserkamia nu

³⁴ Nuyá Pítiur chichaak “Ayu. Yus ímmianum ashí aents métekrak áiniawai nekas nékajai, tímiyai. ³⁵ Antsu ashí nunkanam nánkamas aents Yúsan umirak péñker tura nuna, Yus nú aentsun shiir enentáimtawai, tímiyai. ³⁶ Yuska shiir chichaman Israer-aentsun akuptukmiyai. Nui chichaak “shuar Jesukristu naarín páchiakka, Yusjai nawamnaikiatin átiniaiti, tímiyai. Nú Jesukristu ashí shuara Úuntrinti’ tímiyai Yus. ³⁷ Túrasha Kariréa nunkanam nankamak ashí Israer nunkanam túrunamia nu paant nékarme. Imiakratin Juan ímiaak etserak amukmia nú tsawantin nankamamiyai. ³⁸ Tura jusha nékatsrumek, tímiyai. Nasarénumia Jesus, Yus Anaikiamu asa, Yusa Wakaní kakarmarijjai péñker túriniuyayí. Iwianchruku wáitias pujuarmia nuna péñker awajsamiyai. Yus Niin pujurma asa ashí nuna túriniuyayí. ³⁹ Tura Israer-aents matsatkamunam tura ímia Jerusaréñ péprunmasha Jesus túramia nu, iisu asar, iisha étserajai. Tura ayu, Nin achikiar krúsnum máacharmakia, tímiyai. ⁴⁰ Tura menainti tsawant jeamtai Yus Nin iniantkimiyai. Tura ataksha iwiaintiurtamkachmakají, tímiyai. ⁴¹ Ashí áentsnumka wantinkiachmiyai. Antsu íniak nuik, etserin atarum tusa Yus achirmakmiaj nú áentstiniak wantintiurmakmiaji, tímiyai. Au nekas jakamunmayá nantakmiatai iisha Niijjai tsaniñkiar yurumámji, tímiyai. ⁴² Tura Jesussha in akuptamkaitji. Jesuska “Wiitjai Yus Anaikiamun, tímiyai. Ashí áentsun, júka makuumawai, túrasha júka makuumatsui, Wiki titiniaitjai. Kame ashí áentsun, jaka áinia nuna tura iwiaaku áinia nunasha, Wikiitjai nuna titinian” tímiyai Jesus. Nusha átum werum ujaktruktaram, Jesus turammaji, tímiyai. ⁴³ Ya shuarak Jesusa náarín pachia nú shuarnaka tunaarín tsankurattawai, nuna ashí Yúsnan etserniusha yaunchu etseriarmiayí” tímiyai.

Israer-shuarchan Yusa Wakaní tarurarmiania nu

⁴⁴ Tura Pítiur tuke chichaak pujají, tura chikichcha antúu pujuiniaj Yusa Wakaní tarurarmiayí. ⁴⁵⁻⁴⁶ Tuma ásar ankant ankant chíkich chichamjai chichasarmiayí. Túmainiak, Yus ti péñkeraiti, tiarmiayí. Tura Israer-shuar, Yus-shuar armia nuka Pítrujai táarmia nu, nuna antukar ti enentáimsarmiayí. Maa, Yusa Wakanísha Israer-shuarcha ainia nunasha tarurchaiaik, tu

enentáimsarmiayi ⁴⁷ Túmakui Pítiur chichaak “¿Yaki surimkiat ju aents imi-
antinian? Warí nincha ínia áintsan Yusa Wakaní tarurcharaik” tímiayi.
⁴⁸ Nuyá Pítiur, Jesukrístu náarijn imiantiarum tusa akupkarmiayi. Tura
nuyasha Pitrunka, niijiai ishichik tsawant pujustinian seawarmiayi.

11

Ni túrunamurín Pítiur ujakmiania nu

¹ Israer-shuarchasha Yusa chichamen umirkarai táman Jesusa akatramurisha tura Jutíanmayá Yus-shuarsha antukarmiayi. ² Túmainiak Pítiur Jerusarénum jeamtai, Israer-shuar Yus-shuar ármia nu chichainiak ³ “¿Urukamtia Israer-aents ániachusha iyumam? ¿Tura aujai tsaninkiam urukamtai yurumámum?” tiarmiayi.

⁴ Tutai Pítiur ashí yámankamtaiknumia túrunamun ujakmiayi. ⁵ Chichaak tímiayi “Wikia Jupe péprunam pujumjai. Tura nuí Yusan auju pujusan ímiarmajai. Tura wan̄karam tarachia áanin kuaru tsakarín jin̄kiakma, nayaimpinmayá táarun wáinkiamjai. Tura wi pujamunam jeartimiai, tímiayi. ⁶ Tura nuí iyaj tukaman inít yajasmañ, napincha, nanamtinnisha en̄ketainian wáinkiamjai, tímiayi. ⁷ Tura chichaman antukmajai “Pitru wajakim maam yuata” túrutun antukmajai, tímiayi. ⁸ Túrutkui “Atsá, Uunta, áanin wapiknaka, Israer-aents yuatin surimkiamu ana núnaka tuke yúchaitjai” tímiajai, tímiayi. ⁹ Atak nuyá túrutuk “Wi, péñkeraiti, tájana nu, ámeke, yajauchiiti, tiip” turutmiiai, tímiayi. ¹⁰ Nunasha menaintiú túrunan wáinkiamjai. Túruna nayaimpiniam mash waketkimiai, tímiayi. ¹¹ Nuí túruna pujai menaintiú áishmañ Sesarianmayá akupkamu, winia eatainiak wi pujamunam tarutiarmiai, tímiayi. ¹² Tura nuí Yusa Wakaní chichartak “Arantutsuk aujai wetá” túrutkui, wémajai. Tura ju sais Yus-shuarjai wi wémajai. Túrunar ashin̄kiar Kurniriu jeen wayam̄ji, tímiayi. ¹³ Niisha chichaak “Jearui Yusa suntari nayaimpinmayá taa wajan wáinkiamjai, tímiayi. Tura niisha chichartak “Jupe péprunam Semun̄ Pítiur tatí tusam áishmañ akatram akupkata. ¹⁴ Pítrusha taa, itiura amesha tura áminiurmesha tunaarminia uwemprattam nuna turamtatui.” Yusa suntari nuní turutmiayi” tu ujakkamiayi Kurniriu’ tímiayi.

¹⁵ ‘Wi chichastasan júarai, Yusa Wakaní tarurarmiayi, yámankamtaik in tarutrampramij nútksan, tímiayi. ¹⁶ Nuinkia Uunt Jesus timian enentáimpramjai. Niisha tíchamka “Juan̄ entsajain̄ imiakratmiayi. Tura antsu Yusa Wakanínia imiantinia áintsan̄ atumí enentáin̄ en̄kemprutmattarme.” Nu timian enentáimpramjai, tímiayi. ¹⁷ Atumsha enentáimpratarum. Uunt Jesukrístu umirkamij nuí, incha Yuska ni Wakanín̄ suramsamijai. Tura in suramsamij núnisan̄ Yus nincha ni Wakanín̄ súsarmiayi. Nuna tura asantai, wikia, túrashtiniaiti, Yúsan̄ títinkiaitaij” tímiayi Pítiur.

¹⁸ Tura Pítiur taman antukar mitiat wáinkiar “Nekasaiti, Israer-shuarchancha ni enentáin̄ yapajáwarmatai tuke iwiaaku átinian Yuska nin súsaruiti” tiarmiayi. Tusar Yusa náarin̄ ti shiir awajsarmiayi.

Yus-Shuar Antiukía péprunam wearmiania nu

¹⁹ Estepañkan máawarmia nuí, chíkich Yus-shuarnasha maatai tusar pataa-tiarmiayi. Túram chíkichkia pisarar Pinisia nun̄kanam, Chipri nun̄kanmasha, tura Antiukía péprunmasha wearmiayi. Tura nuí jeawar Yus-Chichaman chikichnaka ujatsuk aya Israer-aentsnak ujakarmiayi. ²⁰ Tura niijiai Chipri nun̄kanmayá pisararmia nu Serini nun̄kanmayasha Yus-shuar ármiai.

Nuka Antiukíanam jeawar Israer-shuarchan Uunt Jesusa túramurin ujakarmi-
ayi. ²¹ Tura Uunt Jesus ikiakárma ásar, nú nunkanmaya aents ti untsurí
yaunchu túrutairin iniaisar Jesusan enentáimtuiniak Yus-shuar ajasarmiayi.

²² Tura nu chichaman antukar, Jerusarénumia Yus-shuar, ame iyutá
tusal, Pirnapín Antiukíanam akupkarmiayi. ²³⁻²⁴ Pirnapísha jeá, Yus nú
shuwaran uwemtikrarma nuna wáiniak warasmiayi. Pirnapísha pénger
áishmankauyayi. Yusa Wakanísha pimiutkamuyayi. Tura Yúsan nekas
umirkauyayi. Tuma asantai nu shuwaran mash jintintiainiak chicharuk
“Tuke enentáimjai umirkarum Yus nemarsatarum.” Tu chicharak ikiukmi-
ayi. Tura nuísha nú arant untsurí aents Yusai kawenkarumiayi.

²⁵ Nuna turasua amik Pirnapí Tarsu péprunam wémiayi Sáurun wáinkiataj
tusa. Tura wáiniak Antiukía péprunam jukimiayi. ²⁶ Tura nuí jeawar,
nú péprunmaya Yus-shuarjai iruntrar chikichík uwí pujusarmiayi. Yus-
Chichaman untsurí shuáran ujaak pujuarmiayi. Tura nuí Antiukía
péprunmanka Yus-shuwaran émkaka, Kristu shuari, tiarmiayi. ²⁷ Nuyá
Yusnan etserin Jerusarénumia táarmiayi Antiukíanam. ²⁸⁻³⁰ Túmainiai
chikichík etserin, ni naari Akaapu, Yus-shuar matsatmanum ajapén
wajaki chichasmiayi. Tura Yusa Wakaní nekatairijiai chichaak “Ti tsuka
ashí núnkanam átatui” tímiayi. Tuma asantai Antiukíanamaya Yus-shuar
chichainiak “Jutía nunkanmaya Yus-shuar ainia nu yáintai” tiarmiayi.
Ankant ankant ni wakeriarmia núnik súsarmiayi. Tura nú kuítniasha
Jutíanamaya Yus-shuara úntrin akuptukarmiayi. Pirnapísha Sáurusha nú
kuítian júkiarmiayi. Tura Akaapu tímia núnisan túrunamiayi, akupin Krautiu
pujai.

12

Pitrún sepunam enkeawarmiania nu

¹ Nu tsawantai akupin Erutis Yus-shuwaran máataj tusa chichaman ju-
rus áentsrin ishiakmiayi. ² Tura Juanka yachin Jakupun suen tsupirkar
máawarmiayi. ³ Nuna tura máawarmatai Israer-aents wáinkiar “júka péngeraiti”
tiarmiayi. Erutissha nuna antuk, Pítrusha achikrum itiatarum tusa akup-
karmiayi. Núnaka wakapruachu tanta yuatin nampertin túrawarmiayi.
⁴ Pítruncha achik itiar matai, Erutis sepunam enkeata tusa akupkamiayi. Tura
sepunam suntarsha ankant ankant, kuatru kuatru, ashikia tiasisáis (16)
irunar Pitrún téntakarmiayi. Tura, ju jisat nankaamasmatai, mantamnatí
tusan jiiaktiatjai aents iruntramunam, tu enentáimsamiayi Erutis. ⁵ Túramu
asa Pítruka sepunam pujumiayi. Tura suntarsha mijjatrutsuk iiyarmiayi.
Túramunak Yus-shuarka, Pitrún yáinkiat tusar iniaitsuk Yúsan ti áujiarmiayi.

Yusa suntari Pitrún uwemtikramiania nu

⁶ Wats, Erutis, kashin jiiaktiajai takui, nú kashi Pítruka jimiará suntar
wajamunam etema tepes kanarmiayi. Tura jimiará jirujai jinwiamuyayi.
Tura chíkich suntarka jínmanum ii wajarmiayi. ⁷ Tumai aya aneachma
Yusa suntari nayaimpinmaya taa ajapén wajasmiayi. Túrunamtai jeanmanka
tsápin ajasmiayi. Tura Yusa suntarísha Pitrún páenum antin ishintiarmiayi.
Tura jirusha Pitru uweyéya sayat atiniamiayi. ⁸ Tura Yusa suntari tímiayi
“Kaki emenmamata. Túram sapatrumsha aweekata” tímiayi. Tutai Pítiur
túramiayi. Nuyá chichaak “Pushiram entsarta. Túram nemartusta” tímiayi.
⁹ Tutai Pítiur nemarsamiayi. Túrusha Pítruka, mesekranmaapi júniaja, tu
enentáimsamiayi. ¹⁰ Túrusha emka suntar íimia wajan nankaikiarmiayi. Tura
nuyasha chíkich suntar íimia wajan nunasha nankaikiarmiayi. Tura nuyasha

jíntiainium jiru waiti ámanum jeawarmatai, nú wáitisha ímia-nínki kuat uranmiayi. Túrunamtai jíinkiarimiayi. Tura jintiá ishichik wésan, Yusa suntari Pitrun níniak ikiukmiayi.

¹¹ Túram Pítiur enentáimiar tímiayi “Yamaikia nékajai. Mese Kranmachuiti. Antsu Uunt Yus ni suntarin nekas akupturkayi. Erutis mantuataj tusan pujurtana nuyá Yusa suntari winia uwemtikrurai. Tura Israer-aents túrutatajtsa wakeriarmia nuyasha uwemtikrurai” tímiayi. ¹² Nuna tu enentáimias nekáa, Marí jeen wémiayi. Nú Marisha Juan Márkusan nukuríyayi. Nú jeanam untsurí aents irunar Yúsan auju matsatainíaj Pítiur jeamiayi. ¹³ Tura jeá aa wáitin tuntuimiayi, wayataj tusa. Túmakui nuwá uchich, ni naari Rutí, yákit tusa iyumiayi. ¹⁴ Tura jeari, Pitru chichamen anturak ti shiir enentáimsamiayi. Túmak wáitin urattsuk ikiuki, init matsatainian werí “Pítiur taa wáitiniam wajaawai” tímiayi.

¹⁵ Tutai “Wáurtsmek” tiarmiayi.

Tútaisha núwaka “Atsá nekasaiti” tímiayi.

Tútaisha nú arant “Níichuiti. Antsu ni wakaní túratsuash” tiarmiayi.

¹⁶ Tu chichainíaj Pitruka tuke tuntuí wajamiayi. Tura wáitin uraj tukamá Pitrun wáinkiar ashamkarmiayi. ¹⁷ Ashamak chichainiakui Pítiur, uweje takuí itiatmamtikiarmiayi. Tura nuyá Uunt Yus sepunmayan uwemtikramun ujakmiayi. Tura “Jú chicham Jakupu tura chíkich Yus-shuarsha ujaktarum” tímiayi. Nuna tí iníais jíinki arant wémiayi.

¹⁸ Kashin tsawar suntarsha Pitrun atsá wáinkiar “Chuwa urukakua menkaka. Áyawa urukattajia” tiarmiayi. Pítiur túrunamun nékachu ásar nuna tiarmiayi. ¹⁹⁻²⁰ Túrunamtai Erutis chichaak Pítiur eaktarum tusa akupkarmiayi, túrasha wáinkiacharmiayi. Túrunamtai Erutis suntaran untsukar, Pítrun íisarmia nuna aniasarmiayi “¿Pítiur itiura menkakama?” tímiayi. Niisha áimiainiachkui, nu suntaran mantámatí tusa akupkamiayi.

Erutis jakamiania nu

Erutissha Tirunmaya tura Setúnmaya áentsjaisha nemasnaikiarmiayi. Túmayatan Jutiá nunkan ikiuki Sesaria péprunam pujustaj tusa Erutis wémiayi. Sesaria péprusha Tiru péprunam tíjuchiiti. Setúnmaya aents Tirunmaya áentsjai Erutisa nunkeyan yurumkan súmainia ásar, Erutisjai nawamnaikiatniun wakeriarmiayi. Tuma asamtai métekrak enentáimsar, Erutisa takarniuri penkeri, ni naari Parastu, níijiai emka amikmawar nuyá Erutisan weriar shiir matsamsatniun seawarmiayi. ²¹ Tuma asamtai tsawant jeamtai Erutissha akupin entsatai pushin entsarmiayi. Tura akupin pujutainium pujus áentsun íkiaanak áujmatmiayi. ²² Nuí pujus chichaakui aents untsumainiak tiarmiayi “Jú chichaa pujana júka áenchaiti. Antsu nekaska yúsaiti” tiarmiayi. ²³ Tumai nuyáik Yusa suntari nayaimpinmaya tarí Erutisan jaa awajsamiayi. Tuma asamtai nusha aka yuam jakamiayi. Erutissha Yusan waantu awajtsuk níinki waantu enentáimtuma asa túruna jakamiayi. ²⁴ Túrunamtaisha Yusa chichamenka nú arant pampanki wémiayi. Túmakí ashí núnkanam anturamiayi.

²⁵ Tura Pirnapísha Sáurusha ni takatrin amukar Jerusarénumia Antiukíanam waketainiak Juan Márkusan júkiarmiayi.

13

Yus-Shuar Pirnapíncha Sáuruncha Yus-Chichaman etserkarat tusar akupkarmiania nu

¹ Antiukíanmaya Yus-shuarnum Yusnan etserin páchitra ármiai. Nútiksán Yus-Chichaman jintinniurísha ármiai. Pirnapísha tura Mukusa Semunsha,

nuyá chíkich, Serinianmaya Rúsiusha tura akupin Erutisa tsakatkesha, ni naari Manaen, Sáurusha tímianu ármiai. ² Tura chíkich tsawantaj niisha yurumtsuk Yúsan áujeak pujuiniaj Yusa Wakaní tímiayi “Pirnapísha, Sáurusha akanturkitiarum, tímiayi. Wi takatan súsaitjiana nuna takasarat tusarum túratarum” tímiayi. ³ Tutai ijiarma Yusan aajsua amikiar, shiir wetarum tusar ni uwejen Sáurun Pirnapíncha awantkarmiai. Túrawar Antiukíanmaya akupkarmiai.

Chipri nunkanam jeawarmiai

⁴ Tura nuyanka Yusa Wakaní akupkam Pirnapísha Sáurusha jíinkiar Serusia péprunam jeawarmiai. Tura nuyá uunt kanunam enkemprar Chipri nunkanam jeawarmiai. ⁵ Juansha yáintaj tusa némarkauyayi. Nuí Saraminia péprunam jeawar Israer-shuar iruntai jeanam wayawar Yus-Chichaman etseriarmiai. ⁶ Tura Chipri nunkanam pepru ainia nuí wáirkutak Papus péprunam jeawarmiai. Nuí jeawar Israer-aents uwishin ni naari Parjesúsan wáinkiarmai. Ni chíkich náarinkia Erimiasauyayi. Niisha uwishniuitiat, Yúsnan étsereajai, tíniuyayi. ⁷ Akupin Serjiu Páurujai pujuyayi. Nu akupniusha ti pénger enentáimniuyayi. Tura Pirnapín Sáuruncha chichaman akuptukmiayi, taarti tusa. Kame Yus-Chichaman antuktaj tusa wakerak untsukmiayi. ⁸ Tura uwishin Erimias nuna nakitiak “Auka péngerchaiti” tímiayi. Akupniusha Yúsan umirkain tusa nuna tímiayi. ⁹ Nuyanka Sauru, ni chíkich naari Papru, Yusa Wakaní pimiutkamu asa, nu uwishniun úmamkemas iis tímiayi ¹⁰ “Ámeke wáitaitme. Anankartiniaitme. Yajauchiitme. Maaj, iwianchiitme. Tura ashí pénger ana nuka imiá nakitniuitme. Tsej, ¿urukantai Yusa jinti naka ana nu emeskim weam? ¹¹ Paij, yamaikia Uunt Yus asutiámattawai. Yamaikia amesha jimi kusurmatai untsurí tsawant tsáapnin penké íschattame” tímiayi. Tura nú chichamaik jii kusurmatai kirit ímiuk chikichan eamiayi enkeki jurukit tusa. ¹² Nu túrunamtai akupin nuna wáinak, ti enentáimpramiayi. Túruna Uunt Yusa chichamen enentáimtur umikmiayi.

Chíkich Antiukíanam etserkarmiania nu

¹³ Nuyá Juan waketki Jerusarénum wémiayi. Tura antsu Pápruka ni tsaniakmarijiai kanunam enkemprar Pápus péprunka ikiukiar Pirji péprunam jeawarmiai. Nusha amaini Pampiria nunkanam pujawai. ¹⁴ Nuyá Pirji péprun nankaikiar Antiukía péprunam jeawarmiai. Nú Antiukíasha Pisitia nunkanam pujawai. Nuí jeawar Israer-shuar ayampratin tsawantin, nuka sáwartin, Israer-shuar iruntai jeanam wayawar pujusarmiai. ¹⁵ Tura nuí Yus-Papinium yaunchu áarman áujas aminkiamtai, Israer-shuar iruntai jeanam írniuri Páprun tiarmiai “Yatsuru, jintiatin chicham takakkurmeka yamaik titiarum. Antukarmi” tiarmiai.

¹⁶ Tutai Papru wajaki uweje takuimiayi. Tura chichaak “Israer-shuartiram, tura Yúsan umirkataj tusa wakerarmena nu antuktarum, tímiayi. ¹⁷ Ii Yusri ii yaunchu uuntrin Israer-shuartin achikmiayi. Tura niisha írara núnik Ejiptunam matsatainai Yuska nin páchiniak uunt awajsarmiai. Yus ni kakarmarijiai nú nunkanmaya ii yaunchu uuntrin uwemtikrarmiai. ¹⁸ Túrasha atsamu nunkanam ii uuntrin kuarenta (40) uwitin Yuska aya kátsuntramiayi. ¹⁹ Tura nuyanka siati áentsun mátsatkainian, Kanaan nunkanam matsamarmia nuna amukarmiai. Nú nunkan ii yaunchu uuntrin susataj tusa Yus túramiai. ²⁰ Nuyanka ii uuntri akupniurin, juís tútain, anaikiamiayi. Tura chikichan ukunam anaiki anaiki wémiayi. Nuna tura túraakua kuatru siántu senkuenta (450) uwí ejemiayi. Samuersha Yúsnan etserin náamtsáin nuna túrimiayi Yus. ²¹ Tura nuyanka áencha juísan

nakitiainiak, uunt akupin náamkat tusa Yúsán seawarmiyai. Tuúniakui Yuska Sesa uchirín Saúran anaikiamiyai. Nú Saúra úntrin_{nkia} Pinjamín_{nkia}uyayai. Tura Saúrsha kuarenta (40) uwí nú áentsun akupkat tusa Yus tsan_{nk}atkamiyai. ²² Tura Saúr náamkan ataksha Yus awain_{nk}imiyai. Tura nuyá iiksa_n nú nun_{nk}anam uunt akupin atí tusa Tawitian anaikiamiyai. Tura Yuska juna Tawitnian tímiyai “Isaí uchirín Tawitian winia enentáir jeam_{nk}taí achirmakjai. Tura Winia umirtin átatui” tímiyai. ²³ Wats, Tawit weeanmaya_{nk} Jesusaiti. Tura Yuska Israer-aentsun Uwemtikrartinian Jesusan anaitiukmiyai, yaunchu timiarín uminkíát tusa. ²⁴ Jesuska táatsa_{nk} Juan ashí Israer-shuaran tunaarín_{nk} enentáim_{nk}tumar imiantinian ujakmiyai. ²⁵ Tura Juansha ni jákatniuri jeatemam_{nk}taí, chichaak “Átum enentáim_{nk}tarmena núchaitjai. Wikia Yusa anaikiamuri, Kristu tutai, ná_{nk}karmena núchaitjai. Antsu Ni_{nk}nia winia ukunmaru_{nk} winittiwai. Tura Niisha wí_{nk}ja_{nk}ia ti nan_{nk}kaamantu asam_{nk}taí wikia sapatrín_{nk}cha atitrataj tíchamniaitjai” tímiyai.’

²⁶ ‘Pai, yatsurtiram, Apraám weeatiram, tura ashí Yus ashamkarum umirkaitrumna nu, antuktaram. Ju uwempratin chichamka íniuiti, tímiyai. ²⁷ Iis, Jesusa túrunatniurín Yuska yaunchu ni etserniurín áantikrachmakia. Tura ukunam Jerusaré_{nk}numiá shuar ni akupniurijj_{nk}ai tuke sáwartin nuna áujeatskesha pen_{nk}ké nekaacharmiyai. Tuma ásar Jesuska Yusa Uchirinti tícharm_{nk}iyai. Tura, jakatí, tiarmia nu_{nk}, Jesusa túrunatniurín, Yus yaunchu chichakmia nuna, tímiatrusara_{nk} umikiarmiyai, tímiyai. ²⁸ Jesuska pen_{nk}ké tunaamkachunak yamaikia mantamnatí tusa Piratun seawarmiyai, tímiyai. ²⁹ Tura Yusa Papirín ashí Jesusnan tímia nuna tímiannak umikiarmiyai. Tura nuyá krúsnumiá itiarar iwiarsarmiyai. ³⁰ Túramunak Yus jakamunmaya_{nk} iniantkimiyai. ³¹ Jesuska jakamunmaya_{nk} nantaki, yaunchu Kariréanmaya_{nk} Jerusaré_{nk}num Nijj_{nk}ai irutka wéarmia nuna núkap tsawantin pujus wantintiukmiyai. Nú shuaraiti yamaikia Jesusa túrunamurín etserainia nu’ tímiyai.

³² ‘Iisha núnisrik shiir chichaman Yus yaunchu ii apachrín tiarmia nu étsereaji. ³³ Iisha Israer-weeá asakrin, Yuska Jesusan iniantkimia nujai ii apachrín anajmatramia nuna yamá_{nk} uminkiaiti. Kame Sarmu Jímiar papinium ju áarmaiti:

“Ámeka winia Uchiruitme.

Túmaitkiui yamaikia winia iwiaakmar susamuitme.”

³⁴ Tura Yuska Jesusa nantakmiarín jintintiak, tura ni ayash_{nk} káurchatniun jintintiak, chíkich Sarmu papinium juna áantikramiyai:

“Nekas pen_{nk}keran Tawitian anajmatramaj nuna atumin amastatjai.”

³⁵ Tura nú arant, nú paant atí tusa, chíkich Sarmu papinium ju aarma awai:

“Yusa, ame Uchiram aneamna nuna ayash_{nk} káur_{nk}tincha tsankatkashtatme.”

³⁶ ‘Nekaatarum, yatsurtiram, Yuska Tawitia ayash_{nk}in tíchamiyai nuna. Tawitkia Yus tímian amuk jakamiyai. Tú_{nk}rasha ni ayash_{nk}in_{nk} káurmiyai. ³⁷ Tura antsu Yus iniantkimia nuna ayash_{nk}in_{nk} pen_{nk}ké káurchamiyai. ³⁸ Tuma asam_{nk}taí, yatsurtiram nekaatarum. Jesusja_{nk}in_{nk}kete tunáa asakártin. ³⁹ Tura Muisais yaunchu akupkamia nujai tunáa tsan_{nk}kurnarchamnia nu, yamaikia Jesusja_{nk}in_{nk} tsan_{nk}kurnartiniaiti. ⁴⁰⁻⁴¹ Yús_{nk}nan etserin juna áarmiyai:

“Enentáimpratarum wishikkiartintiram. Ashamkatarum. Túrarum men_{nk}katumpratarum. Wi Yus asan, átum pujarmena nu_{nk}, aents túrachminian túratajna nusha pen_{nk}kesh nekaashtatrome, chíkich ujatmainiakuisha.” Tu áarmaiti.

Tuma asam_{nk}taí yatsurtiram, aneartarum atumin nuna túrutmawairum, Yusnan etserin aarma tana nútiksa_{nk}.” Nuna chichaak amukmiyai Papru.

⁴² Tura nuyá Papru Pirnapíjjai jjiinki wéenakui aents chichainiak “Chíkich sáwartincha jútiksarmek etserkatarum” tiarmiayi. ⁴³ Tura nuyá iruntsua tsenkeenak Israer-shuarsha, tura chíkichkia Israer ajasarusha, Yúsan umirkatajtsa wakeriarmia nuka, Páprun Pirnapíncha nemarsarmiayi. Niisha nu áentsun chicharuk “Yusa anenkrattairi enentáimtusum kakartarum” tiarmiayi.

⁴⁴ Tura chíkich sáwartinkia nu péprunmaya ti untsurí aents Yus-Chicham antuktai tusar tuakarmiayi. ⁴⁵ Tura Israer-shuarka ti untsurí áentsun tuakarun wáinkiar, suir iiniak, ti kajerkarmiayi. Tuma asamtai Páprun katsekkar “Ju chichaana júka ántar tawai” tiarmiayi. ⁴⁶ Támaitiat Pápruka Pirnapíjjai arantutsuk chichainiak tiarmiayi “Israer-aentstirmin, atumin emka Yus-Chicham ujaktiniuji. Túrasha átum támaitiatrum nakitramarme. Tura atumsha nakitia asarum, Yúsnum tuke iwiaaku pujuschamnia ajasurme, tímiayi. Tuma asamtai iikia yamaikia Israer-aencha ujaktai tusar weraji, tiarmiayi. ⁴⁷ Nu túratarum tusa, Uunt Yus akuptamtsujik. Jes, ni Papiriin júna tawai:

“Israer-shuarcha Winia nekarawarat tusan anaitiukjame. Tura ashí nunkanmaya aents uwemprarat tusan akuptajme.”

Tu áarmaiti” tímiayi. ⁴⁸ Nú chichaman antukar Israer-shuarcha ti wararsar “Uunt Yus tana nuka imiá péñkeraiti” tiarmiayi. Tura, tuke iwiaaku pujusmin armia nu Yus-shuar ajasarmiayi. ⁴⁹ Tú tumakí Yus-Chicham nú nunkanam ashí jamarmiayi. ⁵⁰ Túrasha nuwan, Yúsan péñker enentáimtuinian tura péñker wekainian, Israer-shuarka yajauch enentáimtikrarmiayi. Áishman penkeri ármia nunasha, yajauch enentáimtikrarmiayi. Túram Páprun Pirnapíncha katsekkar, chichaman irunturar najatawarmiayi. Tú-turukiar ni nunkeya jiki awemarmiayi. ⁵¹ Túram Papru Pirnapíjjai, ju aentska yajauchi-iti tusar, wéenak naweyan nunkan akakekiar ikiukiarmiayi. Túrawar Ikiuniu péprunam wearmiayi. ⁵² Yusa Wakanísha pimiútkamu ásar Yus-shuarka ti warasarmiayi.

14

Ikiuniu Péprunam túrunamia nu

¹ Ikiuniu péprunam Papru Pirnapíjjai jeawar Israer-shuar iruntai jeanam wayawarmiayi. Túrunawar Yus-Chichaman etserkarmiayi. Túram ti untsurí Israer-shuar ármia nu, Israer-shuarcha ármia nusha Yúsan umirkarmiayi. ² Tura chíkich Israer-shuar, Yúsan umirkacharu ármia nu, Yus-shuaran kajerkarat tusar Israer-shuarchan yajauch enentáimtikrarmiayi. ³ Tuma asamtai Papru Pirnapíjjai nú núnkanam ti nukap tsawant pujusarmiayi. Tura Uunt Yúsan enentáimtuinia ásar, arantutsuk Yusa waitnekrattairin etserkarmiayi. Tura, etserinia nu winia kakarmarjainti tusa, Yуска aents túrachminian najanmantikiawarmiayi. ⁴ Tura Ikiuniunmaya aentska jímiar kanakarmiayi. Chíkichkia Israer-shuar tuinia nu nekasaiti, tiarmiayi tura chíkichkia Jesusa akatramurí tuinia nu nekasaiti, tiarmiayi. ⁵ Tura nuyá Israer-shuarchajai Israer-shuarka chichasar pepu uuntríjjai chichasarmiayi. Tura Papru Pirnapíjjai katsekkar tura kayajai tukurar, yajauch awajsatniun nankamawarmiayi. ⁶ Túrasha Papru Pirnapíjjai nuna anturmamkar, Ristra péprunam wearmiayi. Nuyasha Tirpi péprunam wearmiayi. Nu péprusha mai Rikiaunia nunkanam pujuiniawai. ⁷ Tura Yus-Chichaman etserkarmiayi.

Ristra péprunam Páprun kayajai tukurarmiania nu

⁸ Ristra péprunam tunamaru áishman pujumiayi. Ni akiiniamuriya tuke wekaichauyai. ⁹ Nú áishman Papru chichaamun antúu pujumiayi. Túman

Papru úmamkemas nin íismiayi. Niisha, Yusa kakarmarijijai tsuamartatjai, tu enentáimium Papru nekaamiayi. ¹⁰ Tura Pápruka kakantar chicharuk “Wajakim wewe ajasam wajasta” tímiayi. Tutai áishman wiut kutsuar wajaki wekaimiayi. ¹¹ Papru túramia nuna aents wáinkiar Rikiaunia chichamjai unsumainiak “Yuska áishmanka áanin ajasaru in tarutramarji” tiarmiayi.

¹² Pirnapínia, Júpitir náartin yúsaiti, tiarmiayi. Tura Páprunka, Mirkiuriu náartin yúsaiti, tiarmiayi. Pápruka chichau asamtai tu anaikiarmiayi. ¹³ Nú pepru jeamunam Júpitir náartin yusa jeen pujumiayi. Tura Júpitir náartin yusa pátriri kukujin iwiarkamun, wáakajai itiamiayi. Tura niisha ni áentsrijijai wáakan maatai tusar pujuarmiayi. Tura tikishmatrar ajamsatai, tiarmiayi. ¹⁴ Tura Jesusa akatramuri Pirnapísha Páprusha nuna nekaawar, auka nakitiai tusar, ni pushirin jaararmiayi. Túrawar aents írunmanum pachiniawarmiayi. ¹⁵ Tura tiarmiayi “Shuara, ¿urukamtaí áitkiarum? Iisha yúschaitji. Atumea áankiitji, tiarmiayi. Penké ántrarum túrarmena nu ikiukrum, nekas Yus nemarsatarum tusar iisha taji. Nekas Yuska nayaimpincha, nunkancha, nayaantsancha, tura ashí nuí írunna nunasha najanaiti, tiarmiayi. ¹⁶ Jes, aents ni enentáimmarijijain wekasarat tusa Yuska yaunchu tsankatkamiayi. ¹⁷ Tuma ain shuaran pénker awajsamujai Wiitjai Nekas Yus tusa paant awajmamsamiayi. Kame yumi yutuktinian nayaimpinmaya akupturmaji. Tura ejemamar warasarmí tusa yurumak nerektinniasha súramji” tímiayi.

¹⁸ Túrasha Pápruka tímianu támaitiat, nuna anturtsuk wáakan maawar nin tikishmatrar ajamsataitsa wakeriarma nuna suritkiachminiak suritkiarmiayi nu áentsun.

¹⁹ Tura nuyá Antiukíanmaya Ikiuniunmayasha Israer-shuar táarmiayi. Taar nuyá áentsun Páprun yajauch awajsatniun enentáimtikrarmiayi. Tú tutai Páprun kayajai tukurarmiayi. Tura jakayi tiar péprunmaya japiki júkiar arant áepsarmiayi. ²⁰ Túrasha Yus-shuar Páprun tariar téntakarmiayi. Túram nuínkia Papru wajaki wé ataksha péprunam wayamiayi. Tura kashin tsawarar Papru Pirnapíjiai Tirpi péprunam wearmiayi.

²¹ Tírpinium pujusar uwempratin chichaman etserkarmatai untsurí shuar Yúsan umirkarmiayi. Nú shuaran Yus-Chichaman jintintia amuukar Rístranam, Ikiuniunam, Antiukíanmasha waketkiarmiayi. ²² Waketainiak “ashí Yus tana nu tímiatrusrumek tuke umirkatarum” tuíniak Yus-shuaran ikiakáramiayi. Tura nin tiarmiayi, “Yusa akupeamuriin pachiinkiatatj tákurkia ti wáitsatniuitji.” ²³ Tura Yus-shuar írunmanum Yus-shuaran wáinnium anaikiarmiayi. Yurumtsuk Yúsan áujсар chicharainiak, “umirkarumna nú Yus iirmasarti” tiar ikiukiarmiayi.

Yaunchu jíinkiarmla nú Antiukíanam waketkiarmiayi

²⁴ Nuyá Pisitia nunkanam nankaamakiar Pampiria nunkanam jeawarmiayi. ²⁵ Nuí jeawar Pirji péprunam Yus-Chichaman etserkar nuyá Ataria péprunam wearmiayi. ²⁶ Nuí kanunam enkemprar, yaunchu jíinkiarmla nú Antiukía péprunam waketkiarmiayi. Páprusha Pirnapísha tuke jíintsain nú Antiukíanmaya Yus-shuar chichainiak, Yusa takatri túrattarmena nuna Yus waitnentramak yáinmakarti, tiar akupkarmiayi nuik. ²⁷ Nú Antiukíanam jeawar, Yus-shuaran irurar, ashí Yus nin yáinkiarmla nuna ujakarmiayi. Tura nútiksan Israer-shuarchan Uunt Yus uwemtikrataj tusa untsukmia nunasha ujakarmiayi. ²⁸ Tura nuyá Yus-shuarjai Papru Pirnapíjiai núkap tsawant pujusarmiayi.

15

Jerusarénum Yus-shuara úuntrijiai iruntrarmiania nu

¹ Nu tsawantin áishman Israer nunkanmaya wear, Antiukíanam jeawar Yus-shuaran jintintiainiak “Muisais tímia nútiksarmek tsupirnaktin ana nu túrachkurmeka uwemprashtatrumé” tiarmiayi. ² Tuma asamtai Papru Pirnapíjjai, núchaiti tusar, nú áishmanjai ti kakaram chicharnaikiarmiayi. Túrasha nuu enentáiniak enentáimsatniun tujinkiarmai. Tuma asamtai Antiukíanmaya Yus-shuar Páprun Pirnapíncha, atumsha chíkich áentsjai Jerusarénum wéтарum tusar akupkarmiayi. “Tura nuj Jesusa akatramurisha Yus-shuaran wáinniusha iniasrum itiurmankit tusarum pénker nekaatarum” tiarmiayi. ³ Papru Pirnapísha akupkamu ásar wéenak Pinisia nunkanam, Samaria nunkanmasha nankaamainiak Israer-shuarcha Yus-shuar ajasman Yus-shuaran ujakarmiayi. Tura Yus-shuarsha nuna antukar ti warasarmiayi.

⁴ Tura Páprusha Pirnapísha Jerusarénum jeawarmatai Jesusa akatramurisha Yus-shuara wáinniurisha tura penké Yus-shuarsha itiawarmiayi. Tura niisha túrunamia nuna mash etserkarmiayi. ⁵ Túrasha Pariséu aencha, Yus-shuar ajasarmiania nu, wajakiar chichainiak “Muisais tsupirnaktinian akupkama nuna tura nú arant ashí Muisais tímia nunasha Israer-shuarchasha umirkatin áiniawai” tiarmiayi. ⁶ Nuyasha Jesusa akatramurisha Yus-shuaran wáinniusha nu chichaman nekaatai tusar iruntrarmiayi. ⁷ Chichasua umikiarmatai Pítiur wajaki tímiayi, “Yatsurtiram, Yus nuik winia chichartak “Israer-shuarchasha winia chichamprun antukar umikiarat ujakarta” tu anaitiukmia nu nékarme. ⁸ Tura Yus Niñki ashí aentsu enentáin neka asa, Wíi shuar ajasmin áiniawai tusa, ni Wakanin Israer-shuarchanacha susamiayi, in suramsamij nútiksán. ⁹ Yus incha aushatka awajtamsachmaji, tímiayi. Antsu métekraketji. Tuma asamtai niisha Yúsan enentáimtuiniakui, Yuska enentáiyán ni tunaarín japirarmai, tímiayi. ¹⁰⁻¹¹ Tura iikia nékaji niya áantsarik Jesukristu waitnenkartutairijjai uwempraitji. Nuinkia çurukamtia Yus uwempraru áiniawai taisha, átum Muisais yaunchu akupkama nu umikiarat tusarum wakerarum? Nu túrakrumka Yus túrana nu jeatsui tarume. Tura nuka kaarka áintsanchakait. Warí, ii úuntrisha tura iisha ashí Muisais tímia nu umiktin tujinkiamji. Tuma asamtai, çurukamtai nú káarkasha Israer-shuarchasha áentskatin wakerarum?” tímiayi Pítiur.

¹² Pítiur nuna tutai Pirnapísha Páprusha chichainiak, “Israer-shuarchasha ni kakarmarín nekaawarat tusa aentsti túrachminian túratniun Yuska ti yáinmakmaji” tú ujuam mitiat wáinkiar antúu pujuarmiayi. ¹³ Nuna ujasua amikmatai, Jakupusha tímiayi “Yatsurú, antuktarum. ¹⁴ Nuik túrachman Yus túramia nuna ii yachi Semun Pítiur ujatmakji. Júiti: Yuska Israer-shuarcha waitnentak Winia ajasarat tusa chikishtarchiniak achikiuiti” tímiayi. ¹⁵ Jusha Yúsnan etserin yaunchu áarmia nu tímiatrusan túrunayi. Júiti aarma:

¹⁶ “Israer-aents meserar, jea sáanakniua áintsan áiniawai. Tura ukunam ataksha tana, Tawitia jeen sáanaki ana nuna, ataksha najanattajai. Juakai nuna achikian ataksha awajrattajai. ¹⁷ Ashí nunkanmaya aents, Israer-shuarcha ainia nu, winia náarun pachinia nu, Winia eatarat tusan túrattajai. ¹⁸ Uunt Yus nuna yaunchu ujakmiayi.”

Tu áarmaiti’ tímiayi.

¹⁹ ‘Tuma asamtai, yatsurtiram, wi tájarme: Israer-shuarcha Yus-shuar ajasaru áiniana nu, imiatik awajsachmi. ²⁰⁻²¹ Iimiatarum, ashí péprunam Israer-shuar iruntainiam yáunchuyan tuke sáwartin Muisaisa áarmarín jintintiainiatsuk. Tuma asamtai, áyatik áatratai ju “Ántar-yus susamu ana nu ini aisatarum. Ántar-yusan susamu asamtai yajauchiiti. Tura tsanirmawairap.

Tura kajemtikramua nu yuawairap. Tura numpasha umarairap.” Tu áatratai’ tímiayi Jakupu.

²² Nuyá Jesusa akatramurisha Yus-shuaran wáinniusha nuyá ashí Yus-shuaraim enentáimsarmiayi. “Papru Pirnapíjiaí wéakui, shuar níijiaí nenakar Antiukíanam akupkatai” tiarmiayi. Tuma ásar Jútas Parsapasan, Sérasnasha anaikiarmiayi. Niisha mai uunt Yus-shuar áirmiayi. ²³ Tura níijiaí ju papin áarman akupkarmiayi:

“Iisha Jesusa akatramurí tura Yus-shuara wainniurí tura ashí Yus-shuaraitjinia nu, atumin Israer-shuarcha árumna nu, Antiukíanam, Sírianam, tura Sirisianmasha, ju papí akupeaji. ²⁴ Juyá aents ii chichamejainchu atumiin jeartamarai. Túrawar, tsupirnaktin ana nu, tura ashí Muisais akupkamia nu túratarum, turammiarne. Nunasha ni chichamejain turamarmayi. Nu chicham atumsha antukrum nushá enentáimprarum “entá nuyanka itiurkatjik” tárume. ²⁵ Tuma asamtai nu nekaar, iisha métekrak enentáimsar, jimiará áishman akupkatin anaikiamji. Ju áishman ii aneamu yachí Páprujai Pirnapíjiaisha atumin írmasarat tusar akupeaji. ²⁶ Papru tura Pirnapísha ii Uuntri Jesukrístunam surumakarmiayi, ni takatrisha tsuumai ain túrami tusar. ²⁷ Níijiaí Jútassha tura Sérassha akupeaji. Ii chichajnia nuna niisha ni wenejai atumin ujatmakartatui. ²⁸⁻²⁹ Kame túratin asamtai iisha Yusa Wakaníjiaí ju áartin enentáimsaji. Naman ántar-yus susamu ana nu yuawairap. Tura numpasha umarairap. Kajemtikramu ana nusha yuawairap. Tura penké tsanirmawairap. Nuyasha chíkichkia nú nankaamas tíchattaji. Tura antsu nu iniaisarmeka, péñker átatrume. Ayu, Yus wáitmakarti.” Tu áarman akupkarmiayi.

³⁰ Tura Antiukíanam akupkam wearmiayi. Nui jeawar Yus-shuaran irurar, papin súarmiayi. ³¹ Tura Antiukíanmaya Yus-shuarsha nu papin áujar, péñker jintíamu chichaman áarman wáinkiar, ti shiir enentáimsarmiayi. ³² Tura Jútassha, Sérassha, ímia niisha Yus-Chichaman etserin ásar, Yus-Chichaman núkap jintintiawar, Yus-shuaran ikiakáarmiayi. ³³ Tura nui ishichik tsawant pujusarmatai, Yus-shuarka, péñker wakеткиitarum, tiar akupkarmiayi. ³⁴ Tura Séras juáktinian wakerukmiayi. ³⁵ Páprusha Pirnapíjiaí juakarmiayi Antiukíanam. Niisha chíkich aentsjai Yus-Chichaman étseruk puuariamiayi.

Papru atak Yus-Chichaman ipiampártasa wémiania nu

³⁶ Nuyá ukunam Papru tímiayi Pirnapín “Ashí péprunam iisha Yus-Chicham etserkamaj nui Yusai ii yachí ainia nusha urukák pujuinia iyutai” tímiayi.

³⁷ Pirnapíkia Juan Márkusán iijjai winiti tusa wakerimiayi. ³⁸ Tura Pampiria nunkanam Juan Márkussha niisháa weu asamtai tura Yusa takatrín iniaisa asamtai, Pápruka ayatniun nakitramiayi. ³⁹ Papru Pirnapíjiaí ti kakannairar kanakarmiayi. Tura Pirnapíkia Márkusán ayaki Chípriniam wémiayi. ⁴⁰ Pápruka Sérasán ayaki wéakui Yús-shuar Yus yáinmakarti tinia akupkarmiayi. ⁴¹ Tura Siria nunkanmaani wekaráktak, Yus-shuaran ikiakárkutak Sirisianam jeamiayi.

16

Páprusha Sérasjai Timiutéun júkiarmiania nu

¹ Papru Sérasjai Tirpi pepru írkitak Ristra péprunam jeawarmiayi. Tura nui Rístranam Yus-shuaran wáinkiarimiayi, ni naari Timiutéu. Ni nukurínkia Israer-shuar Yus-shuarauyayi. Tura ni aparínkia Kriaku áentsuyayi. ² Tura

Ristra péprunmaya Ikiuniu péprunmayasha Yus-shuar ármia nu, Timiutéu pé_nker wekaawai, tiarmiayi. ³ Kame Pápruka Timiutéun uyuuntusat tusa wakera asa, Timiutéu aparí Kriaku-apachin nekaawarmatai Israer-shuar nuí pujuarmia nu yajauch enentáimpraraín tusa tsupirmamtikiamiayi. ⁴ Tura nuyá Papru Timiutéujai ashí péprunam nuí sétur nuí sétur wéenak Jesusa akatramurisha Yus-shuaran wáinniusha Jerusaré_nnum nuik jintintian umiktarum tusa ujarkutak wearmiayi. ⁵ Tu ujamu ásar Yus-shuar nú arant Yúsan enentáimturar kakararmiayi. Tura ashí tsawant kawen_ki wearmiayi.

Papru iimiarmia nu

⁶ Tura Yusa Wakan_kia Páprun Yus-Chichaman Asia nun_kanam ujakintian tsan_katkachmiayi. Tuma asamtai Pirijia nun_kanam tura Karasea nun_kanam a_rikutak, ⁷ Misia nun_ka jeatniunam jeawarmiayi. Túrunawar “Pitinia nun_kanam wetai” tiarmiayi. Túrasha Yusa Wakan_k nuísha wétinian suritkiarmiayi. ⁸ Tuma asamtai Misia nun_kanam menantki Truas péprunam pachiniawarmiayi. ⁹ Nuí jeawar Papru kashi iimiarmiayi. Masetúnia nun_kanmaya áishman_kan wajan wáinmiayi. Nu áishman_k Páprun chicharuk “Winitritia. Yáint_kiamnium” tímiayi. ¹⁰ Nuyanka tu iimiarmatai, wisha Páprujai wetai tusar iwiarnarmiaji. Tura Yus incha nú nun_kanam ni chichame_k etserkat tusa ti nekas untsurmakrin wéaji, tímiayi.

Jiripius Péprunam túrunamia nu

¹¹ Tura nuyanka kanunam enkemprar Truas péprunmaya jíinkir Samutrásia nun_kanam jeamiayi. Tura kashin tsawar nuyanka katjarar Niápuris péprunam jeamiayi. ¹² Tura Niápurisnumia náwek Jiripiusnum jeamiayi. Nuí Jiripius péprunmanka Rúmanmaya aents matsamsa ármiai. Tura nú péprusha Masetúnia nun_kanam nekas uunt peproyayi. Tura nuísha seturmaji. ¹³ Nuyá sáwartin tsawarmatai pepru ikiukir entsá supichik wémiayi. Yus áujsatniun iruntrarmia nuí pujasar, nuwá iruntrarmia nu Yus-Chicham ujakarmiayi. ¹⁴ Nuí Tiatira péprunmaya nuwá, ni naarí Ritia wáinkiamiayi. Niisha tarach yamakain pé_nkeran súriniuyayi. Yúsnasha shiir awajniuyayi. Yus-Chichaman Papru etserkamia nuna niisha pé_nker anturkamiayi. Túman, Uunt Yus Papru chichaamun umirkat tusa ni enentáin takasmiayi. ¹⁵ Túruna nú nuwá níniurijjai imianmiayi. Tura nuyasha chichaak “Yus-shuar nekas ajasai túrutkurmeka winia je_rarui winitiarum” tímiayi. Tura nuí jeawakrin setumtikrampramiayi.

¹⁶ Tura nuyá ukunam Yus aujsatai tusar wekaamar nuwách nekaamin-iwianch enkemtuamu in_kiunmakmiayi. Nu nuwáchikia misatkauyayi. Niisha nékamkui nérenniurisha ti kuitriniawarmiayi. ¹⁷ Tura nú nuwách incha Pápruncha pataaturmamiayi. Tura kakantar untsumuk “Ju áishman_ksha nekas Uunt Yúsan umirkaru áiniawai. Tuma asa niisha atumin uwempratin chichaman ujatmarme” tímiayi. ¹⁸ Tura nú nuwáchisha ti núkap tsawant tu wekaimiayi. Titmakui, Papru ayanmar iwianchin chicharuk “Jesukristu naarijjai tájame: jíinkitiá ni enentáiya” tímiayi. Tutai íwianchkia nú chichamaik jíinkimiayi.

¹⁹ Tura nuwáchí nérenniurisha, íwianch jíiki awematniun nekaawar, Páprun Sérasnasha kajerak achikar pepru uuntri ísarat tusar ajapén júkiarmiayi. ²⁰ Tura pepru úuntriin ejeniar tiarmiayi “Ju áishman_k Israer-shuar áiniawai. Tura in páchim enentáimtikramainiayi. ²¹ Tura iisha Rúmanmaya aents árin, ii túrachminian, iikia asumprachman jintinramainiayi” tiarmiayi. ²² Tura nuyanka ashí aents Páprun Sérasnasha kajakarmiayi. Túramtai pepru uuntri chichainiak “Pushirí áitkiarum numijjai asutiátarum” tiarmiayi. ²³ Tura nuyá

ti asutsua amikiar sepunam enkeawarmiayi. Tura sepú-iinian chicharuk “Ti péñker iistá pisararain” tiarmiayi. ²⁴ Nu chichaman antuk, sepú-iin ti inít awayámiayi, tura nawen numi najanamujai tee chanuntamiayi. Tú tura ikiukmiayi. ²⁵ Tura kashi ajapén Papru Sérasjai Yusan áujainiak kantampriarmiayi. Tura chíkich enkeamusha nuna antúu pujuarmiayi. ²⁶ Tu pujuiniai aya aneachma ti kakantar uurkamiayi. Tura sepusha muchitramiayi. Túrunamtai sepú wáitirisha ashí urantrarmiayi. Tura aents jirujai enkekar jinkiamusha mash atiniakarmiayi. ²⁷ Túrunamtai sepú-iin shintiarmiayi. Tura wáitisha mash uranar aan wáiniak, enkeamusha jiiniar shiákchariash tusa ni puniariniak ukuiniak máamattsá pujumiayi. ²⁸ Tura Papru untsuak “Amek yajauch awajmamsaip. Ashí pujuiniai” tímiayi.

²⁹ Tutai sepú-iincha jinia ekeemak tsékenki wayamiayi. Tura Papru Sérasjai pujamunam kuraní jearmiayi. ³⁰ Tura aa jiki aniasmiayi “Uunta, ¿warí itiurkattaj uwemprataj tusana?” tímiayi. ³¹ Tutai niisha tiarmiayi “Uunt Jesukristu nekas enentáimtustá. Túrakmeka amesha, tura áminiurmesha uwemprattarme” tiarmiayi. ³² Tura nuyá ashí ni jeen pujuarmia nunasha Yus-Chichaman ujakarmiayi. ³³ Tura tsawant irankai sepú-iincha Páprun Sérasjai numpamnamurin nijiararmiayi. Túramtai nuyasha sepú-iincha nuarijiai uchirijiai imianiarmiayi. ³⁴ Túramtai nuyasha ni jeen júkiarmiayi. Tura nuisha ayurawarmiayi. Tura sepú-iincha niiniurijiai Yus-shuar ajasu ásar ti shiir warasarmiayi.

³⁵ Kashin tsawar pepru uuntri, Páprun Sérasjai akupkata tusar suntaran sepú-iinian akuptukarmiayi. ³⁶ Tura nuyanka sepú-iin Páprun tímiayi “Yamaikia pepru uuntri chichaman akupturmakai, átum wétinian. Tuma asantai yamaikia péñkerak jinkitarum” tímiayi. ³⁷ Túrasha Papru suntaran chicharuk tímiayi “Warí, iisha Ruma aents árinin, niisha chichaman iwiartsuk ashí shuar íimiainiain asutiámamji. Túrawar sepunam enketmamji. Tura ¿urukamtai yamaikia uuk akuptamkataj tusa wakeruinia? Atsá. Antsu uuntcha niniki taar jirmaktiai” tímiayi.

³⁸ Tutai suntarsha waketkiar nuna ujakarmiayi pepru úuntrin. Tutai niisha ti ashamkarmiayi Ruma aentsun nekaawar. ³⁹ Túmak ashamainiak Páprun Sérasan weriarmiayi tsankurturtarum titiai tusar. Nuyasha sepunmaya jikiar “Yamaikia wáitneasrum wetarum” tiarmiayi. ⁴⁰ Papru Sérasjai nuyá jinkiar Ritia jeen wearmiayi. Tura Yus-shuaran ikiakárar ikiukiarmiayi.

17

Tisarúnikianam charaatum ajarmia nu

¹ Papru Sérassha wéenak Ampipuris péprunam Apurunia péprunmasha nankaamakutak Tisarúnikia péprunam jeawarmiayi. Nuí Israer-shuara iruntai jeé ámiayi. ² Tura Pápruka nuna tuke túrin asa nu jeenam wémiayi. Tura nuisha menaintiu sáwartin Yus-Chichaman paant etsermiayi. ³ Tura Páprusha Yus-Chicham tana tímiatrusan jintintiarmiayi. Tura Krístusha wáitias jákatniuyi, tura nuyasha jakayat nantaktiniuyi, tímiayi. Tura nuyasha chicharuk “Wi Jesusnan atumin ujaajrumna nusha Yusa anaikiamurin Kristu tútain tájarne” tímiayi Papru.

⁴ Nuna takui Israer-aents chikishtarchik umikiarmiayi. Túrawar Paprujai Sérasjaisha tsaninkiararmiayi. Tura Kriaku aencha ti untsurí Yúsan umirkarmiayi. Tura nuwa penkeri armia nusha nútiksaran umikiarmiayi. ⁵ Tura Israer-shuarka Yus-shuar ajascharmia nu, Páprun Sérasnasha suiir íisarmiayi. Túrawar chíkich yajauch áishman naki yujáu armia nujai chichasar nu peprunam charáa charáa ajarmiayi. Tura Páprun Sérasnasha achikiar aentsu úuntrin

suruktai tusar Jasun̄ka jeen árenkarmiayi. ⁶ Túrasha Páprun Sérasnasha awetrar, Jasun̄kan tura chíkich Yus-shuarnasha achikiar japirkutak júkiarmiayi. Tura pepru úntr̄in juíniak tiarmiayi “Ju áishmansha ashí nun̄kanam charaatum ajá wekarmia nu yamaikia tímiajai tarutramarji. ⁷ Tura ju Jasun̄ ni jeen itiaarmiayi. Tura niisha ashí mash Rúmanmaya uunt akupniu chichamen nakitiainiawai, tiarmiayi. Tura jes, chíkich akupin awai, tuiniawai. Niisha Jesusaiti, turamainiaji” tiarmiayi. ⁸ Nu chichaman antukar, aents nui pujuarmia nu, úntr̄imiak charaatum ajarmiayi. ⁹ Tura Jasun̄ chíkich Yus-shuarjai Papru nekas awemattaji tusar, paij, kuit ikiuaji, tiarmiayi. Nuna takui pepru uuntr̄i nin akupkarmiayi.

Piríanam

¹⁰ Nuínkia nú kashi Yus-shuar Páprun Sérasnasha Piría péprunam akupkarmiayi. Tura nui jeawar Israer-shuar iruntai jeanam wearmiayi. ¹¹ Piríanmaya aentska Tisarúnikianmaya áentsjainkia nan̄kaamas pénker enentáimkia ármiai. Tuke enentáijiai Yus-Chichaman ántiarmiayi. Túrawar tuke tsawant imia nin̄kisha Papru tana nuna nekasashit tusar Yusa papir̄in ii wearmiayi. ¹² Tuma ásar untsur̄i shuar Yus-shuar ajasarmiayi. Tura Kriaku aents nuw̄a pen̄ker̄i armia nusha áishmansha umikiarmiayi. ¹³ Túrasha Tisarúnikianmaya Israer-shuarka Papru Yus-Chichaman Piría péprunam étserun antukar nui weriar charaatum awajarmiayi. ¹⁴ Túmainiakui Yus-shuar Páprun árutsuk nayaantsanam akupkarmiayi. Tura Séraska Timiutéujai nui Piríanam juakarmiayi. ¹⁵ Tura Páprun nemariarmia nu Atenas péprunam nin ejeyarmiayi. Tura niisha waketainiakui, Papru chichaman akatar akupkamiayi, Sérassha Timiutéusha wárik winiartí tusa.

Atenasnum

¹⁶ Tura Papru Atenas péprunam pujus Sérasnasha Timiutéuncha nákamiayi. Nui nú péprunam ántar-yus ti írunkui Páprusha kúntuts enentáimmiayi. ¹⁷ Tuma asa Israer-shuar iruntai jeanam Israer-shuarjai tura chíkich aents Yúsan enentáimtiarmia nujai chichasmiayi. Tura tuke tsawant pepru ajapén aentsjai in̄kiunaikiar chichasarmiayi. ¹⁸ Nuyá chichaman jintin chíkich naari, ipikiuriu, armia nu, tura chikichcha, ni naari, estuikiu, armia nusha Páprun áujmatsarmiayi. Chikichcha tiarmiayi “Imiá chichamtincha jusha waritramtajak.” Tura chikichcha tiarmiayi “Yajaya yusnan etserniuchuashit.” Páprusha Jesusa túrunamur̄in tura aents jakamunmaya nantaktinian étserkui nuna tiarmiayi. ¹⁹ Nuyanka aents iruntainiam, naari Ariupaku támanum Páprun júkiarmiayi. Nuisha tuke irunin ármiai. Nui Páprun aniasarmiayi “Iisha ame yamaram támena nu nekaatai tusar wakeraji, tiarmiayi. ²⁰ Amesha nusháa chicham jintinaitme. Túmaitkiui ju chichamsha warintiuak tusar nekaatai tusar wakeraji” tiarmiayi.

²¹ (Atenasnumia aencha tura chíkich nun̄kanmaya shuar nui pujuarmia nusha aya yamaram chicham amia nunak ántiarmiayi. Tura aya nunak áujmatiarmiayi.) ²² Nuyanka Papru Ariupakunam ajapén wajakí tímiayi “Atenasnumia áishmantiram, wi nékajai, atumsha atumi yusr̄i ainia nuyá tsurakchamniaitrume, tímiayi. ²³ Kame wi nuik atumí yusr̄i enentáimtutainiam íistaj tukaman nui jeachin iwiamun, JU NEKAACHMA YUSNAITI, tu áarman wáinkiamjai. Wátsek, ju Yus átum nékachatrum tikishmatrumna nuna ujaktajrume’ tímiayi.

²⁴ Nekaatarum, nu Uunt Yuska ashí nun̄kan tura nui írunka nuna najanaiti. Tura Niisha nayaimpin nun̄kancha nérenniurinti. Tura aents najanamu jeanam nú Yuska pujuchuiti. ²⁵ Niisha aents yáinkiat tusa atsumatsui. Warí, imia-nin̄ki Niisha ii iwiaakmar̄in, ii mayattair̄incha tura ashí írunka nunasha

súramtsujik, tímiayi. ²⁶ Nekaatarum. Nuu numpanmayanak ashí áentsun najanamiayi ashí nunkanam matsamsarat tusa. Tura Yuska ii tsawantrin nekapmaiti; ii pujustinniasha nútiksar nakakmiayi. ²⁷ Winia eátkar wáitkiarat tusa Yus nuna túrayi. Túrasha Yus jeashtaka pujurtamtsuji, tímiayi. ²⁸ Jes, iisha Yusjai iwiaakji. Yusjai muchitiaji. Tura Yusjai ii kakarmari takakji. Nútiksar atumí papí-aintri tíchamka “Ashí incha Yus najatmaitji.” ²⁹ Tura iisha Yus najatma asakrin kuri najanamusha, yúsaiti, tu enentáimsashtiniaitji, tímiayi. Tura kuit-yussha, kaya-yussha aents enentáimsar najanamuka, yúsaiti tu enentáimsashtiniaitji, tímiayi. ³⁰ Aents Yúsan nékainiachuk túrawarmiania nuna Yuska yáunchuka pachischamiayi. Túrasha yamaikia Yus ashí aentsun chicharuk “Tunaaruminiá enentáimpratarum” túramji, tímiayi. ³¹ Yuska áishman anaikiaiti. Nú áishman ashí aentsti, yáki péńkeran túriniait, yáki yajauchin túriniait núnaka nekarmattaji. Nú áishman Yus akupkamun tuke enentáimtakui Yus nin anaikiaiti. Tura tsawant nú túrunatin átatna nuna Yus Nińki achikiuiti. Túrasha nekas anaikijai tusa, tura ashí áentstiram nekaatarum tusa nú áishman jakamunmaya iniantkimiayi” tímiayi Papru.

³² Tura nuna jakamunmaya nantaktinian áujmatun antukar chikichcha wishikiarmiayi. Tura chíkich “Yamaikia máakete. Antsu chíkich tsawantin antukmí” tiarmiayi. ³³ Tutai Papru iniaisamiayi. ³⁴ Tura chíkich aentska Papru táman umikiar nin nemarsarmiayi. Nuisha Tiuníseu páchitkiauyayi. Niisha Ariupaku áentsuyayi. Tura nuyasha nuwa, ni naari Tamaris, tura chíkich aencha nútiksara nemariarmiayi Páprun.

18

Kurintiu péprunam

¹ Nuyanka Papru Atenas péprun ikiuki Kurintiu péprunam wémiayi. ² Tura nu Israel-shuaran ni naari Akiran wáinkiamiayi. Akiraka Puntu nunkanam akiiniauyayi. Tura ukunam Itiaria nunkanam pujai uunt akupin Krautiu ashí Israel-shuaran Ruma péprunmaya awemarmiayi. Rúmaka Itiaria nunkanmaiti. Nu awemamu ásar Akira Kurintiunam nuik támiayi nuwe Pírisírajai. Tura Pápruka Akiran chichastaj tusa werimiayi. ³ Akirasha Páprusha mai juna takau ármiayi, tarach ti núparman jea najantain najanin ármiayi. Tuma asamtai Papru Akirai seturmiayi nu takat túrawartai tusa. ⁴ Tura tuke sáwartin Papru Israel-shuar iruntai jean wéuyayi. Nuisha Israel-aentsun Kriaku-aentsnasha nútiksara Yus-Chichaman ujakar enentáimtikrarmiayi.

⁵ Tura nuyá Séras Timiutéujai Masetúnianmaya táarmatai Pápruka mijiatrutsuk Yus-Chichaman étseruk “Yusa anaikiamuri Kristu, atum nákarmenta nu Jesusaiti” tímiayi. ⁶ Tura támaiat nú chichaman nakitiarmiayi. Túmainiak Páprun katsekkarmiayi. Tuma asamtai Papru, nuinkia ikiuajrume tusa, ni pushirin pear tímiayi “Atumek makuumarme. Tura wikia Yusai makuumatsjai. Yamaikia Israel-shuarcha ainia nuna Yus-Chichaman ujakartaj tusan werajai” tímiayi.

⁷ Tura nuyanka Israel-shuar iruntai jeanmaya jiinki, Yúsan enentáimtin áishman Justu jeen wémiayi. Ni jeenka Israel-shuara iruntai jeen ayamach pujumiayi. ⁸ Israel-shuar iruntai jea chicharniuri, Krispu, Uunt Jesusan nekas enentáimturmiayi. Túruna nuaríjjai uchiríjjai sha Yúsan umirkamiayi. Tura chíkich aencha Kurintiunmaya armia nu nútiksara Yus-Chichaman antukar, Jesusan enentáimtusar imianiarmiayi.

⁹⁻¹⁰ Nuyá Uunt Yus Páprun mesekran ipiatkamiayi. Chicharuk “Penké ímiatik awajtamsachartatui Wi ámijiai pujakui. Ju péprunmasha untsurí aents

Winia ajasartin írunui. Tuma asamtai ashamtsuk winia chichamur tuke etserkata” tímiayi Yus.

¹¹ Tura nuĵ Kurintiu peprunam jimiará uwí ejesattuk Yus-Chichaman étseruk pujumiayi. ¹² Tura Kariun, Akaya nunka akupniurĵ anaikiamu aĵ, Israer-aents Páprun kajerkarmiayi. Tura kajerainiak akupniunam irunturarmiayi. Túrawar Páprun júkiar ejeniarmiayi. ¹³ Tu túrawar akupniun chicharainiak “Ju áishman Yúsan umirkatniun Muisais akupkamia núnaka íkias ausháa jintíawai” tiarmiayi. ¹⁴ Tura Páprusha chichastaj táunak, Kariunka Israer-shuaran tímiayi “Jusha nekas tunáa túrakuĵkia, tura akupniun umirchakuĵkia, tárugna nuna anturkaintjarne. ¹⁵ Túrasha aya chichamnak tura aya náarĵniak atumí uuntri akupkamia nunak tau asamtai, atumek nuámtak íistarum tájarne. Wikia nu chichamnum pachinkiatniun nakitiajai” tímiayi. ¹⁶ Taku aa júkmiayi. ¹⁷ Tura nuyanka Kriaku aents Israer-shuar iruntai jea úuntri Sústinisian achikiar awatiarmiayi akupniusha ímmianuman. Túrasha akupĵ Kariunka túranak penké pachischamiayi.

Papru Antiukíanam waketki, nuyá atak Yus-Chichaman ipiampartasa wémiania nu

¹⁸ Tura ni jeen waketkiarmatai, Papru nu péprunam untsurĵ tsawant pujumiayi. Tura nuyasha ukunam Yusaj yachi ármiania nuna áujas ikiuak Pírisírajai ni aishri Akirajai Senkrea péprunam wearmiayi. Nuĵ Israer-shuar túrutain umíak Papru ni intiashin awampramiayi, nuik Yúsan tímiay nuna yamá umíajai tusa. Nuĵkia kanunam enkemprarmiayi Siria nunkanam waketkitiai tusar. ¹⁹ Tura nuyá Ipiſiu péprunam jeawar Pápruka Pírisíran tura Akiran ikiukmiayi. Tura Israer-shuar iruntai jeanam wayá Israer-shuar irunar pujuarmia nuĵai chichasmiayi. ²⁰ Tura niisha Páprun juĵin pujustá tusar seawarmiayi. Túrasha támaiat, tujintiajai, tímiayi. ²¹ Nuyanka áujas ikiuak “Wisha Jerusarénum námper átatna nuna pachíintiuktiniaitjai. Tura Yus akuptakuĵkia atak tatajai atumin ístaj tusan” tímiayi. Tura kanunam enkemar Ipiſiunmaya júnkimiayi.

²² Nuyá Pápruka Sesaria péprunam jeá, nuyanka Jerusarénum wémiayi, Yus-shuaran nuĵ áujataj tusa. Tura nuyá Antiukíanam wémiayi. ²³ Tura Antiukíanam ishichik pujus ataksha weak Karasea nunkanam tura Píriĵia nunkanmaani wekaráktak wémiayi. Tura weak Yus-shuar matsamarmia nuna chicharak ikiakármiai.

²⁴ Tumáa puĵaj Ariĵiántria péprunmaya Israer-aents Apurus Ipiſiu péprunam jeamiayi. Niisha Yusa yaunchu papirĵin ti pénker nekaamiayi. Etserkatni-uncha ti nékauyayi. ²⁵ Uunt Yus tímia nunasha unuimiátrauyayi. Tura tuke enentáĵĵai chichasmiayi. Jesusa túramurĵin pénker jintinniuyayi. Túrasha aya Juan imiakratmanak nekaamiayi. ²⁶ Ju Apurus arantutsuk Israer-shuar iruntai jeanam chichamiayi. Tura Pírisíra Akirajai ni étserman anturkar, nincha akanki júkiar Yusa chichamen ni nekaachmia nuna núkap jintintrarmiayi.

²⁷ Nuyá ukunam Apurus, Akaya nunkanam wétaj takui, Ipiſiunmaya Yus-shuar yáinĵkiar papí áarar atakas akupkarmiayi. Nú áentsnum pénkerak jeat tusar túrawarmiayi. Tura Akayanam jeá, nú áentsun Yusa waitnenkratairĵĵai uwempraru ármia nuna ti yáinĵkiarmiayi. ²⁸ Tura Apurus Israer-aentsjai paant chichasmiayi. Túrasha Yusa Papirĵĵai, Jesussha nekas Yusa anaikiamurĵinti tusa paant jintíak nincha nupetkamiayi.

19

Papru Ipiſiunam jeamiayi

1 Tura Apuruska Kurintiunam pujáí Pápruka náinniumaani wekaráktak, Ipsiunam jeamiayi. Tura nuísha Yus-shuaran wáinkiamiayi. 2 Tura aniasmiayi “Atumsha Yus-shuar ajasmarmena nuí, ¿Yusa Wakaní atumí enentáin enkemturmakaitrum?”

Tutai niisha tiarmiayi “Atsá. Iikia nuka penke áyatkisha ántichuitji Yusa Wakaní awai támaka” tiarmiayi.

3 Tutai Papru aniasmiayi “Entá, ¿nuikia atumsha warí enentáimsarimea imianmiarum?” tímiayi.

Tutai niisha tiarmiayi “Juan jintintramamaj nu iisha enentáimsar imianmaji” tiarmiayi.

4 Tutai Papru tímiayi “Juansha, tunaarminia enentáimprarum imiantiarum, tíchamka. Nuyá tíchamka, winia ukuruí winittiana nu nekas enentáimtustarum. Niisha Jesus Yusa anaikiamurinti, tu ujatmakchamka” tímiayi Papru.

5 Nuna antukar niisha Uunt Jesusa náarín enentáimtusar ataksháa imianiarumiayi. 6 Tura Papru ni uwejejai nin antiñmatai Yusa Wakaní tarurarmiayi. Túram chíkich chichamjai chichasarmiayi. Túrunawar Yus-Chichaman etseriarmiayi. 7 Nusha tuse (12) áishman áirmiayi.

8 Tura nuísha menaintiu nantutin Papru Israer-shuar iruntai jeanam werí Yusa akupeamurín pachis arantutsuk etsermiayi. Túrak nú áentsun ujaak Yúsnan nekasaiti tu enentáimtikrarmiayi. 9 Tura chíkichka ni enentáin ti ikiatsuárarmiayi. Túrunawar umiktinian penké nakitiainia ásar aents ántamunam Yusa jintín penké yajauch chicharkarmiayi. Tuma asantai Papru Yus-shuarnaka akanki yaruak Tiranu iskuirariín tuke tsawant Yus-Chichaman ujaarmiayi. 10 Nuna túruki jimiará uwí etserkamiayi. Túramu asantai ashí Asia nunkanmaya aents Israer-shuar tura Israer-shuarcha Uunt Jesusa túramurín antukarmiayi. 11 Tura aentsti túrachminian túrat tusa Yuska ni kakarmarín Páprun susamiayi. 12 Jáanchniasha pushincha Papru antiñman júkiar, nánkamas jaa shuaran ejetim, nú jaa shuarsha nuna antiñkiar péñker ajaarmiayi. Iwianchrukusha nuna antiñkiar, íwianch jíinkimtai ankant ajaarmiayi.

13 Tura chíkich Israer-aents uwishin áirmiayi. Tura niisha chíkich chíkich péprunam wear iwianchrukun iwianchrín jíirki akuptin áirmiayi. Tuma asa niisha Jesusa náaríjjai iwianchin jíiktiai tusar, iwianchin chichartuiniak “Nu Jesus Papru ujaana nuna náaríjjai jíinkitarum tájarne” tiarmiayi. 14 Tura Israer Patri uuntri Esewia náartin, siati uchirí ármia nu, nuna túriarmiayi. 15 Túrasha Jesusa náaríjjai jíinkitia, tuiniakui, iwianchcha tímiayi “Jesusnaka nékajai. Tura Pápruncha nékajai. Tura atumsha, ¿yátsukaitrum?” tímiayi. 16 Nuna tinia iwianchruku áishman tsékenki nú áishman kan kakaram katsumak nupetkarmiayi. Túram ti katsumam niisha misú tura numpamawar jíinkiar pisararmiayi. 17 Nusha Ipiisu péprunam túrunamiayi. Túrunamtai Ipiisu péprunmaya Israer-shuarsha tura Israer-shuarchasha nuna túrunamun nekaawar ti ashankarmiayi. Tura Uunt Jesusa náarín shiir awajsarmiayi.

18 Túmainiai untsurí shuar Yúsan umirkaru Yus-shuar ajatsuk tunáa túrawarmia nuna paant ujakarmiayi. 19 Tura untsurí uwishniunawarmia nu, wawekratai papí ármia nuna itiarumiayi. Itiar, júka iniayaji tusar, ashí ímiainiaín áesawarmiayi. Nú papí áesawarmia nuna kuítrisha senkuenta mir (50.000) nankaamasauyayi. 20 Tu túrunamtai Uunt Yusa chichame pampanki tura nupetmaki wémiayi.

21 Tuma asantai nuyasha Pápruka Masetúnia nunkanam Akaya nunkanmasha irautjai tu enentáimsamiayi. Tura nuyasha Jerusarénnum waketkitjai, tímiayi. Tura nuyá ukunam Ruma péprunmasha wetajai, tu

enentáimsamiayi. ²² Masetúnia wétin asa Papru ni tsaniakmarin Masetúnia nunkanam emka akupkamiayi. Timiutéun Erastujai akupkarmiayi. Tura nin̄kia Asia nunkanam seturmiayi.

Ipisiunam ti charaatum ámiania nu

²³ Pápruka tuke Ipisiunam pujái, nuyá aents Yus-Chichaman nakitiainiak charaatum ajarmiayi. ²⁴ Iis, nuí Ipisiunam kaya-yusa jee ámiayi. Nu yus núwauyayi, Tiana naartin. Tura áishman, Timitriu naartin, nú jean naku-mak uchichin najanniuyayi kuitjai. Tura niisha nú takatjai ti kuítrintin ajasmiai. Tura chíkich áishman nú takatan takarmia nunasha ti kuítrintin awajsarmiayi. ²⁵ Timitriusha niijiai takarmia nuna ikiaanak, chikichnasha niijiai métek-taku takarmia nunasha ikiaanak niijiai charaatum ajarmiayi. Timitriusha tímiayi “Winia írutramutiram antuktaram. Iisha ju takat takaajnia jujai ti kuit achíatsjik. ²⁶ Tura atumsha ju Papru wáintrumna nu tura ántarmena nu chichaak “Ashí aents najanamu yuska ántar ániawai” tatsuk. Nuna tau asa, juí Ipisiunam, tura arant ashí Asia nunkanam, ni yúsrin iniaisarat tusa enentáimtikrarai. Tuma asamtai untsurí aents, ii yusrí Tiánan ikiuiniak, Papru tana nuna umirainiatsuk. ²⁷ Papru tu étserkui, iisha itiurchat pujuschattajik. Kuit ii achiaj nuka men̄kakashtatuak. Tura nú arantcha ii yusrí Tiana jee shuar iniaisachartatuak. Tura nuyá Asia nunkanmayasha tura ashí nunkanmaya aencha, ii yusrí Tiana shiir awajainia nuna yapajíawar aun nakitrachartatuak” tímiayi Timitriu.

²⁸ Nuna antukar aencha ti kajekar charaatum ajarmiayi. Túmainiak “Ipisiu shuartikia, aya Tianak wakeraji” tu untsummiarmiayi.

²⁹ Nuin̄kia aents páchim enentáimprarmiayi. Túmainiak Masetúnianmaya Kayuncha Aristárkuncha Páprun nemarin ármia nuna achikiar japirkutak iruntai jeanam júkiarmiayi. ³⁰ Tura Pápruka iruntai jeanam wayá chichastaj taun, nuyá Yus-shuar ármia nu, nuna suritkiarmiayi. ³¹ Tura Asia nunkanmaya uuntri, Páprun amikri ásar, ain̄kia wayawain̄ tusar chichaman akuptukarmiayi. ³² Túrasha irunar pujuarmia nu, páchim enentáimprar, chíkichka nusháa untsummiarmiayi. Tura chikichcha nútiksaran̄ ausháa untsummiarmiayi. Tura chíkichka ti untsurí, nekaachar “wariniak irunturara” tiarmiayi. ³³ Chíkich nuí wajarmia nu charaatum amia nuna Israer-shuaran Arejántrun jintintrar eem shitiawarmiayi. Arejántrusha Kayun tura Aristárkuncha ayampruktinian wakerak takamatsatarum tusa uwejen̄ takuimiayi. ³⁴ Túrasha aents iruntrarmia nu, júka Israer-shuaraiti tusa nekaawar, nú arant charaatum ajainiak “Ipisiu shuartikia aya Tianak wakeraji” ímia-imiatainiakua tí nukap pujursarmiayi.

³⁵ Ipisiu pepru papí-aintrisha áentsun itiatmamtik tímiayi “Ipisiu shuártiram antuktaram. Ii uunt yusrí Tiana jee ístinia íchukaitiaji. Tura ni nakumkamurisha nayaimpinmaya iniarmiania nusha íschatniukaitiaji. Tura nunasha ashí aents paant nékainiatsuk, tímiayi. ³⁶ Warí, núnaka ashí aents nékainia asamtai atumsha itiatkatarum. Túrurum enentáimtsuk yajauch túrawairap, tímiayi. ³⁷ Ímiatarum. Ju áishman̄ átum itiarumna nu, ii yúsrin yajauch chicharkacharai. Tura ni jee yajauch awajsacharai. ³⁸ Wats, Timitriu tura niijiai takainiana nu tunáa túramun ujaktai tusar wakeruiniakka pepru pen̄kerin̄ werishtinkiait. Nuin̄kia máimtek iwiainiakartí. ³⁹ Tura chíkich chicham ákuin̄kia pen̄ker iruntrarum iwiaratarum. ⁴⁰ Kame ju yamáí túrunamun nekaawar Rúmanmaya kapitíán “Ii uunt kapitíántri yajauch awajsatai tusarum túrachurmeash” turamchatjiash. Warí, niisha “¿Urukamtai

charaatum ajarum?” takuisha, áimkiatin penké tujinkiattaji” tímiayi. ⁴¹ Tura papí-aint nuna tuasua amik “Áukete. Wétarum” tímiayi.

20

Papru Masetúnia nunkanam Krisia nunkanmasha wémiania nu

¹ Charaatum ajasua amikiarmatai Papru Yus-shuaran untsuk Yusnan jintintrataj tusa ikiaankarmiayi. Tura áujas ikiuki Masetúnianam wémiayi. ² Nú nunkanam wekaráktak, Yus-shuaran jintintrar ikiakármiai. Tura nuyasha Krisia nunkanam jeamiayi. ³ Nui menaintiu nántuk pujusmiayi. Tura nuyanka kanujai Siria nunkanam wétasa pujus Israer-shuar chícham jurusman anturmamak “antsu nunkan Masetúnianmaani wetajai” tímiayi. ⁴ Tura Piríanmaya áishman Súpater naartin Páprun atamprimiayi. Tura Tisarúnikianmaya Aristárkusha Sekuntusha Tírpimaya Kayusha Timiutéusha Asianmaya Tíkikiusha, Trújimiusha ashí nu shuar Jiripius peprunam Páprun atampriarmiayi. ⁵ Túrawar niisha emki wear Trúas péprunam jeawarmiayi. ⁶ Tura iisha wakapruachu tanta yutai jisat amuukamtai, iisha Jiripius péprunmaya jíinkir, kanunam enkemprar Masetúnia nunkanmaya jíinkimji. Tura senku tsawant nankaamasmanum emki wearmia nu amaiyankarmiaji Trúasnum. Tura nuisha siati tsawant pujusarmiaji.

Trúas péprunam túrunamia nu

⁷ Tura tumintin kíarai Jesukrístu enentáimtusar yurumátai tusar iruntrarmiaji. Tura Papru Yus-shuaran jintintramiayi. Kame Pápruka kashinkia wétin asa chichaa-chichaakua kashi ajapén ejemiayi. ⁸ Tura yakí menaintiu pátaranam, tesaamu ámia nui iruntrarmiaji. Nuisha ji ekemarma untsurí irunmiayi. ⁹ Tura nuisha natsa Eutikiu, áankamunam ayamas pujusmiayi. Tura Papru ti esaram chichaakui nu nátsasha kari pujumiayi. Tumáa pujus kanaki yakí pátanmaya akaiki iniaamiayi. Tura penké jakan júsarmiayi. ¹⁰ Tura Papru akaatuki tsuntsumprua miniakkamiayi. Tura Yus-shuaran chicharainiak “Ashamkairap. Ataksha iwiaakui” tímiayi. ¹¹ Nuyá ataksha Papru wakamiayi. Tura tantan puukar yurumáwarmatai, tuke chichaa-chichaakua tsawantmarmiayi Papru. ¹² Eutikiuncha iwiaakun ni jēen júkiarmiayi. Tura ashí aents shiir enentáimsarmiayi.

Miritiunam wearmiayi

¹³ Wats, Papru Asun péprunam nunkan we jeatajtsa wakerimiayi. Tura incha, átumka kanunam wétarum, turamkurin, iikia emkir wémaji Asunnum. ¹⁴ Nui Asunnum inkiunaikiar, Páprusha kanunam enkempramtai, Mitiríniniam jeamji. ¹⁵ Tura nuyá jíinkir, kashin tsawarar Sámus péprunam jeamji. Tura nuyanka Trujiriunam jear ayampramji. Nuyasha kashin tsawarar Miritiunam jeamji. ¹⁶ Pápruka Jerusarénum wari wétajtsa wakerimiayi, pinitiústis naartin jístatin pachiinkiataj tusa. Tuma asamtai, Asia nunkanam ti núkap pujustinian nakitiak “Ipisiunam wéhattajai” tímai.

Papru Ipisiunmaya úuntrin áujsamiania nu

¹⁷ Túrasha Papru tuke Miritiunam pujus, Ipisiunmaya Yus-shuara úuntrin winitiarum tusa untsukarmiayi. ¹⁸ Ni taarmatai Papru tímiayi “Atumsha wi Asia nunkanam pujusan itiura túraj nu nékarme. ¹⁹ Atumjai tuke tsawant pujumaj nui, nankaamantuchu enentáimtumasan, úutchim winia Úuntrun takatrin takasmiajai. Tura Israer-shuar yajauch awajtustinian wakerutainiajn tuke takasmiajai. ²⁰ Ashí pénger ana nu nekaatarum tusan mijiatrutsuk

jintintiamjarme. Iruntramarmena nui tura ankant ankant atumí jeen pu-
jumarmena nuisha Yus-Chichaman ujakmajrume, tímiayi. ²¹ Tura Israer-
shuarnasha Israer-shuarchancha nútiksanak, enentai yapajiárum Uunt Je-
sukrístu umirkatarum, tímiajrume. ²² Tura yamáí Jerusarénum wéajai, Yusa
Wakaní túrutkui. Nuisha túrunatana nunasha nekamatsuk wéajai. ²³ Tura Yusa
Wakaní iniakturkui juna nékajai, ashí pepru wi jeattajna nui enketátaí tusar
nákarainiawai. Tura ti wáitsatniun nekapsattajai. ²⁴ Kame wikia jákashtajash.
Túrasha warí winia itiurtawa. Wikia Yusa jintiin warasan wekasataj tusan
wakerajai. Yusai wea-wéakuan jáakun iniaísataj tajai. Tura nuyá takatan
Uunt Jesus surusmia nuna péñker amuktaj tusan wakerajai. Jes, Jesus
chichartak “Yus wáitnenkartana nú chicham etserkata” turutchamka’ tímiayi.

²⁵ ‘Tura, yatsurtiram, ashí Yúsnan atumin paant ujakjarme. Yamaikia
wíniaka atakka wáitkiashtatrume. ²⁶⁻²⁷ Nekaatarum, ashí Yusa wakeramurín
wisha penké úurtsuk ujakjarme. Tuma asamtai atumin títiajtsan wak-
erajrume, chikichík shuara wakaní jinium wéakuisha wikia penké maku-
umashtatjai. ²⁸ Tuma asamtai emka atumek ímiastarum. Túrarum nuyá
chíkich Yus-shuar ístarum. Yus-shuaran wáinin ajastarum tusa, Yusa
Wakaní achirmakurme. Yus-shuar ainia núnaka ni numpejain Uunt Jesus
sumakchakait. ²⁹ Kame wi wémataí, chíkich táartatui. Núnaka nékajai. Tura
niisha, Yus-shuaran amukartajtsa wakeriartatui, uunt yawasha murikiun
amuinia áintsan. ³⁰ Túrasha nemartusarat tusar wakeruiniak atumjiniän
wait chichaman unuikiartin wantinkiartatui. ³¹ Tuma asamtai yatsurtiram,
aneartarum. Wisha menaintiú uwitin tsawajsha káshisha úutchim ankant
ankant unuiniamajrumna nu kajinmatkiirap’ tímiayi.

³² ‘Pai, yamaikia, yatsuru, Yus yáinmakarti. Yusa anenkrattairi nékaitrumna
nú chichamsha kakarmaiti. Nú chicham átum katsuárar kakaram wekasat-
niun yainmakarti. Kame nú chicham atumí enentáin pujakui, Yus ni shuarin
matsamsatniun anajmatramia nui pachiiinkiatarme. ³³ Wats, wisha chi-
kichík shuara kuítrín wariríncha wakerutkachuitjai. ³⁴ Antsu winia uwe-
jrujai takasan wi atsummiaj nuna sumarmakmajai. Tura winia írutkamuru
atsumamuríncha wiki sumakmiajai. Nuka paant nékarme. ³⁵ Kame átum
takasrum, atsumainia nusha yáintarum tusan jintintiajrume. Wats, Uunt
Jesusa chichame enentáimsami. “Achiana nujainkia nankaamas, súana nuka
shiir waraawai” tíchamka” tímiayi.

³⁶ Nuna tuasua amik Papru tikishmarmiayi. Tura ashí niijiai irun-
trarmia nú shuar Yúsán áujsarmiayi. ³⁷⁻³⁸ Tura Papru nuik chichaak “Atakka
wáitkiashtatrume” tiniu asamtai, ti kúntuts pujuiniak, úutchim Páprun miniak-
sarmiayi. Túrawar kanunam ejeniarmiayi.

21

Papru Jerusarénum wémiania nu

¹ Tura nuyá Yus-shuar aujsa ikiukir kanunam enkempramji. Tura
ínkiuasmak Kus péprunam jeamji. Tura kashin tsawárar Rútas péprunam
jeamji. Tura nuyanka Patara péprunam jeamji. ² Tura nui Pataranam pujusar,
chíkich kanu Pinisia péprunam wea wáinkiamji. Túmakui nui enkemprar
wémaji. ³ Nui wésar Chipri nunakaka wáinkiamji. Chíprikia menanmaaní aa
ikiuakur Sírianam jeamji. Kánuka Tiru péprunam jeá pujustiniuyi, káarak núkap
ikiuktin akui. Tuma asamtai iisha Tírunam jear kanunmaya jíinkir péprunam
wayamji. ⁴ Nui Yus-shuar wáinkiar nuiñ siati tsawant pujusmaji. Tura
Yus-shuaran Yusa Wakaní ujakam Páprun chicharainiak “Jerusarénumka
wéchatniuitme” tiarmiayi. ⁵ Tura siati tsawant nankaasmataí jíinkimji.

Ashí Yus-shuar ármia nu núwentuk uchirtiuk nemartamkamji, péprunam iniankatmaktiai tusar. Káanmatkanam jear tikishmarar Yus áujksamji. ⁶Tura nu amikiar nuin̄kia áujnaisar ikiukiarmaji. Tura iikia kanunam en̄kemprakrin nin̄kia ni jeen waketkiarmiayi.

⁷Iisha Tirunmaya entsak wea-wéakuar Turumáitianam nuin̄ jíntramji. Tura nu jearsha Yusaj̄ yach̄i ármia nu chichasar nuin̄ chikichkí tsawant pujumaji. ⁸Kashin tsawarar nuyá jínkir nun̄kan̄ weri Sesaria péprunam jeamji. Nu jiripi jeen jear pujumaji. Jiripikia Yus-Chichaman etserni-uyayi. Nuik Jerusarénn̄num siati áishman̄kan̄ Yusa takatr̄in wáinkiarat tusar anaikiarmia nú Jiripiiti. ⁹Jiripisha kuaru nawantr̄in yarumkauyayi nuatnakchan. Niisha Yusa chichamen etserin ármiai. ¹⁰Tura iisha Jiripi jeen wárum tsawantak pujarin Jutía nun̄kanmaya aents Yusa etserniuri, Akapu náartin támiayi. ¹¹Niisha taa Papru emenmamkar̄in achikmiayi. Tura achik nin̄ki ni nawen tura uwejen̄cha jin̄kiamamiayi. Nuna tura tímiayi “Yusa Wakan̄i tawai, juna emenmamka nérenniur̄in Israer-aents jútikia jin̄kiáwar Israer-shuarchanum surukartatui, tawai” tímiayi. ¹²Iisha nu antukar Papru tímaji “Jerusarénn̄numka weep.” Sesarianmaya Yus-shuarsha núnisan̄ Páprun tiarmiayi. ¹³Tutai Papru tímiayi “¿Urukamtai útkuram winia enentáruj̄ kúntuts awajtarum? tímiayi. Wi Jesusna asamtai Jerusarénn̄num jin̄kiataniakuisha mántuiniakuisha ashamsaj̄i” tímiayi. ¹⁴Tura iisha Papru emetatai tukamar tujinkiar “wats, nuin̄kia Uunt Yus wakera nu tímianak atí” tiarmaji.

¹⁵Nu tiri iniaisar iwiarnarar Jerusarénn̄num wémaji. ¹⁶Chíprinmaya yaunchu Yus-shuar Manasuñ ni jeen Jerusarénn̄num takakuya nuna ikiatmastianian wakerimiayi. Tuma asamtai Sesarianmaya ishichik Yus-shuar nemartamainiak Manasuñnasha júkiarmiayi.

Papru Jakupu jeen irastajtsa wémiania nu

¹⁷Tura iisha Jerusarénn̄num jeawakrin, nu j̄ warasar Yus-shuar ti shiir áujtamsarmaji. ¹⁸Tura kashin tsawar Papru ímiak Jakupu jeen wémiai. Nuisha Yus-shuara uuntri matsamarmiayi. ¹⁹Páprusha áujas amik, Israer-shuarchanum ni étsermaj̄i Yus túramia nuna yámankamtaikniumiá jukí chikichkimas ujakar ujakar awajsamiayi. ²⁰Papru taman antukar “Yus ti péñkerchakait” tiarmiayi. Tura Páprun j̄ chichaman tiarmiayi “Támena nu péñkeraiti, yatsurú, túrasha Israer-shuar timiá untsur̄i Yus-shuar ajasu áiniayat, “ashí Muisais akupkamia nu umiktiniat̄i” tuiniawai. ²¹Nú arant yajaya aents taar, chichartamainiak “Pápruka nusháa jintintiui, turamainiawai. Israer-shuar chikich nun̄kanam pujuinia nuna Muisaisa akupkamur̄i umirkashtin Pápruka jintintiui, turamainiawai. Israer-shuarti tsupirnak̄tin ana nu túrashtinian tura ashí Israer-shuar túrutai iniaisatniun Papru imia Israer-shuaran jintintui, turamainiawai.” ²²Wátsek, yatsuru, nuin̄kia iturmain̄kit. Ame tátintrumin aents nekaawarka j̄ kajertamainiak káutramkachartatuak. ²³Wats, antsu nuin̄kia, j̄ túrata yatsuru. J̄ kuaru áishman̄ Yúsan yaunchu tiarmia nuna umiktasa pujuiniawai. ²⁴Ni júkiarta. Túram niisha Muisais akupkamia nuna umikiar nijiaamainiakui, amesha nijiaamarta. Núnismek kuítniasha ni susatin ana nu amesha akikmatkarta. Niisha ashí umikiarmatai, ni intiash̄in awampratin áchattawak. Nu áishman̄ka intiash̄in awampran Israer-aents wáinkiar, anturtamkarainia nu, nekaschaiti, turamartatui. Antsu, Pápruka Muisais akupkamia tímianak túrawai, turamartatui. ²⁵Túrasha yatsuru, nekaata, Israer-shuarcha Yus-shuarka papí yaunchu akuptukmaji. Israer-shuarti túratin ana nu ashí mash túratarum tátsuji, tu áatramji. Tura antsu naman̄ken máawar ántar-yusan susamu yúashtiniatrume, tímaji. Tura numpasha umarchatniuitrume,

kajemtikramusha yúashtiniaitrume. Tura tsanirmashtiniaitrume. Tu áatramji” tiarmiayi.

Páprun achikiarmiania nu

²⁶ Nuyá tiniu asamtai Papru nú kuaru áishmankan júkiarmiayi. Tura kashin tsawarar nímiak nijiamararmiayi, Muisais timia nútiksaran. Tura Yúsan tiarmia nuna wárik umiktinian tura Muisais timia nuna Yus súsatniun ujaktajtsa Papru Yusa Uunt Jeen wayamiayi. ²⁷ Túrasha nu siati tsawant amusattuk ajatemsaj, Ásianmaya Israer-aents Paprun Yusa Uunt Jeen pujan wáinkiararmiayi. Túrawar charaatum ajakiar Páprun achikiarmiayi. ²⁸ Achikiar untsumainiak “Israer-shuártiram in yáinmaktarum. Ashí nunkanam Muisais akupkamuríncha Israer-shuarti túrutairíncha, ju Yusa Uunt Jeencha yajauch chicharea nu achikji, tiarmiayi. Warí, Kriaku áentsun awayáshtinia nuna awayá nujaj yamá ju Jeencha yajauch awajturmaji” tiarmiayi.

²⁹ Jes, nuik Ipsiunmaya Trúpimiu Páprujaj péprunam wekaan wáinkiaruyi. Wáinkiaru ásar, Yusa Uunt Jeen wayayi, tu enentáimsar tiarmiayi. ³⁰ Tuiniakui aents ashí mash charaatum ajakiar tseke táarmiayi. Túrawar Páprun achikiar japirkutak Yusa Uunt Jeeya júkiarmiayi. Túrawar wáitíncha nú chichamaik epentrarmiayi. ³¹ Tura maatai tusar matsamtuinijaj suntara kapitíántri Jerusarénumiá aents ashí charaatum ajainian antukmiayi. ³² Kapitíáncha ni suntarín tura sarjentuncha irur tseke weriarmiayi aents pujuarmia nu. Aencha suntaran tura kapitíánin wáinkiar, Páprun asutíniayat iniaisarmiayi. ³³ Kapitíánka Páprun jeari achikmiayi. Tura jimiará jirujaj jínkiarmiayi. Nuyasha aniasmiayi “¿Niisha yait? ¿Warinia túrait?” tímiayi. ³⁴ Túrasha aencha untsurí chichaman untsummiarmiayi. Túmainiakui kapitíáncha penké nekaachmiayi. Tuma asamtai Páprunka suntar pujamunam júkiarmiayi. ³⁵ Tura suntar pujamunam wáitíniam jeawar Páprun entsaki júkiarmiayi aents imiá kajerainia asamtai. ³⁶ Tura aencha ukunmaanij pataakar, mantamnatí, tu untsummiarmiayi.

Papru chichastinian seamiania nu

³⁷ Tura Papru suntarnum awayám, Páprusha kapitíánin Kriaku chichamjaj chichaak “Wi ishichik chichasaintjame” tímiayi.

Tutai kapitíán chichaak “Warí, ¿amesha Kriaku chicham chichastin nékamek? tímiayi. ³⁸ Nuínkia amesha ¿Ejiptunmaya shuárchakaitiam? ¿Nuik kuaru mir (4000) aents, mankartin tutai atsamunam yaruakchamkam? ¿Kapitíánjaj meset najanataj tusa túrachmakum?” tímiayi.

³⁹ Tutai Papru tímiayi “Núchaitjai. Antsu wikia Israer áentsuitjai. Sirisia nunkanam uunt pepru Tarsu náartin ana nu akiiniaitjai. Tura waitneasam ju aents chichastin tsankatrukta” tímiayi.

⁴⁰ Tura kapitíán, ayu, tutai, Papru watainiam wajas, mitiat pujustarum tusa uwejen takuimiayi. Tura aents itiatkarmatai Israer-chichamjaj chichasmiayi.

22

Papru áentsun timia nu

¹ Papru chichaak juna tímiayi: “Yatsurtiram, tura úuntur árumna nu antuktarum. Wikia Pápruitjai. Kíishtumaktaj tusan títiatjana nu waitneasrum anturtuktarum” tímiayi. ² Tura Papru Israer chichaman chichaakui, aents nuna antukar nú nankaamas itiatkarmiayi. ³ Nui Papru chichaak “Wikia Israer-shuaraitjai. Tarsu pepru Sirisia nunkanam ana nu akiiniaitjai. Túmaitatnak

juj Jerusarénum tsakaruitjai. Tura unuikiartin Kamaríran chichamen unuimiaruitjai. Tuma asan ii uuntrj akupkarmia nuna ashí umirkaitjai. Tura átum yamá túrarmena nuna wisha nútiksanak Yusna ana nuna tuke enentáijjai wakerukuitjai. ⁴Tura Jesusan umirkaru ármia nuna máataj tusan pataatukni wekaimiajai. Túran áishman kan nuwan cha achikian sepunam enkeataj tusan túrimiajai. ⁵Israer-patri uuntrisha Israer-shuara uuntrisha Tamaskunam íshuar susatá tusar papin ataktusar akuptukarmia nuna nin kía nékainiawai. Jesusan umirkarun achikia ikiaan kan juj Jerusarénum asutniáwarat tusan werimjai' tímiayi.

(Túramurj 9.1-19; 26.12-18)

⁶“Tura wi jintiá wéai Tamaskunam jeastatuk ajasai nantu tutupin aj aya aneachma nayaimpinmaya newaat wajantruntmiayi. ⁷Túrunam tai wisha nun ká iniaarmajai. Nuyanka chichaamun antukmajai. Chichartak “Sauru, Sauru, ¿urukamtia imiá pataaturam?” turutmiai.

⁸Takui wi aniasmajai “¿Amesha yáitiam, Uunta?”

Tutai “Wikia Nasarénumia Jesusaitjai. Ame pataaturmena nútjai” turutmiai.

⁹Wijjai pujuarmia nu, newaat wajantun wáinkiar ti ashamkarmai. Túrasha nin kía túrutun antukcharmai. ¹⁰Tura wi tímiajai “¿Nuinkia, Uunta, warí itiurkattaj?” tímiajai.

Tutai Uunt chichartak “Wajakim Tamaskunam wetá. Nuisha ame túrattamna nuna ujatmakartatui” turutmiai, tímiayi. ¹¹Kame wikia nú newaat ajakun ísan jiru kusurmai. Tuma asam tai winia tsaniakmar enkeki jurukiar Tamaskunam ejetiarmai' tímiayi.

¹²Papru tuke aujmatki wéawai. “Tura nuj Tamaskunam áishman Ananías pujumai. Niisha Yúsan aneak, Muisais akupkarmia nuna umirkauyi. Tura nú péprunmaya Israer-shuar ármia nu nin pénger enentáimtiarmiai. ¹³Nú Ananías winia írsataj tusa támai. Taa turutmai “Yatsuru Sauru, pénger iimtia.” Túrutkui nú chichamaik pénger íimtiajai. Túrunan Ananíasnasha wáinkiamjai. ¹⁴Tura Ananías chichaak “Iwiaaku Yus, winia wakeramurun nekartuat tusa winia Uchirnasha, tunaarinchaa nuna, ísat tusa, winia chichampruncha antukat tusa ámin yaunchu Yus anaitiamkaiti. ¹⁵Amesha Papru, Yusna ana nu ísumna nusha antukumna nusha ashí aents ujakartatme. ¹⁶Tuma asam tai yamaisha ¿warí nákam? Tunaarun asakátrurat tusam Uunt Jesus enentáimtusam weme ni náari pachisam imiantia” turutmai.’

¹⁷“Tura Jerusarénum waketkin Yusa Uunt Jeen wémajai Yúsan áujsataj tusan. Nuji ímiarmajai. ¹⁸Nuji Jesus chichartak “Juj Jerusarénum Wíi túramur etserkattamna nuna antukchartatui. Tuma asam tai warí jíinkim wetá” turutmiai.’

¹⁹“Túrutkui wi tímiajai “Túrasha Uunta, juyá aents wi Israer-shuara iruntai jeen wayan Ámin umirtamkarmia nuna nuj matsatun achikian awatin sepunam enkeawarmia nuna nékainiawai. ²⁰Tura nuyá Áminiu etserniun Estepankan máiniakuisha wisha wajamjai. Túruiniakui, “péngeraiti” tímiajai. Nú arantcha ni pushirín írsamjai” tímiajai.’

²¹“Túrasha Uunt Jesus winia turutmai “Wetá. Israer-shuarcha matsatania nuj akupkatjame” turutmai” tímiayi Papru.

Suntara kapitántrijn túrunamia nu

²²Nuji matsamarmia nu, núnaka antukarka untsumtan juáriarmiayi. “Juka mantamnatí. ¿Urukamtaik iwiaakusha pujusat?” tiarmiayi. ²³Tura aentska Paprun kajerainiak, ti untsumainiak pushirín tujaat ajapawar

nun_̄kancha nan_̄kimkiamaikia ajarmiayi. ²⁴ Tura kapitián nuna wáiniak Páprun suntar pujamunam awayámiayi. Tura suntaran chicharuk “Átum asutiárum áimtikiatarum. ¿Urukamtaik aents nin kajerainiak imiá untsuainia? Nekaatarum” tímiayi. ²⁵ Tura Páprun asutiátai tusar jin_̄kiárar awajsam Pápruka kapitiánin chicharuk “¿Rúmanmaya aents áyatik asutiámniakait, ni túramur_̄ nekartsuk?” tímiayi.

²⁶ Nuna táman antuk kapitiáncha uunt kapitiánin ujaktaj tusa werí chichaak “Maaj, túrataj tamena nu anearta. Ju áishman_̄ Rúmanam pachitkaiti” tímiayi.

²⁷ Nuna antuk uunt kapitián Páprun werí aniasmiayi “¿Amesha nekasmek Rumanam pachitkaitiam?” tímiayi.

Tutai Papru “Ee” tímiayi.

²⁸ Tutai “Wikia ti kuítian akikmakmiajai Rúmanam pachiiinkiatniun” uunt kapitián tímiayi.

Tutai Papru tímiayi “Túrasha winia aparka Rúmanam pachitkia asamtai, wisha Rúmanam pachiiinkian akiiniaitjai” tímiayi.

²⁹ Nuna takui Páprun asutiátaj tiarmia nuna wárik iniaisar jíiniar wearmiayi. Tura imia uunt kapitiáncha Rúmanam pachitkian jin_̄kiá asa ashankamiayi.

³⁰ Tuma asa kashin tsawar uunt kapitián, urukamtaik Páprun imiá kajerainia, nekaataj tusa wakerak Paprun werí jin_̄kiámun atirmiayi. Tura Israer-patr_̄i uuntr_̄in chíkich naamka armia núja_̄isha ikiaankamiayi. Tura nuin_̄kia ni matsatmanum Páprun itiar ajapén awajsamiai.

23

Israer-aentsu Úuntr_̄in Papru timiania nu

¹ Papru Israer-patr_̄i naamkar_̄in úmamkes iis “Wíi shuartiram antuktatum. Úchichik tuke yamaisha Yus íimmianum pé_̄nker wekainuitjai” tímiayi.

² Papru nuna takui Israer-patri uuntr_̄i Ananías, ni suntar_̄in Papru_̄i ayamas pujuarmia nuna “Wenunam awatiarum” tímiayi.

³ Tutai Papru tímiayi “Tsej, jimiará chichamtinia íimiatá, Yus amincha asutiámattawai. Muisais akupeana nuna umiatsui tusam yajauch turutattsam pujame. Entá, ¿nuin_̄kia urukamtia Muisais tímia nuka iniaisam ame suntarum winia asutiátatum tame?” tímiayi.

⁴ Tura nuna takui nu_̄i wajarmia nu Páprun tiarmiayi “¿Maaj, amesha Patri uuntr_̄i imiá yajauchisha chichaream?”

⁵ Tutai Papru tímiayi “Yatsuru, wisha Patri uuntr_̄i áutskaitia tíchamjai. Nékaitkiunka núnaka tícha_̄ajjai. Kame wisha nékajai, Yus-Chichamnum tawai “Atumí uuntr_̄i yajauch chicharkairap” tawai” tímiayi.

⁶⁻⁸ Israer-aentsu úuntriya jimiará írutka ármiayi. Satuséu aents tura nuyá Pariséu aents nusháa írutkan Pápruka nekaamiayi. Kame Satuséu aentska, jakamunmaya nantaktincha Yusa suntar_̄isha aentsu wakan_̄isha tura iwianchcha atsawai, tiniu ármiayi. Antsu Pariséu aentska, nuka ashí awai, tiniu ármiayi. Nuna nekáa Papru kakantar chichaak “Wikia Pariséu áentsuitjai. Wíi shuarsha Pariséu áiniawai. Wikia ashí shuar jakamunmaya ukunam nantaktin átatui tu jintiamun, nekaatai tusar itiararmiayi” tímiayi. Tura Papru nuna takui Pariséu aents tura Satuséu aencha nuámtak kajernaikiarmiayi. Túrunawar kánasara_̄n nusháa nusháa enentáimprarmiayi.

⁹ Nuin_̄kia ashí aents charaatum ajarmiayi. Tura Israer-shuara jintinniur_̄i Pariséunam írutka armia nu wajakar tiarmiayi “Ju áishman_̄ tunaan pen_̄ké túrichuiti. Yusa suntar_̄i chíkich wakancha nin nekas chichaschamashi. ¿Ya neka?” tiarmiayi. ¹⁰ Ti charaatum ajainiakui suntara kapitiántr_̄i Páprun

achiarchartimpiash tusa suntaran untsuk, “Jiiktiarum, túrarum suntar pujamunam awayátarum” tímiayi. ¹¹ Nuyá kashi Papru Uuntri mesekra ipiatuk “Kakaram ajasta, Papru. Ju Jerusarénum winia ujakarumna núnismek Rúmanmasha ujaktatme” tímiayi.

Páprun máatniun wakeriarmiania nu

¹² Nuyá kashin tsawarmatai Israer-aents Páprun maatai tusar chichaman jurusarmiayi. “Papru máachkurkia yurumtsuk tura penké úmutsuk matsamsattaji. Máachrikia yajauchiniam yuminkramu atai” tiarmiayi. ¹³ Nuna tiarmia nuka kuarenta (40) nankaamas ármiai. ¹⁴ Tura Israer-patri úuntrin tura Israer-aentsu úuntrincha weriar “Papru máachkurkia penké yurumtsuk pujustatji. Máachrikia yajauchiniam yuminkramu atai” taji. ¹⁵ Tuma asamtai ashí Israer-patri naamkarijjai suntara kapitiántri seatarum, Papru tatí tusarum. “Kashin Papru itiata, titiarum. Papru tana nu iisha nekas nekaatai tusar wakeraji” titiarum. Túrawakrumin iisha maatai tusar ninikia táatsain náakattaji” tiarmiayi.

¹⁶ Tura Papru awe nú chichaman antuk suntar pujamunam taa Páprun ujakmiayi. ¹⁷ Tuma asamtai Pápruka suntara kapitiántrin untsuk “Ju uchi uunt kapitiánnum jukitia. Niisha chichaman takakui” tímiayi.

¹⁸ Kapitiáncha uchin uunt kapitiánnum ejé tímiayi “Papru enkeamu pujana nu winia untsurak “Ju uchi uunt kapitiánnum jukitia. Chichaman takakui” túrutui” tímiayi.

¹⁹ Uunt kapitiáncha nú uchin enkeki arantach jukí chicharuk “¿Warí turut-tiaj tame?” tímiayi.

²⁰ Tutai uchi tímiayi “Israer-aents Páprun chichaman jurusarai. “Papru túramuri ti paant nekaatai tusar kashin Israer-shuara uuntrin ejetarum” turamartatui. ²¹ Tura amesha nuna takui anturkaip. Kuarenta (40) nankaamas jintiá akirtua pujurainiawai. Tura “Papru máachkurkia yurumtsuk tura úmutsuk matsamsattaji” tuiniawai. Tuma asamtai yamaisha ámin tití tusa nákarainiawai” tímiayi uchi.

²² Tura uunt kapitiáncha uchin chicharuk “Ame túrutmena nu chíkich aents penké ujakaraip’ tímiayi. Nuna tj, uchin akupkamiayi.

Akupin Piriksai ejetiarmiania nu

²³ Nuyanka uunt kapitiáncha chíkich kapitiánin jímiaran itia chichaak “Urum, kashi ajapén ajastatuk aj, untsurí suntar ikiaankarta. Jimiará sián (200) aya náwek, setenta (70) kawainium eketka, nuyá chíkich jimiará sián (200) nánkijjai Sesaria nunkanam wétin iwiarata. ²⁴ Páprusha kawainium ekemkatin iwiarturta. Túrarum penkerak ejetarum akupin Piriksai” tímiayi. ²⁵ Tura nijjai ju chichaman áatrar akuptukmiayi:

²⁶ “Ti penker akupin Píriks, wikia Krautiu Rísias ju papin áatjame. ²⁷ Israer-aents ju áishman kan maatai tusar wakeruiniak achikiarmiayi. Tura niisha Rúmanmaga áentsuitkui wikia nuna nekaan suntarjai werin jukimjai. ²⁸ Wikia ¿urukamtaik achikiaruit? tusan Israer-patri naamkarin jukimjai nin. ²⁹ Páprunka ii uuntri akupkamurin umiatsui tusar nin kakeriarmiayi. Pápruka yajauch túrachu asa mantamnachminiuyayi. Sepunmasha enkemachminiuyayi. ³⁰ Tura wisha Israer-aents nin máatniun chichaman jurusman nekaan amiin akuptajme. Nuyasha nin kajerainia nunasha tajai “Atumsha Piriksai werum átum warinma kajerarum nu titiarum” tajai. Ayu. Júchiniak tájame.” Nuna tu áatar akuptukmiayi.

³¹ Tura suntarsha ni uunt kapitiántri tía mia nútiksaraṅ Páprun kashi júkiarmiayi Antipatris péprunam. ³² Kashin tsawarar suntar aya náwek wearmia nuka waketrarmiayi. Tura kawainium eketrainiaka Páprujai wearmiayi. ³³ Sesaria péprunam jeawar papin Piriksan súarmiayi. Tura Pápruncha nuí ejeniarmiayi.

³⁴ Akupniusha papí aujsua amik Páprun aniasmiayi “Amesha, ¿tuí akiini-aitiam?”

Tutai “Sirisia nunkanmayaitjai” tímiayi.

³⁵ Nuna takui akupin tímiayi “Wátskea kajertamainia nu taar turamainiakui anturkatjame” tímiayi. Tura nuyanka uunt akupin Erutisa jeen awayá apujsamiayi, suntar ísarat tusa.

24

Papru Píriksai áujmatsamiania nu

¹ Tura senku tsawant nankaamasai Israer-patri uuntri, ni naari Ananías, Sesarianam támiayi. Tura Israer-aentsu uuntri tura ti unuimiaru chichamtincha, ni naari Térturu nujai táarmiayi. Ju aents Páprun kajerainia ásar akupniunam wearmiayi. ² Nuí Páprun itiarmatai Térturu chichatan juarmiayi. “Uunt akupin Píriks, amesha yaimiu asakmin iisha shiir matsatainijai. Tura imiá neka asakmin ashí aents tímiatrusrik matsatainijai. ³ Tuma asakmin iisha ashí matsatmanum tuke tsawant ti shiir yuminsamajme, uunta. ⁴ Tura amesha ti núkap chicham antuktin nakitiatspash. Tuma asamtai antsu ishichik waitneasam anturtukta, tímiayi. ⁵ Ju áishman Papru, sunkura ut-sukratniua núniniaiti. Niisha ashí nunkanam mesetan najanatniun Israer áentsun ikiakáiniaiti. Tura Jesusa aentsri, Nasarénu tuinia nuna úntrintri. ⁶ Nú arantcha Yusa Uunt Jeen yajauch awajsataj tusa pujuru wáinkiar achikmaji. Ii uuntri tana nujai métek asutiátai tusar wakerimji. ⁷ Túrarin nuyanka kapitián Rísias taa tapit achik jurutramkimijai. ⁸ Tura atumek akupin Píriksai werum nuí aujmatkatarum, turamaji, tímiayi. Tuma asamtai amesha Píriks, Papru aniasta. Nuinkia ii tájinia nu nekasaiti, nu nekaattame” tímiayi Térturu.

⁹ Tura Israer-aents pujuarmia nu “Nekasaiti ashí ni tana nu” tiarmiayi.

¹⁰ Nuyá Píriks, uwejejai, Papru chichasat tusa iniaktusmiayi. Túram Papru tímiayi “Amesha uunta, ju aentsu akupniuri ti untsurí uwitin pujusuitme. Tuma asamtai nuikia shiir enentáimsan páchitsuk chichastatjai. ¹¹ Wats, wi túramur nekartuata. Yúsan áujmataj tusan Jerusarénum wi wémajna nu tuse (12) tsawant nankaamasai. ¹² Nuisha yajauch áujmatki weai wáitkiacharmai. Yusa Uunt Jeencha tura Israer-shuara aujtai jeencha tura pepru jintianmasha áentsnum charáa charáa ajá wekaai penké wáitkiacharmai, tímiayi. ¹³ Ju aents juí matsatainia nu wíniaka penké turutchamnia áiniawai. ¹⁴ Túrasha juna paant ujaajme. Jesus yamarman jintiana nuna umíajai. Kame Israer-aentska wáitiaiti tuinia nuna wikia umíajai. Túrasha nuna túran ii uuntri Yusri akupkamia nunak umiktasan pujajai. Jes, ashí Muisais aar akupkamia nuna tura ashí Yúsnan yaunchu etserin aar akupkarmia nunasha uminiaitjai. ¹⁵ Tura jakaasha nantaktin átatui, tajai. Warí, péñker aents nútiksaraṅ yajauch aencha nantakiartatui imia Israer-shuar tuiniatsuk. Tura wisha nútiksarak túrunatniuiti tajai. ¹⁶ Tura wisha tiniu asan, wikia winia enentáiru Yús íimmianum makuumatsuk wekasataj tajai. Tura áentsnumsha nútiksarak penké makuumatsuk wekaajai’ tímiayi.

¹⁷ ‘Tura, uunta, untsurí uwitin chíkich chíkich nunkanam wekaasuan amikian winia shuarui támajai. Kuítrinchan kuítian susataj tusan tura

Yusa kuítríncha nin susataj tusan támajai. ¹⁸ Túran wisha, Muisais jintin-mia nútiksanak nijiaamaran, Yusa Uunt Jeen pujumiajai. Untsurí aents charaatum ajainiasha atsumiayi. Nui wiki pujái Ásianmaya Israer-aents wáitkiarmiayi. ¹⁹ Tura wi yajauch túraitkuíñkia winia wáitkiarainia nu táchatniukait ámin ujatmaktasa. ²⁰ Túrachkuíñkia juí pujuinia nu, Israer-patrí naamkarí matsatmanum wi pujumajna nui yajauch túramun nékainiakka turutiarti. ²¹ Kame, ““jakamunmaya nantakminiaiiti” tau asamtai maku-urtiajsarum pujarme” matsatmanum tímiaj nujai turutchartimpiash. Nú arantka yajauch túramun penké nekartuacharmai” tímiayi Papru.

²² Táman antuk Píriks, Kristu shuari túramun paant nekáa, áanik iniaisami-ayi. “Antsu kapitíán Risias támatai nuíñkia nu chichaman nekaatjai” tímiayi. ²³ Tura nuyá suntara kapitíántrín chichaak “Ju Pápruka tuke emetnati. Tura ishichikia ankant apujsatarum. Tura nuyá ni amikrj taa yáintaj takui suritkairap” tímiayi.

²⁴ Tura nuyá chíkich tsawantaj ataksha Píriks ni nuwejai Tursirajai támiayi. Núwenka Israer-shuarauyayi. Pírikska “Papru itiatarum” tímiayi. Papru Jesukrístunun étserkui antimiai. ²⁵ Tura Pápruka yajauchiniam wekasasht-incha naka wekasatniuncha, tura ukunam Yus tunáa áentsnaka asutiátniuiti takui Pírikska ashamak tímiayi “Antsu yamaikia máakete. Tura ataksha wi ankant pujakun utsukmijiam” tímiayi. ²⁶ Tura, ankant ajastaj tusa Papru kuítian akirkashtimpiash, tu enentáimias, Píriks tuke untsúu wémiayi, chichastai tusa. ²⁷ Tura nuyanka jimiará uwí nankaamasmatai Píriks akupin náamkamu ajapnamiayi. Tura chíkich aents, ni naarj Pursiu Jistu akupin náamkamiayi. Tura Pírikska, Israer-aents péñker enentáimtursarat tusa wakerak, Páprun sepunam tuke ikiukmiayi.

25

Papru Jístujai áujmatsamiania nu

¹ Jístusha akupkatin takatan nankaamataj tusa Sesaria péprunam támiayi. Tura menaintiú tsawant nankaamasmatai nuyá we Jerusaréñnum jeami-ayi. ² Nuisha Israer-patrí uuntri tura Israer-aentsu penkerisha Páprun tsanumprurtai tusar Jístun weriarmiayi. ³ Tura tiarmiayi “Waitneasam Páprusha Jerusaréñnum akupkata” tiarmiayi. Jintiá maatai tusar wakeru-iniak nuna tiarmiayi.

⁴ Tutai Jistu tímiayi “Atsá. Páprusha Sesaria péprunam sepunam enkeamu pujawai. Tura wikia nui wárik waketkittiajai” tímiayi. ⁵ Nuyá nin tímiayi “Atumsha penkeri árumna nu, wijiai Sesarianam wétiniaitrumé. Tura nú áishmanka tunaari ákuíñkia nuisha títiniaitrumé” tímiayi.

⁶ Jístuka Jerusaréñnum ishichik tsawant pujusmiayi. Kame uchu tsawant tura tias tsawantcha pujuschiawash. Nuyá ataksha Sesarianam waketkimi-ayi. Tura nui jeá kashin tsawar, akupin pujutainium pujus “Papru itiatarum” tímiayi. ⁷ Tura Papru wayamtai, Israer-aents Jerusaréñnumia taarmia nu káunkarmiayi. Túrawar ti nukap chichainiak “Tunáa túraiti Pápruka” tu tiarmi-ayi. Túrasha penké uyumamtikiacharmiayi.

⁸ Pápruka chichamprumak tímiayi “Wisha tunaan penké túrachuitjai. Is-raera uuntri áarmarincha umirkaruitjai. Tura Yusa Uunt Jeencha yajauch awajsachuitjai. Tura uunt kapitíanniasha yajauch penké chicharkachuitjai” tímiayi.

⁹ Jístuka Israer-aents péñker enentáimtursarat tusa wakerak, Páprun tímiayi “Wakerakmíñkia Jerusaréñnum wemí. Wisha nui ame túramurmin nekaat-jai” tímiayi.

10 Tutai Papru tímiayi “Amesha paant nékame, Israer-áentsnum tunaan penké túrachjai. Tuma asamtai Rúmanmaya uunt akupniun wisha winia túramurun ujaktiniaitjai, nekartuati tusan. 11 Wisha jakamnia tímianu tunáa túranka, jákatniuncha ashamatsjai. Tura antsu turutainia nu nekaschaitki-iuñkia wíniaka Israer-shuarnum surunkachminiaitjai tajai. Tuma asamtai seajme, wíi túramun uunt akupin Sésar nekartuati” tímiayi.

12 Tutai, nuyá ni írutramurijjai chichasua amik, Jistu Páprun tímiayi “Uunt akupniui wétaj tusam seame. Tuma asamtai nui wétatme” tímiayi.

Papru uunt akupniujai áujmatsamiania nu

13 Tura ishichik tsawant nankaamasmatai akupin Akripia ni nuwejai Pirinísejai Jístun áujsatat tusa Sesarianam wearmiai. 14 Tura untsurí tsawant pujusarmiai. Tura nui pujuiniaí Jístuka Papru túrunamun akupniun ujaak tímiayi “Jui áishman pujawai. Píriks nin achik enkea ikiukmiayi, tímiayi. 15 Kame wikia Jerusarénum pujái Israer-patri uuntri tura Israer-aentsu úuntrisha, Papru yajauchin túraiti tusar káutrukarmiai, tímiayi. Mantamnati tusam akupkata, tu seattiarmai. 16 Takui wi tímiajai “Iisha Rúmanmaya áentstikia chícham nékatsuk, mantamnati tusar akupeatsji. Tsanumpruinia nu, emka táartin áiniawai. Tura nuyá chichamprumatsaiñ mantamnati tusar akupeatsji iisha” tímiajai. 17 Tiniu asan, táarmatai, wikia nákatsuk kashin tsawaran akupin pujutainium pujusan, Papru itiatarum tusan akupkamjai. 18 Tura Páprun tsanumprurtaí tusar taar chichainiaksha, wi enentáimmiajna núnaka tícharmai. 19 Antsu áyatik Yus umirkar túmatairín Papru nuna túrachai, tiarmiai. Tura nuyasha áishman Jesus naartin nantaki iwiaakui tawai Pápruka, tiarmiai. Nunak tiarmiai. 20 Tura wikia nú chichaman túratniun nékachu asan, Páprun aniasmajai “¿Amesha Jerusarénum wétaj tusam wakeramek? Nui nu chichaman nekartamawarti” tímiajai. 21 Túrasha “Atsá. Juin pujustajai. Rúmanmaya uunt akupin Akustu Sésar nekartuati” tímiayi Papru. Takui, “nuiñkia tuke sepunam pujustá. Tura wi ukunam uunt akupniun akuptuktatjame” tímiajai” tímiayi Jistu.

22 Nuyá Akripia chichaak “Wisha itiursanak nu áishman chichaamun anturkaj” tímiayi. Tutai Jistu tímiayi “Amesha kashinkia anturkattame”. 23 Tura kashin tsawar Akripia Pirinísejai taar, iwiaa-iwiarmamu ajas wayawarmiai. Suntara úuntrijjai tura nú péprunmaya úuntrijjai wayawarmiai. Tura nui Jistu, “Papru itiatarum” tímiayi. 24 Tura Papru támatai Jistu tímiayi “Uunt Akripia, tura ashí áentstiram matsatrumna nu, pai, ju áishman ístarum. Ti untsurí Israer-aents Jerusarénumsha tura jui Sesarianmasha ju áishman kan Páprun kajerainiak yajauch chichartuiniawai. Tura tuke iniaitsuk, mantamnatniuiti, turutainiawai. 25 Túrasha wíjiañkia tunáa jakamnianka túrachuiti. Kame niisha “uunt akupin Akustu Sésar nekartuati” takui, wisha nin akupkataj tusan wakerajai. 26 Tura wariniak uunt akupniun áatrataj nuna nékachu asan, Páprun atumin itiarjarme. Tura nekaska, Akripia, ame iniasta tusan itiarjame. Túrawakmin wi wariniak áartaj nuna nekaatjai. 27 Warí wisha, ni yajauch túramurín áattsuk, uunt akupniunam akupkashtiniaitjai” tímiayi.

26

Papru Akripiaí chichamprumakmiania nu

1 Jistu nuna tutai Akripia Páprun tímiayi “Wats, amesha tu timi chichamprumakta” tímiayi. Tutai Papru uweje takuí chichatan juarmiai. 2-3 Chichaak tímiayi “Uunt Akripia, ii Israer-shuarti túrutai ainia nu amesha nékame. Tura

ashí ii chicharnaiyajnia nusha nékame. Tuma asamtai yamáí wisha ámin chichamprumaktaj tau asan shiir enentáimjai. Israer-aents turutainia nuna mash ujaktatjame. Waitneasam péñker anturtukta' tímiayi.

Papru ni yaunchu túrutairin ujakmiania nu

⁴ 'Wi úchichik winia nunkaruj tura Jerusaréñnumsha pujusan wi túramajna nuna ashí wíi aents Israer ainia nu nékainiawai. ⁵ Pariséu ajasan, ni akupea-murin itiurchat ajñ ashí takamtsuk tuke umirniuitjai. Nunasha nékainiawai tura wakeruiniakka etserkamnia aintui. ⁶ Túrasha wikia, jakamunmaya nantaktin átatui, tiniu asamtai wíniaka emetruawar itiararmiayi. Túrasha núnaka Yuska ii úntrin yaunchu tímiayi. Yus tímia nuna túrunattawai wisha tiniu asamtai itiararmiayi, tímiayi. ⁷ Tura ashí mash Israer-shuarti, tuse (12) aents matsatka ájnia nu, ju nantaktin chichaman Yus tímia nuna túrunati tusar nákainiaji. Tuma asar Yus áujkurⁱ, tsawáisha káshisha nú enentáimtuiniaji. Tura wisha nú chichamnak enentáimta asamtai wíniaka kajertuiniawai, uunt Akripia. ⁸ Warí, atumsha "Yus jakancha iniantkimniaiti" tátsurmek' tímiayi.

⁹ 'Tura wisha yáunchuka Nasaréñnumia Jesusnan umirkaruka kajerkat-niuiti, tu enentáimniuyajai. ¹⁰ Tura Jerusaréñnum Yus-shuar ármia nuna kajerkarmiajai. Israer-patri uuntri chichamejai untsurí áentsun Jesusnan umirkarmia nuna sepunam enkeamiajai. Tura nú shuaran máiniakuisha wikia péñkeraiti tu wémiajai. ¹¹ Tura Israer-shuara iruntai jeen wayan ti asutiármiajai, Jesusnan umirkatniun iniaisarar tusan. Tura imiá kajerkaran chíkich nunkanmasha pataatu wearmiajai achiktaj tusan' tímiayi.

Tamasku jintianam túrunamun ujakmiania nu

(Túramurj 9.1-19; 22.6-16)

¹² 'Tura Israer-patri uuntri tsankatrukmatái, papin ni surusarmia nujai, Tamasku péprunam wétaj tusan jíinkimiajai. ¹³ Tura, uunta, nantu tutupin ai, jintiá wéai newaat ajaki ti tsáapin, tsawái nantujai nankaamas etsantru-tramiayi. Tura wijjai wearmia nunasha núnisaran etsantrurarmiayi. ¹⁴ Tura túrunamtai ashí nunká tepetar wáinkiarimiaji. Wiki Israer-chichamjai túrutun antukmajai "Sauru, Sauru, ¿urukamtai imiá pataaturam? Amek enentáimin yajauch awajmamsame, wáaka sankanmiak numin ijiuma núnismek. Wíi aents kajera asam túruname" turutmai.'

¹⁵ 'Túrutkui wisha "¿Amesha yáitiam, Uunta?" tímiajai.

Tutai Uunt turutmai "Wisha Jesusaitjai, ame pataatamna núitjai. ¹⁶ Tura nantakim wajaktia. Winia takartusminiam tusan wantintiukjame. Tura ame wáinkiamna nusha etserkattame. Tura ukunam wantintiuktatjame. Wáinkiatamna nusha etserkamnium, turutmai. ¹⁷ Tura nuyasha turutmai, Wats yamaisha Israer-shuarchanum akupkatjame. Tura Israer-shuar kajertamainiakuisha, tura chíkich aents kajertamainiakuisha ayampruktatjame, turutmai. ¹⁸ Péñker jintintiata tusan akupeajme. Kame aencha kiritni-umia jíinkiar tsáapninium wekasarat tusan, tura iwianchin umirtsuk Yúsan umirkarat tusan akupeajme. Tura Winia enentáimtursarmatai Wisha ni tunaarin tsankurattajai. Nuna túran Yusna ajasaru áiniana nujai apujsattajai." Nuna Jesus turutmai' tímiayi.

Papru mesekrampra umikman ujakmiania nu

¹⁹ 'Tuma asamtai, uunt Akripia, Uunt Jesus nayaimpinmaya wantintiu-rak turutmia nuna umirkataj tusan pujajai. ²⁰ Enentai yapajjáwar Yus-shuar ajastinian, emka Tamaskunam pujuarmia nuna ujakarmiajai. Tura nuyasha Jerusaréñnumian, Jutía nunkanmayancha tura nútiksanak Israer-shuarchancha nuna ujakarmiajai. Tura ujainiakun "Yus-shuar ajasmarum

paant ajasat tusarum, péñker túratarum” tímiajai ashí shuaran. ²¹ Tura wi Yusa Uunt Jeen pujái, Israer-shuar achirkar emetruawar mántuatai tukamá tujintrukarmiayi, Yus winia yaintiu asamtai. ²² Yus winia yaintiu asamtai, iniaitsuk tuke Yus-Chichaman ujainiajai. Uunt ainia nunasha, tura péejchach ainia nunasha ujainiajai. Tura Muisaisha, Yúsnan etserniusha tiarmia nunak étsereajai. Nú arantka tátsujai. ²³ Krístuka wáitsatniuyayi, tura jakasha émak nantaktiniuyayi, ii uuntri tiniu ármiai. Tura Krístuka nantaki Yusa chichamen íi áentsun tura Israer-shuarchancha nútiksā ujaktiniuyayi. Nuna tu tiarmiayi. Tura núnaka wisha tu ujainiajai” tímiayi Papru.

Papru Akripian Yus-shuar awajsataj tusa wakerimiania nu

²⁴ Tura nuna takui Jistu kakantar tímiayi “Maaj, Papru, wáurme. Imiá unuimiatu asam wáurkame” tímiayi.

²⁵ Tutai Papru tímiayi “Atsá uunt Jistu, wáurtsujai. Antsu wi tájana nuka ti nekasaiti. ²⁶ Wi tájana nuna, uunt Akripia juí pujana nuka nékawai. Tuma asamtai arantutsuk nin chichareajai. Kame ju túrunamu ti paant asamtai niisha nékawai, tajai” tímiayi.

²⁷ Nuyá Akripian chicharuk “Yaunchu Yúsnan etserin áarmari, nekasapitia tátsumek, uunt Akripia. Wikia nékajme. Nekasaiti, tame” tímiayi.

²⁸ Takui Akripia chichaak “Maaj, ishichik awajtame Papru, Yus-shuar ajastin” tímiayi.

²⁹ Tutai Papru tímiayi “Tura ishichík chichamjaisha untsurí chichamjaisha, amesha uunt Akripia, tura ashí winia anturtukurmena nu, wijiái métek ajasúk tusan wakerajai. Tura antsu wia núnisan jiníkiámua núnaka wakeratsjai” tímiayi.

³⁰ Papru nuna tuasua amikmatai akupniusha, uunt kapitíáncha, Pir-inísesha, tura nuí ashí pujuarmia nu wajakiarmiayi. ³¹ Tura arant wear, túrunamun chichasarmiayi. Tura tiarmiayi “Ju áishman mantamnamnian tunaamkachuiti tura penkesha sepunmasha enkeachminiaiti” tiarmiayi.

³² Tura Akripia Jístun tímiayi “Ju áishman “uunt akupin nekarati” tíchaitkuinkia akupmai makuitji” tímiayi.

27

Páprun Rúmanam akupkarmiania nu

¹ Tura Páprun Ruma péprunam akupkatniun enentáimsarmiayi. Rúmaka tímiai, Itiaria nunkanam pujawai. Wisha Páprujai wémiajai. Pápruncha tura chikichnasha achikma ármia nunasha Akustunu tutai suntara kapitíántrijíai nenakar akupkarmiayi. Nú kapitíáni naari Júriuiti. ² Tura Atramitiunmaya kanu Asia nunkanam pepru ármia nuí wétasa pujumia nu enkemprarmiaji. Tura Tisarúnikianmaya áishman, ni naari Aristárku, in páchitkiauyayi. Tisarúnikiasha Masetúnia nunkanmaiti. ³ Nuí enkemprar kashin tsawarar Sitiun péprunam jeamiaji. Nuí jeawakrin kapitíán Juriu, Páprun waitnentak tímiayi “Ame amikrumiin wetá. Au íirmasarti” tímiayi. ⁴ Tura Sitiunnumia jíinkir, kanujai wesar nase tukumpramprakrin Chipri núnkaka menanmaani aa ikiukmiaji. ⁵ Tura nayaantsanam wesar Sirisia tura Pampiria nunkanam ayamchik nankamakir Mira péprunam jeamiaji. Nuka Risia nunkanmaiti. ⁶ Nuí jear nú kanu ikiukmiaji tura chíkich kanu Ar-ijíántrianmaya taa Itiaria nunkanam wétasa pujumiayi. Nú kanunam suntara kapitíántri, enkempratarum, turammiaji. ⁷ Tura untsurí tsawant yáitmataik we-wémiaji tura ti wiántkar Nítionam jeastatuk ajasmiaji. Tura nuísha nase tuke tukumkarta asamtai Sarmun nunkanam ayamchik nankaamakir, Kritia

nunkanam áawinini ayamchik wémiaji. ⁸ Tura Kritia nunkanam ayamchik wesar itiurchat akui wáitsar wea-wéakuar “Shiir Pujutai” tutainium jeamiaji. Nusha Rasea péprunam tíjiuchiiti. ⁹ Yáitmataik wea asar ti táasmaji. Tura yumi yututai jeatema asa ti tsúumainiuyayi nayaantsanam wétin. ¹⁰ Tura Papru chicharuk “Amikru antuktarum. Wi nékajai, yamaí wéakrikia ti tsúumainti. Kanusha tura káarak kanunam enketainia nusha menkarattawai. Tura iisha núnisrik kajinchatjiash” tímiayi. ¹¹ Suntara kapitántrin^{ka} Páprunka anturt-suk, kanú wianniurⁱⁿ kapitántrin^{cha} tura kanú kapitántrin^{cha} chichamen anturkarmiaji. ¹² Tura nui Shiir Pujutai tutainium yumitin pujustin péⁿkerchaitkui “Nuⁿkia ju^yan^{ka} wéartai. Pinise péprunam jeamainchuashit” ashí tiarmiayi. Nú péprusha Kritia nunkanam nayaants ayamach pujawai. Nú péprunam yumitin pujustinian wakermiaji, arakia nunkaani kakaram nase nú péprunam jeachu asamtai.

Tsúumainium wekasarmiania nu

¹³ Tuma asamtai ukunam nase nunkaaniá tápiriri ajakui, ii wétin ya-maikia péⁿkeraiti, tu enentáimsarmiaji. Túmakui kanu emetai jiru júusar jíinkir K^rítianam ayamchik wearmiaji. ¹⁴ Túrasha árusan^{ar} arakia kakaram nase, Nuristi tuinia nu tukumpramiayi. ¹⁵ Nase kanun tukumpra asamtai iisha atsantratin péⁿké tujinkiamiaji. Túmakui, áankisha juramkitiai tusar iniaisamiaji. ¹⁶ Tura Kritia nunkanam áawinini nan^{ka}amakur nuⁿkia nase ishichik mijiantmatai, uchich kanu japikir wémiaj nu ti takasar uunt kanunam en^kermiaji. ¹⁷ Tura en^kerar chapik^{jai} uunt kanun jin^{ki}áarmiaji wewe najanatai tusar. Tura náikim mukutniunam, Serti tutainium nase juramkishtajiash tusar, kanunam yakí tarach aan itiararmiaji. Nu tarach nase útsuktin tusar nenarma ármiaji. Túrawar áyatik nase juramkitiai, tiarmi-ayi. ¹⁸ Tura kashin tsawarmatai nasesha chíchimisha tímiatrusan^{ar} kakaram aa asamtai kanunmayan káarak irunmia nuna nayaantsanam ajapawarmiaji. ¹⁹ Menaintiú tsawant nan^{ka}amasmatai iisha ii uwe^{jé}jainⁱⁿ kanunam káarak iruniarmia nusha entsá utsan^karmiaji. ²⁰ Tura untsurí tsawant tsawa^{ish}a et-santrachmiayi tura káshisha yaasha tsaparcharmiaji. Tura nasesha ti kakan-tar tukumpramkurin “Yamaikia uwempratin atsawai” tiarmiayi. ²¹ Tura iisha ti untsurí tsawant yurumsuk matsatu asakrin, Papru ajapénⁱⁿ wajakí tímiayi “Amikru winia nuik K^rítianmayan^{ka} jíintsuk anturtukuitkiurmin^{ka} yamaí ju^u itiurchatnum pujutsuk tura emen^katmatsuk puju^aaji’ tímiayi.’

²²⁻²⁴ ‘Yamaí kashi winia Yusru suntariⁱⁿ nayaimpinmaya wantinturkayi. Nú Yúsan umirkaitjiana nu akupturkayi. Tura nu taruti “Ashamkaipia Papru, turutui. Amesha Ruma péprunam uunt akupniunam jeattame. Tura chikichnasha ámijiaⁱⁿ kanunam enketainia ásarmatai uwempratniun Yus tsan^katkarai” turutui. Tuma asamtai, amikru, shiir enentáimsatarum. Atumsha mash uwemprattarme. Túrasha kánuka mesertatui. ²⁵ Wisha winia Yúsrin nekas enentáimtajai. Yusa suntariⁱⁿ turutainia nuna nekas tu túrunattawai, tajai. Tuma asamtai kakartarum. ²⁶ Tura chíchimisha nun^{ka} uchich pújakmanum nuⁱ patatmittiaji” tímiayi.

²⁷ Ayu, katurse (14) tsawant nan^{ka}amasmatai nú kashi Atria nayaantsanam jeamiaji. Nuⁱ nase nan^kamas juram wémiaji. Nuy^an^{ka} kashi ajapénⁱⁿ wiantin armia nu nun^{ka} ámunam jeateman nekaawarmiaji. ²⁸ Tura urutmá kúnakit tusa nekapmamiayi. Túram tráinta sais (36) mítruuyayi. Nuy^asha ékemsan^{ar} ataksha nekapmamiayi. Nuⁿkia painti siati (27) mítru nekapmamiayi. Tuma asa nun^{ká} anumsatuk ajasun nekaawarmiaji. ²⁹ Tura kayanam ijiuk^{ai} tusar ashamainiak kuatru jirun kijinian chapik^{jai} kanú senkarin jin^{ki}áwar entsá ajun^karmiaji. Kijin asamtai, init tepeámtai

nase juramkichmi tusar túrawarmiayi. Tura wake mesekar, tsawarti tusar matsamarmiayi.

³⁰ Tura matsatainiaj wiantin armia nu, iikia uchich kanunam enkemprar pisarchatjash tu enentáimsarmiayi. Túmainiak kanú nujinia chíchich jirun ajuntai tawa nútiksarañ uchich kanun ajuntai tusar pujuarmiayi. ³¹ Tura tuma wáiniak Papru suntara kapitíántrin tura ni suntarincha ujakmiayi. “Ausha uunt kanunman enketainiachkuñkia atumsha uwemprashtatrume” tímiayi. ³² Tutai suntarsha uchich kanú chapikrin tsupirkar entsá ajun̄karmiayi.

³³ Tura kashin káshik Papru ikiakártasa wakerak tímiayi “Ishichkisha yurumátarum. Atumsha katurse (14) tsawant kánutsuk yurumtsuk pujarme. ³⁴ Seajrume, ishichkisha yurumárum kakaram ajastarum, uwemprataj tusarum. Iimiata, nekaatarum, imiatkisha túmatsuk péemkattarme” tímiayi.

³⁵ Nuna tuasua amik Papru apatkun achik Yúsan yuminsamiayi ashí íimmianuman. Tura puuk yuamiayi. ³⁶ Tura apatkun yuan wáinkiar, ashí aents shiir enentáimsar yurumáwarmiayi. ³⁷ Nusha ashí aents irurmaka jimiará siáñ nuyá ataksha setenta sais (276) ármiai. ³⁸ Yurumáwar ejemakar, yurumkanka entsá utsañkarmiayi, uunt kanu wampú ajasat tusar.

Kanu penké mesermiania nu

³⁹ Tura tsawarmatai wiantin armia nu, nun̄kan nekaacharmiayi. Túrasha éñkentamunam káanmatak aan wáinkiar “Aj kanu anuntai” tiarmiayi. ⁴⁰ Nuyá jiru entsá ajun̄man chapikrin tsupirkar entsá ikiukiarmiayi. Tura kanait jin̄kiárma ármia nuna chapikrin tsupirkarmiayi. Tura tarach kanú nujin̄ amia nuna nenakarmiayi. Túram kanu káanmatkanam anumsatuk ajasmiai. ⁴¹ Tura wainchi jímiar ámunam jeá kanu entsá wayá tepeamiayi. Tura kanú senkarin̄kia chíchimi yakí takuir ajíamu asa kupintramiayi. ⁴² Suntarsha, achik júamu armia nú shuaran máataj tusa wakeriarmiayi, yukuak pisararain̄ tusar. ⁴³ Tura kapitíáncha Páprun uwemtikrataj tau asa nuna túratniun tsañkatakchiami. Antsu chichaak “Emka yukuaktin nékarmena nu yukuakrum péemkatarum, tímiayi. ⁴⁴ Nuyá chíchichkia kanunmaya numi, kame nán̄kamas numi achikrum awamkarum péemkatarum” tímiayi. Tu túrawar ashí iwiaakuk jin̄intrarmiayi.

28

Marta nun̄kanam túrunamia nu

¹ Tura ashí iwiaakuk jin̄trar, nu nun̄ka Marta naartin nekaamiai. ² Tura nuj matsamin armia nu, shiir awajtamsarmiai. Tuma asamtai iisha tsetsema asakrin, tura yumisha yútakui, uunt jinia ikiapárarmiayi. Tura “anamaitiarum” turammaji. ³ Pápruka jinia kukarun ikiaan̄ak jinium pataamiayi. Túmawai napi tsuéran ashamak jin̄ki, Papru uwejen̄ nemaramiai. ⁴ Tura nú nun̄kanmaya aents, Papru uwejen̄ napi nemaran wáinkiar “Ju áishman̄sha shuáran maichuashit, tiarmiayi. Nayaantsanmaya uwempraitatan̄ ni yusr̄i iwiaaku átinian suritiawai” tiarmiayi. ⁵ Páprusha ni uwejen̄ pear napin̄ jinium awan̄miayi. Tura pen̄kesha yajauch ajaschamiayi. ⁶ Tura niisha eáchatpiash tusar ii pujuarmiayi. “Túmatskesha jaka inianchatpiash” tiarmiayi. Túrasha ti núkap pujussha pen̄ké najaweachmiayi. Túrunamtai, nuñkia nusháa enentáimprar “Pápruka yúschashit” tiarmiayi.

⁷ Nú nun̄kanam aentsu pen̄ker̄i ámiayi ni naari Pupriu. Nú Pupriu ni jeen̄ in itiaarmamiai. Tura menaintiú tsawant yurumkan̄cha suramsarmiai. ⁸ Tura nuj pujarin̄ Pupriu apar̄i tsuer, numpajai ijiarki jáamiayi. Túmakui

Papru werí iyumiayi. Tura Yúsan áujtus amik uwején nin awantkamiayi. Túram péñker ajasmiayi. ⁹ Nu túramun nekaawar, nú nunkanmaya aents jaa armia nu tariar, niisha péñker ajasarmiayi. ¹⁰ Túram incha ti shiir enentáimturmasar núkap ajampramsamiayi. Túram ukunam ii wétin jeamtai ashí ii atsumamun suramsarmiayi.

Rúmanam jeawarmiania nu

¹¹ Ii wétsuk nú nunkanam menaintiú nantu pujusmiayi. Tura nuyá chíkich kanunam enkempramiayi. Nu kanusha Arijiántrianmaya yaunchu tau menaintiú nantu yumi yútakui nuí pujumiayi. Nú kanu nujiin numi-yus najankamu jímiar ekemiarmiayi, ni náarinikia Kástur tura Púruks. ¹² Iisha nuí enkemprar weri Serakúsa péprunam jeamiayi. Nuí menaintiú tsawant pujusarmiayi. ¹³ Tura jíinkir nuyanka nayaantsa ayamach weri Rijiú péprunam jeamiayi. Nuí kanarmiayi. Tura kashin anariá nase suut umpuunti támiayi. Tuma asamtai nú kashinkia Putiuri péprunam jeamiayi. ¹⁴ Nuí jeawakrin Yusshuar pujuarmia nu, ni jeen juramkimiayi. Tuma asamtai nuin chikichkí tumin pujusmiayi. Tura nuyanka nunkan Rúmanmaani wémiai. ¹⁵ Tura Rúmanmaya Yusshuar, ii jeatniurin neka ásar jintiá inkiunmaktai tusar winiarmiayi. Chíkichkia Apiu pepru támanum táarmiayi, tura chíkichkia, Menaintiu Jeá tutainium táarmiayi. Nuna káunkan wáiniak Papru shiir enentáimias Yúsan yuminsamiayi.

¹⁶ Tura ii Rúmanam jeawakrin kapitíán Juriu achikia yarumman Rúmanmaya uunt kapitíánnin ejetimiayi. Túrasha, Pápruka jeá ikiamas niisháa pujustí, tiarmiayi. Tura Páprun ísat tusa chikichík suntarnak ni jeen apujtusarmiayi.

Rúmanam Papru Yus-Chichaman etserkamiania nu

¹⁷ Nuyá menaintiú tsawant nankaamasmatai Pápruka Rúmanmaya Israer-aentsu penkerin untsuk ikiaanak “Yatsurtiram antuktarum. Wisha Israer-áentsun yajauchin penké túrachmiajai. Tura ii uuntri akupkarmia nunasha yajauch chicharkachmiajai. Tuma ain Jerusarénum winia achirkar Rúmanmaya áentsnum surutkarmiayi. ¹⁸ Tura nu aencha winia anintsar, akupkatai, turutiarmiayi, wisha penké yajauchin, mantamnamnia tímianu túrachu asamtai. ¹⁹ Túrasha Israer-shuarka “Atsá, akupkairap” turutiarmiayi. Nu tuma asamtai, “antsu uunt akupin nekarati” tímiajai. Wikia wíi shuara tunaarín kapitíánnin ujaktinian táchaitjai. ²⁰ Tuma asamtai, yatsurtirmin, atumin untsukjarne chichastaj tusan. Yusa anaikiamuri, Israer-shuarti náakajnia nu táwiti wi tu étserkui, juí achikiar jinkiámu pujajai” tímiayi Papru.

²¹ Tutai niisha tiarmiayi “Iisha Jutía nunkanmaya aentsti, ame yajauch túramu papí penké wáinkiachuitji. Tura ii shuar nuyá táarainia nusha “au yajauch túraiti” tu ujatmakcharmaji. ²² Túrasha ashí nunkanam yamaram chichaman jintinian yajauch chicharainiawai tama antukji. Tuma asamtai amesha nu warintia enentáimtam nekaatai tusar wakeraji” tiarmiayi.

²³ Nú tsawantai iruntrami tiarmia nú tsawant jeamtai, ti untsuri aents Papru pujamunam iruntrarmiayi. Papru jintintiainiak Muisais yaunchu aar akupkarmia nujai tura chíkich Yúsnan etserniu aarmarijiaisha, Jesus nekas Yusa Anaikiamurinti tusa paant jintintiawarmiayi. Nuna tura káshik nankaama Yus akupeamunam pachiinkiatniun étse-étserkua kiarai iniaisamiayi. ²⁴ Tura Papru táman antukarmia nu, chíkichkia, nekasaiti tusar umikiarmiayi. Tura antsu chíkichkia, nekaschaiti tusar umikcharmiai.

²⁵ Chikichkí enentaikí enentáimsatin atsá asamtai, jiinki weartasa pujuarmi-ayi. Túmainiakui Papru chichaak “Nékasen Yusa Wakaní yaunchu Yúsnan etserniu, Isayas naartin áarmarijiaí ii úntrín chicharuk juna tímiayi:

²⁶ “Ame weme au aents ju titia:

“Ántutka ántakrumsha nekaashtatrome,

Íitkia iyakrumsha wáinkiashtatrome.

²⁷ Warí, au shuara enentái katsuurai;

Kuishijiaí ántaksha ántichua núnin ániawai,

Jiisha epetkamua áanin ániawai,

Iyaksha wáinkiaín tusa, ántaksha antukain tusa

Enentáimkiusha nekaawain tusa,

Winí uwemprain tusa, tura Winí tsuamarain tusa túrunayi”.

Nuní áarmaiti. ²⁸ Tuma asamtai, nekaatarum. Yamaikia Yusai uwempratin ana nuna Israer-shuarsha susamuiti. Tura ninikia nekas umikiartatui” tímiayi. ²⁹ Tura Papru nuna ti iniaisamtai Israer-shuar nuamtak núkap chicharnaiyasua wearmiayi.

³⁰ Tura Pápruka nuin jea ikiamsamunam jimiará uwí pujusmiayi. Tura ashí aents nin iyutaj tusa wearmia nuna ni jeen itiaamiayi. ³¹ Tuma asamtai Papru arantutsuk urukuk Yus akupeamunam ati, Uunt Jesukrístu túramuríncha ashí etserkamiayi. Nútiksan etserkatniuncha Páprun penké suritkiacharmiayi.

Papru RÚMANMAYA SHUARAN papí akuptukma

Papru Rúmanmaya Yus-shuaran áatramania nu

¹ Wi Papru Jesukrístu takarniuitjai. Núnisañ Yus achirak ni Shiir Chichamen etserkat tusa akatar akuptukmiayi.

² Nu Chichamun Yus yaunchu “akupkattajai” tímiayi. Núnaka Yúsna etserin Yus-Papinium paant ujakarmiayi. ³ Nu Chichamnum Yus ni Uchirín áujmatui. Ayashíjiainkia Tawit weeanum akiiniamiayi. ⁴ Tura ni tishiir wakaníjiainkia Yusa Uchirínti. Tura ti kakarmaiti. Jakamunmaya nantakmiajai nekas Yusa Uchiría nu, paant nekanamiayi. Niisha ii Uuntri Jesukrístuiti. ⁵ Ni túramujai Yus shiir enentáimturuk nu Shiir Chichaman etserkat tusa akuptukmiayi. Núnisañ ashí nunkanmaya shuar nu chichaman umirkar Jesusa náarín shiir awajsarat tusa akuptukmiayi. ⁶ Atumsha nuyá shuaraitrume. Tura Jesukrístunu ajasarat tusa Yus achirmakuitrume.

⁷ Ashí Yus aneamutirmincha Rúmanam matsatrum nuna ju papin áateajrume. Yus ti péñker awajtamsatniun wakerutmarme. Ii Aparí Yussha ii Uuntri Jesukrístusha waitnentrainia ásar imiatkinchanum ti shiir pujustinian yainmakarti.

Papru Ruma péprunam irautinian wakerimiania nu

⁸ Émkasha, átum Yus nekas enentáimtamun ashí nunkanam áujmatenan nekaan Jesukrístun pachisan Yúsna ti shiir yumínsajai. ⁹ Tuke enentáirjai Yusa Uchirín ashí shuarnum etsertajai. Túrakui wi atumin ti Yus aneamutirmincha Rúmanam matsatrum nuna ju papin áateajuke áujtamun Yus nékarui. ¹⁰ Ashí tsawant ni wakerutakuinkia íitjarum tusan Yúsna seajai. ¹¹ Nekas íitniun wakerajrume. Nuí jean wakanmin yainkian Yusjai kanakchamin ajasúk tusan wakerajrume. ¹² Kame atumsha tura wisha Yus nekas enentáimtuinia asar mai ikiakánai ajatai tusan wakerajai.

¹³ Yatsurú, tuke íitjarum tusan wakerimjiarme. Túrasha iyatsjarme. Kame Yus-Chichaman ujaakun chíkich shuarnuma áintsan atumíincha Yus kakaram takasman wáinkiatniun wakerajai. ¹⁴ Wikia Yus akuptuku asamtai ashí shuaran ujákártiniaitjai. Unuimiaruncha tura unuimiarchancha, ti nékainia nunasha tura nékachuncha, métekrak ujakartiniaitjai. ¹⁵ Tuma asan atumniasha Rúmanam pujarmena nunasha Uwempratin Chichaman ujaitjarum tusan pujajai.

Uwempratin Chicham kakarmaiti

¹⁶ Nu Shiir Chicham Yusa kakarmaríjiai ti kakaram asa ashí shuaran uwemtikramniaiti. Tuma asamtai natsantatsjai. Nekas Israer-shuarnasha tura chíkich shuarnasha núnisañ uwemtikramniaiti. ¹⁷ Nu chichamnum Yus enentáimsamia nu páantaiti. Júiti: Áyatik Yúsna nekas enentáimtuiniakui Yuska “péñkeraitme” tíminiaiti. Yus-Papiniumsha núnisañ tawai: “Yúsna nekas enentáimta nuna Yus “péñkeraitme” tutai tuke Yusjai shiir wekasattawai.” Tu áarmaiti.

Aentsu tunaari

¹⁸ Shuar nekas chichaman nakitrar yajauchin túrataj tusar suriimiainiawai. Túrawar tuke tunaarintin áiniawai. Nu shuaran Yus ti kajerkar

ti asutiátniun nayaimpinmaya paant awajsaiti. ¹⁹ Tura nu shuarka ashí Yusna nekaamnia nuna Yus paant awajsa asamtai péñker nékainiawai. ²⁰ Kame yámankamtaikniumiá Yus wáinchataitiat ni najanamurijjai júka paant nekaamniaiti: Nekas Yus asa tuke kakarmaiti. Nusha ti paant asamtai nu shuar tsankurnarchartatui. ²¹ Yúsan nékainiyat shiir awajsacharmiayi tura yuminsacharmiayi. Tuma ásar aya ánta nunak enentáimtuiniak ni enentái tunaajai piakai. ²² Tura ti nekajai tuñniyat enentáimcha núnin ajasarai. ²³ Túmainiak jákachmin Yus imiá shiira nuna iniaisar shuar jakamnia nakumkamun shiir awajenawai. Tura nu arant nanamtinniasha napincha kuntinniasha yajasmáncha nakumkar nuna shiir awajenawai.

²⁴ Nu asamtai imiá yajauch enentáimiainiakui “áanik asati” tímiayi Yus. Túramtai ti natsanmainian túrunainiawai. ²⁵ Yusna imiá nekasa nuna nakitrar antsu wait-chichaman anturkar nuna túrin áiniawai. Tuke Yúsak shiir awajsatniun iniaisar antsu ni najanamun tikishmatainiak shiir awajenawai. “Antsu tuke Yúsak shiir awajnastí” tajai.

²⁶ Nuna túrin ásarmatai Yus natsanmainia nuna wakeruktinian tsankatkarmiayi. Túramtai nuwasha áishmanjai tsaninñinian nakitrar nuamtak yajauch awajnainiawai. ²⁷ Núnisan áishmansha nuwajai tsaninñinian iniaisar nuamtak áishmankak tsanirmanainiawai. Ti wakerunainiak ti natsanmainia nuna yajauch túrunainiawai. Tura yajauch túruiniak ni ayashj wáitsatniunak sumamawarmiayi.

²⁸ Tura tuke Yúsan nakitiainia asamtai ti yajauch enentáimiainiak penké túrachminia nuna túrawarti tusa Yus tsankatkarmiayi. ²⁹ Nu shuar ti tunaajai piaku áiniawai. Tsanirmausha aya kuítniak wakerincha tura yajauch awajin áiniawai. Nu arantcha awakmakun kajerniusha mankartincha tuke máanaincha anankartincha péñkercha awajkartincha, tsanumniusha áiniawai. ³⁰ Nu arantcha chikichnasha yajauch áujmatin áiniawai. Yúsnasha nakitiainiawai. Áimniusha áiniawai. Tura “péñkeraitjai” tiar nankaamantu enentáimtumainiawai. Tunáa túratniun eainiawai. Aparincha nukurincha umirainiatsui. ³¹ Enentáincha áiniawai. Tana nuna umichu áiniawai. Anenkartichu ásar waitnenkartichu áiniawai. Tsankurcha áiniawai. ³² Yuska “Shuar nuna túrinkia jákatniuiti” taman nékainiyat tuke túrukin wénawai. Tura nu arantcha chikich yajauch túramtai ti shiir wararenawai.

2

Shuar tunáa túramun Yus paant nékawai

¹ Amesha enentáimtumastá. “Shuar nu yajauchin túrana nu imiá tunáa shuaraiti” tákumka amesha métek túrakum imiá nekas sumamame. ² Yuska nu tunaan túrin ainia nuna súmantikiashtinkiait. ³ Amesha nuna túrin “imiá yajauchiiti” táyatam amesha métek túrakminkia Yus sumantikiattana nuyá ¿itiurak uwemprattam? ⁴ Yus ti waitnentrampa asa nu tunáa ikiukim Nin enentáimtustinian katsuntramuk nákarmawai. Tura péñker asa wárik asutiámchakui sumamashtiniaitjai ¿tu enentáimtumamek? Tu enentáimkium ni waitnentrammari ántar awajsaitme. ⁵ Tura tunaarum enentáimtutsuk tuke túrakmeka súmantikiatin tsawantaj ti tunáa irutmampramujaj ti asutniáttame. ⁶ Nu tsawantaj ni túramujaj métek Yus ashí shuaran akirartatui. ⁷ Shuar tuke péñker túrak ashí shiira nunasha tura tuke amuukachmin ainia nunasha wakeruiniana nuna Yus tuke iwiaaku Nijjai shiir pujustinian sústartatui. ⁸ Antsu péñkera nuna wakerutsuk antsu aya yajauchin wakeruiniak Yúsan nakitiainia nuna Yus ti kajerak asutiáwartatui. ⁹ Nekas Israer-shuarsha tura núnisan Israer-shuarchasha tunaan túrin

ániakka ti wáitsartatui. ¹⁰ Antsu nekas Israer-shuarnasha tura núnisan Israer-shuarchancha péñker túrin áinia núnaka Yus ti shiir imiatkinchanum apujsartatui. ¹¹ Yus ashí shuaran akantsuk mai metek iyawai. ¹² Shuar Muisais akupkamun nékatsuk tunaan túraka aya júnisan sumamawartatui. Tura shuar Muisais akupkamun nékayat tunaan túranka nu akupkamujai sumamawartatui. ¹³ Akupkamun aya antukarua nuka Yusaj péñker áiniatsui antsu antukar umirainia nuna Yuska “pénkeraiti” tawai. ¹⁴ Israer-shuarchaka Muisais akupkamun takakainiachkusha aya ni enentáijiai nu akupkamun umirainiak ¹⁵ nu umireamujai Yus nu akupkamun ni enentáin ikiursarua nuka paant nekaamniaiti. Nujai métek túruiniak shiir enentáimiainiawai. Tura métek túruiniachkunka péñkercha enentáimiainiawai. ¹⁶ Wi Uwempratin Chichaman étsereaj nuí ashí shuar uukrishá túramun ashí paant awajsartatui. Tura nuna etserkatniun Jesukrístun anaitiukmiayi. Nu tsawantaj tunaan túrin sumamawartatui.

Israer-shuarsha Muisais akupkamun umircha áiniawai

¹⁷ Ámeke “Tura Israer-shuaraitjai. Muisais akupkamun takakkui winia Yúsruka ti shiir enentáimturui, tátsumeash. ¹⁸ Yus wakeramuncha nékajai. Tura akupkamun nekaan péñkera nuna wakerajai, tátsumeash. ¹⁹ Wakannium kusuraru áinia nunasha jintintiamniaitjai. Tura tsáapninian nekamtiki-awarminiaitjai, tátsumeash. ²⁰ Akupkamu ti penker neka asan nekasa nuna unuimiaruitjai. Tuma asan nékachuncha ántuiniachuncha jintintiamniaitjai” tátsumeash. ²¹ Pai, chíkichka unuiniatmesha ¿urukamtaí imia ámeke unuimiatsum? “Kasamkashtiniaiti” tu étsereatsmek. Táyatmesha ¿urukamtaí ámeke kasamam? ²² “Tsanirmashtiniaiti” tátsumek. Enta, ¿urukamtaí ámeke tsanirmam? “Ántar-yusan nakitiajai” tátsumek. ¿Urukamtaí ámeke nu yusa jeenia kasamam? ²³ Akupkamun takakjai tusam shiir enentáimtumayatam nu akupkamu umireachkum Yus yajauch awajeatsmek. ²⁴ Yus-Papiniumsha núnis áarmaiti: “Átum péñker umirchamujai Israer-shuarcha Yúsan yajauch chicharainiawai.”

²⁵ Muisais akupkamia nu ashí umireakmeke nii timia núnismek tsupirnak-tin péñkeraiti. Tura takamtsuk umireachkumka tsupirnakcha núnisketme. ²⁶ Chíkich shuarsha tsupirnakchaitiat Muisais akupkamun umireakka tsupir-natskesha tsupirnakua áintsankete. ²⁷ Nu shuar tsupirnakchaitiat akupkamun ashí umireak atumin tsupirnakutirmin akupkamu takakuitiatrum umircha asakrumin súmamtikramawartatui. ²⁸⁻²⁹ Kame nekas Israer-shuarka aya pátatkechu antsu tuke enentáijiai Yúsnan wakera núiti. Núnisan nekas tsupirnaktinkia aya ayashíjjainchuiti antsu enentáiniam shiir átinia núiti. Nekas akupkamu aya áarchamuiti antsu nekas enentáijiai umirkamua núiti. Nekas tú tura núnaka aents shiir enentáimtuiniachkuisha Yus shiir enentáimtawai.

3

¹ Núnis aisha Israer-shuar ainia nu ¿warí péñkernak takakainia? Tura tsupirnaktincha ¿wariniak yayá? ² Ti péñkeraiti. Warí, émkaka, Yus ni chichamen Israer-shuaran súsacharmakia. ³ Kame chíkich chíkich umichu ániakui Yus tsankatkamia nuna nú shuaran súsachmatainkia nuikia “Yus umichuiti” ¿títinkiait? ⁴ Péñkea. Antsu Yuska nekas túratniua nujai métek ashí túriniaiti. Shuar umichu ániakuisha ni támarin mash umiktatui. Ni tamajai shuaran wáitrin awajeakka nusha péñkeraiti. Núnisan atí. Yus-Papisha métek tawai:

“Támena nuna “imiá nekasaiti” tiartatui, tura súmamtikramataj tuíniakuisha nupetmaktatme” tawai.

⁵ Nu arantcha, “Wi tunaan túramujaj Yús imiá péñkera nuna paant awajeakka çurukamtai winia asutiua? çNuka péñkerkait?” tíchatapash. (Kame aents chichainia núnisnak tajai.) ⁶ Warí, Yús péñkerchaitkiunka çitiurak ashí shuara tunaarin súmamtikiawarat? Kame imiá péñkeraiti.

⁷ Núnisan, “Wi umirkachmajaj Yús tuke umiiniana nuna paant awajeaknaka nuikia nujaj in shiir awajsamtai çurukamtai “tunaitme” túruta?” tíchatapash. ⁸ Warí, “tunáa túramujaj Yúsán péñker awajeajaj,” tú nekas enentáimpramniaitkiuinkia shuar nuikia “Wats, ashí péñker áti tusar tunáa túratai” tímin ainti. Kame chíkich shuar in kajertamainiak “nuna jintintiainiawai” túramji. Nu shuar sumamawartin ániawai.

Ashí shuar tunáa túraitji

⁹ Nuikia Israer-shuartikia chikichjaj nankaamas çpéñkerkaitiaj? Penkesha. Warí, Israer-shuartisha Israer-shuarchajajisha ashí métekrak tunaan túrin ániawai. Núnaka jú áarmajaj paant awajsaitjai. ¹⁰ Yús-Papisha núnisan tawai:

“Péñkeran túrin chikichkisha atsawai.

¹¹ Yúsán nekaatniun nakitiainiawai. Yúsasha eainiatsui.

¹² Yúsnumia kanakiar menkakatniunam wénawai. Chikichkisha péñkeran túrin penké atsawai.

¹³ Ashí yajauch chichainiak iwiarsamu yama urainiua núnisan ániawai. Ni chichamejaj tuke anañkartin ániawai. Chichame napía áintsan najamin ániawai.

¹⁴ Aya yajauchin kakaram áujmatin ániawai.

¹⁵ Máataj tusa wárik yujarin ániawai.

¹⁶ Aya ti itiurchat ti yajauch awajin ániawai.

¹⁷ Shiir pujustinian nékainiatsui.

¹⁸ Ishichkisha Yúsán ashamenatsui.”

¹⁹ Yaunchu akupkamun umirkatin ainia nú shuar aya tákamtak umirkatin ániawai. Tuma asamtai ashí shuar umirkachu ásarmatai Yús nujaj súmamtikiawartatui. Túrakui niisha pachischamin ániawai.

²⁰ Akupkamuka aya ii tunaarin paant awajturmajaj. Tuma asamtai akupkamu péñker umirkatniujaj Yús “péñkeraitme” turamchamniaitji.

Aya Yús shiir enentáimtusar uwempramniaitji

²¹ Yús-Chicham yaunchu áarmanum itiura Yús in “péñkeraitme” túramminiaitaj nuna paant tawai. Kame akupkamujajinchuiti. ²² Antsu iisha ashí shuarsha núnisan aya Jesukrístu shiir enentáimtakrin Yús “péñkeraitme” túramminiaitji. ²³ Kame ashí shuarti tunáa túraitji. Tuma asar Yúsajaj métek péñker ajastin penké jeatsji. ²⁴ Tura Yús in waitnentrama asa kuítchajaj “péñkeraitme” túramji. Jesukrístujaj uwentikrampra asa túramji. ²⁵ Tura Krístun akupkamiayi ni jakamujaj ashí tunaan asakátratniun. Túramtai shuar Nin nekas enentáimtuiniakui Yús tsañkuramniaiti. Yaunchu tunáa túramun katsunteak enentáimtuschiayi. Yamái tsañkuramnia nuna yaunchu nekáa, nuna túramniuyayi. ²⁶ Tura yamaiya tunaancha tsañkureak ashí shuar Jesusan nekas enentáimtuinia nuna “péñkeraitme” tuke tíminiaiti. Krístu jakamujaj nuka paant ajasai.

²⁷ Nújainkia ii péñker ajasjina nu “winia kakarmarjaj túrunajaj” tíchamnia asar çnankaamantu enentáimtumarminkaitiaj? Penkesha. Warí, akupkamu umitsuk aya Krístu nekas enentáimtakrin Yús “péñkeraitme” túramji. ²⁸ Nujaj páantaiti. Akupkamu umirtsuk aya Jesukrístu shiir enentáimtakrin Yús “péñkeraitme” túramminiaitji.

29 Warí, Yuska Israer-shuarnasha tura núnisan Israer-shuarchancha mai ni Yúsrinchukait. 30 Kame aya chikichik Yúschakait. Tura tsupirnakuncha tsupirnakchancha mai metek aya Jesukrístun nekas enentáimtuiniakui “pénkeraitme” tíminiati. 31 Shuar Yúsan shiir enentáimtamujaí pénker ajastin áiniakui nujai ¿akupkamu ántar awajsamukait? Atsá. Antsu nuna nankaamas umirkatin awajsamuiti.

4

Apraámsha Yúsan shiir enentáimtamujaí pénker ajasmiania nu

1 Ashí Israer-shuara uuntri Apraám enentáimtustai. Niisha ¿itiurak Yusjai pénker ajasma? 2-3 Ni pénker takasmajai Yusjai pénker ajasuitkiunka nankaamantu enentáimtumarainti. Antsu Yus-Papí tawai: “Apraám Yúsan shiir enentáimtakui Yus “pénkeraitme” tímiayi” tawai. Nu túramu asa Apraámsha Yus ímmianum nankaamantu enentáimprachminiati. 4 Shuar íniamna nu takasmatai ¿aya tsanka asam akiktatmek? Warí, ni takasmanum páchitsuk akikchatniukait. 5 Antsu shuar ni pénker turamuri enentaimtsuk áyatik “Yus tunáa shuaran pénker awajniuiti” tu enentáimtakui Yuska tsanka asa “pénkeraitme” tawai. 6 Tura pénker túrachunak Yus “pénkeraitme” takui nu shuar shiir warasminiati. Núnisan tawai uunt akupin Tawit:

7 “Shuar ashí ni tunaarín Yus asakátar tsankuramu ana nuka shiir enentáimpramniati.

8 Uunt Yus ni tunaarín enentáimtachma asa ti warasminiati.” Tu tímiayi Tawit.

9 ¿Aya tsupirnakukeash warasminiati? Tura tsupirnakchasha waraschamniakait. Warí, Apraám Yúsan shiir enentáimtakui Yus “pénkeraitme” tímiayi. 10 Tura Apraám tuke tsupirnatsajín Yus nuna tímiayi. Emka Yus “pénkeraitme” timia nú ukunam Apraám tsupirnakmiayi. 11 Apraám tsupirnatsuk Yúsan shiir enentáimtusmatai Yus “pénkeraitme” tusa “tsupirnaktiniaitme” tímiayi. Nújainkia ashí Yúsan shiir enentáimtuinia nú shuar tsupirnatskesha Apraám weeá ániawai. Tura nu shuaran Yus “pénkeraitme” tawai. 12 Tsupirnakusha aya tsupirnakusa asa Apraám weeá ániatsui antsu nu arant Apraámjai métek Yúsan shiir enentáimtuinia nuka Apraám weeá ániawai. Kame Apraám tuke tsupirnatsuk Yúsan shiir enentáimtusmiayi.

Yus shiir enentáimtamujaí Nii timia nu uminkiattawai

13 Yaunchu Apraáman Yus chicharuk “Amincha amée weeá shuarnasha jú nunkan susattajai” tímiayi. Nunasha Apraám Yus akupkamun umireakui tíchamiayi. Antsu Apraám Yúsan nekas enentáimtakui Yus “pénkeraitme” taku nuna tsankatkamiayi. 14 Kame aya akupkamun umirniun súsatniuitkiuinikia nuikia Yus enentáimtustin ántrai. Tura Yus Apraáman timia nusha ántrai. 15 Akupkamu akui shuar umirkachka ti asutniáshtatuak. Tura atsakuinikia ¿asutniátniukait? ¿Itiurak umirtsuk ikiuktiñ?

16 Tuma asantai Yus ti anenkartin asa Nin nekas enentáimtuinian ashí tsankatkaiti. Nújainkia Apraám weeasha Yus Apraáman timia nuna páchitsuk wáinkíartatui. Iisha Apraámjai métek Yus nekas enentáimtakur ní weeitji. Tuma asantai Muisais akupkamun umirniuncha tura umirniuchuncha mai metek ashí in Yus ashí Apraáman timia nuna tsankatramkattaji. 17 Kame Yus-Papinium Apraám áatramuiti: “Untsurí shuarsha amée weeá ajasartatui.” Nu asantai iisha Apraámjai métek Yus shiir enentáimtakrinkia Yus incha Apraám weeá áintsan írmaji. Nú Yuska ti kakaram asa jakancha iwiaaku awajniuiti; tura atsana nunasha ana nútiksán nájau.

18 Yus “ti pampantatme” takui Apraám ti uuntach áyat Yus timian enentáimtak yajutmartinian nákasmiayi. Nujai untsurí shuar ní weeá

ajasarmiayi, Yus timia áintsan. ¹⁹⁻²⁰ Apraámsha sian (100) uwí takakuitiat tura ni nuwé Sarasha júretsuk uunt ajasmataisha tuke iniaitsuk Yus tímia nuna nekas enentáimtusmiayi. “Yus nekasash ta” tútsuk shiir awajsamiai. Nujajsha nuna nankaamas kakaram ajasmiai. ²¹ Tuma asa “nekas Yus tana nuna páchitsuk umiktatui” tu enentáimpramiayi. ²² Nu asamtai Yus “pénkeraitme” tímiayi.

²³ Tura Yus nekas enentáimtamunam Yus “pénkeraitme” tana nu aya Apraámna áatrachmaiti. ²⁴⁻²⁵ Antsu incha túramji. Iisha núnisrik ii Uuntrí Jesus nekas enentáimtakrinkia Yus incha “pénkeraitme” turamtatji. Jesuska ii tunaarin jarutramkatniun surunkamiayi. Tura nujaj Yus in “pénkeraitme” taku Jesusan ataksha iniantkimiayi.

5

Yus “pénkeraitme” túramkurin shúrait

¹ Tuma asamtai Yus nekas enentáimtakrin Yus “pénkeraitme” túramji. Nujaj iisha Yusjaj shiir nawamnaikiar pujaji. Núnaka ii Uuntrí Jesukrístu ni jakamujaj sumartamkamiaji. ² Tura Nii shiir enentáimtakur Yusaj weankaitji. Tura Kristu jarutramkakrin Yus ti anenmaji. Tura tuke anenma asakrin Niijjaj métek shiir ajastin nákur waraaji. ³ Nu arantcha yamá itiurchat pujayatrik nu itiurchatjaj unuimiartatji tusar waraaji. Katsuntratniuncha unuitiamji. ⁴ Tura nu unuimiarar ii katsuntram paant átatui. Tura nuyá Yus ti shiir awajtamsattajnia nuka shiir enentáijjaj nákastatji. ⁵ Nu ti shiir enentáimsar nákamujaj ananmamtsuji. Yuska ni Shiir Wakanin ii enentáin pujurtamuk ni anenkartutairin ti paant awajturmaj. Tuma asamtai Yus túratin nákjania nu imiá nekas wainkiattaji.

⁶ Iikka penké uwemprachmin asakrin tsawant jeamta Kristu ashí shuara tunaarin jarukmiayi. ⁷ Shuar chích shuaran uwemtikratniun ¿jaruktatuak? Pénker shuar ajn jarukchattawai. Kame ti penkeraitkiuinkia jarukchaintiash. ⁸ Antsu ii tuke tuná árinin Kristu jarutramkamiaji. Nujaj in ti anenmajnia nuna ti paant iniakturmaji. ⁹ Tura ni numpejjaj tunaarinja awajsamu asar imiá nekas Yus asutiámatniua nuyá uwempraitji. ¹⁰ Yusa nemasri áyatar Yusa Uchirí jakamujaj yamaikia Yusjaj shiir nawamnaikiar pujaji. Nu arant nuikia Kristu tuke iwiaaku asa ijjaj tsaninkiu asa ashí yajauchinmaja uwemtikramar tuke shiir awajtamsattaji. ¹¹ Ii Uuntrí Jesukrístu jakamujaj Yusjaj shiir nawamnaikia asar ti waraaji.

Atansha tura Krístusha túrawarma

¹² Ayu. Yámankamtaik emka áishman Atan niniki tunaan túramtai nú tunaajaj ashí shuar tunaarintin ajasarmiayi. Tura ashí tunaarintin ajar mash jákatin áiniawai. ¹³ Akupkamu atsakuinkia umirkachma nekaachminiaiti. Tuma ajn Muisais akupkamu atsaisha tuke tunaan túrin ármiai. ¹⁴ Atan pujumia nuyá Muisais tuke akupeatsajin shuara tunaari paantcha ajn ashí shuar tunaan túrawar jákarmiayi. Kame ni tunaari Atanna áintsachauyayi. Atanka Yus akupkamu paant ujakman umirkachmiayi. Antsu nu shuar Yus akupkamu paant nékainiachiatan tunaan túrin ániak jákarmiayi. Tura Atanka Krístujaj apatkar enentáimpratai.

¹⁵ Atan tuná túramia nujaj apatka iisam, Yus in tsankatramaj nuka nankaamas pénkeraiti. Kame Atan niniki tunaan túramujaj ashí aents untsurí armia nu, tunaarintin ániak, jákarmiayi. Tura Yus in ti anenma asa chikichik áishmanjaj nuna nankaamas tí shiiran tsankatramaji. Jesukrístujajinkia untsurí shuaran uwemtikrar ti shiiran tsankateawai. ¹⁶ Atanka tunaari imiá yajauch ajn nuna nankaamas pénkeran Yus tsankatramkaitji. Iis, aya

chikichik tunaan túramujaj aents sumamawarmiayi. Antsu Yus uwempratniun tsankatramaj nújainkia ti untsurí tunaan asakáruiti, tura “pénkeraitme” túramji. ¹⁷ Chikichik áishman tunaan túramujaj aents jákatin áiniawai. Tura nuna nankaamas chikichik áishman Jesukrístu túramujaj ti shiir pujustatji. Kame Yus ti anenma asa ii péñker túratsriniñ “pénkeraitrume” túramji. Nu asamtai yamaram iwiaakmanum kakaram ajaji.

¹⁸ Atañ tunaan túramujaj ashí tunaarintin ajasar jákarmiayi. Núnisan Jesukrístu péñker túramujaj ashí shuar Yus “pénkeraitme” timia nuka yamaram iwiaakmajaj tuke pujusartatui. ¹⁹ Núnisan chikichik áishman umirkachmajaj untsurí tunaarintin ajasarmiayi. Tura chikichik áishman umirkamujaj untsurí shuar péñker awajnasarmiayi.

²⁰ Wats, tunáa ti paant atí tusa Yus ni akupkamurin susamiayi. Túrasha ti tunáa pampaakui Yus nuna nankaamas waitnentramak nu tunaan asakátramji. ²¹ Shuar tunaan túrin ásar jákatin áirmiayi. Tura núnisan ii Uuntri Jesukrístu túramujaj Yus in “pénkeraitrume” túramkurin iisha tuke iwiaaku pujustiniatji.

6

Krístujaj jaka asar tunáa túrachminiatji tura Krístujaj tsaniñkiu asar iwiaakuitji

¹ Núnisaitkiuinikia Yus nankaamas waitnentrampratai tusar ¿tunáa túrattajik? ² Péñkea. Warí, iikia tunáa túrashtin jákaitji. Jáka ¿itiurak tunaan túramniait? ³ Imianniutikia Krístujaj tsaniñkiu asar imianir Niijjaj métek jaka áintsar aji. ⁴ Tura imianir Krístujaj jaka áintsar métek iwiaarnasuitji. Tura Yus ti kakaram asa Krístun jakan iniantkimia núnisan incha nu kakarmajaj yamaram enentáijaj péñker wekasatniun iniantamkimiaji.

⁵ Krístujaj tsaniñkiu asar Niijjaj métek jaka áintsanketji. Tura núnisan Niijjaj métek nantaktiniatji. ⁶ Yaunchu enentáimtainkia Krístujaj métek jaka asamtai ii yajauch wakerutain emenkátrutmakuitji. Tuma asamtai yamaikia penké umirkashtiniatji. ⁷ Kame ¿jáka ¿itiurak tunaan túrat? Yamaikia ankant ajasuitji. ⁸ Iisha nekas Krístujaj jákaitkiurkia Niijjaj métek tuke iwiaaku pujustin enentáimji. ⁹ Kame Krístuka chikichkí jaka nantakin asa atakka jákashtatui. Túmaitkiui atakka ajakrachminiaiti. ¹⁰ Kristu chikichkí jaka asa ashí tunaajaj itit awajsachmin ajasuíti. Tura yamaikia iwiaaku pujá asa Yúsan shiir awajsatniun pujawai. ¹¹ Atumsha núnisrumek jaka áintsarum tunáa túrachmin enentáimtumastarum. Antsu ii Uuntri Jesukrístujaj tsaniñkiu asarum iwiaaku pujakrum Yus shiir awajstarum.

¹² Nu asamtai tunaaka ayashmijn akuptamkashtiniaitrume. Ayashí wakeramurj umirkashtiniaitrume. Ankantaitrume. ¹³ Atumi ayashí tunaan túrat tusarum ikiasairap. Antsu jakamunmayá nantakin asarum Yus wakeramu túratin surumaktarum. Tura ayashmisha aya péñkernak túratí tusarum Yus íktustarum. ¹⁴ Akupkamu umirkatniujaj iwiaaku pujatsrume. Antsu atumin Yus ti anenma asa yamaram iwiaakman suramsaitrume. Tuma asamtai yamaikia tunaaka nupettamkachminiaiti.

Tuke umireajnia nuna takarniurintji

¹⁵ Nuikia akupkamu umirtsuk antsu Yus ti anenma asakrin iwiaaku pujakur ¿“Páchitsuk tunaan túramniaitjai” títiatjik? Péñkea. ¹⁶ Tuke umireajnia nuna takarniurintji. Nuka nékatsrumek. Tura ni takarín ajasam umirkatniuitme. Tuma asamtai tunáa umirkurkia ni takarniurintji tura umirkar jakattaji. Tura Yus umirkurkia péñker wekasattaji. ¹⁷ Atumsha yáunchuka

tunáa umirniuitiatrum ikiukrum yamaikia nekas chicham antukurmena nu nekas atumí enentáijjaj umirkaitrume. Tuma asamtai Yus ti yuminsatniuiti. ¹⁸ Yamaikia tunaanumiá ankant ajasu asarum ti péñker wekasatniunam pachiinkiaitrum. ¹⁹ Paant nekaak tusan takarniun pachisan tájarne. Wats, yaunchu atumí ayashí mujjmiainian tura ashí yajauchin túrat tusarum tsankamakmarne. Núnisrumek yamaikia atumí ayashí péñkeran túrat tusarum tura tuke Yusjaj shiir wekasat tusarum tsankamaktarum. ²⁰ Atumsha tunáa umirniuyarme nuikia péñker wekaichauyarme. ²¹ Tura nújajsha ¿warí péñkerna yáinmakmarum? Iista, yamá natsanmainchakait. Nusha jákatniunam júawai. ²² Antsu yamaikia, tunaanumiá uwempra asarum Yus umirniuitrume. Antsu júka Yusjaj shiir wekasatniunam júawai tura nuyá tuke iwiaaku pujustatrume. ²³ Tunáa takarkumka tuke jákatniun akirmak-tatui. Antsu Yuska iikia takaatsrinin penké ántar tuke iwiaaku pujustinian suramsattaji. Ii Uuntri Jesukrístujaj tsaniñkia pujá asakrin nuna túrutmattaji.

7

Akupkamujaj ankantaitji

¹ Enentáimpratarum yatsuru. Jákaaka akupkachminiaiti. Aya iwiaakna nu akupkamniaiti. Nu paant nékatsrumek. ² Wats, nuwá nuátkamu ni aishri iwiaakkui niijjaj tsaniñ pujustiniaiti. Tura aishri jakamtai ankant ajawai. ³ Tuma asamtai aishri iwiaakain chíkich áishmanjaj tsaniákka tsanirmawai. Tura ni aishri jakamtai chíkich áishmanjaj páchitsuk nuatnakminiaiti tura nuikia tsanirmatsui.

⁴ Núnisrumek atumsha, yatsuru, Kristu ayashí muchitmarí ajasu asarum akupkamu emettachmin jaka áintsarum ajasuitrume. Túrakrum Krístujaj nuatnaikiatin áintsarum ankantaitrume. Niisha jakamunmayá nantakniuiti. Yamaikia Krístunu ajasu asar Niijjaj tsaniñkiar Yus wakeramu péñker túratniuitji. ⁵ Yaunchu wakerutai umirniuyaj nuí akupkamu enentáimtusar nuna nankaamas yajauchia nu wakerimji tura jákatniunam juramkimji. ⁶ Antsu yamaikia akupkamu emettachmin jaka asar ankant ajasuitji. Túrunar akupkamu yaunchu áarma nu iniaisar yamaikia Yusa Wakaníjjaj tsaniákur yamaram iwiaakmajaj péñker wekasamniaitji.

Winia enentáiruñ tunáa ana nu

⁷ Núnisaitkiuñkia “Akupkamu yajauchiiti” ¿titiñjash? Atsá. Warí, akupkamuka tunaan ti paant awajeawai. Akupkamu “Chikichna wakerukaip” táchakuñkia wakerukchaajaj. ⁸ Tura nu akupkamun enentáimtakui winia enentáiruñ tunáa ana nu ashí yajauchin ti wakerumtikrimiayi. Kame akupkamu atsakui tunaan ti enentáimtichaintjai. ⁹ Yaunchu akupkamun nékachkun nánkamsanak enentáimniuyajaj. Tura akupkamun nekaan tunaan nekaamjai tura jaka áintsanak ajasjai. ¹⁰ Tuma asamtai akupkamujaj péñker wekasatniuitiatan umirkatniun tujintiakuí aya jákatniunam jurukni. ¹¹ Kame tunáa wakerutañkia nu akupkamujaj anankrua péñker iwiaaku pujustinian surutsuk nu akupkamujaj jákatniunam jurukmiayi.

¹² Tuma asamtai akupkamuka Yusna asa ti penkeraiti. Yajauchihuiti. ¹³ Nuikia ¿péñkera nu jákatniunam júrawak? Atsá. Antsu tunáa wakeruktin jákatniunam jurukmiayi. Nuna tura asa tunáa imiá yajauchia nu nekaamniaiti. Tura tunáa wakerutai péñker akupkamujaj jákatniunam jurukmiatai, nuñaj Yus “tunáa wakerutai imiá yajauchiiti” tusa paant awajsamiayi. ¹⁴ Akupkamuka Yúsnaiti. Nu paant nékaji. Antsu wikia ayashna nuna wakerakun tunaan umireajaj. ¹⁵ Kame túrajna nuna itiurchat enentáimtajaj. Péñker túratniun wakeraj nuna túratsjai. Antsu nakitiañ nuna nekaska túriniaitjai.

16 Akupkamu pé_nkeran nekaan umirkatniun wakerajai. Túrayatnak umirchaitjai. 17 Tuma asamtai wíchaitjai tunaan wakerakun túrajna nuka. Antsu winia enentáiruj tunáa wakerutai pujá asa nu túrumtikriniaiti. 18 Yaunchu enentáimtai winia enentáiruj pujana nu penké yajauchiiti. Nuna ti paant nékajai. Tuma asamtai pé_nker túratniun wakerayatnak penké tujintiajai. 19 Pé_nker túratniun wakerayatnak túratsjai. Antsu tunaan nakitiaj nuna túrajai. 20 Nu asamtai nakitiaj nuna túrakun wíchaitjai antsu winia enentáiruj tunáa wakerutai pujana nu túriniaiti.

21 Jú_nisaiti. Pé_nker túratniun wakerakun aya tunaan ínkiuajai. 22 Nekas enentáijjai Yusa akupkamurín wakerajai. 23 Tumaj yaunchu enentáimtai winia enentáiruj pujurtak nupettawai tura nekas wakeraj nuna akirturui.

24 Maa, ti waitiajai. Jú ayash wakeramujai jákatniunmaya ¿yaki uwemtikrurat? 25 Yuska ii Uuntrí Jesukristujai túrutmamniaitji. Tuma asamtai Yúsan ti yumínkijai. Ayu. Winia enentáirjai Yus akupkamun umirniuitjai. Antsu winia ayashrujai tunaan umireajai.

8

Yusa Wakaníjai pé_nker wekasatin

1 Jesukristujai tsanínkiarun Yuska “tunaan túrawar jákatniunam wémin áiniawai” tatsui. Nu shuar ni ayashí wakerana nuna umirtsuk Yusa Wakaní wakerana nuna umirainiawai. 2 Jesukristujai tsanínkiu asakrin Yusa Wakaní nekas iwiaaku awajtamsaitji. Tuma asamtai tunáa túratniunmaya tura jákatniunmayasha ankant ajasuitji. 3 Ayash wakerutainkia, wi akupkamun enentáimtakui, nuna nankaamas tunaan wakerumtikrimiayi. Tuma asamtai akupkamuka yáinkiachminiuyi. Antsu akupkamu tujinkiamia nuna Yus túraiti. Ni Uchirín ayashtin awajas tunaan jarukat tusa akupkamiayi. Tura nujai ayash tunáa wakeramun nupetkamiayi. 4 Túramtai ii yamaikia ayash wakerana nu umirtsuk tura Yusa Wakaní wakeramu túrar akupkamu tana nu umirniuitji. 5 Ayash wakeramun umirainia nu, ayashnia nunak enentáimtuiniawai. Antsu Yusa Wakaní wakeramun páchinia nuka Yúsnan enentáimtuiniawai. 6 Ayashnia nuna enentáimtuinia nú shuar jákatniunam wénawai. Antsu Yúsnan enentáimtuinia nuka Yusjai shiir nawamnaikiar tuke pujusartatui. 7 Aya ayash wakeramun enentáimtuinia nú shuar Yusa nemasrí áiniawai. Yus akupeamun nakitiainia ásar ni taman umirkatniun penké jeainiatsui. 8 Tuma asamtai shuar ni ayashí wakeramurí warareakka Yúsan shiir awajsachminiaiti.

9 Tura átumka ayash wakeramu umirtsuk tura Yusa Wakaní pujurtamkurmin ni wakeramu enentáimtiniaitume. Ashí shuar Krísturtin ainia nu ni Wakanín takaku áiniawai. Takakchaitkiunka nuikia Krístunuchuiti. 10 Tura Kristu atumin pujurtamkurminkia atumí ayashí tunaajai jakamnia aín Yus “pénkeraitme” túramu asamtai atumí wakanínkia nekas tuke iwiaakuiti. 11 Yus Jesukristun jakan iniantkimiayi. Tuma asamtai ni Wakaní atumí enentáin pujurtamkurminkia Jesusan iniantkimia núnisan nu Wakanjai yamaram iwiaakmajai iniantamkittiarne.

12 Tuma asamtai, yatsuru, ayash wakeramu penké umirkashtiniaitji. 13 Ayash wakeramu umirniuitkiurmeka jakattarme. Antsu Yusa Wakaní pujurtamkurmin ayash wakeramu nupetkarmeka pé_nker wekasarum nekas iwiaaku átatume.

14 Ashí shuar Yusa Wakaní timiajai métek wekainia nu, nu shuar nekas Yusa uchirínti. 15 Yusa Wakaní in pujurtamkurin Yusa uchirí ajarar sapijmiatsuk Yusaj weamkar “Aparú” tímimniaitji. 16 Nu Wakan “nekas Yusa

uchirínme” ii enentáin túramji. ¹⁷ Tura ni uchirí ajasu asakrin Yus tímia núnisan ashí Níiniun suramsattaji. Krístun ashí susattana núnisan incha suramsattaji. Yamái Krístunu takaakur wáitiakrikia ukunam Krístujai métek ti shiir awajnastatji.

¹⁸ Maa, yamá ti wáitiakrishá ukunmanka nayaimpiniam ti shiir pujakur nu wáitsamu kajinmatkittiaji. ¹⁹ Tsawant jeamtai Yus ashí ni shuarin Nijjiaí métek ti shiir awajsartatui. Nuin nekas Yusa uchirí ainia nu ti paant nekanattawai. Nu tsawantan wáinkiatniun ashí Yus najanamu íranna nu ti ná kainiawai. ²⁰ Ashí Yus najanamia nuna yámankamtaik ti péñker najanamiayi. Túrasha yajauch ajasmiayi. Nusha ní neaskeka túrunachmiayi. Antsu Yus ukunam ataksha iwiarnartin atí tusa tunáa wayamunam yajauch ajasat tusa tsankatkamiayi. Tuma asantai iwiarnartin tsawantan nákwai. ²¹ Nu tsawantai ashí Yus najanamu emesnartinniumiá uwemprartatui. Tura ashí Yus najanamuka shuar Yusa uchirí ajasarua nujai métek shiir awajnasar ankant ajasartatui. ²² Yamaisha ashí Yus najanamu ainia nu, nuwá jatema wáitia nunis ti wáitiainiawai. ²³ Yus najanamuka ashí wáitiainiawai. Iisha Yusa Wakaní takakiatar ti wáitiaji. Tura Yusa Wakaní takakur ashí Yus suramsattajnia nu nékaji achiktin. Tuma asar nekas Yusa uchirí paant awajnastin tsawant nákwai. Nuisha ii ayashísha ankant awajnastatui. ²⁴ Nu tuke enentáimtuki wéakur takamtsuk uwemprattaji. Yamái nu wáinchiatar tuke nákwai. Warí, ¿wáinjinia nu nákwai? ²⁵ Tuma asar tuke waincha asar katsuntrar nákwai.

²⁶ Nu arantcha ii kakarmachu nekapeakrin Yusa Wakaní yáinmaji. Kame Yus áujsatniusha nékachkurin in yáinmaji. ¿Warí seattaji tura itiur seatjik? Nu nékatsji. Tura itiurchat pujakur ti wáitiakrincha Yusa Wakaní in áujturmajia. ²⁷ Tura Yus ii enentáin enentáimtaji nuna nékaiti. Tuma asa ni shuarí asakrin ni Wakaní ni wakeramujai métek seatramkurin ántawai.

Ti nupetmakuitji

²⁸ Yus anea asakrin ashí nankaatamjinia nujai Yus pujurtamji. Tura nujai péñker awajtamji. Nu paant nékaji. Tura Ni wakerimia núnisan Ní shuar awajtamaitji. ²⁹ Yámankamtaiknumiá in nekarmak ni Uchirí Jesukrístujai métek ajasat tusa achirmakmiayi. Nujai Yusa uchirí untsurí ajasji. Tura Kristu ii iwiairinti. ³⁰ Tura Yus achikmia nuna Niiniu awajsamiayi. Tura nu shuaran “péñkeraitrume” tímiayi. Tura ti shiir awajsamiayi.

³¹ Wats, nuikia Yus in yáinmakrin ¿yaki in nupettamkattaji? ³² Ni Uchiríncha suritramkachmiayi antsu in jarutramkat tusa akupturmakmiayi. Tura asa ni Uchiríjiaí métek ti shiira nuna ashí suramsashtatjik. ³³ Yus achikmia nú shuaran ¿yaki sumamtikiat? Yus Ápaka “péñkeraitrume” tiniu asa penké túrashtatui. ³⁴ Tura ¿yaki “jiniun apenáti” titi? Warí, Kristu penké túrashtatui. Antsu nu shuaran jarukmiayi. Tura nantaki Yusa untsuurini ekemas in áujturmajia. ³⁵ Kristu ti anenma asakrin in akantamkitin atsawai. Wáitiakrishá, itiurchat ínkiuakrishá, shuar áintramkurnisha, tsukamakrishá, entsatai atsakuisha, tsúmainjaisha, tura mantamnakrishá, nujai “Kristu anentsui” tíchamniaitji. Nuka Kristu anenkrattairiya akantamkitin jeatsui. ³⁶ Yus-Papniumsha júnis áarmaiti:

“Amée-shuar asar tuke mantamnatin pujaji. Murik máatniua áintsan enentáimturmajia.”

Tu áarmaiti.

³⁷ Tuma ain Kristu in anenma asakrin Nijjiaí ti nupetmakuitji. ³⁸ Kristu anenkrattairiya akantamkitin penké atsawai. Nuna ti paant nékajai.

Jákatniusha, iwiaakmasha, nayaimpinmaya suntarsha, ashí nayaimpin-masha tura nunkanmasha akupin ainia nusha, yamá írunna nusha, ukunam átatna nusha, ³⁹ yakí írunna nusha, nunká írunna nusha, kame ashí Yus najanmu írunna nusha Yusa anenkrattairiya penké akantamkichminiatji. Yusa anenkrattajsha ii Uuntri Jesukrístu túrunamujai paant wainji.

9

Yus Israer-shuaran ni shuari arti tusa achikiarmiania nu

¹ Yamái tájana nu Kristu shuari asan imiá nekasan wáitrutsuk tájai. Winia enentáirsha tura Yusa Wakanísha “nekas tawai” turutainiawai. ² Israer-shuaran waitnentakun ti kuntuts enentáimjai. ³ Wíishuar ániakui Krístunmaya kanakin yumiñnaraintjai nujai wíishuaran yáimniatkiunka. ⁴ Israer weeá shuar áiniawai. Tura ni uchiría áinis Yus achikiaruiti. Yusa wincharísha níjjiai pujumiayi. Yaunchu Chicham ni weatrijjai iwiamuncha tura Muisais akupkamuncha susamiayi. Tura Yusa Jeen Nin shiir awajsatniun jintintiamiayi. Tura ukunam shiir tsankatkattana nunasha ujakmiayi. ⁵ Ni weatrin Yúsán ti penker enentáimtin irunmiayi. Krístusha aents ajas nú shuarnum akiiniamiayi. Krístuka Uunt Yus asa tura ashí akupin asa Niñki tuke shiir awájnastí. Núnisan atí.

⁶ Kame Yus ashí Nii timia nuna Israer-shuaran súsachmataisha nujai “Yus timia nu uminkiachuiti” tíchamniaiti. Antsu junis enentáimpratniuiti: ashí Israer weeá áiniayatan Yusjai íismaka ashí nekas Israer-shuar ániatsui. ⁷ Núnisan Apraám weeá shuarsha ashí nekas ni shuar ániatsui. Iis, Yus Apraáman tímiayi “Aya Isak pampanma amee shuarum ártatui.” ⁸ Nujai páantaiti. Shuar aya Apraam weeá akiinia asa Yus timian wáinkiashtiniaiti. Antsu Yus timiajai métek akiinia nu nekas Apraám weeá shuar ániak Yus timian wainkiattawai. ⁹ Kame Yus Apraáman tímia nu júiti: “Tsawant jeamtai jeartiatjame, tura ame nuwem Sara uchin takustatui.” Tu tímiayi.

¹⁰ Nu arantcha, ii weatri Isaka nuwe Ripikia jimiampramiayi. ¹¹⁻¹³ Nu uchisha akiiniainiatsain penkernasha tura yajauchincha túruiniatsain Yus Ripikian tímiayi: “Iwiairia nu ni patain umirkattawai.” Ataksha núnisan Yus ni Papiriin chíchak “Jakupan aneakun Esaun nakitramjai” tímiayi. Nujainkia páantaiti. Yus wakerak aya ni enentáijjain shuaran achikminiatiti. Nu shuar túrunamu enentáimtutsuk túramniaiti.

¹⁴ Túriniaitkiui “Yus penkerchaiti” ¿titiyajash? Atsá. ¹⁵ Yus Muisaisan junis tímiayi:

“Wi wakerajna nunak waitnentrattajai.”

¹⁶ Tuma asamtai shuar ti wakerakuisha tura kakaram takaakuisha aya nujai Yus waitnentatsui. Antsu aya ní enentáijjain wakerak waitnentawai.

¹⁷ Ataksha Yus-Papininum tawai “Yus Ejiptu nunka akupniurin tímiayi

“Ámijiai ashí nunkanam winia kakarmarun nekaawarat tusan uunt akupniun awajsamjame” tímiayi” tawai.

¹⁸ Tuma asamtai Yus Nii wakera nuna waitnentawai. Túrasha Ejiptu akupniurin túramia núnisan Nii wakera nú shuaran enentáin kátsuram awajtawai.

¹⁹ Tura “Núnisaitkiunkia ¿urukamtai shuaran Yus súmamtikia? turutchatapash. Nii wakerakuinkia ¿itiurkattajik?” turutchatapash. ²⁰ Warí, aents asam Yusjai ¿tunaiminkiaitiam? Nuwá pininkian nájankui núweka “¿urukamtai junis najatam?” tíminkiait. ²¹ Nuwá wakerakka nu nuwejai amamkuncha tura yukunnasha nusháa takakmastinian mai najanachminkait.

²² Yajauch shuar ti asutiátin ániak emesnartinnium wétin áiniawai. Yus nu shuaran asutiá ni kakarmarin iniaktustaj tayat ti katsuntramiayi. ²³ Tura

katsunteak ni anenkrattairin iniakmasmiayi. Nú arant nuikia in waitnen-tramak shíir enentaijjai pé_nker awajtamkur ni anenkrattairi ti paantchakait. Nekas shíir enentaijjai pé_nker ajasat tusa yaunchu iwiartampramiaji. ²⁴Tura incha, Israer-shuarnumiasha Israer-shuarchanumiasha, ni shuari ajasat tusa achirmakmiaji. ²⁵Núnisan yaunchu Yúsnan etserin Useas Yus-Papinium tawai:

“Wíishuarchan Wíishuar awajsattajai. Aneachmancha aneamu awajsattajai.

²⁶Tura Yus “Wíishuarchaitrume” tímia nú shuaran “Nekas iwiaaku Yusa uchiriniuitrume” ukunam títiatui.”

Tu áarmaiti. ²⁷Antsu Isayas Israer-shuaran páchis tímiayi:

“Israer weeá ti nan_kkaamas untsurí áiniayat pen_ké ishichik uwemprartatui.

²⁸Kame Yus yajauchin akupkataj timia nuna takamtsuk wárik umiktatui.”

²⁹Núnisan Isayas ataksha tawai:

“Ashí akupeana nú Yus in waitnentramachkurni_nkia Sutuma péprusha Kumura péprusha takamtsuk jákarmia núnisan jáka_naji.”

Israer-shuar uwempratin chichamjai tujinkiarmiania nu

³⁰Wátsek, Israer-shuarcha, Yus iisam ni túramurijjai “pén_keraitji” tu enentáimtumainiachunak, Yuska, Nii enentáimtusam, “pén_keraitrume” tímiayi.

³¹Antsu Israer-shuarka pé_nker akupkamun umiktinian wakeruiniayatan tujintiainiakui nujai pé_nker ajastinian tujinkiarmiayi. ³²¿Urukantai tujinkiarma? Yúsan enentáimtutsuk aya ni pé_nker túramujai pé_nker ajastinian enentáimtuiniak tujinkiarmiayi. Krístun enentáimtustinian nakitiainiak shuar kan_kapen awan_kemtuktinia núnisan iniararmai. ³³Tura kaya tukumkar iniarchamniakait. Nu asantai Yus-Papinium Krístun pachis tímiayi:

“Seun péprunam kayan ikiuajai, tawai Yus. Nu kayanam Israer-shuar tukumkar iniarartatui. Antsu Nin shiir enentáimtuinia nú shuar natsa_narchartatui” tawai.” Tu áarmaiti.

10

¹Yatsuru, Israer-shuar uwemprarat tusan ti wakerakun Yúsan áujtajai.

²Maa, uwempratniun nékachiata_n Yúsan shiir awajsatniun ti wakeruiniawai. ³Túmaitiat shuáran Yus pé_nker awajsatniun nékachu ásar aya ni pé_nker túramujain pé_nker ajastinian wakeruiniawai. Tuma ásar Yus pé_nker enentáimtamujai pé_nker ajastinian jecharai. ⁴Aya Kristu enentáimtamujai pé_nker ajastin asantai akupkamu umirkatniujai pé_nker ajastin ántraiti.

⁵Akupkamujai pé_nker ajastinian pachis Muisais tímiayi: “Nuna takamtsuk umirniuka nujai pé_nker pujustatui.” Tu áarmaiti. ⁶Antsu Krístun enentáimtus pé_nker pujustinian pachis shuar juna tímiaiti: “Ti itiurchata áinis “¿Yaki nayaimpiniam waka Krístun itiarat?” tiirap,” tawai. ⁷Tura ¿Yaki jakamunam we Krístun iniantkit?” tiirap” tawai. ⁸Tura junasha tawai: “Yus-Chicham yúpichuch umirkamniaiti. Aya enentáimjai enentáimtakum wenumjai ujak_nitaitme.” Nu Chicham “Yus enentáimtustiniaiti” tawai. Nu Chicham tuke étsereaj núiti. ⁹Yus Jesusan jakan iniantkimia nu enentáimtakum tura wenumjai “Jesus winia Úuntruiti” takum uwemprattame. ¹⁰Kame Kristu enentáimtakmin Yus “pén_keraitme” turamtatui nuyá wenumjai “Jesukrístun enentáimtajai” takum uwemprattame.

¹¹Ataksha Yus-Papinium tawai: “Nin shiir enentáimtuinia nú shuar natsa_narchartatui.” ¹²Tuma asantai ashí shuar, Israertisha Israerchasha, mai metek Yúsan shiir enentáimtuinia nuna Yus ti aneak ashí pé_nkeran súawai. Tura ashí métek ni Úuntrinti. ¹³Nu arantcha “Ashí shuar Uuntan áujea nu uwemprattawai” yáunchu Krístunun tu áatramuiti. ¹⁴Tura Krístun

enentáimtuiniachusha ¿itiurak Nin áujsarat? Tura Krístun nékainiachusha ¿itiurak Nin enentáimtusarat? Tura Yus-Chicham ujaachmasha ¿itiurak nekaawarat? Shuar Yus-Chichaman ujaktiniaiti. ¹⁵ Tura akupkachmasha ¿itiurak Yus-Chichaman ujakarat? Tura shuar Yus-Chichaman etserkataj tusa wéana nuna Yus-Papinium tawai:

“Shuar Yusa Shiir Chichamen etserki weana nu ti shíirchakait.”

¹⁶ Tura ashí shuar uwempratin chichaman ántuiniayatan umirainiatsui. Isayassa yaunchu aak tímiayi:

“Uuntá, ¿yaki ii étserman antukaruit?”

¹⁷ Paantchakáit. Kristu túramu ujakam antuktiniaiti. Tura antukar Krístun shiir enentáimtustiniaiti.

¹⁸ Tura ¿Israer-shuar Yus-Chichaman antukcharu ásarān Yúsan enentáimtuscharma? Atsá. Warí, Yus-Papí tawai:

“Ashí nunkanam ni chichame antunkaiti.”

¹⁹ Tura “Israer-shuar nu chichaman antukariat ¿paant nekaawarmaashi?” inintrusminiaiti. Tura nekas nekaawarmai. Tuma asamtai Muisais tawai:

“Israer-shuarchan nékachu ainiana nuna shiir awajeakun akajkattajrume.”

²⁰ Nuyá Isayas ashamsuk áarmiayi:

“Eatkacharua nu wáitkiarmiayi. Inintruiniatsain wantintiukmiajai.”

²¹ Tura Israer-shuaran áujmatuk tímiayi:

“Tuke iniaitsuk Winin winiarti tusan nu shuaran untsúajai. Tura nakitrurar umirtuiniatsui.”

11

Chíkich Israer-shuarsha uwemprartatui

¹ Tura Israer-shuar Yúsan umiiniachkui ¿Yus nin iniaisaashit? Péñkea. Warí, wi Israer-shuarchakaitiaj. Wi Apraámsha tura Pinjamin weeá aki-iniachukaitiaj. ² Yámankamtaikniumiā Yus Israer-shuaran ni shuar arti tusa achikiu asa yamaikia iniaiashtatui.

Ti yaunchu Yúsnan etserin Erías Israer-shuaran pachis Yúsan áujtak tímiayi:

³ “Uuntrú, naman awasar Yus sútaincha mash saákiarai. Áminiuon etserniu-uncha mash máawarai. Tura wiki juakjai. Tura winiasha “mantuatai” turutainiawai.” Tu áujsamiai.

⁴ Tura Yus ayak tímiayi “Siati mir (7000) áishmankan Israer-shuarnumiā apujtumsaruitjai. Nu shuar ántar-yus Páaran tikishmatrachu áiniawai” tímiayi Yus.

⁵ Núnisan yamaisha Yus ti waitnentainia asa ashí Israer-shuarnumiā ni shuarin achikiuiti. ⁶ Yus ni enentáijiajn waitnentak túrait. Nú shuar péñker tura asamtai waitnentatsui. Yus aya péñkernak waitnentakka nuikia waitnenkratchainti.

⁷ Ayu. Nuikia ashí Israer-shuar péñkeran eákaru ajn aya Yus achikmia nú shuar wainkiarmiayi. Antsu ni achikchamuka nuna nankaamas nekaach-min ajasar kusurua núnin awajnasarmiayi. ⁸ Yus-Chichamsha núnisan tawai: “Yus enentáimchatai enentáin súsarmiayi. Wáinmashtai jüncha tura ántushtai kuíshniasha súsarmiayi. Yamaisha núniskete.” ⁹ Tawitcha yaunchu aak tímiayi: “Tuke tunáa túrin ásar namperan najanainiaksha achinkiar ti asutniáwarti.

¹⁰ Ni enentáin kusurarti tura wainmakcharti. Itiurchat ana nusha, káarak kijiniá áintsan, tuke áentskatá.” Tu áarmiayi.

Israer-shuarcha uwempramin áiniawai

¹¹ Watsek, Israer-shuar kayá tukumkar ¿tuke iniaararuk áinia? Atsá. Antsu Israer-shuar umirkachmajai Israer-shuarcha yamaikia uwempratin jeainiawai. Nujai Israer-shuarsha nujai métek uwempratniun

enentáimsartatui. ¹² Israer-shuar umirkachmajaj ashí shuar, Israercha ainia nusha, uwempramnia ajasarmiayi. Nuna nan̄kaamas Israer-shuar atak Yúsan enentáimtuiniak uwemprarmatai nujaj ashí shuar ti pen̄ker ajasartatui.

¹³ Israer-shuarchatirmea, atumin uwempratin chichaman etserkatniun Yus akupkamu asan nu takatan ti takaajaj. ¹⁴ Nuna túrakun átum uwemprarmena núnisan̄ niisha, wíishuar ainia nu, nuna ísar uwemprarat tusan wakerajaj. ¹⁵ Kame Israer-shuaran iniaisamujaj ashí shuar Yusjaj shiir nawamnaikiarmatain̄kia nuikia atak nin achikmajaj jakamunmayā nantaktinia áintsan̄ ti shiir átatui. ¹⁶ Emka apatuk ana nu Yus súakur yumin̄samuitkiun̄ka nuikia ashí apatkunam Yus yum̄insamuiti. Núnisan̄ numí kan̄kapé pen̄keraitkiun̄ka numi takamtsuk pen̄keraiti.

¹⁷ Yuska chíkich chíkich Israer-shuaran, numí kanawen̄ tsupik ajapniua áinis, iniaisamiayi. Tura nuyá atumin niisháa numinmayā árumniñ nu numiniam anujtamkamarme. Nujaj pen̄ker numijjaj tsanínkrum nu kakarmajaj iwiaakrume. ¹⁸ Tura kanawē tsupikmajaj nan̄kaamantu enentáimtumasaip. Warí, ame kakarmarmijjaj numi wajatsui antsu ni kakarmarijjaj iwiaakme.

¹⁹ “Túrasha wi anujnaktinian kanawen̄ tsupikchamka” tíchainmeash. ²⁰ Nekasaiti, túmaitiat niisha Yúsan enentáimtuiniachu ásar tsupinkiararmiayi. Atumsha aya Yus nekas enentáimta asam anujnakuitme. Tuma asamtai nan̄kaamantu enentáimtumatsuk aya anearta. ²¹ Yus nekas kanawē pen̄kercha túrawarun tsupikkia páchitsuk amincha tsupirmakchamniakait. ²² Íista, Yus atumjaj ti tsán̄kaiti tura Israer-shuar umichua nuna ti wari asutiaiti. Tura pen̄ker wáinmamkata. Yus tuke nekas enentáimtachkurminkia atumniasha páchitsuk tsupirmaktatrumē. ²³ Núnisan̄ Israer-shuar ataksha Yúsan enentáimtuiniakui páchitsuk ataksha anujkachminkait. Nekas túrattawai. ²⁴ Túram Israer-shuarcha asam niisháa numinmayā tsupikiar pen̄ké numiniam anujnakuitrumē. Nuna tura asa nekas ni kanawē tsupikia ajapamun páchitsuk atak anujkamniaiti.

Israer-shuarsha uwempratin áiniawai

²⁵ Yatsurú, nan̄kaamantu enentáimtumarairum tusan yaunchu nekaachman ujaajrume. Júiti: Israer-shuarnumiñ̄ka chíkich chíkich Yúsan nekas enentáimtustinian nakitiainiawai. Tura aya Israer-shuarchasha Yus-shuar ajasarat tusa túrunamiayi. ²⁶ Tura Israer-shuarchasha ti untsurí Yus-shuar ajasarmatai nuyá Israer-shuarsha ashí uwemprartatui. Tuma asamtai Yus-Papí tawai:

“Seúñnumiā Uwemtikkiartin tátatui. Israernumiā tunaan asakátrattawai.

²⁷ Jú Chichamnasha niijjaj najanattajaj: ni tunaar̄in asakturtatjaj.”

²⁸ Uwempratin chicham atumsha nekaatarum tusa Israer-shuaran Yus ni nemasr̄i awajsaruiti. Tura yaunchu ni weatr̄in achikiu asa nincha tuke anenawai. ²⁹ Kame Yus amáa nuna ataksha ataatsui. Shuáran achiksha atak iniayatsui. ³⁰ Átumka yaunchu Yus umirchauyarme. Tura yamaikia Israer-shuar umirainiachkui Yus atumin waitnentrarmarme. ³¹ Núnisan̄ nii yamaikia Yúsan umirainiatsui. Tura atumin waitnentrampumarum núnisan̄ nincha waitnentrattawai. ³² Nujaj ashí métek sumamtikiak métek waitnentrar uwemtikrattawai.

³³ Maa, Yus imiá shiirchakait. Tí nekachukait. Ni túramu pen̄ké nekaachminiaitji.

³⁴ “Uunt Yus enentáimmian ¿yaki neka? Tura ¿ya Nin unuiniaruit. ³⁵ Yaki Nin pen̄keran susa shiira nujaj yapajniuit?” Tu áarmaiti.

³⁶ Ashí najanamu ainia nu Yus najanamu áiniak Niiniu áiniawai. Tura Nin shiir awajsatniun najanawarma áiniawai. Yus tuke iniaitsuk shiir awájnástí. Núnisan atí.

12

Yusaj surumaktarum

¹ Atumsha Yus-shuar árumna nu, atumek Yusaj surumaktarum. Yus ti anenma asakrumin nuna seajrume. Yaunchu Israer-shuar ni waakarín maa Yúsan suu ármiai. Atumsha núnisrumek iwiaaku árumna nuñ Nii túrutataj taku túrutati tusarum tuke enentáijjaj Yusaj tsankamaktarum. Yusaj ísam ti shiir atí tusarum túratarum. Nu túrakrumka pátatkechu antsu ti nekas enentáimjaj Yus shiir awajin átatrume.

² Chíkich shuar aya jú nunkanmaya ana nuna enentáimtusar wekainiawai. Tura átumka nu túrawairap. Antsu Yus winia enentáimmiarun yapajtiurat tusarum tsankatkatarum. Nu túrakrumka Yus wakera nu nekaattarme. Ni wakeramusha yajauchichuiti antsu imiá nekas péñkeraiti.

³ Yus winia waitnentrak akatar akuptuku asamtai juna tájarme. Atumek wíkitiajtai tu enentáimtumatsuk jeamna nujaj métek enentáimtumasta. Yus enentáimta asakmin takastinian suramsana nujaj apatkam nekaamata. ⁴ Ii ayashí chikichkiitiat ii muchitmarí untsurínti. Tura métekrak muchitiániatsui. ⁵ Núnisrik iisha, Yus-shuarti, ayashí muchitmariya áintsarik untsuríitiatar chikichik ayashinia áintsar takaaji. Nusha Krístujaj tsaniñkiu asar áitkiamuitji. Túramu asar nuamtak atsumnaiyaji.

⁶ Ii túratniun Yus nusháa nusháa súramji Nii wakera nujaj métek. Wats, Yus ámin suramsamna nu túratniuitme. Yus ni chichamen etserkatniun suramsaitkiuñkia Yus enentáimtakum unuimiarmam nujaj métek etserkata. ⁷ Chíkich shuar yáintinian Yus suramsaitkiuñkia nekas enentáimjaj yáintá. Unuiniartiniaitkiumka yawetsuk unuiniarta. ⁸ Chíkich shuar ikiakártiniaitkiumka nekas péñker ikiakárta. Súsatniuitkiumka shiir enentáijjaj ementutsuk súsarta. Shuaran wáinin atí tusa Yus apujtamsaitkiuñkia ti enentáimsam túratá. Tura shuar itiurchat pujuinia nu yáintinian Yus suramsaitkiuñkia shiir enentáimsam túratá.

Yus-shuar túratniua nu

⁹ Nekas enentáijjaj mai anenai ajatarum. Yajauch nakitrarum péñkera nu túratarum. ¹⁰ Nuamtak yachi asarum núnisrum mai anenai ajatarum. Chíkich wijjaj nankaamas úntaiti tu enentáimtunaistarum.

¹¹ Nakittsuk kakaram ajasrum ashí enentáimjaj ii Uuntrí wakera nu túratarum.

¹² Ukunam Yus tsankatramkattajnia nu enentáimtusarum warastarum. Wáitiakrumsha katsuntratarum. Tuke iniaitsuk ashí túrunamujaj Yus áujstarum.

¹³ Yus-shuar atsumainia nujaj yáintarum. Írarsha péñker itiaatarum. ¹⁴ Yajauch awajtamainia nu shiir awajstarum. Yus yajauch yumíntsuk nu shuaran péñker túrawarat tusarum seattiarum.

¹⁵ Warainia nujaj warastarum. Kúntuts pujuinia nujajisha úuttiarum.

¹⁶ Chikichik enentáijjaj métekrak shiir enentáimtunaitiarum. Nankaamantu enentáimtumasairap. Antsu péjchach ajastarum. “Ti nekajai” tu enentáimtumasairap.

¹⁷ Shuar ámin yajauch awajtamkuisha nincha yapajkiataj tu enentáimsáip. Aents ísam péñker áminia nu amesha tuke túratá. ¹⁸ Ame jeamna nujaj ashí shuarjaj nawamnaikiam wekasata. ¹⁹ Yuska ni Papiríin juna áamtikramiayi:

“Wíitjai tunaan asutiátniun. Wisha yapajkiattajai” tawai Uunt Yus. Tuma asamtai yatsuru, kajertamkuisha atumsha yapajkiairap. Antsu yajauch awajtamkana nuna Yus ístí. Yus asutiáti. ²⁰ Tura nu arantcha tawai: “Ame nemasrum tsukamakuisha ayurata. Kitiamakkuisha umartin susata. Nu túrakum péñker ajachua nu iniatsaartatme.” ²¹ Yajauch nupettamkajin. Antsu péñker túrakum yajauchia nu nupetkata.

13

¹ Akupniuka ashí shuar umirkatniuiti. Akupniuka Yus apujsamuiti. Yus apujdachma akupin atsawai. ² Tuma asamtai shuar akupniun umirtsuna nu, Yus apujsamun umireachu asa nekas asutniátniuiti. ³ Kame akupniuka péñker shuar sapijmiakarat tusar apujdachma áiniawai. Antsu yajauch shuar ashamkarat tusar apujsamu áiniawai. Nii ashamtsuk pujustin wakerakmekka péñker túratá. Túrakminkia akupin shiir enentáimturmartatui. ⁴ Yainmakat tusa Yus apujsamuiti. Antsu yajauch túrakmekka akupin nekas ashamkatniuitme. Warí, Yus ántar apujdachmaiti. Tunáa shuaran asutiátniun Yus apujsaiti. ⁵ Nu asamtai akupin tuke umirkatniuiti. Aya asutiáwajin tusar umirkashtiniaitji. Antsu shiir enentáijijai wekasatin umirkatniuiti. ⁶ Tuma asamtai núnisan akupniun kuit súsatniua nu páchitsuk susatarum. Nu takatan pujursarat tusa Yus apujsaruiti.

⁷ Ashí túratniua nu túratarum. Akiktiniaitkiikumka páchitsuk akikta. Akupniusha uuntcha ashí núnisan íranna nusha shiir enentáimtikratarum. ⁸ Kuitjai tumashrintin airap. Antsu mai anenai tuke ajatarum. Chíkich shuar aneakum nin péñker túrattame. Túram ashí akupkamu páchitsuk umirkattame. ⁹ Akupkamusha tawai: “Tsanirmawaip, mankartuawaip, kasamkaip, chíkich shuar tsanumpruraip, chikichna wakerutkaip” tawai. Tura nusha ashí chikichik chichamjajin tíminiaiti: “Ame ayashim aneam núnismek ashí shuar aneata.” ¹⁰ Shuar chíkich shuaran aneakka yajauch awajsashtatui. Tuma asa akupkamun ti shiir umirkattawai.

¹¹ Ii yámankamtaik Yus nekas enentáimtusmiaj nuí “Ii ti shiir ajarar tuke uwempratin ukunam átatui” tu enentáimprachmashiaji. Antsu yamaikia nu tsawant yuntumsamtaik ashí túrajnia nujai shintiarar enentáimpratniuitji. ¹² Tuke káshiitiat tsawaattemprai. Ii Uuntri Kristu jú tunáa nunkanam tátin ishichik ajasai. Tuma asamtai ii túrutairi kiritniua núnisan yajauch túrutai ana nuka túrutsuk tsáapninium péñker wekasatin kakaram ajastai. ¹³ Túratniua nujai métek wekasatai. Tsawai wekaakur kiritniunam uumkar tunáa túrutai túrashtai. Nampetsuk, yajauch warartsuk, tsanirmatsuk, jianaitsuk, tura kajernaitsuk aya péñker túratai. ¹⁴ Ii Uuntri Jesukristu túramia núnisrik túratai. Tura ii ayashí wakeramu umikiat tusar tsankatkashtiniaitji.

14

Ame yatsum kakantraip

¹ Shuar Yúsan ishichik enentáimtana nu itiaatarum tura kakantrairap. ² Iis, chíkichka ashí yuamniaiti tuiniawai. Tura chikichcha, Yúsnan awajirar, naman yúashtiniaiti tuiniawai. ³ Tura ashí yúa nuka namanken yúatsna nuna wishikrashtiniaiti. Núnisan ashí yucha nu ashí yuun kakantrashtiniaiti. Warí, núnaka Yus ni shuarin awajsachukait. ⁴ ¿Ámekka timiataash péñkeraitiam chíkich shuar kakantinia? Antsu ni úntrin ni péñker túramuncha tura yajauch túramuncha íschatniukait. Enentáimpratá. Yus kakaram asa nin péñker awajsamniaiti.

⁵ Chikichcha enentáimpratai. Chíkich shuar tsawantan achikiar “Jú tsawantaj Yus nan_{ka}amas shiir awajsatniuiti” tuiniawai. Chikichcha ashí tsawantan métek enentáimtuiniawai. Ayu, tura ni enentáimtamun nekas paant nekaatniuiti. ⁶ Chikichik tsawantan enentáimtakka Yusan shiir awajsatniun túrawai. Tura ashí métekrak enentáimtakka Yusan shiir awajsataj tusa túrawai. Yurumkajajsha ashí yúana nu Yusan yuminkias shiir awajsataj tusa túrawai. Núnisan ashí yúatsna nusha Yusan yuminkias shiir awajsataj tusa túrawai.

⁷ Iikka ii enentáijiaín iwiaaktsuji. Tura jáakrishá ii enentáijiaín jaatsji. ⁸ Kame iwiaaku pujakrishá ii Uuntrj Kristu shiir awajsatai tusar pujurji. Tura jáakrishá tuke Níiniuitji. Nu asamtai iwiaaku pujakrishá tura jakarsha tuke Krístunuitji. ⁹ Kame jakancha iwiaakuncha ashí ni Uuntrj ajastaj tusa Kristu jaka nantakmiayi.

¹⁰ Tura çurukamtai ame yatsum “yajauchiiti” tame. Urukamtai nakitiam? Warí, ashí iikia ii túramu paant awajnasat tusar Kristuj naka wajastatji. ¹¹ Nu asamtai Yus-Papinium tawai:

“Wi nekas iwiaaku pujá asan ashí Winí tikishmatrurartatui. Tura ashí “Yus asa tuke pé_ñker túriniaiti” túrutartatui” tawai.” Tu áarmaiti.

¹² Tuma asamtai iisha chikichik chikichik ashí ii túramu Yus paant ujakartatji.

Ame yatsum tunaanum ajuraip

¹³ Nu asamtai “yajauch túriniaiti” tu áujmatnaisashtiniaitji. Antsu ii yachi tunaanum ajuarchatin ti enentáimturtniaitji. ¹⁴ Jesukrístu jintintiamu asan juna nékajai: Yus najanamuka pé_ñkerchaka atsawai. Ashí túramniaitjai. Túrashá shuar chichaak “Nu túrushtainti” táyat nuna túrakka níijiaí tunaiti. ¹⁵ Tuma asamtai shuar chichartamuk “Nu yúakminkia Yusjaj pé_ñkerchaiti” taj, ame yúakminkia nu shuar itiurchat enentáimsashtatuak. Tura ni-isha tunaanum iniaar menkakamniaiti. Nu shuar aneakum túratsme. Enentáimpratá. Aya ame yuamna nujain ame yatsum Kristu jarukmia nu emenkákaip. ¹⁶ Tura “yuamniaitjai” táyatam wi yúakui yajauch áujmatrusarain tusam iniaisata. ¹⁷ Kame Yus umirkatin yurumátniujajsha umartinjajsha enentáimtuschatniuiti. Antsu Yusa Wakaníjjaj shiir wekasar Yusjaj tura shuarjaj nawamnaikiar ti pé_ñker wekasatniuitji. ¹⁸ Ashí shuar Krístun núnis umireakui Yussha tura chíkich shuarsha pé_ñker enentáimtuiniawai.

¹⁹ Nu asamtai tuke shiir pujusminia nu túrakur Yusjaj kakaram ajastin yáiniaiktai. ²⁰ Yus iisam ashí yuamniaitji. Antsu ame yuamna nujaj chíkich shuar tunaanum ajuartin tunaiti. Tuma asamtai ame yuam nujaj Yus nu shuara enentáin takarsamu emesraip. ²¹ Nu túrashtin nuikia namañ yúashtincha karía umarchatniusha pé_ñkeraiti. Warí, túrushtaijjaj ame yátsum itiurchat enentáimtikram tunaanum ajuarchatapash. Tura nu shuar Yusan nekas enentáimtuschanmia ajastatui. Nuka atsutí. ²² Ame Yus nekas enentáimtakum ashí túramniaitkiumka Yúsak wararsata. Shuar Yus ímmianum shiir enentáijjaj mash túramnia nu nekas shíiraiti. ²³ Tura araantushim yua nuka Yusan shiir enentáimtutsuk yua asa sumamattawai. Kame ashí Yus shiir enentáimtutsuk túramu tunaiti.

15

Chíkich shuar wakeramuk enentáimtustiniaiti

¹ Yusjaj katsuaru ájinia nu iik enentáimtumatsuk kakarmachu ainia nu yáintiniaitji. ² Chíkich shuar wakeramu enentáimtustiniaitji. Tura Yusjaj nu nan_{ka}amas shiir wekasatniun yáinminiaitkiui túratniuitji. ³ Krístusha ni wakeramun túrachmiayi. Antsu Yus-Chicham tana núnisan chikichnan enentáimtusmiayi. Nu asamtai Yusan umirin asa wáitiak timia nu áarmaiti:

“Ámin katsekramainiak Winiaja katsekrukarmiayi.” ⁴ Núnisañ ashí yaunchu Yus-Papinium aarma in jintinramatniun áararmiayi. Nujai atsañtamkurin shiir wáin_{ki}attajnia nuka katsuntrar nákastatji. ⁵ Yus atsañtamar katsuntratniun jintinramji. Tuma asa Jesukrístu túramia áintsañ atumniasha chikichik enentáijjai enentáimtunaisar pujustinian yáinmakartí. ⁶ Nujai ashí métekrak Yus shiir awajsattarme. Niisha ii Uuntri Jesukrístuncha Aparínti.

Israer-shuarchanmasha Uwempratin Chicham etserkamu

⁷ Tuma asamtai chíkich shuarjaisha shiir awajnisatarum. Kristu núnisañ Yúsan shiir awajsat tusa incha shiir awajtamsamiaji. ⁸ Juna tajai. Kristu Israer-shuaran yáintaj tusa támiayi. Tura Yus ti yaunchu nuna weatrin “túrataj” timia nu uminkiat tusa támiayi. Nujai Yus timia nuna umikmia nu nekaamniaiti. ⁹ Tura nu arantcha Israer-shuarchasha Yus waitnentrartin áarmatai nin shiir awajsarat tusa támiayi. Tura Yus-Papisha tawai:

“Ámin kantamprakun ashí shuarnum shiir awajsattajme.”

¹⁰ Tura nu arantcha tawai: “Ashí nun_{kan}mayá shuartiram ashí Israer-shuar Yúsna ainia nujai warastarum.”

¹¹ Tura ataksha tawai: “Ashí aents ii Úuntriñ shiir awajsarti. Tura ashí shuarsha Nin “Ti úuntaiti” tiartí” tawai.

¹² Isayassha áarmiayi: “Tawitia aparí Isai weatriya akupin akiinkiat-tawai. Niisha ashí nun_{kan} akupeakui ashí shuar niiniak shiir enentáimtusartatui.” Tu áarmaiti.

¹³ Yus ashí shíiran suramsattakrin nu shiir nákaji. Tuma asamtai Nii nekas enentáimtakrumin warasa shiir pujustinian yamá suramsati. Nuyá Yusa Wakaní kakarmarijjai ti shiir enentáijjai katsuntrarum, nu nákastarum.

¹⁴ Yatsurú, atumsha anenainiaitrume. Tura ashí Yusna nekaarum nuamtak chicharnaikiatin nékarme. ¹⁵ Tuma aijn kajinmatkiirum tusan ataksha ti paant áakun jú enentáimtikeajrume. Yus winia waitnentrak ni Chichamen etserkat tusa akuptakui nuna áatjarme. ¹⁶ Kame Jesukrístu Israer-shuarchanum Yusa shiir chichamen etserkat tusa akuptukuiti. Nuna túrakun Israer-shuarchan Yusa Wakaníjjai shiir awajsamu áarmatai Yusai juiniajai. Tura Yussha shiir enentáijjai itiainiawai.

¹⁷ Jesukrístu yaintiu asamtai Yusna takarsamaj nuna wararsamniaitjai.

¹⁸ Tura chíkich shuarjai Kristu túramun pachischattajai. Aya wi chichasmajaisha tura wi túramujaisha Israer-shuarchan Kristu umimtikiamia nunak áujmatsattajai. ¹⁹ Yusa Shiir Wakaní kakarmarijjai aents tujintiamun túran ashí shuaran Jerusaren péprunam nan_{kan}aman etserkin Iririkiu nun_{kan}am ejekamjai. Kristu-chichaman ashí nu nun_{kan}am etserkaitjai. ²⁰ Nuna túrakun chíkich shuar etserkachmanum Krístunun ántichu áiniamunam Uwempratin Chichaman etserkaitjai. Nujai chíkich takasmanum takarsachuitjai.

²¹ Yus-Papisha núnisañ tawai:

“Chichaman penké antukcharuka nekaawartatui. Nin áujmatman anturkacharusha unuimiarartatui.”

Papru Rúmanam wétaj tawai

²² Nuna pujuru asan íitjarum táyatan íichmajrume. ²³ Tura yamaikia juyá takatrun umikian tura yáunchusha tuke íitjarum tiniu asan ²⁴ Ispania nukanam wéakun íistatjarme. Tura atumúin shiir irasan Ispanianam wéakui atumsha yaintkiarum shiir akuptukchattarpash. ²⁵ Tura yamaikia kuitjai Jerusarennumia Yus-shuaran yáintaj tusan wéajai. ²⁶ Masetúnianmayá shuarsha tura Akayanmayá shuarsha kuítian irurar Jerusarennumia Yus-shuaran atsumainia nuna akuptuktai tuiniawai. ²⁷ Ti wakeruiniak túrawarmiayi. Nu nekas túrashtinkiait. Israer-shuarnumia Yus-Chichaman antukaru ásar

yamaikia ni kuítrijai páchitsuk yáinchatniukait. ²⁸ Tuma asamtai jú kuitian súsaran umiran nuikia Ispanianam wéakun íktiatjarne. ²⁹ Tura nuí winiakun Kristu Shiir Chichamen nujai shiir yáintajrum tusan ejeetittiajrume.

³⁰ Yatsurú, ii Uuntri Jesukristunu asarum tura ni Wakaní pujurtamkurmin anenia asarum Yus áujtursatarum. Núnisrum wijiai métek Yusna takastin yain-tkiattarme. ³¹ Jutia nunkanmaya Israer-shuarnumiá uwentikrat tusarum Yus áujtursatarum. Tura jú kuitian júajna nunasha Jerusarénnumiá Yus-shuar shiir achikiartí tusarum Yus áujtursatarum. ³² Nujai, Yus wakerakuiníka, péñker wampú enentáimsan warasan íttiajrume. ³³ Yus ti shiir pujustinian súana nu atumjai tsaniñ pujurtamsati. Núnisañ atí.

16

Amikmaamun akupramiania nu

¹ Ii umai Jépeka Senkrea péprunmaya Yus-shuaran yáiniati. Ti penker Yus-shuaraiti. ² Kristu náariñ shiir wáinkiatarum. Nuamtak yachí wáinkiatniua núnisrum wáinkiatarum. Niisha chikichnasha tura winiasha ti péñker wáitin asamtai atumsha ni atsumamusha yaintarum.

³ Pirisirasha Akirasha wijiai métek Jesukristunun takasaru ásar amikmaatainijai. ⁴ Niisha winia uwentikrurtai tusar jániñkiarmiayi. Tuma asamtai yumiñkiniajai. Tura aya wíkichu antsu ashí Israer-shuarchanumiá Yus-shuar áinia nusha yumiñkiniawai. ⁵ Núnisañ ashí Yus-shuar Pirisiran tura Akira jeen irunainia nusha amikmaatarum. Tura winia aneamu amikiur Epenetu amikmaatruatarum. Niisha Akaya nunkanam emka Krístun nekas enentáimtusmiayi. ⁶ Marisha, atumjai ti takasua nu amikmaatruatarum. ⁷ Tura wíi shuarsha Antrunikiusha Júniassha amikmaatruatarum. Niisha wijiai sepunam pujusarmai. Wijiai emka Krístun shiir enentáimtusar chíkich akatramujai nankaamas takasaru áiniawai.

⁸ Ámpriassha Krístunam winia aneamu amikiur asamtai amikmaatruatarum. ⁹ Urpanujaiisha Jesukristu takatrí tsaniñniuitji. Niisha tura aneamu Estakissha amikmaatruatarum. ¹⁰ Apirissha amikmaatruatarum. Niisha Krístun ti shiir enentáimtamú ti páantaiti. Núnisañ Aristúpuru shuarsha amikmaatruatarum. ¹¹ Wíishuar Erutiúnsha tura Narsisu shuarsha Kristu shuari ásarmatai amikmaatruawarta. ¹² Tripiniasha tura Tripiusasha Yúsnan takainia ásarmatai amikmaatruatarum. Núnisañ ii umai Pírsitia Yúsnan ti takasu asamtai amikmaatruatarum. ¹³ Rúpusha, nusha ti penker Yus-shuar, tura nukurísha amikmaatruatarum. Niisha wijiai nekas winia nukuru núnisaiti. ¹⁴ Asiníkriusha, Pirikiuntisha, Érmassha, Patrupassha, Érmessha, tura ashí niijiai Yús-shuar ainia nu amikmaatruatarum. ¹⁵ Núnisañ Jirurukusha, Júriasha, Néreusha, ni umajjiaisha, Urimpiassha, tura ashí Yus-shuar niijiai pujuinia nu amikmaatruatarum.

¹⁶ Nuámtaksha shiir aujnaisatarum. Ashí juyá Kristu shuari amikmaatmainiawai. ¹⁷ Yatsurú, shuar nusháa enentáimtuiniak Yus-shuaran akanainiak itiurchat awajenawai. Nu shuar wáinkiarum kanaktiarum. Ni yajauch túramu átum péñker takastin unuimiarmena núnischaiti. ¹⁸ Nu shuar ii Uuntri Jesukristunun takainiatsui. Antsu ni wakeramun uminiawai. Tura ti shiir chichasar nékachun anankenawai. ¹⁹ Átum umirma ashí shuar nékainiakur ti waraaji. Yajauch túrutsuk aya péñker túratin enentáimsarum pujustarum. ²⁰ Yus tuke shiir pujustinian amawa nu ti wárik uunt iwianchin nupetturmaktatui. Tura ii Uuntri Jesukristu shiir yainmakarti.

²¹ Timiutéusha, wiji*ai* takau, amikmaatmarme. Núnisa*n* Rúsiusha, Jasunsha, Susipatresha, mash wíishuar ainia nu amikmaatmarme. ²² Wi, Tersiu asan, Papru chichamen*n* ju papinium áateakun Kristu náari*n* amikmaajrume.

²³ Káyusha amikmaatmarme. Ni jeen pujaji tura juisha ashí Yus-shuar irunainiawai. Erastusha ju pepru kuítr*n* wáinniuiti. Niisha ii yachi Kuártujai amikmaatmarme.

²⁴ Ii Uuntri*n* Jesukrístu ti shiir yainmakarti. Núnisa*n* atí.

Yus shiir awajsatai

²⁵ Watsek, Yus shiir awajsatai. Ni*n*ki nekas kakaram awajtamsamni-aiti. Wi Uwempratin Chichamnum Jesukrístunun étsereaj nujai ikiantamprattawai. Nu chicham yámankamtaiknumia nekaachmanak Yus yamaikia paant awajsaiti. ²⁶ Yaunchu Yúsnan etserin ni áarmanum nu chichaman etserkarmiyai. Tura yamaikia Yus wakerak ashí nunkanmaya shuar Nii enentáimtusar umirkarat tusa nu Chichaman yamaikia paant awajsaiti. Yus amuutsuk tuke pjuwiti.

²⁷ Yúsak Ni*n*ki ti neka asa tura Jesukrístu ti penker tura asamtai Ni*n*ki tuke shiir awájnástí. Nuke atí.

Papru KURINTIUNMAYA SHUARAN Emka papin aar akuptukma

Kurintiunmaya Yus-shuaran Papru áatramiania nu

¹ Wi Pápruitjai, Jesukrístu akatramu. Yus nuna wakerak, ni akatramurí atí tusa anaitiukmai. Wi, ii yachi Sústinisjai, ju papí akupeaji. ² Ashí Yus-shuar Kurintiu péprunam iruntrumna nu ju papí akupeaji. Átumka Jesukrístujai tsaniñkiu asarum Yusna árume. Atumsha tura ashí shuar Jesukrístun enentáimtuiniana nunasha Yus ti penker awajsatniun wakerawai. Nincha incha Jesukrístu mai metek Úuntrinti. ³ Yus ii Aparí tura ii Úuntri Jesukrístusha waitnentramainia ásar yainmakarti imiatkinchanum tuke shiir pujustinian.

Ii Uuntri Jesukrístujai tsaniñkia pujustin

⁴ Yusan áujkun yumiñsan atumin shiir enentáimtajrume. Jesukrístujai tsaniñkia pujakrumin Yus shiir enentáimturmawai. ⁵ Jesukrístujai tsaniñkia pujakrumin Yus atumin ti yáinmawai ashí penker ana nu enentáimtakrum tuke shiir chichastinian. ⁶ Kristu juna túramniaiti tíchamkaji. Ashí yamaikia uminkiyai. ⁷ Tuma asamtai ashí Yus súramna nu atsumatsrume. Nu túrakrum ii Uuntri Jesukrístu tatin tuke nákarne. ⁸ Tura iniaitsuk tuke emettamattawai ii Uuntri Jesukrístu támatai atumi tunaarín pachischatin. ⁹ Jesukrístu ii Uuntrinti. Nijijai tsaniñkia pujusúk tusa Yus achirmakmarme. Tura Nii tana nuna tuke umiktatui.

Yus-shuar akantramu

¹⁰ Yatsuru, ii Uuntri Jesukrístu naari pachisan, seajrume métek enentáimpratarum tusan. Níisháa níisháa enentáimprairap antsu chikichik enentáijjai métek enentáimsa pujustarum. ¹¹ Átum yajauch chicharnaisarum pujarme. Kruí shuari tu ujatarmatai tájarne. ¹² Kame júnis awai: Chíkich “Wi Páprunuitjai” tuiniawai. Chíkich “Apurusnaitjai” tuiniawai. Chikichcha “Wi Pítrunuitjai” tuiniawai. Chikichcha “Wi Kristu-shuaraitjai” tuiniawai. ¹³ ¿Warí, nuñkia, Kristu akantramukait. Páprusha krúsnum jarutramkamaashi. Tura Papru naari pachisa imiaimiukaitrum? ¹⁴ Atumin untsurí imiaichu asan shiir enentáimjai. Aya Krispu Káyujai jímiarchiniak imiaimjai. ¹⁵ Nújainkia shuar “Papru náarijn imiaimiuitjai” tíchamniaiti. ¹⁶ Maa, nekas, Estepanasa shuarincha imiaimjai tura chíkich wi imiaimiun nékatsjai. ¹⁷ Kristu imiakrattia tusa akuptukchamai antsu uwempratin chichaman etserkat tusa akuptukmai. Tura ti neka chichainia núnisan chichaatsjai shuar wi shiir chichaamun enentáimprarain tusan. Antsu yúpichuch chichaajai Kristu krúsnum jakamuk paant atí tusan.

Kristu Yusa kakarmarincha ni nekatairincha paant iniakmasmiania nu

¹⁸ Kristu krúsnum jarutramkamu étsereaji. Antsu Yus-shuarchaka menkaakatniunam wéana nu, “ántrai nu chicham” tu enentáimainiawai. Antsu Yus-shuarti, uwempratniunam wéakur, “nu chichamjai Yusa kakarmari takusminiaiti” tu enentáimji. ¹⁹ Núnisan tawai Yus-Chicham yaunchu aarma: “Ju nunkanmayan ti neka áiniana nuna chichamen emesrattajai; ti unuimiararu áinianak ántar awajsattajai” tawai Yus ni chichamen. ²⁰ Iis, ju nunkanam uwempratin chicham íruntsuk. Nu

chichaman ashí mash Yus ántar awajsaiti. Ti neka áiniana nusha, jintinkiertin áiniana nusha, ashí ju nunkanmayan unuimiar ti chichastinian nékana nusha, nu shuar mash “wi tájana nujai péñker pujusam uwemprattame” tu enentáimiainiawai. Tura núnaka mash Yus penké ántar najanaiti. ²¹ Aya ni nékamujai aents Yúsan nekaacharmiayi. Núnisan atí tusa Yus túramiayi, timiá neka asa. Antsu ashí aentsun Yus ni chichamejai uwemtikratniun wakerimiayi. Chíkich “ántrai” tuiniana nu chichamjainkⁱ Yus Nin enentáimtuinia núnaka uwemtikratniun wakerak túramiayi. ²² Israer-shuar “aentsti túrachminian iniakmasta, wi nekaataj” tuiniawai. Kriaku shuarsha “ti enentáimsam, mash péñker júkim turuttia wisha métek enentáimprataj” tuiniawai. ²³ Iikia antsu Kristu krúsnum jarutramkamuk étseaejai. Israer-shuarsha “ju chicham natsantaiti” tu enentáimiainiawai. Israer-shuarchasha “ju chicham ántrai” tu enentáimiainiawai. ²⁴ Tura Yus achikiarma, Niiniu ajasarat tusa, Israer-shuarsha Israer-shuarchasha mai metek “Kristu krúsnum jarutramak Yusa kakarmaríncha ni nekatairíncha paant iniakmasmiayi” tu enentáimji. ²⁵ “Yusa nekatairí ántrai” tuiniawai aents, túrasha imiá nekas péñkeraiti. “Yusa kakarmarísha jeatsui” tuiniawai aents, túrasha imiá nekas kakarmaiti. ²⁶ Enentáimtumastarum yatsuru. Yus achirmakmarme Niiniu ajastinian, tura ju nunkanam ti neka áinia núnisan atumíin ti neka íruntsui. Ti akupniusha ti nankaamakusha atumíin íruntsui. ²⁷ Antsu ju nunkanam nékachua núnis ana nuna Yus achikiuuti ti neka nuna iniatsáartinian. Tura ju nunkanam kakarmachua núnis ana nunasha Yus achikiuuti kakarma nuna iniatsáartinian. ²⁸ Péejchachincha, nakitsamuncha, ántrachincha, Yus achikiuuti ashí nankaamantu írunna nuna amuktinian. ²⁹ Nújainkia chikichkisha Yusjai waantu enentáimprachminiaiti. ³⁰ Tura Yus atumín Krístujai tsanin apujtamsaiti. Tura Kristu enentáimtusar Yus nekas nekatainkia nekaattaji. Kristu enentáimtakrin Yus shiir enentáimturmají, péñker awajtamji, tura uwemtikramji. ³¹ Yus-Papinium yaunchu aarma núniskete: “Shuar nankaamantu enentáimprataj tákunka ii Uuntrí Yus túramun wararsati.”

2

Kristu krúsnum jakamu etserkamu

¹ Wisha, yatsuru, atumíin jeamaj nui Yus-chichaman ti neka chichainia áintsan tura íwiasanak ujakchamajrume. ² Tura atumjai pujakun aya chikichkiniak nekaatniun enentáimpramjai. Júiti: Jesukrístu, tura Jesukrístu krúsnum jakamu. ³ Né kayatan kakarmachu sapíjmiashím jearmiajrume. ⁴ Yus-Chichaman ujaakun ti neka chichainia áintsan nupetkataj tu enentáimturchamajrume. Antsu Yusa kakarmaríncha tura ni Wakaníncha paant iniakmasan Yus-Chichaman ujakmajrume. ⁵ Aentsu nekatairíjjai Yus enentáimtuschatniuiti antsu Yusa kakarmarí paant nekaarum Yus enentáimtustiniaitrume. Nuní asantai Yus-Chichaman tu ujakmajrume.

Aya Yusa Wakaníjjai Yúsnan nekaamniaiti

⁶ Túmaitiat Yusa nekatairí átsuk. Yúsnan unuimiararujai Yusa nekatairín áujmatji. Tura Yusa nekatairínkia aentsu nekatairí áintsachuiti. Ju nunkanam akupín ainia nuna nekatairínchuiti Yúsnaka. Ju nunkanam akupniuka ishichik pujus amuukachartatuak. ⁷ Yaunchu ju nunka atsain Yus in uwemtikrampratniun enentáimpramiayi ti shiir pujusarmi tusa. Ju Yusa enentáimmiarí yaunchu nekanachmiayi, tura yamaikia nu nekaar áujmatji. ⁸ Ju nunkanam akupniuka nuna penké nekaacharmiayi. Né kainiakka ii Uuntrí timiá shiira nuna, krúsnum máacharu aayi. ⁹ Yaunchu Yus-Papinium

áarchamukait: “Shuar Yúsán aneana nuna Yus ti shíran susattawai. Susatana nuka timiá pénker asamtai shuar wáinkiachman, antukchamuncha, enentáimtachmancha Yus susattawai” tu áarmaiti. ¹⁰ Tura Yusa Wakaní ii enentáin pujurtamuk Yus suramsattajnia nuna yamá paant jintinramji. Nu Wakancha imia Yus enentáimiancha mash nékawai.

¹¹ Shuar enentáimna nuna chíkich shuar nekaamniakait. Antsu aya ní enentáijjain nékatsuk. Núnisan aya Yusa Wakaní Yúsán paant nékawai. ¹² Ju nunkanmaya aents enentáimiainia nujai Yusna nekaachminiaiti. Antsu Yusa Wakanin in súramaj nujai Yus shiir tsan̄katramajnia nu nekaamniaitji. ¹³ Yusa Wakaní jintinramji Yúsán chichastinian Nii wakera áintsan̄. Ni chichamen súramji. Túramtai ii nékamujai Yúsna étserstsuji. Tuma asamtai imia Yusna nuka Yusjai pénker wekainia nu jintíaji.

¹⁴ Yus-shuarcha Yusa Wakaníniun ántatsui ántrai tusa. Aya Yusa Wakaní jintintiamniaitkiui Yus-shuarcha nuna penké nekaachmin áiniawai. ¹⁵ Antsu Yusa Wakanin takaku ashí mash iis, pénkera nuna nekaamniaiti. Nii túrana nunasha chíkich shuar súmamtikiachminiaiti. ¹⁶ Yus-Papinium yaunchu áarmaiti: “¿Yusa enentáimmiari ya neka. Tura Yúsán ya jintintiamniait?” tu áarmaiti. Tuma ain̄ iikia Yus-shuar ájinia nu, Kristu enentáimna núnisrik enentáimji.

3

Páprusha Apurussha Yusa takatr̄in mai tsaniñkiar takainiawai

¹ Tura wikia, yatsuru, nuik ai atumjai pujakun Yusa Wakanin umirniun chichastinia áintsanak atumjai chichastinian tujinkiamjai. Antsu ayash wakeramu umirin asakrumin Krístunam katsuarcharujai chichastinia áintsanak atumjai chichasmajai. ² Uchi kuírach naman̄ ayurachminiaiti antsu aya umuntsatniuiti. Núnisan aya yúpichuchin ujakmajrume, itiurchat ana nu tujintiakrumin. Tura yamaisha itiurchat ana nu tuke tujintiarne. ³ Tuke ayash wakeramu umirniuitrume. Yajauch enentáimtunaiyakrum tura katsumnaiyakrum akantramuitrume. Nujai páantaiti átum ayash wakeramu umirniuitrume. Yúsán enentáimticharujai métek wekainiaitrume. ⁴ Atumjinkia shuar “wi Páprunuitjai” tuiniatsuk. Chikichcha “wi Apurusnaitjai” tuiniatsuk. Tu chichaakrum ayash wakeramu umirniuitrume. ⁵ Wátsek. Wi Papru ti pénkeraashitiaj. Apurussha ti pénkeraashit. Antsu iisha aya Yusa takarniur̄intji. Yus-Chicham étserkurin ii Uuntr̄i enentáimtuschamkuram. Ii Uuntr̄i takatan chíkich chíkich suramsamajnia nuke takasmaji. ⁶ Wi Yus-Chichaman étserkun arakan araktinia áinis takasmajai. Apurussha entsan ukatramai. Tura Yus nu arakan tsakatmarmai. ⁷ Arakan araana nusha, entsan ukatna nusha ánrachukait. Antsu Yusak arakan tsakatmaru asa ashí túrachukait. ⁸ Arakan araana nusha, entsan ukatna nusha métek áiniawai. Túmaitkiuisha takasmajai métek Yus akiktatui. Pénker takasmatainkia pénker akiktatui. ⁹ Wissha Apurussha Yusa takatr̄i mai tsaniñkiar takaaji. Tura Yus atumí enentáin takaakui atumsha Yusa núnkeá áintsaitrume.

Jeasha enentáimpramniaiti. Yus atumjai takaak jeá jeamtinia áintsan̄ takaawai. ¹⁰⁻¹¹ Jeá jeamainiak, emka uunt kaya nunká init ikiursar kaki awajsatin áiniawai. Tura nuyanka nu kayanam ekeniar júkitniuiti jeá wewe atí tusa. Wikia jeá jeammin ti unuiniamiarua áintsanak uunt kaya nunká emka ikiustinian nekaan, núnisnak Jesukrístunun emka ujakmajrume. Tura Jesukrístu uunt kaya kaki ikusma áinis asa Nínkiti nui jeá ekenkatin. Iis, ashí enentáimtustinia nan̄kaamas Jesukrístu enentáimtustiniaiti. Nu asamtai Jesukrístunun emka ujakmajrume. Yus nuna etserkatniun tsan̄katrukuiti. Wi emka, uunt kaya ikiursatniua áintsan, Jesukrístunun ujakmajrume. Tura

nuyanka chíkich shuar ekeniar jeammin áiniawai. Tura anearti péñker jeamtinian. ¹² Tura jea jeamainiak nii wakerak péñker ana nujai jeamminiaiti. Nii péñker jeamtinian wakerak kuriijaisha, kuítjaisha, shírmach kayajaisha jeamminiaiti. Chíkich jeamkuka numijaisha, kenkujajaisha, nukajaisha jeamminiaiti. Núnisan shuar Yúsnan takaak péñker takasminiaiti túrasha nánkamas takasminiaiti. ¹³ Tura amuukatin tsawant jeakui ashí ni takatri paant átatui. Nu tsawantajaisha Yúsaiya ji átatui tura nu jisha ni takatri péñkera nunasha tura yajauchia nunasha nekapsattawai. ¹⁴ Tura shiir jeamuka tura nu jeasha esaachmatainkia shiir akinkiattawai. ¹⁵ Antsu nánkamas jeamuka imianiñki jiniumia uwemprattawai, tura ni jeamma esaa penké atsuttawai.

¹⁶ Enentáimpratarum. Yusa Wakaní atumín pujá asamtai Yusa Jee ajasuram nu nékatsrumek. ¹⁷ Shuar Yusa Jeen emeseakuñkia Yus nu shuaran emesrattawai. Yusa Jeenka timiá shiir asamtai túrattawai. Nu Jea atumketrumek.

¹⁸ Ju nunkanmayan unuimiarua núnisrum “ti nekaitjai” tu enentáimtusarum ananmamawairap. Antsu ju nunkanmayan nékachu áinis ajas Yúsnan ti shiir unuimiártiniiaiti. ¹⁹ Ju nunkanmaya aents nékainia nuna Yus “ántrai” tawai. Yus-Papinium áarmaiti:

“Ju nunkanmayan unuimiarun ni enentáimmiain Yus sumamtikiattawai.”

²⁰ Tura nu arantcha áarmaiti:

“Uunt Yuska “unuimiaru enentáimmiaincha penké ántrai” tawai.”

²¹ Tuma asamtai “Páprunuitjai tárugna nusha, “Apurusnaitjai”, tura “Pítrunuitjai” tárugna nusha ántar enentáimprume, nii aya aents ásarmatai. Tu enentáimprarum warasairap. Antsu nekaatarum. Ashí írugna nu atumin yainmaktiniiaiti. ²² Páprusha, Apurussha, Pítrusha, ju nunkanmayasha, iwiaakmasha, jákatniusha, yamáí írugna nusha, ukunam átatna nusha, mash atumniaiti shiir yainmaktin. ²³ Atumsha Krístunuitrumek, tura Krístusha Yúsnaiti.

4

Yus akatramu takatri

¹ Júnisan ashí shuar enentáimturmastiniiaitji. Iikia aya Kristu yáintrintji. Kristu akatramurintji Yusna yaunchu nekaachma ana nu yamáí etserkatin.

² Wátsek, akatramuka tána nujai métek umiktiniiaiti. ³⁻⁴ Wi umikmancha umikchamuncha ii Uuntri Kristu nékawai. Átum enentáimturarmena nusha tura chíkich aents enentáimturainia nusha wíjjainkia ántrai. Imia wíkisha nekamatsjai. Kame winia tunaarun penké wáintsujai tura aya nujai “pénkeraitjai” tíchamnitjai. Niñki Yus iirui. ⁵ Tsawant jeamtai ii Uuntri Kristu atak tátatui. Tura ashí yamáí kiritniunam uukma nuna tura shuar ashí enentáimprarma nunasha paant awajsattawai. Nu tsawant jeatsain shuar umikiuashit tusarum enentáimtusairap. Tura nu tsawantai Yus ashí péñker umikiarun shiir awajsattawai. Péñker umikiuncha ishichik umikiuncha takasmajai métek Yus shiir awajsattawai.

⁶ Átum “Ju shuar péñkeraiti tura chíkich péñkerchaiti” tu akannáirarum penké tíchatniuitrumek, yatsuru. Nuka paant atí tusan “Átum “Wi Páprunuitjai” tura “Wi Apurusnaitjai” tírap” tajai. Antsu aya Yus-Papinium áarmajai métek enentáimsatarum. ⁷ Ámeke chíkich shuarjai méteketme. Tura ashí takakmena nusha Yus amasmaiti. Tura Yus amasu asamtai ¿itiurak áminiukea áintsam nujai nankaamantu ajai tu enentáimtumam?

⁸ ¿Ti kuítrinnia áintsan tura ashí takakua áintsan enentáimtsurmek. In nankaakarum uunt kapitían ajasua áintsan enentáimtsurmek? Nekas uunt

kapitián ajasrumka maak. Nuñkia iisha atumjai akupkaintji. ⁹ Chíkich shuar mash nankaamantu áinis áiniakuisha Yus in ni akatramurin ashí amúamunam apujtamsaitji. Tu enentáimpramniaiti. “Yajauch áiniawai, máatái” tu pujurtamji shuar. Tura Yusa suntarisha ashí juyá shuarsha in ístai tusar káutramkaitji. ¹⁰ Iikia atumjai jeatsji. Kristu shuari asakrin nékachua áinis enentáimturmají shuar. Átum antsu Krístunam tí nékachuashitrum. Iikia kakarmachuitji. Átum timiá kakarmaitrume. Átumka ti penkeraitrume. Antsu iikia mujtiaintji. ¹¹ Tuke yamaisha tsukamaji, kitiamaji, entsartin atsumaji. Katsumpramji. Jeasha atsumaji. ¹² Ii ewejéjai takaakur ti pimpíaji. Shuar katsekramainiaji túrasha iikia shiir chichamjai aiyaji. Itiurchat awajtamainiakuisha katsunteaji. ¹³ Tsanumprutmakrincha tuke shiir chichaaji. Tsuata áintsarik tuke yamaisha ashí yajauchia núnisan ajapramatniun enentáimturmainiaji.

¹⁴ Atumin aya iniatsaartajtsan juní áattsujrume. Antsu winia aneamu uchirua áintsan jintintjarme. ¹⁵ Atumin Yus-Chichaman ujaakun Yus-shuar ajastinian unuiniamjarme. Nujai Jesukrístu enentáimtakrumin atumí aparía áintsan ajasmajai. Chíkich shuar Krístunun jintinrámatin timiá untsurí ákuisha aya wiki atumí aparíntjai. ¹⁶ Tuma asamtai wi wekaajna áintsan wekasatarum atumsha.

¹⁷ Nu túratarum tusan winia aneamu uchirun Timiutéun akuptukmarjume. Niisha ii Uuntri Krístun enentáimtamunam winia uchiruiti tura Krístun enentáimtak tuke shiir wekaawai. Túrasha wi Krístujai wekaamun ataksha enentáimtikramprattawai. Núiti ashí Yus-shuarnum wena jintíajna nuka. ¹⁸ Papru yamaikia iraishtatui enentáimturainiak chíkich chíkich nankaamantuitjai tu enentáimtumainiawai. ¹⁹ Antsu Yus wakerakuñkia wárik íitjam tusan wakerajai. Nuñkia nankaamantu chichamen antukchattajai antsu wátskea, ni túramurisha ístái. ²⁰ Yus akupeana nú shuar aya chíchainiatsui antsu Yusa kakarmarin iniaktuiniawai. ²¹ Wátsek, ¿warí enentáimprum? Átum tuke núnisan enentáimkiurminkia wi winin asutiátniuitjarme. Tura péñker enentáimkiurminkia, aneakun shiir chichasmini-aitjarme. ¿Atumsha túa wakerarum?

5

Tsanirmamu ti tunaiti

¹ Atumíin shuar tí tunáa tura awai. Ju yamáí ashí nekanaiti. Nu shuar ni aparí nuwé achikiuiti. Timia tunaaka nu tsanirmamu Yus-shuarchanumsha atsawai. ² ¿Nu tunaajajisha tuke nankaamantu enentáimprumek? Antsu úuttiniaitrum. Nu shuar tunáa túraka atumíiniá akankatniuiti. ³ Ayashur pujachkuisha wi nuj pujáa áintsan nuna tunaarin paant nekaamjai, tura asutiátniuiti tajai. ⁴ Tuma asamtai átum káunkakrumin ii Uuntri Jesukrístu kakarmaríjjai tura wi nuj pujáa áintsanak, ii Uuntri Jesukrístu kakarmaríjjai ⁵ nu shuar uunt iwianchnum surunkatniuiti ni ayashi wakeramurí amukati tusa. Nujai ni wakanj uwemprattawai ii Uuntri Jesukrístu támatái.

⁶ “Iikia péñkeraitji” tárugna nu ántrai, tunáa atumíin tuke akui. Iis, “Karía ishichik yuminnium enketam mash karimtiktsuk” tiniu áiniawai. Núnis átatui ju tunaajajai. ⁷ Tuma asamtai nu karía ukartarum yajauch awajturmasajj tusarum. Núnisrum ju tunaanumiá kanakrum péñker átatrum. Yaunchu enentái karía núnis amuukatniuiti. Ashí yamarmak yuminia áintsan ajasuitrum. Tanta wakapruachusha enentáimpratai. Israer-shuar paskua nampernum aya wakapruachu tantan yuu áiniawai. Atumí tunaari atsakui atumsha nu námper-tantaa áintsar péñker ajasuitrum. Paskua nampertincha

Israer-shuar murikiun main áiniawai. Núnisan̄ Kristu jaka ii murikria áinis ajasuiti. ⁸ Tuma asamtai iisha paskua námper nájanku pujakur tuke núnisan̄ shiir wekasatniuitji. Tuma asamtai ashí yajauch tunaasha írunna nuka karía yaunchu nawamua áintsan̄kete. Nuka atsutniuiti. Antsu nekas ana nuka shiir enentáimsar wekasatniuitji. Nuka yuminia áintsan̄kete.

⁹ Nuik papin áatramajrumna nuí “Tsanirma shuarjain̄kia íschatniuitrume” tímiajrumne. ¹⁰ Ju nun̄kanam Yus-shuarchaka aya tsanirma, aya kuitniak ikiauwin, aya kasak, aya ántar-yusan tikishmatin áiniatsuk. Nú shuarjain̄kia pen̄ké íschatniuitkiurmeka ju nun̄kanmaya jínkintrume. Núnaka tátsujai. ¹¹ Antsu wi tájana nu júiti, Shuar “Yus-shuaraitjai” tákuñka tura tunáa túriniaitkuñkia niijjai íschatniuitrume. Tsanirmasha, kuítian ikiauwincha, ántar-yusan tikishmatniusha, tsanumniusha, nampencha, kasasha “Yus-shuaraitjai” tákuñkia íschatniuitrume. Pen̄ké niijjai yurumáshtiniaitrume. ¹²⁻¹³ Yus-shuarcha tunaari pachischatniuitjai. Yus núnaka ístatui. Átumka antsu atumín Yus-shuar ainia nuna tunaari ístiniaitrume. Tuma asamtai nu shuar tunaarintin atumíyay akankatarum.

6

Yus-shuar nuámtak itiurchat awajnalisarka Yus-shuarchajai nuna iwiarashtin áiniawai

¹ Yus-shuarka chíkich Yus-shuarjai itiurchat pujakka kapitánjai chichas iwiarashtiniaiti Yus-shuarcha asamtai. Antsu Yus-shuar írunna nujai iwiarati. ² Enentáimpratarum. Amuukatin tsawantaj Yus-shuarka ashí ju nun̄kanmaya shuara tunaari mash nekaawartatui. Tura ashí tunáa nekaatniuitkiurmeka itiur yúpichuchia nu nekaashtatrum. ³ Nu arantcha Yusa suntari túramurisha nekaattaji pen̄kerashit tusarⁱ. Nayaimpiniam túrawarma nekaatniuitkiurkia itiura ju nun̄kanmaya nu tujinkiattaji. ⁴ Pai, itiurchat ákuñkia Yus-shuar pen̄ké tujintiainiana nujai iwiaratarum antsu. ⁵ Natsaruk tusan nuna tájarne. Warí, ¿atumíni chíkichkisha atsawak ni yachi itiurchatri pen̄ker iwiamnia? ⁶ ¿Urukantai Yus-shuar ni yachijjai itiurchat pujakka Yus-shuarchanum wea iwiaratniun? ⁷ Atumí itiurchatri kapitianium jukirmeka nujain̄kia átum tujinkiamu páantaiti. Natsantchakait. Itiurchat ana nusha ¿urukantai antsu katsuntram asakáatum? Kasamkamusha ¿urukantai katsuntram asakáatum? ⁸ Antsu átumka nuámtak yachijjai itiurchat awajnáiyarme tura kasárnáiyarme.

⁹ Tunáa túrinkia Yus akupeamunam pachiinkiachmin ainia nu nékatsrumek. Anan̄awairap. Ashí tsanirma nusha, ántar-yusan tikishmatniusha, nuamtak áishman̄jai tsanirmasha, ¹⁰ kasasha, ashí kuítian ikiauwincha, nampencha, tsanumniusha, yajauch chichainia nusha, chíkich shuaran anan̄kawar atantin ainia nusha Yus akupeamunma nuí pen̄ké wayashtin áiniawai. ¹¹ Atumíyasha chíkich chíkich nuna túrin armai. Tura yamaikia ii Uuntri Jesusa kakarmarijjaisha tura ii Yusri Wakani kakarmarijjai atumi enentái shiir ajasuiti, atumsha Yusna ajasurme, tura tuke pen̄ker ajasurme.

Ii ayashi yajauch áchatniuiti

¹² “Ashí túramniaitjai” tiniu áiniawai tura nekasaiti. Tuma aijn̄ mash yáinkiashtatui pen̄ker wekasatniun. Nekas ashí túramniaitjai tura nánkamas túratniujai nupetnakchattajai. ¹³ Junasha tiniu áiniawai: “Apatuk wakejain̄chu tura wake apatkujain̄chu mai ántraiti.” Apatkujai wakesha nekas mai metek enentáimpratin áiniawai tura Yus mai metek amuktatui. Núnisan̄ ii ayashi ii Uuntri Krístunuiti tura Kristu ii ayashi nérenniuiti. Tuma asamtai ii ayashíjjai

tsanirmashtiniaiti. ¹⁴ Tura Yus ii Uuntri Jesusan iniantkimia núnisañ ii ayashíncha nu kakarmarijjai iniantkittiawai.

¹⁵ Ashí ii ayashiin Kristu ayashímkiaiti. ¿Nu átumka nékatsrumek? Winia ayashrusha Kristu ayashíiya asamtai ¿itiurak nuna tsaniri ayashín najanataj? Penké túrachminiitjai. ¹⁶ Kame ¿jusha nékatsrumek? Áishman tsanirijjai tsanin_kiar chikichik ayashtinia áinis ajainiawai. Núnisañ Yus-Papinium áarmaiti: Mai chikichik ayashtinia áinis ajasartatui. ¹⁷ Tura shuar ii Uuntri Kristujai tsaninkia mai chikichik wakantin ajainiawai.

¹⁸ Tuma asamtai tsanirmatniunmaya yajáyan wainkiarum tsékentiarum. Chikich tunáa írunna nu ii ayashínkia ti yajauch awajeatsui. Túrasa shuar tsanirmakka ní ayashiniak yajauch awajeawai. ¹⁹ Yusa Wakaní ame enentáimin pujurtamu asamtai, ame ayashim ni jeente. Nu Wakaninkia Yus amasuíti. ¿Nuka nékatsrumek? Tuma asamtai ame ayashmi nérenchaitme. ²⁰ Kristu numpejai sumakma asamtai, ayashmisha wakanmisha Yusna áiniawai. Yusna asamtai ayashmijjai péñker túratniuitme, Yus shiir awájnásti tusam.

7

Nuatkatniusha péñkeraiti, nuatkashtincha péñkeraiti

¹ Ayu. Átum áatrurmarmena nuna yamaikia ujaktajrume. Shuar nu-atteachkusha péñkeraiti. ² Tura ti tsanirmatniun enentáimtuinia ásar ashí áishman ní nuwenak nuatkati tura ashí nuwá ní áishrinin iniumkati. ³ Áishmansha ni áishri asa nuwen túratniua nuna umiktiniaiti. Núnisañ nuwasha ni nuwe asa ni áishrin túratniua nuna umiktiniaiti. ⁴ Núwaka nin_ki ni ayashí nérenniuchuiti, antsu ni áishrinuítu. Núnisañ áishmansha nin_ki ni ayashí nérenniuchuiti, antsu ni nuwénuiti. ⁵ Ni ayashí suritnaikiashtin áiniawai. Tura mai itit awajnaitsuk Yus áujsatin wakeruiniak ishichik tsawant kanakmin áiniawai. Tura nuinkia atak tsanin pujustin áiniawai. Túracharmatainkia uunt iwianch, Satanás, tunaanum iniartinian útsutkattawai katsuntratniun tujintiakuí.

⁶ Ayu. Tura nuna áarayatan nújain_kia “ashí shuar páchitsuk nuatkatniuiti” tátsujai. Nuatkatniuitkiumka péñkeraiti. ⁷ Túramtai “ashí wijjai métek nu-atkachuitkiuinkia maak ainti” tajai. Tura Yus ashí shuaran imiá métek najanachuiti. Chikichan nuatkatniun súsaiti, tura chikichan yúpichuch katsuntratniun súsaiti.

⁸ Natsancha wajencha juna tájai, “Wijjai métek nuattsuk pujusrumka péñkeraiti.” ⁹ Tura katsuntratniun tujinkiarka nuatkarti. Ti katsuntrachmin nekapeakum nuatkatniun péñkeraiti.

¹⁰ Nuatnaikiarun antsu tájai, “Nuwá nuatkamuka ni áishrin ikiukchatniuiti” tajai. Núnaka ii Uuntri Kristu akupkaiti aya winia chichampruchuiti. ¹¹ Túramtai ni áishrin ikiuk_kia nin_ki atak nuatnatsuk pujustí tura tsanin pujustinian wakerakka ataksha ni áishrin waketskíti. Núnisañ áishmansha ni nuwen ajapashtiniaiti.

¹² Chikich shuaran juna tájai wikia, ii Uuntri Kristu juna akupkachuiti. Yus-shuara nuwenka Yus-shuarchaitkiunka tura ni áishrijjai pujustinian wakerakka péñkeraiti; ajapashtiniaiti, tájai. ¹³ Núnisañ Yus-shuara aishri Yus-shuarchaitkiunka tura ni nuwejai pujustinian wakerakka péñkeraiti; ikiukchatniuiti. ¹⁴ Nu nuwaka “Yus-shuarchajai tsanin pujakun Yusjai yajauch ajastatjai” tu enentáimprashiniaiti. Antsu nii Yus-shuar asamtai ni aishri niijjai pujá asa péñker ajasminiaiti Yusjai. Núnisañ núwaka Yus-shuarchaitiat ni aishri Yus-shuaraitkiuinkia niijjai tsanin pujá asa péñker

ajasminiaiti Yusjaj. Núnisan ni uchirísha péñker ajasmin ániawai Yusjaj. Núnischaitkiuñkia ni uchirí Yus-shuarcha uchiría áintsar ainti. ¹⁵ Tura áishmansha nuwasha Yus-shuarcha ana nu kanaktinian wakerakka túrati. Yus-shuar nujaj ankantaiti. Núnisan asati. Tuke máaniaktinian Yus nakitramaji. ¹⁶ ¿Núwaka ni aishri Yus-shuar ajastatna nuna nekas nékawak. Tura áishmansha ni nuwe Yus-shuar ajastatna nuna nekas nékawak? Yus-shuarcha nuka wétinia wakerakka wetí.

¹⁷ Wátsek. Shuarka Yus-shuar ajaska Yus nin najanama áintsan tuke átiniaiti. Pujumia áintsan pujusminiaiti. Núnaka ashí Yus-shuarnum akupeajai. ¹⁸ Iis, Yus-shuar ajasuka Israer-shuaraitkiuñka tuke Israer-shuar atí. Tura Israer-shuarchaitkiuñka Israer-shuar ajastin enentáimprashstiniiaiti. ¹⁹ Israer-shuaraitkiumsha tura Israer-shuarchaitkiumsha nuka enentáimtuschatniuiti. Aya Yus tana nu umirkatin nekas enentáimtustiniiaiti. ²⁰ Yus-shuar ajasuka nuik pujumia áintsan pujusminiaiti. ²¹ Chíkich shuara takarniurí asam ti itiurchat pujakmesha itiurchat enentáimpráip. Tura ankant jíinkimniaitkiumka jíinkitiá. ²² Ankantchaitkiumka ankantaitkiumsha ju enentáimpratá. Takarniuka Yus-shuar ajas tuke chíkich shuara takarniuríngiusha shiir enentáimpratniuiti Kristu nin tunaanumiá ankant awajsamtaí. Tura shuar takarniuchua nu, Yus-shuar ajas Kristu takarín ajasuiti. ²³ Ti wáitsamiayi Kristu in ankant awajtamsatniun. Ni numpejaj sumakma asarum shuar emetamu áirap. ²⁴ Tuma asamtaí shuar Yus-shuar ajas nuik pujumia áintsan yamaisha pujústí tura Yusan enentáimtus wekasati.

²⁵ Nuwá natsa túratniua nuna yamaikia áujmatjai. Kristu juna akupkachmai tura Kristu anenkratmari ti nekapsa asamtaí wi tájana nu antukmini-aiti. ²⁶ Tuma asamtaí juna tájai. Ti iturchatnum pujá asakrin shuar aya júnisan nuattsuk pujustin péñkeraiti. ²⁷ Nuatkaitkiumka núwem ikiukip. Nátsaitkiumka nuwá eakaip. ²⁸ Tura nuatkumka tunáa túratsme. Nuwasha iniurtukka niisha tunáa túrachuiti. Túrasa nuatnaikiaru itiurchatan ti wáinkiertatui ju nunkanam. Nú itiurchatnumiá wi uwemtikraintjai.

²⁹ Yatsuru, juna tájarme. Ishichik tsawant taasai. Juyanka nuatkaru ainia nuka aya ni nuarín enentáimprashstiniiaiti antsu Yúsna enentáimtustiniiaiti. ³⁰ Núnisan tuke Yúsna enentáimsar útainia nusha uutcha áintsar pujustin ániawai. Warainia nusha warascharua áintsar pujustin ániawai. Súmainia nusha sumakcharua áintsar pujustin ániawai. Ju nunkanmayajainkia itit awajmamsashtiniaitji. ³¹ Núnisan aya jú nunkanam péñker pujustin ti takaschatniuiti. Ashí jú nunkanmayanaka amuukatniuiti.

³² Jú nunkanmayajain itit ajaschak tusan wakerajrume. Nátsaka Yúsna enentáimtawai ni wakera nuna umiktinian. ³³ Túrasa nuatkaka ju nunkanman enentáimtawai ni nuarín shiir enentáimtiksattsá. ³⁴ Núnisan nuwá nátsasha nuatkamusha niisháa enentáimiainiawai. Nuwá natsa Yúsna enentáimtawai ni ayashísha ni wakanísha tuke Yúsaj shiir atí tusa. Tura nuátkamuka ju nunkanmayan enentáimtawai ni áishrín shiir enentáimtiksattsá.

³⁵ Atumin yáintajtsan juna tájarme. Itiurchat awajsattsan wakeratsjai antsu shiir wekaakrum itit awajtsuk Yus shiir enentáimtustarum tusan wakerajai.

³⁶ Tura shuar ni nawantri natsan nuatnaikiati tákuñka péñkeraiti. Nawantrin natsa tuke apujsatniun nakitiakka surukminiaiti. Nusha tunaachuiti. ³⁷ Tura chíkichka tuke natsan apujsataj tákuñka nekas péñkeraiti. Apujsatin itiurchatchaitkiuñkia tura ni nawantri nuatnakchatniuitkiuñkia apujsatniuiti. Apujsanaka nekas péñker túraiti. ³⁸ Tuma asamtaí nuatmantikianka péñker túrayi tura apujsanaka nu nankaamas péñker túrayi.

³⁹ Nuwá aishrĭ iwiaaku pujakuĩnkia tuke niijjajĭ tšaniņ pujustiniaiti. Tura ni aishrĭ jakamtai aņkant ajas ni wakera nujajĭ Yus-shuaran iis nuatnaiki-amniaiti, ⁴⁰ tura tuke nuatnatskesha nu naņkaamas nekas shiir pujustatui. Tú enentáimjajĭ wikia tura Yusa Wakanĭsha métek tátsuash.

8

Yurumkasha namaņsha ántar-yusnum susamu

¹ Ayu. Yamaikia yurumkasha namaņsha ántar-yusnum susamun áujmatsattajajĭ. Juĭjajĭ túratniua nuka mash nékajĭ. Tura shuar “ti nékaitjajĭ” enentáimkiunĭka nujajĭnkia “neka asan naņkaamantuitjajĭ” tu enentáimiui. Antsu shuar chíkich shuaran aneakka nin péņker atí tusa yayawai. ² Shuar “ti nékaitjajĭ” tákuņka nekas nekaatniua núnaka unuimiarchaiti. ³ Tura Yúsan aneana núnaka Yus péņker nékawai.

⁴ Wátsek. Ántar-yus susamu yúatin juņis enentáimpratniuiti. Yuska aya chíkichkiiti. Tura chíkich Yus atsakui, ⁵ aentsu yusrĭ nayaimpinmasha nuņkasha írunna nuka penĭké ántar ániawai. Kame aentsu yúsrĭsha tura úuntrĭsha ti írunui. ⁶ Tura iikia nékajĭ, aya chíkichik Yus awai, nusha ii Aparĭnti. Ashí írunna nuna najanaiti tura ni wakera nuna umikiat tusa najatmamji in. Ii Úuntrĭsha chíkichkiiti, Jesukrĭstu. Niijjajĭnkia ashí najanamuiti. Tura iisha ni kakarmarijjajĭ iwiaaku pujajĭ.

⁷ Tuma asamtai ántar-yus susamu yuamniaiti tura Yus-shuar awai juņa nékainiatsna nu. Nu shuar ántar-yusan yaunchu tikishmatraru ásar nú yusan susamun yuawarka itiurchat enentáimprar “enentáiruĭ yajauch ajasjajĭ” tiartatui. ⁸ Watsek, yuamujajĭ Yus in shiir enentáimtikrampratniun jeatsui. Yuarkia nujajĭ péņker áchattajĭ tura yúachrikia yajauch áchattajĭ. ⁹ Aņkantaitme yúatin wakerakmekka. Tura anearta. Ame yúakmin chíkich shuar itiurchat enentáimna nusha ámin wáitmak yúanĭka ni enentáin tunáa ajastatui. ¹⁰ Íistá. Ámekka neka asam ántar-yusa jeen wayam tura nuĭ yúakminkia ame yatsum nuĭ wáitmakchanpiash. Tura niisha itiurchat enentáimiat ántar-yus susamun yúashtimpiash. ¹¹ Nújajĭnkia ame nékamujajĭ ame yatsum Krĭstu jaka uwentikramia nu yajauch ajastatui. ¹² Túramtai ame yatsum itiurchat enentáimna nu yajauch awajeakum Krĭstunmasha tunáa túraitme. ¹³ Nu asamtai winia yatsurun wi yúajna nujajĭ yajauch awajeaknaka namaņnaka penĭké yuashtatjajĭ ni tunáa ajasajĭn tusan.

9

Krĭstu akatramu túramnia nu

¹ Ashí Krĭstu akatramurĭ túratniua nuna wisha túramniaitjajĭ ni akatramurĭ asan. Iis, wisha ii Uuntrĭ Jesusan wáinkiaitjajĭ tura wisha Jesukrĭstu takatrĭn takaajajĭ. Winia takatrujajĭn átumka Yus-shuar ajasuitrume. ² Chíkich shuar “Krĭstu akatramurĭnchuiti” túrutainiakuiša átumka winia takatrujajĭ Yus-shuar ajasu asakrumĭn nujajĭ wi nekas Krĭstu akatramurĭntiajĭ nu paant nekaamniaiti. Tura tu enentáimtursatniuitrume.

³ Ashí shuar “Krĭstu akatramurĭnchuiti” túrutainia nuna juņa tájajĭ. ⁴ Wisha Yus-Chichaman etserkataj tusan shuárnum iraaĭkun ashí ajampruinia nuna yuamniaitjajĭ tura umarminiaitjajĭ. ⁵ Tura Pĭtrusha, Jesusa yachĭsha, tura chíkich akatramusha irainiak ni nuwen Yus-shuar ainia nuna jukimnia ániawai. Wisha núnisnak túramniaitjajĭ. ⁶ Chíkich akatramuka kuit susamujajĭ Yus-Chichaman etserainiawai. Wisha Pirnapĭsha núnisrik túramniaitji. Kame ĭyaya íchikik takastiniaitiajĭ? ⁷ Suntarka ĭní kuĭtrĭjjajĭimpiash takaa? ĭTsanimpian aráa nu nuna nerĕn yúatsuk. Wáakan wainiua nusha muntsurĭn

úmatsuk? Núnisañ Yus-Chichaman étsera nusha nú takasmanumiã yurumámniaiti. ⁸ Aya aents enentáimmian chichaatsjai. Muisais akupkamun-masha métek tawai. ⁹ Muisais akupkamunam áarmaiti:

“Turu takaak jin̄kiaia saepen pakartaj tusa nájakui ni nují jin̄kiatáshtiniaiti. Antsu ni wakerak yuati.” Tu áarmaiti.

Tura Yus aya túrunak enentáimprachmiayi jujai. ¹⁰ Antsu in jujai nekaawarat tusa tímiayi. Jin̄kiain araana nusha tura júukmatai saepen pakaana nusha nuna jin̄kiain mai yurumáin áiniawai. Paant atí tusa Yus nuna áarmiayi. ¹¹ Tuma asantai Yus-Chicham atum̄in etserkakin nuyá átum takakrumna nujai in ajamsatniutrume. ¿Nusha itiurchatkait? ¹² Chíkich akatramu atum̄in irutainiak ajamsamun yuamniaitkuin̄kia iikia nekas túramniaitji ii etserkamujai Yus-shuar ajasakrumin.

Tura wikia antsu túrachuitjai. Atsumaknasha ashí itiurchat ana nuna kat-suntramjai Kristu shiir chichamen étserkui shuar itiurchat enentáimturarain̄ tusan. ¹³ Ashí shuar ni yúsr̄iniun tuke pujurin ainia nu, ni yusr̄i j̄een írussa nuyān yurumáiniawai. Tura yus-sutai namānken maawar nuyá yurumáiniawai. ¹⁴ Núnisañ Yus-Chichaman etserniua nuka Yúsna takasu asantai pen̄ker ajamsatniuiti. Nuna Kristu akupkamiayi. ¹⁵ Tura wisha ajamsamun yuamniaitiatan tuke winia kuítrujai yurumámjai. Tura yamaisha surúsúk tusan áattsujrume. Antsu nuna túrutsuk jakañka maak aintjai.

¹⁶ Uwempratin chichaman wi étserkun aya nújain̄ “ti pen̄keraitjai” enentáimtumatsjai. Kame Yus nuna túratniun surusuncha itiurkatjak. Nuna túrachkunka ti itiurchat pujusaintjai. ¹⁷ Wakerakun étserkunka, warasminiaitjai. Tura nakitiaknasha tuke Yus surusmanka umiktiniaitjai. ¹⁸ Tura jujai antsu nekas warasminiaitjai: Wi túramnian iniaisan chikichnan takatsuk aya winia kuítrujain̄ uwempratin chichaman étserjai. Nujai waraakun akikma áintsan̄kete.

¹⁹ Chíkich shuara takarniuchuitiatan ashí shuara takarniuriya áintsan̄ketjai Kristu shuar̄i untsur̄i ajasarat tusan. ²⁰ Israer-shuarjai pujakun niisha Yus-shuar ajasarti tusan Israer-shuara áintsan̄ ajai. Kame Muisaisa akupkamur̄i umirkatin áiniakui wisha aun umirkashtiniaitiatnak umirniuitjai. ²¹ Tura Israer-shuarchasha Yus-shuar ajasarti tusan, nu shuar Muisaisa akupkamur̄in umirkashtin̄ áiniakui, wisha nuna umirkashtinia áintsan̄ ajai. Tura Kristu akupeana nuna umirkatin asan nekas Yus akupkamun umirniuitjai. ²² Yusjai katsuarchasha ti pen̄ker Yus-shuar ajasarti tusan wisha katsuarcha áintsan̄ ajai. Chíkich chíkich shuarjai métek ajajai ishichkisha Yus-shuar ajasarti tusan. ²³ Ashí wi túraj núnaka uwempratin chicham tuke shiir atí tusan túrajai. Tura nu chichamjai wisha atsumtsuk shiir wekaajai.

²⁴ Shuar nekapnaisatniusha untsur̄i tsékeñtin̄ átsuk tura aya chikichik awakmatsuk. Nin̄ki, awakmakun súsatniua nú shiirmachin̄ achiktatui. Núnisrum kakarum ajasrum awakmak shiirmachin̄ achiktinia áintsarum Yusna takastarum. ²⁵ Shuar nakurak nekapnaisatin̄ ainia nuka nupetmaktaj tákunka ashí itit awajea nuna ikiuniawai. Iisha núnisrik nu enentáijjai Yusna nu takastiniaitji. Nakuruinia nu shuar awakmakun tawasap súsatniua nuna achikiarsha nú tawaspan wárik kajinmatkimniaiti. Antsu Yus in amastatjina nú tawasap tuke amuukashtatui. ²⁶ Wikia aya nánkamsan tsékeatsjai. Nasejai maania áintsan̄ máaniatsjai. ²⁷ Antsu winia ayashrun awatinia áitkiasnak umimtikiajai. Túrachkunka chikichan unuiniariatan winiasha awakmakun súsatniua nú shiirmachin̄ Yus surustinian̄ nakitrurainti.

10

Ántar-Yus tikishmatrashtiniaiti

¹ Enentáimpratarum, yatsuru. Yus yaunchu ii úuntriñ ashí métek yáinmiayi. Nusháa yurañmijiaí jintian nekapruamiayi. Tura ashí ii uuntriñ nu yurañmin apapekar wearmiayi. Ashí núnisar Kapaaku Nayaantsan Yus akankamunam wekasar katitkiarmiayi. ² Tura Muisaisan umirkar yurañminiam tura nayaantsanam ashí imiainiu áintsan ajasarmiayi. ³ Núnisan ashí mash Yusnumia yurumkan yuawarmiayi. ⁴ Entsancha ashí mash Yus susamunak umararmiayi. Kame Yus kayanmaya entsan akupkamtai ashí umararmiayi. Krístusha, nú kaya áintsan, niijiaí tuke weakui ni wakaní atsumamurin Krístunmayan takusarmiayi. ⁵ Tuma aijn Yus ti yáinmaitiat ni wakeramun umikcharmiayi. Tura ásar ni nunkeen jeatsuk atsamu nunkanam ti untsurí jákarmiayi.

⁶ Iisha nujai unuimiartiniaitji. Iikia ni wakeriarmia áintsarⁱ yajauchia nu wakerukchatniuitji. ⁷ Nu asamtai ántar-yus ni túrawarmia áintsarum tikishmatrairap. Iis, jiru yusrí shiir awajenakui Yus-Papinium áarmaiti, “Nu shuar yurumáwar nampekar námper ti najanawarmiayi.” Tu áarmaiti.

⁸ Nii túrawarmia núnisrik iikia tsanirmashtiniaitji. Nuna túrawar paintitres mir (23.000) chikichik tsawantai jákarmiayi. ⁹ Iisha tunáa túrar “Yus asutiáshtatui” tu enentáimprashstiniaitji. Niisha nuna túrawar napijiaí esaim untsurí jákarmiayi. ¹⁰ Yussha yajauch áujmatsashtiniaiti. Nuna túrawarmatai Yus ni suntarin akupak untsurín maawarmiayi.

¹¹ Yaunchu ii úuntriñiaí túrunamu in amúamu tsawantnum pujajnia nuna jintintramat tusa áarmaiti. ¹² Tuma asamtai shuar “Tunaanum iniaarchatatajai” tákunka anearti. Anearchamka iniaarminiaitme. ¹³ Tura ame itiurchatrumka aya amek nekapeatsme. Chikich shuarsha nu itiurchatjai métek nekapsatin ániawai. Jusha ti enentáimpramniaiti. Ame katsuntratin tujintiamna nuna nankaamas itiurchatan Yuska péñker asa tsankatramatsui. Antsu itiurchat tarutrammatai, nu itiurchatnum pujamin Yuska uwempratniun jintintramattawai. Nújainkia katsuntrattame.

¹⁴ Nu asamtai aneamu yatsuru penke ishichkisha ántar-yus enentaimtusairap. ¹⁵ Atumsha nékatsrumek. Wí tájana nu nekaschakait. ¹⁶ Kristu jakamu enentáimtustin námper najanar Yus áujeaji Kristu numpen nakumea nu shiir atí tusar. Tura métek umarar nujai Kristu numpé métek enentáimtaji taji. Tura apatkusha púurarⁱ tura métek yuarⁱ nujai Kristu ayashí in jarutramkamu métek enentáimtaji taji. ¹⁷ Apatkusha chikichkiitiat púuram untsurí ajatsuk. Iisha núnisrik untsuríitiatar nu apatuk métek yuarⁱ métek enentáimprar chikichik ayashtinia áintsar aji.

¹⁸ Israer-shuartisha enentáimpratai. Yus-sutai namanken yuinia nu, métek yuawar Yusan métek enentáimtuiniatsuk. ¹⁹⁻²⁰ Núnisan Yus-shuarcha ántar-yus sutai namanken suiniak nekas-Yusan suiniatsui antsu yajauch wakanin suiniawai. Kame ántar-yus ániak penké ántar ániawai, iwiaakuchu ániawai. Nu namansha sutai namanketiat péñker namankete, yajauchichuiti. Aya junak tajaí. Yus-shuarcha ántar-yus sutai namanken suiniakui amesha niijiaí métek yuamka yajauch wakanniasha niijiaí métek enentáimtaji tame. Nu antsu yajauchiiti. ²¹ Kristu numpen nakumea nu úmakrum íwianch susamua nuka umarchatniuitrume. Kristu ayashin nakumea nu yúakrumka íwianch susamua nuka yúashtiniaitrome. ²² ¿Warí, Yus akajkatin wakeramek. Iisha nin nupetkamniashitiaj’?

Aya aneakur takastiniaitji

²³ “Ashí túramniaitjai” tiniu áiniawai. Ayu, tura mash yáintkiashtatui péñker wekasatniun. Nekas ashí túramniaitjai tura mash yáintkiashtatui wakaniur kakaram ajastin. ²⁴ Nú arantcha chíkich yáintincha enentáimpratniuitji. Aya íiniuk pachischatniuitji.

²⁵ Namañ súmerum inintrutsuk sumakta. Tura ántar-yusan susamusha yajauchichuashit enentáimtsuk páchitsuk yuata. ²⁶ Ashí ju nunkasha tura ashí írrunna nusha Yúsnachuk ainia. Tuma asamtai péñker áiniawai.

²⁷ Yus-shuarchasha yurumkan ajampramkuisha ashí mash yajauchichuashit tu enentáimtsuk páchitsuk yuamniaitme. ²⁸ Tura chíkich chichaak “Juka ántar-yus susamu namankete” túramkuinkia nuikia yuawaip. Yúakminkia nu shuar itiurchat enentáimprattawai. ²⁹ Ame páchitsuk yuamniaitkiumnisha nii antsu yúachmin asa itiurchat enentáimprattawai.

Tura amesha tíchatameash “¿Urukamtia nii tujintiakuí wi yúachminiaitaj. ³⁰ Wi Yúsan yuminsan yúakuisha urukamtia itiurchat enentáimturainia. Yus yuminsachmakait?” tíchatameash. ³¹ Ayu, yúakmesha úmakmesha ashí túramna nusha ashí shuar Yúsan shiir enentáimtusarti tusam túratá. ³² Tuma asamtai ii túramujai chíkich shuar tunaanum ajuashtiniaitji. Israer-shuarsha, Israer-shuarchasha, Yus-shuarsha ashí yáintiniaitji. ³³ Wisha ashí shuaran yáintinian tuke enentáimjai. Ashí shuar uwemprarti tusan wi wakeraj nuna enentáimtsuk nin yáintinian tuke pujurjai.

11

¹ Kristu turamia áintsan takaajai wisha. Atumsha núnisrum wi takaajna áintsarum takastarum.

Nuwa Yusa jeen túratin

² Yatsuru, átum winia tuke enentáimturarum wi tímiajrumna nu umirniuitrume. Tuma asakrumin shiir enentáimtajrume. ³ Nu arantcha ujaajrume. Yus Apa Kristun akupea áintsan Kristu ashí áishmankan akupeawai. Núnisan áishmansha ni nuwen akupeawai. ⁴⁻⁵ Íjjiainkia shuar Yus áujenak tura núnisan Yus-Chichaman étserainiak áishman etsenkrukchatniuiti antsu nuwá múuknum nukumaktiniaiti. Tuma asamtai áishman nui etsenkkrakka natsantaiti. Tura nuwá múuknum nukumakchanka natsantaiti. Intiashin tsupimiarua áintsankete. ⁶ Nuwá múuknum nukumaktinian nakitiakka intiashin tsupirtí nuikia. Watsek, nuwá ni intiashin tsupirtinian nakitiakka, tura awampratniun natsamakka múuknum nukumakti nuikia. ⁷ Áishmankka Yúsan nakumeawai. Yusna shiir ana nuna nakúmkáttsa Yus áishmankan najanamiayi. Tuma asamtai áishmankka etsenkrukchatniuiti. Antsu nuwanka áishmanna shiir ana nuna nakúmkáttsa Yus najanamiayi. ⁸ Iis, Yus áentsun najaneak nuwanmayan áishmankan najanachmiayi antsu áishmanka ukunchíjiai nuwan najanamiayi. ⁹ Nuwan yáinkíat tusa áishmankan najanachmiayi antsu áishmankan yáinkíat tusa nuwan najanamiayi. ¹⁰ Tuma asamtai núwaka múuknum nukumaktiniaiti, nayaimpinmayá aencha íisarti tusa. ¹¹ Ayu, tura áishman nuwajainchu atsuinti tura nuwasha núnisan áishmanjainchu atsuinti. Yus ju nunkan núnisan atí tusa najanaiti. ¹² Iis, Yus nuwan áishmannumiá najanamiayi tura áishmansha nuwanmayá akiiniaiti. Tura Yus mai najanaiti.

¹³ Enentáimpratarum atumsha. Nuwá múuknum nukumatsuk Yus áujsatin ¿péñkerkai? ¹⁴ Ii shuartinkia áishman intiash ajakin natsantchakait. ¹⁵ Antsu núwaka intiash ajakin péñkerchakait. Múuknum nukumaktinian susamuiti. ¹⁶ Watsek, shuar tuke umiktinian nakitiakka juna nekaati, iisha tura ashí Yus-shuartisha aya tu enentáimji.

Kristu jakamu enentaimtustin nampernum yajauch túramu

¹⁷ Yamái áarattajrumna nujajin shiir enentáimtatsjarne. Atum irunkuram yáiniaiktiniaitrum tuke péñker wekasatin. Átum antsu iruntrarum yajauch awajnaiyarme. ¹⁸ Wats, Yusa Jeen irunkuram atumsháa enentáimprarum kanakurme. Kame tu ujatkarmai. Nekaschashit. ¹⁹ Tuke tupartatrumek Yúsnan ti nekana nu shuar paant nekanat tusarme. Antsu kajernaikiar kanaktin péñkerchaiti. ²⁰ Kanakin asarum Kristu jakamu enentaimtustin nampernum atum iruntrarum yúarmena nu nekas Yúsnachuiti. ²¹ Iis, ashí ní yurumken itiaawai ai yurumáttsa tura chikichan nákatsuk niá niá wari yuattsa wakerawai. Chíkichkia ishichik itiaana nu tsukamawai tura chikichcha nampekarai. ²² Yurumkan ishichik itiaana nu iniatsáarchamek. Atum áitkiarum núnisan Yusa jeen yurumáshtiniaiti. Natsantaiti. Warí, chíkich jea átsuk ai yurumátin. ¿Warimpait. Jujai shíirash áujsatjarum? Atsá. Jujai shiir áujsachminiaitjarne.

Kristu jakamu enentaimtustin námper

²³ Ii Uuntri Kristu jintintruama núnaka ujakmajrume. Jútas tuke súratsain, nu kashi ii Uuntri Jesus apatkun jukí ²⁴ Yusan yuminsamiayi. Nuyá puur tímiayi “Yuatarum. Jusha winia ayashruiti; atumin jarutramkatta núiti. Ju yúakrum Winia enentáimtursatarum” tímiayi. ²⁵ Núnisan yurumá umik piniñnasha achik tímiayi “Ju piniñ Yamaram Chichamaiti. Tura winia numpar puármatai Yamaram Chicham nekas uminkiattawai tawai. Ju tuke úmakrum Winia enentáimtursatarum’ tímiayi. ²⁶ Tuma asamtai ju apatuk yúakrum tura piniñsha úmakrum ii Uuntri Kristu jakamuri enentáimtarme. Kristu táatsain ju tuke túratniuitrume.

Shiir enentaijjiai Kristu jakamu enentaimtustin nampernum yuatniuiti

²⁷ Tuma asamtai shuar Yusan enentáimtutsuk ju apatkun yuawar tura ju piniñnumiancha umarar Kristu ayashincha ni numpencha yajauch enentáimta asa tunáa túrait. ²⁸ Nu asamtai ashí shuar ju apatkun yútsuk tura ju piniñnumiancha úmutsuk ni enentáin iwiaratniuiti Yusjai. ²⁹ Kristu ayashí jakamu enentáimtutsuk yúakka tura úmakka nuna tura asa asutniáttawai. ³⁰ Atumsha tura asarum jaarme tura pimpiruitrume. Chikichcha jákaru áiniawai. ³¹ Ímia-iik ímiakrinkia Yus in asutiámachaintji. ³² Tura ii enentáin Yus yajauchia nuna wáiniuk asutiámji. Túrachkunka ashí Yus-shuarchajai súmamtikramawaintji.

³³ Tuma asamtai, yatsuru, iruntrar yurumáttsa matsatkurmeke nákastarum métek yurumátin. ³⁴ Shuar tsukamakka ni jéeniñkⁱ yurumáti. Nújainkia yajauchijjai irunchakrumin Yus asutiámashtatrume. Ayu, chíkich áatrururmena núnaka wi ai jean iwiarattajai.

12

Yusa Wakaní ni shuarin susamu

¹ Yusa Wakaní ashí ni shuarin súana nuna yamá ujakatjarne. Nekaatarum, yatsuru. Yus-shuar shiir takasarti tusa Yusa Wakaní juna súsaiti.

² Yaunchu átum Yus-shuar tuke ajatsuk chíkich shuarjai métek ántar-yus tikishmatramarme. Niisha ántar-yus ásar áujmattramsachmin ármiai. ³ Tura jújain shuar Yusa Wakaní kakarmarijjiai chichaana nu nekaamniaiti. Yusa Wakaníjjainkia shuar “Jesus yajauchiiti” tíchamniaiti. Núnisan aya Yusa Wakaníjjain “Jesus winia Úuntur asa akuptuktiniaiti” tíminiaiti.

4-5 Yusa takatři íruntsuk. Tura Yusa Wakanínkⁱ ashí nuna takastinian súsaiti. Tura shuar Yus-shuara Uuntri chikichik aín ashí Yusa takatřin métek takaatsui. Antsu chikichkin ashí nankaamas péⁿker takaawai. Yusa Wakanísha nuna shiir takasat tusa súawai. Tura Nii wakera nuna Nínki ni shuarin chikichik chikichik niisháa niisháa súawai. ⁶ Yúskete ashí ni shuarin niisháa takamtikeana nu. Nínki ashí ni shuarⁱ enentáin takaak takatnasha shiir takamtikeawai. ⁷ Yusak túratin súam Yusa Wakaní kakarmari paant átatui nu takasmanum. Tura ashí shuar ní takatřijjai yáiniaiktin ániawai. ⁸ Júnaka Yus takamtikeawai. Nékana nu shuarnasha, unuimiarua nunasha Yúsnan ujaktinian súawai. Tura mai shuaran Yusa Wakaní kakarmarijjai nuna túratniun súsaiti. ⁹ Chikichnasha Yúsan áujenak Yúsan ti enentáimtusar nekas itiurchat ana nuna iwiaratniun súawai. Níncha Yusa Wakaní kakarmarijjai nuna takastinian súsaiti. Chikichnasha jaan tsuártinian súawai. ¹⁰ Chikichnasha aents nínki túrachminian túratniun súawai. Chikichnasha Yúsnan etserkatniun súawai. Chikichnasha shuar wari yajauch wakannia péⁿker wakanniasha apatka nekaatniun súawai. Chikichnasha niisháa chichaman chichastinian súawai. Chikichnasha niisháa chichasman jintíatniun súawai. ¹¹ Tura ashí shuara enentáin nu Wakanik takaawai. Tura Nii wakera nuna an^kant an^kant súawai takastinian.

Ashí Yus-shuar Kristu ayashía áintsan ajainiawai

¹² Iikia Kristu ayashía áintsarⁱ ayashímkiatji. Kristu ayashí muchitmarisha írunui. Niisha túmaitiat chikichik ayash^tiniaiti. ¹³ Tura imianiakrin Yusa Wakaní chikichik awajtamsamji, Kristu ayashía áintsan. Israer-shuarsha, Israer-shuarchasha, ti itiurchat takaana nusha, an^kant ainia nusha, ashí yamá chikichik ajasuitji. Tura Yusa Wakaní pimiutkamuitji Nijjai tsanínkia pujakur.

¹⁴ Ayashi muchitmarⁱ aya chikichkichiiti. ¹⁵ Tuma asamtai, winia nawer uwejruchuitiat tuke winia ayashrunuiti. ¹⁶ Winia kuishrusha jí^ruchuitiat tuke winia ayashrunuiti. ¹⁷ Wátsek winia ayashur aya jíⁱkitkiuínkia ¿itiurak antukaintiaj? Winia ayashrusha aya kuishkitkiuínkia ¿waríjainⁿ nekap-saintiaj? ¹⁸ Nu asamtai Yus winia ayashru muchitmarⁱ ni wakeramunam ikiusuiti. ¹⁹ Chikichik muchitmajainⁿ ¿ayash áminkiait? ²⁰ Antsu untsurí muchitma akuisha chikichik ayashkiiti. Iisha núnisrik chíkich chíkich iisháa takayatrik métek takasar Yus wakeramu takamtsuk umíaji.

²¹ Winia jí^ru péⁿker aín winia uwejrúncha wakerishtatjak. Winia muukarsha péⁿker aín winia nawernasha wakerishtatjak. Núnisanⁿ Yus-shuar shiir enentáimtumak ni yachin “atsumatsjame” tíchamniaiti. ²² Antsu ii muchitmarⁱ ishichik enentáimtajnia nu atsakuínkia ti atsumawaintji. ²³⁻²⁴ Chíkich muchit-masha, ímiancha nu, shiir iwiarmamtaji. Tura nu muchitmaka shiir ísminia nujai nankaamas péⁿker wainji. Iis, shiircha nu antsu péⁿker wainji. Yus ii ayashin núnisanⁿ atí tusa najanamiayi. ²⁵ Nujainkia ayashí muchitmarⁱ máanait^suk métek yáiniainiawai. ²⁶ Chikichik muchitmaram najaimiakum ashí ayashnium wáitiatsmek. Núnisanⁿ chikichik muchitmaram ayap ajakum ashí ayashnium shiir átsmek.

²⁷ Núniskete Kristu ayashíjjai ayashímkiatⁱ nu. Tura chíkich chíkich ni muchitmarⁱ aji. ²⁸ Ayashnium muchitma írunna áintsan Yus ni shuarin untsurí takatan súsaiti. Emka Yus akatramu, nuyá ni chichamen etserin, nuyá jintinkartin, nuyá aents túrachminian túrin, nuyá tsuákratin, nuyá yáinⁿkratin, nuyá akupin, nuyá niisháa chichamjai chicharin, mash írunui. ²⁹ ¿Ashí Yus akatramuk ainia. Ashí Yus-Chichaman etserniuk ainia. Ashí jintinkratniuk

ainia. Aents túrachminian ashí túriniak ainia. ³⁰ Ashí tsuákratniuk ainia. Ashí niisháa chichamjaj chichamtiniak ainia. Ashí niisháa chichamjaj chichasman jintinkratniuk ainia? Atsá. Túmachuiti. ³¹ Túmaitkuinkia péñkera nu takastin wakeruktarum. Tura imiá péñkera nuna ju jintintiatjarne.

13

Aneatin

¹ Ju nunkanmaya aentsu chichamen untsurí chichayatnak tura nayaimpinmaya aentsu chichamencha chichayatnak anenkratchaknaka tampur meserua áintsanak aya ten-ten ajajai. Penké ántranak chichaajai. ² Yus-Chichamnasha ti shiir étseriatnak, túrasha ashí uukmancha tura ashí nekaamniancha nékayatnak, túrasha Yúsan ti enentáimtusan murá umuchiayatnak, anenkratchaknaka penké ántraitjai. ³ Ashí wi takakjana nuna atsumainian súayatnak tura Yus shiir awajsattsan winia ayashrúncha áesawarti tusan suru-mayatnak tura anenkratchaknaka ántranak túraitjai.

⁴ Aneñkartaka wari kajeatsui, tsánkaiti, chíkich shuaran shiir awajniuiti, péejchach asa waantu enentáimtumsui. ⁵ Aneñkartaka natsanta nuna túrichuiti, níniunak enentáimchaiti, kajechuiti, páchichuiti. ⁶ Chikicha tunaarjin wararchaiti antsu péñker shuaran wararniuiti. ⁷ Aneñkartaka aya katsunteawai. Tsanú chichamnasha nakitiawai antsu aya péñker ana nuna nákwai. Tunáa shuar shiir ajastí tusa tuke nákwai.

⁸ Aneñkrattainkia tuke amuukashtiniaiti. Antsu ju nunka amuukmataisha Yus-Chicham etserkatin atsuttawai, tura niisháa chichamjaj unuimiatsuk chichastincha amuukattawai, tura ashí nekanamtai unuimiartincha atsuttawai. ⁹ Kame yamaikia aya ishichik nékaji. Yus-Chichamsha amutsuk étseraeji. ¹⁰ Túra ukunam mash nekanamtai yámankamtaik nekaamuka ántar átatui.

¹¹ Yaunchu wi uchich asan uchichia áintsan enentáimkiun chichasmajai. Antsu yamaikia uunt ajasan uchiniun iniaisaitjai. ¹² Núnisrik yamá ju nunkanam Yus paant wáintsuji. Íspik kusurunam ímsatniua áintsankete. Antsu ukunam mai métek paant wainniaikiattaji. Yamaikia aya ishichik nékajai. Nuj antsu Yus winia nékara áintsanak nekaattajai. ¹³ Watsek, menaintiu amuukashtin áiniawai. Ju áiniawai: Yus shiir enentáimtustin, shiir ana nu nákastin, tura anenkrattai. Ju menaintiunmasha anenkrattainkia ashí nankaamakuiti.

14

Niisháa chicham unuimiatsuk chichastin

¹ Nu asantai, anenkratin atarum. Tura núnisrumek Yúsnan péñkera nu takastin wakeruktarum. Imiankaska Yus-Chicham etserkatin péñkeraiti. ² Nújainkia niisháa chichamjaj unuimiatsuk chichastin péñkerchaiti. Iis, nu shuar chíkich shuarjaj chichatsuk aya Yusjaj chichaawai. Ni chichame penké antukchamniaiti. Yusa Wakaní nin chichastinian súawai túrasha tana nu nekaachminiaiti. ³ Antsu Yus-Chichaman étserae nuka shuaran yayawai. Shuaran ikiatsuártasa, tura ikiakártasa, túrasha atsankrattsa yayawai. ⁴ Niisháa chichamjaj unuimiatsuk chichaana nuka aya niñki katsuartinian yáinmamui. Antsu Yus-Chichaman étserae nuka ashí Yus-shuaran ikiatsuáwai.

⁵ Atumsha ashí mash niisháa chichamjaj chichastinian wakerajrume. Túrasha nuna nankaamas Yus-Chicham etserkatniun wakerajrume. Aya chichastinjainkia ju imiá péñkerchakait. Kame chichasma jintiakmeke maak. Nujai Yus-shuar tsakarartatui. ⁶ Enentaimpratarum, yatsuru. Nuj irakun

aya niisháa chichamjaj chichaaknaka žitiura yáintatjarum? Antsu Yus winia jintintruamuncha tura wi nékajna nunasha étserkunka yáintatjarume. Yus-Chichamnasha tura ashí Yúsnancha jintinkiuuncha yáintatjarume.

⁷ Peemsha tura tumaŋsha wi tájana áintsan áiniawai. Péŋker tuntuíyamuka paant nekaamniaiti. Tura péŋker tuntuíyachkuinkia, nu tuntuíyamu nekaachminiaiti. ⁸ Suntarsha mesetnum wéenaku ni kapitiantri ni wakeramun ujaktinian kachun umpuawai. Paant umpuakuinkia suntarsha ni wakaramun nekaawartatui. Tura paant umpuachkuinkia suntarsha žitiurak mesetnum wétinian iwiarat? ⁹ Atumjajsha núniskete. Nekaachmin chichamjaj chichaakminkia žtámena nuna itiur nekaawartata? Nase chichartsumeash. ¹⁰ Ju nuŋkanmaya chichamka ti untsurí írunui. Nu chichaman nékaka ashí antukmin áiniawai. ¹¹ Tura chíkich shuara chichamen ántachunka níjiainkia yajaya apachia áintsanak ajajai. Niisha wíjiainkia yajaya apachia áintsan ketete. ¹² Tuma asamtai, Yusa takatri ti wakera asarum ashí Yus-shuaran iklarartatna nú takat nekas wakeruktarum.

¹³ Nu asamtai niisháa chichamjaj chichaitkiumka chichasumna nu jintiartin Yus seata. ¹⁴ Niisháa chichamjaj Yusan áujeaknaka nekas winia wakantrujaj áujeajai tura áujsajna nuna nékatsjai. ¹⁵ Antsu wikia júnisan enentáimjai. Yúsan áujeakun winia wakantrujajsha áujsattajai tura enentáimtsuk áujsashtatjai. Kantamkuncha kantamaj nuna enentáimkiun winia wakantrujajsha kantamattajai. ¹⁶ Amesha shuar iruntramunam aya wakanmijaj niisháa chichamjaj Yus shiir yuminsakmincha nekaachmin asamtai nékachuka ámijaj métek áujsatniun jeatsui. ¹⁷ Ti shiir Yus yuminsam áujeatsmeash tura chíkichka Yusjaj ikiakáatsme. ¹⁸ Ashí átum nusháa chichamjaj chicharmena nuna nankaamas wikia chichaajai. Nuna Yusan yuminsajai. ¹⁹ Túmaitiatnak untsurí chichamjaj chichasan ántumtikiashtinjainkia nankaamas Yus-shuar iruntramunmanka aya senku chichamchijajin tiintjai, paant jintintiawartaj tusan.

²⁰ Yatsuru, uchia áintsarum enentáimprairap. Kuirchia áintsarum tunáa túrashtin enentáimpratarum tura chíkich írunna nujaj uunt enentáimpratniua áintsarum enentáimpratarum. ²¹ Yus-Papinium áarmaiti:

“Yajaya shuaran akupkan niisháa chichamjaj chichastatjai. Tura nújajsha anturtukchartatui” tawai Yus.” Tu áarmaiti.

²² Nújajinkia páantaiti, nusháa chichamjaj chichastinkia Yus-shuarčan ashamtikar enentáimtikratniun Yus súsaiti. Yus-shuaran tu enentáimtikratniun súsachuiti. Antsu Yus-Chichaman etserkatniunka Yus-shuarčan enentáimtiktsuk Yus-shuaran yáintinian súsaiti. ²³ Tuma ajn, nékachusha tura Yus-shuarčasha Yus-shuar iruntramunam wayaŋka tura ashí niisháa chichamjaj chichainianak wáinkianka “mash waurka ajasarai” enentáimturmarchartatuak. ²⁴ Tura Yus-Chicham étserkurminkia nékachusha tura Yus-shuarčasha nuj wayaŋka ashí tárumna nujaj ni tunaarjn íimias enentáimturtatui. ²⁵ Nújajinkia ni enentáin úumak ana nuna paant wáiniak tikishmatar Yusan shiir awajsattawai. Tura “nekas Yus atumjaj pujawai” títiatui.

Ashí tuke shiir takastarum

²⁶ Ayu, júnisaiti, yatsuru. Átum irunkurmin shuar takastinian Yus nin susamu túratí. Kantamátniuncha, jintintiatniuncha, Yus iwiainiakman ujaktinniasha, nusháa chichamjaj chichastinniasha, nusháa chichasman jintiatniuncha, ashí Yus-shuar Yusjaj tsakararti tusar juna mash takasarti. ²⁷ Nusháa chichamjaj chichainiakka chikichik chikichik chichasarti. Tura jimiarchik menaintiuchiksha chichasarti. Tura ni timianka jintiartiniaiti.

28 Jintiartin atsakuinkia nusháa chichamjai iruntramunam chichaschat-niuiti. Antsu ninki Yusjai chichasti. 29 Núnisañ jimiarchiksha menaintiuchiksha Yus-Chichaman etserkarti. Tura chíkich shuar nui iruntrar ni etserkamun enentáimprarti péñkerashit tusar. 30 Tura chikichik chichaakui Yus chikichan nui pujana nuna yamaram chichaman súakuinkia emka chichaa nu iniáisatí. 31 Núnisrum Yus-Chicham etserkatin wakerarmena nu chikichik chikichik chichasrum ashí jeattarme. Nújajsha Yus-shuar unuimi-arar kakarartatui. 32 Yúsnañ étserainia nuka tuke enentáimprar chichastin ániawai. Enentáimtsuk nánkamsañ chichasmin ániatsui. 33 Yuska pachimtak chichaman nakitiak shiir chichasmanak wakerawai.

Chíkich nunkanmasha ashí Yus-shuar iruntramunam túrainia áintsarum túratniuitrume atumsha. 34 Yus-shuar iruntramunam nuwá chichastin surimkiamuiti. Yus akupea núnisañ núwaka chichatsuk umin átin ániawai. 35 Inintrustinian wakerakka ni jeñ waketkin ni aishrñ nui aniasi. Ashí iruntramunam nuwá chichastin natsantaiti.

36 Jusha enentáimpratarum. Yus-Chicham atumjai nan̄kamnachmai. Núnisañ aya atumjiniñ Yus-Chicham jeartamchaiti. Chíkich nunkanmasha Yus-shuarti túrutai enentáimpratniuitrume atumsha. 37 Atumjñ shuar “Yus-Chichaman tuke etserniuitjai” enentáimtumatsuash. Tura chíkich shuarsha “Yusa Wakaní tuke winia akuptaiti” enentáimtumatsuash. Nu shuarka wi áatjarmena nuna enentáimprar “nekas Yúsnañ tíniuiti” tiartí. 38 Tu táchakuinkia niisha ántar ániawai.

39 Nu asantai, yatsuru, Yus-Chicham etserkatin wakeruktarum. Nusháa chichamjai unuimiatsuk chichastincha surimkiarap. 40 Túmaitiat antukchamin awajtsuk ashí shiir túratarum.

15

Kristu nantakmia

1 Ataksha, yatsuru, uwempratin chichaman wi etserkamaj nuna atumin enentáimtikrattsan wakerajrume. Nu chichamsha atumsha enentáimturarum tariarurme. 2 Nu chichamsha átum ántar enentáimtachkurmeka uwempraitrume. Wi ujakmajrum nu tuke enentáimtaitkiurmeka nekas uwempraitrume.

3 Winia ujakmunak ujakmajrume. Nu chichamsha ashí nan̄kaamas úuntaiti. Júiti nu chicham: Ii tunaarñ asakártasa Kristu jarutramkamiaji, Yus-Papinium tana núnisañ. 4 Tura jakantai iwiarsarmiaji. Nuyá menaintiú tsawant tsawarmanum Yus Nin iniantkimiayi, Yus-Papinium tana núnisañ. 5 Nantakisha Pítrun wantintiukmiayi, nuyá ni akatramurñ wantintiukmiayi. 6 Nuyanka kiniantusa (500) nan̄kaamas Yus-shuaran wantintiukmiayi. Nú shuarnumiasha ishichik jákaru ániawai tura untsurí tuke pujuiniawai. 7 Nuyasha Sántiakun tura nuyá ashí ni akatramurñ wantintiukmiayi.

8 Ashí amúamunmasha winiasha wantintiurkamiayi, wi yajauch wekaa aín. 9 Wisha Yus-shuaran ti yajauch awajsa asan chíkich Yus-akatramujai ímianchaitjai. Nekas winia péñkerujai ni akatramurñtjai tíchamniatjai. 10 Antsu Yus ti shiir anentak winia enentáiruj pujurtus péñker najataiti. Nu asantai winia kakarmarjai takaschaitjai, antsu Yus, anenkartin asa, winia enentáiruj takaakui ashí ni akatramurñ nan̄kaamas takasuitjai. 11 Tura wi takaakuisha tura ni takainiakuisha mai péñkerkete. Nu chichamka mash étseareji tura nu chichamsha átum enentáimtusmarme.

Jákaru nantakiartatui

¹² Iisha “Kristu jakamunmaya nantakniuiti” tu étsereaji. ¿Itiur nuikia shuar jakamunmaya nantakchatniuiti tuinia? ¹³ Jakamunmaya nantakchatniuitkiuinkia nuikia Krístusha nantakchaiti. ¹⁴ Tura Kristu nantakchaitkiuinkia ii ujajnia nu penké ántraiti, atumsha Kristu enentáimtarmena nusha ántraiti. ¹⁵ Núnisaitkiuinkia iisha “Yus Krístun iniantkimiayi” tákur waitruamji. Iis, nekas jakamunmaya nantakchamniaitkiuinkia nuikia nekas Yus Krístun iniantkichuiti. ¹⁶ Jaka nantakchatniuitkiuinkia imia Krístusha iniantkichmaiti. ¹⁷ Tura Kristu iniantkichmaitkiuinkia átum Kristu enentáimtamusha penké ántraiti. Tunaarmisha asakárchamu áiniawai. ¹⁸ Núnisaitkiuinkia Yus-shuar jákaru ainia nu tuke menkakarú áiniawai. ¹⁹ Iikia Kristu enentáimtusar tuke Niiijai shiir pujustin nákaaji. Tura aya jú nunkanam pujustiniaitkiurkia Kristu ántar enentáimtakrin ashí nankaamas waitnentramptratniuitji.

²⁰ Antsu imiankas Kristu jakamunmaya nantakniuiti. Ashí ukunam jakamunmaya tuke jákashtinian nantakiartatna nuna Nii émtukuíti. ²¹⁻²² Yaunchu Atañ tunáa túramtai ashí shuar jákatin áiniawai. Núnisañ yamaikia Krístujain tuke atakka jákashtinian nantakiartiniaiti. Iis, chikichik áishmanjain jákatin nankamnamiayi. Nuka Atañkauyayi. Núnisañ chikichik áishmanjai nantaktin nankamnamiayi. Nuka Krístuítu. ²³ Yus wakerana nuñ Yusna nu mash nantakiartatui: Kristu emka-juukma áintsañ émtukim nantakniuiti tura atak jú nunkanam tara ashí ni shuarin júuktinia áintsañ iniantkittiwai. ²⁴ Nuñkia mash amuukattawai. Nuñ Kristu ashí kapitíánniasha, ashí akupniuncha, ashí núnisañ jú nunkanam írúnna nunasha nupetak emesrattawai. Krístusha ashí mash ni Aparin susattawai. Tura Yus Apa ashí akupin átatui nuikia. ²⁵ Iis, júnisañ átatui. Emka Yus Apa ashí ni nemasrin nupetak Krístun susattawai akupin atí tusa. ²⁶ Tura ni nemasrin nupetak ashí amúamunam jákatniuncha nupetkattawai. ²⁷ Yus Apa ashí Krístun súsaiti ashí akupin atí tusa. Yus-Papinium tu áarmaiti. Tura “ashí Krístun súsaiti” táyat Yus Apancha susamuiti tátsui. Antsu Yus Apa ashí Nin susa asa Niñki súsachmaiti. ²⁸ Tura Yus Apa ashí mash ni Uchirin Krístun nekas susantai Kristu nuikia ashí akupin ajas atak ni Aparin mash awantuki núnisañ surumaktatui. Nuñkia Yuska tuke ashí nankaamantu átatui.

²⁹ Ayu. Tura shuar jakan enentáimtusar imiantinniasha ¿urukamtia nuna túruinia? Jákaru nantakchatniuncha ¿urukamtai imianainia?

³⁰ Iikia ¿urukamtai tuke jániñkiaruitiaj? Nantakchatniuitkiuinkia ántra wáitsaintji. ³¹ Atsá, penké áintsachuiti. Nu asantai átum ii Uuntrí Jesukrístu enentáimtakrumin wi shiir enentáimtajrume. Tura wisha tuke tsawantin ti itiurchat pujakun jákatniua áintsan pujajai. ³² Jakamunmaya nantakchatniuitkiuinkia wi ántranak kajen shuarjai Ipisiunam máaniakuitjai. Maa, uunt yawáa áinis kajen áрмаi. Wats, núnisaitkiuinkia antsu “yurumar nampektai, kashin jákashtatjik” titiai nuikia.

³³ Anañnawairap. “Pénkeraitiatam yajauch shuarjai tsaniñkia wekak-meka yajauch máatrattame” tiniu áiniawai. ³⁴ Tunáa ikuakrum péñker wekasatin shiir enentáimpratarum. Iis, shuar Yúsan nékainiachu tuke awai. Atumin natsaaruk tusan tájarne.

Iniantkimiú ayash átatna nu

³⁵ Shuarsha inintruschaimpiash ¿jákarusha itiurak nantakiarat. Nantakiarsha warí ayashniak takusarat? ³⁶ Enentáimtsuk inintrawai. Jíñkiaí araamsha jaka áintsañ amúatsuk. Túrayat tsapaatsuk. ³⁷ Tsapaitniurisha araatsme antsu trikiu jínkiaichisha chíkich áraka jínkiaichirisha araame. ³⁸ Nuyá tsapaakuisha Yus wakerana núnisañ ní tsapaitniurincha súawai. Tura ankant ankant tsapaitniurinkia súsaiti. ³⁹ Núnisañ ashí ayash métekcha áiniawai.

Áentsnaka niishaaiti. Kuntinniasha niishaaiti. Nanamtinniasha namaknasha niisháa áiniawai. ⁴⁰ Nayaimpiniam yaa írunui tura ju nunkanam írunna nujai nusháa ímtin áiniawai. Nayaimpinmayasha nun kayasha shírmari nushaiti. ⁴¹ Etsá wincharisha nantunusha yáanusha mash nushaaiti. Nuamtak yaaksha chikicha wincharinkia chikichnajainkia nushaaiti. ⁴² Núniskete jaka nantaktincha. Káurtinnium iwiarsam jákashtinnium nantaawai. ⁴³ Antra nu iwiarnawai, shiira nu nantaawai. Kakarmachua nu iwiarnawai, kakarma nu nantaawai. ⁴⁴ Juyá ayash iwiarnawai, nayaimpinmayá ayash nantaawai. Juyá ayash átsuk. Núnisan nayaimpinmayá ayashsha awai.

⁴⁵ Yus-Papinium nuní áarmaiti:

“Emka áishman ni naari Atan, aents ajas iwiaaku ajasmiayi.” Tu áarmaiti. Ukunmanka, yamaram Atanka áintsan, Kristu, wakan asa, ashí áentsun nekas iwiaaku átinian susamniaiti. ⁴⁶ Nayaimpinmayá ayashkia émkachuiti antsu juyá ayash émkaiti tura nuyá nayaimpinmayá nu. ⁴⁷ Emka áishman nun kajai najanamu asa nun kayaiti. Ukunmayá áishmansha ii Uuntri Kristu asa nayaimpinmayaiti. ⁴⁸ Atanka áintsan ainia nusha juyá ayashtin áiniawai. Kristu áintsan ainia nusha nayaimpinmayá ayashtin áiniawai. ⁴⁹ Yamái juyá áiniakur ukunam nayaimpinmayá ayashtin ajastatji.

⁵⁰ Juna tájarme, yatsuru. Ayash númpentin asa nayaimpiniam, Yus akupeana nu, wayachminiaiti. Iis, káutainkia káurchatniunam wayachminiaiti. ⁵¹ Yaunchu uukma nu yamá nekaatarum. Ashí jákashtatji, túmaitiatar ashí yapajniáttaji. ⁵² Tura púsarí muíttsarnin ti wárik yapajniáttaji. Tura ashí amuukai tusa umpuariatui. Nú umpúamunmasha Yus-shuar jákaru ainia nu atak jákashtinian nantakiartatui. Iisha nun yapajniáttaji. ⁵³⁻⁵⁴ Jú kautainkia yamá jákatniuitiat káurchamnia ajastiniaiti. Túrasha jákachmin átatui. Nu túrunamtaisha Yus-Papinium aarma uminkiattawai:

“Jákatniun Yus nupetak amukuiti. ⁵⁵ ¿Itiur jákatjik yamaikia. Jákatniusha itiur nupettamkan mantamataji?” Tu áarmaiti.

⁵⁶ Yaunchu Yus akupkamu tiniu asamtai shuar tunáa tura jákatniuiti. ⁵⁷ Yamái antsu ii Uuntri Jesukristu túramujai jákatniunka Yus nupetkaiti. Tura incha nujai uwempratniun amaakui shiir yúminkiaji.

⁵⁸ Nu asamtai, aneamu yatsuru, kakaram ajasrum yawetsuk nankaamas Yusa takatři takastarum. Ii Uuntri Kristujai tsainkia takaarum nuka penké ánrachuiti. Nu paant nékarme.

16

Yusa kuitři irurtin

¹ Yusa kuitři irurtinkia, Yus-shuaran Karasea nunkanam tímiaj núnisnak atumniasha tájarme. ² Ashí tumintin, Yus súramna áintsam akankam ikiusta. Nújainkia wi jeattaj nu yaunchu akankamu mash irurmin átatui. ³ Nui jeanča átum anaiyarmena nu shuaran papijiai Jerusarénum akupkattajai. Tura atumí kuítrumin aisha ii yachin sústartatui. ⁴ Wisha wéminiaitkiuinikia wijiai wéartatui.

Papru irastatna nu

⁵ Wi Masetúnia nunkanam wétiniaitjai tura nuyá Kurintiunam jeattajai. ⁶ Nuisha untsurí tsawant pujuschatjash. Ishichik nantusha wéchanmianum pujuschatjash. Tura wi atak wéakui atumsha yáintkiarum shiir akuptukchat-tarpash. ⁷ Aya wárik nankaamaktinian nakitiajai. Antsu Yus wakerakuinkia untsurí tsawant atumjai pujustaj tajai. ⁸ Tura juin Ipsiunam pintikustís nampernum pujustatjai. ⁹ Juinkia Yusa takatři tí shiir takastin awai. Tura untsurí shuar wi takaamun nakitiainiawai.

¹⁰ Timiutéu nuí jeamtáinkia, shiir awajsatarum; sapijmiakain. Niisha wijiaí métek Yusa takatrín takaawiti. ¹¹ Nu asantai nakitraitrap. Antsu yáinkrum winí shiir akupkatarum. Chíkich yachijiaí tatí tusan nákaí.

¹² Apurusnasha chíkich yachijiaí winí írmasartí tusan ti seamjai tura penkesha nakiarmaí. Kame nii ankant aku nuí winishtimpiash.

Áujmamsamu

¹³ Aneara tariarum Yus nekas enentáimtustarum. Áishmanchakaitrum, kakaram ajastarum. ¹⁴ Aneñkartamujai mash túratarum.

¹⁵ Ayu, yatsuru. Estepanasa shuari ashí emka Akaya nunkanam Yus-shuar ajasarmán nékarme. Niisha Yus-shuaran yáintajtsar tuke takainiawai.

¹⁶ Niisha tura ashí niijiaí métek yáinkiar takainia nú shuar seatmana nu tuke túratarum. ¹⁷ Estepanassha Jurtunátusha Akaikiusha atumúya táarmataí shiir waraajai. Átum yajá pujakrum tujintiarmena nuna túrawarmai. ¹⁸ Niisha winia shiir enentáimtikrurarai. Núnisan shiir enentáimtikramprattarme. Nuní aents tuke shiir enentáimtustiniaiti.

¹⁹ Asia nunkanmaya Yus-shuar amikmáatmainiawai. Akirasha ni nuwe Prisirajaisha ashí Yus-shuar ni jeen Yus-Chichaman irunturarusha Jesusa náariin amikmáatmainiawai. ²⁰ Ashí ii yachisha amikmáatmainiawai. Nuámtaksha shiir awajnaisrum amikmáaniatarum.

²¹ Wi Papru asan júchiniak winia uwejrui áaran amikmaajrume.

²² Ii Uuntri Jesukristun aneachuka yajauchiniam yuminkramu atí. “Ii Uuntri, wari tatá.”

²³ Ii Uuntri Jesukristu yainmakarti. ²⁴ Jesukristunu asakrumin atumin ashí ti aneajrume. Nu atí.

Papru KURINTIUNMAYA SHUARAN Ataksha papin aar akuptukma

Kurintiunmayq Yus-shuaran Papru áatramiania nu

¹ Wi Pápruitjai Jesukrístu akatramu. Yus nuna wakerakui ni akatramurí anaikiamuitjai. Ii yachi Timiutéujai Yus-shuar Kurintiu péprunam íruntrumna nuna áatjarme. Kame ashí Akaya nunkanam Yusna ajasurmena nunasha áatjarme. ² Apa Yussha, ii Uuntrí Jesukrístusha shiir enentáimturma ásar imiatkinchanum tuke shiir pujustinian yáinmakarat tusan wakerajrume.

Papru wáitsamurí

³ Ii Uuntrí Jesukrístu Aparí, ii Yusrí ana nuna naarí uunt awajsatai. Niisha ii Aparínti. In waitnentramaji. Tura Niisha ii Yúsrínti. Tuma asa in tuke atsantamji. ⁴ Ii wáitajnia nui Yuska in atsantamji. Tura in atsantamjinya nútiksarik iisha chíkich shuar wáitainia nuna atsankrarat tusa túrutmaji. ⁵ Warí, Kristu wáitsamurí núkap pachiinkiaitjinya núnisrik ni atsankramurín núkap pachiinkiaitji. ⁶ Tuma asamtai, wáitajnia nu, Yusa uwentikrampratniurí tura ni atsankratniurí atumsha takustarum tusar wáitaji. Tura Yus in atsantampramjinya nu, Yusa uwentikrampratniurí tura ni atsankratniurí átum takustarum tusar atsankramuitji. Wats, átum uwentikramu tura atsankramu asarum, ii wáitsajnia nútiksarmek wáitayatrum shiir enentáimsarum katsuntramniaitrum. ⁷ Tura “túrattawai” tu enentáimtajrume. Warí, átum iijjai métek wáitsaitrum. Núnisan iijjai métek Yus atsantamtsurmek.

⁸ Yatsurtiram, iikia Asia nunkanam ti itiurchat wáinkiamjinya nu nekaatarum tusar wakeraji. Imiá itiurchat wáinkiar iikia katsuntratin jeachmaji. ⁹ Nu itiurchatnumiá “iwiaaku jíinkishtatji” tu enentáimsamji. Túrasha “iikia tujinchaitji” tu enentáimtumatsuk, antsu jakamunmayan iniannia nu Yúsan enentáimtusarat tusa nu túrunamji. ¹⁰⁻¹¹ Jakamnia itiurchatnumiá Yuska uwentikrampramji. Tura yamaisha uwentikrampratajtsa pujurtamji. Tura atumsha in Yus áujtakrumniñkia “Yuska tuke uwentikramprattaji” taji. Tura untsurí shuar Yus aujsa asakrumin, ii uwempra asakrin untsurí shuar Yúsan yumñsartatui.

Kurintiunam wau wéchatniun Papru ujakmiania nu

¹² Yatsurtiram, ju nekaatarum tusar wakeraji. Ju nunkanam pujusar tura nekaska atumjai pujusar anantsuk tura Yus umírkar wekaimji. Aya ii nekatairijjaiñ wekaichamji. Antsu Yus in waitnentrama asa péñker wekasatniun yainmakmaji. Nu nekaar shiir enentáimji. ¹³ Áatjarmena nu páantaiti. Átum áujsarum nekaatin jearmena nunak aarjai. Chikichan nekaachminian aatsjai. Péñker nekaatarum tusan wakerajrume. ¹⁴ Ishichik nékayatrumek nú núkap tuke nekaki wetarum tusan wakerajrume. Nuñkia Jesukrístu tátinia nú tsawantai átum winia shiir enentáimtursattarme. Tura átum péñker wekasa asakrumin shiir enentáimtustatjarme. ¹⁵ Tura ii shiir enentaimtunij nuna nékakun ataksha Yusá waitnenkartutairí nekapsak tusan ataksha atumijn irastinian wakerimjai. ¹⁶ Masetúnia nunkanmaani wéakun írkuta nanikaikitjarum tusan enentáimmiajai. Tura wáketkuncha ataksha ístajrum tusan wakerimjai. Túramtai wi Jutía nunkanam weakui átum yáintkiatarum tusan atumin ístinian wakerimjai. ¹⁷ Nuñkia ¿urukamtai túrachmaj? ¿Péñker

enentáimtsukek “wetajai” tímiaj? ¿Wi Yus-shuarcha nunisan, jimiará chicham-tiniaiti, tú enentáimtursarumek? ¹⁸ Núchaiti. Yus tana nuna tímiatrusan umíana nútiksarik iikia ii chichame umiktai tusar wakeraji. Jú chichamaik, “Ee, atsá” tátsuji. ¹⁹ Wisha Serpanujai Timiutéujai Yusa Uchiri Jesukristunun ujakmajrume. Niisha jú chichamaik, “Ee, atsá” tíchaiti. Antsu nii tana nuna tuke umíawai. ²⁰ Niijjaiisha Yus tana nu tímiatrusan uminiui. Tuma asamtai Jesukristu enentáimtakur “nii tana nuna nekas túrattawai” tu enentáimji. Tu enentáimsar Yusa naari shiir awajeaji. ²¹ Atumniasha incha ikiakátmajnia nu Yúsaiti. Krístunu ajasu asakrin túrutmaji. Tura anaitiamak Niiniu awajtamji. ²² Tura ukunam ii achiktatjinia nuna, nekas amastatjai tusa Yus ni Wakanin ii enentáin apujturmajji. Nujai Níiniuitji tusar paant nékaji.

²³ Atumín itirchatan wáinkiaij tusan nakitiakun atumí péprurin Kurintiunam jeachmajai. Wáitrakuinkia “Yus iirsati” tajai. ²⁴ “Aya wi tájana nútiksarmek Yus enentáimtustarum” waantu enentáimtumasar nu titin nakitiaji. Yus nekas enentáimtusmaajai kakaarme. Antsu nekas warastarum tusar wakeraji.

2

¹ Tuma asamtai, atak kúntuts awajsajjrum tusan nakitiakun, “atumí tunaari íwiartsurminin jeashtatjai” tímiajai. ² Wi atumin kúntuts awajkuncha, ¿yaki winia waramtikrusat? Aya atumek, wi nuik kúntuts awajsamjarmena nuke waramtikrusminiaitume. ³ Wi jeakun atumí tunaari íwiartsurminin kúntuts enentáimsajj tusan nakitiakun, nu papin áarmaj nútiksarak áarmajai. Warí, atumketume winia waramtikrustin. ⁴ Nekaatarum. Nu papin áarmiajai. Kúntuts awajsatjarum tusan áarchamjai; antsu ti aneajrumna nu nekaatarum tusan wakerakun áatramajrume.

Yajauchin túrana nu tsankuratin

⁵ Túrasha kúntuts awajtusmia nu, aya wíniak kúntuts awajtuschamai. Antsu atumniasha ishichik kúntuts awajtamsayi. Patasa chichasajj tusan “ishichik” tajai. ⁶ Kame nu áishmankan iruntra chicharkarum wáitkiasmarum nuke máakete. ⁷ Antsu yamaikia tsankuratniuitume. Shiir enentáimtikratniuitume. Niisha imiá kúntuts pujus nú arant ajasáin tusarum túratniuitume. ⁸ Túrakrum nii nekas anearmena nu paant iniaktustarum tusan seajrume. ⁹ Kame “aajna nuna umirtukartimpiash” tímiajai. Kame nuna nekaataj tusan wakerakun nu papin nuik áatramjarme. ¹⁰ Átum tsankurearmena nú shuaran wisha núnisnak tsankureajai. Tura tsankuratin ákuinkia, wi tsankurajna nu ashí atumnian enentáimtusar, Kristu íimmianum túrajai. ¹¹ Kame uunt iwianch Satanás in emestampratajtsa wakerana nusha nékaji. Tuma asamtai, túrawain tusar tsankuratniuitji.

Trúas péprunam Papru juákchamiania nu

¹² Krístunu shiir chichaman Trúas péprunam etserkatajtsan jean, ti pénker takastinian wáinkiamjai. ¹³ Túrasha ii yachí Titiun wáinkiachu asan, shiir enentáimsatniun tujinkiamjai. Tura asamtai Trúasnumia aentsun áujsan ik-iukiaran Masetúnia nunkanam wémiajai.

Krístujai nupetkanniaitji

¹⁴ Kristu Jesusjai Yuska incha nupetmamtikramak ewekatmasuitji. Tuma asamtai Nincha ti shiir yúminsa pujajai. Tura kukují kunjúakui, ashí nékainia núnisan ii etserkamujai Kristu shiir chichamen Yuska ashí aentsun nekamtikiainiawai. ¹⁵ Kristu in pujurtamu asamtai Yusjai nekapsamka iikia kunjúaji. Ii kunjúajnia nuna uwentikramu ainia nusha tura

uwemtikrachma ainia nusha nekapramnia ainiawai. ¹⁶ Menkakatniunam weena nuka ii kun_kúajnia nuna jakamnia mejea nekapramji. Tura iwiaaku átinnium weena nuka iwiaaku átin kun_kúa nekapramji. Maa, nu túratniuncha ¿yaki jeá?

¹⁷ Kame untsurí aents kuítian achiktaj tusar Yusa chichamen yapajinia núniskechuitji. Antsu Krístunu ajasu asar, Yus akupkamu asar, Yus íimmianum anantsuk esetsar étsereaji.

3

Yamaram chícham najanamu

¹ ¿Nu tákurniñkia, “ataksha niñki waantu enentáimtumainiawai,” tu enentáimsarmek? ¿Chíkich túruinia núnisrik, “Ju áishman nekas Yus-Chichaman etserin áiniawai” tusa papí aarma atumin iniaktustinkiaitaj? ¿Chíkich iniaktustin nú papí atumin seatniukaitaj? ² Atsá. Átumka ii papiría núniskechukaitrum. Ii enentáin nu papí áarmaiti. Tura nú papí áujsatniua núnisan ashí aents atumí túramurí wáinkiar ii etserkamaj nu, Papru nekas Yusa takatrín takaawai tusa nekaamnia áiniawai. ³ Iis, tátsujak. Papí aarma núnisketrume. Nu papí Kristu áarmaiti tura iisha nú papí atumin súaji. Tíntiajainchu antsu iwiaaku Yusa Wakaníjjai áarmaiti. Kayanmasha áarchamuiti; antsu shuara enentáin, auka, áarmaiti.

⁴ Kame Krístunu asar, Yus enentáimta asar, nusha tímíniatji, taji. ⁵ Ju nékaji; imia iik penké tujinkiaitji. Antsu ii túrajnia nu Yus ni kakarmarín súramkurin túrajni.

⁶ Yamaram chichaman Yus najanamia nuna, incha péñker etserkatniun suramsaitji. Yaunchu aarma chichamnum, ashí takamtsuk umirkachrikiya tuke jakamniuyaji. Antsu yamaram chichamnum, Yuska ni Wakaníjjai yamaram wekasatniun súramji. Yusa kakarmaríjjai nu chicham étserji. ⁷ Yaunchu chichamnaka kayanam aar Yus Muisaisan susamiayi. Susamia nuj, Muisaisa yapi ti wincha ajasmiai. Túrunamtaí Israer-shuar ni yapin íistinian tujinkiarmiayi. (Túrasha nu wincha mushatmaki wémiayi.) Túrasha nu chichaman shuar umirkatniun tujintiakui, nu chichamsha aya tuke jákatniunam shuáran ejemiayi. Túmayatan winchajai susamuyayi. ⁸ Tura yamaram chichaman Yusa Wakaní súramna nu, nujjai nankaamas shíiraiti. ⁹ Kame mesertinnium ejeana nú chicham winchajai susamuyayi. Tura nujjai nankaamas Yúsnum ejeana nú chichamka Yus íimmianum péñkeraiti. ¹⁰ Iista; yamaram ana nu imiá shiir asa, yaunchu wincha amia núnaka mushatmamtikiui. ¹¹ Núkap arur pujuschamnia nu wincha áchamkia. Kame tuke átinia nuke nujjai nankaamas shíiraiti.

¹² Nu nékatur ti paant étserji. ¹³ Muisais túramia nútiksarik túratsji. Ii uuntri Israer-shuar ni yapin wincha ajas menkaan wáinkiarain tusa tarachjai ni yapin Muisaiska nukumakmiayi. ¹⁴ Tura nu arantcha Muisaisan anturkarmia nuna enentáisha nukukmauyayi. Nekaatniun tujinkiarmiayi. Tura yamaisha núnisan yaunchu aarma chichaman áujsam antukar nekaatniun tujintiainiawai. Kristu enentáimtuschatin ni enentáin nukukma nu yapajíáchmaiti. Aya Krístujai nuka yapajíámniaiti. ¹⁵ Yamaisha Muisaisa áarmarín áujsar nékainiatsui, ni enentáimmiari nukurkamu asa. ¹⁶ Tura aencha ni enentái yapajía Uuntna ajasmataikia ni enentáimmiariya nukurkamu ana nu jusamuiti. ¹⁷ “Uunt” tájinia nu, Yusa Wakaníiti. Uunt Yusa Wakaní pujana nuj ankant ajastiniaiti. ¹⁸ Nuke asamtai, iisha ii yapi tarachjai nukukchamu asar íspikia núnisketji. Uunt Kristu péñkeri iniakmaji. Kristu péñkeri nú núkap takaki wéakur, Krístujai métek ajastasa pujaji. Yusa Wakaníkiya nuna túrawai.

4

¹ Yus in waitnentrama asa ni chichamen etserkatniun ataktamsaitji. Tuma asamtai yawetsuk takaaji. ² Uuka túratin ana nuyá tura natsanmai ana nuyasha kanakmiaji. Anañkatai tusar wekaatsuji. Tura Yus-Chichamjai nakuratsji. Étserkur aya Yus-Chicham tana núchik étserji. Ashí aents nuna antukar, “nekas núiti Yus-Chicham” tiarat tusar túraji. Wi tájana nuna Yus nékawai. ³ Uwempratin Chicham ii étserjinia nu páantaiti. Áyatik menkakatniunam weena nu “páantchaiti” tuíniawai. ⁴ Uunt iwianch, ju nunká uuntri ana nu, nu aentsu enentáin ukusturuiti. Uunt Krístunu shiir chichaman ii étsermajai tsáapnin enentáimpraraín tusa ukustawai. Nu Kristu Yúsan ímiatrusañ nakumui. ⁵ Iisha étserkur, Jesukristu ii Úuntrinti tu étseraji. Iikia atumí úntrintji tátsuji. Antsu, Jesus ii uuntri asamtai, atumí yáintrintji, taji. ⁶ Yaunchu kiritin aan Yus tsáapin ati tusa tsáapnin awajsachmakia. Nú Yúsaiti ii enentáin tsaapnin awajtamsamia nu. Nu tsaapnijiai ni shiirmarin, Jesukristu iniakmia nuna, ashí aents nekaawarat tusar Jesukristunun étseraji.

Yusak enentáimtusar wekasatin

⁷ Nu tsáapin imiá péñker ana nuna ii ayashijn Yus ikiusuiti. Tura ii ayashj kakarmachu, nuwe najanamua áanin asamtai, warí, kakaram ájinia nu Yúsnumiachukait. Ii ai nuna nekaawarat tusa Yuska ni tsáapnintrin ii ayashijn ikiusuiti. ⁸ Tuma asamtai ii itiurchatri árentmaku árinin tuke jiinkimniaitji. “Itiurkatjik” taji, túrasha Yus yáinmaji. ⁹ Aents pataaturmainiakrincha Yus ikiurmatsji. Emesrataj tukamá tujintiainiawai. ¹⁰ Kame Krístun máataj tusa tuke wakeriarmia núnisan incha tuke mantamataj turamainiaji. Túrasha jákachu asar Kristu kakarmari ii ayashijn iniakmaji. ¹¹ Iisha Jesusna ajasu asar wekaajnia nuñ tuke tsawant tsúumainium jasattuk ajaji. Túrar ii ayashj jakamniaitiat nu ayashnium Jesusa iwiaakmari paant iniakmaji. ¹² Iisha Yus-Chicham étserkur ii ayashijn jasattuk ajaji, tuma aijn atumsha umikiu asarum nekas iwiaaku atin wáinkiarne.

¹³ Yus-Papinium yaunchu áarmanum: “Yúsan enentáimtusmajai, tuma asan etserkamjai” tátsuk. Iisha núnisrik Yus enentáimtusar wekaaji. Tuma asar étserji. ¹⁴ Yus kakarmaiti. Uunt Jesusan jakamunmayan iniantkimiai. Incha núnisan Jesusjai iniantamkittiaji. Tura atumjai métek ni pujamunam juramkittiaji. Nusha paant nékaji. ¹⁵ Atumsha untsurí aencha Yus-Chicham antukakrumin, Yus yáinmakurme. Tuma asamtai atumsha nútiksarmek Yus yuminsarum pujarme. Nujai Yusa naari uunt awajsamuiti. Nu nekaar wáitsatin ashamatsji. ¹⁶ Tura yaweatsji. Ii ayashj amuiki wéakuisha ii enentáinkia yamaram ajaki wéawai. ¹⁷ Warí, ukunam tuke shiir pujustatinia nu enentáimtakrikia, ju nunkanam wáitiajnia nu, ti itiurchataitiat, aya yamaiya asa tiikia itiurchatchaiti, tura wárik nankaamawai. Túrasha ii itiurchatrijiai Yuska ti shiir ana nuna amuukachmin ana nuna núkap suramsattaji. ¹⁸ Tuma asamtai wáinjinia nu ti enentáimtatsji. Antsu wáintsujnia nu nekas enentáimtaji. Wáinjinia nusha aya yamaiyaiti. Antsu wáintsujnia nuka tuke amuukachminiaiti.

5

¹ Wats ju nékaji. Nayaimpiniam ii shiir pujustinian amuukachmin ayashin Yus najanamun ikiurtamsaitji. Aents najanachmaiti nu. Tuma asamtai ii ayashj emesnakuisha warí itiurtamajia. Nuka aaka núnisan amuukamniaiti. ² Ju ayashnium pujusar wáitiaji, taji. Yamaram ayash nayaimpiniam pujana nu achiktai tusar wakeraji. ³ Ayashtichu ajasajj tusar, yamaram ayashtin

ajastaitсар wakeraji. Pushía núnik yamaram ayash in nukurmaktai tusar wakeraji. ⁴ Tura juí ayashjai pujusar wáitsar pujakur shiir enentáimtsuji. Arut pushí áiktinia núnisrik ju ayash ikiuktiaitsar tátsuji. Antsu yamaram pushí entsartinia núnisrik yamaram ayashnium tuke pujusmí tusar taji. Iista, ju ayash amuukachminkiait. Yamaram ayashnium pujusar tuke iwiaaku pujustatji. ⁵ Yamaram ayashintin ajastinian iwiarturmaruitjinia nu Yúsaiti. Tura nekas túrattajai tusa ni Wakanin suramsaitji.

⁶⁻⁷ Ju nékaji. Ju ayashnium pujajnia juinkia Uunt Jesusjai pujatsji. Tuma asamtai, wáinjinia nu ti enentáimtutsuk Yus enentáimtusar tuke shiir enentáimsar wekaaji. ⁸ Tura ju ayashniumia jíinkir Uunt Jesusjai tuke pujustaitсар wakeraji. Tura túrattaji tu nékaji. ⁹ Tuma asamtai ju ayashnium pujakrishá tura ju ayash ikiukrishá Uunt Jesus tuke waramtikсатаi taji. ¹⁰ Warí, ju ayashjai ii túramajnia nu ujakam, “pénkeraiti”, “yajauchiiti” Kristu turutit tusar, ashí iisha Uunt Kristui jeatniuitji. Tura ii túramujai métek akirmaktatji.

Krístun waramtikсатаj taji

¹¹ Tuma asamtai ju nékaji: Uunt umirkashtin ti tsúumainti. Nu nekaar ashí shuar Yus-shuaran awajsataj tusar ti takaaji. Tura incha Yus nékarmaji. Tura ii túramuri átumka atumí enentáin paant nékarme, tajai. ¹² Ataksha, “wi pénkeraitjai” tusar nu tátsuji. Antsu, ii túramu nekáa asakrumin enentáiniam ana nuna enentáimtsuk aya pátatkea nujai warainia nú shuar tsanumprut-mainiakui yaintkiatarum tusar taji. ¹³ “Wáurkaiti” turamainiajiash. Nusha warí, itiurtamajia. Ashí túrajnia nu, Yus aneakur tura atumin yáintai tusar túraji. ¹⁴ Kame ashí ii túrajnia nu Kristu anenkrattairijjai túraji. Kame ju nékaji: Kristu ashí shuaran jaruku asamtai, Yus íimmianum ashí iisha jaka núnisaitji. ¹⁵ Kristu ashí shuaran jaruk nantarkimiayi. Tuma asamtai Krístunam iisha iwiaaku pujajnia juí, iik wararmamtsuk, Kristu umirkatniuitji. ¹⁶ Tura yamaisha aya ni ayashi íirsar, “nu shuar pénkeraiti” tura “nu shuar yajauchiiti,” titin tujintiaji. Kame yaunchu aya ni ayashi íirsar “Kristu yajauchiiti” tu enentáimsamajai. Tura yamaikia yapajiár, esetsar enentáimkiur “Kristu Yusa Uchirínti” taji.

Krístujai yamarmaitji

¹⁷ Tuma asamtai, Krístunu ajasúka yamaram najanamuiti. Yaunchu enentáimtai ri menkakayi. Antsu núnaka íikias ni enentáimtai ri nekas yamarmaiti yamaikia. ¹⁸ Nunasha Yus túraiti. In nawampramkattsa Krístun akupturmakuitji. Tura nu etserkatniun incha ataktamsaitji. ¹⁹ Yuska in tunaarinniutin asutiámatniun nakitiak Krístujai nawampramkamajai. Tura incha Yus-shuartin nu ujaktinian ataktamsaitji. ²⁰ Krístunu ataksamu asar, Yuska “winia Uchirjai nawamnaikiatarum” tusa ii wenejai atumin seatmarme. Tuma asakrin, Kristu náariin “túrarum” tájarme. ²¹ Krístuka tunaan penké túrachmiayi. Túmanak ii tunaariin Yus Krístun makuumiayi. Nuna tura Krístunam makuuchmin awajtamsamajai.

6

¹⁻² Ni Papiriin Yus yaunchu Isayasan juna tímiayi:

Tsawant jeamtai, ame seatmena nuna anturkamjame. Uwempratin tsawant jeamtaisha yainmajme.

Wats yamaikia Yus seatin jeayi. Yamái Yúsnum uwempratin jeayi. Tuma asamtai, iikia Yusa takatrín pachitkiajnía nu, Yusa anenkrattairi pénker achiktarum tusar seajrume. ³ Tura “Papru etserkamuri ántraiiti” tíraíin tusar

chíkich yajauch enentáimtiktsuk péñker wekaaji. ⁴ Nekas Yusa takarniurintji nuna paant nekaawarat tusar wáitiayatrik, atsumayatrik, itiurchatnum pujayatrik shiir katsunteaji. ⁵ Ju itiurchat wáinkiamji: katsumpramkarmaji; sepunam enketmáwarmiaji; charáa-charáa awajtamiarmiaji; takatcha ti itiurchat takasmiaji; kanutsuk pujumiaji; tura tsukasha ti tsukammiaji. ⁶ Tunáa nakitrar wekaaji; Yus-Chicham unuimiátraitji; shiir enentáijiaj katsuntrar wekaaji. Chíkich shuar péñker awajeaji; Yusa Wakaní pujurtamkurin shuar nekas aneaji; ⁷ nekas chicham ana nu étsereaji; tura Yusa kakarmarisha nú paant iniakmaji. Tura ni nemasrín nupettukajín tusa suntar ni tantarín júana núnisrik iisha ii nemasrí íwianch nupettamkajj tusar ii Yusrí tuke umirkar wekaaji. ⁸ Shuar shiir enentáimturmainiakrincha, yajauch enentáimturmainiakrincha, péñker chichartamainiakrincha, yajauch chichartamainiakrincha tuke Yusjaj shiir wekaaji. “Wáitruiniawai” turamainiakrincha tuke nekas chichajaji. ⁹ “Nu aents nékatsji” turamainiakrincha Yusnumka nékanji; jákatin tsúumainnium wekayatrik tuke iwiaaku pujaji; asutiámuitiatrik mantamnatsji. Yusa takarniurintiaj nu ashí nujaj paant nekaamniaiti. ¹⁰ Kúntuts pujayatrik ii enentáinkia waraaji; kuítrinchaitiatrik chíkich shuar kuítrintin awajeaji; penké takakchiatrik ashí wáinji.

¹¹ Yatsurtiram, Kurintiunam pujarmena nu, ashí paant ujakchamkajrum. Ti aneajrumna nu nékarme. ¹² Wikia atumin paant chichastajtsan wakerajrume; antsu átumka anenttsuk paant chichastin nakitrarme. ¹³ Winia uchirua núnisnak chichajjrume; wi tuke paant chichaarjarmena núnisrumek atumsha atumí enentáin ana nu, paant ujakatarum tusan seajjrume.

Yusa jeentji

¹⁴ Yus-shuar Yus-shuarchajaj tsaniñktinian enentáimsashtiniaiti. Warí, ¿Yusan umirna nú shuar, iwianchin umirna nú shuarjaj métek enentáimiainiawak? ¿Tsáapnisha kiritjaj máimtek áminkiait? ¹⁵ ¿Kústuka uunt iwianchjaj nawamnaikiamniakait? ¿Yus-shuar Yus-shuarchajaj tsaniñ shiir pujusminkiait? ¹⁶ ¿Iwiaaku Yusa jeencha ántar-yus pujustinkiait? Tura atumsha iwiaaku Yusa jéentrume. Yus Niñki ni Papirijn júna tíchamka: Niijjaj tsaniñkia pujusan, niijjaj wekasartatjai tura ni Yusrí átatjai; tura niisha Wíi aents ajasartatui.

¹⁷ Tuma asamtai junasha tímiayi:

Nii matsatainia nuyá jíinkitiarum, tura nijya kanaktiarum, tawai Uunt Yus; tura yajauch ana nu antinñkaiarap. Túrakrumninkia awayattajjrume.

¹⁸ Tura atumí Aparj átatjai; átumka winia uchir átrume. Nuna Wi imiá kakaram uunt Yus asan tajai. Tu áarmaiti.

7

¹ Tuma asamtai aneamur yatsurtiram, nusha, Yus tímia nu, in túramji. Nu tuma asamtai ii ayashí tura ii enentáisha yajauch ajasajín tusar, ashí tunáa ana nuyá kanaktiniaitji. Túrar “Yusak nekas ii úntrinti” takur, ii ayashísha, ii enentáisha takamtsuk tuke tsawant Yus íktustiniaitji.

Kurintiunmayá shuar enentáimprarmatai Papru warasmiayi

² Ataksha nawamnaikiatai. Iikia shuar yajauch awajsachmaji; yajauch jintintrachmaji; anañkachmaji. ³ Makuutai tusan nuna tátsujaj. Antsu nuik tíchamkajrum, iwiaaku pujakrishá jakarsha átumka ii enentáin áchitkiarme. ⁴ Araantutsuk áatjarme; shiir enentáimjai. Itiurchatnum pujayatnak, atumin enentáimtusan enentairuí kakaram enentáimsan waraajaj.

⁵ Jui Masetúnianum penké ayamprachmaji. Antsu ti wáitsamji. Áentsnumia itiurchat wáinkiamji, tura ii enentájjiaĩnkia ashamkamji. ⁶ Tura kúntuts pujakrincha Yus ikiakátmartinian nékawai. Tuma asamtai Titiún akupturkamai. Nujai winia enentáirun ikiakármai. ⁷ Tura átum nii ikiakármarumna nuna Titiu ujatkamai. Nuna antukan ti warasmajai. Títiuka átum írsatin wakerarmena nuna ujatkamai; túrunamia nuna kúntuts enentáimmiarumna nusha, tura winia anentu asarum enentáimturumna nuna ujatkamai. Nuna antukan nú nankaamas warasmajai.

⁸ Papí nuik akupkamaj nu áujsarum kúntuts enentáimprarme; núnaka nékajai. Túrasha ii akupmainchu túraitjai tátsujai. Eta, nuikkia tímiajai, túrasha yamaikia tátsujai. Papí áujsarum ishichik kúntuts enentáimprarumna nuna nekaan waraajai. ⁹ Kame kúntuts enentáimprakrumin waraatsjai. Antsu atumí tunaari nekaarum kúntuts enentáimprarum atumí enentái Yusjai yapajjá asakrumin nuna nekaan waraajai. Kame Yus wakerana nútiksarmek kúntutsrum katsuntearme; tuma asamtai iikia nu papijjai yajauch awajsachji. ¹⁰ Nekaatarum. Yus wakerana nútiksañ kúntuts katsunteakka ni enentái Yúsnum yapajjáwaj. Nuĩnkia ni tunaariya uwempraiti. Nuka “túrurmainchu túraitjai” tíchamniaiti. Antsu Yusan enentáimtusuk kúntuts pujakka ni enentái yapajjáshatui; yapajítsuk ni tunaariya uwemtsuk jakattawai. ¹¹ Tura iistarum; Yus wakerana nútiksarmek atumí kúntutsrj katsuntearme. Tuma asarum wi áatjarmena nu esettsarum enentáimtusurme. Atumí túramurj ujatkatajtsa wakerimiarme. Tura nu tunáa nakitramarme; tura ashamkarmarme. Tura yajauchin túramia nu asutiámarme. Tura winia anentu asarum wi timia tímiatrusrumek turatai tusarum ti wakerimiarme. Nu tura asakrumin péñker túrarmena nu, paant iniakmarme. ¹² Kame yajauchin túramia nuna ni tunaarin iniaisat tusan wakerakun, tura wáitias pujumia nu atak shiir enentáimsati tusan wakerakun nu papin áatramjarme. Tura nú nankaamas átum Yúsnum in anearmena nu nekamatarum tusan áatramjarme. ¹³ Atum umikiu asarum waraakrumin iisha shiir enentáimji. Tura shiir itiaamarumna nuna Titiu waraak ujatkamtai nú nankaamas shiir waraaji. ¹⁴ Atumin shiir enentáimtajrumna nuna Titiun ujakmajai. Tura nuna nekas aan Titiu nekaamai. Tuma asamtai atumin natsantrachmajrume. Kame atumin tuke nekas ana nuna tímiajrume. Núnisan atumnian Titiun tímiaj nusha nekasauyi. ¹⁵ Tura Títiuka atumin enentáimturmas ti waraawai. “Ji-atmaktajtsa winiatsuash” tusarum ti ashamkachurmek. Túmayatrum, nii péñker tati tusarum pachischarmek. Tura nii taa seatmarmena nu umikiurme. Títiuka nuna enentáimias waraawai. ¹⁶ Tura wikia, átum péñker túramurmin nekaan tura péñker túrawartatui tu enentáimsan waraajai.

8

Yus-shuarti ii kuitri súsatin

¹ Yatsurtiram, Masetúnia núnkanmaya Yus-shuaran Yus waitnentainia nuna yamá ujaktatjarme. ² Ti itiurchatnum nekapsamu ainiawai. Túmayatan warainiawai. Tura ti kútrincha áiniyatan emeentutsuk kútrinñia núnisañ suiniawai. ³ Juna wi paant nekaan ujaajrume. Niisha wakeramujai súsatniun jeainia nuna súiniawai; tura nú nankaamassa súiniawai. ⁴ Yus-shuaran kútrinchan súsartaitsa ti wakeruiniak, nu túratniun ti seatmarmaji. ⁵ Tura ii enentáimmiáj nú nankaamas túrawarmiayi. Emka Yúsnum niñki sumamawarmiayi. Tura Yusa wakeramurj túratjai tusar incha “yáintajrume” turammiajai. ⁶ Tuma asamtai, “Masetúnia nunkanam kuit júuktin nankamamamna nu, Kurintiu peprunmasha amukta” tusar Titiu

seamiaji. ⁷ Atumsha ashí pé_nker túratin ti nékarme. Yus enentáimtustincha, unuiniartíncha, ju nu_nkanmaya nekaatniusha, in aneatniusha nuka ashí nékarme. Wats, ju_sha túratarum. Yus-shuar kuítríncha ainia nu achikiarat tusarum Titiu támatai núkap susatarum.

⁸ Kame atumí úuntriá núnisnak akupeatsjarne, túratniuitrume tusan. Antsu chíkich shuar ni kuítrín susartasa ti wakeruinia nuna atumin ujakan, atumí anenkrattairi nekaspashi tusan nekapsatajtsa pujajai. ⁹ Ii uuntri Jesukrístu waitnenkartutairi nékarme. Ashí takakuyayi, tura atumin anenma asa kuítríncha núnisan ajasmiai. Ju nu_nkanam kuítríncha núnis ajasmatai átum nayaimpiniam kuítriniak tusa túramiai.

¹⁰ Ju_na enentáimjai. Nuik uwitin, “yáintatji” tíchamkarum. Tura nu túratin ti wakerimiarme. ¹¹ Nan_kamamarmena nu yamaikia amuktarum. Nuik ti wakerimiarmena núnisrumek yamaisha súsatin jearmena nu susatarum. ¹² Iistarum. Ni kuítrín Yúsan nekas susatajtsa wakerakuí_nka, nii jeana nuna susat tusa Yus wakerawai. “Jeana nú nan_kaamas susati” tátsui Yus.

¹³ Chíkich ti núkap susarum atumnia táasat tusan tátsujai. ¹⁴ Antsu ashí métek takusarat tusan tajai. Iis atumsha yamaikia ti nukap takakrume; nu_jai atsuma nu súsatniuitrume. Ukunam chíkich tsawantai átum atsumashtarmeash. Nu_nka niisha atumin suramsarti. Nu túratin áku_nka ashí métek takustin átatui. ¹⁵ Yusa Papir_iin yaunchu áarman núnis tátsuk: Núkap takusmia nu ampirchamiayi; tura ishichik takusmia nu atsumachmiayi.

Titiu chíkich Yus-shuarjai Kurintiunam wetin ármiai

¹⁶ Tura wi aneajrumna núnisan atumin aneatniun Yus Titiun susamiai. Tuma asantai Yúsan yum_insan pujajai. ¹⁷ Iis, wi takui wétinian wakerimiayi. Tura nú nan_kaamas, atumin anenma asa, ni enentáij_iin wéawai.

¹⁸ Tura chíkich Yus-shuar Titiujai akupkatajtsa pujaji. Nu shuar Yusa Chichamen ti pe_nker etserainakui, ashí Yus-shuar iruntramunam nin pé_nker áujmatainiawai. ¹⁹ Tura nú shuarnaka ii tsaniakmar_i atí tusar ashí Yus-shuar iruntramunam nuna anaikiarmiayi. Iijai kuítian jukiarti tusar anaikiarmiayi. Iis Yusa náar_in ashí aents uunt najanawarat tusar tura ashí shuar atumí tsan_kar_in nekaawarat tusar nu takat túratsjik. ²⁰ Iis, ju kuit ii jukittiajnia nu, núkap asantai, aents tsanumprutmawar_{aj} tusar, Titiujai tura ju shuarja_isha wéaji. ²¹ Yus ímmianumsha, aents ímmianumsha ii naka wekaajnia nuna nekaawarat tusar túraji.

²² Nu jimiará shuarjai chíkich Yus-shuar akupeaji. Yusa takatr_in takastasa ti wakerana nu nekas nékaji. Tura átum yáintin ti wakerarmena nuna nekáa niisha atum_in jeataj tusa ti wakerawai. Nuna túmak Yusa takatr_in takastinian wakerana nuna paant iniakmawai. ²³ Tura ajsha chíkich shuar Titiun nekaataitsar aninruiniakuisha, “Titiu Papru tsaniakmar_inti. Incha yáinmaktajtsa Páprujai takaawai” titiarum. Chíkich Yus-shuaran nekaataitsar aninruiniakuisha, “Yus-shuar akupkamu áiniawai, tura Kristu náar_in shiir awajin áiniawai” titiarum. ²⁴ Tura atumí anenkrattairi ashí Yus-shuar nekaawarat tusarum, nu shuar pé_nker itiaatarum. Nu túrakrum, atumnia ii shiir tímiaj nu nekasaiti tu iniaktustatrume.

9

Yus-shuaran kuítrínchan súsarmia nu

¹⁻² Kame átum Yus-shuar kuítríncha súsatin wakerarme; nuna nékajai. Tuma asan núnaka áatrachminiatjarne. Atumsha súsatin wakera asakrumin wi nunasha shiir enentáimsan, “Akaya nu_nkanmaya shuar nuik uwitina

wakerusmatak yáintinian wakeruiniawai” tusan Masetúnianmaya shuáran ujaajai. ³ Tura “kuítniasha súsatniun ti wakeruiniawai” tímiaj nuna, “wáitiaiti” tíraín tusan nakitiajai. Tuma asan, kuit susatajtsa wakerarum nu iwiaratarum tusan nu menaintiu Yus-shuaran nuna yáinmakarat tusan emka akupenajai. ⁴ Wi ukunam Masetúnianmaya shuarjai atumiin jean, kuit súsatini tímiarmena nuna iwiarachman wáinkian natsaraj tusan, tura atumsha natsarairum tusan túrajai. Warí, “súsatniun ti wakeruiniawai” tuke tu wéatsjak. ⁵ Nu tuma asantai, au takui súarme tu enentáimsarain tusan ju Yus-shuaran emka akupenajai. Niisha nu kuítian iwiaratniun yáinmakarti, tajai. Nuinkia wisha Masetúnianmaya shuarjai ukunam jeawakrin, nu kuit atumsha nekas atumí enentáijjaink' súsatini wakerarmena nu nekaamnia átatui.

⁶ Tura junasha paant tájarme: ishichik araana nu ishichik júuktatui. Núkap araana nusha núkap júuktatui. Kuit súsatniusha núniskete. ⁷ Tura ashí shuar ni enentáin enentáimsana nunak susati. “Nakitiayatnak susatjai” tíchamniaiti. “Turutainiakui susatjai” tíchamniaiti. Shiir enentáimias súana nuna Yuska shiir enentáimtawai. ⁸ Ashí pénker ana nuna suramsatniun Yus tujintiatsui. Nujai átum atsumashtatume. Tura chikichan yáintin núkap takustatume.

⁹ Yus-Papinium ju aarma awai:

Kuítrinchan núkap susayi;

nuna tura, tuke túratin átatui.

¹⁰ Arakmaun araakan súana nusha Yúsaiti. Tura yurumkan súana nusha Yúsaiti. Niisha átum pénker araatniun suramsattarme. Tura araarumna nujai pénker túratarum tusa araakrumin ipiampartatui. ¹¹ Tuma asantai núkap juukma takaku asarum, núkap súsatini jeattarme. Nuinkia súarmena nuna ii uwejeyan chíkich Yus-shuar achikiar Yúsán yuminsartatui. ¹² Warí, ju kuit Yus-shuar kuítrinchá súakrin ni atsumamuríncha atsumachartatui. Tura nú nankaamas Yúsán ti yuminsartatui. ¹³ Nu shuar yáintai tusarum tura ashí Yus-shuar yáintai tusarum súatsrumek. Nujai Kristu shiir chichamen umiarmena nuna nékainiawai. Tura kuítrum emeentutsuk sua asakrumin niisha Yusa náarin uunt awajsartatui. ¹⁴ Kame Yus atumin ti waitnentramainiakui kuítrum súatsrumek. Sua asakrumin nu shuar atumin ti anenmainiak Yúsán áujturmasartatui. ¹⁵ ;Tura ashí iisha ii Yusri ti yuminsatniuitji! ¿In súramjinia nuna yaki jintíartinian jeá?

10

Papru nekas jintintiamniaiti

¹ Wats, “Papru iijjai pujak péejchach ajawai, tura yajá pujak kakaram chichaawai” chíkich shuar turutainiatsuk. Kame imia wiki Papru Kristu anenkartutairijjai juna seatjarum tusan pujajai. ² Atumí weatkamuriya shuar chichainiak “Papru ni tsaniakmarijjai ju nunkanam akupin ajastai tusar wakeruiniak jintintiniawai” turutainia nuna kíishtumaktajtsan enentáimjai. Wisha atumiin jean kakaram chichaschataj tusan, nu antukairap tu seajrume. ³ Áentstanaka nunkanmaya áentsuitji, túrasha jú áents maania aintsar máaniatsji. ⁴ Ju nunkanmaya nan kijjai máaniatsji antsu ii nan kirij Yusa kakarmarinti. Nujai iwianchi kakarmari núpeteaji. ⁵ Ju nunkanmaya aentsu jintiamurinkia tura waantu enentáimtumamurinkia, Yus nekaatniun itit awajea nuka, nu nan kijjai núpeteaji. Tura ashí ju nunkanmaya enentáimsatin yapajniak, emetamu áintsan, Kristun umirkarat tusar nu nan kijjai núpeteaji. ⁶ Nekas umirkatin átum jeawakrumniinkia nuinkia umirkatniun tuke nakitiainia nu, Yusa kakarmarijjai asutiáttaji, tajai.

⁷ Atumsha aya pátatek ana nu iiyarme. Wats, shuar nekas Krístunu ajasman nekamaka, núnisan winiasha Krístunuiti tu enentáimtusar niuuiti. ⁸ Yusa kakarmarijiaí akupeaji tuke tákuncha natsaamatsjai. Nu kakarman atumin péñker jintintiatarum tusa Kristu suramsaitji. Kame atumin emesratniun suramsachuitji. ⁹ “Ni áarmarijiaí awaktamkatajtsa wakerutmaji” tátsurpash. Núchaiti. ¹⁰ “Papru áarmari ti kakaram áiniawai, tura juí pujak kakarmachuiti; tura etserkatniuncha nékatsui” turutainiawai. ¹¹ Wats, tuinia nuka junasha nekaawarti. Yajá pujakur kakaram áajinia núñisrik atumjai pujakrishakakaram túrattaji.

¹² “Wiki imiá péñkeraitjai” tuinia nujai méteketji tátsuji. Ní shuaraitji tátsuji. Warí, niisha imia niñki nekapmamainiawai. Tura ni ai íisar “nu nankaamas péñkeraitjai” tu wéenawai. Nuna túruiniak netse túruiniawai. ¹³ Antsu iikia, ii nekamatín jeajnia nú nankaamas waantu ajaschattaji. Ii takastatjina nui Yus Niñki jintinramji. Nu arant wéatsji. Kame atumiin takastinian Yus tsankatramkaitji. ¹⁴ Tuma asamtai, tájina nu Yus tsankatramka nú iniankas túratsji. Warí, iisha emka Kristu chichamejai atumiin jeachmakaji. “Emka jeamji” tájina nu ántar tátsuji. Kame Yus tsankatramakrin jeamji. ¹⁵ Chíkich takasmanum iikia waantu enentáimtumasar, “ii takatrínti” tátsuji. Antsu yamá enentáimtarmena nú nankaamas Yus enentáimtustarum tusar wakeraji. Nu túrakrumninkia atumiin tuke takasminiaitji. ¹⁶ Nuyasha chíkich takaana nui takatsuk átum pujarmena nú arant pujuinia nusha Yus-Chicham ujaktaj tusar wakeraji. Nu túrar chíkich shuar takasma “íiniuiti” tíchattaji.

¹⁷ Tura péñker enentáimtumastaj tusa wakerakka, Yúsnaítjai tusa péñker enentáimtumasti. ¹⁸ Warí, niñki “péñkeraitjai” tumamna nuka anturkachimiaiti. Antsu Uunt “péñkeraiti” tana nú shuar nekas péñkeraiti.

11

Ántar etserniun Papru áujmateawai

¹ Waurua núnisnak chichastatjana nu anturtukaintrumeash. Ee, anturtuktarum tusan seajrume. ² Atumniasha Krístunak anajmamtikrajrume. Tura nuwá chíkich áishmankan nékatsuk ni áishrijaink' nuatnaiya núnisrumek átum chikicha chichame umirtsuk aya ni chichamenk' umiakrumin Krístuú ejetaj tusan wakerajrume. Nuna túrataj tusan atumin akasmataj rume. Nu akasmaktinian Yus surusuiti. ³ Túrasha íwianch ni nekatairjiaí emka nuwá Epan anankamia nútiksán atumniasha Yusa jintiya awajimtikramar Kristu aneashtinian enentáimtikramprarmatai anankamu airum tusan tsuutarjume. ⁴ Warí, chíkich shuar Jesusnan nusháa étserkamujai táiniakuisha péñker ántarme. Tura nusháa wakan achikiam, nusháa chichamjai uwempramniaiti tu etserainiakuisha, nekasapitia tárume. ⁵ Kame “Yúsnumia akatramu asar etserkatin imiá nékaitji” tuinia nujai nankaamas nékaitjai, tu enentáimjai. ⁶ Ti péñker chichastinian nékachiatnak winia nekaatairsha taamtsui. Núnaka ii túramurijiaí tuke paant iniakmaji.

⁷ “Akirkata” tútsuk Yus-Chichaman atumin ujakmajrumna nui ¿tunáa túrajak? Átum ankant ajastarum tusan wikia péejchach ajasu asan, “etserkamunam akirkata” tíchamjarme. ⁸ Antsu atumin yáintaj tusan pujakun chíkich Yus-shuarnumia kuítian suruiniakui achikmiajai. Nuna túran ni kuítrín emeentukmiajai. ⁹ Tura atumjai pujusan atsumaknasha atumniaka seachjarme. Masetúnianmaya Yus-shuar taar, wi atsummiajna nuna surusarmiaiyi. Nu tuma asamtai tájarme, seachjarme tura seashtatjarme. ¹⁰ Ashí Akaya nunkanam nuna ujaktinian suritrukchartatui. Nuna tákun Kristu nekasrijiaí

tajai. ¹¹ ¿Urukamtai nuna taja? ¿Atumin aneachu asanak taja? Atsá. Aneajrumna nuna Yus nékawai.

¹² Túrasha wi túrajna nuna tuke turu wétatjai. “Papru túrana núnisrik túraji” tuinia nuna tíaraj̄n̄ tusan túrattajai. ¹³ Warí, niisha Yúsnumīa akatrachma áiniawai. Anan̄kartin áiniawai. “Kristu akatramur̄int̄ji” tumá átaj tusar wekainiawai. ¹⁴ Nusha urukaku túmait tíchamniaiti. Warí, imia Satanáskesha “nayaimpinmaya akatramuit̄jai” tumá átaj tusa wekaatsuk. ¹⁵ Nuin̄kia imia ni suntar̄isha péñkeran túrawai tumá atai tusar wekasachartinkiait̄; túrasha ni amuamur̄inkia tunáa túriarma nuj̄ai métek nekapmá asutiátin átatui.

Papru wáitsamia nu

¹⁶ Ataksha tájarne “wáurkaiti” tu enentáimtursacharti. Kame “wáurkaiti” tu enentáimturiatrumek, chichastin tsan̄katruktarum. Ishichik waantu enentáimtumastaj tusan wakerajai. ¹⁷ Tura waantu enentáimtumastaj tájana nu, Uunta tsan̄katramur̄ij̄j̄ai tátsujai. Antsu waurka núnisnak chichaa-jai. ¹⁸ Untsur̄i j̄u nun̄kanam uunt ajasar ti waantu enentáimtumainiakui wisha ishichik waantu enentáimtumastatjai. ¹⁹ Imiá nékayatrum waurka ainia nu shiir enentáimtusum ánturearme. ²⁰ Niisha atumin takamtikramainiakui sha, kasartamainiakui sha, atumí nérenniur̄i ajainiakui sha, ya-jauch chichartamainiakui sha, yapimin awattamainiakui sha ashí nu kat-suntearme. ²¹ Natsamayatnak tájarne j̄ikia nu túratin kakarmachuuji! Wats, niisha araanainiatsna nuna wisha araantatsjai. (Waurka núnisnak chichaa-jai.) ²² Niisha Ipr̄iu-shuar áiniakuisha wisha núnisnak Ipr̄iu-shuaraitjai. Israer-shuar áiniakuisha wisha núnisnak Israer-shuaraitjai. Apraáma weetri áiniakuisha pai, wisha núnisnak. ²³ Kristu takarniur̄int̄ji, tuiniaawai. Wikia auj̄ai nan̄kaamasaitjai. Kame nuna tákun waurka núnisnak chichaa-jai. Kame niij̄j̄ai nan̄kaamas takasuitjai; niij̄j̄ai nan̄kaamas asutiámuitjai; niij̄j̄ai nan̄kaamas sepunam en̄keamuitjai; ti núkap j̄an̄inkiamjai. ²⁴ Israer-shuar chikichkí achirkacharmai. Antsu tímiajni sen̄ku jea achirkarmai. Tura emka achirkarmia nūi awa-awatatkuwa trainta nuiwi ejeyarmiayi. Tura nu tímiajni sen̄ku jea achirkarmia nūisha nútiks̄an̄ nuj̄ai métek awatturarmiayi. ²⁵ Numij̄j̄ai menaintiú awatturarmai. Kayajāisha mantuatai tusar chikichkí tukurarmai, kanusha menaintiú wayamāi wi en̄kempran wekaimiaj nūi. Tura nayaantsanam ajapén chikichik kashi nūi pujusan tsawarmajai tura nu tsawantcha tuke pujusmajai. ²⁶ Ti nukap wekasaitjai. Tura entsá wekasan tsúumainian wáinkiaitjai. Tura kasa shuarjāisha, wí shuarjāisha tura yajayā shuarjāisha tsúumainian wáinkiaitjai. Péprunmasha, kampuniunmasha, nayaantsanmasha tsúumainian wáinkiaitjai. Wait Yus-shuarsha yajauch awajtustaj tusar wakeriarmai. ²⁷ Itiurchatnasha ti wáinkiaitjai; takatnasha ti takasuitjai. Ti untsur̄i kánutsuk pujusuitjai. Tsukamaknasha, kitiamaknasha wáitsaitjai. Ti ijiarmaitjai. Pushir táasmatai tsetsekrūj̄ wáitsaitjai.

²⁸ Tura nuna nan̄kaamas, kaarka kijin júkitniua núnisnak Yus-shuar péñker wekainiawash tusan ashí tsawant ti enentáimsan pujajai. ²⁹ Chikichik Yus-shuar kakarmachu pujakui wisha kakarmachu nekapeajai. Shuar chikichan tunaanum ajuawarmatainkia wisha natsamakun kajekan wáitajai. ³⁰ Maa, waantu chichastin ákuin̄kia, antsu winia kakarmachu awajtuinia nuna ujakan waantu ajasaintjai. ³¹ Yus, ii Uuntrī Jesukristu Apar̄i ana nu (ni naar̄i tuke shiir awajsamu atí) wi wáitratsjana nuna nékawai. ³² Tamasku péprunam puj̄ai nu nun̄kanmayā akupin winia jinkiā juruktiaj tusa wakerak pepru tanish téntakma wáitirīin̄ suntaran apujusamiayi. Aretas uunt kapitián puj̄ai túramiayi. ³³ Túrasha uunt chankinnium en̄ketawar pepru aa tanishrīi áan̄kamunam j̄iki itiararmiayi. Tu uwempramajai.

12

Papru wáinkiamia nu

¹ Kame wiki shiir chicharmamsatniun nakitiajai. Túmayatnak ímiarjana nuna tura uunt Yus iniaktursamia nuna ujaktiniaitjarne. ² Krístun umirin ana nú áishman kan nékajai. Nu áishman jimiará nayaimpin nan kaikin menaintiú nayaimpiniam junakniuiti. Nusha katurse uwí nan kaamasuiti. Kame ayashtiuk wakaashit, tura ayashtichu wakaashit. Núnaka nékatsjai; aya Yúsak nékawai. ³ Tura nekas junakniua núnaka nékajai. Ayashtiuk wakaashit, ayashtichu wakaashit, núnaka aya Yúsak nékawai. ⁴ Yus-shuara wakaní shiir pujutainium junakmiayi. Nuisha paant awajsachmin ana nuna antukmiayi. Nii antukmia nú chicham paant awajsatniun suritkiamuiti. ⁵ Nu áishman ka túrunamuri nan kaamakuiti tajai. Tura wikia nan kaamakuitjai túmamtsuk, kakarmachuitjiana nuna paant ujaajai. ⁶ Nan kaamakuitjai túmamtiaj tusan wakeraknaka nekas tíminiaitjai, ántran tíchaintjai. Túrasha túratsjai. Winia túramuruk wáinkiarum winia chichampruk antukrum, waritia enentáimsarum nujai métek enentáimtursatarum tusan wakerajai.

⁷ Wi nayaimpiniam wáinkiamajna nu timiá péñker asamtai ántar waantu enentáimtumaschatniun, jan ki mesertinia núnisan winia ayashruj najaimiatniun sunasmiajai. Nuka wi wáitsatin Satanásnumia akupkamuiti. ⁸ Nuka jurutkia tusan Úntan menaintiú seamjai. ⁹ Tuma ain Uunt winia turutmiayi “Atsá. Jaa pujayatmek winia waitnenkartutairjai shiir pujame. Shuar kakarmachun winia kakarmarun Wi suakui ashí aents nu shuara ayashiin winia kakarmarun wáiniainiawai.” Tuma asamtai, Krístu kakarmari winia ayashruj paant ati tusan kakarmachuitiatnak araantatsjai. ¹⁰ Tuma asamtai, wi Krístun aneakui shuar katsekruiniakuisha, kajertuiniakuisha, winia kuítrusha, kakarmarsha atsain waraajai. Kame ashí itiurchat ana nui kakarmachuitiatnak kakaram nekapeajai.

¹¹ Wi “péñkeraitjai” túmamkun waurua núnisnak chichaajai. Tura atumsha winia péñker chichartusminiaitiatrumek, túrachu asakrumin tu chichasjai. Warí, wi penké ántraiatnak, “ti péñker akatramuitji” tumamainia nú nunkaachichuitjai. ¹² Atumjai pujumiaj nui, itiurchat ámanman katsuntran takasmiajai. Yuska ni kakarmarin iniakmastaj tusa ti uuntan aents tujintiamun túratniun surusmiayi. Nujai “Papru nekas winia akatramuruiti” tusa paant iniakmasmiayi. ¹³ Warí, chíkich Yus-shuaran yáinmiaj núnisnak atumniasha yáinmajrume. Áyatik atumin “kuit surusta” tíchamjarne. ¡Nu yajauchiitkiuin kua tsankurturtarum!

Papru atak tátinrin ujakmiania nu

¹⁴ Jújainkia menaintiú iwiarnarjai atumin íistaj tusan. Tura jeaknaka, “etserkamun akirkatarum” tíchattajrume. Atumí kuítrin wakeratsjai. Antsu atumin wakerajrume. Warí, winia uchirchakaitrum. Uchisha aparín kuitian ikiauntukchatniuiti. Antsu aparí ni uchirín kuitian ikiauntuktini-aiti. ¹⁵ Atumniasha yáintaj tusan ashí takakjana juna ajapawaintjai, tura winia kakarmarnasha ashí emenkákaintjai. Wi ti wakeramaitiatrum átumka ishichik wakerutarminin túrawaintjai.

¹⁶ Túrasha chíkich shuar chichainiak “Nekasaiti; Papru nin ki ii kuítrin jurutramkichmaji. Túrasha anankartuatniun neka asa in anankramachmiashia” turutainiatsuk. ¹⁷ ¿Nusha itiura? ¿Shuáran wi akupkamaj nujai kuítrumin achikjak? ¹⁸ Atumin íirmasat tusan Titiun “wetá” tímiajai. Tura nin atampriit tusan chíkich Yus-shuaran akupkamjai. ¿Titiusha

kuítrumin juruttramkimkiarum? ¿Wisha niisha mai metek enentáimsar métek takaschamkaj?

¹⁹ ¿Warí enentáimsarum? ¿Átum péñker ániawai turutik tusar nu tájik? Antsu, aneamu yatsurtiram, ii tájinia nu atumin Yúsnum ikiakártajrum tusar taji. ²⁰ Wi atumíin jeaknasha, wi wáitkiataj tusan wakeraj nuna wáinkiashtatjai, tu enentáimsan itiurchat enentáimjai. Tura atumsha wakerarmena núnisrumek wáinkiashtatrome, tu enentáimjai. Yajauch chicharnaikiatniuncha, yajauch enentáimtunaistinniasha, kajernaikiatniuncha, niñki enentáimtumastinniasha, tsanumpratniuncha, mái-tunai ajatniuncha, waantu enentáimtumastinniasha, yajauch wekasatniuncha, ashí nuna wáinkiashtajash tusan itiurchat enentáimjai. ²¹ Tura wi jeaknasha, átum yajauch túratniusha, tsanirmatniusha tura yajauch ti wakerarmena nu, yaunchu túriniarmena nu, untsurí shuurtiram iniaisachurmena nuna nekashtajash. Tura enentáim yapajitsuk tuke tura asakrumin úutchatjash tajai. Kame wi átum umikchamun nekaamtai Yus winia iniatsátrattawai tusan tsúumajai.

13

¹ Jujai menaintiú listajrum tusan winiajai. Ashí iwiaratin ana nu, jimiará tura menaintiú shuara chichamejai iwiarnartatui. ² Wi atumjai pujachatnak, atumjai pujáa núnisnak áatjarme. Yaunchu tunáa túrimiarmena nuna tura ashí shuártirmin wi nuik tímiajrumna nuna ataksha tájarme, wi atak tana tunaarum iwiareachkurminkia iniaisashtatjarme. ³ Nuñkia wi Kristu kakarmarijjai chichaajna nu nekaattarme. Nu nekaataj tusarum wakeratsrumek. Tura Krístuka kakarmachuchuiti. Antsu atumí enentáin kakaram takaawai. ⁴ Kristu nekas kakarmachua nútiksañ krúsnum máamuitiat, Yusa kakarmarijjai iwiaakuíti. Ayashnium Kristu kakarmachu nekapmia núnisrik iikia kakarmachuitji. Túrasha Yusa kakarmarijjai ni takatři takaaji. Nu atumin iniakmastatji.

⁵ “Nekas Yúsan umirniuashitiaj” tusarum nekamatarum. Íimiastarum. Antar Yus-shuarchaitkiurmeka Jesukrístu atumí enentáin pujurtama nu nekaattarme. ⁶ Tura iikia antar Yus-shuarchaitji nu nekaatarum tusan wakerajai. ⁷ Tura átum tunáa túrawáirum tusar Yus seaji. Aents in péñker enentáimtikramprat tusar tátsuji. “Antar ániawai” túramprinñ, átum péñker wekasatarum tusar wakeraji. ⁸ Warí, Yusa nekas chichame emesratin tujintiaji. Antsu ii túrajnia nu Yusa nekas chichamejai túraji. ⁹ Tuma asamtai, átum kakarmaitkiurminkia iikia kakarmachuitiatar shiir enentáimji. Atumsha nekas kakaram ajasúk tusar Yus tuke seaji. ¹⁰ Atumin emesratin Yuska winia akuptatsui. Antsu Yus akuptukuíti atumin ikiakártinian. Tuma asamtai, wi atumíin jeaknaka kakaram chicharkajrum tusan winitsuk jü papin áatjarme.

Amikmaawai

¹¹ Ayu, yatsurtiram, shiir pujustarum. Krístunam tuke kakaram ajastarum. Yus shiir enentáimtikramprarti. Chikichík enentáik enentáimsatarum. Shiir awajnaisarum pujustarum. Tura Yus anenmarmena nu, shiir enentáimtikramna nu atumjai pujurtamsattarme. ¹² Yúsnum shiir enentáimtunaisrum amikmaanaisatarum. ¹³ Ashí Yus-shuar ainia nu amikmaatmarme. ¹⁴ Uunt Jesukrístu waitnenkartutairi, Yusa anenkrattairisha atumíin pujurtamsati. Tura Yusa Wakanísha tuke nemartamsarti. Nu atí.

Papru KARASEANMAYA SHUARAN Papí aar akuptukma

Karaseamaya Yus-shuaran Papru áatramiania nu

¹ Wi Pápruitjai, Yus akatramu. Yúsak winia akatturuiti. Shuarka akaturchamai. Yussha chíkich shuáran akupturak akatturchamai, antsu Nun̄ki, Yus Apa, Jesusan jakamunmaya iniantkimia nu, tura Jesussha winia akatturarmai Yusa shiir chichamen etserkatniun. ² Wisha, ashí Yus-shuar wijíaj pujuinia nusha, ju papí akupeaji. Ashí Yus-shuar Karasea nun̄kanam pujarmena nu áujsatarum tusan ju papin akuptajrume.

³ Yus Apa tura ii Uuntri Jesukrístusha waitnentrainia ásar yainmakarti imiatkinchanum tuke shiir pujustinian. ⁴ Yus ii Aparí nuna wakera asamtai, Jesus ni ayashin surumak wáitsamiayi ii tunaari asakártinian. Nuna tura ashí tunáa ju nun̄kanam ana nuyá an̄kant awajtamsatai tusa in yáinmaji. ⁵ Tuma asamtai tuke Yus shiir atí. Ayu.

Chíkich uwempratin chichamka atsawai

⁶ Maa, nekasaash timiá wárik Yus ikiukmiarum. Kristu in ti anenma asamtai Yus ni shuari ajastinian in anaitiamkamji. Urukamtaitasuk nuikia imiá wárik ni chichame inaisamarum nusháa chicham umikrum uwemprataj tusarum. ⁷ Wátsek, nekas chíkich chicham penké atsawai shuar umikiar uwempratin. Antsu yajaya shuar atumín taar penkercha awajtamainiawai. Tura nusháa chichaman etserkar Yusa shiir chichamen yapajilatniun wakeruinaiwai. ⁸ Tuma asamtai Yus nin yajauchiniam yumiñkrattawai. Wisha Yus-Chicham yapajiamun etserkamtainkia Yus winia yumiñkrurtatui. Nayaimpinmaya suntarsha nusháa chichaman wi etserkachmaj nuna étserkuinkia nunsha yumiñkrattawai. ⁹ Paant ujakjarme túmaitiatnak ataksha ujaajrume: Náñkamas shuar niisháa uwempratin chichaman, wi etserkachmaj nuna étserkuinkia Yus yumiñkrattawai.

¹⁰ Ti kakaram chichaatsjak. Nuna chichaakun shuar shiir enentáimtursarti tusan chichaatsjai. Antsu Yus shiir enentáimtursati tusan nuna tajai. ¿Shuar wakeruinia nuna enentáimsan chichaajak? Nuna enentáimkiunka Kristu wakera nuna umirkachaintjai.

Papru júnis Yus akatramu ajasmiai

¹¹ Antsu nekaatarum, yatsuru. Uwempratin chichaman wi étserjana nuka áentsnumianchuiti. ¹² Aentska ujakachmai. Unuitiutnasha unuitiurchamai. Antsu Jesukrístuk winia paant jintintruamai.

¹³ Tura wi yáunchu ti yajauchin túramiaj nuka antukchakaitrum. Israer-shuar Yúsnan takainia nútiksanak wisha takasmajai. Tuma asan Yus-shuaran ti kajerkan tuke pataatukmajai amuktaj tusan. Nusha nékarme. ¹⁴ Tura kakaram ajasan, ii uuntri yaunchu tiarmia nuna yawetsuk umiktinian ti enentáimpramjai. Tura untsurí shuaran wijíaj métek uunt armia nuna nan̄kaamas Yúsnan takasmajai. Túmaitiatan aya winia únun̄trun chichamen ti umirniuyajai. ¹⁵ Túrasha wikia akiintsain̄ Yus winia achirkamiayi, tura ti anenkratmaríjjai winia anaitiukmiayi. ¹⁶ Nuikia shiir enentáimiuk ni Uchirín paant nekamtikruamai. Tura Israer-shuarchanum ni shiir chichamen etserkat tusa akuptukmiayi. Tuma asamtai chíkich shuaran aniaschamjai.

17 Uunt péprunmasha, Jerusarénumka, wé chamjai winí emkaru Yus akatramujai chichastinian. Antsu wárik Arapia nunkanam wémajai. Tura nuí Yúsan enentáimtasuan atak Tamasku péprunam waketkimjai. 18 Tura menaintiú uwí nankaasmatai, nuyá Pítrujai áujmattsataj tusan Jerusarénum jeamjai. Tura jimiará semanachik pujusmajai Pítrujai. 19 Tura Jakupuncha, ii Uuntri Jesusa yachia nuna, wáinkiamjai. Nú arantka chikichnaka Yus akatramunka wáinkiachmajai. 20 Yus iirui. Wi tájana nu nekasaiti, wáitchaiti.

21 Nú ukunmasha Siria nunkanmasha, Sirisia nunkanmasha wémajai. 22 Tuma asantai ashí Yus-shuar Jutía nunkanam pujuarmia nu winia nekaracharmai. 23 Aya antukarmai. “Yaunchu in ti áintrammiaj nu yamaikia Yus-Chichaman étseruk wekaawai. Yáunchuka in amutmaktinian wakerini-aitiat yamaikia iniaisaiti” tiarmai. 24 Túrawar winia enentáimtursar Yúsan shiir yuminsarmai.

2

Chíkich Yus akatramu Paprun shiir enentáimtuiniawai

1 Tura katurse uwí nankaasmatai wisha Pírnapijiai Jerusarénum wémajai. Titiuncha jukimjai wijiai. 2 Yus akupta asantai Jerusarénum wémajai. Tura nuí jean aya Yus-shuara úuntrijiai áujmattsamjai. “Júnisnak ashí Israer-shuarchan Yus-Chichaman ujainiajai” tímiajai. Takasmajna nusha tura tuke takastin enentáimjiana nusha ántar aijn tusan tu áujmattsamjai. 3 Niisha Yus-shuara úuntrintiat itiurchat enentáimpracharmai. Antsu chíkich shuarka Titu Israer-shuarchaitiat wijiai pujakui niisha Israer-shuar ajastí tusa tsupimiamtikiatniun wakeriarmai. Túrasha tujinkiarmai. 4 Tura nu shuar ántar yachi áiniak antuktai tusar wayawarmai. Tura ii chichamen antukar itiurchat awájtámsatai tusar wakeriarmai. Iis, Kristu Jesus in uwentikrampra asantai ti shiir iisha Yus yúpichuch umíaji. Tura nuna nekaawar, atakka, aya yáunchu akupkamu itiurchat ana nujai uwentikrampratniun wakerutmakarmaji. 5 Túrasha penké ishichkisha umikchamji. Antsu atumíin Yus-Chicham yapajniátsuk métek jeartamat tusar ni chichame penké anturkachmaji. 6 Nu arantcha Yus akatramu uuntriñkia yamaratniunka suruscharmajai. Nincha ashí aents ti neka ainiawai tu enentáimtuiniawai. Kame nu shuar ti nékainiakuisha ti enentáimtatsjai. Yus ashí shuaran mash métek iyatsuk. 7 Yus akatramu uuntrisha Yus winia Israer-shuarchan Yus-chicham ujaktinian akuptukma nuna nekarawarmai. Tura Pítruncha akupkamai Israer-shuaran Yus-Chicham ujaktinian. 8 Pítrun Israer-shuarnum akupkama nú Yusak winiasha akuptukmai Israer-shuarchanum. 9 Tuma asantai Jakupusha, Pítrusha, Juansha, Yus akatramu uuntri ásar, Yus winia ti paant akuptan nekaawar, winiasha Pírnapiñsha, “Ayu, átum, Israer-shuarchanum Yus-Chicham etserkatarum, tiarmai. Iisha Israer-shuarnum Yus-Chicham etserkattaji” tiarmai. Túrawarmatai shiir áujnaisar ii uwejejai achirnaikiamji métek enentáimji tusar. 10 Áyatik “Kuítrincha enentáimtusrum tuke yáintarum” tiarmai. Wisha núnaka ti wakerakun tuke túriniaitjai.

Papru Pítrun chicharkamai

11 Tura nú ukunam wi Antiukía péprunam pujain Pítiur tamai. Tura nuí yajauch túramtai, Yus-shuara úuntriniak chicharkamjai. 12 Iis, Israer-shuar tuiniawai, “Israer-shuarcha Muisais timia núnisan tsupirnakcha asantai, nu shuarjai yurumáshtiniaiti” tuiniawai. Túmaitiat Pítiur yurumámnian nékak, emka Sántiak shuar táatsain Israer-shuarchajai yurumámai. Tura nuyá Sántiak shuar Jerusarénumia Antiukíanam jeawarmatai Pítiur ashamak

tsupirnakcha shuarnumiã kanakin yurumáchmai. “Tsupirnaktiniaitme” tiniu ainia nuna ashamak túramai.

¹³ Tuma asamtai chíkich Yus-shuar, Israer-shuar armia nu, Pítrujai métek emka yurumáwaru áiniayat jimiará enentai takusar ukunam iniaisarmai. Pirnapísha neka áyat nútiksã nupetnakmai. ¹⁴ Tura nuna ísan ashí íimiainiañ Pítrun chicharkamjai. Yus Shiir Chicham tana nujai métek wekasachu ásarmatai tímiajai “Ame Israer-shuaraitiam Israer-shuarti ikiukim tsupirnakchajai yurumám Israer-shuarcha áintsamek túrame, tímiajai. Nuikia “Israer-shuarcha Israer-shuartijiai métek wekasatin áiniawai” tiip” tímiajai.

Israer-shuarsha Israer-shuarchasha mai métek Yúsan enentáimtusar uwemprartatui

¹⁵ Iikia nekas Israer-shuaraitji. Israer-shuarcha, tunáa ainia áaniuchitji. ¹⁶ Túmaitiatar ju nékaji. Akupkamu umíamujai uwemprachminiaitji antsu Jesukrístu nekas enentáimtakum uwemprattame. Nu nekaar iisha Jesukrístu nekas enentáimtusmaji tunaajainchu atai tusar. Aya Kristu nekas enentáimtusar péñker átatji. Akupkamu takasar umirkarsha tuke nujai péñker ajaschattaji. Akupkamunka shuar umiktaj táyat, chikichkí shuarkesha nujai péñker ajaschamniaiti. Nu nekaar antsu Jesukrístu nekas enentáimtusmaji péñker ajastai tusar. ¹⁷ Tura Israer-shuar enentáimprashimpiash, “Wátsek, núnisaitkiuinã wisha Krístun enentáimtusaj tákunka, emka tunáa shuaraitjai tu enentáimtumastiniaitjai” tíchanpiash. Nuka nekasaiti tura nuyá “Nu asamtai Kristu winia tunáa shuaran najataiti” penké tu enentáimprashitniaiti. ¹⁸ Antsu yaunchu, wi túrashtiniaitjai tímiaj nuna awainkin túratniuitjai tákunka nuikia nekas tunaitjai. ¹⁹ Iista, akupeamun umiktaj tukaman penké tujinkiamjai. Umiktinian tujinkian jaka áintsanak ajasmajai akupeamunam. Antsu Yusjai iwiaaku pujajai ni wakera nuna umiktinian. ²⁰ Wisha Krístujai krúsnum jákaitjai. Tuma asamtai yamaikia wikia iwiaaktsujai wi wakeraj nuna túratniun antsu Kristu winí iwiaakui ni wakera nuna túratniun. Tura ju ayashniun pujayatan aya Kristu enentáimtakun iwiaakjai. Krístusha Yusa Uchiríntiat winia ti anentuk jarutkamiayi. ²¹ Yus ti péñker asamtai itiurak “Kristu ántar jakamiayi” títiaj. Iis, aya akupkamun umirkan péñker ajasminiaitkiuinã, nuikia Kristu ántar jákaayi.

3

Yus akupkamu tura Yus enentáimtustin

¹ ¿Warin aa Karaseanmayatirmea. Waweamukaitrum netse enentáimprarum Yus tama umirkashtin. Kristu krúsnum máamun ti paant étserkun atumin iniaktuschkamkarum? ² Wátsek, aniatatjarme, enentáimpratarum. ¿Warijiañ Yusa Wakaní atumí enentáin achikmarum. Akupkamu umirkarmek enentáimin achikmarum, antsu Yus enentáimtusrum ni Wakaní achikchamkuram? ³ ¿Tuke nétsekaitrum. Yusa Wakaní emka atumí enentáin wayá takasmatai atumek yamaikia nu takat aya ayashí kakarmarijiañ umiktin enentáimprarmek. ⁴ Penké ántarmek wáitsamarum tura antsu ishichkisha unuimiarchamkarum? ⁵ Naka enentáimpratarum. Yus ni Wakanín súramtsuk tura aents túrachminian atumín ti takaatsuk. Átum aya akupkamun umirkurmin Yus nuna túrachuiti. Antsu ni chichame antukrum Yus enentáimtakrumin Yus nuna túraiti.

⁶ Yaunchu ii uuntri Apraám enentáimpratai. Yus-Chicham nin tawai: “Apraám Yúsan enentáimtusmatai Yus “Ayu, péñkeraitme” tímiayi” tawai.

⁷ Iis, nujai páantchakait. Ashí shuar Yúsan enentáimtuinia nuka Apraámjaj métek enentáimpraru ásar, ni uchiría áintsan ajasaru áiniawai. ⁸ Yamái páantaiti. Yus ashí Israer-shuarchancha tawai “Aya winia enentáimtursarum péñker átatrume”. Israer-shuarchasha nujai péñker ajastinia nuna ti yaunchu neka asa, Apraáman ujakmiayi,

“Ámijijai ashí aents ti shiir ajasartatui.”

Tu ujakmiayi. ⁹ Tuma asamtai ashí shuar Yúsan enentáimtuinia nuke Apraámjaj métek péñker ajasar shiir warasartatui.

¹⁰ Antsu ashí shuar “akupkamun umirkan uwemprattajai” tuinia nuka yajauchiniam yumiñkramu áiniawai. Yus-Papinium áarchamukait

“Ashí shuar Yus akupkamun ashí aarma nuna takamtsuk umirkachka yajau-chiniam yumiñkramu áiniawai.” Tu áarmaiti.

¹¹ Nújainkia páantaiti. Akupkamu umirkatniujai péñker ajaschamniaiti Yusjaj, antsu aya Yus enentáimtusam péñker ajasam uwemprattame. ¹² Shuar akupkamu umirkatniun enentáimna nuka aya nujai péñker ajastinian enentáimui; Yúsan enentáimtak péñker ajastinian enentáimtsui.

¹³ Tura Kristu yamaikia uwentikrampramji. Akupkamun umirkachu yumiñkramuiti tana nuka in túramtsuji. Antsu Kristu in yainmaktin krúsnum jaka yumiñkramu ajasmiayi. Kame áarmaiti:

Shuar jakati tusa numiniam nenasma yumiñkramuiti.

¹⁴ Tuma asamtai Jesukrístu jakamujaj ashí Israer-shuarchasha Apraámjaj métek péñker shiir warasartatui. Iisha núnisrik nu shuarjaj Yusa Wakaní, Yus akupkataj timia nusha, achiktatji Yus enentáimtusar.

Yus akupkamu tura Yus túrattana nu anajmarma

¹⁵⁻¹⁶ Iis, yatsuru, Yus Apraáman Chichaman najana anajmatuk,

“Ámijijai tura amée weeá akiinkiattana nujajisha ashí aents ti shiir ajasartatui” tímiayi.

Kame ‘amée weeá akiinkiartatna nujai’ tíchamiayi, antsu ‘akiintiatta nujaj’ tímiayi. Nuna taku chikichik átinia nuna enentáimpramiayi. Nusha Krístuiti. Aentstisha enentáimpratai. Shuar chichaman najana tura papinium aar nuyá ni naarj apujas nuikia nekas yapajítsuk umiktiniaiti. Umitsuk ini-aisachminiaiti. Patattasha patattsachminiaiti. ¹⁷ Wátsek, Yus núnisan Chichaman Apraámjaj najana, ukunam umitsuk iniaisachminiaiti. Tura Chichaman najanamia nú ukunam, kuaru siantu nuyá trainta (430) uwí nankaasmatai, Yus ni akupkamurjñ Muisaisan susamiayi. Túramaitiat nujaj Yusa yaunchu Chichamen yapajíachmiayi iniaisatniun. ¹⁸ Tuma asamtai Yus timia nuka tuke uminkiattawai, Yus yaunchu Apraámjaj Chichaman najana asamtai. Nújainkia páantaiti, péñker ajastajtsar akupkamu umikrikia shiir pujuschartatji antsu Yus timia nujaj iikia takatsuk shiir pujustatji. Nuna tsankatkamiayi Yus Apraámjaj Chichaman najaneak.

¹⁹ “¿Nuikia Yus urukamtaí akupkamun susamia?” tíchaintmeash. Ayu, Apraám weean, Kristu táatsajñ Yus tímía nu uminkichminiuyayi. Tuma asamtai nii táatsajñ ashí tunaan túrawarmia nu timiá yajauchiiti tusa Yus akupkamun susamiayi. Tura Yusa suntari ju akupkamun ashí iwiarar Muisaisan susar akatrarmiyai Israer-shuaran susárti tusar. ²⁰ Antsu chikichik shuar nínki takastinian enentáimkiunka chikichan atsumatsui. Tura Yus aya chikichkiiti. Nínki chikichan akátsuk ashí aentsun Apraámjaj péñker awajsatniun Apraáma anajmatar nijijaj Chichaman najanamiayi.

Yus akupkamu itiúrkátin

21 “¿Tura Yus jimiará chichamjaj chichaawak, tíchaintmeash. Emka Apráaman “Jujaj uwemprattame” tíchamkia, nuyá Muisaisan ni akupkamurín súsachmakia?” tíchaintmeash. Tura áintsachuiti. Nekaata, akupkamu umirkatniujaj Yusjaj tuke péñker pujusminiaitkiumka nuyá aya akupkamujaj uwempram tunaajainchu ajasaintme. 22 Tura Yus-Chicham paant “Ashí tunáa áiniawai” tawai. Nu asamtai yamaikia ashí Jesukrístu enentáimtuinia nú shuar, aya Yus timiá asamtai, uwemprartatui. 23 Tura Kristu táatsain Nin enentáimtuschaniauyayi. Tuma asamtai Nii táatsain akupkamuka in emettama pujurtamji aya akupkamu tana nu umirkatin. Tura ukunam ju nekanayi: Kristu enentáimtusar uwempratniuitji. 24 Akupkamu, nuika, in waitmakmaji uchin kuírchin wainnia áintsan. Kristu tatí tusa waitmakmaji. Tura Kristu támatai ashí nekas Nin enentáimtuinia nuka Yúsaj péñker áiniawai. 25 Yamái Kristu nekas enentáimtustiniaiti tuma asamtai yamaikia akupkamu kuirchia áintsan wáitmatsji. 26 Antsu Jesukrístu enentáimtusar, nujaj Yusa uchirí úuntmaru ajasuitji. 27 Ashí Kristu náariñ imiaimiutirmeka Kristu áintsan ajasuitrume. 28 Jesukrístujaj tsaniñkiu asarí imiá métek aji. Israer-shuar, Israer-shuarcha, ankant ainia nu, ankantcha ainia nu, áishman, nuwa, ashí mash Jesukrístunuitkiunkia yamaikia “ni-shaaiti” tu enentáimprashitniaiti. Ni shuari mash chikichik áiniaji. 29 Tura Krístunuitkiurmeka Apráam weeá áintsan ajasurme atumsha. Tuma asarum, Yus Apráaman anajmatramia nu atumsha jurumkitniuitrume.

4

1 Kuítrinniu uchirí ashí ni aparí takakna nuna niiniu áchattawak ukunam. Tura uchichitkiunka ni aparí takarniuriya núkete. 2 Tuke uunt ajatsuk ni wáinnia nuna umirkatniuiti. Tura uunt ajasmatai tura ni aparí “Ayu” takui nuyá nii antsu ni aparíniu ashí wáinkiatniuiti. 3 Núnisrik iisha úchichik asarkia ashí aentsu akupkamurí umirkatniuji. 4 Tura tsawant jeamtai, Yus ni Uchirín akupkamiayi ju nunkanam. Niisha Yúsaitiat nuwanam akiiniamiayi. Tura aents ajasmiai. Tura aents ajas yaunchu akupkamuncha umirkatniuyayi. 5 Nujaj ashí aents akupkamun umirkatin armia nuna uwemtikrataj tusa támiayi. Tura iisha yamaikia nujaj ni uchirí uunt ajasminiaitji. 6 Atumsha nekas ni uchirí ajasakrumin Yus ni Uchirí Wakanin atumi enentáin akup-turmakuiti. Tura nu Wakan atumí enentáiya Yúsan “Aparú” tawai. 7 Tuma asamtai yamaikia aya takarniuchuitme antsu Yus ni uchirín najatmaiti ámin. Tura ni uchirí asakmin ashí Yus takakna nuna amastatui Krístuiyan.

Papru nu Yus-shuaran yáintinian wakerawai

8 Yaunchu átum nekas Yus nékachkuram, ántar-yus írunna nu umirkamarme nekascha yúsak. 9 Tura yamaikia nekas Yus nékarme, kame Yus atumin nekarmarme. Núnis asamtai itiurtsuk atak aentsu akupkamurí umirkatin enentáimprum. Nujaj kakaram ajaschamniaitme tura umikmesha yainmakchattawai uwempratin. 10 Átumka jísat ti najanearme. Yaunchu jísat najanatin amia nú tsawantcha, nantusha, uwisha, jísat tuke najanearme Yus shiir enentáimtursati tusarum. 11 Ashamajai, atumín ántrankeash takasmaj tusan. 12 Yatsuru, wi atumea áintsanak ajaschamkaj; atumsha yamaikia wi wekaajna áintsarmek wekasatarum. Wi nuí pujakui ishichkisha yajauch awajtuschamarme. 13 Antsu nekarmarme ayashruí itiurchat pujayatan Yusa shiir chichamen emka ujakmajrume. 14 Tura winia sunkur ti yajauch awajtain atum winia nakitrurum mujrukchamarme, antsu Yusa suntaríá áintsarmek itiararmarme. Jesukrístu anturkatniua áintsarum anturtukmarme. 15 Maa, wi nékajai, nuik atumí jüimi ukuinkiarum surusaarme, túramniaitkiurmeka.

Tura shiir enentáimpramarmena nusha itiurtsukait yamaisha. ¹⁶ Yamaikia nekas chichaman étserkun ¿atumí nemasrī ajasjak? ¹⁷ Chíkich yajaya taaru ti shiir awajtamainiawai tura atumin yainmaktasa áitkiarmainiatsui. Aya winíya akantamkitiai tusa wakerutmainiawai, winia antsu shiir enentáimtursat tusa. ¹⁸ Niisha nekas yainmaktinian wakerutmainiakka atumin shiir awajtamsatin tuke péñker ainti, wi atumjai pujajinsha tura pujatsainsha. ¹⁹ Uchirú, nuwá jurertaj tana núnisnak ataksha wáitijai Kristu atumín paant atí tusan. ²⁰ Atumjai pujaknaka maak aintjai. Yamái pujaknaka nekas nusháa chichasaintjarme. Itiurkatjarmetsuk nékatsjai.

Akarsha, Sarasha jimiara Chichaman nakumainiawai

²¹ Ayu, “akupkamu umirkatniuiti” támena nu nekaata; akupkamuka júnisaiti. ²²⁻²³ Aarma awai: Apraám jimiara uchirtiniuyayi. Emka ni takarniurī jurermiayi Ismaeran. Nuyá Apraáma nuwé jurermiayi Isakan. Ismaera nukurī Apraáma takarniuriyayi. Tura Apraám Yusan enentáimtutsuk niijiai kanarmatai, ni takarniurī jurermiayi. Tura antsu Isaka nukurīnkia takarniurīnchuyayi, antsu nekas ni nuwé áuyayi. Niisha ti úuntchiniak, Yus “jurertatme” tímiayi. Tuma asamtai Yus timiajai Isakan jurermiayi. ²⁴ Ayu. Yamái tájana nuka Yusa Chichamen jímieran nakumui. Ismaera nukurī Akar chikichik Chichaman nakumui. Yaunchu Senái muranam Yus ni akupkamurīn áarmiayi Israer-shuar, takarniua áintsan, umirkarti tusa. ²⁵ Senái murasha Akara nunke Arapianam wajaawai. Akarsha Senái muran nakumak, ashí Israer-shuaran “Akupkamujai uwempramniaiti” tuinia nuna nakumui. Yamaisha Israer-shuara uuntri Jerusarénum pujuinia nuka tu chichainiawai. Tuma asamtai Akarsha, ashí nu shuarsha núnisar, akupkamu umirkatin ásar, ti takarniu áintsan wáitsar takainiawai. ²⁶ Antsu ashí Yus-shuarti uwempra asar imiankas ankant pujaji. Nayaimpinmaya Jerusarénumiá áentsuitji. Nuyá áentsti tuke ankant pujuinijai. Nuyá aents asakrin, nu yakiya Jerusaréнка ii nukurīa áintsan enentáimpramniaiti. ²⁷ Junis áarmaiti:

Warasta, misurma, uchi takakchiatmek;
Ti shiir warasta, uchi najawé nékachiatmek.

Nuwá ajapamu uchin jurertatui;

Nuwá áishrinniu núnaka nankaamas uchirtin átatui.

²⁸ Iisha, yatsuru, Isaka áintsarⁱ, Yus timiajai akiiniaitji. ²⁹ Yaunchu Ismaer Isakan kakerak itiurchat awajsamiayi. Núnisan yamaisha Ismaera áintsan aya ayashnumiá ainia nú aents Yusa Wakaníya akiinia nuna yajauch awajenawai. ³⁰ Tura Yus-Papinium áarmaiti:

“Takarniusha, ni uchirijijai, ajapam awemata. Nekas péñker nuwá uchirijijai tsanin pujuschamniaiti. Apari kuítríncha achikchamniaiti,” tawai Yus-Papí.

³¹ Ayu, yatsuru, nekaatarum. Takarniu uchirínchuitji antsu ankant pujaji nekas péñker nuwá uchirī asarⁱ.

5

Yusjai tuke ankant atarum

¹ Kristu uwemtikrampramijai tuke ankant átinian. Tuma asamtai kakaram ajasam tuke ankant pujustá. Ataksha nu itiurchatnum waketchip.

² Wi Papru asan ujaajrume. Átum Muisais timia núnisrumek tsupirnakrumniñkia ¿Kristu nuikia warí itiurtamkamniait? ³ Ataksha tájarme, ashí tsupirnakua nu shuar ashí Muisais timia nuna takamtsuk umirkatniuiti.

⁴ Atum “Akupkamu umiakmin Yus shiir enentáimturmastatui” tárugna nu,

nu shuartiram Krístujiya tupanniuutrume. Yusa anenkrattairiya kanakni-urme. ⁵ Iikia, antsu, Yusa Wakanijjai tura Yus enentáimtakrin Yus shiir enentáimturmastatji, tu enentáimji. ⁶ Nekas Krístunuitkiurkia tsupirnaktin atsumatsji. Antsu aya Yus nekas enentáimtakur ashí anenaitniuitji.

⁷ Atumsha Krístujai péñker wekaimiarme. ¿Urukamtai nekas Yus timia nu iniaisatin enentáimprum ataksha akupkamunam waketkitin? ⁸ Nú enentai Yúsaiyanchuiti. Nijjai wekasatniunka Yus achirmakuitrume. ⁹ Ju enentáimpratarum: Karía ishichik yuminnium enketam mash' karimtiktsuk. Aneartarum atumsha. ¹⁰ Ayu, Yus yáinmakrumin wi tájana nu nusháa enentáimprashtatrume, nékajai. Tura atumin yajauch áujmatramainia nuna Yus asutiáttawai páchitsuk.

¹¹ Wíkiá, yatsuru, yamaisha “tsupirnaktiniaiti” tuke tákuinkia Israer-shuar yajauch awajtuscharainti. Antsu Kristu jakamun étsereatnak “tsupirnaktiniaiti” tákuinkia kajertukcharainti. ¹² Atumin yajauch awajtamsatin wakeru-iniana nú shuar antsu niniki tsupimiakar yajauch awajmamsarti.

¹³ Atumniasha, yatsuru, Kristu tuke ankant awajtamsarme. Tura ankant ajasrum, “Aya wi wakerajna nuna túramniaitjai” tu enentáimprairap. Antsu nuámtak aneniakrum péñker yáiniáiktarum. ¹⁴ Ju chichamjai ashí akupkamu mash uminkiattawai: Ame ayashim aneamna áintsamek chíkich shuarsha aneata. ¹⁵ Tura aneartarum. Aneniachkurmeka, antsu esanairum mai yunai ajakrumka nuámtak amunaiktatrume.

Ayash wakeramu tura Yusa Wakaní wakeramu

¹⁶ Juna tájarne: Atumí ayashi wakerana nu umikijaj tusarum Yusa Wakaní kakarmarijjai wekasatarum. ¹⁷ Yusa Wakaní wakera nuna ame ayashim nakitiawai. Tura ame ayashim wakerana núnaka Yusa Wakaní nakitiawai. Mai maanai ajainiawai. Túmaitkui péñker wekasataj tukamam tujintiame. Páantchakait. ¹⁸ Tura Yusa Wakaní jintinramkuinkia, aentsu akupkamurijjai itit áchattame.

¹⁹ Wats, ayash túramu ti paant áiniawai. Ju áiniawai: tsanirmatin, wapik túratin, yajauch túratin, ²⁰ ántar-yus ainia nu tikishmatratin, wawekratatin, nemasnaikiatin, katsumnaikiatin, akasmaktin, wari kajektin, nankaamantu enentáimtumastin, aya niisháa niisháa enentáimsartin, níniunak ístin, ²¹ yajauch enentáimtunaistin, mankartuatin, nampektin, nampernum aya ti yurumin, tura ti nampen átin. Chíkich nujai métek áiniawai. Nuik ujakmajrumna núnisnak ataksha tájarne: Shuar nuna túrakka Yusai pujustinian penké tujinkiattawai.

²² Ayu, yamaikia Yusa Wakaní kakarmarijjai túratin enentáimsatai. Yusa Wakaní ii enentáin pujak, péñker túratniun nerektinia áintsan neremtikramji. Ju áiniawai: aneatin, shiir enentáimsatin, Yusjai tura shuarjai nawamnaikiar wekasatin, shiir enentáijjai katsuntratin, chíkich shuar shiir awajsatin, tsanka átin, tana nuna tímatrusan umiktin, ²³ péjchach ajastin, iik ímiasar tunáa túrashtin. ¿Ju túratniuncha yaki surimia? ²⁴ Shuar Jesukrístunu ainia nu, ni ayashí wakeramuríncha tura nunisan ni túramuríncha surimiak wekaawai. Ni ayashi krúsnum maatniua áintsan túraiti.

²⁵ Yusa Wakaní kakarmarijjai Yus-shuar ajasu asar, núnisrik Yusa Wakaní kakarmarijjain wekasatai. ²⁶ “Wats, nekapnaisatai. Wi imiá péñkeraitjai” nuámtak túnaitsuk, yajauch enentáimtunáischatniuiti.

6

¹ Túrasha, yatsuru, Yus-shuar tunáa túrashtimpiash. Atumsha nekas Yusjaj wekaarumna nu, nu wáinkiumeka, yátsum Yusjaj iwíarat tusarum yáintárum. Tura nankaamantu enentáimtumatsuk túratarum. Tura amesha nekamata. Tunaanum iniaraj tusam anearam wekasata. ² Káarak kijin akui nuámtak yáiniaiktin átsuk. Núnisrumek atumsha, itiurchatrij akui nuámtak yáiniáiktarum. Túrakrumka Kristu akupeamurij umíarme.

³ Shuar tujintiayat “nankaamantuitjai” tákuŋka anaŋmamui. ⁴ Shuar ní túramuriniak enentáimtumastiniaiti. Níiniunak enentáimtumakuinŋkia tura péŋkeraitkiuinŋkia chikicha túramurij iirtsuk, antsu níiniun péŋker iis wararsattawai. ⁵ Iis, ashí ní káarkariniak júkishtinkiait.

⁶ Shuar Yus-Chichaman unuimiatna nu, nu shuar nin jintiana nuna ashí takakna nujaj yáintí.

⁷ Anaŋmamawairap. Shuar Yúsan anaŋkatniun tujintiawai. Ame araanu nuna nereŋ júuktatme. Chíkich nereŋ áchattawai. Atumi enentáincha núniskete. ⁸ Iista. Shuar ni ayashí wakeramunak tuke enentáimtakka, jataj nereŋ áintsan araiti. Nerekmataj jákatniun júuktatui. Tura Yusa Wakaní wakerana tuke enentáimtakka Yusjaj tuke shiir pujustinian júuktatui. ⁹ Nu asamtai péŋker túratin yawetkishtiniaiti. Tura pimpitsuk takasar júuktin tsawant jeamtai, páchitsuk júuktatji. ¹⁰ Tuma asamtai yáinmin ákuinŋkia ii jeajnia nu túratniuitji nekaska ii yachí yáinŋkartin, Yus-shuar ainia nu. Tura ashí shuarsha yáintinaiti.

Jesukristunu ajarar yamaram akiiniatin nekas péŋkeraiti

¹¹ Ímsakua, winia uwejruraj urutá uuntna áatjarum. ¹² “Nekas tuke tsupirnaktiniaitme” tuinia nuka áyatik shuar shiir enentáimtursartí tusa tuiniawai. Kristu krúsnum jakamun étsereakuinŋkia itiurchat awajtusarain tusar “tsupirnaktiniaitme” tuiniawai. Shuar “ashí akupkamun umiktajai” tusa, Muisais timia núnisan tsupirnaktiniaiti. ¹³ Pai. Tura nú shuar tsupirnaku áiniayat ashí akupkamun umiiniatsui. Muisais timia nuna ajapén ikiuiniawai. Túmaitiat tsupirnaku tusa wakerutmainiawai. Áyatik atumin “Pai, niisha tsupimiatkiakji” titiai tusar wakerutmainiawai. ¹⁴ Wikia, antsu, aya ii uuntri Jesukristu krúsnum jakamunak wararsatniun enentáimjai. Tu enentáimkiun Kristu krúsnum jakamia áintsanak ju nuŋkanmaya ana nuna jaka áintsan páchiatsjai; tunaanum winia útsutkatin atsawai. ¹⁵ Krístunu ajararia tsupirnaktincha tsupirnakchaitkiursha mai ántrai antsu yamaram akiiniatin nekas péŋkeraiti. ¹⁶ Ashí nekas Yus-shuaran, wi tájana nujaj métek wekainia nuna, Yus shiir enentáimias yáinti tuke shiir pujustinian.

¹⁷ Yamaikia itiurchat najatawaraj. Jesusa takatri takaakui asutiuawarma paant ayashruj chimikma írunui.

¹⁸ Yatsuru, ii uuntri Jesukristu atumin shiir yainmakarti. Nuke atí.

Papru IPISIUNMAYĀ SHUARAN papí akuptukma

Ipisiunmaya Yus-shuaran Papru átramiania nu

¹ Yus nuna wakerakui Jesukrístu akatramuitjai. Jesukrístu nekas enentáimtusrum Yus-shuar ajasrum Ipisiunam pujarmena nuna ju papin áatjarme. ² Yus ii Aparísha tura ii Uuntri Jesukrístusha waitnentramainia ásar imiatkinchanum shiir pujustinian yainmakarti.

Krístujai tsanínkiu asakrin Yus ti shiira nuna tsankatramji

³ Ii Uuntri Jesukrístu Apari Yus nekas shiir awajtustiniaiti. Iisha Krístujai tsanínkiu asar ii enentáin ashí nayaimpinmaya ana nujai warasminiaiti. Túmaitkiui Yus nu waratain ashí suramsaitji. ⁴ Krístujai uwemprar ti shiir tunaajainchu Nijjai pujusarat tusa Yus, ju nunka atsaisha, anaitiamkami-aji. ⁵ Yámankamtaiksha incha ti anenmak Jesukrístu túrunamujai ni uchiri ajasat tusa wakerutmakmaji. ⁶ Ni aneamu Uchirijjai tsanínkiu asakrin nekas ti anenmaji. Nu enentáimsar ti shiir awajsatniuitji. ⁷ Yus ti anenmakrin ni aneamu Uchiri numpé puarmatai, nu jakamujai ii tunaarin akikmatramak uwemtikrampraitji. ⁸ Tura ti anenmak ni enentáimtairin tura nekatairincha suramsamijai. ⁹ Nujai shiir enentáimturmak in uwemtikrampratniun wakerutmakmaji nuna, yaunchu nekaachman, yamá paant awajturmajai. ¹⁰ Ashí jú nunkanam íranna nunasha tura nayaimpiniam íranna nunasha Kristu ashí akupin ati tusa Yus tsanatkattawai. Nunasha Yus yaunchu enentáimturmu asamtai tsawant jeamtai ashí uminkiáttawai.

¹¹ Iisha Krístujai tsanínkiu asakrin Yus yaunchu achirmakmaji ashí Niiniu ana nuna tsankatramkatniun. Nunasha, ashí Nii túrana núnisan, aya Nii wakera asa túramiayi.

¹² Iikia Israer-shuar asar Kristu emka umirkakrin in imiá penker túrutmamun nekaawar ashí shuar Yúsan ti shiir awajsamín áiniawai. ¹³ Núnisan atumsha nekas uwempratín chicham antukrum Kristu nekas enentáimtusurme. Túrarum Kristu-shuar ajasakrumin Yus ni shiir Wakanin akuptuktaj timia nuna akupturmakmai. Nuna tura “nekas Wíi shuaraitume” tawai. ¹⁴ Yamái Yusa Wakaní ii enentáin pujuruk tuke uwemtikramji. Tura takas umik nu tsawantaj ashí tsankatramkattaji. Tura ii enentáin pujá asamtai Yus ukunam Nijjaisha ashí tsankatramkattaj nu paant nékaji. Maa, Yus ti penker asamtai Nin ashí ti shiir awajsarti.

Papru Yus-shuaran ájtusmiania nu

¹⁵ Átum ii Uuntri Jesukrístu nekas enentáimtamuncha tura ashí Yus-shuarjai shiir awajnaiyamuncha antukjai. ¹⁶ Túran shiir enentáimkiun Yúsan ájukun tuke yúminkiajai. ¹⁷ Ii Uuntri Jesukrístu Apari Yus ti shiir asamtai Nin áujeakun ni Wakaní ni nekatairin suramas ashí jintinramawarti tusan seajai. Nujai nuna nankaamas Yus nekaattarme. ¹⁸ Tura enentáimincha paant enentáimtikramprarti tusan seajai. Nujai shiir túrutmataj tusa achirmakuitrum nu nekaattarme. Nu arantcha imiá shíira nu, Yus ni shuarin ashí tsanatkattana nusha nekaattarme. ¹⁹ Nu arantcha Yus umirkurin ti kakaram tujincha asa in yáinmaj nu nekaattarme. Tura nu kakaram ti kakaram asamtai ²⁰ nujai Krístun jakamunmaya iniantkimiayi. Tura nayaimpiniam jukí ni untsuurin akupin pujutainium apujsamiai. ²¹ Tura

ashí ju nuñkanam akupin ainia nújaisha tura ukunam nunka átatna nu akupin áminia nújaisha tura ashí akupin ainia nújaisha tura ashí naari nékamu ainia nujaisha Yus Krístun ashí nankaamas akupin najanamiayi. ²² Tura ashí írrunna nu, Krístun umirkartin áiniawai. Tura Yuska Krístunak ashí Yus-shuara Akupniuri awajsamiayi. Túramtai Kristu ni shuari muuké áintsankete. ²³ Tura ashí nuñkanam Yus-shuar ainia nu Kristu ayashí najanainiawai. Tura Kristu ashí ni ayashin pimiutkaiti tura nu arantcha ashí írrunna nunasha pimiutkaiti.

2

Yus anenma asa uwemtikramji

¹ Átum yajauch túrakrum tunaanum tuke wekaakrum Yúsnumiá kanakin asarum jákauyarme. ² Nu tunaanum jú nuñkanam pujuinia nujai métek tuke wekainiuyarme. Túrarum uunt iwianchi wakeramuri umirniuyarme. Uunt iwianch ashí Yúsan umirainiatsna nuna akatenawai. ³ Ashí iisha núnisrik yaunchu nu shuarjai métek ii ayashí wakerakmu umirniuyaji. Tura íi enentái wakeramusha umirniuyaji. Tuma asar tura tunaajai akiinia asar chíkich shuarjai métek ti kajernakmiaji. ⁴ Antsu Yus ti waitnenkartin asa in ti anenmamiyai. ⁵ Tuma asa ii tunaanum tuke jaka pujarnin Krístujai métek iwiaaku awajtamsamiyai. Aya ti anenkartin asa uwemtikrampramiyai. ⁶ Tura Krístujai métek iniantamkimiaji. Nuyá Jesukrístujai métek, akupin pujutainium yamaisha apujtamas tuke nupetkatniun tsankatramkaitji. ⁷ Nujai ni ti anenkratmarincha tura Kristu túrunamujai waitnentrampmuncha tuke iniaktusmin átatui. ⁸ Jesukrístu nekas enentáimta asakrumin Yus waitnentramar uwemtikrampraiti. Juka átumkeka túrunachuitrume. Antsu Yuska Niñki kuítchajai suramsaitrume. ⁹ Shuar ni takatríjjai uwempratniuitkiunka nankaamantu enentáimsainti winia kakarmarjai uwemprajai tusa. Nu enentáimsatniuka atsutí tusa Yuska átumka takaatsrumnin uwempratniun suramsamiarme. ¹⁰ Yus najanamuitji. Kame Jesukrístujai tsaniákrin yamaram iwiaakman suramas tuke péñker túratniun najatmamji. Yáunchuk nuna enentáimturmasmiaji.

Krístujai tsaniñkiu asar shiir nawamnaikiar pujaji

¹¹ Nuik ámarum nu enentáimpratarum. Ashí Israer-shuar ni ayashin tsupirnakaku ásar ashí Israer-shuarchan, tsupirnakcha áiniakui, penké Yúsnachua núnis enentáimtuiniawai. Tura atumsha Israer-shuarcha asakrumin “tsupirnakcha” turamniuyarme. ¹² Nuik Krísturtinchaulyarme. Israer-shuarcha asarum ashí ni túrutairisha tura ashí Yus nin tsankatkarmasha nekaachuyarme. Tura jú nuñkanmaya asarum nekas Yusa nu enentáimtichuyarme tura shiir pujustin nánkamsarum enentáimpramarme. ¹³ Antsu yamaikia Krístujai tsaniñkiu asarum, yaunchu Yusaíya yajá pujuwitiatrum, yamaikia Kristu numpé puármatai ni jarutramkamujai tántaitrume. ¹⁴ Israer-shuarjai Israer-shuarchajai nemasmanaikiar ajapén péenkramu ámiaji. Tura Kristu nuna sáaki nawamnaimtikramkamiyai. Tura chikichik shuar najatmamiyai. ¹⁵ Nuik aya Israer-shuar Muisais akupkamu untsurí armia nuna umirkatin áiniak nujai chíkich shuarjai nemasmanainiarmiayi. Tura Kristu jaka nu akupkamun ántar awajas chikichik shuar yamaram awajtamsamiyai. ¹⁶ Núnisañ ámiayi. Kristu krúsnum jaka nemasjai mai apattamak chikichik awajtamas Yusjaisha nawamnaimtikramkamiyai.

¹⁷ Kristu taa nawamnaikiatniun chichaman Israer-shuaran ujakmiayi. Tura nu chichamnak atumin Yus nékachuyarmena nunasha ujaktinian akupkamiayi. ¹⁸ Yamaikia Israer-shuartisha tura Israer-shuarchasha mai metek Kristu túrunamujai tura Yusa Wakaní takaku asar Yusaj jeatniuitji. ¹⁹ Tuma

asantai yamaikia chíkich shuarchaitrume, antsu ashí Yus-shuarjaj métek ajasuitrume. Nekas Yusa shuarinrume.

²⁰ Átum uunt jea jeamma núnisaitrume. Uunt jea jeamtin, emka kaya apujtuktiniaiti jea ti wewe atí tusa. Núnisan yaunchu Yúsnan etserniusha tura Kristu akatramurisha Yus-Chichaman etserainiak imiá nekas enentáimtustinia nuna apujtukarmiayi. Tura ashí nujaj nankaamas Jesukrístu enentáimtustiniaiti. ²¹ Jea apujtukmari Kristu asantai Nij ti penker ekeniar jea jeamnaki wéawai. Tura ii Uuntrj Krístujaj Yusa Jee ti shiir átatui. ²² Núnisrumek atumsha Krístujaj tsaninriu asarum átum ashí Yus-shuarjaj Yusa Jeyya áintsan ajasuitrume. Tura Yusa Wakani ashí Yus-shuara enentáin pujú asantai nekas Yusa Jeente.

3

Papru Israer-shuarchanum Yus-chichaman etserkatniuya nu

¹ Nu asantai atumin Israer-shuarchatirmin yáintaj tusan Jesukrístunu étserkun sepunam pujajaj. ² Yus anentak Yus-Chichaman atumin etserkatniun akatar akuptukuíti. Nu nékatsrumek. ³ Yus nuna túrutak yaunchu nekaachmancha paant awajtursamiayi. Núnaka ishichik áatraitjarne. ⁴ Nu áujsarum Krístunu yaunchu nekaachman yamaikia paant nékajna nu nekaattarme. ⁵ Nú chichaman yáunchusha chikichkinkesha ujankachmiayi. Túrasha yamaikia Yusa Wakani Kristu akatramurincha etserniurincha nu chichaman paant awajtusarai. ⁶ Nu chicham juiti: Uwempratin chichaman umirkar Israer-shuarcha Israer-shuarjaj métek Krístujaj tsaninkiaru ásar chikichik shuar ajasartatui. Tura nu arantcha Yus ni shuarin ashí shíiran tsankatkatniun anajmatrama nu j métek pachinkartatui. ⁷ Yus ni kakarmarijjaj winia yáintiuk tura ti anentu asa nu uwempratin chichaman etserkat tusa akatturmiayi. ⁸ Ashí Yus-shuarjaj nankaamas wi pénercha ajn Israer-shuarchanum shiir chichaman etserkat tusa Yus tsankatrukmiayi. Krístujajinkia kuitjaj nankaamas péner, enentáimtustin jeatsjinia nu, takakji. Nusha ti shiir chichamaiti. ⁹ Yuska, ashí najana nu, nu enentáimmian yáunchusha etsertsuk yamaikia ashí shuar nu chichaman nekaawarat tusa winia akatturmiayi. ¹⁰ Yamaikia ashí nayaimpiniam pujuinia nuka Yus ni shuarijn túrunamun ísar Yuska imiá neka asa ashí enentáimniua nuna paant nékainiawai. ¹¹ Yus júnis túratniun yáunchuk enentáimpramiayi. Tura ii Uuntrj Jesukrístujaj mash uminkiamiayi. ¹² Tura Krístujaj Yusaj yúpichuch jeaji. Tura Nin nekas enentáimtusar sapijmiatsuk Niin tantamniaitji. ¹³ Tuma asantai tájarne, atumin yáintaj tusan sepunam pujakui kúntuts enentáimprairap. Antsu nujaj Yus atumin ti shiir awajtamkurmin átum warasuk tusan wakerajrume.

Kristu ti anenkratniuiti

¹⁴ Nu asantai ii Uuntrj Jesukrístu Aparin tikishmatran áujtajrume. ¹⁵ Ashí nayaimpinmasha tura nunkasha Yus-shuar ájinia nu nekas ni shuari áiniaji. ¹⁶ Yus ti kakaram asa ni Wakanijjaj atumí enentáin pujureak ashí ni kakarmariyan atumin suramsarat tusan áujtajrume. ¹⁷ Yus nekas enentáimtakrumin Kristu atumí enentáin pujusat tusan áujtajrume. Tuke yapajítsuk anenkratin átarum tusan áujtajrume. ¹⁸ Túrakrum ashí Yus-shuarjaj Kristu anenkrattairi nekaattarme. Imiá uunt asa nankansuk tuke amuukachminiaiti. ¹⁹ Nu anenkrattai ashí takamtsuk nekaachmin ajn nekaatarum tusan áujtajrume. Nujaj Yus takamtsuk pimiutramkattarme.

20 Nekas Yus shiir awajnasti. Ni ti kakaram asa ii seajnia nuna nan̄kaamas tura enentáimprachminia nunasha nan̄kaamas iin pujurtamuk ashí túramniaiti. 21 Ashí Yus-shuarjaisha tura Krístujaisha Yusa péñkeri tuke paant wantinin atí. Yus tuke iniaitsuk shiir awajnasti. Núnisañ atí.

4

Yusa Wakaníjiaí tsanínkiar pujakur túratin

1 Atumsha ni shuari ajastin Yus achikma asarum péñker wekasatarum tájarme. Ii Úuntriniun étserkun sepunam pujakun seajrume. 2 Nekasmiancha ajasrum aneniakrum katsunnairatarum. 3 Yusa Wakaní chikichik shuar awajtamkurmin shiir awajnisarum pujustarum. 4 Yusa Wakaninkia chikichkiiti. Tura ashí métek Yus achikma asar métek Niijiaí shiir pujustin enentáimji. Iisha Kristu ayashí ayashímkia asar chikichik ayashkiitji. 5 Ii Uuntrí chikichkiiti. Niñki nekas enentáimtusar métek imiantiniaitji. 6 Chikichkiiti Yus, ashí Yus-shuarti ii Aparínti. Ashí akuptamniuitji. Ashí ni shuariin pujak ii enentáin pujurtamji. Ti nekas ashí mash, Israer-shuartisha Israer-shuarchasha, imiá chikichik ajasuitji.

7 Tura chikichik chikichik niisháa shiir takastinian suramsaitji. Tura Kristu wakerimia núnisañ suramsaji. 8 Nu asamtai Yus-Papiniumsha tawai: “Achikman jukí nayaimpiniam wakamiayi. Tura shuáran shíiran susamiayi.” Tu áarmaiti.

9 Tura “wakamiayi” tana nu ¿warintia? Kristu nayaimpiniam pujá asa yakí wákañka emka tárashinkiait. Nekas nunká taramiayi. 10 Niñki ataksha nekas nayaimpiniam wakamiayi. Nuna tura asa ashí ni shuarin pimiutkarmiayi. 11 Tura nujai chikichan akatramun awajsamiayi. Chikichnasha Yúsna etserniun awajsamiayi. Chikichnasha uwempratin chichaman etserniun awajsamiayi. Chikichnasha Yus-shuara wáinniun awajsamiayi. Tura chikichnasha unuikiartinian awajsamiayi. 12 Túramtai ashí Yus-shuar ni takatrijiaí yáiniaikar ti péñker shuar ajainiakui Kristu ayashí takamtsuk katsuarartatui. 13 Nujai Yus nekas enentáimtamunam Yusa Uchirí ashí métekrak péñker nekaattaji. Nu túrakur katsukir Krístujai métek péñker ajastatji. 14 Tura uchía áintsar áhattaji. Úchikia ashí yamaram chichaman antukar wari yapáñniawai. Tura anañkartinia chichamen antukar waaku ániawai. Kame nu anañkartin shuar ti paant chichayatañ ni shiir chichamejai anañkatniun pujurenawai. 15 Antsu nekas aneniakur nekas chicham ujanaiktiniaitji. Túrar Krístujai tsanínkiar tuke tsakakir ashí péñker túratniujai Niijiaí métek ajastatji. Krístuka ashí ni shuari muuké áintsan̄kete. 16 Tuma asa ni ayashin wáinkui ashí nuna muchitmarí péñker yáiniaikar ashí ni túratniurin shiir takasartatui. Nujai nu ayashnium muchitmarí chikich chikich péñker takainiak métekrak shiir tsakartatui. Tura anenainiakui nu ayashsha péñker úuntmartatui.

Krístujai tsanínkiu asar yamaram iwiaakmanum wekaaji

17 Ii Uuntrí Kristu ímmianum juna akatjarme: Chikich aents Yúsna nékachu ásar ántar ni enentáimmiájain̄ wekainia núnisrum wekasairap. 18 Ni enentáin kusuru ániak Yusna nuna nekaatniun wakeruiniatsui. Tuma ásar shiir wekasatniun, Yus amaana nuna, nékainiatsui. 19 Nu arantcha, ni túramurijiaí natsamtichu ásar ti yajauchiniam surumakar ashí tunaan wararainiak túrin ániawai. 20 Antsu átumka núnisrum enentáimtustin unuimiarcharmarme. 21 Nekas Nii anturkaitkiurmeka tura Jesus nekas tama Kristu unuiniarmaitkiurmeka Nin shiir enentáimtustin unuimiarmarme.

²² Yaunchu enentáimtairmeka ayash wakeramu anankramin ainia nujaj pi-aku asa imiá yajauchiiti. Nu enentáimtairmesha yaunchu túrutairmesha ajapa iniaisatarum. ²³ Túrarum péñker enentáimsarum wakannium yapajiátarum. ²⁴ Tura yamaram enentáimtairam emetatarum. Nuka Yusjaj métek najanamu asa nekas péñker tura shiira nuna tuke túriniaiti.

²⁵ Nu asamtai chikichik ayashi muchitmarj asarum wáitrutsuk nekas chicham chicharnaisatarum.

²⁶ Kajeakrum tunáa túrawairap. Tura nu kajekmasha tsawant takamtsuk áchatniuiti. ²⁷ Uunt iwianch yajauch awajtamsatin tsankatkaip.

²⁸ Kasasha kasamtsuk kakaram takakmasti. Tura ni uwejéjaj péñker takaak atsumainia nú shuarnasha susati.

²⁹ Muijmiai chicham chichasairap. Antsu chichastin akui péñker chicham, chikich shuar péñker awajsamnia nu chichastarum. Anturtuinia nuna yáintaj tusarum nu chicham ujaktarum. ³⁰ Yusa Shiir Wakanj kúntuts awajsairap. Warí, Yúsnaiti tusa pujurtamji. Tura pujurtamuk takamtsuk uwemtikramprattaji.

³¹ Ashí yajauch ana nuyá kanaktiarum. Nakitratniusha, kajernaiki-atniusha, tura kakantrar charáa charáa ajatniusha, katsekmaktincha, tsanumpratniusha mash atsutí. ³² Antsu shiir awajkartin ajasrum waitnen-nairarum, Kristu jakamujaj Yus atumí tunaarjñ tsankurtampra nútiksarmek tsankurnairatarum.

5

Yus-shuar túratin

¹ Nekas Yusa Uchirj aneamu asarum Nii tura núnis túratin wakeruktarum. ² Kristu in anenmaj núnisrum anenaitiarum. Kame ii tunaarjñ akikmaktaj tusa jákatniunam surumakmiayi. Túramtai Yus shiir enentáimtusmiayi.

³ Yusna asarum tsanirmatniusha yajauch túratniusha tura jú nunkanmayan ikiaunkatniusha ishichkisha enentáimtuschatniuitrume.

⁴ Natsanmaincha, ántar chichamsha yainmakchamnia asamtai chichaschatniuitrume. Antsu Yus shiir yuminsatniuiti. ⁵ Shuar chikich nuwajaj tsanirmakka tura ashí yajauchin wakerakka tura jú nunkanmayan ikiaunkatniun wakerakka Yusaj Kristu akupea nuj penké pachinkiachminiaiti. Kame ju nunkanmayan ikiaunkatin ántar-yus tikishmatratniua nujaj méteketé. ⁶ Nu túramniaiti tusar ántar chichamjaj anankramacharti. Warí, nuna túruiniakui Yúsan umirainiachun Yus ti asutiáwartatui. ⁷ Tuma asamtai nu shuar penké pachischatniuitrume.

⁸ Yáunchuka atumsha kiritniunam wekainiuyarme. Tura yamaikia Krístujaj tsaninkiu asarum péñker tsáapninium wekaarme. Shuar tsáapninium wekainia nujaj métek wekasatarum. ⁹ Tsáapninium wekainiaka shiir awajkartincha tura nekas chichamtincha tura péñker túrin ániawai. ¹⁰ Ii Uuntri Kristu wakeramu nekaatin wakeruktarum. ¹¹ Kiritniunam wekainia nu túramu pachisairap. Antsu nu shuar tsáapninium enkeatarum. ¹² Ni uuk túruinia nu áujmatsatin natsanmainiaiti. ¹³ Tura ashí tsáapninium itiamu ashí paant ajawai. Tsáapnikia ashí paant awajeatsuk. ¹⁴ Nu asamtai Yus-Papinium tawai:

“Kanaruitme nu shintiártá. Jakamunmaya nantáktiá. Tura Kristu tsáapin awajturmastatui.”

Tu áarmaiti.

¹⁵ Nu asamtai átum túramu ímiastarum. Nékachu áintsarum pujusairap. Antsu péñker enentáimprarum wekasatarum. ¹⁶ Péñker túratin tsawant wasúrkáip. Tunáa ti pampaatsuk. ¹⁷ Enentáincha áirap. Ii Uuntri Kristu

warinia wakera nu enentáimtustarum. ¹⁸ Nampekairap. Nampeakmeka aya yajauch ajame. Antsu Yusa Wakanj winia enentáiruuj takamtsuk pujurtusti, tu enentáimsatarum. ¹⁹ Túrarum Yus shiir enentáimtakrum Yus-kanta kantamkirum shiir áujnaisatarum. ²⁰ Ii Uuntri Jesukrístu náarijjai ashí irunna nu Yus Apa tuke yuminsatarum.

Yus-shuar túratin

²¹ Yus-shuar asarum nuámtak umirnaikiatarum. Túrakrum Kristu shiir awajsattarme.

²² Núwaka Krístun umirna núnisan ni áishrincha umirkatniuiti. ²³ Kristu ni shuarin akupeana núnisan áishmansha ni nuwen akupkatniuiti. Kristu ni shuarin ayashimiak ni muuké áintsankete. Tura nin uwemtikiartiniaiti. ²⁴ Nu asamtai Yus-shuar Krístun umirin áiniawai. Núnisan ashí ana nujai nuwa ni áishrin umirkatniuiti.

²⁵ Kristu ni shuarin ti aneak nin yáintaj tusa jákatniun surumakmiayi. Núnisrumek áishmantirmesha atumi nuwé aneatniuitrume. ²⁶ Kristu ashí ni shuarin ni Chichamejai tura entsajai nijjar ní shuar péñker árat tusa jakamiayi. ²⁷ Nujai ashí ni shuarin tunaarinniuchu tura yajauch máatrachu antsu ti péñker shiir awajas Niini éjetaj tusa túramiayi. ²⁸ Núnisan áishman ni ayashin anea núnisan ni nuwen aneatniuiti. Shuar ni nuwen aneak nujai ni ayashincha aneawai. ²⁹ ¿Yaki ni ayashin nakitniuit? Antsu péñker wáiniuk áyureatsuk. Kristu núnisan ni shuarin wainiui ³⁰ ni ayashí asamtai. Kame ni ayashí muchitmarintji. ³¹ “Tuma asamtai áishman ni aparincha nukurincha ikiukin ni nuwejai tsaninkiar chikichik ayashtin ajainiawai.” Tu áarmaiti. ³² Nusha Kristu ni shuarijjai tsaninmán tawai. Nuka yaunchu nekaachma yamaikia nekanaiti, tura ti enentáimturiniaiti. ³³ Tura núnisan ashí áishmantiram atumí nuwé atumí ayashía nútiksarmek aneatniuitrume. Nuwasha ni áishrin umirkatniuiti.

6

¹ Uchitirmesha, Yus-shuar asarum apasha nukusha umirkatarum. Nuka ti péñkeraiti. ² Emka akupkamu “umirkam nekas shiir átatme” tana nu júiti: “Apasha nukusha umirkata.

³ Túrakmeka shiir átatme tura jú nunkanam untsurí tsawant pujustatme” tawai.

⁴ Atumsha, uchirtintirmesha, atumí uchiri ántarum akajkairap. Antsu Yusan shiir enentáimtusarat tusarum ti péñker jintinkirum tsakatmartarum.

⁵ Takakmautirmesha, atumí uuntri jú nunkanam pujuinia nu ti péñker umirkatarum. Kristu umirkatniua áintsarum wishiktsuk ashamakrum tuke enentáijjai takarsatarum. ⁶ Aya wáitmakui shiir enentáimtursat tusarum péñker takarsairap. Antsu Kristu takarniurja núnisrum ashí ame enentáimjai Yus wakera nu túratarum. ⁷ Aya shuárnak yayá nútiksarum takasairap. Antsu ii Uuntri Kristu takarsatniua nútiksarmek ásump enentáijjai takastarum. ⁸ Kame chikich chikich ni takasmajai métek akinkiartatui. Ii Uuntri Kristu nu shuar péñker túramujai métek akiktatui.

⁹ Tura atumsha, iniamniutirmesha, atumí takartamu wakanj mántutsuk shiir enentáijjai iniartarum. Nekas enentáimpratarum. Ii Uuntri nayaimpiniam pujana nuna niisha atumjai métek umirainiawai. Tura Yuska ashí shuaran akantsuk métek iyawai.

Yusa kakarmarijjai iwianch taritatarum

¹⁰ Wátsek, yatsuru, ii Uuntri Yusjai tsaninkiu asarum ni ti kakarmarijjai iwianchjai máanaiktin kakaram ajastarum. ¹¹ Apach máanainiak jiru entsarua

núnisrum Yus susamujai entsartarum. Nujai íwianch nupettamkui tariar-tatme. ¹² Kame Yusna takáa asar penké áentsjai máaniatsji antsu yajauch wakan kakaram íranna nujai máaniaji. Niisha ju nunkanam, kiritniunma áintsan, tunaanum wekainia nuna akupin áiniawai. ¹³ Jiru entsartinia áintsarum Yus súramna nu entsartarum. Nu entsarmajai itiurchat tsawant taritra nupetkarum tuke tariarum wajastatrume. ¹⁴ Wats, nekas tariartin nekas chicham emenmamatarum. Tura penker túratniujai jatairum ajaktarum. ¹⁵ Suntar iwiarnak sapatan aweá áintsarum Yusa shiir chichame etserkatin iwiarnartarum. ¹⁶ Nuyasha ashí nankaamas, tantar takustinia áintsan, Yus tuke nekas enentáimtustarum. Nujai íwianch eketrámkamusha uwemturtatme. ¹⁷ Múukem ajaktincha Kristu uwemtikrampramu múukmjin etsenkruktarum. Tura Yus-Chicham puniáa áintsan achiktarum. Nuka nekas Yusa Wakaní puniarinti. ¹⁸ Yusa Wakaníjiai Yus áujeakrum tuke seatniuitrume. Tura tuke aneara pujustarum wake mesetsuk, tura ashí Yus-shuar ainia nusha Yus áujtustarum. ¹⁹ Núnisan winiasha áujtursatarum. Wi sepunam pujayatan Yus winia chichastinian surusat tusarum seatritiarum. Tura wi chichaakun sapijmiatsuk Shiir-chichaman yaunchu nekaachma paant awajsat tusarum áujtursatarum. ²⁰ Yus nu chichaman etserkatniun akuptukuiti. Nuna túrakun sepunam pujajai. Sapijmiatsuk etserkat tusarum Yus áujtursatarum.

Amikmaamu

²¹ Ii aneamu yachj, Tíkikiu, ashí wi túramun ujatmaktatui. Niisha Ii Uuntri Krístunu etserkatniun ti penker yáinniuiti. ²² Tuma asamtai ii jui pujamun ujatmak ikiantamprarat tusan akuptajrume.

²³ Yus Apasha tura ii Uuntri Jesukrístusha ashí Yus-shuartirmin anenmak shiir imiatkinchanum pujustinian suramsarti. Tura Nin tuke nekas enentáimtustinian suramsarti. ²⁴ Ashí ii Uuntri Jesukrístun tuke enentáijiai aneana nuna Yus shiir yáintí.

Nuke atí.

Papru JIRIPIUSNUMIA SHUARAN papi akuptukma

Papru sepunam pujus Jiripiusnumia Yus-shuaran áatramiania nu

¹ Wi Papru Timiutéujai Jesuskrístu takarín asar ashí Yus-shuar Jiripius péprunam pujarmena nu ju papi akuptaji. Yus-shuaran wainin árumna nusha tura Yus-shuaran yain árumna nusha ashí Yus-shuarsha nunisan Yusna asarum tura Jesukrístujai tsanínkiu asakrumin ju papi áateajrume. ² Yus ii Aparísha Jesukrístu ii Úuntrísha atumin waitnentramaiania ásar imiatkinchanum tuke shiir pujustinian yainmakarti.

Papru Yus-shuaran Yúsan áujtawai

³ Ashí tsawant atumin enentáimtakun Yúsan tuke shiir yúminíajai. ⁴ Yúsan áujeaknasha ti warasan seatjarne. ⁵ Kame iikia yámankamtaiknumia Yus-Chicham métek yáiniáikiar iniaitsuk takasuitji. ⁶ Yus atumín ti péñker awajsatniun naníkaasa asa núnisan Jesuskrístu táatsain tuke shiir awájtámki nekas péñker najatmattarme. Nuka ti nekasaiti. ⁷ Atumin ashí ti aneajrume. Kame wi sepunam pujakun Yus-Chichaman akasmatkun tura Yus-shuar kakararti tusan takaakui átum yáintiarme. Yus ti aneñkartin asa nu túratniun mai metek tsañkatrámkaitji. Tuma asantai atumin júnisan enentáimtustin ti penkeraiti. ⁸ Jesukrístu aneñkrattairíjiai wi atumin aneamun Yússa paant nékarui. ⁹ Yúsan áujeakun anearmena nú naníkaamas aneak tusan seatjarne. Tura nújajisha ti neka ajasrum ¹⁰ ashí péñkera nu achikiuk tusan Yúsan áujtajrume. Atumin nu túrunamtaínkia yamaisha tunáajainchu pujustatrume tura Krístu támatái sumamashtatrume. ¹¹ Núnisan Jesukrístu kakarmaríjiai ashí péñker túrin áatrume. Tura nújai ashí shuar Yúsan ti shiir enentáimturartatui.

Wi ju nuníkanam aya Krístunak enentáimtakun pujajai

¹² Winin túrunamu itiurchat ain nujai uwempratin chicham nekas pam-pawai. Nu nekaatarum tusan wakerajrume, yatsuru. ¹³ Iis, uunt akupniun suntarísha tura ashí shuarsha wi Krístunun etseru asan sepunam pujamun paant nékainiawai. ¹⁴ Ti untsurí Yus-shuar wi sepunam enketman nekaawar ii Uuntri Jesusan nekas enentáimtusar sapijmiatsuk Yus-Chichaman etserainiawai.

¹⁵ Kame shuar awai winia kajertuiniak tura naníkaamantu enentáimtumainiak Krístun páchiniawai. Antsu chíkich shuarka nekas enentáijjai Krístun etserainiawai. ¹⁶ Yajauch shuarka Krístun shiir enentáimtutsuk antsu ashí shuar ní chichamenak anturkar wíi shuar ajasarat tusar etserainiawai. Túruiniak wisha sepunam pujakui nu arant itit awajtustinian wakerutainiawai. ¹⁷ Antsu péñker shuar Krístun nekas aneenak etserainiawai. Nu uwempratin chicham imiá penkeraiti wi titin asantai winiasha anentainiak shiir etserainiawai. ¹⁸ Wats, mai metek chíkich yajauch enentáijjai tura chíkich shiir enentáijjai Krístun etserainiakui shiir enentáimjai.

Tura nuna naníkaamas shiir enentáimprattajai. ¹⁹ Kame Yus áujtursa asakrumin tura Jesukrístu Wakanísha yaintiu asantai ti péñker uwempran jiinkit-tajai. ²⁰ Nekas juna wakerajai: Natsamtsuk uunt akupniun Jesukrístun paant ujakartinian wakerajai. Nujai winí Krístu kakarmari pujamu ti paant nekanattawai. Mántuiniakuisha tura mántuiniachkuisha ashamatsjai.

Aya Kristu kakarmarın winí nankaamas nekaawarat tusan wakerajai. ²¹ Wíjiainkia ju nunkanam iwiaaku pujakun aya Krístunak enentáimtakun pujajai. Tura jákatniusha juí pujajnia nuna nankaamas péñkeraiti. ²² Ju nunkanam pujakun Uunt Jesusnan takasminiaitjai. Nu asantai tunatsuk achiktaj nékatsjai. ²³ Wíjiainkia itiurchataiti mai achiktin. Jákatniuncha wakerajai Krístujai tsaninkian pujustaj tusan. Wíjiainkia nu imiá péñkeraiti. ²⁴ Túrasha atumin yáintaj tusan tuke ju nunkanam iwiaaku pujusminiaitjai. ²⁵ Kame tuke pujustajai nékajai. Núnisnak atumjai pujakun Yus nekas enentáimtakrum nankaamas waraakrum tuke katsuáruk tusan yáintajarme. ²⁶ Nu asantai wi atumjai pujakui Jesukrístu yumínsarum shiir warastatrume.

²⁷ Kristu chichame ti penker asantai atumsha aya péñkera nuke túratarum. Wi atumjai pujaknasha tura yajá pujaknasha átum ti shiir túrarmena nuna antuktinian wakerajai. Ashí shuar uwempratin chichaman nekaawar umirkarat tusarum chikichik enentáijjai kakaram ajastarum. ²⁸ Atumí nemasrisha ishichkisha sapijmiamtikramkarain. Nu túrakrumin nu shuar emesratniunam weena nusha tura átum uwempratniusha paant nekanattawai. Núnisan atí tusa Yus túrait. ²⁹ Krístunu asarum Nii nekas enentáimtustinniasha tura Niiniu asarum wáitsatniusha Yus anenma asa tsankatramkaitrume. ³⁰ Yus-Chicham pamparat tusar maimetek ti takáa asar wáitiaji. Wi nuik ti takasmaj nu nekamarme. Tura yamá tuke takaaj nusha ántarme.

2

Kristu péejchach ajasmatai Yus ti uunt awajsamiayi

¹ Kristu ikiantamkuisha, ni anenkrattairi atsanamkuisha, ni Wakani atumjai pujakuisha, anenkratniuitkiurmesha, waitnenkratniuitkiurmesha ² waramtikrustarum. Métekrak takastarum. Mai metek anenaitiarum. Yusa Wakani atumí enentáin pujá asantai chikichik enentáik enentáimsatarum. ³ Átum wakeramuk túrawairap. Nankaamantu ajastaj tírap. Antsu péejchach ajasrum chíkich shuar atumjai nankaamas péñker enentáimtusta. ⁴ Aya níniak péñker átatna nunak shuar túrashti. Antsu chíkich shuar yáinminia nuna túrati.

⁵ Kristu Jesus enentáimpramia núnisrum enentáimpratarum. ⁶ Niisha Yúsaitiat ju nunkanam winiak tuke Yusjai métek átinian emettsuk ⁷⁻⁸ antsu nuna ikiuak aents ajas péejchach asa ashí aentsu takarın ajasmiayi. Tura aentsu ayashın ayashimiak tura Yúsan umireak jákatniuncha surimiakchamiayi. Maa, imiá tunaarinnia áintsan krúsnum natsanmainium jakamiayi. ⁹ Túramtai Yus nekas nankaamantu awajsamiayi. Ni náarıncha ashí paant awajsamiayi. ¹⁰ Tuma asantai ashí nayaimpiniam írúnna nusha, nunká írúnna nusha, tura iwarsamusha Jesusa náarın antukar tikishmatrartatui. ¹¹ Tura ashí shuar Jesukrístu ashí akupin ajasman paant nekaawartatui. Nújainkia Yus Apá kakarmarisha paant nekanattawai.

Yus-shuar kiritniunam keeák tsápin awajeana áintsan áiniawai

¹²⁻¹³ Nu asantai, aneamu yatsuru, wi atumjai pujakui umirtukmarmena nuna nankaamas yamaikia arant pujakuisha umirtuktarum. Iis, Yus atumí enentáin takaak ni shiir wakeramu wakeruktinniasha tura umiktinniasha pujurtamprume. Nu asantai atumsha kakaram ajastarum Yus ti penker awajtamsatniun wakera nu túrunati tusarum. Tura péejchach enentáimprarum awajirminiaitjai tusarum aneara wekasatarum.

¹⁴ Ashí yajauch tunaitsuk tura jianaitsuk wekasatarum. ¹⁵ Túrakrum makuumatsuk tunaajainchu átatrume. Antsu Yusa uchirí átatrume. Ju

nun_{kan}masha shuar imiá tunaan túrin_{ja}isha máatrachu asarum kiritniunam ji keeá áintsan_{ke}trume ¹⁶ iwiaaku pujustin chicham paant awajeakrum. Nú_{ja}i Kristu tá_matai atum_{in} án_{tr}an takascha asan ti shiir wararsattajrume. ¹⁷ Winia takatru_{ja}i Yus-shuar ajasakrumin wi jákatniuitkiuncha nú_{ja}isha warasaint_{ja}i. Atumsha wi waraajna ju_i núnisrumek warastarum tusan wakera_{jr}ume. ¹⁸ Atumsha waraakrumin métek wararnaisatai.

Timiutéuncha Epaprutíiuncha Papru u_{ja}tkamiania nu

¹⁹ Ii Uuntri Jesus wakeraku_{in}kia Timiutéun írmainiarat tusan ti warik akuptuktat_{ja}rme. Tura átum shiir pujamu ujateakui warastat_{ja}i. ²⁰ Kame Timiutéu wij_{ja}i métek enentáimna áinis chíkich shuar atsawai. Niisha átum shiir pujusuk tusa ti nekas enentáimtur_{ma}rme. ²¹ Chíkichka Kristu wakeramun iniaisar ní wakeramunak páchiniawai. ²² Tú_rasha átumka Timiutéu tuke pé_nker tú_ramu nékarme. Uchi ni aparí_{ja}i takaana áinis Yusa shiir chichame etserkatniun yáintki_{ai}ti. ²³ Winia itiurtukarti_n nuna nekaan Timiutéu írmainiarat tusan akuptuktat_{ja}rme. ²⁴ Kame Kristu yáintkiui wíkisha wárik ímniait_{ja}rme.

²⁵ Wi atsumaj nuna írsati tusarum Epaprutíiu akupturkamarme. Wij_{ja}i métek tsani_n takasuiti. Tura métek wáitsait_{ji}. Áunkesha akupkamnia enentáim_{ja}i. ²⁶ Nii jaawai taman átum antukman nekáa, írmaitniun ti wakerut_{ma}rme. ²⁷ Maa, nekas ti jan_{in}kiamai. Tú_rasha Yus nin waitnentramai. Kame winiasha wi ju_i wáitiakun nii jakamtai nu arant ti kuntuts pujuschatniun waitnentrur_{ma}i. ²⁸ Tuma asamtai akuptuktinian wakera_{jr}ume. Tura atumsha ataksha wáinkiarum waraakrumin wisha ti kuntuts enentáimchakun akuptuktat_{ja}rme. ²⁹ Kristu yuminsarum ti shiir warasrum wáinkiatarum. Chíkich shuar niij_{ja}i métek pé_nker Yus-shuar ainia nusha shiir enentáimtustarum. ³⁰ Kristu takatr_n takaak ti jan_{in}kiamai. Átum yáintkiachminia nuna winia yáintkiataj tusa pujus ján_{in}kiamai.

3

Kristu nekaatin ashí nan_{ka}amas pé_nkeraiti

¹ Ayu. Warastarum, yatsurtiram, ii Uuntri Kristu ti pé_nker asamtai nuik áatramajrum nuna ataksha títiat_{ja}rme. Ataksha ujam yainmakminiaitkiu_{in}kia wí_{ja}in_{ka} itiu_rchatchaiti atak enentáimtik_{ra}tin. ² Yajauch shuar_{ja}i aneartarum. Nu shuar Muisais timia núnis tuke yamaisha tsupirnaktini_{ai}trume tuiniawai. ³ Antsu iikia ayash tsupirnakmaj_{ja}i pé_nker átiniait_{ji} tu enentáimtats_{ji}. Iikia antsu ii wakan_{ja}i Yus shiir awajeaji tura Jesukrístunu asar Ni_nki shiir warar_{ji}. Nu tú_rakur Muisais timia nu umintikia iit_{ji}. ⁴ Ju nun_{ka}nam írunna nu_{ja}i waantu enentáimpramniaitkiu_{in}kia ashí shuar_{ja}i nan_{ka}amas wikia waantu enentáimtumaraint_{ja}i. ⁵⁻⁶ Israer-shuar asan Muisais timia núnisan wi akiiniamtai uchu (8) tsawant nan_{ka}asmatai tsupirtukarmiayi. Israer-shuarnum Pinjam_{in} weeit_{ja}i. Winia aparsha nukursha mai Israer-shuar áiniakui wi imiá Israer-shuarait_{ja}i. Wisha Pariséu tuinia núnisan Muisais akupkamun ti umirin asamtai chíkichka winia sumamtikiatniun tujintrin ármiayi. Tura Pariséu asan Kristu-shuarin ti kajerkan áin_{tr}am_{ja}i. ⁷ Ashí nu_{ja}in_{ka} waantu enentáimtuma_uyajai. Antsu yamaikia Krístuj_{ja}in_{ka} pé_nké ántar áiniawai tajai. ⁸ Ashí enentáimpramnia ákuisha winia Úuntur Jesukrístu shiir enentáimtustin nekas pé_nkeraiti. Nu asamtai Krístunu ajakun wi takusmaj nu muijmiai ajasmatai núnaka iniaisam_{ja}i. ⁹ Nuna tú_ran Nii_{ja}i tsanin_{ka}n pujajai. Tura akupkamu umirkatniuj_{ja}i pé_nker ajaschait_{ja}i antsu Krístun enentáimtakui Yus “pé_nkeraitme” túrutui. ¹⁰ Tuma asamtai ashí nan_{ka}amas wakeraj nu júiti: Krístun pé_nker

nekaan nekas enentáimtustinniasha tura ni iniantkimiú kakarman takustinniasha wakerajai. Tura Níijíai métek ajastinian wakerakun ni wáitkiamunam tsaníninniasha tura Nii jakamia núnisan jákatniuncha wakerajai. ¹¹ Túraknaka Krístujai métek jakamunmaya nantaktiaj tusan wakerajai.

Papru kakaram ajasmiayi Kristu wakeramun umiktinian

¹² Kame wakerukuitjia nuna mash umirkachuitjai. Krístujai métek nekas péñker shuar ajaschaitjai. Túrasha Kristu Jesus “nuí ejetajam” emka túrutkui, wisha nuí jeataj tusan kakaram ajasan pimpitsuk takaajai. ¹³ Yatsuru, wisha nuí jeajai tátsujai. Antsu yaunchu túrutain kajinmatkin kakaram ajasan Kristu wakeramunam jeatniun takaajai. ¹⁴ Tura nuna umikmatai nayaimpiniam Jesukrístujai tsanínkian shiir pujustinian Yus surustatui.

¹⁵ Ashí shuar Yusjai katsuuru ájinia nu wi tájana núnis “jeachuitjai” tu enentáimpratniuitji. Tura “jeaitjai” enentáimkiurminkia Yus nunasha atak enentáimtikramprattarme. ¹⁶ Tura aneartarum. Naki pujutsuk jeajnia nujai métek umirkatin pimpitsuk takastiniaitji. ¹⁷ Yatsuru, wisha tura chikichcha wíjjai métek péñker túrajnia nu wáinkuram atumsha núnisrumek túratarum. ¹⁸ Tura yajauch shuarsha írunui. Wi nuiksha ti ujakmajrume tura ataksha útkun ujaajrume, nu shuar Kristu krúsnum jakamun muíjjaiiniawai. ¹⁹ Tuma ásar emesratniunam akupnakartatui. Ni ayashí wakeramun, ni yusria áintsan, tuke umirainiawai. Natsanmainian túruiniayat wararainiawai. Tura ju nunkanmayanak enentáimtuiniawai. ²⁰ Antsu iikia nayaimpinmaya shuar asar ii Uuntri Jesukrístu in uwentikrampra asamtai nayaimpinmaya tatí tusar nákaai. ²¹ Nii taa, ii yajauch ayashin yapajjá ni ayashíjjai métek ti shiir awajsattawai. Ashí uunt akupin ajas nu kakarmajai túrutmattaji.

4

Krístujai tsanínkia wekáa asarum warastarum

¹ Nu asamtai, aneamu yatsuru, ii Uuntri Krístujai tsanínkiu asarum kakaram ajastarum. Maa, ti aneakun atumin enentáimtakin ti waraajai tura ístajrum tusan wakerajrume. Tawasap achikiar shiir enentaimsatniua núnisnak shiir enentáimtajrume.

² Ewautiancha tura Séntikincha, ii Uuntri Kristu shuari ásar, mai metek enentáimsarat tusan seajai. ³ Amincha, winia airú, nu nuwa yáinkta tusan seajme. Niisha wi iwiaaku chichaman étsereakui wíjjai métek takasarmai. Tura Krimintisha tura chikichcha wíjjai métek takasarmai. Nuna náarin iwaaku átinnium Yus átraiti.

⁴ Nu asamtai Uunt Jesusjai tsanínkia pujá asarum warastarum. Ataksha “warastarum” tájarme. ⁵ Uunt Jesus tátin ishichik ajasai. Tuma asamtai tsanka enentái takakrum nu paant nekanati.

⁶ Itiurchat enentáimsatin atumjai péñké atsutí. Antsu tuke Yus áujkum ashí itiurchatrum ujakta. Atsumamuram Yus seata. Túram Yus yuminsata. ⁷ Nuínkia atumí enentái ankant átinian, áentstikia péñké nekaachminia nuna, Yus amastatui. Yus atumin ankant awajtamsa asa atumí enentáin tura atumí enentáimsamurincha yajauch wayawain tusa shiir waitmaktatrume Jesukrístujai tsanínkiu asakrumin.

Ashí péñker ana nu enentáimsatarum

⁸ Yamaisha yatsuru, júchiniak títiatjai. Yus-shuarti enentáimsatniun chichastatjai yamaikia. Ashí nekas ana nu enentáimsatarum. Tura ashí anturkamnia ana nusha, naka chicham ana nusha enentáimsatarum. Tura yajauch chichamsha enentáimsairap. Tura antsu ashí shiir ana nusha, chikich shuarnasha péñker enentáimtusminia nusha, kame ashí péñker

ana nu enentáimsatarum. Nuyásha chíkich shiir anturkamnia ana nusha enentáimsatarum.

⁹ Wi unuiniarmajrumna nu umiktarum. Tura wi túramur ísurmena nu tura antukurmena nusha umiktarum. Túrakrumniñkia Yuska ankant átinian amastaj tusa pujurtamsattarme.

Jiripiusnumia Yus-shuar Páprun kuítian akuptukarmiania nu

¹⁰ Ii Uuntri Kristu anea asarum winiasha ataksha enentáimturú asakru-min ti waraajai. Kame kajinmatrukmiarme tátsujai antsu kuítrum atsakui yáintkiatin tujinkiamarme. ¹¹ Tura kuítian atsumakun tátsujai. Antsu wi takakjana nujaiñ warastinian unuimiáruitjai. ¹² Kuítrinchatí pujustinia nuna nékajai tura ti nukap takustinia nunasha nékajai. Tsukamaknasha jéemarnasha, itiarar takustinniasha tura penké takutsuk pujustinniasha unuimiáruitjai. ¹³ Kristu ni kakarmarín surakui ashí túramniaitjai. ¹⁴ Tuma aiñ atumsha wi atsumamu akupturkarum ti péñker túramarme.

¹⁵ Jiripiusnumia shuartiram, ju ti penker nékarme. Masetunia nunkanam Yus-Chichaman etserumtai aya atumek kuit akupturkamiarme. Wi et-serkamujai atumí wakanín yáinma asamtai yuminsarum akupturkamiarme. ¹⁶ Atumek wi Tisarúnikia nunkanam atsumakun pujaisha kuit akupturkamiarme. ¹⁷ Aya kuit akupturkakrumin tu enentáimtsujai. Antsu nu kuit Yusai kawentramkaku tusan wakerajrume. ¹⁸ Epaprutítiujai akupturkamarum nujaiisha atsumamaj nuna nankaamas tiaruncha wáinkiajai. Akupturkamarum nusha ti kunkuin Yus susamua áinis ti shiir auyi. ¹⁹ Winia Yúsrusha ti péñkeran núkap takakui. Atumsha Jesukrístunu ajasu asarum Yus seamniaitrumé. Tura Yuska ti takakna nujai ashí atsumarmena nuna suramsattarme. ²⁰ Ii Aparí Yus tuke shiir atí. Nuke atí.

Amikmaamu

²¹ Winia náaruisha tura Jesukrístu náaríncha ashí Yus-shuar ainia nu chícham ujatruktarum. Niisha shiir pujusarti. Wi írutramusha núnisañ shiir pujusarti tusa akupturmainiawai. ²² Tura ashí akupin Sésarai pujuinia nuyá Yusna ajararuka tura chíkich Yus-shuarsha shiir pujusarti tusa chichaman akupturmainiawai.

²³ Ii Uuntri Jesukrístu atumniasha ti shiir yainmakarti. Nuke atí.

Papru KURUSENMAYA SHUARAN papí akuptukma

Kurusenmaya Yus-shuaran Papru áatramiania nu

¹ Wi Pápruitjai. Yus wakerutak Jesukrístunun etserkat tusa akatra akupka-muitjai. Wisha ii yachi Timiutéujai ² ju papí áarar nuí Kuruse péprunam Kristu péñker umirkarum Yusna ajasuitrumna nu akuptaji. Yus ii Apari atumin wáitnentaimturma asa yainmakarti imiatkinchanum tuke shiir pujustinian.

Papru Yus-shuaran Yúsan áujtusmianis nu

³ Iisha atumin Yus áujtakur ii Uuntri Jesukrístu Apari Yus ashí tsawant yúmiñkijai. ⁴ Atumsha Jesukrístu ti shiir enentáimtamusha tura ashí Yus-shuar aneamusha antukji. ⁵ Uwempratin chicham nekasa nu antukrum atumsha nayaimpiniam atumnian Yus ti shiir ikiusman wáinkiatat tusarum nákarne. ⁶ Nu chicham ashí nunkanam pampaakui shuara enentáin nereá áinis nusháa ajasar yamaikia péñker túrin áiniawai. Núnisañ atumíincha túrunaiti. Yus ti nekas anenkartiniaiti tu etserkamu ántakrumin nu chicham atumí enentáincha nerekmiai. ⁷ Nu chichaman Épapras ujatmakmarme. Niisha iijjai métek takasu asamtai ti aneamuiti. Atumniasha Kristu takatrin ti shiir takartamsaiti. ⁸ Niisha átum Yus-shuar asarum mai anenai ajamun ujatmakmaji.

⁹ Iisha nu antukar Yus ashí tsawant áujtajrume. Yus ni wakeramun ti paant nekaprutmawarat tusar seaji. Ashí Yúsnan ni enentáimtaijijai ashí Níiniun paant nekaatniun Yus jintintramat tusar seaji. ¹⁰ Atumsha Krístunu ainia núnisrum péñker túrutak tusar seaji. Tura ashí ni wakerana nu umiakrum ashí péñker ana nu, nerektinia áintsarmek, túrattarme. Núnis túrarum Yus unuimiatki wéakrum Nin ti penker nekaak tusar seaji. ¹¹ Yus ti kakaram asa ikiantamprat tusar seaji. Nujai ashí itiurchat ákuisha páchitsuk ti shiir warasrum katsuntrattarme. ¹² Yus ni shuarin tsáapnia nuí ashí péñkeran susattawai. Tura incha nuí pachinkiatniun tsankatramka asakrin Yus Apa yuminsamniaitrum. ¹³ Yus iwianchin nupetak íwianch akupeana nú kiritniunmaya uwentikramar ni aneamu Uchiri akupeana nuí wearmakmaji. ¹⁴ Ni Uchiri krúsnum jaka ii tunaarin nijiar tsankurtamar uwentikrampramaji.

Kristu jakamujai Yusjai nawamnaikiar shiir pujustin

¹⁵ Yus wáinkiachminiaitiat ni Uchiri akiiniamai tura ayashimkiamiai. Túmaitiat ashí najanamua nuna yaunchu pujú asa ashí akupniuiti. ¹⁶ Niiijai Yus ashí nayaimpiniam írunka nunasha nunáka írunka nunasha, ashí wáiniáj nunasha núnisañ wáintsuj nunasha mashi najanamiayi. Nu arantcha ashí akupin ju nunkanam írunka nusha, nayaimpiniam írunka nusha, iwianchnium írunka nusha, ashí Niiijai najanamua áiniak Nin umirkarti tusa najanamua áiniawai. ¹⁷ Ashí najanamua nuna yaunchu, Krístuka tuke pujuwiti. Ashí najanamua írunka nuna emestsuk wáinniuiti. ¹⁸ Ashí Yus-shuar métekrak chikichik ayashtinia áinis enentáimkiumka nuna muuke Krístuiti. Tura nu ayashin ni iwiaakmarijjai iwiaaku átinian súsaiti. Niisha ashí jakamunmaya nantakniujai imiá nankaamantuiti. Nujainkia ashí enentáimpramnia írunka nunasha akupniuiti. ¹⁹ Yus ashí takamtsuk Kristui shiir pujumiayi. ²⁰ Núnisañ Yus Kristu krúsnum jakamujai ashí nayaimpinmasha tura

ju nunkanmasha írunna nuna Niijjai nawamnaikiar shiir pujusarat tusa wakerukmiayi.

²¹⁻²² Atumsha nuik tunáa túrin asarum atumí enentáin Yusa nemasri ámarne. Tuma asarum yajá wekaimiarme. Antsu Kristu, aentsu ayashín ayashimiak, krúsnum wáitias jakamujai ii tunaari asakármatai yamaikia Yusjai nawamnaikiar shiir pujaji. Nujai Kristu in péñker ajasuncha tunaan máatrachmancha tura sumamachuncha Yúsai ejetamtatji. ²³ Tuma asamtai Jesukrístu shiir enentáimtusrum kakaram ajasrum katsuartiniaitrum. Tura uwempratin chicham antukuitrum nuyá kanakchatniuitrum. Ju uwempratin chichaman ashí nunkanam etsernakuiti. Wisha, Papru asan, etserkatniun yaimjai.

Papru ashí Yus-shuaran yáinkratniuiti

²⁴ Atumin wáitiaknasha ti shiir waraajai. Kristu ni shuarin nekas péñker awajsat tusa wáitiana nuí pachiinkia asan waraajai. Ashí Yus-shuar Kristu ayashí áintsan áiniakui Yus-shuaran yáintajtsan ayashrujai wáitiakun shiir enentáimjai. ²⁵ Atumin yáinkiai tusa Yus akattur Yus-Chichaman takamt-suk ujakai tusa akuptukmai. Nuna takaakun ashí Yus-shuara yáintrintjai. ²⁶ Yámankamtaiknumiá nekaachman Yus yamaikia ni shuarin paant awajsaiti. Nu chichamnasha ujakarai tusa winia akatar akuptukuiti. ²⁷ Nu chichamsha júiti: Kristu atumí enentáin pujak Niijjai métek ti shíiram awajtamsattawai. Nu imiá shiir chichamnum Israer-shuarchasha pachiiniainian Yus ashí ni shuari nekawarat tusa wakerimiayi.

²⁸ Iisha Kristu étseraeji. Túrar ashí enentáimtikrar péñker nekaawarat tusar jintintiainiaji. Nujai Krístujai tsaninkiar ashí péñker tsakarartatui. ²⁹ Tuma asamtai Kristu ni kakarmarín tí surakui nekas kakaram takaajai.

2

¹ Nekaatarum, yatsuru. Yus-shuaran yáintaj tusan ti takaajai. Tura atumíncha, Rautiséanmayá shuarnasha, tura ashí winia waitcha ainia nunasha yáintaj tusan ti takaitjai. ² Ashí shiir enentáimtikratniun ti takaa-jai. Núnisan aneniarum chikichik enentáijjai métekrak wekasatarum tusan wakerajrume. Nu arantcha, ashí Yusna ti péñker nekaarum tuke katsuaruk tusan takaajai. Nujai Kristu ti péñker nekaattarme. Tura yaunchu nekaachman Yus yamá paant awajsaiti. Nuka Krístuiti. Tura Nii nekaatin nekas shíiraiti. ³ Tura kakaram ajasam Kristu péñker nekaam ashí shiir enentáimpramnia nusha tura ashí Yusna nekaamnia nusha nekaattarme. ⁴ Atumin chikich shuar niisháa chichamjai shiir chichartamas anankramawarain tusan nuna tájarne. ⁵ Wi nuí atumjai pujachkuncha nuí pujajna áintsanak enentáimtajrume. Tuma asan átum métek enentáimprarum tura kakaram ajasrum Kristu nekas enentáimtururmena nuna íisnaka shiir enentáimjai. ⁶⁻⁷ Nu asamtai átum ii Uuntrj Jesukrístu nekas enentáimtusrum Yus-shuar ajasmarmena núnisrum yamaisha Nii nekas enentáimtusrum Niijjai tsaninkrum ashí túratarum. Nu túrakrum Nii enentáimtakrum tuke tsakaki wétatrum. Tura te tariara wajasrum Yusjai kanakchattarme. Yus-Chicham núnisan etsernakmatai nekamarne. Tuma asarum Yus tuke yuminsarum, núnisan péñker wekasatarum.

Krístujai yamaram iwiaakma takakji

⁸ Aneartarum atumsha. Shuar aentsti enentáimmiyajain ashí ju nunkanmayan enentáimprar tura Krístun enentáimtutsuk niisháa chichaman áujtamainiak nekaschajai anankramataj tusa wakerutmainiawai.

⁹ Krístunam Yus ashí takamtsuk pujuwiti. ¹⁰ Túmakui atumsha Krístujai tsaniñkiu asarum ni iwiaakmarí takamtsuk takakuitrume. Krístusha ashí akupniun akupniuiti. Áentsnumsha iwianchniumsha tura nayaimpinmasha ashí akupin íranna nuna akupniuiti. ¹¹ Nu arant átum ayashnium tsupir-natskesha Kristu shuarí ajasakrumin ashí ayash wakeramun, tsupirkat-niua áintsan, Kristu ajapamiayi. ¹² Tura atumsha Yus ni kakarmarijjai Kristu jakan iniantkimia nu enentáimtusrum imianmiarme. Túrarum Krístujai métek iwiarnasmarme. Tura núnisrumek Krístujai métek nantakmiarme. ¹³ Nuikkia átumsha tsupirnatsuk atumí tunaari tuke akui atumí wakanín jákauyarme. Tura yamaikia Jesukrístujai tsaniñkiu asakrumin Yuska atumí tunaari tsankur yamaram iwiaakman suramsaitrume. ¹⁴ Tura ashí ii tumashrin sumamtikramatin amia nuna japiruiti. Kristu krúsnum jakamtai ashí akupkamujai sumamtikramamun tsankurtampramiai. ¹⁵ Núnisan Kristu krúsnum jaka, iwianchnium ashí akupin ainia nuna nupetak ashí íimiainaiñ iniatsararmiayi.

Nayaimpiniam íranna nu enentáimtustarum

¹⁶ Akupkamunmaya Yus ankant awajtamsantai chíkich shuar ame túramujai yajauch enentáimturmaraiñ. Yúamna nujai, úmamna nujai, uwitinha, nantutinha, tura tsawantinha nampermam nujai chíkich shuar yajauch áujmatramkuisha ¿warí urukatin? ¹⁷ Nu nampernum Israer-shuar Kristu túrattana nuna nakumainiak túrin ármiayi. Tura Kristu taa imia Nínki pujá asantai nakumkamuka ántrai. ¹⁸ Tura shuar “Péejchach ajasam Yus áujtsuk aya Yusa suntari shiir awajsatniuiti” túramkuñkia anturkairap. Nu shuar mesekranam wáinkiamun áujmatenak ántar nankaamantu enentáimtumainiawai. Aya aentsti enentáimian chichainiawai. ¹⁹ Tuma ásar Krístujai tsaniñkiar wekainiatsui. Kristu ashí akupin asa ni shuarin Yúsnan jintintiá shiir tsakarát tusa péñker wáiniui. Nu arantcha ashí ápateak Yus wakerana áintsan chikichik awajeawai.

²⁰ Atumsha Krístujai jaka asarum aya aentsti enentáimtai ikiukniuitrume. Nuikia ¿urukamtai ju nunkanmaya ana nu tuke páchiarum? Nii tuinia nu umirkashtiniaiti. ²¹ “Ju antinchatniuiti, tuiniawai. Ju yúashtiniaiti. Tura ju achikchatniuiti” tuiniawai. ²² Nusha ¿warí, takasam amuukashtatuak? Kame áyatik aents akupkamu áiniawai. ²³ Shuar nu akupkamu umiiniak Yúsnan ti nékaitjai tura Yus shiir enentáimturui tu enentáimtumainiawai. Nu arantcha péejchach ajasan winia ayashrun ti asutiájai tu enentáimtumainiawai. Túrasha ayash wakeramunka nupeteatsui.

3

¹ Nuikia Krístujai nantakin asarum nayaimpinmaya íranna nu wakeruktarum. Nui Kristu pujawai Yusa untsuuríni. ² Ju nunkanam ana nu enentáimtsuk aya nayaimpinmaya ana nu enentáimtustarum. ³ Atumsha Krístujai tsaniñkrum jakarmarme. Tuma asarum Krístujai tsaniñkrum Yusjai iwiaaku pujarme. ⁴ Krístukete ii iwiaakmarí. Nii nayaimpinmaya wantinkiuisha atumsha Niijjai métek wantinkiattarme. Tura Niijjai métek ti penker áatrume.

Yaunchu iwiaakmasha tura yamaram iwiaakmasha

⁵ Tuma asantai ju nunkanmaya ana nu ajakratniua áintsarum ini-aisatarum. Tsanirmatniusha, tunáa wakeruktincha, tura takakna nujai nankaamas wakeruktincha ántar-yus tikishmatratniua áintsan asantai ini-aisatarum. ⁶ Shuar Yúsan umirtsuk aya nuna túrin ásarmatai Yus nin kajerak

ti asutiáttawai. ⁷ Atumsha núnisrumek túriniuyarme. ⁸ Tura yamaikia júsha iniaisatarum: kajektincha, yajauch wakeruktincha, yajauch túratniusha, katsekmaktincha, yajauch chicham chichastincha, mash iniaisatarum. ⁹ Yushuar ajasrum yaunchu enentáimtairam iniaisarmame. Tura yaunchu túrutairmesha iniaisaitrume. Tuma asarum nuamtak tsanumprunairairap tura wáitruawairap. ¹⁰ Yaunchu enentái, pushí mamuru áiktinia áintsarum, iniaisaitrume. Núnisrum yamaram enentái, shiir pushí entsartinia áintsarmek, wekasaitrume. Tura Yus nu yamaram enentáin najana asa ashí tsawant pujurtawai nuna nan̄kaamas Niijiaí métek shiir ati tusa. Túramtai Yus ti pen̄ker nekaki wéaji. ¹¹ Krístuka ashí írúnna nujai nan̄kaamas ashiyaiti. Niiniun pujurui. Tuma asamtai ashí ni shuari enentáin pujá asamtai nusháa enentáimtunairchatin áiniawai. Kriaku-shuarsha tura Israer-shuarsha, tsupirnakusha tura tsupirnakchasha, apachcha tura yajaya shuarsha, takarin ainia nusha tura an̄kant ainia nusha, Kristu ashí ni enentáin pujakui nusháa enentáimtunairchatniuiti.

¹² Yus atumin anenmak Niiniu arti tusa achirmakmarme. Túrutma asamtai jujai shiir iwiarmampratniua áintsarum tuke túrin atarum: waitnenkartin, shiir awajkartin, péejchach átin, émtin áchatin, tura katsuntin átin. ¹³ Kristu atumí tunaarin tsan̄kura mia núnisrumek nuamtak tsan̄kurnáiratarum. Chíkich yajauch awajtamkuisha shiir katsuntram yapajniaitsuk tsan̄kurnáiratarum. ¹⁴ Tura ashí nan̄kaamas anenaitiarum. Túrakrumka chikichik ajasrum mash pen̄ker túrattarme. ¹⁵ Kame chikichik ayashtinia áintsarum ajastarum tusa Yus ni shuari ajasat tusa achirmakmarme. Tuma asamtai Yusa shiiri atumí enentáin pujurtamsati. Nujai Yus yuminsatarum.

¹⁶ Kristu shiir chichame atumí enentáin piakti. Nekas naka enentáimprarum jintinniaiyarum mai ikiakánai ajatarum. Yus kanta kantamarum tuke enentáijiaí Yus yuminsarum shiir awajsatarum. ¹⁷ Tura takaakmesha, chichaakmesha, kame ashí túramna nuka Jesukrístu shiir awajsataj tusam ni kakarmarijiaín túrata. Túrakum Krístujai Yus Apa yuminsata.

Yus-shuar túratniua nu

¹⁸ Nuwatiram, atumí aishri umirkatarum Uunt Yus nuna wakerakui. ¹⁹ Áishmantiram, atumí nuwé aneatarum. Atumí nuwejai kajernaikiairap. ²⁰ Uchitiram, ame apa nukusha tuke umirkatarum. Nu túrakrum Yus shiir enentáimtiksattarme. ²¹ Uchirtintiram, atumí uchiri ti kakantrairap. Ti kakanteamka uchisha ti kuntuts pujus pen̄ker wekasatniun nakitchanpiash. Nu túrunawain̄ tusarum an̄trarum atumí uchiri kakantrairap. ²² Takarniutiram, atumí uuntri shiir umirkatarum. Ju nun̄kanmaya uuntri ain̄ aya nii iimkiui shiir enentáimturati tusarum takaschatniuitrume. Antsu Yus enentáimtakrum tuke pen̄ker takastiniaitrume. ²³ Ashí túramna nu asump enentáijiaí takakmasta. Aya aentsuk yáintinia áintsachu antsu nayaimpinmaya Úuntrum yayá áitkiasrum takastarum. ²⁴ Ame Úuntrum Kristu asa nayaimpiniam ashí shiir takustinian tsan̄katramkattawai. ²⁵ Antsu tunáa túrin ni yajauch túramujai métek akinkiáttawai. Yus ashí áentsun métek iyawai.

4

¹ Úunttirmesha, atumí Uuntri atumin wáiniuk nayaimpiniam pujatsuk. Tuma asamtai atumí yáinma jiatsuk pen̄ker iniartiniaitrume.

² Yus áujkuram Nii yuminsarum asummiarum iniaitsuk áujstarum. ³ Incha Yus áujtustarum. Kristu-chicham yaunchu nekaachman yamáí étserkun sepunam pujajai. Tuma asamtai nuna shiir an̄kant etserkat tusarum

áujtursatarum. ⁴ Tura wi paant etserkatniuitiaj núnisan etserkat tusarum áujtursatarum.

⁵ Yus-shuarchajai shiir túratarum Yus-Chichaman yajauch enentáimturarain. Kakaram ajasrum tsawant ántrarum iniañkasairap. ⁶ Ti shiir chichamtin átiniaitrome tura anturújamin átiniaitrome. Núnisrum chíkich chíkich Yus-chicham paant ujaktin nekaattarme.

Amikmaamu

⁷ Ii aneamu yachi Tíkikiu ashí wínian ujatmaktatrome. Niisha wijiaj métek Yúsnan pimpitsuk ti penker takasuiti. ⁸ Nu asamtai ii jui pujajnia nuna ujatmak ikiantamprarat tusan akuptajrume. ⁹ Núnisan ii aneamu yachi Unisemu niijiaj winiawai. Niisha atum wééaiti, tura Yusjaj shiir wekaawai. Nu shuar ashí jui túrunamun ujatmaktatrome.

¹⁰ Aristarku wi sepunam tsaniñkia pujamur amikmaatmarme. Núnisan Markus, Pirnapí kaná yachia nu, amikmaatmawai. Niisha nuj jeamtai antukmarum núnisrum penker wáinkiatarum. ¹¹ Justu Jesus náartin amikmaatmarme. Júchik ániawai Rúmanmaya Israer-shuar winia Yúsnan etserkatin atutkaru ainia nu. Túmainiak ti shiir ayamtikruiniawai. ¹² Épaprassha, atum weeá, Krístunun etserin asa atumin amikmaatmarme. Niisha ashí tsawant Yúsan áujeak Yusjaj kakaarum tuke shiir Yus wakera nu túrak tusa seatramprume. ¹³ Wisha Épapas atumin ti enentáimturman nékajai. Núnisan Rautiséanmaya shuarnasha tura Iarapurisnumia shuarnasha ti páchiniawai. ¹⁴ Rukas, aneamu tsuákratin, núnisan Témassha amikmaatmarme.

¹⁵ Tura Rautiséanam pujuinia nú Yus-shuarsha amikmaatruatarum. Núnisan Nímpiassha tura ni jeen irunainia nú Yus-shuarsha amikmaatruatarum. ¹⁶ Átum ju papí áujсарum umikrum Rautiséanmasha nuyá Yus-shuar áujсarti tusarum akupkatarum. Tura atumsha núnisan Rautiséanmaya papí támatai atumsha áujсatarum. ¹⁷ Tura ju Arkipiu titiarum: “Ii Uuntri Jesus ni takatrin suramsa nu penker umikta” tawai, titiarum.

¹⁸ Wi, Papru, winia uwejruijaj júchiniak áatkun amikmaajrume. Sepunam pujajna ju enentáimturatarum. Yus shiir yainmakarti.

Nuke atí.

Papru

TISARÚNIKIANMAYA SHUARAN

Emka papín aar akuptukma

Papru ni tsaniakmarijiai Yus-shuaran áatramiania nu

¹ Wikia Pápruitjai. Wissha Serpanujai tura Timiutéujai Tisarúnikianmaya Yus-shuar ajasuitrumna nuna áatjarne. Atumsha Yus-shuar asarum Apa Yúsnaitrume, tura Uunt Jesukrístunuitrume. Ii Apari Yus, tura ii Uuntri Jesukrístu waitnentrama ásarmatai, ti shiir imiatkinchanum pujustarum, tu wakerajrume.

Tisarúnikianmaya shuar Yus nekas enentáimtusar umirkatniun jintintiarmaniania nu

² Iisha Yus áujkurkia atumniasha tuke enentáimtusar Yus shiir yuminsaji. ³ Atumsha Yus nekas enentáimtakrum umirkarumna nu nékaji. Núnisrumek, Yus aneakrum takaarme. Tura Jesukrístu tatí tusarum tuke tsawant nákarne. Nu neka asar, ii Apari Yus áujkur, nusha ashí enentáimsar áujtajrume. ⁴ Yatsurú, Yus anenmarme. Anenma asa Winia arti tusa achirmakurmena nusha nékaji. ⁵ Enentáimpratarum. Iisha Yúsai Uwempratin Chicham atumin ujakmajnia nusha aya chíchamjain tíchamji. Antsu nú arant, nu chicham nekasaiti tusar Yusa Wakaní kakarmarijiai tímiaji. Tura átum péñker matsamsarat tusar atumjai pujusar shiir iruntrar wekasarmiaji. Nusha paant nékarne.

⁶ Atumsha yamaikia íksarmek ii túramiaj nu, tura ii Uuntri Jesukrístu túramia nu túrarme. Itiurchat ain Yus-Chicham umikiurme. Tura wáitiatrumek Yusa Wakaní shiir enentáimtikramkui warasrum pujarme. ⁷ Nu túrakrum ashí Masetúnia tura Akaya nunkanmaya Yus-shuarsha shiir wekasatin jintintiarne. ⁸ Tuma asarum Uunt Yusa chichame ti ipiamparurme. Tuma asamtai Masetúnia tura Akaya nunkanmaya shuar nuna nékainiawai. Tura nú nankaamas Yus nekas umirkarmena nuna ashí aents nékainiawai. Nuna nékainia ásar ii étserman atsumainiatsui. ⁹ Antsu átum in péñker itiaamun nii íksan ujatmainiaji. Tura nuyasha ántar-yus enentáimtustin iniaisarum nekas iwiaaku Yus nekas enentáimtusarum umirkarumna nunasha ujatmainiaji. ¹⁰ Tura nuyasha Yusa Uchiri Jesus jakamunmayan Yus iniantkimia nu, nayaimpinimaya tatí tusarum átum nákamuncha ujatmainiaji. Iis, Jesus Nínkiti Yusa kajetáiri tsawantri jeattana nuyá uwemtikrampratin.

2

Yus-chichaman paant ujakarmiania nu

¹ Atumsha nékarne, yatsurú, iisha ántar atumín jeachmaji. ² Antsu itiurchat wáinkiaitiatar arantutsuk shiir Uwempratin Chichaman ujakmajrume. Iis, nuik Jiripius péprunam incha katsekramkarmiaji. Tura nú arant, ti itiurchat wáinkiamiajai. Túmaitiatan Yus yáintkiui Yusa chichamen ujakmajrume. Nuka atumsha ti péñker nékarne. ³ Warí, iisha Yus-Chicham atumin ujakmiaj nu nekasauyi. Tura yajauch enentáimsan, anañkatjarum tusan tíchamjarne. ⁴ Antsu Yus in péñker enentaimturmas Uwempratin Chicham etserkatarum tusa akatrampramiaji. Tuma asamtai núnisrik étseraeji. Túrasha aya aents waramtikсатаi tusar étsertsuji. Antsu Nínki Yúsak ii enentáin nekar-tamin asamtai, shiir enentáimtikсатаitsar túraji. ⁵ Átumka nékarne, péñkesha shíirmach chichasan anañkachjarne. Nuyasha, kuit achiktai tusar ántar

chichaschamji. Núnaka Yus nékawai. ⁶ Iisha Kristu akatramurintji. Tuma asar ni kakarmaríjiaí akupkatin takakuji. Páchitsuk túramniauji. Túrasha waantu ajastaj tíchamji. Nuyá atumsha tura chikichcha in waantu awajtamsataj tákuisha iikia nakitmiaji. ⁷ Antsu uchi kuírchin ni nukurí péñker iis tsakatmana áintsarik iikia atumniaka shiir íismajrume. ⁸ Iisha ti shiir aneajrume. Tuma asar Yus-Chicham ujaktai tusar ti wakerukmaji. Tura aya ujakar ini-aisatin wakerukchamji. Antsu ii jákatniuitkiursha iniaisachaaji, atumín ti anea asarⁱ. ⁹ Yatsurú, ii atumaj nu sumarmaktai tusar kakaram takakmasmaj nu ¿kajinmatkintrumek? Atsá. Nékarne. Iis, Yus-Chicham étserkur, tsawajsha káshisha takasmiaji. Nusha, akirkata, t_{ij} tusar takakmasmiaji.

¹⁰ Yatsurú, atumjai pujumiaj nu_i iisha Yus wakerana nu túrimiaji, tura ya-jauch túrutsuk shiir wekasamiaji. Nujai incha chikichkisha yajauch chichartamkatniusha atumiayi. Nuka atumsha nékarne tura nú arant Yus nékawai. ¹¹ Tura atumniasha ankant ankant Yúsnum ikiakármajrumna nu nékarne. Tura uchin ni aparí átsankeana nútiksarik shiir enentáimtikramajrumna nusha nékarne. ¹² Tura Yúsjaí shiir wekasatarum tímiajrume. Yus nankaamas uunt asa ashí akupeawai. Tura Yus-shuaraitrumna nuna, Winin pachiiinkiarat tusa, Yus untsurmarme. Yus untsurma asantai Níniuitrume. Niiniu asarum Yusa uchirja núnisrumek wekasatniuitrume.

¹³ Yus-Chicham ii étserma antukrum, aya áentsnumianchaiti tímiarme. Yúsnumiaiti tímiarme. Nu tiniu asarum umirkamarme. Kame nekas tárume. Ii étserjinia nu nekas Yusa chichamente. Átum nu chicham umirka asakrumin, atumí enentáin kakaram ajastinian amaawai, Yus-Chicham asa. Átum Yus-Chicham umirkaru asakrumin iisha tuke tsawant Yus yúminkiaji. ¹⁴ Yatsurú, ju nekaatarum. Aya atumek wáitiatsrume. Ashí Jutía nunkanam Israer-shuar, ni shuarin ketiat, Yus-shuaran wáitkiascharmakia. Iis, Yus-shuaran Kristu Jesusan umirkaru ásarmatai wáitkiasarmiayi. Yamaikia atumniasha atumí shuarin wáitkiarmainiawai. Nujai Jutía nunkanmaya Yus-shuarjai métekrak ajasurme. ¹⁵ Niisha Israer-shuaraitiatan Yus-Chichaman etserin armia nuna nuamtaketiat máawarmiayi. Tura nú weeák Uunt Jesusnasha máawarmiayi. Tura incha aa j_{iiki} akuptamkarmiaji. Maaj, niisha Yúsan shiir enentáimtikiainiatsui. Tura núnisan ashí áentsun kajerainiawai. ¹⁶ Warí, Israer-shuaracha Uwempratin Chicham ujaktaj tákurnisha niisha suritramainiaji. Nuna túruiniak yaunchu tunaan túriarmia nújainkia nankaamas yamaikia túrawarai. Pai, túrasha yamaikia Yusa kajetairi_i imiá tsumaj ana nu_i pujusarai.

Papru ataksha Tisarúnikianam irautajtsa wakerimiania nu

¹⁷ Iisha, yatsuru, ishichik tsawant atumijya kanakir jeachat pujayatrik, atumjaisha wáinniaiyachiatrik tuke ii enentáinkia enentáimtimjiarme. Tuma asar ataksha atumin iistai tusar ti wakerimji. ¹⁸ Nekas winitiaitsar wakerimji. Imia wíkisha winitniun ti nukap enentáimsamjai. Tura iwianchi uuntri Satanás tuke nuna suritrammiaji. ¹⁹⁻²⁰ Atumsha shiir wekasa asakrumin iisha ti shiir enentáimsar waraaji. Nu tuma asar Uunt Jesukristu tátintri shiir enentáimsar náka_i. Nii támatai imiá warastatji. Atumin Yus-shuar awajsa asar, Nii támatai atumsha iijjai Jesus shiir inkiuntatji. Tuma asantai nu enentáimsar tawasap achiktinia áintsar waraaji.

3

¹⁻² Iisha ataksha atumin íistaitсар ti wakerimji. Tura tujintiakur iikia Atenas péprunam juákur ii yachi Timiutéu atumin íirmainiarat tusar akupkatai, timiaji. Iisha Kristui Uwempratin Chicham etsermiaj nu_i, Timiutéuka

ijjaj métek takasuiti. Tuma asa niisha Yusa takatr̄in takáa asa atumni-asha Yusaj kakartarum turamarti tusar akupkamji. ³ Tura nú arant, itiurchatan wáiniuk iniaisaraj̄n tusa ikiakátmararti tusar Timiutéu akupkamji. Yatsurú, átumka nékarme, ashí Yus-shuaraitj̄inia nuka páchitsuk wáitsatniuitji. Iis, tuma asamtai atumsha ti nekas itiurchatnum pujarme, Yus-Chicham umirka asarum. ⁴ Iimiatarum, atumjaj̄ nuik tuke pujumj̄inia nūi “iisha wáitsartatji” tíchamkajrum. Iis, túrunachaik. Nuka nékarme. ⁵ Tura atumin íwianch tunaanum ajun̄marchariash tusan, wisha kúntuts enentáimsamijaj̄. Tura ántr̄ar takaschajiash tu enentáimsamijaj̄. Tuma asamtai nekaataj̄ tusan ti wakerakun, wisha ti nukap tsawant nákaschamijaj̄. Antsu wárik Timiutéun akupkamijaj̄. Yúsaj̄ pénkerash wekainia tusan, “nu inintrusam ikiuuta” timíaj̄.

⁶ Tura yamaikia Timiutéu Tisarúnikianmaya waketki tayi. Niisha taa, átum Yus aneakrum shiir enentáimtamuncha ujatmaji. Tura átum in anenma asarum tuke enentáimsar pujamuncha tura ii atumin ístait̄sar wakeraj̄nia núnisrumek atumsha incha írmait̄iai tusarum wakeramuncha Timiutéu ujatmaji. ⁷ Tuma asamtai, yatsuru, ashí itiurchat tura wáitsatin wáiniatrik átum Yus shiir enentáimta asakrumin iisha shiir enentáimji. ⁸ Atumsha Yúsaj̄ tariara weká asakrumin, shuar jaa pénker ajas enentá̄i chinkiana áintsarik enentáimji. ⁹ Yus pénker umirka asakrumin, iisha shiir waraaji. Warasu asar ii Yusr̄i ti yúmin̄kijaj̄. ¹⁰ Incha Yus akuptamkurniñkia atumiin̄ timíaj̄aik jeart̄iai tusar wakeraji. Túrar Yusna nekaatin mash nékatsrum nu jintintiatai tusar tuke ti seaji.

¹¹ Atumiin̄ weri íistinian ii Apar̄i Yussha tura ii Uuntr̄i Jesukr̄istusha in yáinmakt̄ai tusar wakeraji. ¹² Atumin ii aneaj̄nia núnisan̄ Yus atumniasha mai anenai ajatniun tura chikichcha aneastinian enentáimtikramprart̄i. Tura nú nukap anenkratt̄ain Yus amasart̄i tusar wakeraji. ¹³ Yus ikiakátmakui átum tunáa túrutsuk Yus umirkarum wekasatarum tusar ii Apar̄i Yus seaji. Ii Uuntr̄i Jesus Níiniurij̄jaj̄ winiak pénker wekaarmin tati tusar taji.

4

Pénker túratniun Yus wakerana nu

¹ Iikia Uunt Jesus akupkamuitji. Tuma asar nu kakarmajaj̄ atumniasha ju túratarum tusan akupeajrume. Atumsha iwiaaku pujarmena nūi Yus shiir wamtiksatarum tura tuke pénker túrukum wetarum tusar seajrume. Iisha nuik atumin unuiniarmajrumna nútiksarmek túratarum. ² Uunt Jesusa akupeamurij̄jaj̄ tura nu kakarmajaj̄ atumniasha nuik unuiniarmajrumna nu átumka nékarme. ³ Atumin Yus wakerutmarmena nu júiti: “Shuar aya Win̄in sumama pujusat tusan chikichkinkesha shuar tsanirmaashti”. ⁴⁻⁵ Yus-shuarcha ainia nu, Yús̄an nékainiachu ásar, aya niñki enentáimtumasar aya ni ayash̄i wakeramunak umiktinian wakeruiniak nuwan̄ enentáimtuiniawai. Atumsha núnisrumek túrawairap. Antsu atumsha atumí nuar̄i pénker enentáimtusrum shiir aneasrum ayastarum. ⁶ Nú arant, amesha ame yatsum anankam ni nuar̄i yajauch awajtusaip. Nu túrakrumniñkia ii timíaj̄rumna nútiks̄an Uunt Yus ti kakaram asutiámawartatui. ⁷ Warí, Yus incha pénkercha yajauch túratarum turamchaitji. Antsu aya pénkerak túratarum turamji. ⁸ Tuma asamtai shuar jū chichaman nakitiakka áentsun nakitiatsui, antsu Yús̄an nakitrait̄i. Tura nu Yussha ni Wakan̄in amaawiti tunaan túrashtinian.

⁹ Tura yamaikia nuamtak Yus-shuar aneniastin ana nuna ti neka asakrumin áatrashtatjarme. Warí, imia Niñki Yus atumin mai anenai ajatniun jintinramawarmatai nékarme. ¹⁰ Iis nútiksarmek aneniatsrumek

ashí Masetúnianam matsatainia nujai. Túrasha, yatsuru, atumí anenkrattairi nú nukap ajasti tusan, seajrume. ¹¹ Yamaikia tímiaj nútiksarmek, yayauchin túruinia nui wekatsuk, chíkich shuarna pachittsuk, atumí takatriin shiir ankant pujusrum atumí uwejejañ takakmá pujutarum. ¹² Átum táasaírum tusan tájarne. Túrakrumniñkia atumniasha chíkich shuar péñker enentáimturmasartatui.

Kristu tátintri

¹³ Yatsuru, Yus-shuarcha ni shuari jakamtai “atakka wáinkiashtatjai” tusa ti kuntuts enentáimainiawai. Tuma asamtai atumsha nútiksarmek kúntuts enentáimsaírum tusan juna tájarne. Jákaru ainia nu urukawartinkit paant nekaatarum. ¹⁴ Jesus jákayat nantakchamkia. Núnisañ Yus Jesusan iniantkin Nin umirkar jákaru áiniana nunasha iniantkittiawai. Paant nékaji nusha. ¹⁵ Tuma asamtai Yus-Chicham nekaprutamnia nuna atumniasha jintintiajrume. Iisha tuke iwiaaku pujarin Kristu táakuisha jákaru ainia nuka ikiuakur émkishtatji. ¹⁶ Antsu Yus akupeakui, Yusa suntarí uuntri untsumkui tura Yusa kachurin umpuarmatai Uunt Jesukrístu untsumuk Yus pujamunmaya tarattawai. Nuiñkia Krístunu ajarar jákaru áiniana nu iwiarsumunmaya nantakiartatui emka. ¹⁷ Tura nuyá iisha Yus-shuar tuke iwiaaku pujajnia nu Kristujai yurañminiam ajapén inkiunaikiartatji. Nuní ashí nayaimpiniam ii Uuntri Jesukrístujai tuke iwiaaku pujusartatji. ¹⁸ Tuma asamtai ju shiir chicham atumin ujakjana jujai mai ikiakánai ajatarum.

5

¹ Túrasha, yatsuru, ni tátintri waritiñ tura warí tsawantai, nuka áatratin atsumatsrume. ² Ni tátintri júnis átin nékarme. Kiritniunam kasá shuar kasamkataj tusa tátatna nu nekaachminiaiti. Núnisañ nákatsuk pujuiniaj Uunt Kristu tsawantri jeattawai. ³ Ashí shuar “Pai, yamaikia ti nekas shiir péñker pujuiniaji” tu matsatainiaj, aya aneachma nunka mesertin tsawant jeattawai. Nuwa ajamtin aya aneachma jatema áintsañ, nékachmanum átatui. Túmakui pisartin penké atsuttawai. ⁴ Túrasha, yatsuru, átumka ujakmaitrume. Nu tsawant atumsha aneara pujarmin jeattawai. Atumsha aneara pujá asakrumin kasá áintsañ tarutrámashatui. ⁵ Enta, átumka tsáapninium wekáa asarum Yus-shuartirmeka nékaitrume. Iikia kiritniumianchuitji. ⁶ Nu tuma asar, chíkich uruka núnisrik, ii enentáin kanartinia núnisrik “Warí, winia itiurtawa” tíchami. Antsu naka enentáimsar anearmi. ⁷ Iis, kashi kanarchatniukait. Tura nampeena nu kashi nampeenawai. ⁸ Túrasha iikia shiir tsáapninium wekainiaj nuka naka enentáimprar tuke nampetsuk pujustini-aitji. Suntar ni nemasri anankruawain tusa anear wekasatniuiti. Tura iisha núnisrik íwianch yajauch awajtamsaj tusar anearmi. Yus enentáimtusar aneetniuitji. Tura núnisrik iisha, ju nunkanmaya uwemprar Yúsai tuke pujustatji, tu enentáimprar wetái. ⁹ Páantchakait. “Jinium wéchatniuitrume” Yus incha túramji. Antsu ii Uuntri Jesukrístujai uwempratniun tsankatramkaitji. ¹⁰ Niijjai métekrak iwiaaku ami tusa Jesukrístu in jarutramkamiaji. Nu tuma asamtai iisha ii ayashijjai iwiaaku pujakrishia Niijjai iwiaakji, tura ii ayashijjai jáakrishia Niijjai tuke iwiaakji. ¹¹ Tuma asamtai tuke túrarmena núnisrumek, shiir enentáimtiknaisarum mai ikiakánai ajatarum.

Papru Yus-shuaran jintintiamiania nu

¹² Yatsurú, juna seajrume. Atumjai pujuinia nú shuar Yúsnan takakmainiakui shiir enentáimtustarum. Jintintramuk chichartamainiakui umirkatarum. ¹³ Yúsnan takainia ásarmatai ti péñker enentáimtusarum aneestarum. Tura yajauch awajnaitsuk ti shiir nawamnaikiarum

matsamsatarum. ¹⁴Tura junasha seajrume, yatsuru. Takastinian nakitiana nusha chicharkatarum. Tura yaweena nusha ataksha enentáimtikrarum ikiakártarum. Kakarmachu ana nusha yáin̄tarum. Tura ashí shuarjaj̄ kajetsuk katsuntrarum wekasatarum.

¹⁵Aneartarum, yatsuru. Chíkich yajauch túrutmamtai amesha nútiksamek yapajkiaip. Antsu nuka túrutsuk átumka mai péñker awajnai ajatarum. Tura nú arant, ashí nun̄kanmasha ashí shuarsha nútiksarmek túratarum. ¹⁶Tuke shiir warasrum pujustarum. ¹⁷Tuke tsawant iniaitsuk Yus áuj̄satarum. ¹⁸Péñker pujakmesha, itiurchat pujakmesha ashí warí wáiniam nūisha Yus shiir yum̄nsatarum. Kristu Jesusaj̄ Yus-shuar ajasutiram nu túratniun Yus wakerawai.

¹⁹Ji ikiajniaktinia núnisan̄ Yusa Wakaní enentáimin keana nuka tunaajaj̄ téenmamtikiarum ikiajniakairap.

²⁰Yus jintintrar akupkamu asa péñker chichaman etserainia nu naki-trairap.

²¹Ashí etserkamu ana nu nekasashit tusarum nekaatarum. Túrarum aya péñker ana nuke achiktarum. ²²Ashí yajauch ana nuyañka kanaktiarum.

²³Yuska, imiatkinchanum wekasatin amaana nu, atumin takamtsuk shiir awajtamsartí. Tura ii Uuntrī Jesukrístu táatsain̄, atumí wakaní atumí enentaj̄ tura atumí ayash̄isha mash métek tunaajaj̄in̄chu awajtamsati. ²⁴Yus atumin untsurmakmarumna nu tímianak uminiaiti. Nii tana nuna yawetsuk túrattawai.

Amuamunam amikmaatin

²⁵Ashí yatsurtiram winiasha Yus áuj̄tursatarum. ²⁶Ashí Yus-shuar árum nu, amikmaaniatarum. ²⁷Winia Uuntrū Jesukrístu chichamejaj̄ juna tájarne. Ju papí ashí Yus-shuar antukarti tusarum ashí iruntramunam áuj̄satarum. ²⁸Ii Uuntrī Jesukrístu atumin yáinmákartí. Nu atí.

Papru

TISARÚNIKIANMAYA SHUARAN

Ataksha papin aar akuptukma

Papru ni tsaniakmarijjai Yus-shuaran áatramiania nu

¹ Wikia Pápruitjai. Wissha Serpanujai tura Timiutéujai iruntran atumin Tisarúnikianmaya Yus-shuar árumna nuna ju papin áatjarne. Atumsha ii Aparí Yusna tura Uunt Jesukrístunu ajasuitrume. ² Tuma asakrumin ii Aparí Yus tura ii Uuntri Jesukrístusha waitnentrana áarmatai yáinmakar péñker awajtamsarat tusan wakerajrume.

Kristu támatai tunáa shuáran Yus asutiáttawai

³ Yatsurú, átum péñker matsatu asakrumin iisha Yus tuke yúmiñkiaji. Átumka Yus nekas enentáimtustin nú núkap nekaakrum wéarme. Tura nuamtak aneniastincha nú núkap nékarme. Nu tuma asamtai Yus yumĩnsatniuitji. ⁴ Átum Yus-shuar asakrumin chíkich shuar atumin yajauch awajtamainiawai. Tura itiurchat wainiu asarum ti wáitiarme. Nu tuma aijn átumka katsuntearme, tuke Yus enentáimta asarum. Nu tuma asakrumin, iisha Yus-shuar matsatainia nuka warasar ujainiaji. ⁵ “Yusa akupeamurĩn pachiinkiamniaitrume” Yus túramprume. Nuĩ pachiinkiatat tau asarum ju nunkanam wáitiarme. Tura wáitiakrumsha nuna nankaamas iwiarnaruitrume nuĩ pachiinkiatin. Kame nújainkia Yus atumin achirmak péñker túrait, nuka páantaiti. ⁶ Núnisan atumin wáitkiarmainia nunasha Yus tímatrusan wáitkiasartincha nekas péñkeraiti. ⁷ Tura wáitiarmena nusha Yus íjijaiisha ayamtikramprartin péñkeraiti. Ii Uuntri Jesukrístu ji keana ímianisan kakaram suntaríjiai nayaimpinmaya tara wantinkiamtai, nu tsawantai Yus ayampratniun suramsartatji. ⁸ Tura nú tsawantaiisha Yúsan nékainiatsna núnaka ii Uuntri Jesukrístu ti asutiátajtsa tátatui. ⁹ Taa, nincha menkakatniunam akupkartatui. Chichaak “Wi pujajna juyá akupeajrume” títiatui. Tura winia ti kakarmar atsana nuĩ akupeajrume, átum winia umirtukcha asakrumin” nin tiartatui. ¹⁰ Kame Uunt Jesukrístu tátin tsawantri jeamtai, ni shuari, ni enentái péñker awajsaru áinia nu, ni náarin shiir pachisartatui. Tura Yúsan umikiaru ásar, ti shiir enentáimsar Jesukrístun ísartatui. Ii ujakmajrumna nu antukrum umirka asarum atumsha nuĩ pachiinkiatarme. ¹¹ Nu tuma asamtai ii Yusrin atumin tuke áujtajrume. Yus atumin achirmakuitrume. Nuĩnkia Yuska atumí enentáin takas Nii wakera nujai métek awajtamsati, taji. Yus umirka asarum péñker wekasataj tusarum wakerarme. Túrarum Yus enentáimtusum péñker túratin wakerarme. Tura wakerarmena nu umiktin Yuska ni kakarmaríjiai yáintí, tu áujtaji. ¹² Átum péñker wekasa asakrumin chíkich shuarsha ii Uuntri Jesukrístu náarin nankaamantu enentáimtusartatui. Nusha auka ii Yusri tura ii Uuntri Jesukrístu waitnentáimturmasar péñker wekasatniun yáinmakui túrarme. Túramtai chíkich shuar shiir enentáimturmasartatui.

2

Tuke Tunaarintin wantinkiatana nu

¹ Tura, yatsuru, ii Uuntri Jesukrístu tátatna nuna tura Níjijai inkiunaiktatjina nunasha ujaktinian wakerajrume. ² Chíkich shuar anankramawar “Uunt Jesukrístu tsawantri jeayi” tu ujatmaktaj tusar wakeruiniawai. “Ímiarmaj nujai nékajai” turamainiakuiisha, “chícham

étserman antukmaj nujaj nékajai” turamainiakuisha, tura “Papru papí áarmari nuna takui nékajai” turamainiakuisha, páchim enentáimprairap. Tura sapijmiakairap tusan seajrume. ³ Penké anañawairap. Nekaatarum. Nu tsawant jeatsajñ Yúsnumiã kanaktin átatui. Tura nú arant, Tuke Tunaarintin, emesnartatna nu wantinkiattawai. ⁴ Niisha aya wíniak enentáimtursarat tusa wakerak, ántar-yusnasha tura nekas Yúsasha shuar tikishmatrarajñ tusa ti nakitrattawai. Niñki ti nankaamantu enentáimtumas, Yusa nuke ajas, Uunt Yusa Jeen wayáa pujustatui. “Júiti Yus” shuar turutiarat tusa mash túrittiawai. ⁵ Yatsurtiram, wi atumjaj pujakun nuna ashí ujakmajrume. ¿Nuka kajinmakniurmek? ⁶ Yámaikikia, ni tsawantrj jeatsajñ, Tuke Tunaarintin wantinkiajñ tusa surimia nu nékarme. ⁷ Tunaasha yamaisha awai, tura paantcha. Túrasha tunaan surimia nu juramkitniuk taasai nu tunaaka paant átin. ⁸ Nuñkia nu Tuke Tunaarintin wantinkiattawai. Tura Uunt Jesus ni wenejaj umpuú aun máattawai. Tara ni wincharijjaj nuna amuktatui. ⁹ Nu Tuke Tunaarintin, iwianchi uuntrj Satanás akupkam tátatui. Ni kakarmari iniakmastaj tusa, aentsti túrachminian túrak anañkawartatui. ¹⁰ Jinium wémin ainia nú shuaran ashí tunáa ana nujaj anañkawartatui. Nu shuar Yus-Chichaman nekas ana núnaka nakitraru ásar uwemprachmin áiniawai. ¹¹ Iis, nekas ana nuna nakitia ásarmatai, ti ananmamawar waitchichaman umirkarat tusa Yuska tsañkatkattawai. ¹² Warí, niisha ni tunaarjñ wararainiak, nekas ana nuna nakitraru ásarmatai, Yuska “jinium wétatrume” tiartatui nuna.

Uwempramin ainia nu

¹³ Tura, yatsuru, Uunt Jesus aneamu árumna nu, iisha atumin enentáimtusar ii Yusri yumisajj. Átum nekas ana nuka umikiurme. Tuma asakrumin Yusa Wakanj atumí enentáin penker awajtamsaitrume. Nu tuma asamtai yámankamtaikniumiã Yuska “átum uwempramniaitrume” túramprume. ¹⁴ Nu túrunat tusa Yus wakerutmarme. Krístujaj Uwempratin Chicham ii ujakjinia nujaj Yus untsurmakmarme. II Uuntrj Jesukrístu ti penker pujana nuñ pachiinkiamniuram tusan ujakmajrume, nú chichaman.

¹⁵ Wátsek, yatsuru, Yusjaj katsuartarum. Yus-Chicham etserkamu antukurmena nu, tura wisha áaran akuptukjarmena nusha kajinmatkiirap. ¹⁶ Ii Uuntrj Jesukrístusha tura ii Aparj Yussha ti penker ásar incha anenmatsjik. Tura waitnentrama ásar incha shiir enentáimtikramji. Tura nú nankaamas ii tuke penker pujustinian ikiurtamsaitji. ¹⁷ Nu tuma asamtai, penker chichastarum tusa, tura penker takastarum tusa Jesukrístuka shiir enentáimtikramar ikiakátmarartí.

3

Papru “áujtursatarum” tímiania nu

¹ Nuyá, yatsurú, Yusa chichame shiir pampartí tusarum Yus áujtursatarum. Átum Yus-Chicham wakerukmarmena áintsañ ashí nuñkanam wakerukartí tusarum Yus seatarum. ² Tura yajauch shuar, penker ana nuna ti nakitainia nu, incha yajauch awajtamsachartí tusarum Yus áujkartustarum. Kame chikich aents Yúsán umirkacharu áiniawai. ³ Túrasha Uunt Jesusak atumin iniaitsuk wáitmaktatrume. Tura atumin ikiakátmartatrume. Tura íwianch anankramataj takui kíshturmaktatrume. ⁴ Kame Yus atumin yainmaktatrume, taji. Ii tájnia nu yamáí umíarme. Tura tuke umirkattarme. Nusha nekaar shiir enentáimji. ⁵ Uunt Yus yainmakartí ni anenkrattairjñ nekaatniun. Kristu itiurchatan katsuntramia núnisañ atumniasha katsuntratniun Yus yainmaktí.

Takastiniaitji

⁶ Yatsurtiram, antuktaram. Ii Uuntri Jesukrístu chichamejai ju taji: “Nuyá Yus-shuar wi jintintramun nakitiak aya wékana nu ikiuktiarum.” ⁷⁻⁸ Ii túrajnia núnisrumek túratin nékarme. Júiti: atumjai pujusmaj nuí tuke takakmasmiaji. Atumí yurumkarí iisha akikmakar yurummiaji. Atumjai itiurchat áchatí tusar tsawaisha káshisha tuke takakmasmiaji. ⁹ Kame iisha, Kristu akatramu asar “yáintkiatarum” tíminiuji; túrasha nu tútsuk, ii túrajnia núnisrumek túratin nekaatarum tusar, iisha tuke tsawant takaamiaji. ¹⁰ Warí, atumjai pujumiaj nuí “Takastinian nakitiana nuka yurumashti” tíchamkaji. ¹¹ Iis, atumjiniá weeá, nánkamas enentáimiainiak tura nánkamas túruiniak penké takatsuk pujuiniawai, túramainiaji. ¹² Nú shuáran ii Uuntri Jesukrístu chichamejai “Táamtak shiir takakmasartí” tajai.

¹³ Yatsurtiram, yawetsuk shiir túratarum. ¹⁴ Ju papinium ii tájiniá nuna, shuar umiktinian nakitiakuñkia “umichuiti” tákuram, ni natsarat tusarum ikiuktiarum. ¹⁵ Túrasha “Yus-shuara nemasrinti” tiip. Áyatik jintintrata, tura Yúsai enentáimtikrata, ame nekas yatsumeá áitkiasmek.

Papru aujsua ikuamu

¹⁶ Uunt Yuska, imiatkichu enentái susamniaiti. Jú Yus, itiurchatnum pujarminiñ atumin tuke imiatkichu enentáimtikramsarti. Uunt Yuska atumin pujurtamsarti, tajai.

¹⁷ Jui wi Papru juna aajai. Wi papin akupeaj nuí júnisnak winia náarun áaran apujeajai, wíniaiti tusan. ¹⁸ Ii Uuntri Jesukrístu atumin ashí yainmakarat tusan wakerajrume. Nu atí.

Papru TIMIUTÉUN Emka papin aar akuptukma

¹ Wi Papru Jesukrístu akatramurintjai. In uwemtikiartin Yussha tura ii Uuntri Jesukrístusha winia akuptuku áiniawai. Jesukrístujai métek ti shiir ajastai tusar nákJai. ² Timiutéu, ju papin áateajme. Wi ujakam Yus-shuar ajasu asam nekas winia uchirua áinkaitme. Tuma asakmin Yus Apasha tura ii Uuntri Jesukrístusha ti anenma ásar waitnentramainiak imiatkinchanum ti shiir pujustinian yainmakarti.

Wait chichamjai anearta

³ Masetúnia nunkanam wéakun “Ipiu péprunam pujuuta” timiaj núnisnak tájame. Shuar nuĵ wait-chichaman jintin ainia nu suritkiarta. ⁴ Niisha Israer-shuara weātrin áujmatsamunak tura ni weātri naari ti untsurĵ irurtinniak Yus-Chichamjai nanĵkaamas enentáimtuiniawai. Nunak áujmatsar tuke ántar tuiniawai. Nu túramuka Yus enentáimtusar Nin shiir umirkatniun yáinmatsji. Tuma asantai nusha suritkiatá.

⁵ Yus-shuar tuke enentáijĵai Yúsán shiir enentáimtusar tura tunáa túrutsuk aya péñkera nuna wakerukar anenĵkartin ajastin áiniawai. Núnisāñ péñker ajasat tusar Yus-Chicham étsereaji. ⁶ Chíkich shuar ĵuna iniaisar ántar chichaman áujmatainiawai. ⁷ Yúsán nekachiat “jintinniuitjai” tuiniawai. Tura unuiniainia nuna nékainiatsui.

⁸ Yus wakeramun nekaatin tura tunaan suritkiatin akupkamuka nekas péñkeraiti. Nu paant nékaji. ⁹ Kame akupniuka péñker shuaran itit awajsatniun akupenatsui. Antsu yajauch shuar ĵuna túrin ainia nuna itit awajsatniun akupenawai: Tunáa shuarnasha, umichuncha, Yúsánasha tura ashĵ Yúsánacha nakitiainia nunasha, aparĵn máinnishasha, nukurĵn máinnishasha, kame mañkartinnishasha, ¹⁰ nuwāncha tura áishmannasha tsanirma áinia nunasha, shuaran kasamak juu ainia nunasha, wáitrinnishasha, tsanumniuncha, ashĵ nuna itit awajsatniun akupenawai. Kame ashĵ péñkercha nuna iwiaratniun akupenawai. ¹¹ Núnisāñ tawai ti shiir uwempratin chicham Yus suramsamania nu. Nu chichamnaka etserkatniun Yus péñker asa tsañkatrukuiti.

Yus waitnenkartin asantai Papru yumĵnsamiayi

¹² Ii Uuntri Jesukrístu shiir enentáimturu asa Níiniun etserturkat tusa kakarman surusuiti. Túruta asantai yúmiñĵajai. ¹³ Wi Yúsán imiá yajauch chicharniuyajai. Yus-shuarnasha áinrarmiajai. Yusnasha katseĵniuyajai. Túrin aĵñ Yus winia waitnentrurmiayi. Kame Jesuska Yus Anaikiamun nékachu asan wi túramu yajauchiiti tu enentáimchayajai. ¹⁴ Tura ii Uuntri Jesukrístu ti nekas waitnentrurmiayi. Tura Jesukrístujai tsaniñĵia puĵakui Yus nekas enentáimtustinnishasha tura anenĵkartin ajastinnishasha surusuiti.

¹⁵ Ju chicham ti nekasaiti. Tunáa shuáran uwemtikrataj tusa Jesukrístu ju nunkanam tamiayi. Nunasha ashĵ shuar nekaatin áiniawai. Tura wikia ashĵ shuarĵai nanĵkaamas tunáan túriniaitjai. ¹⁶ Ti tunáa aĵñ Jesukrístu ti anenĵkartin ana nu paant nekanati tusa Yus winia waitnentrurmiayi Tuma asantai chíkich shuar, wĵĵai métek, Yúsán nekas enentáimtusar Niĵĵai tuke iwiaaku puĵusartatui. ¹⁷ Yus tuke jacha asa tuke iniaitsuk akupniuiti. Wáinchataitiat imiá nanĵkaamas nékaiti. imia Niñĵi Yúsaiti. Tuma asantai imia Niñĵi tuke iniaitsuk ti shiir awajsatniuiti. Núnisāñ tuke atí.

18 Uchiru, Timiutéu, yáunchuya Yus-shuar ámin “Ju shuar péñkeran túrattawai” túramarmia nútksam yamaikia kakaram ajástá. Nii timia enentáimsam suntara áintsam Yúsna kakaram takastin asumprurta. Nuna tájame. Tura Yus tuke nekas enentáimtusam tura tunaan túrawaj tusam anearam túrata. 19 Chíkich shuar tunaajaj anearcharu ásar Yúsan ikiukiarmai. 20 Iminíusha tura Arejántrusha núnisan Yúsan ikiukiarmatai uunt iwianchnium surukarmajai. Nujaj Yúsan ti yajauch chicharsacharat tusan túraitjai.

2

Yus áuj satin

1 Wátsek, emka seajrume Yus áujeakum Yus yuminsam ashí shuar yainkiat tusam áujtusarta. 2 Imiatkinchanum pujusar Yusjajisha tura áentsjajisha shiir túratai tusar tura ashí akupin ainia nusha péñker akupkarat tusar Yus áujtustiniaitji. 3 Áitkiasar seatin péñker asamtai, uwentikramajnia nú Yus wakerawai. 4 Ashí shuar nekas chichaman nekaawar uwemprarat tusar wakerawai Yus. 5 Aya chikichik Yus awai. Tura Jesukrístu aents ajas Yusjaj áentsun nawamnaimtikiartiniaiti. 6 Ashí shuara tunaarín akikmatkataj tusa jákatniunam Jesukrístu surumakmiayi. Tura tsawant jeamtai nu chicham ashí shuarnum etsernaktiniuyi. 7 Nuna túratniun Yus winia akatar akuptukuiti. Israer-shuarcha nekas chichaman enentáimtusarti tusa Yus akuptukmiayi. Krístunu asan wáitruitsuk nekas tajai.

8 Nu asamtai áishman̄kka kajetsuk yajauch tunaitsuk antsu péñker enentáijjai uweje takuiniar Yúsan áuj sarti. 9-10 Núnisan̄ núwaka iwiarmamuk nekasmiancha péñker enentáijjai entsararti. Chíkich shuar nu nuwan̄ iis temashmarmaríncha, sháukríncha, kurimkiamuncha, iwiarmampramuríncha núnaka enentáimtusuk antsu ni péñker túrunamun enentáimtusarti. Núnisan̄ áchatniukait nuwá Yus-shuar ainia nujaj. Ni péñker túramujaj nekas shiir awajmamsashtinkiait. 11 Núwaka takamtak pujusar umiiniak unuimiararti. 12 Nuwan̄ka ashí iruntramunam unuiniartinniaasha tura ni áshrín akupkatniuncha suritiajai. Antsu takamtak pujustiniaiti. 13 Yus emka áishman̄kan Ataŋkan najanamiayi. Nuyá nuwan̄ Épan najanamiayi. 14 Tura Yus timian umirkach Ataŋka anaŋnachmiayi. Antsu Épa anaŋna asa tunaan túramiayi. 15 Túmaitiat jurertin asa, emesnartinniumia uwempraiti. Tura Yúsan nekas enentáimtak anenkartiniaitiuk tura esetar enentáimiuk péñker wekasatniuiti.

3

Yus-shuaran wáinin

1 Shuar Yus-shuaran wáinkiatniun wakerakka péñker takatan achikiuiti. Nuka nekasaiti. 2 Tura Yus-shuaran wáinin ajastinian wakerakka chíkich shuar nin yajauch áujmattsachmin átiniaiti. Nuwá apatka áchatniuiti. Ni-isha péñker esetar enentáimin naka wekasatniuiti. Írran ni jeen ti shiir itiaatniuiti. Péñker jintinkratin átiniaiti. 3 Nampechusha tura suiir enentáimtichusha átiniaiti. Aya kuítian ikiaun̄katniun enentáimtuschatniuiti. Antsu tsan̄ka átiniaiti. Kajechusha átiniaiti. Chikichnancha wakerutkash-tiniaiti. 4 Ni shuarín shiir akupeakui ni uchirísha umin tura shiir awajkartin ártiniaiti. 5 Kame ni shuarín akupkachminiaitkiun̄ka žitiurak Yus-shuaran wáinkiat? 6 Yus-shuaran wáinniuka yama Yus-shuar ajasu áchatniuiti. Túmaitkiun̄ka ti nan̄kaamantu enentáimtumak iwianchjaj métek tunaan

túrak sumamattawai. ⁷ Yus-shuarchasha nin shiir enentáimtustin áiniawai. Núnischaitkiuin^ukia nin yajauch chicharainiakui íwianch wárik tunaanum ajuartatui.

Yus-shuaran yain

⁸ Núnisan Yus-shuaran yaincha péⁿker asamtai ashí shuar nin shiir enentáimtustin áiniawai. Nii tana nuna tímatrusan^u umin átiniaiti. Nampechu átiniaiti. Aya kuítian ikiaun^ukatniun enentáimtuschatniuiti. ⁹ Yúsnan ti péⁿker nekaatniuiti. Tura esetar enentáimsatniuiti. ¹⁰ Emka péⁿker íistiniaiti nuyá péⁿker wekaakka Yus-shuaran yain átiniaiti. ¹¹ Nuwasha péⁿker asamtai ashí shuarsha nin shiir enentáimtustin áiniawai. Tsanumniuchu antsu esetar enentáimiar nii chichaa ímiatrusan^u umin átiniaiti. ¹² Yus-shuaran yainkia nuwan^u apatkachu átiniaiti. Tura ni uchiríncha ni shuaríncha ashí shiir akupin átiniaiti. ¹³ Yus-shuaran yayak nekas péⁿker takaakka shiir enentáimtusmin asa páchitsuk Kristu Jesus enentáimtamun arantsuk etserkamniaiti.

Yusna ana nu imiá nan^ukaamas péⁿkeraiti

¹⁴⁻¹⁵ Wárik íitniun wakerajme. Túmaitiatnak sétaknasha Yus-shuarjajⁱ takastin nekaak tusan juna áatjame. Ashí Yus-shuar, iwiaaku Yusna ainia nu, nekas chichaman tuke emetawar akasmatainiawai. ¹⁶ Maa, imiá nekasaiti, Yus iwiainturmakma ashí nan^ukaamas ti péⁿkeraiti. Tura júiti:

Yuska aents ajas jú^u nun^ukanam paant wantinkiamiayi.

Yus Wakancha “ti shiiraiti” Nin tímiayi.

Yusa suntarisha Nin wáinkiar^umiayi.

Ashí nun^ukanam nu etsernakmiayi.

Túramtai ashí nun^ukanmaya^u shuar umirkarmiayi.

Tura nayainpiniam waketkimiayi.

4

Amuukatin tsawantin

¹ Yusa Wakanⁱ ti paant tawai, amuukatin tsawant jeaakui untsurí aents Yus enentáimtustinian iniaisar antsu yajauch wakanin nemarsar íwianch jintíamun anturkartatui. ² Yajauch shuaran anturkartatui. Nu shuar ni enentáí narúa áinin ásar ni tunáa túramun péⁿké enentáimtichu áiniawai. Tuma asa shiir chichainiayatan^u wáitrin áiniawai. ³ Nu shuar nuatnaikiatniun suritiainiawai. Núnisan^u chíkich chíkich yurumak yúatniuncha suritiainiawai. Warí, Yus ashí yurumkan najana asamtai Yus-shuar nekas chichaman nékainia ásar Yúsan yuminsar páchitsuk yuámin áiniawai. ⁴ Ashí Yus najanamu péⁿker asamtai nakittsuk antsu Yusan yuminsar yúatniuiti. ⁵ Yus-Chicham tana nújajⁱsha tura yuiniak Yúsan yuminkias áuj^usamujajⁱ ashí péⁿker ajasuⁱti.

Jesukrístu péⁿker takarín

⁶ Wi tájamna nu chíkich Yus-shuar jintintiakmeka Jesukrístu péⁿker takarín átatme. Tura ashí Yus-Chicham péⁿker jintíamu unuimiaru asam nujajⁱ kakaram ajastatme. ⁷ Ántar chichamsha tura netse chichamsha enentáimtutsuk nekas Yusna ana nu túratin kakaram ajasta. ⁸ Kame ayash kakaram awajsatniusha ishichik péⁿkeraiti. Antsu Yusna nu túratin kakaram ajastinkia imiá péⁿkeraiti. Yamái ju^u nun^ukanmasha yáinmaji tura ukunmasha Yusjajⁱ pujustin asakrin nan^ukaamas péⁿkeraiti. ⁹ Nu imiá nekas asamtai ashí shuar nuna enentáimtustini^uaiti. ¹⁰ Nekas iwiaaku Yus ashí shuaran uwemtikramni^uaiti, tura ashí Nin enentáimtu^uinia nú shuaran nekas uwemtikratni^uuiti. Nu chicham imiá nekasaiti tu enentáimtakur katsekramainiakrincha kakaram takaaji.

11 Nuka ashí ame jintiakum akupkatniuitme. 12 Ti úuntchaitkiumnisha nakitrampraraín. Antsu péñker túrakum Yus-shuar unuiniarta. Chichammijiaísha, túramurmijiaísha, anenkratmarmijiaísha, nekas Yus enentáimtamujaísha, tura esetra enentáimsam Yusna péñker túramujaísha niisha túrawarat tusam iniaktusarta. 13 Wi jeatsaín Yus-Chicham áujeakum shuar jintintiata. Túram Yus-shuar ikiakárarta. 14 Yus-shuara uuntri Yúsna takastin anaitiamak uwején awantramsarmai. Nuna túramainiak “Ju shuar kakarman Yúsnumiañ takustatui” túramarmia nu, kakaram ajasam tímiatrusam túratá.

15 Tuke enentáimjai wi tájamna nu enentáimtakin ame péñker túruki wéamun nekaawartatui. 16 Túramna nusha tura unuiniamna nusha péñker wáinmankata. Nu túratin pimpikiip. Nu túrakmeka uwemprattame amesha tura ujainiam nusha uwemtikrattame.

5

Yus-shuarjai itiuur túratniuit

1 Uunta nu kakantraip. Antsu nekas ame apa nútiksamek chicharkata. Nátsasha nekas ame yátsumeá nútiksamek shiir awajsarta. 2 Nuwá úuntchisha nekas ame núkua nútiksamek shiir awajsarta. Nuwá nátsasha nekas ame umaimia nútiksam shiir enentáimjai péñker awajsarta.

3 Waje nekas atsumin ainia nusha yáinikiarta. 4 Tura waje uchirtini-aitkiuinikia tura tirañkrinniuitkiuinikia, nu shuar wajen wáinkiariti. Emka ni shuarin péñker wáinkiatniun unuimiariti. Ni aparí anemia núnis awantuiniak shiir wáinkiariti. Núnaka Yus ti shiir enentáimtawai. 5 Nekas waje nínki pujana nu Yúsna enentáimtak tsawaísha káshisha iniaitsuk Yúsna áujeawai. 6 Antsu aya wárastiniak wakera nuka iwiaakiat jaka áintsankete. 7 Tura wajenka ni shuari wáinkiariti. Yus-shuaran yajauch chicharnaktin atsutí tusam wi tájamna nu ashí Yus-shuar ujakarta. 8 Shuar ni jeen pujuinia nuna nekaska wáinkiatniuiti. Tura nuyá chíkich shuárnasha yáintiniaiti. Túrachkunka Yus tana nuna umiátsui, tura Yus-shuarcha nujai nankaamas yajauchiiti.

9 Yusa kuítrijiai yáinniaiktiniaitkiunka waje sesenta (60) uwí nankaamas takustiniaiti. Tura chikichik aishriniak takusu átiniaiti. 10 Ti paant péñker túrin átiniaiti. Ni uchirín péñker tsakatmaashit, íraran péñker táata tíniuashit, nekasmiancha enentáimtumar Yus-shuaran yáiniaashit, wáitiainia nuna waitnenniuashit, tura chikichnasha péñker túriniaitkiunka maak.

11 Tura sesenta (60) uwí takakchaka chíkich wajejai iruraip. Ni ayashí wakeramuri Krístuiya kanamtikiainiawai tura ataksha nuatnaikiatniun wakeruiniawai. 12 Tura emka enentáimtiarmia nuna iniaisar sumamainiawai. 13 Nu arantcha nakimiainiak ántar irauwear chikicha itiuurcharin áujmatsachminia nunasha áujmatin áiniawai. 14 Nu asantai waje úchiplik ainia nuka uyurtukar uchin takusarti. Tura nuwá nuatkamu takastinia nuna túrawartí. Tura ni túrunamurijiai in kajertamainiaj nú shuar yajauch enentáimturmarcharti. 15 Kame nuik chíkich chíkich waje Krístuiya kanakiar iwianchin nemarsaru ásarmatai nuna tájai.

16 Áishmansha nuwasha Yus-shuar ainia nu ni shuariin waje ákuinikia Yusa kuítrin seatsuk nii yaíntí. Nujai chíkich wajén nekas atsumainia nuna Yusa kuitri yáintatui.

17 Yus-shuara uuntri Yus-shuaran péñker wáinkiarua nu, nekas shiir enentáimtustin áiniawai. Tura akinkiamniasha áiniawai. Nekaska Yus-Chichaman etserkatniuncha tura unuiniartinniasha tuke takaaka imiá shiir enentáimtustinaiti. 18 Yus-Papiniumsha núnisañ áarmaiti:

Jin̄kiaia saepen pakartaj tusa turu takaak nájakui ni nují jin̄kiatáshtiniaiti. Antsu ni wakerak yuati. Tu áarmaiti.

Tura nu arantcha áarmaiti:

Takakmasua nu nekas akinkiatniuiti. Tu áarmaiti.

¹⁹ Chikichik shuarak Yus-shuara uuntri tunaarín etsertukmatain̄kia an-turkaip. Antsu jímiarsha menaintiusha tsanumtsuk métek tuiniakui an-turkata. ²⁰ Chíkich shuarsha ni tunaarín ikiuktinian nakitiainia nu, ashí iruntramunam chicharkarta. Chikichcha, nuna íisar, ashamkarti. ²¹ Yussha ii Uuntri Jesukristusha tura nayaimpinmaya suntarsha íimiainiamunam “túrata” tájame. Ashí shuarjai niisháa enentáimtutsuk métekrak túrata. ²² Yus-shuara uuntri atí tusam wárik anaikiaip. Wárik túramka chikicha tunaarín sumamat-tame. Ashí tunaanum penké pachiinkiaip.

²³ Wakemjai jau asam aya éntsak úmutsuk karía ishichik pachimpram umarta.

²⁴ Chíkich shuara tunaari wáitsatin imiá paant áiniawai wáitsatin tsawant jeatsain̄. Tura chíkich shuara tunaarínkia paantcha áiniawai antsu ukunam paant nekanawartatui. ²⁵ Núnisan penker túramusha ti paant áiniawai. Tura yamá páantchaitiat tuke paantcha áchamniaiti. Páchitsuk nekanattawai.

6

¹ Takarniutirmesha, atumí uuntri ti shiir umirkatarum. Túrachkumnin̄kia chíkich shuar Yusnasha ii unuiniamuncha yajauch áujmattsartatui. ² Atumí uuntri Yus-shuar áiniakka aya Yusjai yatsum asamtai nakiarchatniuitrume. Antsu nuna nan̄kaamas penker takarsatniuitrume. Warí, ame yayamna nu Yus-shuarchak ainia, tura ame aneamu yatsumchak ainia. Ame, Timiutéu, tu jintintiata.

Yusna wakeruktincha tura kuit wakeruktincha

³ Shuar ti shiir naka chichaman ii Uuntri Jesukristunu ana nuna nakitiak antsu niisháa chichaman étserkun̄ka ⁴ nu shuar nan̄kaamantu enentáimtumayat ántraiti. Ni enentáimmianak chichaak aya ántar chichaman antumtiknaikiatniun chichaawai. Tura nu chichamjai nupetmaktaj tusa nan̄kaamas áujmatainiak kajernaikiar tura katseknaikiar penker enentáimtunaitisuk ⁵ tuke kakannainiawai. Tura tu aujmatnaisatniun wakeruiniana nú shuar nekas-chichaman nékachu ásar aya tunaan enentáimtin áiniawai. “Yusna ana nujai kuítrintin ajasminiaiti” tuiniawai. Nu shuar pachisaip. ⁶ Shuar takakna nujain̄ waraakka Yusna ana nujai sha waraak ju nun̄kanmasha tura nayaimpinmasha nekas kuítrinniuiti. ⁷ Iis, ju nun̄kanam misuk támaji; núnisar misuk jiinkittiaji. ⁸ Tuma asamtai yurumkasha tura entsataisha takakkurkia nujain̄ warasa pujustiniaitji. ⁹ Antsu kuítrintin ajastaj tuinia nu, tunaanum awan̄kemkar iniainiawai. Tura antra nuna wakerukar itiurchatan wáiniainiawai. Nujai emesratniunmasha jeainiawai. ¹⁰ Kame kuit aneatniuka ashí tunáanum útsutmakminiaitji. Chíkich shuar nuna wakerukar Yus enentáimtustinian iniaisar ti itiurchatjai yajauch awajmamsarai.

Yusna nu túrunat tusam kakaram ajástá

¹¹ Antsu ame Yus-shuar asam nuyá pisarta. Yus nekas enentáimtakum penker túrata. Waantu enentáimtsuk Yus penker umirkata. Aneakum katsun-trata. ¹² Yusna nu túrunat tusam kakaram ajástá. Tuke amuicha iwiaakma emetata. Nu túratniun Yus anaitiamkaiti, tura ame Yus nekas enentáimtamun̄ untsurí shuar iruntramunam etserkaitme. ¹³ Yuska ashí iwiaaku átinian súwiti. Jesukristusha Punsu Piratui nekasa nuna ti paant ujakmiayi. Tuma asamtai Yussha Jesukristusha íirainiamunam nuna tájame. ¹⁴ Ii Uuntri Jesukristu

táatsain wi tájamna nu yapajítsuk tura yajauch chicharnakchamnia pé_nker umiktá, tájame. ¹⁵ Tsawant jeamtai Jesukrístu tatí tusa Uunt Yus, imiá pe_nker asa, akupkattawai. Ni_nkiti Yus. Akupniuncha Akupniuiti. Uuntjai nan_nkaamas Úuntaiti. ¹⁶ Iwiaaku átinia nérenniur_i Ni_nkiti. Ti tsáapninnium pujakui nuntumtuachminiaiiti. Wáinchatai asamtai shuar pe_nké wáinkiacharu áiniawai. Ni_nki ashí shiir awajsatniuiti tura Ni_nki tuke ashí akupin atí. Núnisa_n ati.

¹⁷ Jú nu_nkanam kuítrintin ainia nusha nan_nkaamantu enentáimtuscharti. Kuitcha yúpichuch me_nkkakamnia asamtai kuítniak enentáimtusar pujuscharti. Antsu iwiaaku Yus ashí in ti pe_nkeran núkap súramaj nuna nekas enentáimtusarti. ¹⁸ “Pé_nker túratarum” tiarta. Tákumin niisha shiir enentáijiai ni takakman ajamsarti. Nuyá nú pé_nker túramujai Yusai ikiáunkartí. ¹⁹ Nuna túruiniak kuítriniawartatui. Núnisa_n tuke iwiaaku átinian wáinkiaartatui.

Amuak Timiutéun akatramu

²⁰ Timiutéu, ashí ame túratniua nu tuke enentáimturta. Jú nu_nkanmaya ántar chichainia nu anturkaip. Tura wáitruiniak “wi imiá nékajai” tuinia nusha anturkaip. ²¹ Chíkich shuar nuna umirkar Yusaiya kanakiarai.

Wátsek, Timiutéu, Yus shiir yainmakti.

Nuke atí.

Papru TIMIUTÉUN Ataksha papin aar akuptukma

Papru Timiutéun áatramiania nu

¹ Wi Pápruitjai. Yus wakerakui Jesukrístu akatramuri ajasuitjai. Ashí Jesukrístujai tsaniñkiarun “Nekas iwiaaku átinian susattajai” tíniuiti Yus. Tuma asa nuna etserkat tusa akuptukuiti. ² Aneamu uchiru, Timiutéu, ju papín áateajme. Yus Apasha tura ii Uuntri Jesukrístusha ti anenma ásar waitnentrainiak imiatkinchanum shiir pujustinian yainmakarti.

Krístunu takastiniaitjinia nu

³ Tsawajsha káshisha Yúsan áujeakun ámin tuke enentáimtusan ti shiir Yúsan yúmiñkijai. Winia weatur túrawarmia nútiksanak Yúsan enentáimtakun ti shiir awajeajai. ⁴ Kanakmiaj nuñ eantramiam nuna tuke enentáimtajme. Ataksha wararnaisatai tusan ítniun wakerajme. ⁵ Yus nekas shiir enentáimtiniaitmena nuna nékajai. Nukuchrum Ruítiasha tura ame nuku Eunisiasha emka Yúsan nekas enentáimtin ármiai. Amesha núnisketme.

⁶ Tuma asakmin tájame: Yusna takasái tusan winia uwejrún ámin awanteakui Yus kakarman suramsamia nujai atak kakaram takasta. ⁷ Yus sápij enentáin suramsachuitji. Antsu kakaram ajastinniasha anenaitniuncha péñker wekasatniuncha suramsaitji. ⁸ Ii Uuntri Jesukrístunu etserkatin natsantraip. Níiniun étserkun sepunam pujamusha étserkum natsantraip. Antsu Yus kakaram awajtamkui ame étseream nujai shuar yajauch túramainiakui surimiamtsuk wáitsatin enentáimtumarta. ⁹ Ii péñker túrichu áriniñ Yus in anenma asa uwemtikramar péñker túratniunam apujtamsaitji. Iisha Jesukrístujai tsaniñkiaru asakrin tura Yus nuna túratniun wakerak túramiai. Yaunchu ju nunka atsaisha in tuke waitnentrampriamiai. ¹⁰ Tura yamá in Uwemtikkiartin Jesukrístu támatai nu anenmamu paant ajasuiti. Niisha jákatniun nupetak emesramiai. Tura uwempratin chichamjai jáchatai iwiaakman paant awajturmajai.

¹¹ Nuna etserkat tusa Yus anaitiukmiayi. Tura akattur Israer-shuarchanum akuptukmiayi. ¹² Túruta asamtai ti wáitijai. Túrasa Yúsan nekas enentáimta asan natsamatsjai. Imiá kakaram asa amuukatin tsawant jeatsain ashí wínian susamaj nuna ti péñker waitruktatui.

¹³ Shiir chichaman jintintiamajmena nuke emetata. Jesukrístujai tsaniñkiu asar Yus nekas enentáimtaji tura nujai anenkratniuitji. Tuke núnismek túrata. ¹⁴ Yus ámin takasat tusa suramsamu shiir takasta. Tura Yusa Wakaní in pujurtamaj nuna kakarmarjjai túrata.

¹⁵ Asia nunkanmaya shuar mash iniaitiusarmai. Nu nekaachmaashum. Nu shuarnumia Pijirusha Ermujenessha armai. ¹⁶ Antsu Unisépuru niisháa shuar amai. Ti nukap shiir enentáimtikurmai. Tura wi sepunam pujamuncha natsantrurchamai. Ii Uuntri Kristu ni shuarincha waitnentrarti. ¹⁷ Rúmanam taasha natsantrutsuk eatak wáittsuk iniaitiúschamiayi. ¹⁸ Ipiisu péprunam pujarin ti yainmakmiaj nu paant nékame. Tuma asamtai amuukatin tsawant jeamtai nincha Uunt Yus waitnentrati.

2

Kakaram ajasta

¹ Amesha, uchirú, Jesukristujai tsaninkiu asam nu kakarmajai kakaram ajasta. ² Untsurí ántuiniamunam wi etserkamaj nu, shuar umikmin ainia nu jintintiwaram chikichnasha jintintiwarat tusam akupkarta.

³ Ame ti penker Jesukristu suntari asam wáitsatin katsunrata. ⁴ Suntarka ni uuntri tana nunak umiktin asa chíkich takatan pachintiukchatniuiti. ⁵ Núnisan nakurincha nakurustinia nujai métek nakurachkunka nekas penkeran awakmakun súsatniua nuna achikchamniaiti. ⁶ Ataksha núnisan shuar ajan takaana nu, ashí shuara nankaamas nuyan yúashtinkiait. ⁷ Wats, ju menaintiu métek-taku chicham ániawai. Penker enentáimtakmin ii Uuntri Kristu paant awajturmastatui.

⁸ Jesukristu jaka nantakmia nu enentáimprata. Tura Uunt akupin Tawit ni weatri asamtai Jesussha uunt akupin átiniaiti. Núiti wi uwempratin chichaman étsereaj nu. ⁹ Nuna étsereakun sepunam jirujai jinkiamu pujakun wáitiajai. Túrasha Yus-Chicham jinkiachminiaiti. ¹⁰ Ashí shuar ni shuari arti tusa Yus achikiarua nuna yáintajtsan ashí itiurchatan katsunteajai. Nujai Jesukristujai tsaninkiaru ásar uwemprar tuke shiir pujusartatui Yusjai.

¹¹ Ju imiá nekasaiti:

Jesukristujai jákaitkiurkia Níjiaisha tuke iwiaaku pujustatji.

¹² Wáitiakrishia Nijijai akupkattaji.

Natsantakrinkia Niisha natsantramprattaji.

¹³ Umichuitkiurniisha Ninkia tuke uminiaiti. Warí, Yuska ni enentáimmiyajain yapajniátsuk tuke umiktiniaiti.

Yusai natsaaraj tusam ashi túrata

¹⁴ Shuar jintintiakum ju enentáimtikrata. Ii Uuntri Yus ímmianum chichamjai yajauch tunaiyarain tusam chicharkarta. Nu tunaitin penké áantrai antsu ántuiniana nuna yajauch awajenawai. ¹⁵ Yus-Chicham tuke enentáimjai penker unuimiátram shiir jintintiwarta. Túrakum Yus penker írsat tusam penker takarin atá. Túramka Yusai natsaarchattame. ¹⁶ Jú nunkanmayanak ántar áujmatin ainia nujai kanaktia. Shuar nuna áujmatainiak tunaanum nuna nankaamas wáiniawai. ¹⁷ Ni jintiniamusha sunkurjai métek pampaawai. Iminíusha tura Piritiusha nu shuar ániawai. ¹⁸ Niisha nekas chichaman iniaisar tura ashí Yus-shuar nantaktincha nankaamasai tuiniakui chíkich chíkich shuar Yúsan naka enentáimtuiniatsui yamaikia. ¹⁹ Túrasha Yus ashí nankaamas enentáimtustinia nuna paant awajsaiti. Júnisaiti: “Uunt Yus ni shuarin nékainiawai,” tura nuyá “Ashí Kristu shuari ainia nu tunaanumiá kanakiarti.”

²⁰ Kufrinniu jeen kurijai najanamusha kuitjai najanamusha írunui. Nújainkia ti shiira nu takastin ániawai. Tura numijiai najanamusha nuwejai najanamusha írunui. Antsu nújainkia nekasmiancha ainia nu takastin ániawai. ²¹ Núniskete Yusa takatríjiai. Ashí tunaanumiá kanakir penker wekasar shiira nu takasmin átatji. Kame ashí penkera nu takasmin asakrin ii Uuntri Jesukristu wakerak penker takata nu apujtamsamniaitji.

²² Natsá wakerutai iniaisam esetram penker wekasata. Amesha ashí shuar shiir enentáijiai Yúsan áujena nujai Yus nekas enentáimtakum aneniakum ti shiir pujustá. ²³ Enentáimtsuk chichainiak aya ántar tunaitinian chichainia nu pachisárap. Nusha aya némasmanainiawai. ²⁴ Ii uuntri Jesukristu takarniuka chíkich shuarjai nemasmanaikiashtiniaiti, antsu ashí shuarjai penker nawamnaikiatniuiti. Tura waitnentáimturar penker jintintiatniuiti. ²⁵ Tura umircha shuarnasha Yus ni enentáin yapajtiakui nekas chichaman shiir enentáimturarat tusa penker enentáijiai jintintiatniuiti. ²⁶ Nujai íwianch ni wakeramu túrawarat tusa achikmaitiatan uwemprartatui.

3

Amuukatin tsawant jeatemamtai aents ti tunaan túrawartatui

¹ Amuukatin tsawant jeakui ti itiurchat átatui. ² Shuar aya niñki enentáimtumasartatui. Kuítian ti wakeriartatui. Nañkaamantu enentáimtumarartatui. Yúsnasha yajauch chicharsartatui. Aparíncha umirkachartatui. Yumínsatniuncha nékachu ártatui. Ashí Yúsnan ncha enentáimtuschartatui. ³ Aneetsuk waitnenkartichu ártatui. Tsanumin ártatui. Ni ayashí wakeramun katsuncha ártatui. Aya kajen ártatui. Ashí péñker túrinia nuna nemasrı́ ártatui. ⁴ Amikríncha surukartatui. Arantsuk tunaan túrawartatui. Waantu enentáimin ártatui. Yúsan nakitrar aya ni wakeramunak enentáimtusartatui. ⁵ Yusa kakarmari “ántrai” tuíniak péñker umirkachartatui. Túrasha Yúsan umirua núnisar túrawartatui.

Nu shuar penké pachisáip. ⁶ Nu shuarsha shiir chichayatan anañkawar jeá wáiniawai. Tura nuwá esetar enentáimchan nekas tunaarinnun anañkainiawai. Nu nuwá ashí yajauch wakeramujai anañnainiawai. ⁷ Tuma ásar ashí shuara chichamen tuke ántuiniayatan nekas-chichaman nekaatniun tujintiainiawai. ⁸ Yaunchu Ejiptu nunkanam Muisais uunt akupniujai chichaakui jimiará iwishin, Jánissha Jámpriissha, Muisaisan kajerainiak “ántar tawai” tiarmiayi. Núnisar ju shuar nekas-chichaman nakitiainiawai. Naka enentáimiainiachu ásar Yúsnan naka jintiatniun penké tujintiainiawai. ⁹ Túrasha nuna nañkaamas kuakchartatui. Shuar ti paant ni netse túruiniamurin nekarawartatui. Núnisar nu jimiará iwishniujai túrunamiayi.

Amúak Papru Timiutéun akatramiania nu

¹⁰⁻¹¹ Tura ámeke wi tímiaj nu umireame. Wi Yusjai shiir wekaamusha métek túriniaitme. Wi enentáimmiasha nékaitme. Ántruiniakui wáitsamaj nu nékame. Tura Yúsan enentáimtakun tura aneñkratkun shiir enentáijjai kat-suntramjai. Antiukía péprunmasha, Ikiuniu péprunmasha, Ristra péprunmasha ashí yajauch túrutawarmatai wáitsamaj nu paant nékame. Túrasha ii Uuntri uwemtikrurmiayi. ¹² Nekasaiti, shuar Jesukrístujai shiir túrataj tákunka ni nemasrı́ ántiam ti wáitsatniuiti. ¹³ Tura ashí anañkartin ainia nusha kame ashí yajauch shuarsha nú yajauch túrukiar wétatui. Iwianchjai anañkamu ásar chikichnasha anañkiar weartatui.

¹⁴ Antsu ámeke unuimiam nu imiá nekasaiti tu enentáimtakum tuke emetata. Jintinramawarmia nú shuarsha wáitrichua nu nékame. ¹⁵ Úchichinmayan Yus-Chicham nékame. Yus-Chichamka uwempratniun jintinramanniaiti. Nusha “Jesukrístu nekas enentáimtakum uwemprattame” tawai. ¹⁶⁻¹⁷ Ni Papirin áarat tusa Yus ni shuarin áantikramiayi. Ashí shuar ni Chichamen nekaawar péñker túrawarat tusa túramiayi. Tuma asamtai Yus-Papí shuartin unuiniakartin asa imiá penkeraiti. Tunáa túrajnia nu Yus-Papijjai nekatatniuitji. Tura awajikrincha Yus-Papí núnaka paant jintinramji. Nuyá naka wekasatniun jintinramji.

4

¹ Ii Uuntri Jesukrístu amuukatin tsawantaj Uunt Akupin ajas iwiaakuncha tura jákaruncha ashí péñker túramuncha tura yajauch túramuncha nekaat-tawai. Tuma asamtai Niisha tura Yus Apasha íimiainiamunam juna akateajme. ² Uwempratniun chicham etserkata. Yúpichuchia nuisha tura itiuurchata nuisha tuke etserkata. Yus-Chicham nekas enentáimtikrarta. Tura shiir enentáimtusam chicharkam yáintaj tusam unuiniararta. ³ Ukunmanka

pénker chichaman nakitrar ii wakeraj núchik nekaatai tusar, shuar teremak pénker pujuschamnia nekapea áintsan, nankaamas unuimiaru atai tusar, nánkamas unuikiartinian ti untsurí eakartatui. ⁴ Nekas shiir chichaman iniaisar ikiuiniak ántar áujmatsamun enentáimtusartatui. ⁵ Antsu ámeke tuke pénker túratin wakerakum ashí itiurchat katsuntrata. Uwempratin chicham étserkum takatrum pénker umikta.

⁶ Ishichik ajasai winia iwiaakmar Yusaj surumaktin. Mantamnan nayimpiniam wétin jeatimiai. ⁷ Shuar kakaram maanainia núnisnak tuke kakaram takasmajai. Tséken pénker tsekea áintsanak yawetsuk takasmajai. Tura Yus-Chichaman nekas akasmatkun pénker wáinkiaitjai. ⁸ Tuma asamtai tawasap nukajaj najanam tsékena susamua áintsan wisha pénker túramunam akinkiattajai. Tura aya wíniak akirkashtatui. Antsu ashí ni tátinian shiir enentáijiai nákania nunasha nekas pénkera nuna akikiartatui.

Timiutéu túratin akatmamturma

⁹ Wárik iiraitin enentáimturata. ¹⁰ Témas aya jú nunkanmayanak wakerak ajapa ikiuruk Tisarúnika péprunam weyi. Tura Kresentisha Karasea nunkanam weyi. Núnisan Títiusha Tarmasia nunkanam weyi. ¹¹ Túrawarmatai aya Rúkas wijiaj pujawai. Márkus eaka wáinkiam ame itiaititia. Jui ti penker yainkiamniaiti. ¹² Tura Tíkikiunka Ipiisu péprunam akupkamjai. ¹³ Tura winiakum nuparam pushí Trúas péprunam Karpu jeen ikiukmiaj nu takurtuktia. Núnisan nuparam papísha tura nekaska penké papí takurtuktia.

¹⁴ Arejánruka jirujaj takawa nu ti yajauch awajtusuiti. Túrutaitkiuisha ni túramujaj métek Yus akiktí. ¹⁵ Nu amesha pénker wáinkiatá. Ii étsereamun penké nakitiawai.

¹⁶ Emka akupniunam ayamprumaktaj tusan chichaakui chikichkisha yáintkiacharmiayi. Antsu sapijmiainiak ikiurkiarmiayi. Yus nu shuaran yajauch enentáimturchara maak. ¹⁷ Tura ii Uuntri Jesukristu ni kakarmarin surus yaintkiamiayi. Nujaj uwempratin chichaman ashí nunkanam Israershuarsha antukarti tusan etserkamjai. Tura núnisan akupniunmayasha ii Uuntri uwemtikrurmiayi. ¹⁸ Tura núnisan ashí yajauchia nuyá uwemtikrurmatai Nii akupeana nu nayaimpiniam jeattajai. Niniki tuke shiir awajnasti. Núnisan atí.

Amikmaamiania nu

¹⁹ Piriskancha ni áishri Akiranacha amikmainiajai. Núnisnak Unisépuru shuarincha amikmainiajai. ²⁰ Erastu Kurintiu péprunam juakmai. Tura Trúpimiunka Miritiu péprunam jaan ikiukmiajai. ²¹ Michá nantu jeatsain iiraitin enentáimturata. Tura Eupurusha Putentesha Ríniusha Kráutiasha tura ashí Yus-shuarsha amikmaatmainiawai.

²² Ii Uuntri Jesukristu ámijiaj tsanin pujustí. Tura Yus ashí pénker waitmakarti.

Nuke atí.

Papru TITIUN papí áatramu

Papru Titiun áatramiania nu

¹ Wikia Pápruitjai Yusa takarniurí. Tura Jesukrístu akatramurintjai. Yus achikma ainia nú shuar niisha antukar Yúsán umirkarat tusan akatramuitjai. Shuar nuna nekaawar péñker wekasartatui. ² Tura nú arant, nú shuarsha tuke iwiaaku pujusarat tusan étsereajai. Nú shuarnasha, nunñan najantsuk, “uwentikrattajai” Yus tímiayi. Tura Niisha wáitruatniun tujintiawai. ³ Tura yamaikia, tsawant jeantai, nuna nekaawarat tusa ii Yusrí uwentikkiartinia nu, winia chichamur ujakarta tusa, winia akatturmiayi.

⁴ Titiu, wi Yusna étserma umikiu asakmin winia uchirua áitkiasnak papin áateajme. Iis, iijjai métek Yus nekas enentáimtatsjik. Yus waitnentrama asa shiir awajtamsati tusan wakerajme. Tura ii Aparí Yussha, ii Uuntri Jesukrístusha, Uwentikkiartin ana nu, enentáimin imiatkincha awajtamsati, tajai.

⁵ Wats, wi iwiarachmajna nu ame iwiarata tusan Kreta nunñanam ik-iukchamkajam. Tura “ashí péprunam Yus-shuar írunmanum, Yus-shuaran wáinkiarat tusam shuar anaikiarta” tíchamkajam.

Yus-shuaran wáinin

⁶ Yus-shuaran wáinin júnis atí. Niisha makuuchmin ti péñker wekasatí. Tura chikichík nuwentín átiniaiti. Tura ni uchirísha Yusna ártiniaiti. Tura shuar yajauch chicharsachmin niisha tutupnisañ wekain ártiniaiti. ⁷ Enentáimprata. Yus-shuaran wáinin Yusna ana nuna wáinkiat tusa anaiki-amuiti. Tuma asamtai nekas makuuchmin wekasatniuiti. Waantu enentáimtumatsuk, kajetsuk, tura nampechu átiniaiti. Chikichan waitkiau áchatniuiti. Tura anañma kuítrintin ajastaj tusa wakerukchatniuiti. ⁸ Antsu shuar ni jeen írar winiana nuna itiaatniuiti. Tura ashí péñker ana nuna wakerin, esetas enentáimin átiniaiti. Tura ju nunñanmayá akupeamuncha, núnisañ Yús akupeamuncha umirkatniuiti. Tura niñki ímiastiniaiti. ⁹ Tura nú arantcha, chíkich shuáran péñker jintintrataj tusa tura Yus-Chichaman nakitin áinia nuna nupetkataj tusa, Yúsnumiá nekas chichaman, nii un-uimiátramiania nuyá kanakchatniuiti. ¹⁰ Nekaata. Umichu ti irunui. Niisha ántar chichau ásar anañmau áiniawai. Israer-shuar weenam ti irunui nú shuar. ¹¹ Niisha kuítian achiktaj tusar wakeruiniak, yajauch unuiniarchatniua nuna unuiniainiawai. Nuna túruiniak untsurí shuáran, ni írutkamurijjai yajauch enentáimtikiainiawai. Tuma asamtai auka, ni wene epetkatniuiti, ántar chichainiakui. ¹² Warí, imia Krétanmayá chichaman etserin juna tíchamka: “Krétanmayá aentska tuke wáittrin áiniawai. Tura nákitiat ti yurumin áiniawai. Yajasma núnisañ áiniawai.” Nuna tíchamka. ¹³⁻¹⁴ Maa, niisha nékasañ tímiayi. Nu tuma asamtai, Titiu, Israer-shuar ántar tuinia nuna, Yus-shuar anturkachartí tusam, tura nekas chichaman nakitiana nuna akupeamurín umirkachartí tusam, antsu Yúsán nekas umirkarat tusam, umichu shuar kakaram chicharkarta.

¹⁵ Enentáimprata. Yus-shuarka, ni enentái chamir ajasu ana nuka, ashí ni wainnia nuna péñkernak enentáimtai. Tura chíkich shuar, Yúsán umirkachu asa, ni enentái wapik asa, péñker ana nuna enentáimtustinian tujintiawai. Achapai enentáimiuk, péñkercha ana nuna “péñkeraiti”

tawai. ¹⁶ Tura niisha “Yus-shuaraitjai” tuñiyatan, Yúsan umirtsuk niisháa túruiniawai. Tuma ásar mujmiai áiniawai niisha. Umichu ásar péñkeran túratniun penké tujintiainiawai.

2

Pénker jintintiatin

¹ Tura amesha, Tituu, péñker chicham etserkata. Yus-Chicham tátsuna nu etserkaip. ² Antsu áishman katsunt Yusna ainia nu, ju jintintrata. Nampechu, nánkamas enentáimcha, esetas enentáimin arti. Yus tana nuna umirin tura anenain arti. Ni itiurchatrín Yúsan enentáimtusar katsuntin arti. ³ Tura núnismek nuwá katsunt Yusna ainia nusha ju jintintrata. Niisha núnisarañ Yus-shuarti túramnia nuna péñker túrawartí. Tsanumin tura nampen áchartí. Antsu péñker wekasatniun unuinin arti. ⁴ Niisha yama nuatnakua nuna ni áishrin ni uchiríncha nekas aneetniun unuiniarartí. ⁵ Junasha jintintrartí. Esetas enentáimin, péñker wekain ártiniaiti. Ni takatrín péñker takastin áiniawai. Ni áishrin umirin ártiniaiti. Tura waitnentin ártiniaiti. Yus-shuarcha Yus-Chichaman yajauch chicharkarañ tusar túrawartiniaiti. “Tu jintintrarta” titiá.

⁶ Nuyá, Tituu, natsa áinia nu “nánkamsar enentáimsarum wekasairap” titiá. ⁷⁻⁸ Tura amesha, Tituu, ashí tsawant péñker wekasatá. Nu natsa wi túramun júkiar nunak túrawarmi tusam, nu túrata. Tura anturtamna nu “nekaschapitia” tijn tusam, esetsam enentáimsam, Yus-Chicham tana nu ímiatrusmek jintintiata. Nú túrakmiñkia, Yus-Chichaman nakitiana nu shuar “Tituu nánkamas chichaawai” titiaj tukamá, natsaamak tujintramkattawai.

⁹ Takarin ainia nu, ni takartairin umirkarat tusam jintintrarta. “Shiir enentáimsarum, yajauch áimtsuk shiir umirkatarum” titiá. ¹⁰ “Kasamkairap, tura anañkawairap. Iis, péñker túrakrumka, takarniuitiatrum, shiir tura asarum ii Uwemtikramin Yusri chichamen shíiraiti, tu enentáimtikrattarme” titiá.

¹¹ Yus in waitnentrama asa ashí áentstin uwemtikramprataj tusa wakerutmaji. ¹² Kame Yus waitnentrama asantai, tunáa ana nu iniaisatniuitji, nu nékaji. Tura ju nunkanmaya yajauch ana nu wakerukchatniuitji. Tura antsu ju nunkanam pujayatrik esetsar enentáimsar ananma wekatsuk tuke tsawant Yus anear wekasatniuitji. ¹³ Túrar ii Yusri Jesukrístu, uwemtikramajnia nu, imiá shiir iwiarnar tatí tusar nákastiniaitji. ¹⁴ Jesukrístuka in jarutramkamiaji, ii tunaariniá uwemtikrampratajtsa. Tura, Winia ajarar tuke enentáijjai péñker túrawarat tusa, ii tunaarin japirtampramajia.

¹⁵ Tituu, anaikiamu asam arantutsuk nu jintintrata. Yajauch ana nuna túrawarañ tusam chicharkarta. Péñkeran túruinia nu ikiakárta. Tura yajauch chichartukarañ tusam tuke péñker wekasata.

3

Yus-shuarti túratin

¹ Tituu, shuar enentáimtikrarta. “Ashí akupin ainia nusha tura chikich uunt akupena nusha antukrum umirkatarum” titiá. “Pénkeran túratin ana nuna páchitsuk túratatajai” titiniaitrume” titiá. ² “Tsanumprairap, kajernaikiairap, antsu shiir enentáimtunaistarum” titiá. Nankaamantu enentáimtumsuk ashí shuar péñker awajsatarum tusam tu jintintrarta. ³ Warí, iisha núnisrik Yus-shuar ajatsuk nánkamsar wekaimji, Yuska umirtsuk. Tura íwianch emetamu pempée wekaimji. Tura ii ayashí wakeramu tuke túriniuyaji. Tunaasha túriniuyaji. Chíkich atankittsar wakeriniuyaji. Chíkich shuar kajerkar tura nuamtaksha kajernainiuyaji. ⁴ Túrasa Yus in uwemtikkiartin ana nu,

anenkratin asa, ni anenkrattairin ashí áentsun iniaktus in uwentikrampramiaji. ⁵ Yus in waitnentrama asa, iikia júkesha péñker túrachma ain uwentikrampramiaji. ¿Itiurak uwentikrampramiaji? Ii tunaarin asakátrampramiaji, nijiaktinia áintsan. Tura Yusa Wakanj pujurtamkurin, ii iwiaakmarin yamarman amasmaji. ⁶ Jesukrístu jakamujai Yus in emeenturmatsuk ni Wakanin suramsamiaji. ⁷ In anenma asa nuna túramiayi. Nuñkia iisha yamaram awajsamu asar tuke iwiaaku átin, ti wakerimiaj nu íiniuiti. ⁸ Nuka ti nekasaiti. Tuma asamtai Yúsan umirkarmia nu, péñker túratniun tuke wakerukarat tusam tuke jintinki wetá. Wi tímiajna nu, péñker asamtai, ashí aents nuna nekaatniun atsumainiawai. ⁹ Shuar netse áujmatainiakui ameja pachisaip. Tura “aya winia úuntruk péñker áiniawai” tu chichasaip. Tura Israer-shuara akupkamurj itiurkit tusa shuar ti áujmatainiakui nusha pachisaip. Ántraiti nuka. Péñker wekasatniun yayatsui. ¹⁰ Shuar tsanumprur yajauch enentáimtunaimtikiana nu chicharkata. Ántachkuinkia ataksha chicharkata. Tura penké tujinkiamka jiki akupkata. ¹¹ Nujai juna nekaamniaitme: nuna tura asa awajiruiti. Tura ni tunaarinin jakattui.

Papru wakerana nu

¹² Wisha Artemasan akatran akuptukchatjameash. Nin akupeachkunka Tíkikiun akuptuktatjame. Nii jeamtaí amesha wari winitritia Nekapuris péprunam. Jui Nekapurisnum yumí nantu asamtai seturan pujuttajai. ¹³ Senas, chichaman ti unuimiaru pujana nu, amikiur Apurusjai jeamtaí, nii atsumtsuk shiir weartí tusam, ame túratin jeamna nu yain̄ta. ¹⁴ Iini Yus-shuar ainia nusha péñker túratniun tura atsumainia nunasha yáin̄tinian nekaawartí. Ántar pujusarain tusan nuna tajai.

¹⁵ Ashí wijjai pujuinia nu amikmaatmainiawai. Tura ii amikri Yus-shuar ainia nu amikmaatruata. Atumniasha Yus shiir yainmakat tusan wakerajrume. Nuke atí.

Papru JIRIMIÚÑKAN papí áatramu

Papru Jirimiúñkan papin áatramiania nu

¹ Wi Papru ju papin áaran akuptajme ámin, Jirimiunká. Ii yachi Timiutéusha juna akupturmawai. Wi Jesukrístu takaru asan sepunam pujajai. Ame iijiai tsaninkia takáa asakmin ju papin akuptajme. ² Núnisan ame jeemiin Yus-shuar irunainia nunasha tura ii umaí Apiancha tura Arkipiuncha iijiai ti kakaram takasu asamtai ju papin akuptajrume. ³ Yus ii Aparí tura ii Uuntri Jesukrístu shiir enentáimturma ásar yainmakarti imiatkinchanum tuke shiir pujustinian.

Jirimiún pénker Yus-shuar ámiayi

⁴⁻⁵ Ame Uunt Jesus shiir enentáimtakum ashí Yus-shuar ainia nusha aneamun antukjai. Nuna antukan ámin ti shiir enentáimtakun Yúsan áujeakun yúminkiajai. ⁶ Áujeakun chích shuarsha ámijiai métek Yúsan nekas enentáimtuiniak ashí pénker ana nuna ti paant nekaawarat tusan seajai. Ashí pénker ana nuka Jesukrístu shiir awajsamujai takakji. ⁷ Wisha ame anenkratmajai ti shiir enentáimtakun waraajai. Yatsurú, ámijiai ashí Yus-shuarsha shiir enentáimiainiawai.

Papru Unisemun waitnentratniun Jirimiúñkan seamiani nu

⁸ Nu asamtai kakaram tátsujme. Kame wakeraknaka Kristu akatramu asan “Ju túrata” tíminiaitjiamé. ⁹ Antsu aneakun aya júnisan tájame. Wi Papru úuntach asan tura Krístun takarkun sepunam pujakun ¹⁰ Unisemu waitnentraí tusan seajme. Niisha wi ujakmajai Yus-shuar ajasu asa winia uchirua áintsan keté. Sepunam pujayatan ni aparíya áintsanak ajasjai.

¹¹ Nuikkia Unisemu ántrauyi antsu yamaikia aminiisha winiisha yáimniuiti. ¹² Ataksha awantajme. Wi ti penker aneamu asamtai pénker itiaata. ¹³ Wi Yus-Chichaman étserkun sepunam pujajai. Túmakun ame yajá pujakun yáintkiatin tujintiakmin nii antsu wijiiai pujus yáintkiat tusan wakerimjai. ¹⁴ Túrasha ámin ujatsuk túrachmin enentáimpramjai. Kame ame wakerakun útsukchamujai “pujustí” tákumninkia maak. ¹⁵ Júnissha enentáimpramniaiti. Unisemu ishichik tsawant menkakamai tura yamaikia waketki ámijiai tuke pujustatui. ¹⁶ Kame yamaikia emetachma antsu ame aneamu yátsumeá áinis átatui. Nuka ti pénkerchakait. Wisha nin ti aneajai. Tura yainmakmin asamtai tura Krístunam ame yatsum ajasu asamtai winia iniankattsam aneashtapash.

¹⁷ Wisha ti penker amikrumchakaitiaj. Tuma asam winia itiaarua nútiksam shiir awayáta. ¹⁸ Yajauch awajtamkaitkiuinikia tura ámijiai tumashitkiuisha wi akiktatjai. ¹⁹ Wi Papru nekas winia uwejrujai juna áaran ti nekas akiktatjame tájame. Túrasha winia tumashitmena nuna páchittsujme. Kame wi ujakam Yus-shuar ajaschamkun. ²⁰ Wátsek, yatsurú, amesha Yus-shuar asam wi seajme jú túrutata. Kristu enentáimtakum shiir enentáimtikurta.

²¹ Ti penker uminiaitme nuna nékakun júnisan áatjame. Tura wi seajmena nuna nankaamas túrattamna nuna nékajai. ²² Ayu. Átum Yus áujturkurmin Yus winia tsankatruktatui atumiin iiraitniun. Tuma asamtai wi nuí jean pujustin iwiarturata.

Amikmaamiania nu

²³ Épaprassha niisha Jesukrístunu étseruk sepunam wiji*ai* pujus amikmaatmarme. ²⁴ Núnisan Márkussha Aristárkusha Témassha tura Rúkassha Yuschichaman etserkatniun yáintiainia nusha amikmaatmainiawai.

²⁵ Ii Uuntri Jesukrístu atumniasha ti shiir yainmakarti.
Nuke atí.

ISRAER-SHUARAN papí akuptukma

Yus ni Uchiríjaj ni chichamen ujatmakji

¹ Yáunchuka Yúsnan etserniujaj chichas Yus ni enentáimmian ii úuntrin ujakmiayi. Tura untsurí nunkanmasha tura untsurí uwitíncha niisháa niisháa chichas ujakmiayi. ² Antsu ju amúamu tsawantaikia ni Uchirí Jesukristujain ashí Niiniu ana nuna ujatmakji. Yus Niijjaj ashí írúnna nuna najana asa mash Nin súsaiti. ³ Níyaiti Yúsán imiá métek nakumeana nu. Tura Níyaiti Yus nankaamas shiira nuna paant awajeana nu. Niisha aya ni chichamejjaj kakarma nujaj ashí írúnna nuna wáiniuk emeta pujurui. Tura ii tunaarin nijiatramak akupin pujutainium, Yusa untsuurini, pujusmiayi.

Nayaimpinmaya suntarjaj Kristu nankaamantuiti

⁴ Yusa Uchirí nayaimpinmaya suntarjaj imiá nankaamantu awajnasuiti. Tura ti nankaamantu asamtai Yus nayaimpinmaya suntar nankaamas Nin ti shiir awajtawai. ⁵ Wátsek, nayaimpinmaya suntaran chikichkinkesha juna tútsuk Krístun tímiayi:

“Ame winia Uchiruitme. Túmaitkiui yamáikia winia kakarmarun átakeajme.”

Tura núnisan tímiayi:

“Wi ni aparí átatjai, tura Nii winia uchir átatui.”

⁶ Tura jú nunkanam ni Iwiairin akupeak tímiayi:

“Ashí Yusa suntarí tikishmatrarti.”

⁷ Nayaimpinmaya suntarnan júnis chicharui:

“Nayaimpinmaya suntarin takartursarat tusa nasea áintsan awajsaiti. Ni suntarin chárpia áinis akupeawai.”

⁸ Antsu ni Uchiríniun tímiayi:

“Ame, Yusá, tuke akupniuitme. Ame akuptairmesha aya péñkeraiti.

⁹ Péñkera nu anenaitme, tura yajauchia nu muíjniuitme. Tuma asamtai ashí shuar shiir warartamu asamtai Yus, ame Yúsrum, ashí akupniujaj nankaamas uunt awajtamsaiti.”

¹⁰ Nu arantcha tawai:

“Uuntá, yámankamtaik Ame ju nunka najanamiamme. Túram ame uwejmíjjaj nayaimpisha najanaítme. ¹¹ Nusha mai amuukarmataisha Ame tuke pujuttame. Tarachjaj métek mamurartatui. ¹² Tura ipijram ikius-tatme. Pushiya áintsam yapajíáttame. Túrasha Ámeka núnismek átatme. Játsuk tuke pujuttame.”

¹³ Ataksha tímiayi:

“Akupin pujutainium, winia untsuurini, pujusam nákarsatá. Ame nemasru-min nupetkan Ámin umirtamkarti tusan amastatjai.”

Núnisan nayaimpinmaya suntaran penké tíchamiayi. ¹⁴ Antsu Yusa suntarí wakan áiniak ashí shuar uwemprartatna nuna yáinkiarat tusar Yus akup-kamu áiniawai.

2

Anearta. Uwempratin Chicham nakitrashtiniaiti.

¹ Nuikia Kristu ti uunt asamtai ashí Niiniu antukajnia nujaj kanakchatin ti enentáimtustiniaitji. ² Yaunchu nayaimpinmaya suntar Muisaisan súsarmia nú akupkamu nekas uminkiatniuyayi. Shuar umitsuk tunaan túramtai ti

kakaram asutniáwarmiayi. ³ Antsu ii Uuntri Krístuka Uwempratin Chichaman emka itiamiayi. Tura imiá nekas tuíniak Nin anturkaru in ujatmakarmaji. Tuma asamtai Uwempratin Chicham nakitiakrikia nuna nankaamas uwemtsuk asutniáttaji. ⁴ Kame nu arantcha, Uwempratin Chicham ujatmainiakrin imiá nekas tuíniawai tusa aents túrachminian kakarman Yus iniakmasmiayi. Núnisan ni Shiir Wakanj ni wakerana núnisan niisháa niisháa kakermajaj takamtikeawai. Nujaj Yus-Chichama nu paant nekanamniaiti.

Jesukrístu aents ajasmiania nu

⁵ Ayu. Nuik áujmatkur “jú nunka amuukattawai” taji. Tura yamaram nunkanam nayaimpinmaya suntar akupkachartatui. ⁶ Antsu ii akupkattajnia nu, Yus-Papinium áarmaiti:

“¿Shuarti warimpiaitaj ame imiá enentáimtitniusha? Kame, ¿shuar warí asamtai pujursataj tamea? ⁷ Ishichik tsawant nayaimpinmaya suntarjaj péejchach awajsamiame. Túram ti shiir nankaamas uunt awajsattame. Ame najanamun ashí akupkati tusam tsan̄katkattame. ⁸ Ashí nin umirkarti tusam susattame.” Tu áarmaiti.

Yus “ashí nin umirkarti” takui nin umirkashtinkia atsawai. Túrasha yamaikia ashí umirainiaka wáintsuji. ⁹ Tura wáinjinia nu Krístuiti. Niisha aents ajas ishichik tsawant nayaimpinmaya suntarjaj péejchach ajasmiai. Yus ni shuarin ti aneak jarukarti tusa wakerimiayi. Tura ni wáitias jakamujaj yamaikia ti shiir nankaamas Uunt awajsamuíti.

¹⁰ Ashí írunna nu Yus najanamun ásar ni wakeramun umiktin ainiawai. Tura ashí ni uchirisha ni shífirmarin pachiinkiarat tusa wakerawai. Tuma asa Yuska Jesukristun, nu shuaran Uwemtiknia nuna, ni waitsmujaj nekas Uwemtikiartin awajsamiayi. ¹¹ Yusna atí tusa shiir awajsamuncha tura Kristu nin shiir awajea nunasha Yuska mai metek ni Aparínti. Nu asamtai Yusa Uchirj nu shuaran “yatsur” títinian natsantatsui. ¹² Yus-Papinium núnisan tawai:

“Ame náarmin winia yatsurun ujakartatjai. Ashí iruntramunam kantampruattajme.”

¹³ Ataksha ni shuarijjaj métek enentáimtamun tawai:

“Yúsan ti shiir enentáimtustatjai.”

Tura ataksha:

“Yus surusmia nú uchirjaj Yúsan umirkun pujajaj” tawai.

¹⁴ Tura nu uchi aents ásarmatai núnisan Jesussha aents ajasmiai. Tura aents ajas jaka, iwianchin, jatai nérenniurin, ashí emesramiai. ¹⁵ Tura ti untsurj shuaran uwemtikrarmiayi. Nu shuar yaunchu jákatnium ashamainiak tuke wáitin ármiai. Antsu ni jakamujaj yamá an̄kant áiniawai. ¹⁶ Maa, imiá nekasaiti, nayaimpinmaya suntaran yáintaj tusa táchamiayi. Antsu ashí Apraám weean, ashí Yus-shuar ainia nuna yáintajtsa támiayi. ¹⁷ Túratin asa pen̄ké métek ni yachía áinis ajasmiai. Nujaj in tuke waitnentrampromniaitji. Tuma asa Yúsnan pujurniu uuntri ajas Yúsan tuke pen̄ker chichartamsamniaitji. Núnisan murikiun maa Yus súsatniua áintsan ni jakamujaj ashí shuara tunaarin tsan̄kurniuiti. ¹⁸ Tura imia nin̄ki waitsa asa tura íwianch nekapsamu asa yamaikia iisha wáitiakrincha tura íwianch nekaprampurnisha yainmakminiaitji.

3

Jesus Muisaisjajisha nan̄kaamantuiti

¹ Tuma asamtai, pen̄ker yatsuru, atumniasha Niiniu atí tusa Yus achir-makuitrume. Tuma asarum Kristu Jesus pen̄ker enentáimtustarum. Niisha

Yus nekas Akatramuyayi. Tura ashí Yus-shuar ajasarua nujají Yúsna pu-jurniu uuntria núnisaiti. ² Nu atí tusa Yus anaikiamiayi. Túramtai Kristu nuna ti penker takasuiti. Núnisañ Muisais ashí Yusa aentsrín, Israer-shuar armia nuna ti shiir wainkiamiayi. ³ Túrasha Muisaisjají nankaamas Kristu ti shiir awajnasuiti. Jeajají nankaamas jea jeamniuka nekas péñkerchakait. Núnisañ Kristu Muisaisjají nankaamas péñkeraiti. ⁴ Kame ashí jeañ shuar jeamtsuk. Tura Yus ashí írúna nuna najanaíti. ⁵ Wats. Muisais Israer-shuaran wáiniuk Yusa Jeen takastinia ántsañ péñker takarniuyayi. Tura ni takaak ukunam Yus titiatna nuna etserkatniuyayi. ⁶ Túrasha Kristu Yusa Jeen takarniuchu asa antsu Yusa Uchirí asa nuí ashí akupeawai. Nu jeasha iitji. Tura tuke iniaitsuk kakaram ajasar Yus suramsattaj nu wararsar nákastiniaitji.

Yusa shuari shiir pujustin

⁷ Nu asamtai, Yusa Shiir Wakani Yus-Papinium tawai:

“Yamaikia, Yus tana nu ántakrumka ⁸ nakittsuk shiir anturkatarum. Israer-shuar yaunchu aents atsamunam wekainiak Yus taman nakitrar Yúsna nekapsar akajkarmiayi. ⁹ Túramtai Yus tímiayi “Nuí atumí uuntri nekaprusar akajtukarmiayi. Kuarenta (40) uwitin wi kakaram túramun ísarsha nakitrurarmiayi. ¹⁰ Tuma áarmatai nu shuaran kakerkan tiarmajai “Nu shuar ni enentáin tuke awajiniawai. Tura Wi taman umirkatniun nakitiainiawai” tímiajai. ¹¹ Tura kakerkaran nekas takun “Wijjají shiir pujustinian penké tsankatkachartatjai” tímiajai” tímiayi Yús.”

Tu áarmaiti.

¹² Anearta, yatsuru. Yajauch enentáimsarum tuke iwiaaku Yus enentáimtutsuk kanakiirap. ¹³ Kame kashinkia tunaajají anañnam enentáimin Yúsna nakitrashtapash. Tuma asamtai yamaik tura ashí tsawant ikiakánairatarum. ¹⁴ Yámankamtaik Kristu shiir enentáimtusmaj núnisrik tuke iniaitsuk émeteakrikia Krístujají shiir tsaniñkiar pujustatji. ¹⁵ Nu asamtai Yus-Papí tawai:

“Yamaikia, Yus tana nu ántakrumka nakittsuk shiir anturkatarum. Israer-shuar yaunchu Yus taman nakitrarua núnisrum ajasairap.”

¹⁶ Muisais Ejiptu nunkanmaya jjiikmia nú shuar Yusa chichamen anturkariat nakitrarmiayi. ¹⁷ Tura umiiniachkui kuarenta uwí kakerkarmiayi. Tunaan túrawaru ásar untsurí shuar aents atsamunam kajinñkiarmiayi. ¹⁸ Kame umirkacharunka Yus “Wijjají shiir pujustinian penké tsankatkachartatjai” tímiayi. ¹⁹ Iis, Yúsna enentáimtachu ásar Nijjají shiir pujustinnium wayatniun tujinñkiarmiayi.

4

¹ Nu asamtai, ii wayatin tsankatkamu áyatar Yusjají shiir pujustinnium páchitkiachu aij tusan aneartiniaitji. ² Yaunchu nu shuaran ujakarmia núnisañ incha Uwempratin Chichaman ujatmakuitji. Nu shuar Yúsna enentáimtutsuk antukaru áarmatai nu chicham yáincharmiayi. ³ Antsu iikia ni chichame enentáimta asar Yusjají shiir pujustinnium nekas wayají. Tura chikichan Yus tímiayi:

“Nu asamtai kakerkan nekas takun “Wijjají shiir pujustinian penké tsankatkachartatjai” tímiajai” tímiayi. Kame Yus jú nunkan najana umik nuyá shiir pujus ayampramiayi. ⁴ Yus-Chichamnum ayampramun júnis tawai.

“Yus sais tsawant takakmas nuyá tsawantai ayampramiayi.”

⁵ Tura ataksha tawai:

“Wijjaj shiir pujustinnium wayá ayamprashtatui.”

⁶ Shuar nuj wayawar ayampratin tuke awai. Tura emka Uwempratin Chichaman antukarmia nuka umichu ásar wayacharmiayi. ⁷ Nu asamtai ataksha Yus wayatin tsawantan áanturmaitji. Nusha yamá tsawantaiti. Wats, Israer-shuar ni nunké Yus susamunam wayáwarmiayi. Tura nuna ukunam Uunt Tawit timiajai Yus ni chichamen ujatmaji:

“Yamaikia, Yus tana nu ántakrumka nakittsuk shiir anturkatarum. Israer-shuar yaunchu Yus taman nakitrarua núnisrum ajasairap” tímiayi.

⁸ Kame ni kapitiantri Jusué Israer-shuaran ni nunkeen awayá ayamtikraitkiuiñkia Yus ukunam ataksha tsawantan áanturmachajji. ⁹ Nujaj páantaiti, ashí Yus-shuar Yusjai shiir pujusar ayampratin tuke awai. ¹⁰ Yusjai ayampra nu, ni kakarmarijjai takastinian ayampraiti Yus ni takatrijjai ayampramia núnisan. ¹¹ Nu asamtai iisha Yusjai shiir pujustinnium pachiñkiachajj tusar Yus shiir enentáimtusar kakaram ajastiniaitji. Israer-shuar yaunchu Yus taman nakitrarua núnis ajaschatniuitji.

¹² Yusa chichame iwiaaku chichamaiti, imiá kakarmaiti. Puniá mai érea núniniaiti. Tuma asa shuara enentáin inít wayá ashí ni enentáimmian tura wakeramurin ti paant awajtai. ¹³ Yus najanamuka penké Nin umprukchamniaiti. Ashí írrunna nu Yus íimmianum misúa áintsan paant áiniawai. Tura ii túramu ashí paant ujakartatji.

Jesus nekas Yúsnan pujurniu úntrinti

¹⁴ Jesus Yusa Uchirj nekas Yúsnan pujurniu uuntri ajas Yusaj wayá iiniun chichartamji. Nu asamtai iniaitsuk tuke nekas enentáimtustiniaitji. ¹⁵ Niisha iijjai métek ashí tunaanum nekapsamuiti. Túrasha tunaan túrachmiayi. Tuma asa ii tujintiaj nuna paant nékak ii itiurchatrin waitnentramniuitji. Tura Yúsnan pujurniu uuntri asamtai ¹⁶ Yús-akuptainium shiir enentáijjai sapijmiatsuk jeamniaitji. Tura Yus in anenma asa waitnentramak itiurchat pujajnia nuj yainmaktatji.

5

¹ Tura Yúsnan pujurniu úntrikia shuar anaikiamuiti tura ni takatrijjímaraiti. Yusaj shuárgan chicharsatniuiti. Nuyasha Yus suíniamun súsatniuiti tura núnisan namanken maa Yúsán súsatniuiti shuara tunaarin asakátratniun.

² Tura Yúsnan pujurniu uuntri niisha shuar asa ni tujintiamun nékak shuar nékachuncha tura waak yujainia nunasha waitnentramniaiti. ³ Tura niisha tujintia asa ni tunaaríncha chíkichnajai métek tsankurnarat namanken maa Yúsán súsatniuiti.

⁴ Shuar ni enentáijjainkia Yúsnan pujurniu uuntri ajaschamniaiti. Antsu Yus nu shuaran anaikiatniuiti. Núnisan Aruncan anaikiamiayi. ⁵ Núniskete Krístujai. Niisha ni enentáijjai Yúsnan pujurniu uuntri ajaschamiayi. Antsu Yus Nin anak nujaj shiir awajsamiayi. Tura tímiayi:

“Ame winia Uchiruitme. Túmaitkui yamaikia winia kakarmarun átakeajme.”

⁶ Tura ataksha Yus-Papinium júnis tawai:

“Mirkisetékka Yúsnan pujurin amia núnismek Amesha tuke Yúsnan pujurin átatme.”

⁷ Kristu jū nunkanam pujak kakantar útuk Yúsán ti seamiayi. Nin jákatniunmaya uwemtikramnia asamtai seamiayi. Tura Yusa wakeramurin tuke enentáijjai enentáimtakui Yus anturak ti yáinmiayi. ⁸ Nujaj Kristu Yusa Uchiríntiat ni wáitsatniujai umirkatniun unuimiarmiayi. ⁹ Nujaj ti nekas Uwemtikin ajasmiayi. Tura shuar umirainia nuna tuke uwem ataksha Yus-Papinium júnis tawai:

“Mirkisetékka Yúsnantikrarminiaiti. ¹⁰Túramtai Yus Nin Yúsnan pujurniu uuntri Mirkisetékjai métek awajsamiayi.

Anearta. Yusjai kanakchatniuiti.

¹¹Ju ti nukap áujmatsatin awai. Túrasha ántichu asakrumin mashi ujakchamniaitjiarme. ¹²Átumka yaunchu mash nekaamaintrume. Túmaitiatrum ataksha yaitiás Yúsnan jintintruat tusarum atsumarme. Warí, kuirchia núniniaitrum. Kátsum yútsuk muntsu muntsúatniuitrum. ¹³Kuírchikia Uwempratin Chichaman áujenak péñker unuimiainiatsui. Tin_kiamnumiá ásar tujintiainiawai. ¹⁴Apatuk kátsuman aya uunt yuámniaiti. Uunt ainia nuka péñkernasha tura yajauchincha apatkar paant nékainiawai.

6

¹Uunt ajastai. Krístunu ana nuyá aya yúpichuchia nuke enentáimtutsuk nu arantcha unuimiartai. Kame emka unuimartinia nu ju áiniawai: shuar ni tunaarín jákatniunam júana nuna kúntuts enentáimtur Yúsan shiir enentáimtustincha, ²imiantinnium nekaatniuswai:

“Mirkisetékka Yúsnanha, Yus-shuar yainmanum uweje awantsatniusha, jakamunmaya nantaktincha, tura sumamtikiatin tsawanta nu nekaatniusha. ³Tura Yus yáinmakrin nuna nan_kaamas nekaattaji.

⁴Shuar Yusna nuna nekaan_ka tura Yus susamun takakkun_ka tura Yusa Shiir Wakaní kakarmarín nekapsaitkiun_ka ⁵tura Yusa chichamencha péñkeraiti nekaan_ka tura Yusa kakarmari ukunam nun_ka yamarmanum takastatna nuna yamá nekapeakka, ⁶nu shuar nuna nakitiak kanakniaka atak ni tunaarín enentáimtak ikiuktinian wakerachuk tujinkiattawai. Warí, ní enentáijjai Yusa Uchirín krúsnum máiniaiti túrak ashí íimianiaj natsanmain awajeawai. ⁷Nu shuar yajauch nun_ka áintsan_ áiniawai. Yumi yútakui péñker nun_ka arakan péñker tsapatmakka arakmaun yayawai. Túramtai Yus shiir enentáimui. ⁸Antsu jan_kí nupan tsapatmakka nu nun_ka yajauchiiti. Yus áeseak emesrattawai.

Yus tsan_katramkattajnia nu enentáimtakur kakaram ajaji

⁹Aneamu yatsurú, tu chicharkursha, nú shuarchaitrum nu nékaji. Antsu uwempra asarum nú péñker túrattarme. ¹⁰Yus ti péñker asa átum takasmancha tura ni aneakrum Yus-shuar yainmancha kajinmatkishtatui. Tura yamaisha tuke túrarme. ¹¹Tura nuik túrarmena núnisrumek tuke iniaitsuk kakaram takasrum ashí Yus tsan_katramkatta nu wáinkiatarme. Núnisan_ atí tusar wakeraji. ¹²Nakimtsuk kakaram ajastarum. Niiniua nuna Yus ni shuarín susattawai. Tura shuar Yúsan enentáimtak shiir enentáijjai nákkaka nuna wainkiattawai. Tu takastarum tusar wakeraji.

¹³⁻¹⁴Yus yaunchu Apraámjai chichaak “Ti nekas shiir awajsattajme tura ti nukap pampamtikrattajme” tímiayi. Nuna taku imiá nekas tajai tusa tura chíkich Niijjai nan_kaamas uunt atsakui imia Ni_nki pachiimias tumammiayi. ¹⁵Tutai Apraám yáitmataik nákas Yus timia nuna wáinkiamiayi. ¹⁶Shuar “nekas tajai Yus íirui” tákun_ka chíkich niijjai nan_kaamas úuntan páchiawai. Tura tu chichasmatain_kia nuyán_ka imiá nekas tana nu nekaamniaiti. ¹⁷Tuma asantai Yuska “ti nekasan yapájítsuk túrattajai” tusa imia Ni_nki pachiimias tumammiayi. Nujai ni tsan_katkamun júkiartatna nu shuar Yus ti nekas umiktatna nuna nékainiawai. ¹⁸Yus pen_ké wáitruachmin asa áyatik ni tamajai nekasaiti. Nuna arant nuikia imia Ni_nki pachiimias ti ikiakátmaji in. Nujai iisha uwempratai tusar Niini weamkatikia tsan_katramkattajnia nu ti shiir enentáimsar wáinkiatin nákkaji. ¹⁹Nu enentáimsar kakaram ajaji. Yusaiya in umuchtiamkamnia pen_ké atsawai. Yusai áchitkia asakrin ti kakaram

emettamji. ²⁰ Jesussha emka Yusaj wayá mash iwiarturmaji. Tura Mirkiseték amia núnisan Niisha yamá tuke amuukashtinian Yúsnan pujurniu uuntri ajasuiti.

7

Mirkiseték amia núnisan Jesussha Yúsnan pujurniu uuntri ajasuiti

¹ Nu Mirkisetéksha Sarem nunkanam akupniuyayi. Tura ashí nanamas kakaram Yúsnan pujurniuyayi. Apraám chíchich akupniun mesetjai awakak támatai Mirkiseték jiintiuki inkiun ti shiir awájsamiayi. ² Túramtai Apraám nupetmakar kuit jukimiun tias (10) akantuk susamiayi. Mirkisetéka naari tana júka “ti penker uunt akupin” tawai. Tura Saremka “ti shiir imiatkincha” tawai. Tura Mirkiseték Sarema akupniuri asa “ti shiir imiatkinchanum akupín” tawai. ³ Nukurisha aparisha Yus-Chichamnum atsawai. Núnisan ni uuntrisha atsawai. Ni akiiniamuríncha ni jakamuríncha ujaatsui. Tuma asamtai Yusa Uchiría áintsan tuke iniannakchatniun Yúsnan pujurniu uuntri ajasuiti.

⁴ Mirkiseték timiá uuntauya nu enentáimprata. Ii uuntri Apraámsha nupetmakar kuit jukimiun tias akantuk susamiayi. ⁵ Tuma asamtai Apraám nankaamas úuntaiti. Muisais akupkamujai Riwi weeáka Yúsnan pujurin áiniawai. Niisha ashí Israer-shuarjai métek Apraám weeá áiniawai. Túmaitiat penké Israer-shuar ni waririn tias akantuk Riwi shuaran suu ármiayi. Muisais tu akupkamiayi. ⁶ Túrasha Mirkiseték Riwi weeachunak Apraám tiásan akantuk nin susamiayi. Apraám Yus shiira nuna tsanatkamuitiat Mirkisetékan nijjai uunt asamtai susamiayi. Túram Mirkiseték Apraáman shiir awajsamiayi. ⁷ Imiá nekas Mirkiseték Apraáma nankaamas páantin asa Apraáman shiir awajsamiayi. ⁸ Israer-shuarti tias akankamun súajnia nú shuar aya aents ásar tuke pujuschamin áiniawai. Antsu Mirkiseték jakamun Yus-Chicham penké ujaatsui. ⁹ Yamái Riwi weeá shuar kuit akankamun achiktin áiniawai. Túrasha Apraám Mirkisetékan súakui Riwi weeá nujai susa áiniawai. ¹⁰ Apraám weeá áiniak ni ayashía áinis enentáimtusmin áiniawai.

¹¹ Muisais akupkamunam Riwi-shuarnumiá aya Arun weeá shuar Yúsnan pujurin ármiayi. Niisha Muisais akupkamu timia nujai métek penké shuarjai takasarmiayi. Tura Riwi-shuarnumiá Yúsnan pujurniu takarrijai tunáa nekas asakárminiatkiuinikia Yúsnan pujurin yamarmak, Arun weeachu, anaiki-ashtin ainti. Túrasha Yus Jesusan, Mirkiseték amia áinis, Yúsnan pujurniun anaikiaiti. Nusha Arun weeachuiti. ¹² Tura Yúsnan pujurin yapajniámtai Muisais akupkamusha yapajniátniuiti. ¹³⁻¹⁴ Nu arantcha, ii Uuntri Jesukristu Riwi-shuarcha antsu Jutá-shuarauyayi. Tura Muisais akupkamujai Jutá-shuarnumiá Yúsnan pujurin atsutniuiti. Antsu nuna takatrin penké túrashtiniuyi. Tuma asamtai nújaiisha Muisais akupkamu yapajniátniuiti.

¹⁵ Nú páantcha awajsamniaiti. Wats, Yúsnan pujurin yamarma nuka Mirkisetékjai méteketi. ¹⁶ Ninkia Riwi shuar asa Yúsnan pujurin ajaschamiayi, antsu jákashtin asa nu kakarmajai Yúsnan pujurin ajasmiayi. ¹⁷ Tuma asamtai júna Yus Jesusan áujmatui:

“Mirkisetékka Yúsnan pujurin amia núnismek Amesha iniannatsuk Yúsnan tuke pujurin átatme.”

¹⁸ Nujai yaunchu akupkamu penkercha ajasmatai japirmaiti. ¹⁹ Muisais akupkamuka shuáran penker awajsachminiuyayi. Antsu Yus in ti shiir awajtamsattajnia nu nákaji. Nujai Yusaj ti shiir jeeáitji.

²⁰ Nunasha Yus “nekas tajai” tusa Ninki pachimias tumammiayi. ²¹ Riwi-shuarnumiá Yúsnan pujurin Yusa naari pachitsuk anaikiamu ármiayi. Antsu jú

Yúsnan pujurniunka Yus imia Niñki pachiimias anaikiamiayi. Tura Nin júnis tímiayi:

“Uuntka imia Niñki pachiimias tiniu asa peñké yapajiáshtatui. Niisha “Mirkisetékka Yúsnan pujurin amia núnismek Amesha tuke Yúsnan pujurin átatme” tímiayi.”

²² Tuma asamtai Jesuska nekas uwemtikrattajai tusa yaunchu amia nujaj nankaamas peñker Chichaman iwiarturuiti. ²³ Yaunchu Yúsnan pujurin untsurí ármiai. Chíkich jakamtai chíkich tuke takaarmiai. ²⁴ Antsu Jesus tuke jákashtin asa chikichan ikiurkishtatui. ²⁵ Tuma asa tuke iwiaaku pujak ni shuarin tuke Yúsán áujtusminiaiti. Tuma asa shuar Nin enentámtusar Yusaj weankarun tuke uwemtikramniaiti.

²⁶ Tuma asa Jesus Yúsnan peñker pujurin asa ii atsumajnia núkete niisha. Niisha ti shiir asa peñké tunaarinchaiti. Ashí tunaariniunmaya kanakniuiti. Tura Yusjaj métek Uunt ajasuiti. ²⁷ Niisha yaunchu Yúsnan pujurniu uuntri armia núnikchaiti. Yaunchua nuka murikiun máawar ashí tsawant Yúsán suu ármiai. Nujaj emka ni tunaarin nuyá ashí shuara tunaarin asakátin ármiai. Tura Jesuska jákatniunam chikichkí surumak ashí shuara tunaarin asakátramiayi. ²⁸ Muisais akupkamuka peñké shuarnak tuke peñkercha aijn Yúsnan pujurniu úuntrin anaikiaiti. Tura nu ukunmanka Yus, nekas niñki pachiimias, ni Uchirín, tuke peñkera nuna, Yúsnan pujurniu úuntrin anaikiaiti.

8

Nankaamas peñker Chichaman Jesus takartamji

¹ Nekas juna tájame: Yúsnan pujurniu uuntri Jesus in ti shiir yainma asa akupin pujutainium Yusa untsuurinj nayaimpiniam pujusuiti. ² Nekas Yusa Jee nayaimpinma nu aents najanachma antsu Yus najanamuiti. Nui Jesus Yúsnan pujurui. ³ Ashí Yúsnan pujurniu uuntri ainia nu, shuar Yúsnan susamuncha tura naman maar Yus sútaincha Yúsán ashí súsatin ániawai. Núnisan Jesukrístusha Yúsán súsatniuiti. ⁴ Juyá Yúsnan pujurin Muisais timia nuna Yúsán yamaisha susamin akui Jesus ju nunkanam pujakka Yúsnan pujurin áchainti. Antsu nayaimpiniam takaawai. ⁵ Yus yaunchu Muisais nayaimpiniam írúnna nuna iniaktus tímiayi “Ame wáinkiamna nujaj métek ashí najanata.” Túramu asamtai ashí yaunchu Yúsnan pujurin Muisais najanamujaj takainia nu aya nayaimpiniam ana nuna nakumkamujaj takainiawai. ⁶ Antsu Jesus ti nekasa nujaj nayaimpiniam takaawai. Muisais akupkamuka shuáran peñker awajsachminiaiti. Antsu Yus in ti peñker awajtamsattaji. Kame Yamaram Chichamnum Yus ashí túrutmattajnia nu Muisais akupkamunam ana nuna nankaamas ti peñker ániawai. Tuma asamtai nankaamas peñker Chichaman Jesus takartamji.

⁷ Kame Emka Chicham, Yus Muisaisjaj yaunchu najanamia nu, nekas peñkeraitkiuinjia Yamaram Chichaman najanachaayi. ⁸ Antsu peñkercha ániakui Israer-shuaran tímiayi:

“Uunt Yus tawai: “Tsawant jeamtai ashí Israer-shuarjaj Yamaram Chichaman najanattajai. ⁹ Yaunchu ju shuara uuntrin Ejiptunmaya yaruakmij nui Emka Chichaman najanamjai. Tura Yamaram Chichaman najanattaj nu núnischa átatui. Emka nuna uminiachkui ajapan iniaisarmajai.” Núnis tawai Uunt Yus. ¹⁰ Tura nu arantcha tawai: “Tsawant jeamtai Israer-shuarjaj Yamaram Chichaman najanattaj nuka júnis átatui. Wi akupeajna nuna enentáin paant enentáimtikrattajai. Nuyá ni Yusri ártatjai tura niisha Wíi shuar ártatui.

¹¹ Nuisha Yúsán nekaat tusa jintinnaiyachartatui. Kame ni aisha ni

yachisha kame ashí shuar, uchisha uuntcha, ashí nekarawartatui.

¹² Tura ashí ni tunaaríncha tsankuraran ni yajauchirín atak penké enentáimtuschartatjai” tímiayi.” Tu áarmaiti.

¹³ Wats, Emka Chicham yajauch ajakui Yus Yamaram Chichaman nájaneak pujurui. Tura yajauch ajasua nuka wárik ajapnattawai.

9

Yusa Jee nayaimpinmasha tura ju nunkanmasha

¹ Ayu. Yus shiir awajsatniuka Emka Chicham timia nujai métek túratniuyayi. Tura ju nunkanmaya Yusa Jee weriar Yús shiir awajsatniuyayi. ² Nu Jeeasha júnis tesakmauyayi. Nékatka Shiir Tesaamu tutainti. Nui asuitin ekeemakar tsáapin awajtaisha tura misasha Yus iniaktusma tantajai pujuyayi. ³ Nuyá-tesaamuka Imiá Shiir Tesaamu tutainti. ⁴ Nui kunkuin ekeemataisha kurijiai kuerma tura Chícham Aarma Chumpitiaisha pujuyayi. Nusha ashí kurijiai kuérmauyayi. Tura init kurijiai najanamu ichinkian maná yurumak enkemniuyayi. Nuyá Yúsnan pujurniu uuntri Arunka ushukrutairi yaunchu tsapaak jankukmia nusha enkemniuyayi. Nuyá Yus najanamu Chícham Muisais kayanam aarmasha enkemniuyayi. ⁵ Nuna úkurin Kirupín, nayaimpinmaya suntara nu, kurijiai nakumkamu wajarmiayi. Nusha Yusa shíirmarín nakumkarmiayi. Tura ni nanapéjai shuara tunaarín ayamprutain nukúakuyayi. Nuna arantka yamá etserkatin atsumatsji.

⁶ Núnis aa asamtai Shiir Tesaamunam ashí Yúsnan pujurin tuke wáiniak Yúsnan takasarmiayi. ⁷ Tura Imiá Shiir Tesaamunmanka aya ni uuntrin wáiniauyayi. Tura niisha ashí uwitin aya chikichik tsawant wayamiayi. Wayak ni tunaarisha tura ashí shuara tunaari tsankurnarat tusa Yus súsatniu namanké numpen juu ámiayi. ⁸ Yusa Wakaní núnis atí tusa nuna mash iwiaramiayi. Tura asa júna paant awajturmají. Jú nunkanmaya Yusa Jee pujakui tura aya nuin Yus shiir awajsamniaitkiuinikia nekas Imiá Shiira nuí Yus pujamunam wayatin tuke itiurchat ainti. ⁹ Nusha yamá pujuiniaj nuna enentáimtikrampratniuitji. Shuar Yus shiir enentáimtikratniun namanken maa suíniaksha nu shuar ni tunaarijiai tuke itit enentáimtumainiawai. ¹⁰ Warí, aya yurumátniusha umartincha nijartincha tura ashí núnisan túratniujai aya pátatek asamtai enentáiniam ana nuna iwiarachmin áiniawai. Antsu Yus nú túratniunka yapajiatniuyayi. Tuma asamtai yapajniátsain túratin áiniawai.

¹¹ Tura yamaikia Kristu táwiti tura Yúsnan pujurniu uuntri ajas Yamaram Chichamnum Yus ti penkeran túrutmatniua nuna pujurturmaji. Niisha ti shiir Yus Jee aents najanachmanum takaawai. Nu Jee ju nunkanmayanchuiti. ¹² Tura Kristu Imiá Shiir Tesaamunam namanke numpéjai wayachuiti antsu ni numpejaink' wayaiti. Tura aya chikichkí wayá ii tunaarín asakturmar tuke uwentikrampramijai. ¹³ Nekas namanké numpesha tura áisamu yunkunmirisha tunáa shuarum pátatek ukatkamu aya pátatek shiir awajsamniuyi. ¹⁴ Túrasha Kristu numpé ii tunaarín penké asakáruiti. Túramtai yamaikia tunáa jákatniunam júana nujai itit enentáimtumatsuk nekas iwaaku Yus shiir umirkamniaitji. Kristu penké tunaaríncha asa tuke jákashtin Wakaní kakarmarijiai jákatniunam Yusai surumakmiayi.

¹⁵ Nu asamtai Jesukristu Yamaram Chichaman shiir takarniuiti. Yaunchu Chichamjai tunáa nekas tsankurachma asamtai Kristu jaka nu tunaanacha tsankurarmiayi. Nujai ashí Yus-shuarti Yus achikma asar Yus tsankatramajnia nu wáinkiar tuke wararsattaji. ¹⁶⁻¹⁷ Shuar ni kuítrin akantrattak chichaman najanatniuiti. Tura jáatsain nu kuit akantrashtiniaiti. Aya nii jakamtai nu chicham najanamu uminkiatniuiti.

18 Nu asamtai Emka Chicham Muisaisjai najanamusha maamu numpé ukatramujai akupkamuyayi. Nujai sha naman máatniuyayi. 19 Muisais nu akupkamun ashí shuáran ujakarmiayi. Nuyá ure kapaakujai tura nupajaisha namañké numpé entsajai pachimpramujai ayak akupkamu papincha ashí shuarnasha ukatkarmiayi. 20 Tura tiarmiayi “Ju numpajai “Chícham Yus akupturmarmena nu nekas umiktiniaiti” tawai.” 21 Nuyá nu numpajai Yusa Jeencha ashí nu takastin irunmia nunasha ukatkarmiayi. 22 Nu akupkamujai penké ishichik numpajainchu shiir awajsamniaiti. Túrasha numpajainchu tunáa penké asakárchamniaiti.

Kristu jakamujai tunáa asakárminiaiti

23 Tuma asamtai Muisais najanamu nayaimpiniam ana nuna aya nakumkamu ásar namañké numpejai shiir awajsamu ármiai. Antsu nayaimpiniam nekas írunna nu, nankaamas kakaram numpajai shiir awajsatin ániawai. 24 Krístuka yaunchu Yusa Jeen aents najanamunam takastaj tusa wayachmiayi. Nuka nayaimpinmayan aya nakumkamuiti. Antsu nekas nayaimpiniam Yus pujamunam wayá asa in áujturmaji. 25 Yaunchu Yúsnan pujurniu uuntri ni numpejainchu ashí uwitin Imiá Shiir Tesaamunam wain ármiai. Tura Krístuka untsurí wayachuiti. 26 Kame untsurí wayatniuitkiuinikia ni numpejaink' wayá asa yamañkamtaiknumia untsurí jákaayi. Antsu yamaikia ju nunka amúamunam Kristu chikichkí jákatniunam surumak tunaan ashí asakáruiti. 27 Ashí shuar chikichkí jakar nuyá ni túramun Yusai nekamatniun nantaktin ániawai. 28 Núnisan Kristu chikichkí jákatniunam surumak shuara tunaarin asakáruiti. Tura atakka tunaan asakártinian wantinkiashtatui. Antsu ni tátintrin nákania nuna uwemtikkrattsa wantinkiattawai.

10

1 Muisais akupkamuka ukunam ti penker átatna núchaiti. Antsu nuna aya nakumeawai. Tuma asa ashí uwitin naman maar Yus sútaijiaisha shuara tunaarin asakátrachminiaiti. 2 Kame asakátraka shuar nekas shiir awajsamniaitkiuinikia Yus naman maar súsatniun atsumachuk iniaisaraayi. Iis, mash tsankuramuitkiunka ni tunaarjjai itit enentáimtumasharainti. Túravar naman maar Yus súsatniun iniaisarainti. 3 Antsu namañken maar ashí uwitin tuke suñiak nujai ni tunaarin tuke enentáimtuiniawai. 4 Warí, namañké numpejai ii tunaari penké asakárchamniaiti.

5 Nu asamtai Kristu ju nunkanam taa Yúsan chicharuk tímiayi: “Naman maar sútai sha penké nakitráme. Antsu ayash iwiaram surusuitme.

6 Naman áesamusha tura tunaan asakártin naman susamusha wakeratsme. 7 Tuma asamtai “Yusrú, tímiajai. Winia áatrurma núnisnak ame wakeramurmin umiktajtsan táwitjai” tímiajai” tímiayi.

8 Emka, Muisais akupkamu aijn, naman susamuncha, tunaan asakárat tusa naman maar susamuncha, naman áesamuncha Yus ashí nakitraititawai Kristu. 9 Nuyá “Yusrú, ame wakeramurmin umiktajtsan táwitjai” tawai. Nuna taku naman maar sútain “Asakáiniaiti” tawai. Tura chikichan ikuawai. 10 Jesukrístu Yúsan umiruk jákatniun chikichkí surumakmatai Yus in tunaar-incha shiir awajtamsaitji.

11 Tura Israer-shuarnumia Yúsnan pujurin ashí tsawantaj nú namañnak máawar tunaan asakáchunak Yúsan ti suu ániawai. 12 Antsu Jesukrístuka jákatniunam chikichkí surumak ashí shuara tunaarin asakár atakka penké jákashtiniaiti. Nuna tura Yusa untsuurinj nekas akupin pujutainium pujusuiti. 13 Tura Yus ni nemasrin nupetak nin umirkarti tusa súsartatna nuna

nákawai. ¹⁴ Chikichkí jakamujaj ni shuarin tuke tunaarincha awajsaruiti.

¹⁵ Yusa Wakanisha núnisan tawai. Emka tímiayi:

¹⁶ “Yamaram Chichaman najanattaj nuka júnisan átatui: Wi akupeaj nuna ni enentáin paant enentáimtikrartatjai.” ¹⁷ Nuyásha tawai: “Ni yajauch tunáa túramurin penké enentáimtuschatatajai.”

¹⁸ Tuma asamtai, ii tunaari tsankuramu asamtai atak in jarutramkatin atsumatsji.

Yus tuke shiir enentáimtusar Yusaj jeartai

¹⁹ Tuma asamtai, yatsurú, Jesukrístu numpejaj péñker awajsamu asar sapijmiatsuk shiir enentáijaj Imiá Shiira nu, nekas Yus pujamunam wayamniaitji. ²⁰ Nu wayatniuka Kristu jaka Yusa Jeen tesaamun júsatniua áintsan ánturmamiaji. Yamaisha tura tuke wayamnia átatui. ²¹ Jesus Yúsnan pujurniu uuntri asa ashí Yus-shuartin wáitmak pujurtamji. ²² Tuma asamtai, tuke enentáijaj Yus imiá nekas enentáimtusar Yusaj jeartai. Ii enentái Kristu numpejaj niarma asamtai nekas enentáimtakur ii tunaarijaj itit enentáimtusachatniuitji. Tura ii ayashisha péñker entsajaj imianniuitji. ²³ Yus tsankatramkattajnia nu shiir enentáimtamun iniaitsuk kakaram ajarar tuke emetatniuitji. Yus tsankatramkaitji nuna umiktatui. ²⁴ Péñker anenain tura péñker túrin ajasartai tusar mai yainiaikiartiniuitji. ²⁵ Yusa Jeen Yus-shuarjaj tuke irunratin iniaiashtiniuitji. Chikich iniainiakuisha iikia tuke irunratniuitji. Nu irunkurkia ikiakánairtiniuitji. Tura Kristu tátin tsawantri ishichik ajasu asamtai nú nukap túratniuitji.

Anearta. Ti tsúumainti iwiaaku Yusa kakarmarijaj asutniátin.

²⁶ Túrasa shuar nekas chichaman nékayat wakeramurijaj tunaanum wekaakka Kristu jakamun nakitia asamtai chikich atsawai ni tunaarin asakátratniun. ²⁷ Áyatik ashamak ti tsuunmai sumamatin tsawantan nákasminiaiti. Nu tsawantaj Yus ni nemasrin ti kakerak asutiak mash emesrattawai. ²⁸ Shuar Muisais akupkamun umikchamtai tura jímjar shuar menaintiusha etserkarmatai waitnentsuk máatniuyayi. ²⁹ Núnisaitkiuinikia shuar Yusa Uchirin wishikiainiakka ni numpencha nakitiainiakka tura Yus nin anea nuna Wakanincha katsekainiakka nuna nankaamas asutniáchartatuak. Warí, nii nakitiana nu numpajaj Yamaram Chicham nekas umirkatin awajsamuyayi. Tura nújajsha nii ti péñker awajnastiniuyayi. ³⁰ Ii Uuntri Yus júnis tímiayi “Wi asutiátniuitjai. Wi yapajkiattajai.” Nuyásha tímiayi “Wíi shuara tunaarin ti paant nekarattajai.” ³¹ Ti tsúumainti iwiaaku Yusa kakarmarijaj asutniátin.

³² Tura atumsha yámankamtaik Yusna nekaarum Yus-shuar ajasmarum nu enentáimsatarum. Kakaram ajarum ashí itiurchat katsuntramarme. ³³ Chikichtirmeka katseknakmarme tura ashí íimiainiamunam yajauch awajnasmararme. Chikichcha nu shuarum pachitkia asarum itit awajnasmararme. ³⁴ Atumsha sepunam pujuinia nusha waitnentramarme. Tura shiir wararum kuítrumin atantramainiakkuisha katsuntramarme. Nayaimpiniam tuke amuukashtin kuit pachiktin asarum túramarme. ³⁵ Tuma asarum yawetsuk Yus tuke enentáimtusarum kakaram ajastarum. Túrakrum nankaamas akinkiattarme. ³⁶ Atumsha esetra enentáimsarum Yus wakera nu túrakrum Yus atumin amastinia nu wainkiattarme. ³⁷ Kame Yus-Chichamnum áarmaiti: “Tátinia nu ishichik ajasai. Wárik tátatui. ³⁸ Shuar Yúsan nekas enentáimtak péñker wekaak uwemprattawai. Tura iniayakuinikia nin wararsashattajai.”

³⁹ Tura iikia iniaisar mesena nú shuarchaitji. Antsu Yus shiir enentáimtusar uwempraitji.

11

Yus nekas enentáimtustin

¹ Yus nekas enentáimtakur “nákajnia nuna, Yus nekas suramsattaji” taji. Tura wáinchaitiatar “nekas wainkiattaji” taji. ² Yaunchu ii uuntri Yúsan nekas enentáimtuiniakui Yus “pénkeraitme” tiarmiayi.

³ Aya Yus enentáimtakur ju nékaji: Yus aya ni chichamejain ashí nunkan najanamiayi. Túramtai ashí wáiniainiaj nu wáinchataijiaj najanamu áiniawai.

⁴ Apir Yúsan nekas enentáimtak Kaínjai nankaamas pénkera nuna Yúsan susamiayi. Túramtai Yus “pénkeraitme” taku shiir yuminsamiayi. Tuma asamtai Apir jákaitiat tuke enentáimtikramji.

⁵ Euksha Yúsan nekas enentáimtak iwiaakuk nayaimpiniam junakmiayi. Yus jukimiu asamtai wáinkiacharmiayi. Tura Yus-Chichamnum aarma “Euk júnatsuk Yúsan ti shiir enentáimtikniuyayi” tawai. ⁶ Tura Yus nekas enentáimtachkumka çitiurak Nii shiir enentáimtiksata? Nekas enentáimjai Yúsan weantuktaj tusam wakerakmek, emka, Yus iwiaaku pujawai, tu enentáimpratniuitme. Nuyásha, Wi Yúsan eakuinkia Yuska winia yáintkiattawai, tu enentáimsatniuitme.

⁷ Yus, ‘amaarkatniun akupkattajai’ tiniu asamtai, Nuaisha Yúsan nekas enentáimtak, amaarun wáinchaitiat, “túrunattawai” tímiayi. Túrak Yus timiajai métek uunt kanun najana ni shuarincha uwemtikramiayi. Tura Yúsan nekas enentáimta asamtai Yus “pénkeraitme” tímiayi. Tura ni umirkamujai chikich shuar Yúsan enentáimtachun súmamtikiawarmiayi.

⁸ Tura Apraámsha Yúsan nekas enentáimtak Yus “núnkem ikiukim wetá” tutai shiir umikmiayi. Yus tuke nin súsatniua nú nunkanam wémiayi. Turasha ni nunken ikuak ni jeatniun nékatsuk jiinkimiayi. ⁹ Yúsan shiir enentáimtak nú nunkanam Yus nin tsankatkamuitiat írara áinis pujusmiayi. Nuap jeanam pujuyayi. Núnisan ni uchirí Isaksha tura ni tirankí Jakupsha nuin tsankatkamuitiatan írara núnisar pujuarmiayi. ¹⁰ Kame Apraámka nayaimpinmaya ashirchamin péprunam pujustinian nákasmiayi. Yus nu pepru pénger iwiar jeamka asamtai umuchkiachminiaiti.

¹¹ Apraáma nuwé Sarasha Yúsan shiir enentáimta asa úuntach áyat ajaprukmiayi. Yus timia nuna umiktatui tau asa uchin takusmiayi. ¹² Tura nujai Apraám ti úuntchitiat ti pampanmiayi. Nii chikichkitiat ni pampanmari ti untsurí ajasar yaajai métek tura náikmijiai métek nekapmarchannia ajasarmiayi.

¹³ Ashí nu shuar Yus tsankatkamun wáintsuk jákarmiayi. Túrasha Yúsan nekas enentáimtuiniak arantia wáinkiar warasar shiir enentáimtiarmiayi. Túrawar “ju nunkanam nekas aya íraraitji” tiarmiayi. ¹⁴ ‘Íraraitji’ tu chichainiak chikich nunka eamun páant awajainiawai. ¹⁵ Niisha matsatu winíarmia nuj atak waketkitniun wakeruiniakka páchitsuk waketkiaraayi. ¹⁶ Tura antsu niisha nuna nankaamas pénger nunkan nayaimpinmaya nuna enentáimtiarmiayi. Túmainiakui Yuska péprun iwiartur susa asa “wi ni Yusrintjai” títinian natsantatsui.

¹⁷ Ataksha Apraám Yúsan nekas enentáimtak “chikichik uchi amasmaj nu, namankea áitkiasmek maam surusta” takui Apraám Isakan ni uchirin Yus susatniun penké suritkiachmiayi. ¹⁸ Kame Yus “Isakjai ti pampanatme” tau asamtai ¹⁹ Apraám “máamtaisha Yus iniantkittiwai” tu enentáimpramiayi.

Tura Yus ukunam máatiun suritkiamtai Isakan máachiat nekas jákatniunmaya uwempran nantakniua áintsan wáinkiamiyai.

²⁰ Isaksha Yúsan nekas enentáimtak ni uchirín Jakupnasha Esauncha ukunam ni túrunattana nuna ujakarmiayi. ²¹ Núnisan Jakup Yúsan nekas enentáimtak jatsuk ni tirankin, Jusé uchirín, shiir túrunattana nuna ujakarmiayi. Tura ti uuntach asa máshtunkrin ushukruma Yúsan shiir awajsamiayi. ²² Tura Jusesha jákatniuri ishichik ajatesmatai Yúsan nekas enentáimtak Yus ukunam Israer-shuaran Ejiptu nunkanmaya júkiartatna nuna ujakarmiayi. Tura jíiniainiak ni ukunchin júkiar Yus tsankatkamu nunkanam iwiarsarat tusa akupkamiayi.

²³ Muisaisa aparisha nukurisha Yúsan nekas enentáimtuiniak Muisais ti shírmach asamtai suntar máawarain tusa akiiniamunmaya menaintiu nantu úukarmiayi. Tura uunt akupin akupkamun ashamkacharmiayi. ²⁴ Muisaissha Yúsan shiir enentáimtak uunt ajas Ejiptunmaya uunt akupniu nawantrí uchirí ajastinian nakitramiayi. ²⁵ Antsu Ejiptu nunkanam ishichiksha tunaan warartsuk Yusa shuarijijai métek wáitsatniun nankaamas wakerukmiayi. ²⁶ Nujai Krístun yajauch awajsarmia núnisan niisha wáitsatniuuuyi. Túrasha ashí Ejiptu nunkanam péñker irunmia nuna nankaamas Yus nin ukunam tsankatkatta nuna shiir enentáimtusmiayi. ²⁷ Niisha Yúsan shiir enentáimtak uunt akupin kajeramu ain ashamsuk Ejiptu nunkanmaya jiinki wémiayi. Yúsan wáinchiat shiir enentáimtamujai wainiua áinis kakaram ajas ashí katsuntramiayi.

²⁸ Muisais Yúsan shiir enentáimtak yámankamtaik paskua namperan najaneak ashí Israer-shuaran numpajai ni wáitirin kuérat tusa akupkarmiayi. Nujai Yus timia núnisan nayaimpinmaya suntar nuna iis nu jeanam iwiairin máatsuk nankaikit tusa tímiayi.

²⁹ Israer-shuarsha Yúsan shiir enentáimtuinia ásar Kapaantin Entsa nakaakamtai ajapén ti penker kukarnum katiñkiarmiayi. Ejiptunmaya suntarsha núnisan katiñtai tukamá jakerarmiayi.

³⁰ Israer-shuarsha Yúsan shiir enentáimtuinia ásar Yus timian umirkar siati tsawant Jerikiú péprun téntakarmatai aa tanish sáanákmiai. Nujai ti yúpichuch nupetkarmiayi. ³¹ Raapsha nu péprunam pujak, Yúsan nekas enentáimtak tsanirmatai ayat Israera suntarin mamikmak wekaan ti penker itiaa asa chikich shuar Jerikiúnam matsatua nujai jákachmiayi.

³² Nu arantcha Yúsan shiir enentáimtin ti írunui. Jeteúnsha, Paraksha, Sansunsha, Jiptísha, Tawitcha, Samuersha, Yúsnan etserniusha nu shuar ármiai. Mash ujaktinian jeatsjai. ³³ Niisha ashí Yúsan nekas enentáimtuinia ásar Yusa kakarmarin niisháa niisháa iniaktusarmiayi. Nuna túruiniak chikich chikich nunkanmaya aentsun nupetkarmiayi, nuisha péñker akupkarmiayi, tura Yussha ni timia núnisan yainkiarmiayi. Uunt yawancha kajechu awajsarmiayi, ³⁴ uunt jiniasha ikiajniakarmiayi, puniajai mantamnatniuncha uwemprarmiayi. Kakarmachusha kakaram ajaras mesetnumsha ni nemasrincha nupetkarmiayi. ³⁵ Nuwasha ni uchirí jakan iniantkimium wáinkiararmiayi.

Chikichcha wáitias mantamnowarmiayi. Ti shiir pujustinnium nantaktiai tusar nú tsawantai uwempratniun nakitrarmiayi. ³⁶ Chikichcha katsek-nakarmiayi, asutniáwarmiayi, jirujai jinjiawar sepunam enkenawarmiayi. ³⁷ Kayajai tukú mantamnowarmiayi, jimiapetek tsupinkiararmiayi, Yúsan iniaisarat tusa nekapnasarmiayi, puniajai mantamnowarmiayi. Aya wékainiararmiayi, kuítrincha ásar nuapen entsararmiayi, shuar nincha áintrar wáitnenmai awajiararmiayi. ³⁸ Atsamunmasha, naincha, wañmasha, ashí

nun^{kan}am wekain ármiayi. Nu shuarjain^{ka} ju nun^{kan}maya shuar imiá yajauch ásar niij^{ai} pujumainchu áiniawai. ³⁹ Nu shuar Yúsan shiir enentáimtuiniakui Yus “pén^{ker}aitrume” tiarmiayi. Túmaitiat ni tsan^{kat}kamun wáink^{ia}charm^{ia}yi. ⁴⁰ Yuska nuna nan^{ka}amas pén^{ker}an iwiarturaru asa tura in yamá pujajnia juna enentáimturma asa niisha iisha mai metek tsaniⁿkiar ti pen^{ker}er ajasarti tu enentáimsamiayi.

12

Jesus tuke enentáimtusar tsé^{ken}tiai

¹ Ashí ju nun^{kan}am túrajnia nuka shuar nakuruiniak tsé^{ken}ena nuj^{ai} nakumkamniaiti. Ashí shuar yaunchu Yúsan shiir enentáimtusaruka téntakar írmainiaji. Tuma asamtai ashí kijin ana nusha tura ashí tunaaka itit awajtamaj nusha ajapa iniaisar tura katsuntrar tsé^{ken}kir jeatai. ² Túmakur Jesus tuke enentáimtusar tsé^{ken}tiai. Ashí shuarj^{ai} nan^{ka}amas Jesus Yúsan ti nekas enentáimtak aya pén^{ker}nak túramiayi. Tuke nekas awakmakmiayi. Imiá tunáa shuáran krusnum máatin aⁿ núnisan natsanmainium jákatniun surimiakchamiayi. Antsu ukunam ti shiir warastin átatna nuna enentáimtak nuna ashí katsuntramiai^{yi} tura nuyá Yusa untsuurinⁱ akupin pujutainium pujusuiti.

³ Tunáa shuar Jesusan wáitkiasarmia nu enentáimpratarum. Túrarum pimpit^{suk} katsuntratarum. ⁴ Átum tunaaj^{ai} máaniakrum Jesus túramia áintsarum numpemsha puárchaitrume tura jákachuitrume. Nu^{isha} katsuntrarum jeatniuitrume. ⁵⁻⁶ Yus nekas ni uchirⁱⁿ chicharkatniua áinis túramprum nu kajinmatkichmashuram. Júnis tawai:

“Uchirú, wi jintin^{tra}majmena nu kajinmatkip. Asutiámkuisha kúntuts puju^{saip}. Kame Uuntka Nii aneana nuna jintint^{ia}wai. Tura ni uchirⁱ ajasat tusa achána nuna asutiawai.”

⁷ Tuma asamtai Yus ni uchir^{ia} áinis asutiámkuisha katsuntratarum. Warí, ashí apa ni uchirⁱⁿ chicharkashtatuak. ⁸ Tura ashí uchin chicharkatniua núnis Yus atumin chichartamchakrumnⁱⁿka nekas ni uchirⁱⁿchuitrume. Antsu chikichnaitrume. ⁹ Nu arantcha ii aparⁱ uchich árinⁱⁿ chichartamkurin umirniuyaji. Nu arant nuikia nekas ii Aparⁱ nayaimpiniam pujana nu shiir umirkar tuke shiir pujustin wakerishtatjik. ¹⁰ Ii aparⁱ ishichik ni enentáij^{ai} wakeramu chichartamniuyaji. Antsu Yuska ti pen^{ker}er awajtam^{sataj} tusa nekas atsumajnia nuj^{ai} métek chichartamji. ¹¹ Kame nekasaiti, ashí asutiámu yamaikikia waraschamniaiti, antsu kúntuts enentáimtikramji. Túrasha ukunam nu asutiámuj^{ai} unuim^{iaj} nuka pén^{ker}er túratniun tura shiir pujustinian yáinmaji.

Anearta. Yus tana nu nekas antuktini^{ai}ti.

¹² Nuj^{ai} pimpirarusha tura kakarmachu ainia nusha ikiakártarum. ¹³ Túrarum pén^{ker}er esettsa enentáimsarum wekasatarum. Túrarum tujintiainia nusha shiir wekasatin yain^{tarum}.

¹⁴ Ashí pén^{ker}er túrakrum ashí shuarj^{ai} nawamnaik^{iarum} pén^{ker}er wekasatarum. Tunaan túrinkia Yusaj pen^{ké} jeashtatui. ¹⁵ Aneartarum. Shuar nakitiakuⁿka Yus nu shuáran shiir yáin^{tin}ian tujinkiattawai. Nu shuar yajauch enentáimiuk chík^{ich} shuárnasha itit awajas tunaanum útsukartatui.

¹⁶ Tsanirmawairap.

Yusna nusha nakit^{ra}irap. Isaka uchirⁱ Esau pén^{ker}era nuna nakitramiayi. Yus “iwi^{ai}rin núkap súsatni^uiti” timia nuna enentáimtus^{chami}ayi. Tura asa aya ishichik yurumkaj^{ai} yapaj^{ai}miayi. ¹⁷ Tura nuyá ni aparⁱ ukunam túrunattana

nuna takui Esau ti penkeran wakerimiayi. Tura ti útkuisha ni aparí nin nakitramiayi tura ni chichasman yapajíatniun tujinkiamiayi.

¹⁸ Atumjainkia Yusna enentáimtusminia nuka yaunchu Israer-shuarjai ashammai amia núnischaiti. Yáunchuka Yus ni akupkamurín Israer-shuaran súakui Senai muranam jeeáirmiayi. Muranam uunt jisha kiritniusha teesha nasesha ajamiayi. ¹⁹ Tura kachu kakaram umpúamusha ámiayi. Tura Yus kakaram nin chichaream antukar ashamkar atakka chichaschati tu searmiayi. ²⁰ Kame Yus chichaak “Shuarsha tan̄kusha ishichkisha nú muranam najarmatai nuka kayajai tukurar tura nan̄kijiaisha máatniuiti” tímiayi. Nu akupkamu ti ashammai asamtai “chichaschati” tiarmiayi. ²¹ Wáinkiarminia nu ti tsuunmai asamtai imia Muisaissha “Ashamakun kuraajai” tímiayi.

²² Antsu atumjainkia Yusna enentáimtustin nujai nan̄kaamas péñkeraiti. Átumka nayaimpinmaya Seun náinnium, Jerusarén iwiaaku Yus pujutai péprun nakumeana nu jeeáitrume. Nuisha ti untsurí nayaimpinmaya suntarsha ²³ ashí Yus-shuarsha shiir iruntrarú ániawai. Yus-shuarka ashí nayaimpiniam ni naarí anujtukma ásar ni uchirí ániawai. Nuisha Yus, ashí shuaran ti nékana nu, pujawai. Niisha shuáran ti penker awajsamtaí nu shuar jákar ni wakaní nuí shiir pujuiniawai. ²⁴ Nuisha Yamaram Chichaman in takartamajnia nu, Jesus, pujawai. Nuna numpe ukatramujai ashí shiir awajsaiti. Nu numpasha Apira numpejai nan̄kaamas péñkeraiti. Kame Apir ántar máamu asamtai yapajmiatrukta titinia áintsan̄ enentáimtaji. Antsu Jesus tunáa shuáran péñker awajsartaj tusa jakamiayi.

²⁵ Nuka ti penker asamtai Yus chichartamprumna nu nekas anturkatniuitrume. Yaunchu Yus jú nun̄kanam murá chichaamun anturkachar asutniátniunam uwempracharmiayi. Nuikia Yus nayaimpinmaya chichartamkurin̄ ántachkurkia ishichkisha uwemprashtatji. ²⁶ Yaunchu Yus chichamejai nun̄kan úurmamtikiarmiayi. Tura yamaisha tawai “Ataksha aya nún̄kankechu antsu nayaimpinmasha úurmamtikiattajai.” ²⁷ “Ataksha” tana nujai “ashí muchitrámnia nu amuukartatui” tawai. Tura muchitrachminia nu juakartatui. ²⁸ Yus in akupkatniun tsan̄katramaj nuka umuchnakchattawai. Tuma asamtai Yus yuminsatniuitji. Yus wakerana núnisrik wishiktsuk shiir enentáimtusar Yus shiir awajsatniuitji. ²⁹ Maa, ii Yúsrin̄kia kajerkan̄ka uunt jía nuke áesaa mash emesramniaiti.

13

Yus shiir enentáimtiksatin

¹ Nuamtak yachia núnisrum tuke mai anenai ajatarum. ² Tuke fírar shiir itiaatarum. Nuna túruiniak shuar nékachminiak nayaimpinmaya suntaran itiaawaruiti.

³ Sepunam pujuinia nusha atumsha niijiai pujáa núnisrumek waitnentrarta. Wáitkiasarma nusha wisha núnisnak wáitsamniapitjia tusarum waitnentratarum.

⁴ Nuatnaikiatin péñkeraiti. Shuar ni nuwejai tsanin̄ pujustin péñkeraiti. Tura nuatkamu ainia nusha chikichan̄ eakchatniuiti. Tsanirmana núnaka Yus asutiáttawai.

⁵ Aya kuítiak enentáimtusam pujusaip. Yuska “Kanakchattajai tura penké ikiukchattajme” túramui. Tuma asamtai ame takakmena nujai shiir enentáimsam “maakete” titiá. ⁶ Tiniu asamtai arantutsuk ju tíminiaitji: “Winia yainnia nuka Uunt Yúsaiti. Nu asamtai shuar túrutamnia nuna ashamkashtatjai.”

⁷ Atumin Yus-Chichaman jintinramawarmia nu enentáimtustarum. Yúsan shiir enentáimtuiniak péñker wekasarmia núnisrumek atumsha túratarum.

⁸ Jesukrístuka tuke yapajítsuk nuikiya núnisan yamaisha tura ukunmasha tuke núnisan átatui. ⁹ Chíkich chicham niisháa írunka nu anturkairap. Yus in anenma asakrin kakaram ajasartai. Shuar niisháa yurumkajai enentáirui kakaram ajastaj táyat penké yáinchaíti. Yurumeaj nújainchu antsu Yusa anenkrattairijjai ii enentáin kakaram ajasminiaitji.

¹⁰ Yáunchu Yúsnan pujurin naman maar Yus susamunmayan yuu ármiayi. Tura iikia Yus-sutaj nusháa ana nu súaji. Nusha Kristu jakamu asamtai yaunchua nu Yúsnan pujurin nu pachiinkiachmin ániawai. ¹¹ Israer-shuarnumiá Yúsnan pujurniu uuntri tunaan asakártaj tusa namanké numpen júkiar Imiá Shiir Tesaamunam wain ármiayi. Tura nu naman arant áesatniuyayi. ¹² Núnisan Jesussha péprunam arant wáitkianas mantamnamiayi. Nujai ashí shuara tunaarin ni numpejai nijiatkai. ¹³ Núnisrik iisha péprunmaya arant wétinia núnisrik Jesusai weri Nijjai métek wishikmain katsuntutai. ¹⁴ Kame ju nunkanam amuukachmin pepru atsawai. Antsu ukunam ti shiir pepru átatna nu nákaji. ¹⁵ Tuma asar naman maar Yus sútsuk antsu shiir chicham súakur tuke Yus shiir yúminkiaji. Tuke núnisar túratái. ¹⁶ Pénger túrakrum takakrum nu ajamnaisatin kajinmatnaikiirap. Nusha ti shiir Yus sútainti.

¹⁷ Yus-shuaran akupin ainia nu umirkarum shiir enentáimtikratarum. Ni takatrin Yusan ujaktin ásar atumí wakanin shiir wainiainiawai. Niisha itiurchatcha antsu wakerumainian túrawarat tusarum shiir yáintarum. Nu túrachkumka ¿itiurak yainmakarat?

¹⁸ Incha Yus áujсарarum. Iisha ashí pénger túratin wakeraji. Túraji enentáimji. ¹⁹ Tura Yus áujkuram Yus ataksha atumjai wainniaikiatniun wari tsankatrukak tusarum seatritiarum.

Amúak shiir chichaawai

²⁰⁻²¹ Imiatkinchanum apujkartinia nú Yus, Jesukrístun jakamunmaya iniantkimia nuka, ni numpé kakarmarijjai ashí pénger ana nuna suramsarti. Nujai ni wakeramu túrattarme. Tura Jesukrístu kakarmarijjai ashí ni wakeramun in pujurtamas takasti. Ii Uuntri Jesukrístu ashí Yus-shuaran ti pénger Wáinniuiti. Tura ni numpejai Yamaram Chichaman kakaram awajsamiayi. Nu Chichamsha tuke menkakashtatui. Aya Kristu tuke shiir awajnasti. Núnisan atí.

²² Yatsurú, kakaram chicharkajrumna ju shiir enentáimjai anturkatarum. Kame ti wárik átrajrume. ²³ Yamaikia ii yachi Timiutéu sepunmaya jiinki ankant ajasai. Nuna ujaajrume. Wárik támatainkia atumin ítiaj tusan winiakun nijjai winittiajai.

²⁴ Atumí úntrisha tura ashí Yus-shuarsha amikmaatarum. Itiaria nunkanmaya shuarsha amikmatmainiawai.

²⁵ Ashí Yus ti shiir yainmakarti. Nuke atí.

SÁNTIAK papin áarar akuptukma

Sántiak aarmiania nu

¹ Wi Sántiak Uunt Yúsan tura núnisan ii Uuntrj Jesukrístun umirin asan ju papin aajai. Ashí Yus-shuartirmin ashí nunkanam tsakinmakarum matsatrumna nuna amikmaajrume.

Nekatainkia Yúsnumiqiti

² Yatsuru, ashí itiurchat wáinkiumesha tuke warastarum. ³ Iis, itiurchatnum pujakrum nekas Yus enentáimtaitkiurmeka katsuntratin unuimiartatrume. ⁴ Tura tuke páchiachkuram, tuke katsunteakrum, nuikia Yúsjaí ti penker katsuartatrume. Penké atsumashtatrume.

⁵ Átum nánkamsarmek nekaatin tujintiakrumka Yusa nekatairj seata. Shuar seakuí Yuska kajetsuk tura ementutsuk antsu patatas súawai. Tuma asamtai seakminkia suramsattawai. ⁶ Túrasha Yus nekas enentáimtusam, “túratpiash” tútsuk seata. “Cha, nékatsjai surustimpiash” tu seakmeka ántram seame. Nayaantsa tsukaturj juní taa, atúu waketki ajatsuk. Amesha áintsamek túmame. ⁷ Enentáimjin núnisketkuinkia, seamna nuna Yus penké suramsashtatui. ⁸ Shuar jimiará enentáimna nuka shiir wekasatniun tujintiawai.

⁹ Yus-shuar, ju nunkanam kuítríncha ainia nu, Yus shiir awajsamu nujai warasti. ¹⁰⁻¹¹ Tura Yus-shuar kuítrinniuitkuisha péejchach enentáimtikramsha warasti. Iis, nupa kuánkam tura nantu ti sukuam kaar miniatsuk. Kuítrinniuka ántska ántram seame. Nayaantsa tsukaturj juní taa, atúu waketki ajatsuk. Amesha áintsamek tánkete. Tuke súrutnak pujurkusha itiurchat wáiniuk wárik amuukattawai.

Ii itiurchatrj ana nu

¹² Shíiraiti shuar ni itiurchatrjin nekas katsunteana nuka. Nekapsam jíinkiuñka akinkiatniun wáinkiatstawai. Iwiaaku átinian, tawasap achiktinia núnisan, wáinkiatstawai Yus ni aneam tsankatka nuna. ¹³ Shuar tunáa túramnia nekapeakka “Yus nuna útsutrutui” tu enentáimprashtiniaiti. Yuska yajauch túramnia enentáimtsui túrasha Niisha penké chikichkinkesha tunaanum útsuchuiti. ¹⁴ Antsu ni wakeramurijjain aents tunaan ninki ikiatmamkaiti yajauch túratniun. Nújainkia tunaanum útsukmaiti. ¹⁵ Nu yajauch wakera-munmaya tunáa akiiniui. Tura nu tunáa mash amuukamtaí jákatin akiiniui.

¹⁶ Yatsuru, aneakun tájarme, ananmamawairap. ¹⁷ Ashí penker ana nu, ashí shiir ana nusha nayaimpinmaya Yusak amasuíti. Yus ashí tsáapninia nuna najanaiti. Tura Niin kiritin atsain yapajítsuk tuke tsáapniiti. ¹⁸ Nii wakera asa ni nekas chichamea nujai ni uchirj najatmamji. Tura ashí ukunam átatna nujai ii émkaitji.

Yus nekas shiir awajsatin

¹⁹ Tuma asamtai aneamu yatsuru, wárik chichastin enentáimprairap antsu antuktin emka enentáimprata. Núnisan wárik kajekaip. ²⁰ Kajena nuka Yus penker wakeramun túratsui. ²¹ Nu asamtai, ashí penkercha nu tura ashí yajauch írúnna nusha iniaisata. Tura tuke enentáijjai Yus-Chicham ame enentáimin araamu anturkata. Tura nu Chicham kakarmaiti uwentikrampratniun.

22 Yus-Chicham umikta. Aya ántukaip. Aya ántakmeka amek ananmamattame. 23-24 Shuar íspikia ímiak ni yapin wapikian wáiniak tura nuyá jáupmitsuk we, ni urukuit nuna wárik kajinmatkishtimpiash. Shuar Yus-Chicham umitsuk aya ántana nuka nujaj méteketete. 25 Yus tana nujaj ankant ajasminiaiti. Shuar íspikia iimia áintsan nekas Yus péñker táman tuke iniaitsuk enentáimtus, nu shuar kajinmattsuk aya antukchattawai antsu tuke umiktatui. Tura ti shiir waras pujustatui.

26 “Nekas Yúsan shiir umirjai” tana nu tura eseer chichaachkunka imia niñki ananmamui tura “Yúsan shiir umirjai” tana nuna ántar tawai. 27 Nekas Yus Apa awajitsuk shiir umirkatin júiti: mitiaikiasha wajasha itiurchat-num pujuiniakuisha yáintiniaiti tura ju nunkanam ashí tunáa ana nújaisha máatrashtiniaiti.

2

Shuar antra akantrashtin

1 Yatsuru, ii Uuntri Jesukrístu ti shiir nankaamantua nu enentaimtatirmeka shuar akantratin enentáimsairap. Shuara enentái enentáimtsuk antsu aya pátatke wáinmena nujaj aents akantram niisháa enentáimturairap.

2 Iis, iruntrumna nuj shuar kuítrintin kurí aniyu aweera tura péñker iwiarmampra wayashtimpiash. Tura núnisan chíkich kuítrincha aruta entsaru wayashtimpiash. 3 Tura kuítrinnia nu “Péñkera jui pujusta” tíchatameash. Tura kuítrinchaka “Atu wajauta, túrachkumsha jui nunkansha pujusta” tíchatameash. 4 Nu tákumka yajauch enentáimpram jimiará enentáijiai aents enentáimtame.

5 Aneamu yatsuru, antuktaram. Ju nunkanam kuítrincha ainia nuna Yus achikiuiti Ní shuar ajar Nin nekas enentaimtin ajarartinian. Tura ashí nayaimpiniam írunna nunasha Yus nin tsankatkattawai. Ashí shuar Yúsan aneena nuna anajmatra asa nin tsankatkattawai. 6 Átum antsu kuítrincha natsant awajearme. Iista, kuítrinnia nuka timiá itiurchat awajtamainiat-suk. ¿Nuikia níchuk ainia achirmak kapitánnium japiki júramprumna nu?

7 ¿Nínkichuk ainia Kristu naari shiira nuna ántar pachikiar penké yajauch áujmatainia nu? Tura átumka nuna naari tuke shiir awajkurmin, ashí shuar “Kristu shuari” túramainiawai.

8 Yus-Chichamnum ju akupeamu nekas péñkeraiti: “Ame ayashim aneamna núnismek ame írutramuram aneeta.” Nu nekas umirniuitkiurmeka maak. 9 Nú enentaijjai kuítrinnijai chichasminiaiti. Tura nuyá kuítrinchajai shiir chichaachkumka, niisháa enentáimta asam, nu akupkamu umirkachuitme. Tunáa túrame. Núnismek Yusa akupeamurijjai amek sumamame. 10 Chíkich akupkamu írunna nu ashí umikiam tura aya chikichik akupkamu umikchamka nuikia ashí akupkamu umircha ajasume. 11 Iis, Niñki Yúsak chichaak tíchamka “tsanirmawaip.” Tura chikichnasha “mankartuawaip” tímiayi. Nu asantai, shuar tsanirmatsuk túrasha mankartakka ni wakeramun umirtsui. 12 Kristu ankant awajtam-santai ii yamá ni akupeamuri yúpichuch umirkamniaitji. Nu asantai nu akupkamujai métek wekakurniñkia Yus “péñker túraitme” turamtatji. Tura umikchakriñkia “péñker umikchaitme” turamtatji. Tura nu enentáimsar péñker chichasar takasar wekasatniuitji. 13 Chikichan waitnentachkunka waitnennatsuk asutniáttawai. Tura waitnenkratniuitkiurniñkia tsawant jeamta Yus in waitnentramp Prattaji.

10 Chíkich akupkamu írunna nu ashí umikiam tura aya chikichik akupkamu umikchamka nuikia ashí akupkamu umircha ajasume. 11 Iis, Niñki Yúsak chichaak tíchamka “tsanirmawaip.” Tura chikichnasha “mankartuawaip” tímiayi. Nu asantai, shuar tsanirmatsuk túrasha mankartakka ni wakeramun umirtsui. 12 Kristu ankant awajtam-santai ii yamá ni akupeamuri yúpichuch umirkamniaitji. Nu asantai nu akupkamujai métek wekakurniñkia Yus “péñker túraitme” turamtatji. Tura umikchakriñkia “péñker umikchaitme” turamtatji. Tura nu enentáimsar péñker chichasar takasar wekasatniuitji. 13 Chikichan waitnentachkunka waitnennatsuk asutniáttawai. Tura waitnenkratniuitkiurniñkia tsawant jeamta Yus in waitnentramp Prattaji.

10 Chíkich akupkamu írunna nu ashí umikiam tura aya chikichik akupkamu umikchamka nuikia ashí akupkamu umircha ajasume. 11 Iis, Niñki Yúsak chichaak tíchamka “tsanirmawaip.” Tura chikichnasha “mankartuawaip” tímiayi. Nu asantai, shuar tsanirmatsuk túrasha mankartakka ni wakeramun umirtsui. 12 Kristu ankant awajtam-santai ii yamá ni akupeamuri yúpichuch umirkamniaitji. Nu asantai nu akupkamujai métek wekakurniñkia Yus “péñker túraitme” turamtatji. Tura umikchakriñkia “péñker umikchaitme” turamtatji. Tura nu enentáimsar péñker chichasar takasar wekasatniuitji. 13 Chikichan waitnentachkunka waitnennatsuk asutniáttawai. Tura waitnenkratniuitkiurniñkia tsawant jeamta Yus in waitnentramp Prattaji.

10 Chíkich akupkamu írunna nu ashí umikiam tura aya chikichik akupkamu umikchamka nuikia ashí akupkamu umircha ajasume. 11 Iis, Niñki Yúsak chichaak tíchamka “tsanirmawaip.” Tura chikichnasha “mankartuawaip” tímiayi. Nu asantai, shuar tsanirmatsuk túrasha mankartakka ni wakeramun umirtsui. 12 Kristu ankant awajtam-santai ii yamá ni akupeamuri yúpichuch umirkamniaitji. Nu asantai nu akupkamujai métek wekakurniñkia Yus “péñker túraitme” turamtatji. Tura umikchakriñkia “péñker umikchaitme” turamtatji. Tura nu enentáimsar péñker chichasar takasar wekasatniuitji. 13 Chikichan waitnentachkunka waitnennatsuk asutniáttawai. Tura waitnenkratniuitkiurniñkia tsawant jeamta Yus in waitnentramp Prattaji.

10 Chíkich akupkamu írunna nu ashí umikiam tura aya chikichik akupkamu umikchamka nuikia ashí akupkamu umircha ajasume. 11 Iis, Niñki Yúsak chichaak tíchamka “tsanirmawaip.” Tura chikichnasha “mankartuawaip” tímiayi. Nu asantai, shuar tsanirmatsuk túrasha mankartakka ni wakeramun umirtsui. 12 Kristu ankant awajtam-santai ii yamá ni akupeamuri yúpichuch umirkamniaitji. Nu asantai nu akupkamujai métek wekakurniñkia Yus “péñker túraitme” turamtatji. Tura umikchakriñkia “péñker umikchaitme” turamtatji. Tura nu enentáimsar péñker chichasar takasar wekasatniuitji. 13 Chikichan waitnentachkunka waitnennatsuk asutniáttawai. Tura waitnenkratniuitkiurniñkia tsawant jeamta Yus in waitnentramp Prattaji.

10 Chíkich akupkamu írunna nu ashí umikiam tura aya chikichik akupkamu umikchamka nuikia ashí akupkamu umircha ajasume. 11 Iis, Niñki Yúsak chichaak tíchamka “tsanirmawaip.” Tura chikichnasha “mankartuawaip” tímiayi. Nu asantai, shuar tsanirmatsuk túrasha mankartakka ni wakeramun umirtsui. 12 Kristu ankant awajtam-santai ii yamá ni akupeamuri yúpichuch umirkamniaitji. Nu asantai nu akupkamujai métek wekakurniñkia Yus “péñker túraitme” turamtatji. Tura umikchakriñkia “péñker umikchaitme” turamtatji. Tura nu enentáimsar péñker chichasar takasar wekasatniuitji. 13 Chikichan waitnentachkunka waitnennatsuk asutniáttawai. Tura waitnenkratniuitkiurniñkia tsawant jeamta Yus in waitnentramp Prattaji.

10 Chíkich akupkamu írunna nu ashí umikiam tura aya chikichik akupkamu umikchamka nuikia ashí akupkamu umircha ajasume. 11 Iis, Niñki Yúsak chichaak tíchamka “tsanirmawaip.” Tura chikichnasha “mankartuawaip” tímiayi. Nu asantai, shuar tsanirmatsuk túrasha mankartakka ni wakeramun umirtsui. 12 Kristu ankant awajtam-santai ii yamá ni akupeamuri yúpichuch umirkamniaitji. Nu asantai nu akupkamujai métek wekakurniñkia Yus “péñker túraitme” turamtatji. Tura umikchakriñkia “péñker umikchaitme” turamtatji. Tura nu enentáimsar péñker chichasar takasar wekasatniuitji. 13 Chikichan waitnentachkunka waitnennatsuk asutniáttawai. Tura waitnenkratniuitkiurniñkia tsawant jeamta Yus in waitnentramp Prattaji.

10 Chíkich akupkamu írunna nu ashí umikiam tura aya chikichik akupkamu umikchamka nuikia ashí akupkamu umircha ajasume. 11 Iis, Niñki Yúsak chichaak tíchamka “tsanirmawaip.” Tura chikichnasha “mankartuawaip” tímiayi. Nu asantai, shuar tsanirmatsuk túrasha mankartakka ni wakeramun umirtsui. 12 Kristu ankant awajtam-santai ii yamá ni akupeamuri yúpichuch umirkamniaitji. Nu asantai nu akupkamujai métek wekakurniñkia Yus “péñker túraitme” turamtatji. Tura umikchakriñkia “péñker umikchaitme” turamtatji. Tura nu enentáimsar péñker chichasar takasar wekasatniuitji. 13 Chikichan waitnentachkunka waitnennatsuk asutniáttawai. Tura waitnenkratniuitkiurniñkia tsawant jeamta Yus in waitnentramp Prattaji.

Yus enentáimtustin tura umirkatniusha

¹⁴Yatsuru, shuar “Yusan shiir enentáimtajai” táyat tura péñker túrachkuñkia péñkerashit. Nujaj uwemprattawak. ¹⁵Wátskea, Yus-shuar, áishmansha nuwasha, entsátáirin tura yurumken atsumashtimpiash. ¹⁶Tura ame nékayatmek ayashj atsumana nu sútsuk tíchatapash “Péñker wetá, entsatai entsaram túram péñker yurumáta.” ¿Nu sútsuk tákum péñkerkait? ¹⁷Núnisan takatsuk Yus enentáimtustin ántrai.

¹⁸Tura shuar tíchanpiash, “Chíkich takaawai tura chikichcha Yúsan shiir enentáimtawai. Mai péñkerchakait” tichanpiash. Wats, ame Yus enentáimtamun takatsuk paant inaktusminiashitiam. Tura wi antsu péñker takatrujaj Yus enentáimtamun paant inaktustatjai. ¹⁹Nekas Yus chikichkiiti tu enentáimtame. Nuka péñker túrame. Túrasha iwianchcha nunasha nékainiawai. Tura umircha ásar ashainiawai. ²⁰Netse enentáimpraip. Ashí Yus wakera nu takaachkumka, Yus enentáimtustin ántrai. ¿Nu nekaatin wakeramek? Iista. ²¹Apraáman Yus chicharuk “Winia ti shiir awajtusat tusam ame uchiram Isak maam surusta” tutai suritkiachmiayi. Máachiat suritkiachmiayi. Tura suritkiacham Yus “Péñkeraitme” tímiayi Apraáman. ²²Páantchakait. Apraám Yusa shiir enentáimtak umirkamiayi. Umirtsuk Yúsan enentáimtakka nuikia ántar enentáimtiaayi. Tura umirak Yus enentáimtamun umikmiayi. ²³Nujaj Yus-Chicham aarma nu uminkiamiayi. Juiti:

Apraám Yúsan shiir enentáimtusmiayi tura Yus chicharuk tímiayi “Máakete. Nújainkia tuke péñker túraitme Wijjaj” tímiayi. Apraámsha nekas “Yusa Amikri” tu náamkamiayi.

²⁴Páantchakait. Shuar aya Yúsan shiir enentáimtamujainchuk tura péñker takasmajajsha Yus nin shiir enentáimtawai. ²⁵Núnisan Raap tsanirmataiyayi. Túmaitiat Israeran suntarin mamikmauta tusar akupkamun ni jeen itiaawar tura úukar chíkich jintianam akupak uwemtikrarmiayi. Nuna túramtai Yus “péñkeraitme” tímiayi nincha. ²⁶Ayash wakantichuka jákachukait. Núnisan Yus enentáimtustin tura ni wakeramu takaachkurkia, jaka áintsan ántraiji.

3

Ii iniaj

¹Atum untsurj jintinjiartin ajastin wakerukairap. Yus in, jintinjiartin ájina núnaka, nankaamas neka asar, awajiakrin nankaamas Yus asutiámattaji. ²Iis, ashí mash ti awajiatstjik. Tura shuar chichaak, aya péñkernak chichaakka, nu shuar tuke eseer enentáimniuiti. Tura ayashjisha tuke péñker ana nuna túriniaiti. ³Kawaisha enentáimpratai. Jiru wenuchiniam ikiursam ni ayashj ashí ayantaatsuk. ⁴Kanusha ti úuntaitiat tura kakaram wéayat ishitiapach wiantaijjaj shuar wakera nuj ayantarminiaiti. ⁵Núniskete ii iniaj. Timiá ishitiapchitiat awakmaktinia tímianu chichaatsuk. Ji ishichik kapaajaj ashí numi tsaruaku ekeemakchamniakait. ⁶Ii iniajsha jijjaj méteketete. Ashí tunáa piákuiti. Tura ii ayashjin tunáa túratniun útsutmaji. Túnkuranmaya jijjaj ikiapármaiti tura ashí ii wekajnia nuj émesewai. ⁷Shuar ashí yajaman nawamkamin áiniawai. Ashí kajen írussa nunasha, nanamtincha, napincha, tura entsayanacha ashí nawamkaruiti. ⁸Tura iniaikia penké nawamkachminiaiti. Ti yajauch asa penké nupetkachminiaiti. Iniaikia ti taráa tseasaiti. ⁹Nu iniaijjaj Yus Apa shiir awajeaji tura nu iniaijjain aentsti yajauch chichárnaiyaji. Áentsun Yus Nijjaj métek-taku najanamaitiatar yajauch chichárnaiyaji. ¹⁰Nu iniaijjain péñkersha tura yajauchisha chichaaji. Yatsuru, nuka penké atsutniuiti. ¹¹¿Púkununmaya entsa sáawijjaj kusuku jinkimniakait? ¹²Yatsuru, ¿Kushinjiap shuinian nereawak. Munchisha

kushin̄kiapen nerektatuak? Núnisan̄ púkununmaya entsa sáawijjaj̄ kusuku j̄inkichminiaiti. Ii iniaijjaj̄ núnisan̄ aya pénker̄a nu chichastiniaitji.

Yusa nekatairi

¹³ Shuar ti neka enentái takakna nu, pénker̄ túrattawai. Nekas nékaitkiun̄ka péechachia núnis tuke pénker̄ ana nuna túrattawai. ¹⁴ Antsu atumí enentáijjaj̄ pen̄ké yajauch enentáimtunairum tura atumek pénker̄ pujustin enentáimtumarum, nékaitiatam pénker̄ túrachiatam “pénkeraitjai” tiip. Nuka wáitrame. Nekaska núchaiti. ¹⁵ Nú enentaikia Yúsaiyan̄chuiti. Antsu jū nun̄kanmayaiti, shuara enentáiyaiti, núnisan̄ iwianchnumiaiti nú enentaikia. ¹⁶ Shuarsha yajauch enentáimtunairar tura nin̄ki enentáimtumainiakui, nujaj̄ ashí meseawai tura ashí yajauch ti awai. ¹⁷ Antsu Yusaiya enentái takakua nu júnisaiti: ashí nan̄kaamas emka eseeratin, nuyá nawamkartin, shiir ajá, pénker̄ anturnain, waitnen̄kratin, ashí pénker̄ takáa tura anañtsuk naka chichamtin. ¹⁸ Eseera enentáimsatniusha shiir takawai ashí shuar pénker̄ ana nuna túrawarti tusa.

4

Jū nun̄kanam írunna nu aneashtin

¹ ¿Urukamtaitsuk tuke kajernaikiarum ti máanaisrum pujarum. Mesetnumsha urukamtaí wéarum? Júnisaiti: Atumin yajauch enentái katsuñtrachmin útsutmakrumin tuke máaniarme. ² Wakerarmena nu takustin wakerarme tura nu wakeramu takustin jeachkuram nérentin maarne juruktiaj̄ tusam. Chíkich takakna nujaj̄ itit enentáimtuniarme tura ataitin tujinkiam máanaitrume. Wakerarmena nusha Yus seachu asarum wáintsurme. ³ Tura seakrumsha yajauch searme. Atumí pénker̄ijjaj̄ warastin enentáimiu asarum searmena nusha wáintsurme. ⁴ Jú̄ nun̄kanmaya wakerakum Yusa nemasr̄ijjaj̄ tsanirma áintsan̄ketrume. Nékatsumek atumsha. Jū nun̄kanmayan̄ wakerakrikia Yusa nemasr̄intji. Shuar jū nun̄kanmayan̄ wakerakka Yusa nemasr̄i ajawai. ⁵ Yus-Chicham juna tawai:

Yus ni Wakaní̄ ii enentáin̄ apujturmasuitji. Nu Wakan in anenma asa ti akasmatramaji, táwai.

Tura nuna ¿ántran̄keash ta? ⁶ Tura anenma asa ti yáinmaji. Tuma asamtaí Yus-Chicham tawai:

Kajemtinian̄ Yus íistatui tura péechachin̄ Yus nin̄ aneak ti shiir yáin̄tatui, tawai.

⁷ Yusaj̄ ikiumastarum, tura íwianch taritratatum. Túrakrumin íwianch ikiurmaktiatui. ⁸ Yúsainí̄ weamkata tura Nii atumin wearmaktatrume. Tunáa shuartiram Kristu numpejaj̄ nijiamartatum. Tura átum, Yussha tura jū nun̄kanmayasha mai métek wakerarmena nu, atumí enentái naka eseeratarum. ⁹ Atumí tunaari enentáimsarum kúntuts enentáimpratarum. Nu kúntutsjaj̄ ti úuttiarum. Nuik shiir enentáimprarum wishikmiarumna nuka iniaisarum kúntuts enentáimprarum úuttiarum. ¹⁰ Yusjaj̄ péechach ajasta, túrakmin shiir awajtamsattawai.

“Yajauchiitme” tunaichatin

¹¹ Yatsuru, yajauch áujmatnaisairap. Yus-shuar ni yachin̄ yajauch áujmatas tura yachí̄ tunaarī tuke áujmatuk Yus “aneniatarum” tana nuna umichuiti. Antsu umichu asa “nu akupkamu áñtrai, umirkashtiniaiti” tawai nu shuar. Nujaj̄ nu shuar umirtsuk Yus akupkamu nan̄kaamas enentáimtumawai. ¹² Yus Nin̄ki akupkamu najana asa Nin̄ki nu akupkamu umirkamun nekas nekaamniaiti tunaashit tusa. Nin̄kiti uwentikratniun tura emesratniunam akupkatin jea nu. Amesha yáitiam chikicha tunaarī íistincha.

Kashin átatna nuna Yusak nékawai

¹³ Watsek, átum áujmateakrum “Arumsha kashincha nu péprunam weri nu j chikichik uwí takasar kuit achiktatji” tíchattarpash. ¹⁴ Ishichkisha penké nékatsrume kashin átatna nu. Ju nunkanam ii iwiaakmarí wárik amúatsuk. Yurañkim utsanar tura nantu sukuam mash wárik menkaatsuk. Núnisketji. ¹⁵ Antsu júnis tíminiaitrume: “Yus wakerakuñkia iwiaaku pujakrikia nusha túrattaji” titiarum. ¹⁶ Túrachkurmeka átumka Yusjai nankaamantu enentáimprume. Tura ashí nu enentáikia yajauchiiti. ¹⁷ Shuar péñker túratniun nékayat, túrachkuñkia, nuka tunaiti.

5*Kuítrintin enentáimpratniua nu*

¹ Kuítrinniutiram ju antuktarum. Ti úuttiarum. Ti wáitsatin asarum ti kakantra úuttiarum. ² Kuítrum mash mamukarai tura iwiarmampramurmesha mash tiñkishap yúkayi. ³ Kurirmesha tura kuítrumsha ashí ijiakmamkarai. Ijiakmampramurisha ame péñkercha túram nuna paant iniakmawai. Tura jinium áesamua áintsan ame kuítrum yajauch awajtamstatawai ayashmijn. Amuukatin tsawant jeamunam anearchamame antsu ame kuítrum ikiaunkamame. ⁴ Ame takat iniararam ementushim akirarmamna nu “akirkati” turamainiawai. Anearta. Yakiyá Yus, nayaimpinmaya suntara uuntri, nu takartamniu chichamen antukai. ⁵ Ashí ju nunkanam írúnna nu wararsaruitrume. Tuma asarum kapunka nuke machararme tura yamaikia máatin tsawant jeayi. ⁶ “Nu shuar tunaiti” tírum tunaachu tsanumprurum máamarme, tura niñkia surimiakcharmai.

Yawetsuk takastin tura Yus áujsatin

⁷ Nu asamtai, yatsuru, nu páchitsuk ii Uuntri Kristu tatin nákastarum. Arakmausha ni arakri péñker tsapaiti tusa yumi yutuktinian shiir enentaijiai nákatsuk. Yútasua umirmatai esatrurmatai júuktatjai tusa nákatsuk. Tura júurmaksha ti waraatsuk. ⁸ Núnisan atumsha katsuntsatarum tura yawekiirap. Kristu tatin yuntumtemayi. ⁹ Yatsuru, nuámtak “ju yajauch túrutui” tunainirap. Tákurminkia Yus írmastatrume. Nínkichukait nuna íistin tura anearta nu Yúsak tíjiuch wajatramui. ¹⁰ Yatsuru, yaunchu Yúsnan etserin enentáimpratarum. Tuke ii Uuntri Yus timia nuna shiir etserkarmiayi. Túmaitiat wáitsarmiyai túrasha pachischarmiayi. Núnisrume enentáimsatarum. ¹¹ Itiurchatan katsuntainia nuka nekas shíiraiti, tu enentáimji. Shuar itiurchatan ti katsuntin ámiayi, ni naari Jup. Tura ni itiurchatri nankaamasmatai Yus ti núkap kuítrin susamiayi. Nu nékatsrume. Ii Uuntri Yus ti waitnenkrachakait.

¹² Ju ashí nankaamas enentáimtustiniaiti, yatsuru. Ame “ee” tákumka nekas titiá. Tura “atsá” tákumka nusha nekas titiá. Nekas chicham chichaachkumnñkia Yus írmastatui. Nu asamtai nayaimsha nunkaasha ashí írúnna nusha páchitsuk, aya támena nu tuke nekas atí.

¹³ Wáitakmeka Yus áujсата. Waraakmeka, warasam kantamám Yus shiir awajsata. ¹⁴ Yus-shuartiram, shuar jáakka, Yus-shuara úntrin untsukti. Tura niisha taarti. Tura Jesusa naari pachikiar asuitijiai jaa shuaran ishichik kuerarti. Túrawar Yúsan áujtusarti nu shuaran. ¹⁵ Tura “Yus nuna nekas anturtamkattaji” tu enentáimsar áujsarti. Túrawarmatai jaa shuar péñker ajastatui. Yus nin tsuártatui. Tura tunaan tura asa jáakuñkia Yus nu tunaan tsanukurattawai. ¹⁶ Nu asamtai, atumí tunaari paant etsertunaiktarum. Túrarum Yus áujtunaistarum atumí tunaari tsanukurnarat tusarum. Péñker

shuar Yúsan tuke enentáijjaj áujeamurinkia ti kakarmaiti. ¹⁷ Yaunchu Yuschichaman etserin ámiayi, ni naari Erías. Niisha iijjaj méteketiat yumi yutukaj tusa Yusa ájsamtai menaintiú uwí nuyá nankaamas yutukchamiayi. ¹⁸ Ataksha yutukti tu ájsamtai ataksha yutukmiayi tura araksha ataksha tsapainiarmiayi.

¹⁹ Yatsuru, shuar eseera wekatinmaya kanaakuinkia chikich nin waketkitniun yainti. ²⁰ Shuar tunáa shuaran yajauch wekaan awakeakka jákatniunmaya uwemtikrattawai tura ti untsurí tunaari tsankurnartatui.

PÍTIUR Emka papin aar akupkamu

Pítur Yus-shuaran áatramiania nu

¹ Wisha ju papin aajna nu Pítruitjai. Wisha Jesukrístu akatramurintjai. Israer-shuar Yus-shuar árum nuna atumin ankant ankant tsakinmakarum chíchich chíchich nunkanam matsatrumna nuna áatjarme. Puntu nunkanmasha, Karasea nunkanmasha, Kapatúsea nunkanmasha, Asia nunkanmasha, Pitinia nunkanmasha pujarmena nuna áatjarme. ² Yaunchu Apa Yus, “uwemtikrataj” tímia núnisan achikmaitrume. Tura, Winia ajasat tusa ni Wakanijjai akantamkamiarme. Umirtukat tusa nuna túramiayi. Tura Jesukrístu numpejaisha atumí enentáin atsajkir chamir awajturmasmiarme. Wats, Yus tuke waitnentramar ti shiir awajtamsarat tusan wakerajrume.

Shiir enentáimsar pujustin

³ Wats, Yus, ii Uuntri Jesukrístu Apari ana nuna naari shiir awajsatai. Yusha ti waitnentrama asa, atak akiiniatniun suramsaitji. Jesukrístu jakamunmaya nantakin asamtai, iikia atak akiiniar tuke iwiaaku pujustiniaitiajnia nu arutramji. ⁴ Tura nayaimpiniam ikiurtamsamu ana nuna achikmintrum tusa Yus wakerawai. Nu ikiurtamsamu meserchamnia amuukachminiaiti. Tura nusha yajauchichuiti. ⁵ Yus nekas enentáimta asakrumin ni kakarmarijiai wearmarme. Tura tuke uwemtikrampratniun, nunka amuuamunam paant iniakmastatna nu achikmintrum tusa tuke tsawant ni kakarmarijiai wáitmarme.

⁶ Nu enentáimsarum wararme. Kame ju nunkanam pujakrum itiurchat wáinkiashtarmeash. Tura ju nunkanam pujustin ishichkichukait. Ukunam pénger pujustaj tu enentáimsarum wararme. ⁷ Enentáimsatarum. Shuar kurin wakerana núnisan atumniasha umirtukat tusa Yus wakerutmarme. Aents kurin jinium áesainiawai, aya kurik juakat tusar. Kurin ti wakeruinia ásar, amuukamnia aijn túruiniawai. Atumsha, itiurchat wáinkiarmana nujai, Yus san nekas enentáimtusartimpiash tusa nekapsamuitrume. Nu enentáimtamukurijiai nankaamas péngeraiti. Ukunam, Jesukrístu támatai, Yuska atumin “pénger túraitrume” turamtajtsa wakerittiawai. Tura “Ashí shuar nuna nekaawar winia naarun uunt awajsarat” tusa túrutmattarme. Nu tuma asamtai ju nunkanam nekapsamuitrume, itiurchat wáintrumna nujai.

⁸ Jesukrístu wáinchaiatrum anearme. Tura yamá wáinchaiatrumek nekas enentáimtarume. Tuma asarum ti wararme. Nu warastin nayaimpiniam warastatjinia núniskete; nuka paant titin jeatsji. ⁹ Iimiatarum. Uwemtikrurat tusarum Yus umirkachurmek. Nu uwempratniun wainiu asarum waraarme.

Krístujai ii uwempratniun yaunchu etserkarmiayi

¹⁰⁻¹¹ Yus áentsun waitnenta asa, uwemtikrataj tusa tuke wakerimiayi. Núnaka Yúsnan etserin etseriarmiayi. Kristu Wakani ni enentáin pujuriarmia nu, túruntsain Kristu wáitsatniurin jintiarmiayi. Tura ukunam ni ti shiir pujustintrincha etseriarmiayi. Túrasha “tuu áishmankait Kristu tutai, tura urutiák túrunat” tusar nu etserin émamkesar anintrusarmiayi. ¹² Tura nii pujuiniainkia túrunashtinian, antsu ti ukunam, ii pujajnia juí túrunatniun Yus nekaamtikiarmiayi. Núnaka Yusa shiir chichamen ujatmakarmia nú shuar nekaprutmarme. Nú shuar Yusa Wakani, nayaimpinimaya akupkamu ana nuna nekatairijiai ujatmakurme. Maa, nu uwempratniun tájana nuna,

nayaimpinmaya suntar nekaatai tusar wakeruiniawai, túrasha tujintiainiawai.

Pénker wekasatin

¹³ Tuma asamtai, pé_nker enentáimsarum tura pé_nker ímiasrum wekasatarum. Tura Jesukrístu ukunam wantiniak waitnentramprattana nu yawetsuk nákastarum. ¹⁴ Umin uchi áintsarmek yaunchu nékachu asarum wakerimiarmena nu iniaisarum Yus umirin atarum. ¹⁵ Ashí túramurmijjají timiá pé_nker wekasatarum. Yus, untsurmakuana nu, pé_nker asamtai, átumka ni shuari asarum pé_nker wekasatarum. ¹⁶ “Wi pé_nker asamtai atumsha pé_nker wekasatarum” Yus tana nu ni Papiriin áarchamukait.

¹⁷ “Yus winia Aparuiti” tárumna nu aneartarum. Ashí aentsu túrutairin métek Yus nekaattawai. Nu neka asarum, ju nunkanam pujarmena juí Yus ashamkatarum. ¹⁸ Warí, ánta wekasatniun atumí uuntri jintintrarmena nuyá Yus uwemtikramprarme. Túrasha kurisha kuitcha amuukamnia ainia nujají uwemtikrachmaitrume. ¹⁹ Antsu Kristu numpe ti shiira nujají uwemtikramuitrume. Nu nékarme. Yaunchu, shuar tunáa túrakui, Yus tímiayi, “murik yajauchichu tunamarcha maarum, Yus sútainiam ikiustarum. Nuna numpen wáinkian, atumí tunaarín tsan_kurattajai” tíniuyayi. Núnisan Kristu in jarutramka asa ii tunaaríniá uwemtikrampraitji. ²⁰ Nunkan nájantsuk áentsun jaruktinian Krístun anaikiamiayi Yus. Tura wárik akupkachmiayi. Antsu yamá tsawantin, átum pujarmin, pé_nker pujusúk tusa wakerak, atumin jarutramkat tusa Krístun akupkamiayi. ²¹ Niijjají átumka Yus umiirume. Yuska Krístun jakamunmayan iniantki nan_kaamantu awajsamiai. Yus nekas enentáimtakrum, aya pé_nkernak túrawai titiarum tusa túraití. ²² Yus nekas tana nuna, Yusa Wakani yainmakui, umirka asarum atumí wakaníin pé_nker ajasuitrume. Yus-shuarjají yajauch enentáimtunaisuk mai anenai ajatai tusarum tura asarum, nekas shiir enentáimtunaisrum mai anenai ajatarum. ²³ Nekaatarum. Yusa chichame umirka asarum atak akiini-aitrum nuka ju nunkanmayanchuiti. Antsu Yusa chichame iwiaaku tuke amuukachmin ana nú chichamjají tuke iwiaaku átiniaitrum.

²⁴ Ju ayash tuke pujuschamniaiti. Yusa Papiriin junis áarmaiti: Ashí aentsti nupáa áaniuitji. Ii pé_nkerisha kukujiá áaniuiti. Nupa wárik kaawai. Kukujsa núnisan wárik iniaawai. ²⁵ Tura Yusa chichamesha tuke amuukachminiati. Nu Chichamjají uwempramnia asamtai atumin etsernakuiti.

2

¹ Tuma asamtai, ashí yajauch ana nu iniaisatarum. Anan_katin, ántarchichamtin átin, chikichna wakeruktin, ashí tsanumpratniusha iniaisatarum. ²⁻³ Antsu, Uunt Jesukrístu waitnenkartutairi nekapsa asarum, uchi yama akiinia muntsun ti wakeruinia áintsarmek, Yusa chichame aya pé_nkerkea nu ti wakeruktarum. Yusa chichamejají tuke tsawant tsakakrum tuke uwemprami tusarum túratarum.

Iwiaaku kaya

⁴ Ii Uuntri Kristu kayáa áantsan_kete. Tura shuar kayan yajauchin nakitainia núnisan Jesukrístun nakitrarmiayi. Tura kayan ti pé_nkeran wakeruinia núnisan, Yuska, “winia Uchir ti pé_nkeraiti” tusa Jesukrístun achikmiayi. Atumsha Jesukrístu weantuktarum. Nii iwiaaku kayaiti. ⁵ Atumsha iwiaaku kaya áantsan_ketrume. Tuma asarum Yus wíjjají ni jeen jeamti tusarum tsan_kamaktarum. Tura nútiksarmek Jesukrístui atumí iwiaakmari tsan_kamaktarum, Yus wakera nuna túrutati tusarum. Jesukrístujají tura

asarum Yus shiir enentáimtikrume. ⁶ Jesukrístunun Yusa Papiriin júnis áarmaiti:

“Iistarum. Kayan ti penkeran achikjai” Yus tímiayi. Jeän emka apujtuamuri atí tusan Seunnum apujeajai.

Nin enentáimtana nu ántar enentáimtatsui. Aarma ana nu penké kayan chichaatsui. Antsu Jesukrístun tawai. ⁷ Yus umirkaitrumna nu, “kaya ti penkeraiti” tarume. Tura Yúsan umirainiatsna nuka Yusa Papiriin tana nujai métek áiniawai. Ju áarmaiti:

Jeän jeamin nakitrarmia nú kaya jeän emka apujtuamuri atí tusa apujamuiti.

⁸ Tura júsha aarma awai:

Tukumak iniaartin kayaiti.

Kame shuar Jesukrístunun etserkamun nakitiakka, ¿enentáinium itiur penker wekasat?

Wats, nú shuar, Krístun umirainiachu ásar, tuke túrunatin asamtai tukumainiawai.

Yusna ajasaru ainia nu

⁹ Tura átumka Yus achikmaitrume. Tura, wínian pujurtursarat tusa yajuchinmayá Uunt Yus akantamkairume. Yusna asarum penker enentáimin ajasurme. Tura Yus sumakmaitrume. Niisha winia penkerun etserturkarat tusa túrait. Kame kiritniunmayá jíinkirum ni tsáapnintrin wekasatniun achirmakurme. ¹⁰ Yaunchu nusháa shuar áuyarme. Tura antsu yamaikia Yusshuar ajasrum, Niiniu ajasurme. Yus-shuar ajatsrumni, ¿ya waitnentrampramia? Antsu yamaikia Yus waitnentramuitrume.

“Yúsnaitjai” tu enentáimsatin

¹¹ Yatsurtirmin tájarme, Yusna ajasrum, ju nunkanam írar matsatu asarum, atumí ayashí wakerana nu tsankatkairap. Ayashim wakerana nu túrakminkia ame enentáim nujai yajauch ajastatui. ¹² Yus-shuarchanum penker wekasatarum. Túrakrumninkia niisha yamá “Yus-shuar yajauch túruiniawai” ántar tuíniayatan, ukunmanka, Yusjai inkiunaiktin tsawant jeamtai, penker wekarmena nuna enentáimturmasar, nú shuarsha Yúsan shiir awajsartatui.

¹³ Kristu atumí Uuntri asamtai, ju nunkanam akupin áiniana nusha umirkatniuitrume. Uunt akupin ashí akupin asamtai umirkatarum.

¹⁴ Tura ni akupeamuri ainia nusha tunaan túruinia núnaka asutiáti tura penkeran túruinia núnaka shiir awajsati tusa uunt akupin akupkamu ásarmatai umirkatarum. ¹⁵ Nekas penker wekaamurmijjai enentáimcha ainia nu netse chichaamuri itiatmamtikiatarum tusa Yus wakerawai.

¹⁶ Tunaanumiá ankant ajasu asarum penker wekasatarum. Túrasha wi ankant ajaschajak tusarum nánkamsarum yajauch túrawairap. Antsu Yusna asarum, ni wakera nuna umirkatjai tusarum anearum wekasatarum.

¹⁷ Chíkichcha shiir enentáimtustarum. Yus-shuar ainia nusha aneetarum. Yus penker asamtai ashankatarum. Uunt akupin shiir awajsatarum.

Yus-shuarti katsuntratin

¹⁸ Takarniutirmesha ame úuntrum penker shiir enentáimturmakui sha tura yajauchiitkuisha umirkatarum. ¹⁹ Nekaatarum. Ántar wáitkiarmainia nuí, “Yus iirui” tu enentáimsa katsunteakrumka, ti penkeraiti. ²⁰ Yajauch túrawakmin asutiámamtai katsunteakmeka nuísha wariñ ati. Antsu penker túrawakmin asutiámamtai katsunteakmeka júka ti penker túrame Yusai.

²¹ Núnisan túrunatin achikmaitrume. Kristu waitrutmasmiarme nuí, Wi túraj núnisan túrawarmi tusar wáitsamiayi. ²² Krístuka tunaan penké túrachmiayi.

Tura chikichkinkesha penké anankachmiayi. ²³ Kátsekeamsha Nínkia katsekachmiayi. Wáitkiamsha “yapajmiaktaj” tíchamiayi. Antsu “winia Apar Yus iistí’ tímiayi, Yus péñker túrin asamtai. ²⁴ Kristu Nínki ni ayashíin ii tunaarín entsaki krúsnum jarutramkamiaji. Tunáa enentáimtusajrum tusa, antsu Yusaj péñker wekasamniuram tusa jarutramkamiaji. Atumí enentáin tsuártaj tusa Kristu asutniámiayi. ²⁵ Murik ni pujutairíin waketkitniun nékatsna ántsarmek atumsha menkaka wekaimiarme. Tura yamaikia atumí wáitmauríin waketkitrume. Atumí wáitmau Krístuiti, atumí enentáin wáinnia nu.

3

Nuatnaikiaru itiur túratniuit

¹⁻² Tuma asamtai, nuwáitram atumí áishri umirkatarum. Amesha péñker, Yus umirka weká asakmin, áishrum Yus-Chichaman umirchaitiat, ame túramurmin nekáa, ámeke chichaatsminin, niisha Yus-shuar ajastinian wakerittiawai. ³ Nu asamtai aya pátatek iwiarmampratniusha ti enentáimtusairap. Intiash ti péñker iwiaratniusha, kuriíjaj iwiarmampratniusha, pushí ti kuitjaj entsartincha ti enentáimtusairap. ⁴ Antsu, “nekas shíirmach ajastaj” tákumka, enentáimin “shíir kajechu átajaj” tu enentáimsatarum. Nuka sakarchattawai. Tura nuka Yúsnumka ti péñkeraiti. ⁵ Yaunchu núnisaran nuwá Yúsán enentáimtusarmia nu, tura Yúsán shíir enentáimtikratniun wakeriarmia nu, ni áishrin umirkar nujaj ni enentáin shíirmach ajarar pujuarmiayi. ⁶ Atumí weátri Sara ni áishrin Apráaman umirmiayi. Umírin asa, “winia uuntru” tíniuyayi nin. Atumsha péñker túrakrumka tura sapijmiatsuk wekaakrumka, Sarajaj métek átratume.

⁷ Tura áishmantirmesha Yus wakerana nu nekaarum atumí nuwe shíir enentáimtusum tsanintarum. Nuwemsha, nuwá asa, áishmanjaj métek kat-suntrachminiaiti. Tura niisha, ámíjjaj métek Yusa waitnenkartutairíjjaj tuke iwíiaaku átinian takusminiaiti. Tu enentáimta asam ame núwem shíir enentáimtustá. Yus áujkuram iturchat atsuti tusarum túratarum.

Yúsnum péñker wekasatin

⁸ Nuyasha ashí Yús-shuartirmin tájarme, aya chikichík enentaik atí. Waitnennairatarum. Nekas yatsum aneam núnisrumek anenaitiarum. Aya áminiuk enentáimtutsuk chikichan yáintaj tu enentáimsatarum. ⁹ Yajauch turamainiakuisha “yapajkiataj” tiirap. Katsekramainiakuisha “iikkiataj” tiirap. Antsu “Yus winia shíir awajtusúiti” tu enentáimsarum, yajauch turamainiana nu péñker awajsataram. ¹⁰⁻¹² Yus-Chichamnum júnis aarma asamtai nu túratarum:

Uunt Yus péñker wekaana nuna wainiui, tura ni áujmancha ántawai. Tura yajauchin túrana nuna nakitrawai. Tuma asamtai, shíir pujustaj tákunka tura tuke tsawant warastinian wakerana nu, péñker ímiastí, yajauch chichakajj tusa tura wáitruawajj tusa. Tunaanumiá kanaki péñkeran túratí. Tuke enentáíjjaj shíir átinian eakti.

Tu áarmaiti.

Itiurchat aijn péñker túratin

¹³ ¿Yaki yajauch túrutmat péñker turamnisha? ¹⁴ Túrasha péñker túrayatmek wáitiamkia Yus shíir enentáimtikramprattarme. Tuma asamtai ashamkartutsuk, sapijmiatsuk wekasatniuitrume. ¹⁵ Tura “Kristu winia Úntruiti” tu enentáimtustarum. Tura “¿urukamtia Yus-shuar ajasuitiam?” turamainiakuisha, péñker áimkiamnium iwiarnarum pujustarum. Waantu enentáimtumsuk, nin péñker enentáimtikrataj tusam túrata. ¹⁶ “Yúsajaj péñker wekasataj” tu enentáimsarum wekasatarum. Yus-shuar asakrumin chikich

shuar ántar áujmatramainia nu ni ántar áujmatramsamun nekaawar natsaararat tusarum Yusjaj péñker wekasatarum. ¹⁷ Yajauch túrakur wáitsatniujainkia nankaamas, Yus wakerakuinkia péñker túrakur wáitsatniuka ti peñkeraiti.

¹⁸ Kristu ii tunaarín asakártaj tusa jarutramkamiaji. Ashí asakárma asamtai atak tunaan jarukchatniuiti. Niisha tunaan péñké túrichuiat, ii tunáa asakrin wáitrutmasmiaji, Yúsnum ejetamtai tusa. Ayashiiinkia jakayat ni wakaníjjai ni ayashí ataksha iwiaaku ajasmiayi. ¹⁹ Ni wakaníjjai jakáa wakanin emetamu armia nuna etserkataj tusa wémiayi. ²⁰ Nusha yaunchu Nuai uunt kanun nájanuk sian̄tu painti (120) uwi pujurmia nū Yuska umirtukarat tusa ti nákamaitiat Nuai étserman umikcharmiayi. Nú kanunmasha ishichik, uchu, aents kanunam pujuinian yumíjjai uwemtikrarmiayi. ²¹ Nu yumi Yus-shuarti imiantinian nakumui. Ii ayashí chamir awajsatai tusar imiantsuji. Antsu ii enentáí péñker atí tusar Yus sear imianji. Nujaj iisha uwemji. Jesukrístu nantakin asamtai, nujaj uwempraitji. ²² Tura Niisha nayaimpiniam we akupin pujutainium Yusa untsuuríni apujsamuiti. Túramtai nayaimpinmaya suntarsha, tura ashí kakaram akupin áiniana nusha Jesukrístun umirainiawai.

4

Ju nunkanam wáitsatin

¹ Kristu ni ayashíin wáitsa asamtai atumsha núnisrumek wáitsatin ákuisha, katsuntratjai titiarum. Ni ayashíin wáitiana nú shuar yajauchin páchiatsui. ² Antsu “iwiaakjana nūkia Yusa wakeramurín tuke umirkatjai” tu enentáimiui. Ni ayashí wakerana nuna yamaikia páchiatsui. ³ Warí, Yúsán nékainiatsna nú shuar túruiniana nu atumsha núkap túrichmakuram. Yus-shuar ajatsuk tsanirmatin wakerimiarme. Yajauch túratniusha, nampernum nampekrum ti yurumárú, enentáincha ajasrum charaatum ajatniusha, ántar-yusa namperiin yajauch ana nu najanatniusha nusha ashí wakerimiarme. ⁴ Tura surimiatsuk yajauch túrimiarmena nu iniaisa asakrumin, yaunchu atumjai nuna túrin armia nu, “urukamtai iniaisara?” tusar yajauch áujmatramprume. ⁵ Túrasa ukunam nu aents ni túramurín etserkartatui. Iwiaaku ainia nunasha tura jákaru ainia nunasha Neka awai. Nii nu aentsun sumamtikiawartatui. ⁶ Túrasa jaka armia nu Yusa shiir chichame ujankarmiayi. Ni ayashíin ashí shuarjai métek jakamniaitiatan̄ Yus iwiaaku pujana núnisan̄ ni wakaníi iwiaaku pujusarat tusa ujankarmiayi.

Shuar yáintiniaitji

⁷ Ashí amuukatin jeatemayi. Tuma asamtai péñker enentáimsatarum; túrarum anearum Yus auju pujutarum. ⁸ Aneniamujaj untsurí tunaasha tsankuratin awai. Tuma asamtai ashí nankaamas nuamtak anenaistarum. ⁹ Kajé-kajejainchu atumí jeen itiaaniátarum. ¹⁰ In an̄kant an̄kant shiir awajtamsatniun Yus ti núkap takakui. Tura in shiir awajtamsamujaj chíkich shuarsha shiir awajsatarum tusa chíkich chíkich túratniun suramsaitji. Tuma asamtai péñker takaawa áintsarmek Yus amasmania nujaj ame írutramuram yaintá. ¹¹ Etserkatniun Yus amasuitkiuin̄kia ame tamena nu, Yus tana nujaj métek atí. Chíkich shuar yáintiniaitkiumka Yus amaana nú kakarmajaj túrata. Ashí túramna nu Yusa naari shiir atí tusam Jesukrístu náaríjjai túrata. Jesukrístun ashí aents shiir enentáimtusartí. Tura ashí áentsnum ni kakarmarij tuke atí. Nuna tajai.

Yus-shuarti wáitsatin

¹² Aneamu yatsurtiram, ti waitsatin nekapramsartin jeartampramna nu nusháa enentáimprairap. Wáitsatin támatai, “¿urukamtai waitsa pujaj?” tu enentáimsairap. Kame túrunamniaiti. ¹³ Tuma aṅ shiir enentáimsatarum. “Kristu wáitsamurṅ métek-taku wáitiakun péñkeraiti” tu enentáimsatarum. Ukunam Kristu wincharṅ wáinkiarum timiá warasmi tusarum túratarum. ¹⁴ Krístunu asakrumin katsekkramkachartimpiash. Túmaitkiuisha Yusa Wakanṅ shiir ana nu atumṅin pujurtamkui shiir awajsamuitrume. Katsekkramainia nú shuar imia Yusa Wakanṅin yajauch áujmatainiawai. Tura átumka Yusa Wakanṅ shiir awajearme. ¹⁵ Túra atumsha yajauch túrawairum aneartarum. Mankartana nu, kasamkana nu, tunáa túrana nu, tura chikichna páchiana nusha ni wáitsatniurṅkete. Atumjainṅkia nu wáitsatniuka atsutí. ¹⁶ Tura antsu Krístunuiti tusar wishikramuk wáitkiarmainiakui natsaṅairap. Krístunu asam wáitiayatmek, natsamtsuk Kristu naarṅ shiir awajsata.

¹⁷ Yuska ni shuarṅin nekapsatajtsa nanṅkamatniuiti. Tura nu tsawantcha jeayi. Yus imia in nekapramkuisha Yus-Chichaman umirainiatsna nú shuarsha urukawartṅ. Ti asutniáwartatui. ¹⁸ Imia Yus umirjinia nu uwempratniurṅ itiurchataitkiuisha tunaan túruiniana nusha urukawartṅ. ¹⁹ Tuma asamtai Yus wakeramujaj wáitiainia nu, niisha Yus najanamu asa Yus iirsatí tusa tuke péñker túratí. Warí, Yuska tuke péñker túrichukait.

5

Yus-shuara uuntri túratin

¹ Yamaikia Yus-shuara úuntriṅtiram, jintintjiarme. Wisha núnisnak Yus-shuara úuntriṅtjai. Kristu wáitsamurṅ wáinkiaitjai wisha. Tura ukunam ti shiir átatna nui chikich Yus-shuara uuntriṅa núnisnak wisha pachiinkiat-tajai. ² Yus-shuar ame ístiniaitmena nu, péñker iistá, murikiu wáinin ni murikrṅin wainnia áintsamek. Nakittsuk, shiir enentáimsam túrata, Yus wakerana nuke. “Chikich akupta asamtai túrattajai” tútsuk tura nujaj kuítrintin ajastin enentáimtsuk nekas wakeritia, Yusa takatrṅ asamtai. ³ Turasha, “Yús-shuara uuntriṅ ajasan, Yus-shuaran akuptiaj” tu enentáimsaip. Antsu shiir túramurmijaj Yusa murikrṅ jintintiata. ⁴ Nuiṅkia murikiu wainniu Uuntriṅ taa wantiniak iwiarmamtai tawasap ti shíirmachia núninian suramsattawai. Aents súana nú shíirmach wari mamurtiniaiti. Tura Úuntrum ámin suramsattana nuka penṅké mamurchattawai.

Yus-shuarti umirnaikiatin

⁵ Tura natsatirmesha atumí uuntriṅ umirkatarum. Kame yaunchu Yús-Papinium aarma asamtai ashí Yus-shuartiram nanṅkaamantu enentáimtumatsuk umirnaikiatarum.

Waantu enentáimtuma núnaka Yus nakittiawai. Antsu nanṅkaamantuchu enentáimtuma nuna Yus waitnentak yayawai. Tu aarmaiti.

⁶ Wats, Yus timiá kakaram asamtai, amek nekamam, péejchach enentáijjai enentáimtumasta. Nuiṅkia tsawant jeamtai ni wakerak Yus ámin penṅkerṅ awajtamsattawai. ⁷ Yus ámin ti enentáimturmakui ame itiurchatrum ainia nu Yus ashí iiktusta.

⁸ Aneartarum tura ímiastarum. Íwianch atumí nemasrṅ ana nu, uunt yawáa nuke, yanak emesraintiaj tusa eaṅk tentaa wekaawai. ⁹ Tura tuke Yus nekas enentáimtusrum surimiaktarum. Ashí nunṅkanam Yusnum atumí yachṅ ainia nu átum wáitiarmena núnisaraṅ wáitiainiawai. Nusha kajinmakchatniuitrume. ¹⁰ Wats, ishichik tsawant wáitsarmena nu nanṅkaasmatai Yus

ataksha pé_nker awajtamsattarme. Tura numi wewe wajana nú_nisa_n iki-akátmartatrume. Tura Yus ikiakárma asarum ni jinti_n tuke pé_nker wekasattarme. Ju Yus tuke in waitnentramtsujik. Tura iisha Jesukrí_stunu asakrin Nii_jia_i mé_tek Yus ni shiir pujutainium tuke shiir pujusmintrum tusa achirmakuitji. ¹¹ Nú Yúsnasha ashí aents shiir enentáimtusartí. Tura ashí áentsnum ni kakarmari_j tuke atí. Nuke ati.

Amíak áujmamsamu

¹² Serpanujai_j ju papin ishichik áarmaj nuna akupeajai. Serpanu Yusjai pé_nker wekaak Yusnum winia yatsur ajasuiti; nú_naka né_kajai. Yus waitnentrama asa ti yainmakmania nuna enentáimtikeajrume ju papijia_i. Tura tuke ni waitnenkartutairi_n wekasatarum tájarme.

¹³ Papirú_nianmaya_a atumjai_j mé_tek Yus achikma áinia nu amikmaatmarme. Winia uchir Markus nú_nisa_n amikmaatmawai.

¹⁴ Yusai_j yachi_j ajasu asarum anenaisrum shiir awajnaisatarum. Jesukrí_stunu ajasuitrumna nuna Yus imiatkinchanum pujustinian suramsarat tusan wakerajai.

Nu atí.

PÍTIUR Ataksha papin áarar akupkamu

Pitiur Yus-shuaran áatramiania nu

¹ Wikia ju papin aajna ju Semun Pítruitjai. Jesukrístu akatramu asan ni takarniurintjai. Ii Yusrj tura in Uwemtikramin Jesukrístu umirumna nuna atumniasha juna áatjarme. Niisha ashí áentsun métekrak enentáimtin asamtai atumsha iijjai métek Niiniu ajasurme. Nuka ti penkeraiti. ² Yus, tura ii Uuntri Jesussha nékarmena nú núkap nekaki wéakrumin, Yuska atumin ti nukap yáinmaktatrum tura ti nekas imiatkinchanum pujustinian suramsattarme. Nuna nekaan tuke núnisan atí tusan wakerajrume.

Yusaj páchitkia atin

³ Yus uunt asa tura ashí túramnia asa, umirtukat tusa achirmakuitji. Nii neka asar atsumajnia nu wáinkiaitji. Yus-shuarti wekasatniusha, tura Nin aneatniusha ii atsumajnia nuna Yuska kakaram asa suramsaitji. ⁴ Niisha uunt asa tura tujinkiachu asa ni chichamen suramsaitji. Nu chichamsha ti kakarmaiti tura ti penkeraiti. Nu chichamjai atumsha atumí ayashj yajauch wakerana nuyá uwemprarum, Yusaj páchitkia átinian suramsaitrume. ⁵ Yus umirkarme. Yamaikia juna túrataj tusarum kakartiniaitrum. Ti penker wekasatniuitrum. Nuyá Yusna nekaatniuitrum. ⁶ Nuyá yayauch túrashtin íimiastiniaitrum. Nuyá katsuntratniuitrum. Nuyá Yus shiir enentáimtusrum wekasatniuitrum. ⁷ Tura nuyá ashí shuar shiir enentáimtustiniaitrum. Tura nu nankaamas ashí shuar aneatniuitrum.

⁸ Ashí nu túrakrumka, tura tuke túrukum wéakrumka, nakiarchattarme. Túrarum ni takatri émamkesrum takastatrum. Tura ii Uuntri Jesukrístu nekas nekaattarme. ⁹ Tura nuna túruiniatsna nuka, kusurua áanin áiniawai. Jesukrístu wakeramurj enentáimtuiniatsui. Ni tunaariya uwemprarmia nuna kajinmatainiawai. ¹⁰ Tuma asamtai yatsurtiram, Yus atumin anaitiamak achirmakurmena nu tuke enentáimsarum wetarum. Túrakrumka penké iniar-chattarme. ¹¹ Tura ii Uuntri Jesukrístu uwemtikramprajnia nu, Nii tuke akupeana nui, nakittsuk shiir awaintiamattarme.

¹² Tuma asamtai nékarminiñ tura Yusna nekas ana nuyá kanaatsrumniñ tuke enentáimtikratjarme. ¹³⁻¹⁴ Nekaatarum. Winia jákatniurun jeatema nuna ii Uuntri Jesukrístu ujakmayi. Tuma asamtai iwiaaku pujajna juik atumin tuke enentáimpratarum tusan jintinratniuitjarme, tu enentáimsajai. ¹⁵ Tura wi jakamtai, wi aajna juna tuke kajinmatkiirum tusan, wi jeajna nuna túrattajai.

Kristu waantu ajasun wáinkiamia nu

¹⁶ Ii Uuntri Jesukrístu kakarmari tura ni táratniuri etserkamajnia nu, aya áentsnumia ántar chichamchauyi. Antsu imia ii jiiijai Uunt Jesukrístu waantu ajasu wáinkia asar ujakmajrume. ¹⁷ Tura Apa Yus Jesukrístun shiir waantu awajsamia nui, ni imiá shiir pujutairiya chichaak tímiayi, “Juka winia ti aneamur Uchiruiti. Nin ti wararjai.” ¹⁸ Iisha naint “Yusna” tájnia nui Niiijai pujá asar nu nayaimpinmaya chichaamu paant antukmaji.

¹⁹ Tura nuna nankaamas ti nekasa nu, Yúsnan etserin yaunchu etserkarmia nusha nékaji. Ju étserma jusha, tsawant tsawaatsain kiritniunam ji keak tsáapin awajeana áintsan asamtai, pénger enentáimta asarum pénger túrarme. Tura Kristu taa, yánkuam etsantea núnisan atumí enentáin ashí paant awajsattawai. Tura nu tsawant jeatsain nu étserma tuke

pénker enentáimtustarum. ²⁰ Tura ju emka nekaatarum. Shuar aya ni enentáimmiarijiaín, Yusa Wakanjiaínchu, Yus-Chicham urukamtai tu chicháa nuna nekaatniun jeatsui. ²¹ Warí, Yúsnan etserin yaunchu etserkarmia nu, aya ni wakeramurijiaín tícharmiayi. Nu áishman kan enentáin Yus pujursarmiayi. Tuma asa ni tiarmia nuna Yusa Wakanj jintintiam tiarmiayi.

2

Wait chichaman unuiniainia nu (Jútas 4-13)

¹ Tura Israer-shuarnum wait chichaman etserniusha páchitkiarmiayi. Atumiincha wait chichaman unuinau páchitkia ártatui. Niisha awajimtikrampratniun wakeruiniak wáitian ti yajauchin uúkar unuiniartatui. Tura “Uunt Jesus uwemtikrurmia nusha ántrai” tiartatui. Nuna takui ni amuukatniurisha wárik jeartiatui. ² Tura untsurí shuar ni yajauch túruiniamurín írsar métek túrawartatui. Iis, “Yus-Chichaman unuinaítjai” tuíniayatan imiá yajauch túruiniakui untsurí aents “Yus-Chicham ántrai” tiartatui. ³ Kuítian ti wakeruina ásar, wait chichaman unuitiamprar akiam kuítriniawartatui. Tura nú shuar yaunchu Yus jákatniunam sumamtiki-awarma ásar, ni amuukatin tsawantri jeatemayi. ⁴ ¿Warí? Yuska ni suntari nayaimpiniam pujuarmia nunasha penké tsankurachmiayi. Antsu nayaimpinmaya jinium akupkarmiayi. Tura nekapsatin tsawant jeatsain kiritniunam jinkiamu emetamu pujuiniawai. ⁵ Yáunchuya shuarnasha Yus tsankurachmiayi. Antsu amuukarat tusa amaarkatniun akuptukarmiayi. Antsu aya Nuain, Yusjai wekasatniun etserin asamtai ni shuari siati armia nujai uwemtikramiayi. ⁶ Enentáimpratarum. Sutuma pépruncha tura Kumura pépruncha nayaimpinmaya jin akuptuk Yus mash amukmiayi. Aya yúnkunmik awajsamiayi. Ukunam nu túrunamun nekaawar, shuar tunáa túratin tsúumainian nekaawarat tusa túramiayi. ⁷ Tura Yus Ráutan uwemtikramiayi. Pénker shuar asa, Sutumanmaya shuar imiá yajauch ásar tunáa túruiniakui, Raut kúntuts enentáimsamiayi. ⁸ Pénker áishman asa, nuyá shuara yajauchirín wáitianiak, ni enentái pénker asamtai tuke tsawant kúntuts enentáimiuk wáitmiayi. ⁹ Tura incha tunaan iniakturmakin, nu tunaanum nupetnakchati tusa Uunt Yus uwemtikrampramniaitji, ni umirka asakrin. Túrasha yajauch shuárnaka nekapsatin tsawant jeakui ti asutniáwarat tusa Yus yámaikikia apujeawai.

¹⁰ Tura Yus akupeana nuna umirkatniun nakitrar ni yajauch wakera-murín túruinia nunasha Yuska nekas asutiáttawai. Enentáimcha áiniawai. Tura ni wakeramuriniak wakeruiniawai. Nijjai nankaamas akupin ainia nuna yajauch áujmatainiawai. ¹¹ Warí, imia Yusa suntari Yusai matsatainia nu, nuna túratniun tsúumainiawai. Nankaamas kakaram tura nankaamas uunt áiniayat nu akupniun katsekainiatsui.

¹² Nu áishmansha enentáincha yajasma núnin áiniawai. Achikiar mantamnatniuk akiinia áiniawai. Enentáimtsuk nánkamsar yajauchin chichainiawai. Tuma ásar yajasma núnisañ jákartatui. ¹³ Chikichan wáitkiamia áintsañ wáitsartatui. Tuke tsawant ni wakeramunak túruiniak “waraajai” tuiniawai. Tura atumjai irunar yurumáiniayatan atumin anankramawar warainiawai. Nuka natsantaiti.

¹⁴ Nuwan wakerutskeka íniatsui. Tunaan yawetainiatsui. Yúpichuch ainia nú shuaran netse túratniun wakerumtikiainiawai. Kuítian wakeruktinniasha ti nékainiawai. Jákatniunam sumamawaru áiniawai. ¹⁵ Yúsnumaaní naka wétsuk

awajirarai. Peura uchirí Paraam Yúsnan etserniuitiat yaunchu awajimia núnisan awajiniawai ju shuar. Paraamka tunaan tura, kuítian achiktinian ti wakerukmiayi. ¹⁶ Tura niisha tunáa túratajtsa weaj Yuska umpuurun chichachun aents chichaana nujaj métek chichamtikiamiayi. Nuinkia umpuuru timia nujaj Yúsnan etserin ni netse túratniurín enentáimiar iniaisamiayi.

¹⁷ Nu áishmansha yumirmat kuyua núnis áiniawai. Tura núnisan yuranmisha kíariat nase umpuim menkaana nu, yumi ajuarcha ásar, penké ántar áiniawai. Warí, Yus-Chichamjaj áentsun yainiainiatsui. Niisha imiá kirit ámanum tuke pujustin áiniawai. ¹⁸ Niisha ti chichainiyat ántar chichainiawai. Yajauch túratniujaj tura ayash wakera nújajsha páchim túriarmia nuyá kanakiarua nú shuaran ataksha tunaanum ajuartajtsa wakeruiniawai. ¹⁹ “Iiya núnis túrakrumka ankant átratume” tu wénawai. Túrasha imia niniki ni tunaariin emetamu áiniawai. Páantchakait. Shuar warí tunaajaim nupetnaka, nuna emetamurinti. ²⁰ Kame shuar, uunt Jesukrístu uwemtikiartin ana nuna chichamen nékainiak ju nunkanam yajauch ainia nuyá uwempra ainia nu, tunáa nupetkam atak yajauchiniam iniainiakka, nuik pujumia nújainkia nankaamas yamá imiá yajauch pujuiniawai. ²¹ Yusa akupkamurín imiá pénkera nuna Yus nú shuarnasha súarmiayi. Túrasha nékainiyat tunaanum waketiari ásar ti asutniáwartatui. Tuma asamtai, nekas jintia nekaachuitkiunka maak árainti. ²² Tíchamukait, “yawá iyak ataksha yúawai,” tura, “kuchisha imiainiuitiat ataksha tsakusnum maajkimiui.” Nu áishmansha núnisan yajauchiniam ataksha wáketainiawai.

3

Uunta tátintri

¹ Aneamu yatsurtiram ju papin jimiará áatjarne. Mai papinium winia jintintiamurjaj atumí chamir enentáin enentáimtikratjarum tusan wakerajrume. ² Yúsnan etserin, pénger wekain armia nuna etserkamurí enentáimturum. Tura ii Uuntri akupkamurín ni akatramuríjjaj ujatmakarmia nusha enentáimpratarum. Jesukrístu uwentikrampramaj nuna chichamen tajai.

³ Jusha emka nekaatarum. Amuamu tsawantin Yúsnan wishikin wantinkiartatui. Tura niisha ni yajauch wakeramurín túrusar wekasartatui. ⁴ Tura juna tiartatui. “¿Krístuka “wi atak tátatjai” timia nusha urukuit? Warí, ii uuntri yaunchu kajinkiarmlia nuyá yapajíáchmaiti. Yus yaunchu ju nunkan najanamia nuyá yamaisha tuke núniskete” tiartatui. ⁵ Túrasha nunkancha nayaimpincha Yus yaunchu najanamia nuna nekaatniun nakitiainiawai. Yusa chichamejjaj nunka entsaya jinkimiayi tura nunkasha entsá nanatrawai, Yus timia nujaj métek. ⁶ Tura ukunam nu nunkan amaarkamujaj Yus emesramiayi. Ashí nuna nekaatniun nakitiainiawai. ⁷ Tura Yus tiniu asamtai nayaimpisha nunkasha yamáiya nuka jijjaj emesnarat tusa ikiusma áiniawai. Yus áentsun nekapsattana nu tsawantaj yajauch aents emesnartatui; tura jisha nu tsawantaj nunkancha nayaimpincha áesattawai.

⁸ Tura jusha, aneamu yatsurtiram, enentáimsatarum. Uunt Krístujainkia chikichík tsawant mir uwiya núniskete; mir uwisha chikichík tsawanta núniskete. ⁹ Uunt Kristu, “atak tátatjai” tana nuna umitsuk menkakashtatui. Áyatik áentsti “wau taatsui” taji. ¿Urukamtai wau taatsua? In áentstin nákarmaji. Shuar chikichíkisha menkakain tusa nakitiawai. Antsu ashí shuar enentáin yapajíáwarat tusa wakerawai. ¹⁰ Túrasha Uunta tsawantri aya aneachma jeattawai. Kasa aya aneachma kiritniunam taana núnisan tátatui. Nu

tsawantin nayaimpisha ipiamta núnis charáa timiatai menkakattawai. Tura nu*j* ashí írunna núur*t*iuk esaawartatui. Tura nun*k*asha tura ashí írunna nusha esaawartatui.

¹¹ Ashí nu emesnartin neka asarum atumsha imiá nekas Yus tuke enentáimtusrum, takamtsuk umirkarum wekasatniuitrume. ¹² Yusa tsawantri wárik tati tusar, jintiá ímprusar nákastiniaitji. Nu tsawantaj nayaimpisha esáa emesnartatui, tura ashí írunna núur*t*iuk ti tsuer ajas entsamnattawai. ¹³ Tura iikia yamaram nayaimpisha, yamaram nun*k*asha ati tusar ná*k*aji. Nu átatui, tímiayi Yus. Tura nu*u*sha aya p*e*nkerak átatui.

¹⁴ Nu tuma asantai, aneamu yatsurtiram, ju túrunati tusarum ná*k*armena nu*j*, imiatkinchanum wekasam chamir enentáim*j*ai makuuchmin Yus wáitkiati tusarum wekasatarum. ¹⁵ Ju nekaatarum. In uwentikramprataj tusa Yus ti ná*k*armaji. Ii aneamu yachi Páprusha núnisa*n* Yus ni nekatair*n* susamia tímiatrusa*n* áatramprarmeme. ¹⁶ Ashí papí aarmia nu*j* Pápruka wi tajana nuna chichaawai. Kame ni áarmari chíkichka ishichik nekaachminiusha áiniawai. Nékachu ainia nú shuarsha, tura Yúsnum tariarcha ainia nusha Papru áarman yapaj*i*áwar nusháa jintintiainiawai. Tura chíkich chichamsha Yus-Chichamnumi*a* ana nuna núnisa*n* túruiniawai. Túmainiakka ni*n*ki emesmamainiawai.

¹⁷ Wátsek, aneamu yatsurtiram, túruntsa*n* ujakjarmena nu neka asarum, yajauch shuar ana*n*kramattsa wakerutmainiak awajimtikrur*a*n tusarum, tura Yusai tariarurmena nuyá iniar*a*j tusarum anearum wekasatarum.

¹⁸ Tura ii Uuntri Jesukrístu in Uwentikkiartin ana nu, yamáí nékarmena nú na*n*kaamas nekaatarum. Tura enentáimin nú na*n*kaamas tariarum wetarum. Yamaisha tura tuke, ii Uuntri Jesukristu náar*n* uunt awájsartí. Nu atí.

JUAN

Emka papin árar akupkamu

Tuke iwaaku átinia nérentin Chicham ana nu

¹ Ashí nan̄kamamia nú yaunchu Yusa Uchir̄i tuke pujuuyayi. Nusha iisha anturkaitji. Nekas ii j̄ij̄iāi wáinkiaitji. Wáinkiarsha ii uwejējāisha ant̄ink̄iuitji. Niisha Yús̄an ti paant awajeak̄u, Chícham tíminiaiti. Tura tuke iwiaaku átinia nérennuiti. Nuna áateajrume. ² Iwiaaku átinia nérenniusha paant nekanamiayi, nusha Jesukristuiti. Iisha Nii wáinkia asar nu étsereaji. Tura tuke iwiaaku átinia nérenniur̄i asa tuke Yus Apajāi pujuyayi. Tura yamaikia īini paant ajatram-sakrin atumniasha ujaajrume. ³ Ii Yus Apajāisha ni Uchir̄i Jesukristujāisha tsan̄inkiar nekas chikichík ajaji. Tura atumsha núnisrumek īij̄iāi chikichík ajasuk tusar wáinkiamajnia nuna anturkamajnia nunasha ujaajrume. ⁴ Ti shiir warastarum tusan j̄una áatjarme.

Yus tsáapniniaiti

⁵ Yus imiá tsáapnin asamtai kiritin N̄iinkia pen̄ké atsawai. Nu chichaman Jesukristu in unuitiamprakrin nuna atumniasha ujaajrume. ⁶ “Niij̄iāi tsan̄inkia pujaji” táyatar kiritniunam pujustinia áintsar tunaanum pujakrikia wáitraji tura nekas pen̄ker ana nu túratsji. ⁷ Yuska tuke tsáapninium pujuwiti. Iisha núnisrik tuke tsáapninium pujakrikia nuámtak nawamnaikiar pujuiniaji. Túrakrin Yus ni Uchir̄i Jesukristu numpéj̄iāi ashí ii tunaar̄i japirtamji.

⁸ “Wi tunaan túrichuitjai” tákurkia ímia iik anan̄mamaji. Nekas ana nu nékatsji. ⁹ Antsu ii tunáar̄i Yus paant ujakrinkia Yuska tsan̄kurtamprattaji. Tura ii tunaar̄in asakátramprattaji. Yuska ti pen̄ker asa Nii tana nuna tímiatrusan̄ umikmin asa túrattawai. ¹⁰ Kame “Tunaan túrichuitjai” tákurkia nuj̄iāi “Yus wáitriiniaiti” taji. Ni chichamesha ii enentáin pujurtamtsuji.

2

Jesukristu in Yús̄an áujturmaidji

¹ Yus-shuartiram, tunaanum iniaar̄airum tusan j̄u papí áateajrume. Túrasha Yus-shuar tunáa túramt̄ain̄kia Apa Yusan ii áujturmau awai. Nuka Jesukristuiti. Niisha ti pen̄keraiti. Niisha Yús̄an áujturmakui Yusj̄iāi ataksha iwiaarar pujustatji. ² Jesukristu ii tunaar̄in asakártaj tusa jarutramkamiaji. Túrasha aya íiniunkechu antsu ashí shuara tunaar̄in asakártaj tusa jarukmiayi.

³ Yus tana nu umirkurkia nuikia Yus nekas nékaitji. ⁴ Tura shuar “Yús̄an nékaitjai” tayat Yus tana nuna umirchakka wáitrawai. Nekasa nuka ni enentáin atsawai. ⁵ Antsu shuar Yus tana nuna umireakka Yús̄an ti shiir aneawai. Túrakur Niij̄iāi tsan̄inkiar pujamu nékaji. ⁶ “Yusj̄iāi tsan̄inkia wekaajai” tana nú shuar Jesukristu wekasamia núnisan̄ wekasatniuiti.

Yamaram akupkamu

⁷ Yatsuru, yamaram akupkamun áattsujrume. Áyatik yámankamtaiknumīa antukmiarum nunak tájarme. Ashí atumin jintintiamu yaunchu akupkamuiti. ⁸ Túmaitiat nekas yamarma áitkiasnak áateajrume. Nu akupkamun Kristusha nekas iniakmasmai. Atum̄īincha nu akupkamu nekas paant awajsamuiti. Nuj̄iāi kiritin men̄kaatemka asamtai tura nekas tsaapn̄inkia paant tsaapnir-tasa pujakui nu akupkamun ataksháa aateajrume.

⁹ Shuar “tsáapninium pujajai” táyat chíkich Yus-shuaran nakitiakka tuke kiritniunam wekaawai. ¹⁰ Yus-shuaran aneana nu nekas tsáapninium pujawai. Niisha iniaatsuk chikichnasha tunaanum ajuarchamniaiti. ¹¹ Tura shuar chíkich Yus-shuaran nakitiakka kiritniunam tuke wekaawai. Tura kiritniunam iimiu asa itiuraani wea nuna nékatsui.

¹² Uchitirmincha, Jesukrístu jakamujai atumí tunaari tsankurnaru asakrumin juna áateajrume. ¹³ Úuntirmincha yámankamtaiknumiá tuke pujuuya nu nekáa asakrumin juna áateajrume. Úunmarutirmincha uunt iwianch nupetka asakrumin juna áateajrume.

Uchitirmincha, Yus Apa nekáa asakrumin áateajrume. ¹⁴ Úuntirmincha yámankamtaiknumiá tuke pujuuya nu nekáa asakrumin juna áatjarne. Úunmarutirmincha atumí enentáijjai Yus-Chicham umirkarum kakaram asarum íwianch nupetka asakrumin juna áatjarne.

¹⁵⁻¹⁷ Aya áentsnumiá ana nu yakiyanchuiti. Apa Yus súsachuiti. ¿Warimpiait nu? Júiti: ame ayashim wakerana nusha, ame ísam takustaj támena nusha, tura nankaamantu ajastin. Nuka ju nunkanmaya áiniawai. Shuar aya nunak wakerak Yúsnaka aneatsui. Kame ju nunkasha amuukattawai. Ashí nu wakeruktincha ti nekas amuukattawai. Túrasha shuar Yusa wakera-murin umiana nu tuke iwiaaku pujustatui Yusjai. Nu asamtai atumsha ju nunkanam ana nu pachikiairap. Tura aya juyá ana nu aya tákustin enentáimsáip.

Nekas chicham tura wait chicham

¹⁸ Uchirú, amuukatin tsawant jeatemayi. Atumsha Kristu nemasri tátin antukuitrume. Yamaikia untsurí Kristu nemasri wantinkarmatai amuukatin tsawant jeatemayi. ¹⁹ Nusha ii weeak ármayi. Túmaitiat nekas Yus-shuar ácharmayi. Nekas Yus-shuar ániakka tuke iijjai irunar pujuaraayi. Tura jíinkarmatai nekas Yus-shuarcha ainia nu paant nekanamniaiti.

²⁰ Antsu atumniaka Yusa Shiir Wakanin Kristu suramsantai ashí paant nékarme. ²¹ Nékachuitrume tu enentáimkiun áattsujrume. Antsu nekas chicham ana nu neka asakrumin paant áatjarne. Wáit-chichamsha nekas-chichamsha penké nushaachuk ainia.

²² Wáitrin júiti: Jesusan “Yus anaikiamuka Krístuchuiti” tana núiti. Núiti nekas Kristu nemasri. Yus Apancha ni Uchirincha nakitia asa Kristu nemasrinti. ²³ Yusa Uchirin nakitiainia nu Yus Apajaisha tsanin pujatsui. Tura Yusa Uchirin shiir awajea nu, Yus Apajaisha tsanin pujawai.

²⁴ Yámankamtaiknumiá antukmiarum nu atumí enentáin pujurtamsati. Nu túrakrum atumsha Yusa Uchirijjaisha Yus Apajaisha tuke tsaninkrum pujustatrume. ²⁵ Jesukrístusha Niiijjai tuke iwiaaku pujustinian tsankatramkaitji.

²⁶ Anañkartin írunkui juna áatjarne. ²⁷ Atumniasha Jesukrístu Yusa Shiir Wakanin suramsakrumin, nu Wakan tuke pujurtamkurmin shuar jintintramatín atsumatsrume. Antsu Yusa Wakaní ashí jintintramprume. Ni jintintrammasha imiá nekas asa wáitchaiti. Tuma asamtai Nii jintintramna áintsarum Krístujai tuke tsaninkrum pujustarum.

²⁸ Yamaikia, uchiru, Krístujai tuke tsaninkrum wekasatarum. Nu túrakrikia Nii támatai natsamtsuk ti shiir inkiunaiktatji. ²⁹ Atumsha Jesukrístu ti penkera nu nékarme. Núnisañ ashí shuar penkeran túruinia nuka Yusa uchirí áiniawai. Nusha nekaatarum.

3

Yusa uchirí áiniana nu

¹ Maa, shiir enentáimpratarum. Yus Apa ti anenma asa “winia uchir” tu anaitiamkaitji. Kame nekas ni uchirintji. Tuma asakrin jú nunkanmaya Yús-shuaracha nekarmainiatsji. Kame Yúsnasha nékainiatsui. ² Aneamu yatsurtirmea, júna tájarme: nekas Yusa uchirí ajasuitji. Kame ukunam urukuk átaji nusha nékatsji. Túrasha jú paant nékaji: Jesukrístu támatai imia Nii paant wáinkiar Niijjai métek ajastatji. ³ Tura shuar shiir enentáijjai nuna nákakka imia niniki shiir awajmamui Jesukrístujai métek shiir atajai tusa.

⁴ Shuar tunáa túrakka Yus akupkamu umirkachuiti. Kame núiti tunaaka Yus akupkamu umirkashtin. ⁵ Jesukrístu ii tunaari asakártaj tusa jú nunkanam támia nu nékarme. Tura Niñkia tunaan túrichuyayi. ⁶ Tuma asamtai shuar Niijjai tsanin wekáa nuka tunaanum wekaatsui. Antsu shuar tunaanum wekaakka nu shuar Krístun wáinchaiti, núnisan nékachuiti. ⁷ Uchiru, shuar anankramawairap. Péñker túrinkia Kristu ti penker asamtai niisha péñkeraiti. ⁸ Antsu shuar tunaanum wekaana nu iwianchnaiti íwianch tuke tunaan túrin asamtai. Yusa Uchirí jú nunkanam táwiti ashí íwianch túramun emesrataj tusa.

⁹ Shuar nekas Yusjai akiinia nu tunaanum wekaatsui. Yusa uchirí asa Yusa iwiaakmarijjai wekaawai. Tuma asa tunaanum tuke wekaatsui. ¹⁰ Shuar péñker túratsna nuka tura Yus-shuaran kajera nuka Yus-shuarhaiti. Nujai Yusa uchirí ainia nusha tura iwianchi uchirí ainia nusha paant nekaamni-aiti.

Mai anenai ajatin

¹¹ Atumsha yámankamtaikniumia chicham antukmiarum nu júiti: mai anenai ajartin. ¹² Iisha Kaínkia áanin áchatnuiitji. Íwianch-shuar asa ni yachin máamiayi. Tura ¿urukamtai maamia? Enentaimprata. Nii yajauch asa tura ni yachi péñker asamtai máamiayi.

¹³ Yatsurtiram, jú nunkanmaya shuar nakitramainiakui ti enentáimsairap. ¹⁴ Iikia jákatniummaya uwempra asar nekas iwiaaku pujaji. Túmakur Yus-shuar ainia nu aneaji. Nujai yamaram iwiaakma takakjinia nu imiá páantaiti. Shuar Yus-shuaran aneachkunka tuke jákatniumam wekaawai. ¹⁵ Shuar Yus-shuaran nakitiakka mankartinia núnisaiti. Tura mankartinkia tuke amuicha iwiaakmanum pujuiniatsui. Nuka nékaji. ¹⁶ Jesukrístu in jarutramka asakrin nujai nekas in anenmaj nu nékaji. Iisha núnisrik Yus-shuar ainia nu ti aneakur ni yaintai tusar jarukmin átiniaitji. ¹⁷ Túrasha shuar chíkich Yus-shuar atsumana nuna takakiat waitnentachkunka nekas ni enentáijjai Yúsan aneawash. ¹⁸ Uchiru, aya chíchamjain anenain áchatnuiitji antsu nekas aneniakur péñker túrar yáiniaiktiniaitji.

Yusaj natsamtsuk jeamniaitji

¹⁹ Jujai ii Yúsai sapijmiatsuk jeatniusha tura nekas Yus-shuaraitji nu nekaatniusha nekapmampramniaitji. ²⁰ Ii enentái yajauch túramun enentáimtikramkurnisha Yus iijjai nankaamas ashí mash nékatsuk. ²¹ Tura, aneamu yatsurtiram, ii enentái yajauch túramun enentáimtikramchakrinkia Yúsai sapijmiatsuk jeamniaitji. ²² Tura ni wakeramu túrakrikia tura ni chichamesha umiru asakrin ashí ii seaj nuna suramsattaji. ²³ Júiti Yus akupkamu: ni Uchirí Jesukrístu nekas enentáimtustin tura Kristu timia áintsarik shuartisha mai anenai ajartin. ²⁴ Shuar ni chichamen umía nuka Yusjai tsanin wekaawai tura Yus niijjai tsanin wekaawai. Mai chikichik ajasu ániawai. Tura Yusa Wakaní ii enentáin pujá asamtai nujai Yus iijjai tsanin wekaana nu nékaji.

4

Yusa Wakanisha tura Kristu nemasri wancha

¹ Aneamu yatsuru, untsurí shuar wáitruiniak “wi Yúsnan etserniuitjai” tuiniawai. Tuma asamtai ashí shuar “wi Yusa Wakanin takakkun chichajai” tuinia nu péñker nekapsuk enentámtusairap. Antsu ísrum nekas Yusa Wakanimpiashit tura chíkich wakaniashit nu nekaatarum. ² Jujai nekasarum ya nekas Yusa Wakanin takaka nu nekaattarme: Shuar “Jesus Yusa Uchiri Krístuítat nekas aents ajas ayashimkiamiayi” tana nu Yusa Wakanin nekas takakui. ³ Tura Jesusan tu enentámtatsna nuka Yusa Wakanin takakt-sui antsu Kristu nemasri wakanin takakui. Kame Kristu nemasri wakanin tatin tama ántichukaitrum. Nu wakan yamaikia ju nunkanam táwiti.

⁴ Uchiru, átumka Yusna asarum Yus atumí enentáin pujawai. Tura ju nunkanmaya shuara enentáin íwianch pujawai. Atumiin pujana nuka niijjai nankaamas kakaram asamtai wáittrin ainia nu nupetkaitrume. ⁵ Niisha ju nunkanmaya ásar aya ju nunkanmayan áujmatainiawai. Túmainiakui ju nunkanmaya shuar ti penker anturainiawai. ⁶ Antsu iikia Yúsnaitji. Tuma asakrin Yusan nékainia nu anturtamainiaji. Tura Yúsnachu ainia nu anturta-mainiatsji. Nujai nekas Wakanin takakusha tura wáittrin wakanin takakusha nekaamniaiti.

Yus tuke anenkratniuiti

⁷ Aneamu yatsuru, anenaitin Yúsnumia asamtai mai anenai ajartai. Shuar anenkratniua nuka Yusa uchiri asa Yúsnancha nékawai. ⁸ Shuar anenkratcha nuka Yúsnanka nékatsui. Kame Yuska tuke anenkratniuiti. ⁹ Tuma asa ni Uchiri chikichkiniak ju nunkanam akupturmakmiaji. Iisha ni túrunamujai nekas iwiaaku pujaji. Nujai Yus in yáinmak ni anenkrattain paant iniaktur-masmiaji. ¹⁰ Jujai nekas anenkrattainkia paant nekanamniaiti: ii Yus aneaj núchaiti. Antsu ii ti tunáa árinin Nii aneachmaitiatan Yuska ti anenma asa ni Uchirin ii tunaarin asakarat tusa akupturmakmiaj nujai nekas nekanam-naiti.

¹¹ Aneamu yatsuru, Yus núnis anenma asakrin iisha núnisrik mai anenai ajartai. ¹² Chikichkisha Yusan wáinkiachuiti. Túmaitiat mai anenai ajakrikia Yus ii enentáin pujurtamkui Niijjai métek anenkratin ajaji. ¹³ Yus ni Wakanin suramsa asakrin Yus iijjai tsanin wekaana nusha tura ii Niijjai tsaninkia wekaajnia nusha, nujai nékaji. ¹⁴ Yus Apa ni Uchirin ashí shuaran uwemtikrarat tusa ju nunkanam akupkama nu wáinkia asarí étsereaji. ¹⁵ “Jesus Yusa Uchirinti” tana nu shuarjai Yus tsanin wekaawai tura niisha Yusjai tsanin wekaawai. Mai chikichik ajasu ániawai.

¹⁶ Yus in anenmajnia nu ti nekas nékaji. Yus tuke anenkratniuiti. Tuma asamtai shuar anenkartakka Yusjai tsanin wekaawai tura Yusha niijjai tsanin wekaawai. Mai chikichik ajasu ániawai. ¹⁷ Núnisar ti penker anenkartin ajaji. Túrarí súmamtikiatin tsawantai natsamtsuk wajastatji. Kame ju nunkanam pujayatrik Jesukrístujai méteketji. ¹⁸ Nekas anenaiyamunam sápij atsawai. Antsu nekas anenaiyamunam sápij menkaawai. Aya asu-tiátin akui sapijmiaktinaiti. Tuma asamtai ántar sapijmiana nu nekas anenkratchaiti.

¹⁹ Yus emka in anenma asakrin iisha Nii aneaji. ²⁰ Tura shuar “wi Yusan aneajai” táyat chíkich Yus-shuaran nakitiakka nuka wáittrinaiti. Kame Yus-shuaran tuke wainnia nuna aneachkunka ¿itiurak Yusan wáinchasha aneat? ²¹ Yus incha juna turammiaji: Yusan anea nu shuar chíkich Yus-shuarnasha aneatniuiti.

5

Ju nunkanmaya írunna nu núpeteaji

¹ Ashí “Jesus Yusa Uchirí Krístuítí” tu enentáimtana nú shuar Yusa uchirínti. Tura aparí aneakrikia ní uchirísha aneattaji. ² Yus Apa aneakur tura Nii wakera nu umirkur Yusa uchirísha ashí aneattaji. ³⁻⁴ Yus aneakur Nii tana nu umiktatji. Ashí Yusa uchiríya nu Yúsan nekas enentáimta asa, ashí ju nunkanmaya írunna nuna núpeteawai. Nu asamtai Yus tana nu umirkatín itíurchatchaiti. ⁵ Aya “Jesus Yusa Uchirínti” tu enentáimtana nú shuar ju nunkanmaya ana nuna awakkamniaiti.

Jesukrístu “Yusa Uchirínti” tu etserainia nu

⁶ Jesukrístu jú nunkanam taa entsajají imiankui Yus nayaimpinmaya chichaak “Juka winia aneamu Uchirúiti” tímiayi. Tura nuyá Jesus jakamtai ní numpé puarmiayi. Entsajají imianin ní takatrín nankamamiayi túrasha in jarutramak ní takatrín amukmiayi ju nunkanam. Chikichkinkia túrutsuk mai metek túra asamtai Yusa Uchiríya nu paant nekanamniaiti. Yusa Wakanísha tuke nekas tiniua nu métek tawai. ⁷⁻⁸ Nu asamtai menaint “Yusa Uchirínti” Jesusan tuiniawai: Nayaimpiniam Yus Apa tura Jesukrístu, Chícham aa nu, tura Yus Wakancha; nunkanmasha Yus Wakancha, entsasha tura numpasha. Mash métekrak tuiniawai. ⁹ Aents étserainiakui ántureaji. Nuna nankaamas Yus ní Uchirín tana nu nekas anturkatniuitji. ¹⁰ Yusa Uchirín enentáimtana nú shuar ní enentáincha nékawai. Antsu Yus ní Uchirín timian enentáimtatsna nú shuar Yúsan enentáimtachu asa Yúsan “wáitriniaiti” tawai. ¹¹ Yus ní Uchirín timia júiti: Tuke iwiaaku pujutai nérenniuiti tura nu iwiaakmancha in suramsaitji. ¹² Yusa Uchiríjjají tsanín wekaana nú shuar, nu iwiaakmajají iwiaaku pujuiniawai. Tura Yusa Uchiríjjají tsanín wekaatsna nú shuar, nu iwiaaku átinnium pujatsui.

Amuak Yus nekas enentáimtustinian áarmiania nu

¹³ Yusa Uchirí nekas enentáimtakrum tuke amuicha iwiaakmajají iwiaaku pujarme. Nu nekaatarum tusan júna áatjarne.

¹⁴⁻¹⁵ Yus wakeramujají métek seakrinkia anturtamji. Tura anturtamkurin ii seamaj nu nekas takusua nu enentáimpramniaitji. Nu neka asar Yus ti shiir enentáimtají.

¹⁶ Tunáa awai jákatniunam júana nu. Shuar nu tunaan túramtainkia Yus áujtustin ántrai. Tura shuar chíkich tunaan túrakuinkia nuka nekas Yus áujtustiniaiti. Nekas jákatniunam júatsna nú tunaan túraitkiuinkia iwiaaku átinian Yus susattawai. ¹⁷ Ashí yajauchⁱ ana nuka tunaiti. Tura jákatniunam júatsna nú tunaasha awai.

¹⁸ Nekas Yusjají akiinia nú shuar tunaanum tuke wekaatsui. Antsu Yusa Uchirí nin ti penker wainkiui íwianch antínkiachminiaiti.

¹⁹ Iikia nekas Yúsnaítji tura ashí ju nunkanmaya shuar iwianchnia áiniawai. ²⁰ Yusa Uchirí ju nunkanam taa nekas-Yus aa nuna paant jintinramji. Yusa Uchirí Jesukrístujají tsanínkia wekaakur nekas-Yusa nujajísha tsanínkiar wekaaji. Nekas-Yus asa tuke iwiaaku átinia nuna nérenniuiti. ²¹ Uchirú, ántar-yus írunna nuú pachíinkiairap. Antsu nujají aneartarum.

Nuke atí.

JUAN

Ataksha papin aar akupkamu

Nekasa nunasha tura anenaitniuncha ujaawai

¹ Wi Juan Yus-shuara uuntri asan ii umai Yus achikma nuna tura ni uchirincha ju papin áateajai. Wisha nekasan atumin aneajrume. Tura aya wíkichu antsu ashí Yus-shuar ainia nusha nekas chichaman nekaawaru ásar atumin anenmarme. ² Nekas-chicham tuke amuutsuk ii enentáin pujá asam-tai aneajrume. ³ Yus ii Aparisha tura ii Uuntri Jesukristusha, Yus Apa Uchiri asa, atumin anenmak imiatkinchanum shiir pujustinian waitnentrakamak yainmakarti. Nujai nekas-chicham nekaarum anenaittiarme.

⁴ Ame uchiram Yus Apa akupkamujai métek umiiniakui nuna nekaan ti shiir enentáimprajai. Nekas-chichaman umin áiniawai. ⁵ Yamaikia, umaru, tájame: mai anenai ajartai. Yamaram akupkamun áattsujme antsu yámankamtaik antukmiaj nunak tájame. ⁶ Nekas anenkartinia nú shuar Yus akupkamun uminiaiti. Tura Yus akupkamuka “anenkartin tuke atarum” tawai. Nusha yámankamtaiknumia antukuitrume.

Anankartincha írunui

⁷ Ju nunkanam anankartincha ti írunui. Jesukristu nekas aents ajas aki-iniamia nuna enentáimtuiniatsui. Nu shuar anankartin ásar Kristu nemasri áiniawai. ⁸ Nu shuarjai aneartarum. Yajauch shuar ántar yayakrumin Yus átum takasman métek akirmakchamniaiti. Antsu aneara takasakrumin Yus métek akirmakarmi.

⁹ Ashí shuar Kristu jintíamun iniais “nankaamas nékajai” tana nu, Yúsnachuiti. Antsu Kristu jintíamun umiana nu shuar Yus Apajaisha tura ni Uchirijaisha mai tsaniñ pujawai. ¹⁰ Shuar Kristu chichamen jintíachu atumí jeen írmástaj tusa jeakui awayáwairap tura “shiir taume” tiirap. ¹¹ Kame nu shuar “shiir taume” takumka nu shuar yajauch jintíamu jímiareame.

Umíamu chicham

¹² Ti nukap atumjai áujmatsatniun wakerajai. Túrasha ju papinium mashi áatrashtatjarne. Antsu imía wiki atumin iyakun jeátjai. Nuyá naka chichasar ti shiir warastatji.

¹³ Ame kaim Yus achikma nuna uchiri amikmaatmainiawai. Nuke atí.

JUAN

Nuyá Ukunam papin aar akupkamu

Kayu ti penker shuaraiti

¹ Wi Juan Yus-shuara uuntri asan winia amikrun Kayun ju papin áateajai. Wisha ti nekas aneajme. ² Aneamu yatsurú, Yusjai péñker wekaakum ame wakanim péñker pujana núnisañ ame ayashmisha péñker atí tusan Yúsan áujtajme. ³ Ame nekas chicham umirman shuar juñ taar ujatarmayi. Tura nuna antukan ti warasmajai. ⁴ Yus-shuar nekas chichaman umiiniakui imiá shiir enentáimtuiniajai.

⁵ Aneamu yatsurú, chíkich Yus-shuar ti penker yayame. Kame yajaya yujainia nusha nekas yayame. Nu péñkeraiti. ⁶ Nu shuar ame nekas anenamun juñ taar Yus-shuar iruntramunam etserkarai. Ataksha irauwenakui atsumainiana nu súsam shiir akupkarta. Péñker wáinkiumka Yus shiir enentáimtikrattame. ⁷ Nu shuar Jesukrístun takarsatai tusar wekainiawai. Túrawar Yus-shuarcha ainia nuna kuñtrijiai yurumátniun nakitrarmatai ⁸ ii Yus-shuartikia nii atsumainia nu ajamsatniuitji. Nekas chichaman etserainia nu, yainkiartai tusar túratniuitji.

Tiútrepes yajauch túriniaiti

⁹ Ashí Yus-shuar árumna nuna papin akuptukmajrume. Kame nékajai, Tiútrepes nankaamantu enentáimtumak ii tájinia nuna umiktinian nakitiawai. ¹⁰ Nu asamtai nui jean ni yajauch túramun etsertuktatjai. Nii ántar ti áujmatuk tsanumprutmaji. Tura nu arantcha Yúsnan takainia nu irainiakui awayáiniatsui. Tura chíkich awayátaj tákuisha suritiawai. Tura nuyá Yus-shuarjai iruntratniun surimiawai.

¹¹ Aneamu yatsurú, nu yajauch túramu jumamkiirap antsu péñker túratarum. Péñker túrinia nuka Yúsnaiti. Antsu tunáa túrinia nuka Yúsan nékachuiti.

Timitriu péñker túriniaiti

¹² Imiá nekas péñker shuar asamtai ashí shuar Timitriun péñker áujmatainiawai. Iisha núnisrik péñker shuáraití tákurin nekas tájinia nusha nékarne.

Umíamu chicham

¹³ Wi ti nukap títinian wakerajme. Túrasha ju papinium mashi áatrashtatjame ¹⁴ wárik ítin asan. Nui jean chichasmi.

¹⁵ Shiir pujustá. Juyá amikrum amikmaatmainiawai. Ii amikrisha chikichik chikichik amikmaatruata.

JÚTAS papin áarar akuptukma

Jútas Yus-shuaran papin áateawai

¹ Wi Jútas Jakupu yachintjai. Jesukrístu takarin asan ashí Yus Apa ni shuari átinian achikma ainia nuna ju papin áateajai. Jesukrístujai tsaninkiaru ásarmatai Yus nin wainiainiawai niijjai kanakchatniun. ² Yus ti waitnentra-mak imiatkinchanum tuke shiir pujustinian yainmakarti. Ti anenma asa túrati.

Ti tunáa shuar írunui (2 Pítíur 2.1-17)

³⁻⁴ Aneamu yatsurú, iikia mai metek Yus-shuar asar ju uwempratin chichaman áatratniun wakerukjarme. Túrasha ti yajauch shuar anankramawar atumín pachiinkiarmai. Niisha “Yus ti anenkartin asamtai páchitsuk tunáa túramniatji” tuiniawai. Nu arantcha Yus in Akuptamniuncha tura ii Uuntri Jesukrístuncha nakitin áiniawai. Nu asamtai nu shuaran “yaunchu sumamawaruiti” tímiayi Yus. Tuma asamtai tájarme “Tuke Yus-Chicham yapajáshtinian ashí Yus-shuar akasmatkarat tusar susamuiti. Wátsek, kakaram ajastarum” tájarme.

⁵ Yaunchu Uunt Yus Israer-shuaran túramia nu nékarme. Nuna atak enentáimtikratjarme. Ejiptu nunkanmaya júkiar Nin umirkacharua nuna máawarmiayi. ⁶ Nayaimpinmaya suntarsha ni pujutairin ajapa ikiukiar Yus susamun umitsuk iniaisarmiayi. Túrawarmatai Yus kiritniunam jirujai tuke jiníkiá sepunam apujas pujurainiawai. Tura Uunt Tsawant jeamtai súmamtikiawartatui. ⁷ Núnisan Sutuma péprusha Kumura péprusha tura tíjiuch péprusha áishmanjaisha nuwajaisha ti yajauch nuamtak tsanirmanainiakui ti tunaan penké túrachmin ana nunasha túrin ármiai. Túmainiakui ashí shuar ashamkarat tusa Yus amuicha jinium asutiáwarmiai.

⁸ Ayu. Atumín yajauch shuar ainia nu, yaunchu túrunamun enentáimtsuk tuke yajauch enentáimiainiak ni ayashin yajauch awajmamainiawai, Yus-nasha nakitiainiawai, tura ashí akupin ainia nunasha yajauch áujmatainiawai. ⁹ Antsu Mikiar, nayaimpinmaya suntara kapitántrintiat, iwianchjai máaniak Muisaisa ayashin akasmatak “ániumsha” tu chicharkachmiayi. Antsu áyatik “Yus írmastí” tímiayi. ¹⁰ Túrasha ju shuarka nékainiatsna nuna nánkamsar yajauch chicharainiawai. Tura nékainiana nuka yawá áinis enentáimtsuk áyatik nékainiawai. Tura nújaisha imia niníki yajauch emesmamainiawai.

¹¹ Maa, anearartí. Kaín yajauchin túramia núnis tura ásar jákartatui. Tura Parama áinis kuítian ti wakeruuniak imia niníki tunaanum tsankamakarua áiniawai. Tura Kurea áinis ashí akupniun nakitin áiniak kajinkiertatui. ¹² Átum nuamtak anenaitiai-jisat nájankurmin nu shuar chikichan enentáimtutsuk Yusnasha ashamtsuk imia niníki enentáimtumainiawai. Penké ántar áiniak yumi kíar tee ajasua núnin áiniawai. Tura nase umpuim yútutsuk nankamainiawai. Árak nerektin nantutin nerechua áanin áiniawai. Tuma ásar uwemu penké jaka áanin áiniawai. ¹³ Entsa nujankrak saurín ajekeawai. Nu shuarsha núnisar ni natsantrín natsamtsuk ajekenawai. Tura yaa waakua áanin áiniawai. Tuma ásar nekas kiritniunam tuke menkakatin áiniawai.

¹⁴ Atanka tirankiyayi Eruk. Ti penker Yúsnan etserin asa juna tímiayi “Uunt Yus ti untsurí ni shuarjijai winittiawai. ¹⁵ Nuyá ashí shuar túrawarman nekaattawai. Tura ashí yajauch shuarnasha ti tunáa túrawarua nujai tura

Yúsan yajauch áujmatsarua nújaisha súmamtikiawartatui” tímiayi Eruk. ¹⁶ Nu shuarka péñkera nujai waratsuk “yajauchiiti” tuiniawai. Aya ni ayashí wak-eramunak wakeruiniawai. Nankaamantu enentáimtumainiak chichainiawai. Tura chikich shuaran shiir chícharainiaksha aya nii wakera nuna túrutati tusa péñker chichainiawai.

Yus-shuar enentáimtikratin

¹⁷ Tura atumsha, aneamu yatsurú, ii Uuntri Jesukrístu akatramuri yáunchu “aneartarum” tiarmiania nusha enentáimtustarum. ¹⁸ “Amúamu tsawant ishichik ajatesmatai shuar Yúsnan wishikrar nakitrartatui. Tura ni yajauch wakeramuriniak umíi pujuartatui” tiarmiayi. ¹⁹ Nu yajauch shuar atumín akantamenawai. Ju nunkanmayanak páchiniak Yusa Wakanin takakainiat-sui.

²⁰ Tura átumka, aneamu yatsurú, tuke Yus nekas enentáimtusrum kakaram ajastarum. Yusa Wakaní kakarmarijjai ashí Yus seatarum. ²¹ Yus ti anenmakui nii wakera nu wakeruktarum atumsha. Túrarum ni anenmamu shiir nekaattarme. Tsawant winiawai, ii Uuntri Jesukrístu in waitnentrana asa tuke shiir Niijjai pujustinian amastatji. Nu tsawant naká pujutarum.

²² Mai yapaji ajá ainia nu naka enentáimtikratarum. ²³ Chíkich shuarsha jiniumia júsatniua áitkiasrum uwentikratarum. Tura chikichcha ti yajauch ásarmatai anearum waitnentratarum. Tura ni pushirisha ni tunaarjjai maatra asantai muíkiatniuiti.

Yúsan shiir awajeawai

²⁴⁻²⁵ Yus chikichkiiti. Ti nekaiti. In uwentikkiartin asa ni kakarmarijjai yainmakminiaiti tunaanum iniarchatniun. Tuma asa tunaajai máatrachu awajtamas ni ti shíirmarin ejetamtatrume. Túrutma ti waramtikramsattarme. Ii Uuntri Jesukrístu túrunamujai Yuska Niñki shiir awajsatniuiti tura nankaamantu enentáimtustiniaiti. Yáunchusha, yamaisha, tura tuke ashí akupin atí.

Núkete.

APUKARÍPSIS Jesukrístu Juánkan paant iniaktusma

Jesukristu paant awajsamu

¹ Jú áarman Jesukrístun Yus ujakmiayi. Wárik túrunatta nuna ni shuarin ujakarát tusa ujakmiayi. Tuma asamtai Jesukrístu ni suntarin akupak ashí winia paant awajtursamai. Wisha Juánkaitjai. ² Yus timia nunasha tura Jesukrístu ujatkamia nunasha tura wi íismaj nunasha ti paant aya nekasa nuna tájai. Penké wáitratsjai.

³ Jú papin áujea nu shuarsha tura núnisan juna ántana nusha nekas enentáimtuiniakka shiir ártatui. Ukunam átatna nuna ujaawai tura jeatemayi.

Juan siati péprunam Yus-shuar írunun juna áateawai

⁴ Wi, Juan, Asia nunkanam siati (7) péprunam Yus-shuar írunun ju papin áateajai. Yus anenma asa imiatkinchanum shiir pujustinian yainmakarti. Nu Yus tuke yaunchu pujuyayi. Núnisan yamaisha pujawai. Tura nuke winittiwai. Akupin pujutainium Yusa Wakani siati naka pujurainia nusha shiir yainmakarti. ⁵ Núnisan Jesukrístu shiir yainmakarti. Nii tana nu imiá nekasaiti. Niisha emka jakamunmaya yamaram iwiaakmajai nantakniuiti. Tura ju nunkanmaya akupniu Uuntrinti. In anenma asa ni numpejai ii tunaarin nijiatramkaitji. ⁶ Túrutma akupin awajtamsaitji. Tura ni Apari Yúsnan pujursarat tusa anaitiamkaitji. Nii ti kakaram asa tuke shiir awaj-nasti. Núnisan atí.

⁷ Wats, Krístuka yuranmijjai winittiwai. Tura íjiuarmia nusha tura ashí shuarsha nuna wáinkiertatui. Túrawar ashí sapijmiainiak útiartatui. Maa, nekas nunis átatui.

⁸ Krístuka “yámankamtaiknumia amúamunmasha ashí nérenniuitjai, tawai. Wisha A rétranmaya Y rétranam ashí retra áintsaitjai” tawai ti kakaram Uunt Kristu. Tuke yaunchu pujuyayi. Núnisan yamaisha pujawai. Tura nuke ataksha winittiwai.

Kristu ti shiir wincha ajasun Juan wainkiamiania nu

⁹ Wi Juan atumjai métek waitia asan atumí yachintjai. Núnisan nayainpiniam, Yus akupeana nu, métek jeattaji. Tura katsuntrar nákastinian Jesukrístu mái métek súramji. Yus-Chichamnasha tura Jesukrístu timiancha étsereakun nayaantsa ajapén atentramunam Pátmus nunkanam sepunam apujsamua núnisan pujumjai. ¹⁰ Tumai tumin tsawantai Yusa Wakani pujurtakui winia úkuruini kakantar untsunman antukmajai. Kachu umpúamua núnis ti kakarmauyayi.

¹¹ Tura turutmiai “Wiitjai. Yámankamtaiknumia amúamunam ashí nérenniuitjai. Wisha A rétranmaya Y rétranam ashí retra áintsaitjai, tímiai. Tuma asamtai wáinmena ju, papinium áaram Asia nunkanam siati péprunam Yus-shuar írunna nu akuptukarta. Ju peprunam akupkarta: Ipisiusha, Ismirnasha, Pírkamusha, Tiatirasha, Sártissha, Piratírpiasha, tura Rautiséasha.” Tu turutmiai.

¹² Túrutkui yaki túruta tusan apajasan íkman siati shirikip ikiutain kurijjai najanamun wainkiamjai. ¹³ Tura nu ajapén Aents Ajasua núninan wajan wáinkiamjai. Tura pushirísha nawea tímiai nuntuaru entsaruyi. Emenmamkesha kúriniak netsepnum emenmamauyi. ¹⁴ Tura ni muuke intiashísha murikiu uré nijiamua núnisan tura micha núnisan ti puju chírauyi. Tura

ni jii_{sh}a jiya núniskeyi. ¹⁵ Ni nawesha ti wincha asa jiru yan_kutaku jiamua áinis néwar ajarmiayi. Ni chichamesha ti kakaram asa uunt entsa téter ajá áintsauyi. ¹⁶ Ni untsuurin_i siati yaan takakuyi. Tura ni weneniasha puniá áinis tsakatskat mai ere awajsamu jínmiyai. Ni yap_isha etsa ti etsantuk íischamnia núnisauyi.

¹⁷ Nuna wáinkian jaka áintsanak naween iniaarmajai. Tú_rasha ni untsuurí uwejen awaantrus turutmiayi, “Ashamkaip. Wiitjai. Yámankamtaiknumiá amúamunmasha tuke pujuwitjai, timiai. ¹⁸ Wikia tuke iwiaakuitjai. Jakami-ajai tura nantakin jákashtinian tuke iwiaaku pujajai. Jákatniuncha tura jaka pujuinia nuna yawir_in takakkun nérenniuitjai, timiai. ¹⁹ Tuma asamtai wáinkiamna ju_{sh}a, yamá_i wáinmena nusha, tura ukunam átatna nusha aartá, timiai. ²⁰ Wáinmena nu júnisaiti. Siati shirikip-ikiutai kúrik wainkiam nu, siati péprunam Yus-shuar írunun nakumeawai. Tura winia untsuuru_in_i siati yaa wainkiam nu, siati péprunmayá Yus-shuaran wáinniun nakumenawai, turutmiyai.

2

Ipisiunam chícham áatramu

¹ Nuyá turutmiyai ‘Ipisiunmayá Yus-shuaran wáinin ju áatratá: Siati yaan untsuurnum takakna nu tura núnisa_n siati shirikip-ikiutai kúrinman ajapén atenta wekáa nu, tawai: ² “Ashí ame túram nuna nékajai. Ti kakaram takaakum katsunteamuncha nékajai. Yajauch shuar nawamtsuk awe-maitrume. Shuar “Yus akatramuitjai” ántar tuinia nu nekaamarme. Wáit_rinia nusha nékaitme. ³ Ti wáit_iayatmek katsuntram yawetsuk Winia ti takar-tusuitme. ⁴ Túrin áminin ju_na títiatjame. Yus aneakum yámankamtaik ti pen_ker wekainiuyam núnisam túratsme. ⁵ Tuma asam ikiuknium nu enentáimpram yaunchu túriniuyam núnismek ataksha túrata. Túrachakminkia ame shirip-kirmin wari jurustatjame. ⁶ Tura ju_pén_ker túriniaitme. Nikiurás shuar nakitniuitrume. Nu shuar “ayash wakeramu páchitsuk túramniaiti” tuiniakui Wisha núnisnak nakitiajai. ⁷ Kuíshtinia nu shuar Yusa Wakan_i ashí Yus-shuaran timian antukti: Nupetmakunka tuke iwiaaku pujutai numi neren yúatniun tsan_katkattajai. Nu numi Yus pujana nu_i wajaawai.” Tu áartá’ turutmiyai.

Ismirnanam chícham áatramu

⁸ Nuyá turutmiyai ‘Ismirnanmayá Yus-shuaran wáinin ju áatratá: Yámankamtaiknumiá amúamunam tuke pujuwa nu tura núnisa_n jaka nantakmia nu, tawai: ⁹ “Ashí ame túram nuna nékajai. Ti wáitiam nunasha tura kuítrinchaitmena nunasha nékajai. Antsu Yusai_nkia ti kuítrinniuitme. Tura shuar uunt iwianch Satanása shuari áiniayat “Israer-shuaraitjai” tuíniak yajauch áujmatramena nuna nékajai. ¹⁰ Ti wáitsattamna nu ashamkaip. Íwianch ashí nekapramsataj tusa atumi_inian sepunam en_keattawai. Nu_i tias tsawant wáitsattarme. Jáakmesha tuke Yus shiir enentáimtusakminkia tawaspan nakurin susatniua nútiksanak nekas iwiaakman tuke shiir pujustinian amastatjai. ¹¹ Kuíshtinia nu shuar Yusa Wakan_i ashí Yus-shuaran timian antukti: Nupetmakuka jimiará jákatniuka waitsashtatui.” Tu aartá’ turutmiyai.

Pírkamunam chícham áatramu

¹² Nuyá turutmiyai ‘Pírkamunmayá Yus-shuaran wáinin ju áatratá: Puniá áinis tsakatskat mai ere awajsamun takakna nu, tawai: ¹³ “Ashí ame túram nuna nékajai. Uunt iwianch Satanás akupea nu_i pujayatmek tuke shiir enentáimturmena nuna nékajai. Winia shiir umirtínian Ántipasan máawarmataisha Winia enentáimtursatin ishichkisha iniaitiuschamame.

Nusha íwianch pujutainium pujakrumin túrunamai. ¹⁴ Túrin áminin juna títiatjame. Atumjiniá shuar yaunchu Yúsnan etserin Param yajauch jintíamun tuke emetainiawai. Niisha Israer-shuaran tunáa awajsat tusa kapitián Parakan unuiniarmiayi. Nuyá Parak Yus-sutai namanken maar yúatniun Israer-shuaran jintintiamiayi. Núnisañ ti tsanirmatniun jintintiamiayi. ¹⁵ Atumjiniá shuarsha Nikiurás jintíamuncha, Wi nakitiaj nuna, iniaisatniun nakitiainiawai. ¹⁶ Wats, enentáimpram iniaisata. Túrachakminkia Wi wari winin winia wenuruiya puniá jiinia nujai máaniaktajai. ¹⁷ Kuíshtinia nu shuar Yusa Wakaní ashí Yus-shuaran timian antukti: Nupetmakunka maná yurumkan uukma nuna ayurattajai. Nuyá kaya pújun susattajai. Nu kayanam yamaram naari aarma átatui. Nunasha chíkich shuarka penké nékatsain aya achía nuke nekaattawai.” Tu aartá’ turutmiai.

Tiatiranam chícham áatramu

¹⁸ Nuyá turutmiai ‘Tiatiranmayá Yus-shuaran wáinin ju áatratá: Yusa Uchirí jii jijiai métek keena nu tura núnisañ nawe jiru yanikutaku jiamua núnis néwar ajawa nu, tawai: ¹⁹ “Ashí ame túram nuna nékajai. Yus shiir enentáimtakum aneam nuna nékajai. Tura katsuntram penker takaamna nuna nékajai. Yáunchujai nankaamas penker túrame yamaikia. ²⁰ Túrin áminin juna títiatjame. Nu nuwa Jesapír awematsme. “Yúsnan unuiniyajai” tinia Wíi shuaran ti anankenawai. Tura ti tsanirmatniuncha tura ántar-yus-sutai namanken maar yúatniun jintintiainiawai. ²¹ Niisha ni tunaarín enentáimiar iniaisat tusan nákasuitjai. Tura nakitiawai. ²² Wátsek, sunkurmatkiakan peaknum áepsattajai. Tura chíkichcha nijiai tsanirma ainia nunasha nijiai métek ti wáitkiastatjai. Ni tunaarín enentáimiar iniaisacharmatainkia túrattajai. ²³ Ni uchiríncha mantúattajai. Nujai ashí Yus-shuar Wi nekas shuara enentáin nékaitjia nuna nekaawartatui. Atumniasha chikichik chikichik takasmajai métek akiktatjarme. ²⁴ Tura chíkich shuar Tiatiranmayatiram, nú chicham enentáimtuscharmena nu, “nekas iwianchnia uukma” tútaiya nu nékachu asakrumin atakka túratniun patatkashtatjarme. ²⁵ Tura Wi jeatsain takakrum nu emetatarum. ²⁶ Nupetmakunka Wi wakeraj nunak tuke initsuk túrana nuna untsurí nunkanam akupkatniun tsanekatattajai. ²⁷ Winia Apar tsankatrukmiá núnisnak akupkatniun tsanekatattajai. Tura nuwe najanam jirujai awati ijiakratniua áinis ti kakarmajai akupkattawai. ²⁸ Yánkuam káshik jiinia nuna susattajai. ²⁹ Kuíshtinia nu shuar Yusa Wakaní ashí Yus-shuaran timian antukti.” Tu aartá’ turutmiai.

3

Sártisnum chícham áatramu

¹ Nuyá turutmiai ‘Sártisnumiá Yus-shuaran wáinin ju áatratá: Siati Yusa Wakanin takakna nu tura núnisañ siati yaan takakna nu, tawai: “Ashí ame túram nuna nékajai. Iwiaakua áintsañ wekayatmek Wijiainkia jákaitme. ² Shintiarta. Kajinia nu umpuim ekeemakta. Kame Yusjai íisam penker túrichuitme. ³ Yus-Chicham ti shiir enentáijiai emka antukmam nu ataksha enentáimpram emetata. Tura tunaarumsha enentáimpram iniaisata. Tura iniaiyachkumniinkia kasa núnisnak nékatsmin jeartiatjame. ⁴ Tura Sártisnum shuar ishichik pushiri wapik máacharu pujuiniawai. Nusha ti penker ániak pushí pújun entsarar Wijiai wekasartatui. ⁵ Nupetmakuka pushí pújun entsartatui. Tura iwiaaku átinia nu papiniumiá ni naari áarman japirashattajai. Antsu winia Apar tura ashí nayaimpinmayá suntar íimmianum shiir áujmattsattajai. ⁶ Kuíshtinia nu shuar Yusa Wakaní ashí Yus-shuaran timian antukti.” Tu aartá’ turutmiai.

Piratírpianam chícham áatramu

⁷ Nuyá turutmiai ‘Piratírpianmaya Yús-shuaran wáinin ju áatratá: Ti shiir túrin tuke nekasana tana nu, uunt akupin Tawitia yawirí takaku asa uraimtai chíkich penké epenchamniaiti. Tura epenmiatai chíkich penké uraichmini-aiti. Juna tawai: ⁸ “Ashí ame túram nuna nékajai. Kakarmachuitmek winia chichamur shiir enentáimtakum Winia initieschaitme. Tuma asakmin wáitin uratjame. Nuna chíkich penké epenchamniaiti. ⁹ Wátsek. Shuar wáitruiniak “Israer-shuaraitjai” tuíniayat uunt iwianch Satanás-shuar áiniawai. Nu shuaran, nekas ámin aneajna nuna nekaawarat tusan amíini tikishmatkiarartatjai. ¹⁰ Katsuntrata tímiaj nu, shiir umirka asakmin Wisha ti wáitsatin ashí nunkanam áatna nuyá uwentikrattajme. Nu wáitsatniujai ashí nunkanmaya shuar nekapnasartatui. ¹¹ Wárik winittiajai. Takakmena nu emetata. Akinkiatniuitmena nuna chíkich shuar atantramkiarain. ¹² Nupetmakunka winia Yusru jee tankirin awajsattajai. Tura nuyá penké jínkichartatui. Tura nín winia Yusru náarin áatrattajai. Tura winia Yusru pépruri náarincha áatrattajai. Nu pépruka nayaimpinmaya yamaram Jerusarenka Yúsnumia tára núiti. Núnisan winia yamaram náarun nín áatrattajai. ¹³ Kuíshtinia nu shuar Yusa Wakaní ashí Yus-shuaran timian antukti.” Tu aartá,” turutmiai.

Rautiséanam chícham áatramu

¹⁴ Nuyá turutmiai ‘Rautiséanamaya Yús-shuaran wáinin ju áatratá: Wáitruitsuk nekasa nunak tiniua nu tura núnisan ashí Yus najanamun Úntriya nu, tawai: ¹⁵ “Ashí ame túram nuna nékajai. Tura michaash míchachuitme. Núnisan tsuersha tsuérchaitme. Míchaitkiumsha tura tsuéraitkiumsha maak. ¹⁶ Kame míchachu tsuércha antsu aya tsuétsetak asakmin imiutkattajme. ¹⁷ Iis, “Kuítrinnuitjai, ti irumpraitjai, warinkisha atsumatsjai” tame. Túrasha ashí yajauch, wáitnenmai, kuítrinha, kusuru, tura misú iyajme. ¹⁸ Tuma asam Winí ti shiir kuri sumakam nekas kuítrintin ajasta. Turam puju pushí Winí sumakam misú ajasma shiir entsarta. Péñker ímprataj tusan júnium enketai enkeeta. ¹⁹ Aneajna nuna chichareajai. Nu asantai kakaram ajasam tunaarum enentáimpram iniaisata. ²⁰ Enentáimprata. Shuar wáitiniam wajas untsumna áintsanak Wi ámin untsúajme. Winia anturtukam ame enentáimin awaintiakminkia Wi wáintiuattajme. Tura wayan ámijiai yurumáttajai. Tura amesha Wijiai yurumáttame. ²¹ Nupetmakuka akupin pujutainium Wijiai pujustatui. Wisha núnisnak nupetmaku asan winia Aparjai akupin pujutainium pujusuitjai. ²² Kuíshtinia nu shuar Yusa Wakaní ashí Yus-shuaran timian antukti.” Tu áartá,” turutmiai.

4*Nayaimpiniam Yúsan shiir awajenawai*

¹ Nu nankaamasmatai nayaimpiniam waiti uranniun wainkiamjai. Tura nuyá kakaram untsumman antukmajai. Nuik kachujai métek kakaram chichartukma nu turutmiai “Juí yakí wakatá. Ukunam áatna nuna iniaktus-tatjame” turutmiai.

² Nu chichamaik Yusa Wakaní akantukmiai. Túrutamtai nayaimpiniam akupin pujutainium pujan wainkiamjai. ³ Niisha jaspi kayasha tura kurnarínia kayasha nujai métek ti winchauyi. Akupin pujutain tuntiak téntakuyi. Nusha ismirarta kayajai métekeyi. ⁴ Chíkich paintikuatru (24) akupin pujutain nu pujutain téntakarun wainkiamjai. Tura paintikuatru uunt púju entsarainian tura kurin etsenkrakainian, nu pujuinian wainkiamjai.

⁵ Akuptainiumiá peemsha ipiamtasha untsummasha jíiniarmai. Tura nu pujutainium naka siati shirikip kearmai. Nusha siati Yusa Wakaninti. ⁶ Núnisan nu pujutainium naka nayaantsa áanin ti saar amai.

Nu pujutainium wakenmaanisha niisháa tan̄ku kuaru téntakar ármiai. Ukurínisha tura eemsha jíi irunmiai. ⁷ Emka tan̄ku úunt yawaa áanniuyi. Chíkichka turu uchichia áanniuyi. Tura chíkichcha shuara yapia áanniuyi. Tura chíkichka churuwia nanamua áanniuyi. ⁸ Nusha sais nanamtin ármiai. Tura jíisha ti irunainiak ashí wainmarmai. Káshisha tsawaisha tuke iniaitsuk juna tiniu armai:

“Ti nekas pēnkeraiti Uunt Yus. Ashí nan̄kaamas kakarmaiti. Tuke yaunchu pujuyayi. Núnisan yamaisha pujawai. Tura ataksha juke winittiwai” tiniu armai.

⁹ Tura uunt pujutainium pujana nu tuke iwiaaku pujú asamtai nu tanku ti shiir awajsar yúmin̄kiak pujuriarmai. ¹⁰ Túruiniakui paintikuatru uunt tuke iwiaaku pujun tikishmatainiak ni etsēkrutairin naka áepuiniak tuiniawai:

¹¹ “Úuntá, ii Yúsr̄inme. Tuke shiir awajmainme. Ashí nankaamas kakarmaitme. Amek ashí ír̄unna nu najanaitme. Tura aya wakerakum najanamame. Ame wakerakmin irunainiwai” tuiniawai.

5

Murikkia papin urakminiaiti

¹ Nuyá akupin pujutainium pujuya nuna untsur̄in papí penuarma áanniun wainkiamjai. Nu papisha initiaan̄isha tura páatkesha áarmauyi. Tura urakchamnia atí tusa siati anujtukmajai kaki peekmauyi. ² Tura nayaimpinmayá suntar ti kakarma nu, ti kakantar inintran wainkiamjai. Niisha tímiai “¿Ya akupniuk ju papin kaki anujkamun jaak urakminiait?” ³ Tura nayaimpinmayásha nun̄kanmayásha tura jakamunmayásha chíkichkisha nu papin urakmin atsumiayi. Áujtsuk ístinniasha tujinkiarmai. Tímianu akupin atsumai. ⁴ Nu papin uraktincha tura áujsatniusha, kame ístincha atsakui ti úutmiajai. ⁵ Nuyá chíkichik uunt turutmiai “Ti úutíp. Israershuarnumiá Úunt-yawá, Jutá weeá awai. Niisha uunt akupin Tawit weeaiti. Nupetmaku asa nu papí siati anujtukman jaak urakminiaiti.”

⁶ Nuyá uunt pujutaiya nūi tura kuaru tan̄kunam ajapén tura úuntnum ajapén Murik wajan wainkiamjai. Maamua áintsan̄ketiat iwiaakuyi. Kachur̄isha siátiyi. Ni jíisha siátiyi. Nusha Yusa Wakan̄i siati ashí nun̄kanam akupramua nuuyi. ⁷ Nu Murik we nekas uunt Akupniun untsur̄inian nu papin achikmiayi. ⁸ Tura papin achikmatai kuaru tan̄kusha tura paintikuatru uunt arma nusha Murikiun tikishmatrarmiayi. Ashí uunt arpa tuntuitiain takaku armai. Tura ashí kun̄kuin en̄ketain kuri najanamun takaku armai. Nu kun̄kuin Yus-shuar áujsamuiti. ⁹ Ju yamaram kantancha kantampriarmai:

“Amek imiá nan̄kaamas akupniuitme. Amek papí achikiam anujtukmari jaakminiaitme. Yús-sutai naman̄kea áinis mantamna asam túramniaitme. Ashí nun̄kanmayá shuarnumiásha Yusna árat tusam ame numpem̄jai in sumakmiame.

¹⁰ Turam akupin awajkartusuitme tura núnisan̄ ii Yúsr̄iniun pujurin awajkartusuitme. Tuma asakmin akupin ajar̄sar ju nun̄kanam akupkattaji.” Tu kantamainiwai.

¹¹ Tura untsur̄i nayaimpinmayá suntar uunt pujutaincha tan̄kuncha tura úuntnasha en̄kekarun wainkiamjai. Nusha nekapmarchamnia ti untsur̄i armia nu ¹² kakantar tiarmai:

“Murik mantamnamia nu akupin ajas ashí kakarmancha, kuítniasha, nekaatniuncha Niñki achikminiaiti. Tura nupetmaku asamtai yuminsar Nin ti shiir awajsatin áiniawai.” Tu tiarmai.

¹³ Núnisañ ashí Yus najanamu, nayaimpiniam írúnna nusha, nunkanam írúnna nusha, nunká init írúnna nusha, nayaantsanam írúnna nusha, tuínian antukmajai:

“Muriksha tura akuptainium pujana nusha ti shiir tura ti kakaram ásar tuke iniaitsuk shiir awajnasarti.” Tu tuiniawai.

¹⁴ Tura kuaru tañkusha “Tuke núnisañ atí” tiarmai. Tura paintikuatru uuntka nekas tuke iwiaaku pujá nuna tikishmatar shiir awajsarmai.

6

Murikkia siati anujtukman jaakmai

¹ Wi iyakui Murikkia chikichík anujtukman jaakmai. Túramtai chikichík tañku ipiamtajai métek kakantar untsunam antukmajai. “Winim iitiá” turutmiai. ² Túrutkui kaway pújun wainkiamjai. Nuñ ekeemia nu tíshimkiun takakuyi. Akuptai tawaspasha susamuyi. Tura tuke nupetmaktinian jíinkimiai.

³ Nuyá Murik anujtukma jímiaran jáakmatai tañku jímiara nu “Winim iitiá” turutmiai. ⁴ Túrutkui chikich kawai kapaakun wainkiamjai. Nuñ ekeemia nuna puniá úuntan susamuyi. Nusha shiir pujuscharat tusa ashí jú nunkanmaya shuaran máanaimtikiatniun akupkamuyi.

⁵ Nuyá Murik anujtukma menaintiun jáakmatai tañku menaintiua nu “Winim íitiá” turutmiai. Túrutkui kaway mukusan wainkiamjai. Nuñ ekeemia nusha kijin nekapmatain takakuyi. ⁶ Tura kuaru tañku ajapénia chichaamun antukmajai. “Tsawant takamtsuk takaakmesha apatkuka penké ishichik sumakmin átatme. Tura núnisañ machasha nijiamchisha amuukacharat tusam penker wáinkiata.” Tu timiai.

⁷ Nuyá Murik anujtukma kuátrun jáakmatai tañku kuarua nu “Winim iitiá” turutmiai. ⁸ Túrutkui kaway yañkun wainkiamjai. Nuñ ekeemia nusha Jákatín náartiniuyi. Tura nuna úkurin Jatai nemark winimiai. Nusha ashí nunkanmaya shuar kuaru akankamunmaya chikichkin máatniun akupkarmauyi. Nusha mesetjaisha tsukajajisha sunkurjajisha tura yajasmajai máawarmai.

⁹ Nuyá Murik anujtukma séñkun jáakmatai Yus-sutai kunkuin ekemtai wakenmaanñ íismajai. Túran Yus-Chichaman etserainiakui máawarma wakanin wainkiamjai.

¹⁰ Nusha kakantar untsumainiak tiarmai “Uuntá, ti penker asam táména nu umíatsmek. ¿Urutiak nunká pujuinia nú shuar ii mantamnamunam yapajmíatruktam?” tiarmai.

¹¹ Tuíniakui pushí pújun susar tiarmai “Chikichcha Krístunun etserainiakui mantamnatin áiniawai. Nu náakrum ishichik ayampratarum” tiarmai.

¹² Nuyásha Murik anujtukma sáisan jáakmatai ti úurun wainkiamjai. Tsawai-nantusha itiurchat ajasua áintsañ mukusa ajasmái. Kashí-nantusha numpá áintsañ ajasmái. ¹³ Tura yaasha wampú nere nase umpuim ti majüwa áintsañ kákekarmai. ¹⁴ Nayaimpisha papí penuara júamua áintsañ menkakamai. Tura naintcha yajá apujnasarmai. Tura nunkasha nayaantsanam ajapén atentrainia nusha yajá apujnasarmai. ¹⁵ Tura jú nunkanam akupin ainia nusha náinnium wear kayá wáanam uumkarmai. Niijjaisha ashí shuar, uuntcha, kuítriniusha, suntara kapitiántrisha, ashí

kakaram ainia nusha, tura takarniusha ankant ainia nujai náinnium wear-mai. ¹⁶⁻¹⁷ Túrawar náinniasha kayancha tiarmai “Asutniátin tsawant jeayi. ¿Yaki aun katsuntrat? Nu asantai saanakim in yutukratata. Túrarum Murik ti asutiámataj nuyásha tura akupin pujana nuyásha uukratkatá” tiarmai.

7

Israer-shuarnumiá anujturma armia nu

¹ Nu nankaasmatai kuaru nayaimpinmaya suntar, nunkaa kuaru yantamén wajan wainkiamjai. Nusha kuaru nase kukarsha, nayaantsanmasha tura kampunniunmasha nasenkacharat tusar wajatiarmai. ² Kame kukarsha tura nayaantsanmasha yajauch awajsatniun akupkamu armai. Tura chíkich suntarnasha nantu tátainmaaniá winian wainkiamjai. Tuke iwiaaku Yusa anujtutairin takakauyi. Nusha kuaru suntaran kakantar untsuak tímiai, ³ “Íi Yusri takarin ainia nu nijiajnium áarar anujtatsriniñ kukarsha, nayaantsasha, tura kampunniusha nasejai yajauch awajsairap” timiai.

⁴ Tura tímiajni untsurí aara anujtukman antukmajai. Ashí Israer-shuar tuse (12) shuar weeá ainia nuyá chikichik sianu kuarenta kuaru mir (144.000) armai. ⁵ Jutá weeanmaya tuse mir (12.000) anujtukma armai. Rupiñ weeanmayasha tuse mir anujtukma armai. Kat weeanmayasha tuse mir anujtukma armai. ⁶ Aser weeanmayasha tuse mir anujtukma armai. Niptarí weeanmayasha tuse mir anujtukma armai. Manasés weeanmayasha tuse mir anujtukma armai. ⁷ Semeun weeanmayasha tuse mir anujtukma armai. Riwí weeanmayasha tuse mir anujtukma armai. Ísakar weeanmayasha tuse mir anujtukma armai. ⁸ Sapurún weeanmayasha tuse mir anujtukma armai. Jusé weeanmayasha tuse mir anujtukma armai. Pinjamín weeanmayasha tuse mir anujtukma armai.

Ti untsurí shuar pújun entsararu

⁹ Nuyá ti untsurí shuaran wainkiamjai. Ashí nunkanmaya nusháa shuaraim iruntrarú ásar nekapmarchamnia armai. Tura nusha uunt akupin pujutainium tura Muriknium naka wajaarmai. Tintiuki nukéa áaniun takaku armai. Tura ashí pújun entsaru armai. ¹⁰ Ashí kakantar untsumainiak tiarmai:

“Íi Yusri uunt akupin pujutainium eketna au tura Muriksha imia Niñki Uwemtikin áiniawai” tiarmai.

¹¹ Tura nayaimpinmaya suntarsha uunt akupin pujutaincha, kuaru tanuncha, tura úuntnasha téntatkar armia nu piniakum nunká tepersar Yúsan shiir awajsar ¹² tiarmai

“Nekasaiti. Tuke iniaitsuk ii Yusri ti shiir awajsatniuiti. Niñki ti neka, ti kakaram, ti akupin, tura ti penker asantai tuke yuminsatniuiti. Núnisan atí.”

¹³ Nuyá chikichik uunt inintsamai “Pújun entsaru ainia jusha ¿ya ainia tura tuyá ainia?”

¹⁴ Túrutkui “Uuntá, amek nékame” tímiajai.

Tutai nii túrutmiai “Ju shuar ti waitsaru áiniawai. Túrawar Murikiu numpéjai ni pushirí nijiamawar paju awajsaru áiniawai. ¹⁵ Nuna túrawaru ásar yamaikia Yusaj naka pujusar tsawaisha káshisha Yúsnan ni Jeen takainiawai. Tura akupin pujutainium eketna au tuke wainkiartatui. ¹⁶ Yamaikia tsukajaisha kitiakjaisha wáitsachartatui. Tura etsasha sukuiniak yajauch awajsachartatui. ¹⁷ Murik, akupin pujutainium naka wajana au, ni murikrin wáiniuk

áyureak ti penker púkuni entsa waana nuí apujsartatui. Tura Yus ni neajkincha ukuñtiurartatui.” Tu túrutmiai.

8

Anujtukma siatia nu jaakma tura kunkuin ekeemataijjai túrunamu

¹ Nuyá Murik anujtukma siatin jaakmatai nayaimpiniam chikichik ura jeastatuk ajapén mitia ajasmai. ² Nuyá siati suntar Yusai naka wajainia nuna wainkiamjai. Nusha siati kachun susamu armai. ³ Nuyá chikich suntar kunkuin enketain kurijjai najanamun itiamai. Tura Yus-sútanium ayamas wajasmatai núkap kunkuin sunasmai. Nu kunkuin ashí Yus-shuar áujsamujai métek kunkuin ekeematainium ekeemaktiniuyi. Nu ekeematai kurijjai najanamuyi tura uunt akupin pujutanium naka pujumai. ⁴ Tura suntar ekeemakmatai kunkuinia mukuintiuri Yus-shuar áujsamujai métek Yúsan amainkiamai. ⁵ Nuyá nu kunkuin enketain suntar achik ekeematainmaya ji kapaan káirin áimiak ju nunkanam ukaamai. Túramtai ipiamtasha unsummasha, peemsha, tura uusha armai.

Kachu umpuarma

⁶ Nuyá siati suntar kachun takakainia nu umpuarta tusar iwiarnararmai. ⁷ Emka suntar kachun umpuarmatai micha kákekamai. Nunasha ji numpajai pachimpramuncha nunkanam ajapawarmai. Túmakui menaintiu nakakma jeeán numincha tura ashí írunka nuí ekeemakmai. Tura ashí nunkanam chírichrin takamtsuk ekeemakmai. ⁸ Nuyá suntar jímiara nu kachun umpuarmatai uunt naintia áanin kean nayaantsanam ajunmai. Túramtai menaintiu nakakma jeeá nayaants numpa ajasmai. ⁹ Núnisan menaint jeeá nayaantsanam matsatainia jákarmai. Tura menaint jeeá uunt kanua nu emesnararmai. ¹⁰ Nuyá suntar menaintiua nu kachun umpuarmatai ti uunt yaa nayaimpinmaya kapaá kákekamai. Tura entsasha tura púkuninmasha menaint nakakam jeeánnum kákekamai. ¹¹ Nu yaasha Yapá-numi náartiniuyi. Tura menaintiu nakakam jeeá entsa yapá ajasarmai. Túrunamtai ti untsurí shuar nu entsa yapá ajasmájai jákarmai. ¹² Nuyá suntar kuatrua nu kachun umpuarmatai menaintiu nakakam jeeá tsawai-nantusha kashí-nantusha tura yaasha emesnarar ajapén tee ajasarmai. Túrunawar tsawajsha káshisha menaintiu nakakam jeeánnum tsáapnircharmai. ¹³ Nuyá chikich suntar nayaimpiniam nanamun wainkiamjai. Nusha kakantar unsumuk timiai “Maa, chikich menaintiu suntar umpuiniakui nunkanam pujuinia nu ti wáitsartatui.” Tu timiai.

9

¹ Nuyá suntar senkua nu, kachun umpuarmatai yaan nayaimpinmaya nunká kákeran wainkiamjai. Tura nu yaan tunáa shuar jákaru matsamtai yawirín susamuyi. ² Tura uraimtai nu nánkatkachu wáanmaya ti mukuintiun jiniamia uunt jiniamia áintsan. Tura etsancha tee awajsamai, yuranmincha tee awajsamai. ³ Nuyá nu mukuintiunmaya manchi jíintrar nunká ti yujaarmai. Tura ju nunkanmaya titinkia áinis najamin ajastinian susamu armai. ⁴ Chírichrincha ashí arakmancha ashí numincha yajauch awajsatin suritki-amuyi. Antsu áyatik shuar nijainium Yusa naari áarar anujtukchamunak yajauch awajsatin armai. ⁵ Túrasha ajaktsuk senku (5) nántutin wáitkiastin susamu armai. Kame titin, shuaran ijiú, najaweá núnis najaweatin susamu armai. ⁶ Nuí shuar wari jakataj tuñniayatan jákachartatui. Ti wakeruiniayatan jákatniun tujinkiartatui.

⁷ Manchisha ísam mesetnum weena nu kawaiya áinis armai. Kurí tawaspa áinis etsenkraku armai. Yapisha shuarna áinis armai. ⁸ Intiashisha nuwanua núnis armai. Najsha úunt yawa najya núnis armai. ⁹ Netsepén namaka saepea áinis jiru péeramu armai. Tura nanamenaksha kaway karu japiiniak mesetnum tsékeena núnisan téter ajarmai. ¹⁰ Ujukésa titinki ujukea áinis asa janki ajakin armai. Nujai tuke senku nantu yujarsar shuaran íjiuar wáitkiastin armai. ¹¹ Ni uuntrisha nánkatchu waa uraimia nuyaiti. Nusha Israerchichamjai Apatún tutainti. Tura Kriaku-chichamjainkia Apuriún tutainti. Nuka Yajauch Awajkartin tawai.

¹² Jujai emka wáitsatin nankaamasai. Túrasha tuke jímiar taasai.

¹³ Nuyá suntar saisa nu kachun umpuarmatai chichaman antukmajai. Yusai naka kunkuin ekeemaka Yus-sutai kurimpramu amai. Tura ni kuaru yantame kachu jijnmiai. Tura nuyá chichaak ¹⁴ suntar kachu takakun saisa nuna timiai “Kuaru suntar Eupratis kanusá pujuinia nu atiram akupkarta.” ¹⁵ Túramtai nu kuaru suntar wear menaintiu nakakam untsurí shuaran maatai tusar weriarmiayi. Kame nuna túrawarat tusar ikiusma armai. Tura nu uwitin, nu nantutin, nu tsawantin, tura nu úratin atíatin ikiusma armai. ¹⁶ Tura suntarnasha kawainium eketainian wainkiamjai. Tura timiá untsurí nekapmarchannia asamtai aya númirurín antukmajai. Nusha jimiará sianu miyun (200.000.000) armai.

¹⁷ Tura ímiamunam suntarnasha kawaincha júnisan wainkiamjai: Eketainiaka netsepnum jirun entsaru armai. Nusha kapaaku winkia tura yanjú armai. Tura kawaiya úunt yawáa muuke áinin armai. Tura ni wenyasha jisha, mukuintiusha, asuprisha ti tsuer keá nu jíniarmai. ¹⁸ Nu menaintiu ti yajauch wáitsamujai menaintiu nakakam shuar untsurí jákarmai. Jijiaisha, mukuintiujaisha, asuprijaisha jákarmai. ¹⁹ Nujai nu kaway ni wenejai shuaran wáitkiasarmai. Tura ni ujuké napí múukeya áinin áрмаi. Nújaisha shuaran wáitkiasarmai.

²⁰ Tura nujaiisha jákacharmia nú shuar tuke tunáa túratniun iniaisacharmai. Tura yajauch wakanniasha tura ántar-yusnasha tikishmatratniun ini-aisacharmai. Nu ántar-yus kurijiaisha, kuítjaisha, jiru yanikutakujaisha, kayajaisha, numijiaisha najanamú ásar wainmaktinniasha, antuktinniasha, tura wekasatniuncha tujintiainiawai. ²¹ Núnisan mankartuatniuncha, wawekratatniuncha, tsanirmatniuncha, tura kasamkatniuncha iniaisacharmai.

10

Papichin suntar takusmia nu

¹ Nuyá chíkich kakaram suntar nayaimpinmaya táarun wainkiamjai. Nusha yuran kim amúamu tura múuknum tuntíak téntakmauyi. Yapisha etsajai métek winchauyi. Tura kujapésa ji keá áintsankeyi. ² Nusha papin urak takakauyi. Tura imiá uunt asamtai ni nawé untsuurnumaní nayaantsanam tura menarini kukar tarimias wajasmai. ³ Tura úunt yawa kakar shiniak chicháa áinis ti kakaram untsunkamai. Nujai siati (7) ipiamtasha chichasarmai. ⁴ Nii chichasarmatai ni chichamen áartiniujai tura nayaimpinmaya chichartak “Áaráip, túrutmiai. Juka nekanashti” túrutmiai.

⁵ Tura nuyá, suntar nayaantsanmasha tura kukarsha tarimias wajama nu ni uweje untsurín nayaimpinmaaní takuimiai. ⁶⁻⁷ Tura timiai “Penké ishichik ajasai. Suntar siatia nu umpúakuinkia Yus ashí yaunchu enentáimpramia nu uminkiatatawai. Emka ujatsuk ukunam ni shuarin Yúsnan etserniua nuna ujakmiayi.” Tu timiai. Nuyá chichaak:

“Yus tuke iwiaaku pujawai. Tura imiá kakaram asa nayaimpincha, nunkancha, nayaantsancha, tura ashí nui írunna nunasha najanaiti” timiai.

⁸ Nayaimpinmaya “áaráip” túrutmia nu ataksha chichartak turutmiai “Suntar nayaantsanam tura kukar tarimias wajana nu weritiá. Turam ni untsurini papin urak takakna nu achiktá” turutmiai. ⁹ Nuyá túrutkui werin papichin seamjai.

Tura surak turutmiai “Papái. Yuátá. Tura yúamka ti yumin átatui. Tura antsu wakeminkia yapamprattame” túrutmiai. ¹⁰ Nuyá papichin suntar-numia jukin yuamjai. Tura nii turutmia núnisan wenuruinkia ti yumin nekapramjai. Tura antsu yuan wakeruinkia yapampramjai.

¹¹ Tura nuyá turutiarmai “Waketkim ataksha ashí nunkanmaya shuaran tura ni kapitiantrinchá Yus tana nu ujakartiniaitme.” Tu túrutmiai.

11

Jimiará shuar Yusaia akupkamu

¹ Nuyá karisun nekapmatia áaniun surus turutiarmai “Weme Yusa Uunt Jee nekapmartá. Túram namañ-maa-Yus-sutaisha nekapmartá. Tura nui Yusan shiir awajeena nusha nekapmartá. ² Antsu jea áarinikia yajaya shuar susamu asamtai nekapmatsuk ikiuktiá. Nu shuar ti shiir péprun Jerusarénkan kuar-entitús (42) nantu nui akupeenak mash yajauch awajsartatui. ³ Túruiniakui Wikia Wii-shuaran jímieran akatran akupkattajai. Nusha chikichik mir jimiará sianu sesenta (1.260) tsawant pujasar Winian etserkartatui. Nuka maintiu uwí nankaamasaiti. Úutkur-entsatai pushin entsaru ártatui.” Tu turutiarmai.

⁴ Nu jímiar shuarsha nayaimpiniam nakumkamu áiniawai. Uriwiu numisha jímiar tura shirikip ekeemataisha jímiar nayaimpiniam awai. Nusha ju nuká Uuntri Yusai wajainiak, jímiar akatramua nú shuaran nakumainiawai. ⁵ Shuar nin yajauch awajsataj tutai ni wenenia jinia jiki nemasri ashí ásatniuiti. Núnisan nin yajauch awajsatniun wakera nuka jákartatui. ⁶ Nu aentska Yúsnan áujmatainiak yumi yutukaip titinian kakarman takakainiawai. Núnisan entsancha numpa awajsatniun kakarman takakainiawai. Tura ashí yajauchia nujai aentsun wáitkiastinian takakainiawai. Nuna ashí ni wakeruinia nui páchitsuk túramin áiniawai. ⁷ Tura ni takatrin umikiarmatai Ti Kajen Yajasma nánkatkachu wañmaya jinia nu mesetan najata nupetak máawartatui. ⁸ Tura iwiarnatsuk ni ayashi uunt pepru jintiin ajapén tepeartatui. Nu péprunmasha ii Uuntri Jesukristuncha máawarmiayi. Nu péprunmaya shuar tuke tunaan túrin áarmatai Ejiptu tuíniak tura núnisan Sutuma tuíniak nu péprun páchiiniawai. ⁹ Tura maintiu tsawant nuyá nankaamas ashí nunkanmaya shuar jaka tepan ísar iwiarnascharti tiártatui. ¹⁰ Nu jákarmatai ashí nunkanam pujuinia nú shuar ni jakamun ti wararainiak mai sunai ajartatui. Kame nu jimiará aents Yúsnan áujmatenak ashí shuaran wáitkiasaru áarmatai ti warasarmai. ¹¹ Nuyá maintiú tsawant nuyá nankaamas jaka tepesarmatai Yus ataksha iwiaaku awajsarmai. Tura nantakiarmatai nuyá shuar nin wainkiar ti ashamkarmai.

¹² Nuyá nu nantakiaru nayaimpinmaya kakaram untsunnan antukarmai: “Jui yakí wakatarum.” Tu untsunmiai. Tutai ashí ni nemasri íimiainian yurankim amuam nayaimpiniam wáarmai. ¹³ Túmainiaj ti úurkamtai tias nakakam jeeá pepru saanakmiai. Tura siati mir (7.000) shuar jákarmai nu uujai. Chikichkia sapijmiainiak Yus nayaimpiniam pujana nuna shiir awajsarmai.

¹⁴ Jímiar wáitsatin nan̄kaamasai. Chikichik ajasua nu túrunatin ishichik ajasai.

Suntar siatia nu kachun umpuarmai

¹⁵ Nuyá suntar siatia nu, kachun umpuarmatai chícham kakaram chichainian nayaimpinmayan antunkamai. Juna tímiayi:

“Yamaikia ii Uuntrj Yus tura ni Anaikiamu Kristu ashí shuaran akupin ajasarai. Niisha tuke amutsuk akupkartatui.”

¹⁶ Nuyá paintikuatru uuntka akupin pujutainium Yusaj naka pujuarmia nu piniakum tepersar Yúsan shiir awajenak tiarmai:

¹⁷ “Uunt Yusá, ti kakaram asam Ámijjai tujinkiatin atsawai. Yáunchusha, yamaisha, tura tuke amuutsuk iwiaaku pujuwitme. Ame ti kakarmarmijjai nekas akupkatin juarme yamaikia. Tuma asakmin yumin̄sajme, tiarmai. ¹⁸ Ashí shuar kajertamkaru ajn̄ yamaikia amesha kajerkatin tsawant jeayi. Jákarusha iniantkim ni túramurj íisartatme. Turam amée shuarka shiir etserturmakua nusha, tura Aminiak enentáimturmasarua nusha, tura Ámin shiir awajtamsarua nusha ashí mash ti shiira nuna súakum akiktatme. Antsu ju nun̄kan emesniuka ashí emesratniunam akupkattame.” Tu tiarmai.

¹⁹ Tuíniakui Yusa Uunt Jee nayaimpiniam ana nu uranmiatai wakenmaani Chícham Aarma Chumpítiai paant amai. Túrunamtaí peemsha, ipiamtasha, cháarpisha, uusha amai tura michasha ti kakekamai.

12

Nuwasha tura Ti Kajen Yajasmasha

¹ Nuyá nakumkamu ti enentáimpramnia nayaimpiniam wantinkiamai. Nuwá etsajaj̄ penuarma wantinkiamai. Nawēsha nantunam ekeemai. Tura múuknum tuse yaan etsen̄krakuyi. ² Nu nuwá ajamtin asa jurertaj tusa wáitiak ti kakantar uutmiai.

³ Tumaj̄ ataksha ti enentáimpramnia nayaimpiniam wantinkiamai. Ti Kajen Yajasma kap̄aaku wantinkiamai. Muukēsha siati asa siati akuptai tawaspan etsen̄kraku ármai. Tura kachur̄isha tiásauyi. ⁴ Menaintiu nakakam jeeán yaan ni ujukéjaj̄ japiki akakermai. Tura nun̄ká utsamai. Nu Ti Kajen Yajasma nu nuwá jatema nūj wajasmai. Júrmataik yuruataj tusa wajattsamai. ⁵ Tura nuwasha áishman̄kan jurermai. Nu uchi uunt ajas ashí nun̄kanam ti kakaram akupkatin asa, nu uchi akupin pujutainium Yus pujana nūj junakmiai. ⁶ Tura núwaka atsamunam pisarmai. Nūj pujustinian Yus iwiarturmai. Tura chikichik mir jimiarā sian̄tu sesenta (1.260) tsawant ayurnat tusa akupkamai. Nuka menaintiu uwí nan̄kaamasaiti.

⁷ Nuyá nayaimpiniam meset amai. Nayaimpinmayā suntara kapitiántri Mikiar ni suntarj̄jaj̄ Ti Kajen Yajasmajaj̄ máanaikiarmai. Ti Kajen Yajasmasha ni suntarj̄jaj̄ ti máanaikiarsha ⁸ nupetmakcharmai. Túramtai nayaimpinmayā j̄iki akupkamuyi. ⁹ Núnisan̄ Ti Kajen Yajasma ashí ni suntarj̄jaj̄ nun̄ká akupnakmai. Nu Yajasmasha iwianchi kapitiántri Satanás tutainti. Yáunchuyā napiiti niisha. Ashí nun̄kanmayā shuáran anañniuiti.

¹⁰ Nuyá nayaimpinmayā kakaram unsumman antukmajai. Tura timiai: “Uunt iwianch ii yach̄in yajauch áujmatin j̄iki akupkamu asamtai yamaikia ii Yusri uwemtikratniusha tura ni kakarmar̄in iniakmastincha tura akupkatniusha jeayi. Anaikiamu Krístusha ashí akupin ajastincha

jeayi. Tura uunt iwianch ii yachin tsawaisha káshisha iniaitsuk Yusaí yajauch áujmatniua nuna ¹¹ íksan ii yachi nupetmakarai. Yususamu murikiu numpea áinis Jesukrístu numpejai nupetmakarai. Niisha jákatniuitkiusha surimiatsuk nekas-chichaman páchitsuk etserkarmai. Nujajisha uunt iwianchin nupetkarmai. ¹² Tuma asamtai nayaimpiniam pujarmena nusha warastarum. Antsu nunká tura entsá pujarmena nusha uunt iwianch atumin tarutmarmatai, maa, waitnentajrume. Ni tsawantri ishichik ajatesman nekáa ti kajekuiti.”
Tu timiai.

¹³ Nuyá Ti Kajen Yajasma nunká ajapna nuwa áishmankan jurerma nuna áintramai. ¹⁴ Turakui nuwan uunt nanapen churuwia nanapea áinis sunasmai. Nujai nanamuk yáunchuya-napiya pisar atsamunam wemai. Tura ni ayuratniunam menaintiu uwí nuyá sais nantu pujusmai. ¹⁵ Nuyá nu napi ni weneya entsá jiki nujan krumamai nuwan ajekrataj tusa. ¹⁶ Túrasha nunka nuwan yayak nakaak nu entsan mash ukuyámai. ¹⁷⁻¹⁸ Túramtai nuwan ti kajerak ni weeá chíchik írunna nujai máaniaktaj tusa wemai. Nu shuarsha Yus akupkamun umirainiak Jesusan ti shiir áujmaténakui, niijjai máaniaktaj tawai.

13

Nuyá Yajasma jímira nu

¹ Nuyá nayaantsa káanmatkarin wajasan nayaantsanmaya Yajasma jiniun wainkiamjai. Muukésha siátitiat kachuri tias tura akuptai tawaspasha tias armái. Ashí muuken Yúsan yajauch chicharin tu áarmauyi. ² Nuj wainkiamaj nu Yajasma nekas uunt yawáa áinniuitiat nawenka chai nawea áinniuyi. Wenésha nekas kajen yawáa áinniuyi. Tura Ti Kajen Yajasma Entsayá Yajasma ni kakarmarincha tura ni akupkatniurinchá susamai nujai ti kakaram akupkati tusa. ³ Entsayá Yajasma muuké chikichkin jakamnia awatmian wainkiamjai. Túrasha péker awajnasmai. Túramtai ashí nunkanmayá shuar nuna ísar ti enentáimturar nemarsarmái. ⁴ Túrawar nin tikishmatrar shiir awajsar “¿Yaki jujajisha jeá. Imiá kakaram asamtai yaki niijjai máanaikminiait?” tiarmai. Tura Ti Kajen Yajasma ni kakarmarin Entsayá Yajasma susa asamtai ashí shuar nincha tikishmatrarmái.

⁵ Núnisan nu Entsayá Yajasma waantu enentáimtumak Yúsan yajauch chicharkatniusha tsankatnakmai. Tura kuarentitús (42) nantutin kakaram akupkatniun sunasmai. ⁶ Núnisan túrak Yúsan yajauch áujmatuk ni náarincha ni Jeencha tura ashí ni shuari nayaimpiniam pujuinia nunasha katsekkarmai. ⁷ Tura Yusna ainia nujai mesetan najana nupetkatniun tsankatnakmai. Tura ashí nunkanmayá shuaran akupkatniun tsankatnakmai. ⁸ Túramtai ashí shuar tuke iwiaaku átinia nu papinium ni naari yámankamtaiknumia anujkamu atsúarma nuka nu Yajasma tikishmatrarmái. Nu papincha Murik jaka nantakmia nu takakui.

⁹ Shuar juna ántakka enentáimprati:

¹⁰ “Shuaran emetá juinia nusha emetnattawai.

Núnisan shuaran nankijjai mainia nusha nankijjai mantamnattawai.”

Tuma asamtai Yajasma mesetan najanamtai Yus-shuar Yus iistí tusar tuke enentáimtusar katsuntsar pujustin áiniawai.

¹¹ Nuyá chíchik Yajasma kukariá wáakun wainkiamjai. Nusha murikiu áanin jimiará kachurtiniuyi. Tura Ti Kajen Yajasma áinis kakaram chichaakuyi. ¹² Niisha Entsayá Yajasma kakarmarin súam akupniuyi. Tura ashí nunkanmayá shuaran “Entsayá Yajasma penké jaa tsuarma nu, shiir awajnasti” timiai. ¹³ Núnisan shuarti túrachminian ti turin asa ashí

shuar íimiainaj̄n nayaimpinmayā jinia nunká ajuarmai. ¹⁴ Tura Entsayā Yajasma súam aents túrachminian ti turak ashí nunkanmayā shuaran anankawarmai. Túrak Entsayā Yajasma nakumkamur̄in najanawarat tusa akupkamai. Túramtai puniajaī penké jakamnia awatmia péñker ajasma nuna nakumkamur̄in najanawarmai. ¹⁵ Kukarīa Yajasma kakaram sunasmai. Nujaī Entsayā Yajasma najanamun iwiaaku awajsatniua áintsan̄ ichachkiamai. Túram ashí níniak shiir awajeacham máatniun susamai. ¹⁶ Nu arantcha ashí shuar anujmamprarat tusa akupkamai. Uuntcha uchisha kuítrinniusa kuítrinchasha ankantcha ankantchasha ashí ni nijiāincha tura wakerakka untsuur̄incha anujtuktiniuyi. ¹⁷ Entsayā Yajasma náar̄in tura wakerakka ni náar̄i númirur̄in anujtuktiniuyi. Túrachuka sumatnasha sumakchamniuyi, surutnasha surukchamniuyi. ¹⁸ Wats, wi tájana ju nekaatniuka ti nekas enentáimtustiniaiti: Entsayā Yajasma númirur̄i áishmañka númirur̄i asa sais siañtu seséntisáisaiti (666). Ashí ti neka ainia nú shuar Entsayā Yajasma númirur̄in nekapmar nin nekaati.

14

144.000 shuar Yúsan kantampruawarma

¹ Nuyá Murikiun Seun̄ náinnium wajan wainkiamjai. Níjiāisha siañtu kuaréntikuátru mir (144.000) shuar wajaarmai. Nusha nijiāi Murikiun náar̄incha tura ni Aparí náar̄incha anujtukma aarmai. ² Ti untsur̄i árpan nayaimpiniam túntuiniak teer awajenak kanusa uuntrī nujan̄krak téter ajá núnisan̄ antukmajai. Ti kakaram ipiamta núnis amai. ³ Nu tuntuiyamujaī siañtu kuaréntikuátru mir shuar akupin pujutainium naka wajasar yamar̄am kántan kantamáwarmai. Niisha kuation tan̄kunmasha tura paintikuatru uuntnumsha naka wajasar kantamáwarmai. Nu kántanka chíkichka nekaachmin armai. Aya nu siañtu kuaréntikuátru mir shuarka jú nunkanmayā shuarnumiā uwempraru ásar nu kántan kantamiarmai. ⁴ Nu shuarsha nuwajaī yajauch ajascharu ásar ti shiir áiniawai. Túrawar Murik weana nuj̄i nemarainiawai. Ju nunkanmayā shuarnumiā uwempraru ásarmatai Yussha tura Muriksha ti shiir enentáimtiarmai. Niisha emka juukma ti shiira núnisan̄ armai. ⁵ Nu shuar penké wáitruachu ásar Yúsāisha ti shiir tunáa máatrachu armai.

Menaintiu suntar chichaman etserainiawai

⁶ Nuyá nayaimpiniam suntar nanamun wainkiamjai. Nusha uwempratin chicham tuke amuukashtinia nuna ashí nunkanam pujuinia nú shuaran ujakartiniuyi. ⁷ Nusha ti kakantar untsukum timiai: “Yus ashamkatarum. Niñki shiir awajsataram. Yamaikia ashí shuaran súmamtikiawartin tsawant jeayi. Nayaimpincha nunkancha nayaantsan̄cha ashí entsan̄cha najana asantai shiir awajsataram.”

⁸ Nuyá chíkich suntar, jímiara nu, taa timiai: “Pai, Uunt Papirúnia pépruka penké meserai. Niisha tuke tsanirmaua núnisan̄ ashí shuaran anampratniua núnisan̄ utsuurmai. Tuma asa niisha nú shuarjaī nupetnak tuke emesnarai.”

⁹ Nuyá chíkich suntar, menaintiua nu, taa timiai: “Shuar Entsayā Yajasma n̄cha tura ni nakumkamur̄incha shiir awajeakuñkia tura nijiāin̄iumsha uwejn̄umsha ni naarī anujtukmaitkuñkia ¹⁰ Yus nin kajerak ti asutiáttawai. Yapá pachimprachman áartinia áintsan̄ ti kajerkattawai. Túramtai asupri ti tsúer keá nujaī jinium wáitsartatui. Yusa suntarī tura Murik íimmianum apenáwar jinium wáitsartatui. ¹¹ Ni wáitsatniurī ji esaak kajintsuk tuke mukuñtia nuniskete. Entsayā yajasma n̄ tura ni nakumkamur̄in shiir awajeenak ni naarī anujmamainia nuka tsawāisha káshisha ayamtsuk

wáitsartatui. ¹² Nu asamtai ni chichamen umirainiak Yusa ainia nuka Krístun ti shiir nemarainia ásar nu tsawantaj iturchatnum pujuiniak katsun-tratin áiniawai.”

¹³ Nuyá nayaimpinmaya chichaman antukmajai. Nusha turutmiai “Ju áatratá: “Uunt Jesusan umirainia nu yamá jakarusha tura ukunam jakarusha ti shiir pujusartatui.” Tu aartá” timiai.

‘Núnisan Yusa Wakaní tawai. “Eta, ti takasaru ásar jakar yawerman ayamprartatui. Tura ti penker túrawar akinkiartatui” tawai” turutmiai.

Jú nunkanam arakma juukma

¹⁴ Nuyá yuran kim pújun wainkiamjai. Tura yuranminiam Aents Aja-sua nuna eketun wainkiamjai. Akuptai tawaspan kurijijai najanamu et-senkrakuyi. Tura machitian éren takakuyi.

¹⁵ Tura chíchich suntar Yusa Uunt Jeeñiá jiinki yuranminiam eketun kakan-tar chicharuk timiai “Árak júuktin tsawant jeayi. Machitrumjai tsupiram juuktá.” ¹⁶ Tutai yuranminiam eketu ni machitrijijai nunká arakman tsupir juukmai.

¹⁷ Nuyá chíchich suntar Yusa Uunt Jee nayaimpiniam ana nuyá jíinkimiai. Niisha ni machitri éren takakuyi. ¹⁸ Tura chíchich suntar namañ maar Yus-sútainmaya jíinkimiai. Niisha jinia wáinniuyi. Tura máchit ti éren takakun kakantar chicharuk timiai “Machitrum ti érea nujai uwa nunká arakma nu tsupiram juuktá. Mash tsamakarai.” ¹⁹ Tutai suntar ni machitrijijai ashí nunkanmaya uwa neren tsupir juukmai. Tura neketainiam chumpiamai. Nu neketai Yus ti kajerak shuáran ti asutiáta nuna nakumeawai. ²⁰ Tura uunt péprunmaya arantach ijiurarmai. Tura neketainmaya numpa jíinkimiai. Nu numpa tres siañtu (300) kirumitrua nuñ pajamar kawayu nujijijai métek ajasmai.

15

Nayaimpinmaya suntar amúamunam wáitkiastinia nuna pininnumian ukaini-awai

¹ Nuyá ashammian ti enentáimpramnian nayaimpiniam wainkiamjai. Siati suntar amúamunam wáitkiastinia nuna takusarmai. Nujai ju nunkanam yajauch shuáran ti wáitkiasar Yus kajeamun umirtatui.

² Nuyá antumianka áiv 20 Tura uunt péprunmaya aranntsañ ti saar jijijai pachimpramun wainkiamjai. Ni káanmatkarincha Entsayá Yajasman tura ni nakumkamurincha nupetkarma nu nuñ wajaarmai. Tura nin arpa tun-tuitiañ Yus súsarmai. ³ Túramtai kantamáwarmai. Yusa yaintri Muisaisa kantarincha tura Murikiu kantarincha kantamainiak tiarmai:

“Uuntá, ashí tujinchaitme. Ti penker tura ti enentáimturmin ashí najanaitme.

Ashí Uunt Akupin asam ashí nekasa nu túrasha péñkera nu túriniaitme.

⁴ Uuntá, ¿yaki ashampromkachatí? Tura yaki ti shiir awajtamsachatí?

Aya Amek ti shiir tunaarinchaitme. Ashí nunkanmaya shuar ame ti shiir túramun wáinkiar Aminiak jeartamar ti shiir awajtamsartatui.”

Tu kantamáwarmai.

⁵ Nuyá atak Yusa Uunt Jeeñ íisan, Ti Shiir Tesaamun uranniun wainkiamjai.

⁶ Tura Ti Shiir Tesaamunmaya siati suntar siati wáitkiastinjai jíinkiarmai. Niisha ti shiir pújun entsaru armái. Netsepnumsha kurin emenmama armái.

⁷ Nuyá kuaru tan kunmaya chikichik kurí pininkian súsarmai. Nu pinin tuke iwiaaku Yusa kajetairijijai piaku armái. ⁸ Tura Yusa kakarmari ti ashammai Ti Shiir Tesaamunam mukuñtia núnis piakmai. Túramtai nu siati suntar wáitkiastinian ukarar amuniatsañ Yusa Jeeñ wayachminiuyi.

16

Wáitkiastin piniñ ukarma

¹ Nuyá Imiá Shiir Tesaamunmaya ti kakaram chichaamun antukmajai. Nusha siati suntaran tiarmai “Nuñká werum Yusa kajetairi siati piniñnum ana nu ashí ukartarum.”

² Tutai emka suntar we, piniñnumiã kukar ukarmai. Túramtai ashí shuar Entsaya Yajasma náarin anujmamprar ni nakumkamurin shiir awajiarma nuna ti najamin kuchap jiintiurarmai.

³ Nuyá chíkich suntar jímiara nu, we Yusa kajetairin nayaantsanam ukarmai. Túramtai nayaants jakáa numpéa áinis ajasmai. Tura ashí nuí pujuiña nu kajinñkarmai.

⁴ Nuyá suntar menaintiua nu, entsanam tura púkununmasha ukarmai. Túramtai ashí numpa ajasarmai. ⁵ Nuyá suntar entsá wáinniu nuna chichamen antukmajai. “Uuntá, amek ti penker Yus asam jútikiame. Yáunchusha tuke pujú asam ti shíraitme. ⁶ Iis, nu shuar amée shuárumincha tura ame chichammin etserniuncha máawar ni numpen ukatraru áarmatai Amesha núnismek numpa áarume. Maa, páchitsuk áitkianatin áiniawai.”

⁷ Tutai namañ-maa-Yus-sútainmaya chichaman antukmajai. “Eta, Uuntá. Nekas kakaram asam ashí ti tujinchaitme, Nekas túratniua nu ti penker túrin asam nu shuar túramujai métek akiruitme, timiai.”

⁸ Nuyá suntar kuatrua nu, tsawai nantunam ukarmai. Túramtai jijiai shuáran esaamujai wáitkiastin kakaram sunasmai. ⁹ Tura shuar ti sukuám wáitarmia nu, nu wáitkiastinian nérenniun Yusan yajauch chicharkarmai. Tura ni tunaarin enentáimtsuk Nin shiir awajsatniuncha penké nakitrarmai.

¹⁰ Nuyá suntar senkua nu, Entsaya Yajasma akupin pujutairin ukarmai. Túramtai ni nunkeen ashí kashi ajasmai. Tura shuar ti najaimiainiak iniauncha esamiarmai. ¹¹ Tura nújajisha yajauch túratniuncha iniaisacharmai. Antsu kuchaprijajisha tura ti najaimiainiak wáitainiak nayaimpinmaya Yusan ti yajauch chicharkarmai.

¹² Nuyá suntar saisa nu, Eupratis entsanam ukarmai. Túramtai kuyuámai. Nujai nantu tátainmaaniã akupin taarti tusa jintiamnamai.

¹³ Tura nuyá juna wainkiamjai. Ti Kajen Yajasma weneyasha, Entsaya Yajasma weneyasha tura núnisan penké Kukaria Yajasma ántar yúsnan etserniua nuna weneyasha puachia núnin yajauch wakan menaint jíiniarmai.

¹⁴ Íwianch áiniak aents tujintiamun túruiniak ashí nunñkanmaya akupniun irurarmai. Ti Tujincha-Yusai ni uunt tsawantri jeamtai mesetan najanatai tusar weriarmai. ¹⁵ (Yamá Kristu “Aneara pujustarum, tawai. Nékachmanum kasa núnisnak jeattajai. Kánutsuk tuke iwiarnar pujak ni entsatairin penker wáinia nú shuar ti shiir átatui. Misuchu asa natsaarchattawai.” Tu tawai.)

¹⁶ Tura yajauch wakan uunt akupin áinian Armajetún nunñkanam irurarmai. Israer-chichamnum nu nunka tu anaikiamuiti.

¹⁷ Nuyá suntar siatia nu, nasenam ukarmai. Túramtai nayaimpinmaya Yusa Uunt Jeeniã ti kakaram chicham Yus akupin pujutainmaya chichaak “Mash uminkiai” timiai.

¹⁸ Tura nuyañka peemsha, chárpisha, ipiamtasha ajamai. Tura nunñkasha ti kakaram úurkamai. Maa, aents jú nunñkanam yámankamtaik pujuarmia nuyá júnis úurkamuka atsuwiti. ¹⁹ Ti Uunt Péprusha menaint nakantramai. Ashí nunñkanmaya péprusha saanakiarmai. Nuñsha Yus ti kajerak Papirúnia pépruncha kajinmattsuk ni kajetairin yapá umutaia áintsan aarmai. ²⁰ Entsá ajapén atentrasa tura murasha menkaramai. ²¹ Núnisan nayaimpinmaya

uunt kaya núnisan micha kákeramai. Ti uunt áiniak kintiarjaj métek kijin armai. Shuarsha nujaj ti wáitiainiayatan áyatik Yúsan yajauch chicharkarmai.

17

Tsanirmatai nuwá asutiámu

¹ Nuyá siati suntarnumiá chikichik taruti turutmiai “Winitia. Tsanirmatai nuwá ti asutiátniun iniaktustatjame. Nu nuwá nayaantsanam uku eketui. ² Ashí ju nunkanmaya akupin nijijaj tsanirmawaru áiniawai. Núnisan ashí ju nunkanmaya shuar, nu nuwá tsanirmatniun tsankateam, nijiamanch umartinia áintsar nijijaj ti yajauch túrawar nampekarmai.” Nuna taku Yusnumiá kanaktinian nakumkamai. ³ Nuyá mesekranam kampuntin atsamunam jurukmiai. Tura nuj Yajasma kapaakunam nuwá eketun wainkiamjai. Nu Yajasma manmasha ashí Yúsan yajauch chichareamu áatramuyi. Muuke siátitiat kachurj tiásauyi. ⁴ Nu nuwasha tarachin yamakai kapaakujaisha ti shiir iwiarmamar entsaruyi. Kurijjaisha, shírmach kayajaisha, ti shiir sháukjaisha iwiarmamprauyi. Kurí pininkian mujmiainniasha tura ashí ni tsanirmatairj imiá yajauch armia nunasha piakun ajaamak takakauyi. ⁵ Nijiainiumsha ni naaria áintsan yúpichuch nekaachminia nu júnis áarmauyi: UUNT PAPIRÚNIA, Ashí Tsanirmauncha tura Ashí Ju Nunkanam Mujmiainian Túrinia Nunasha Nukurinti. ⁶ Nu nuwasha Yus-shuar Krístunun etserkar máawarma ainia nuna numpen nampekuyi.

Nuna wáinkian ti enentáimturmajai. ⁷ Túrunamtai nayaimpinmaya sun-tar túrutmiai “¿Urukamtai imiá enentáimtam? Wats, ashí nuwanun paant ujaktatjame. Núnisan yajasma ekenak júana nunasha paant ujaktatjame. Muukésha siátichukait tura kachurisha tiáschak áinia. ⁸ Nu yajasma wáinkiam nuka yaunchu pjuwiti tura yamaikia juj pujachiat amúamunam tuke játsuk nánkatkachu wáanmaya jíinkíttiawai. Shuar nuna wáinkiar ni naarij tuke iwiaaku pujutai papinium yámankamtaiknumiá anujtukchamua nuka nu yajasma ashankartatui. Nu yajasma yaunchu pujú yamaikia atsayat atak wantinkiattawai’ turutmiai.

⁹ ‘Nekas neka ainia nu júna enentáimturarti: Siati muukenka siati náintian nakumui. Nu nuwá nuj eketui. ¹⁰ Núnisan ni siati muuke siati akupniun nakumui. Kame senku akupniuka nankaamasaru ainiawai. Chikichik tuke akupniuiti tura chíkichka tuke taatsui. Nii taasha núkap tsawant akupkashtatui. ¹¹ Nuyá ashí ukunmanka yaunchu amia nú yajasma wantiniak nujaj uchu akupin ajastatui. Túmaitiat chíkich siati akupniujaj iruram métek enentáimpranniaiti. Tura nu yajasma yamaikia atsayat wantiniak akupak umik tuke emesnartinnium wétatui’ turutmiai.

¹² ‘Tias kachurj wáinkiam nuka tias akupin tuke akupeenatsna núiti. Ni-isha nu yajasmajaj métek penké ishichik tsawant akupin ajasartatui. ¹³ Ju tias akupniusha métekrak enentáimiainiak ni kakarmarj yajasma súsartatui nújaisha akupkat tusar. ¹⁴ Murikjaisha mesetan najanawartatui. Túrasha Murik nupetkartatui. Niisha uuntjaj nankaamas Uunt asa tura núnisan akupniujaj nankaamas Akupin asa nupetmaktatui. Tura Nijijaj írutraa nu, Yus Winia atí tusa achikma ásar tura Nin tuke umirin ásar Nijijaj nupetmakartatui.’

¹⁵ Suntar tuke chichartak turutmiai ‘Tsanirmatai nuwá nayaantsanam uku eketu wáinkiachumek. Nu nayaantsaka ashí nunkanmaya shuáran nakumeawai. ¹⁶ Tura tias káchuka yajasma num wáinkiam nu, tsanirmatai nuwan nakitrar ajapawar misú ikiukiartatui. Ni ayashíncha yuawartatui

tura áesawartatui. ¹⁷ Nu akupniu enentáin Yuska ni wakeramurin apujsaiti. Nii timia nu umintsain akupniusha métekrak enentáimprar ni kakarmarin takamtsuk yajasman súsatniun enentáimtikramai. ¹⁸ Nuwá wáinkiam nuka ashí nunkanmaya akupniun akupeana nu pépruiti.”

18

Papirúnia emesramuiti

¹ Nuyá nayaimpinmaya suntar táarun wainkiamjai. Ti kakaram akupin asa nunkancha tsáapin awajsamai. ² Tura ti kakantar chichaak timiai “Pai, Uunt Papirúnia penké meserai. Tura yamaikia íwianch matsamtaisha ashí yajauch wakaní pujutairisha ajasai. Muijmiais nanamtincha tura ashí yajauch nanamtin ainia nusha nuí pasunmainiawai. ³ Nu péprunmaya shuar tuke tsanirmaua núnisañ ashí nunkanmaya shuaran anampratniua núnisañ ni ti yajauch turamujai utsuurmai. Núnisañ ashí jú nunkanmaya akupin Yúsan iniaisar niijjai tsanirmawarua áinis áiniawai. Tura shuarsha ni yajauch wararmajai ti kuítrintin ajasaruiti.” Tu timiai.

⁴ Nuyá nayaimpinmaya ti kakantar chichaman antukmajai. “Wíi shuaraitrumna nuka nú peprunmaya jíinkitiarum. Túrachkurmeka ni tunaari jumamkirum ni wáitsatniurincha pachiinkiatarme. ⁵ Ni tunaarisha ti piak nayaimpiniam jeastatuk ajasai. Tuma asantai Yus ni tunaarin kajinmatkichuiti. ⁶ Ni tunáa túramujai métek akikiam ataksha nuna nankaamas métek patattsata. Ni yajauch túramu nijiamchin ashí áararma núnisañ nuna nankaamas ti wáitsatin nijiamanch pachimpruram susata. ⁷ Waantu enentáimtumak yajauchin wararsama nujai métek ti wáitkiastá yamaikia. Tunáan ti túriniaitiat ni enentáinkia enentáimias “Uunt Akupniuitjai. Wajechu asan penké wáitsashtiniaitjai” tu enentáimtumawai. ⁸ Tuma asantai ti wárik chikichik tsawantai ni wáitsatniuri tarittiwai. Jákatniusha ti wáitsatniusha tura tsukasha tarí ashí jijjai ekeemankattawai. Uunt Yus ashí Tujincha nu kajerkamú asa nujai asutniáttawai.” Tu timiai.

⁹ Ashí nunkanmaya akupin niijjai tsanirmawaru ainia nu ashí yajauchin niijjai wararsaru ásar nu pepru esaak múkuint ajakui eararmai. ¹⁰ Ti esaak wáitkiakui nuí pachiinkiar wáitsatniun ashamainiak arant wajasar tiartatui “Maa, Papirúnia ti uunt pépruitiat nekas wáitnenmai ajawai. Imiá wárik ni wáitsatniuri tarini.”

¹¹ Núnisañ ashí nunkanam súrin ainia nusha nu péprun ti kuntuts enentáimturar earartatui. Ni surutain itiamun ¿yaki sumarkat? ¹² Kame juna itiaru áiniawai: kurincha, kuítniasha, kaya shíirmachincha, ti shiir sháuknasha, ti péñker tarachniasha, akupin entsatai shiirmachin yamakaincha kapaaniuncha, sétancha, itiaru áiniawai. Núnisañ ashí kunkuin numincha, ti shiir awara najanamuncha, ti shíiram numincha, yanjú jiruncha, penké jiruncha, mármur kayancha itiaru áiniawai. ¹³ Núnisañ ishpiñnasha, nusháa kunkuinniasha, mira kunkuinniasha, umutaincha, asuitincha, trikiu nerenchá, tura trikiu ti péñker nekenmancha itiaru áiniawai. Núnisañ áintstai tanuncha, murikniasha, kawaincha ni káurijjai, tura nú arantka shuárnasha suruktinian itiaru áiniawai.

¹⁴ Tura nu péprun tiarmai “Numí nerén ti wakeruk súmauya nu yamaikia nuí atsawai. Ashí ni kuítrisha tura ashí ni péñkerisha tuke penké amuukayi.” Tu tiarmai.

¹⁵ Ashí nuna súrin armia nu, nuna surukar kuítrintin ajasaru ásar, ti wáitsamun ashamkar arant wajasar earartatui. ¹⁶ Túrawar tiartatui “Maa, uunt pépruitiat ti wáitnenmai ajakai. Nuwá ti péñker iwiarmampra áinis nuyá shuar akuptai tarachin yamakaiijai kapaaku entsarmai. Kurijjaisha kaya ti

shíirmachijiaisha tura ti penker sháukjaisha ti shiir iwiarmampraruyi. ¹⁷ Ti wárik ashí jū kuit amukaiti.” Tu tiarmai.

Ashí uunt kanú kapitíántrisha, ashí nayaantsanam katiinia nusha, ashí kanú wiánniusha, tura ashí kanú nérennurisha árantak wajasarmai. ¹⁸ Tura pepru esaak múkuint ajan wáinkiar ti kakantar úutainiak tiarmai “Timiá shiir pepru atsuwiti.” ¹⁹ Tiar ti kuntuts pujuiniak awatmamar kakantar úutainiak tiarmai “Maa, ti uunt pépruitiat ti wáitnenmai ajakai. Ashí uunt kanu nérentin nayaantsanam niijjai takasar kuítrintin ajasarmai. Tura ti wárik mash emesnarai.” Tu tiarmai.

²⁰ Antsu nayaimpiniam pujarumna nu, ashí Yus akatramutirmesha, ashí Yusna etserniutirmesha, tura ashí Yus-shuar árumna nu ni wáitsamujai waras-tarum. Nu wáitsamujai atumin yajauch awajtamsamarmena nuna yapajtiur-makurme.

²¹ Nuyá ti kakaram nayaimpinmaya suntar ti uunt neketai kayan juki nayaantsanam ajun timiai “Júnisan uunt pepru Papirúnia emesnar atakka wainniakchatin tuke menkakattawai. ²² Tura atakka jantsemma piñkiuisha tampursha shakapsha antunkashtatui. Nu arantcha nuñkia shuar penké takakmaschartatui. Túramtai nekeamusha antunkashtatui. Ashí mitia átatui. ²³ Shiripkincha ekeemakchartatui. Nuatma nampersha antunkashtatui. Nuikkia ni shuari súrin arma nu ashí nunkanam nankaamantu armai. Tura ashí nunkanmaya shuaran waweatniua áintsan níya núnis ajasarat tusa anankawarmai. Túrasha núnisan ti kakarmaitiat jū mash túrunayi.” Tu timiai.

²⁴ Kame ni akupkamujai penker shuar ti mantamnawaru asamtai nu péprunam ashí yaunchu Yusna etserniu numpesha, ashí Yus-shuara numpesha tura penker shuar ashí nunkanam maamu ainia nuna numpesha nu paant wáinkiamniaiti.

19

¹ Nuyá nayaimpinmaya ti untsurí aents kakantar untsuainian antukmajai.

“Jū ti shiir enentáimtumainti. Yuska uwempratniuncha, nekas shiir átinniasha, nankaamaku átinniasha, tura ashí kakarmancha nekas nérenniuiti.

² Niisha aya nekas penker túratniua nuna túrin asa ti nukap tsanirmaun ashí shuaran tsanirijjai utsuun ti asutiáyi. Nin ti wáitkias ashí ni shuari máawarman yapájmiátkaiti” tiarmai.

³ Ataksha kakantar untsuainiak tiarmai:

“Ti shiiraiti. Nii wáitsatin ji esaak tuke kajintsuk múkuint ajawai.” Tu tiarmai.

⁴ Tuíniakui paintikuatru uunta nu tura kuatru tanakusha nunka piniakumawar akupin pujutainium Yus pujana nuna shiir awajsarmai. Túrawar “Imiá nekasaiti. Ti shiir túriniaitme” tiarmai. ⁵ Akupin pujutainmaya chícham jíinkimiai.

“Yusna takarniutirmesha tura ni umirniutirmesha, úuntaitkiurmesha úchitkiurmesha kapitíánitkiurmesha péejchachitkiurmesha, ii Yusrí tuke shiir awajsatarum.” Tu timiai.

Murik nuatnaikiatin namperi

⁶ Nuyá ti untsurí aents chichainiak kanusa uuntri nujanrak téter ajá núnisan antukmajai. Ti kakaram ipiamta núnis amai.

“Tí shiiraiti, tiarmai. Ii Uuntri Yus ashí tujincha asa ashí akupkatniun nankaamayai. ⁷ Tuma asamtai shiir enentáimsartai. Murikiu anajmarmari shiir iwiarnarmatai ni nuatnaikiatin tsawantri jeayi. Tuma

asantai ti shiir warasar nincha shiir awajsatai. ⁸ Murikiu anajmar-marĩkia iwiarnarti tusa ti shiir pushí sunasmai. Nusha yamaram máatrachu asa ti pújuiti.” Tu tiarmai.

Nu pushí Yus-shuar péñker túramun nakumeawai.

⁹ Nuyá nayaimpinmaya suntar turutmiai “Ju áatrarta: “Murik nuatma námpernam ipiaamu ainia nuka ti shiir warasarti.” Tu aartá, turutmiai. Juka Yus timia asa imiá nekasaiti.”

¹⁰ Takui nu suntaran shiir awajsataj tusan tikishmatramjai. Túramtai turutmiai “Peñke áinkiaip. Wisha Yusa yáintrintjai ámijjai métek tura yat-sumjai métek Kristu nekas chichamen tuke umirin ainia nu. Yúsak shiir awajsatniuiti.” Tu turutmiai.

Kame Kristu imiá nekas timia nuna ashí Yúsnan etserainia nú shuar paant awajkartin áiniawai.

Kaway pújunam eketna nu

¹¹ Nuyá nayaimp uranniun wainkiamjai. Nuñ kaway puju wantinkiamai. Nu kawaynium ekeema nuna naari Ti Peñker Umin tutajyi. Núnisan Ti Nekas Turin tutajyi. Ti peñker Akupin asa aya nekas péñker túrak mesetan najanaiti. ¹²⁻¹³ Ni jiiisha jijjai métek keeármái. Múuknumsha akuptai tawaspan untsurí etsenkrakuyi. Nuñ ni naari Yus Chicham áarmauyi. Túrasha tana nuna Niñki takamtsuk nekaamai. Numpajai enkerman entsaruyi. ¹⁴ Ti untsurí nayaimpinmaya suntar mesetnum weena áintsar kawainium ekemkar ti shiir pújun entsaru Nin nemariarmai. ¹⁵ Nu suntara Uuntri weneeya, ashí nunkanmaya yajauch shuaran máatin, puniá mai ere tsakatskatin jijnmiais. Tura jirujai asutiátniua áintsan ti kakaram akupkattawai. Túrak Ashí Tujincha Yusa kajetairi ti kakarma nujai shuáran asutiáttawai. Uwa nekenkar ijiuratniua áitkiasan wáitkiasartatui. ¹⁶ Ni pushirincha makuincha ni naari áarmauyi: Ashí Akupniun Akupin tura Ashí Uunta Uuntri.

¹⁷ Nuyá tsawái-nantunam suntaran eketun wainkiamjai. Nusha nayaimpiniam nanamtin nanamainian kakantar untsuak timiai “Yusa uunt namperin yurumáitiarum. ¹⁸ Akupniu namankésha yuítiarum. Suntara kapitántri namankésha, kakaram suntara namankésha, kaway namankésha tura eketainia nuna namankésha, kame ashí shuara namankésha nankaamantu ainia núnasha tura peñké shuar ainia núnasha yuítiarum.” Tu untsukmai.

¹⁹ Tura nuyá Entsaya Yajasmacha tura jú nunkanam akupin ainia nunasha ashí ni suntarijjai wainkiamjai. Niisha kawainium eketka nujai tura nuna suntarijjai mesetan najanatai tusar iruntrarmai. ²⁰ Tura nu mesetnum Yajasmacha tura Kukariá Yajasmacha, peñké ántar yúsnan etserniua nu, mai achinkiarmai. Nuikkia Entsaya Yajasma ni kakarmarin súam nu Kukariá Yajasmacha aents tujintiamun ti turak shuáran anankawarmai. Túramtai nu shuar Entsaya Yajasma náarin apujmamsar ni nakumkamurin shiir awajsarmai. Tuma asantai Entsaya Yajasmacha tura Kukariá Yajasmacha íwiakuk asuprijjai ti kea nu ji-antumiannum apeáwarmai. ²¹ Chíkichka kawainium eketkanumiá puniá tsakatskatin weneya jijnmia nujai mantamnawarmai. Túramtai nanamtin ni ayashin yuawar ejemakarmai.

20

Kristu mir uwí jú nunkanam akupkattawai

¹ Nuyá nayaimpinmaya suntar táarun wainkiamjai. Nusha nánkatkachuwá yawirin tura jinjatai jirun kampurman takakuyi. ² Nu suntarsha Ti

Kajen Yajasman jiru kampurmajai jinkiamai. Nu Yajasma iwianchi kapitiántri Satanas tutainti. Yáunchuya-napiti niisha. Tura nu iwianchin jinkia mir uwí pujusat tusa ³ nánkatchu waanam epenmiai. Tura waiti uraichminian anujtukmai. Mir uwí nankaamatsain ashí nunkanmaya shuaran anañkawarain tusa túramai. Antsu mir uwí nankaasmatai ishichik tsawant ankant akupnaktiniaiti.

⁴⁻⁵ Nuyá akupin pujutainium pujuinian wainkiamjai. Tura shuara túramurin írsarat tusa kakaram sunasarmai. Tura núnisan muuke tsupirka maamu wakanincha wainkiamjai. Nusha Yusa chichamen etserainiak tura Kristu chichamencha etserin ásar maamu armái. Niisha Entsayá Yajasmancha ni nakumkamurincha tikishmatracharu armái. Núnisan náarincha ni-jiaíniumsha tura uwejniumsha anujmampracharu armái. Nu shuar ataksha nantakiar emka nantaktin tsawantnum pachiinkiarmai. Túmainiak Krístujai métek mir uwí akupeamun wainkiamjai. Antsu chikich jákaruka mir uwí nankaamatsain nantakcharmai. ⁶ Antsu emka nantaktin tsawantnum pachiinkiarua nú shuar, ti penker áimak, ti shiir warasmin áiniawai. Nu shuarka jimiará jákatniunam pachiintsuk Yusna tuke takarin tura núnisan Krístunu tuke takarin ártatui. Tura Krístujai métek mir uwí akupkartatui.

⁷ Tura mir uwí nankaasmatai uunt iwianch urani akupnaktatui. ⁸ Túram ashí nunkanmaya shuaran anañkawartaj tusa jínkittiawai. Kuk nunkanmasha tura Makuk nunkanmasha ashí pujuinia nuna anañkawartatui. Tura mesetan najanataj tusa ni suntarin nekapmar-chamnia ti untsurí irurtatui. ⁹ Tura ashí nunkan enetak Yus-shuar matsamtaincha tura Yus ti aneamu pépruncha mash éñkekarmai. Túramtai Yus nayaimpinmaya jinia akuptuk mash áesawarmai. ¹⁰ Tura iwianchi kapitiántri, nin anañkawarmia nu, asuprijiai keá ji-antumiannum apenámai. Nu yaunchusha Entsayá Yajasmasha tura Kukariá Yajasmasha, penké ántar yusnan etserniua nu, nui apenáwarmai. Nuisha tsawaisha káshisha iniañnatsuk ti wáitsartatui.

Ashí amúamunam súmamtikiatin tsawant

¹¹ Nuyá akupin pujutain úuntan tura ti pújun wainkiamjai. Tura nui pujancha wainkiamjai. Niisha ti kakaram asamtai nunkasha nayaimpisha aya menkarar tuke atsúarmai. ¹²⁻¹³ Tura túrunatsain nayaantsanam jákarua nusha jínkiarmai. Núnisan iwiarsamunam jaka pujuinia nusha jínkiarmai. Tura jákaruncha, nankaamantu arma nunasha tura penké shuar arma nunasha, ashí wainkiamjai. Tura Yusai naka wajaarmai. Nuyá ashí shuar túramu aakma papí urantrarmai. Tura nu papinium aarma nujai métek ashí ni turamurí paant nékaneakui súmamtiknawarmai. Tura chikich papisha tuke iwiaaku pujustin papí urankamai. ¹⁴ Nuyá jákatin amuukati tusa ji-antumiannum apenámai. Nu ji-antumiannum wétin jimiará jákatin tútainti. ¹⁵ Tura ashí shuar ni naari tuke iwiaaku pujustin papinium atsúarma nusha nui apenáwarmai.

21

Nayaim yamaram tura yamá nunka

¹ Nuyá nayaimpisha tura nunkasha menkaramtai nayaim yamarman tura yamá nunkancha wainkiamjai. Tura nayaantsasha atsumai. ² Wi, Juan, ti shiir péprun, Yusnumia yamaram Jerusarenkan nayaimpinmaya táarun, wainkiamjai. Anajmarma ni áishrin inkiuntaj tusa ti shiir iwiarmampra áintsan ti penker iwiamuyi. ³ Nayaimpinmaya ti kakantar chichaamun antukmajai. “Iisiá, Yus yamaikia aentsjai pujawai. Tuke niijiai pujakui ashí

ni shuari ártatui. Tura niijjai tuke pujak nekas tuke ni Yusri átatui. ⁴ Yus ni neajkin ujujturartatui. Tura nuik amia nuka ashí amuukarmatai jákatniusha, úttincha, wáitsatniusha, tura najaimiatniusha atsuttawai.”

⁵ Tura akupin pujutainium ekema nu “Iistá, Wi ashí penké yamarman nájanjai” timiai. Nuyá nu arantcha turutmiai “Juka imiá nekas asamtai aartá. Nekas enentáimtustiniaiti.” ⁶ Ataksha turutmiai “Yamaikia mash uminkiyai. Wiitjai. Yámankamtaiknumiá amúanmasha tuke pjuwitjai. Wisha A rétranmaya Y rétranam ashí retra áintsaitjai. Ashí kitima núnaka tuke iwiaaku pujutai entsan penké kuitchajai áartatjai. ⁷ Nupetmakunka ashí yamarma juna mash susattajai. Wisha ni Yusri átatjai. Núnisan niisha winia uchir átatui. ⁸ Antsu sápijka, Yúsan enentáimtichusha, yajauchin máatrasha, mankartincha, tsanir-matan pujurniusha, wawekratniusha, ántar-yusan tikishmatniusha, tura ashí wáitrincha asuprijjai keá ji-antumianum apenáwartatui. Nuka jimiará jákatin tútainti.”

Yamaram Jerusarén

⁹ Nuyá siati suntar pinin amúamunam wáitkiastinjai piakun takakua nuyá chikichik taruti túrutmiais “Winitia. Murikiu anajmarmarin iniaktustatjame.”

¹⁰ Taku mesekranam naint yakí juruki Yusnumiá ti shiir Jerusarén pepru nayaimpinmaya táarun iniaktursamai. ¹¹ Nu péprusha Yusa wincharijjai tsáapniniuyi. Nu tsáapnincha kaya ti shíirmachia núnis jaspi kaya nuní saar asa ti tsáapniniuyi. ¹² Pepru yantamesha ti yakí penkramuyi tura wáitiri tuse amai. Tura nu wáitinium suntar wajatiarmai. Nu wáitinmasha Israer-shuara uuntri tuse armia nuna naari áarmauyi. ¹³ Nantu tátainmaani menaintiu waiti amai. Nantu akatainmaani nisha menaintiu waiti amai. Nunkaanisha menaintiu waiti amai. Arakaanisha menaintiu waiti amai. ¹⁴ Ti uunt kaya tuse apujsamu armai. Tura nu ekenir penkramuyi. Nu tuse kayanam Murikiu akatramuri tuse armia nuna naari áarmauyi.

¹⁵ Suntar wijjai chichaua nu, nekapmatain kurin takakuyi. Nujai pépruncha, wáitirincha, tura penkramurincha nekapmartiniuyi. ¹⁶ Pepru esantisha wan kantisha yakirisha mash métekrak armai. Suntarsha péprun nekapmataijjai nekapmaram esantisha wan kantisha tura núnisan jeamkamu yakirisha jimiará mir jimiará siañtu (2.200) kirúmitru amai. ¹⁷ Nuyá penkrincha nekapmarmai. Suntar aents nekapmataijjai nekapmaram sesentikuatru (64) mitru amai. ¹⁸ Nu penkramusha jaspi kayajai najanamuyi. Péprusha aya kúrikiyi. Nu kuri ti penker sáarauyi. ¹⁹ Pen apujtukma kayasha ti shiir kaya ainia nujai najanamu asa ti shiir iwiamuyi. Emka nu jaspi káyauyi. Jimiara nusha sapiru káyauyi. Menaintia nusha ákata káyauyi. Kuatrua nusha ismirártauyi. ²⁰ Senkua nusha únise káyauyi. Saisa nusha kurnarinia káyauyi. Siatia nusha krisuritiu káyauyi. Uchua nusha periru káyauyi. Nuiwia nusha tupasiu káyauyi. Tiasa nusha krisuprasa káyauyi. Áuntsea nusha jasentu káyauyi. Tusea nusha amatista káyauyi. Ti kayaim apujsamu asamtai ti shíirmachiiyi. ²¹ Pepru wáitiri tuse ainia nu, ti shiir nayaantsanmaya shaukjai chikichik najanamu armai. Pepru jintisha aya kúrikiyi. Nu kuri ti penker sáarauyi.

²² Yusa Uunt Jeecha wainkiachmajai. Antsu nu peprunam Uunt Yus ashí tujincha nu tura núnisan Muriksha nu péprun pímiutkui takamtsuk Niiniuyi. ²³ Nu péprunmasha tsawai-nantusha kashí-nantusha atsumchamai. Antsu Yusa winchari tsáapin awajmiais. Núnisan Muriksha tsáapin awajmiais. ²⁴ Nu tsáapnijjaisha ashí nunkanmaya shuar wekasartatui. Tura ashí nunkanam akupin ainia nusha nu yujainiak ni penkerijjai nuna shiir awajtuiniawai. ²⁵ Tura kashi atsá asamtai tuke tsawaiti. Tuma asamtai

wáitirí tuke epenchamu ártatui. ²⁶ Tura ashí nunkanam péñker ana nuna nuí itiaartatui. ²⁷ Tura yajauchikia penké wayashatatuí. Muíjmiainian túrincha tura anankartincha penké wayachartatuí. Antsu áyatik shuar tuke iwiaaku pujutai papinium naarí aarma ainia nuke wayawartatuí. Nu papincha Murik takakui.

22

¹ Nuyá suntar tuke iwiaaku pujutai entsan ti sáaran iniaktursamai. Nusha uunt akupin pujutainmaya ti saawi jijnmíai. Nu pujutaisha Yusna tura Muriknauyi. ² Pepru jintincha tura entsá mai paen tuke iwiaaku pujutai numi wajamai. Nusha ashí tuse nantutin neremai. Ni nukeshashí nunkanmaya shuar tsuámatainti. ³⁻⁴ Ashí yajauchia nuka atsuttawai. Uunt akupin pujutai, Yúsnasha Murikniasha, nuñ aa asamtai ni shuarí ti paant wainiainiak tikishmatrartatuí. Tura nijiaíncha ni naarí anujmankartatuí. ⁵ Tura káshisha atsuttawai. Nuí pujuinia nuka shiripkincha etsancha atsumchartatuí. Uunt Yúsak tuke tsáapin awajtiatui. Tura ni shuarí tuke iniannatsuk akupkartatuí.

Jesukrístu tátinrí penké nuntumsai

⁶ Nuyá suntar turutmíai “Ju chicham ti nekas asa nekas enentáimtusminiaiti. Uunt Yus yaunchu níiniun etserniun ni chichamen enentáimtikramia núnisan yamaikia ni suntarin akuptuk wárik túrunatta nuna ashí ni shuarin ujakuítí.”

⁷ “Ti wárik winittiajai” tawai Murikkia.

Shuar ju papinium Yusa Chichame áarman umirna nuka shiir warasminiaiti.

⁸ Wi, Juan, juna mash íisan mash antukmajai. Tura mash íisan antukan nayaimpinmaya suntar iniaktursama nuna shiir awajsataj tusan tikishmatramjai. ⁹ Túram turutmíai “Penke áinkiaip. Wisha Yusa yáinríntjai ámijiaí métek tura yatsumijiaí métek. Yúsnan etserin ásar tura ju papinium áarma nuna umirainiak Yusa yáinrí áiniawai níisha. Yúsak shiir awajsatniúiti.”

¹⁰ Nuyá ataksha turutmíai “Ju papinium aarma Yusna asamtai úukam ikiusaip. Ashí túrunatin tsawant ishichik ajatesai. ¹¹ Nu jeatsainkia yajauch shuarka tuke yajauch túruki wetí. Núnisan muíjmiainian túraka tuke túruki wetí. Antsu péñkeran túraka péñkeran túruki wetí. Núnisan esetar enentáimniusha tuke esetar Yusjai wekasati.”

¹² Muriksha tawai “Eta, ti wárik winittiajai. Túran ti shíirmachin ashí péñker túramujai métek súsatniua nuna takukin winittiajai. ¹³ Wiitjai. Yámankamtaiknumia amúanmasha tuke pujuwitjai. Wisha A rétranmaya Y rétranam ashí retra áintsaitjai.” Tu tawai.

¹⁴ Ni pushirí péñker nijiamatniua núnisan péñker túrinia nú shuar shiir warasminiaiti. Nu shuar nu pepru wáitirincha wayamniaiti. Túrar tuke iwiaaku pujutai numinmaya yuamniaiti. ¹⁵ Tura antsu Yúsan enentáimtachuka, wawekratniuka, tsanirmatan pujurainia nuka, mankartinkia, ántar-yus tikishmatniuka, tura ashí shuar wáitian wararainiak tuke túrin ainia nuka aa matsatainiak penké wayachmin áiniawai.

¹⁶ “Wi, Jesus, ashí Yus-shuaran ujakarat tusan winia suntarun akupkajai. Wikia Tawit Weeitjai. Túrasha Tawitia Úunríntjai. Wikia ti tsáapin yaa, yankuamia áintsanketjai.” Tu tawai.

¹⁷ Yusa Shiir Wakanísha tura Murik anajmarmasha “Winitiarum” tuiniawai.

Tura juna ántana nusha “Winitiarum” tití. Tura ashí kitiama nuka winití. Wakerakka tuke iwiaaku pujutai entsan penké kuítchajai umartí.

¹⁸ Ashí shuar ju papinium Yus-Chicham aarma nuna antukarun juna ujaajai: Shuar juí áarman chikichan pataakka Yus nin ti wáitsatin juí aarma nuna patattsattawai. ¹⁹ Núnisan shuar juí aarman emeneakuinkia Yus ni naarin iwiaaku pujutai papiniumia jampirattawai. Tura ti shiir péprunam wayatniun suritkiattawai. Nu péprusha tura nu papisha juí paant ujakma áiniawai.

²⁰ Jú papí áantratniun ujakua nu tawai “Eta, ti wari winittiajai.”
Pai, núnisan atí. Wari winitia, Uunt Jesúsá.

²¹ Ii Uuntri Jesukrístu atumniasha shiir yainmakarti.
Nuke atí.